


Xti'idza' Diuzi



New Testament in Zapotec, Choapan (MX:zpc:Zapotec, Choapan)

# Xti'idza' Diuzi

## New Testament in Zapotec, Choapan (MX:zpc:Zapotec, Choapan)

copyright © 1986 Wycliffe Bible Translators, Inc.

Language: Zapotec, Choapan

Translation by: Wycliffe Bible Translators, Inc.

Zapoteco, Choapan [zpc], Mexico

### Copyright Information

© 1986, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Zapotec, Choapan

© 1986, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
f44721e8-d767-55bd-8bcb-f1eb4965c7c2

## Contents

San Mateo . . . . .	1
San Marcos . . . . .	63
San Lucas . . . . .	104
San Juan . . . . .	173
Hechos . . . . .	223
Romanos . . . . .	287
1 Corintios . . . . .	315
2 Corintios . . . . .	341
Gálatas . . . . .	358
Efesios . . . . .	368
Filipenses . . . . .	378
Colosenses . . . . .	384
1 Tesalonicenses . . . . .	390
2 Tesalonicenses . . . . .	395
1 Timoteo . . . . .	398
2 Timoteo . . . . .	406
Tito . . . . .	411
Filemón . . . . .	415
Hebreos . . . . .	417
Santiago . . . . .	438
1 Pedro . . . . .	445
2 Pedro . . . . .	452
1 Juan . . . . .	456
2 Juan . . . . .	462
3 Juan . . . . .	463
Judas . . . . .	464
Apocalipsis . . . . .	466

## DI'IDZA' LA' IYA BZU SAN MATEO LÈ'È GUICHI

### *Ni rnèn quie xuzixta'o Jesucristo*

*(Lc. 3.23-38)*

<sup>1</sup> Ni rguixogue'n quie ja xuzixta'o Jesucristo. Naca Abraham len rey David xuzixta'o Jesucristo.

<sup>2</sup> Abraham guquè' xuzi Isaac, na' Isaac guquè' xuzi Jacob, na' Jacob guquè' xuzi Judá len ja bichinë'.

<sup>3</sup> Na' Judá guquè' xuzi Fares len Zara, na' lao zna'jè' Tamar. Na' Fares guquè' xuzi Esrom, na' Esrom guquè' xuzi Aram.

<sup>4</sup> Na' Aram guquè' xuzi Aminadab, na' Aminadab guquè' xuzi Naasón, na' Naasón guquè' xuzi Salmón.

<sup>5</sup> Na' Salmón guquè' xuzi Booz, na' lao zna'nè' Rahab. Na' Booz guquè' xuzi Obed, na' lao zna'nè' Rut. Na' Obed guquè' xuzi Isaí.

<sup>6</sup> Na' Isaí guquè' xuzi rey David, na' rey David lènè' zgula Urías gucajè' xuzi zna' Salomón.

<sup>7</sup> Na' Salomón guquè' xuzi Roboam, na' Roboam guquè' xuzi Abías, na' Abías guquè' xuzi Asa.

<sup>8</sup> Na' Asa guquè' xuzi Josafat, na' Josafat guquè' xuzi Joram, na' Joram guquè' xuzi Uzías.

<sup>9</sup> Na' Uzías guquè' xuzi Jotam, na' Jotam guquè' xuzi Acáz, na' Acáz guquè' xuzi Ezequías.

<sup>10</sup> Na' Ezequías guquè' xuzi Manasés, na' Manasés guquè' xuzi Amón, na' Amón guquè' xuzi Josías.

<sup>11</sup> Na' Josías guquè' xuzi Jeconías len ja bichinë' tiempo cati unita' ben' Babilonia cati yahua'ajè' preso ben' Israel lao yedyi quiejè'.

<sup>12</sup> Te beyudyi na', Jeconías guquè' xuzi Salatiel, na' Salatiel guquè' xuzi Zorobabel.

<sup>13</sup> Na' Zorobabel guquè' xuzi Abiud, na' Abiud guquè' xuzi Eliaquim, na' Eliaquim guquè' xuzi Azor.

<sup>14</sup> Na' Azor guquè' xuzi Sadoc, na' Sadoc guquè' xuzi Aquim, na' Aquim guquè' xuzi Eliud.

<sup>15</sup> Na' Eliud guquè' xuzi Eleazar, na' Eleazar guquè' xuzi Matán, na' Matán guquè' xuzi Jacob.

<sup>16</sup> Na' Jacob guquè' xuzi José, ben' quie María, na' María guquè' zna' Jesús, ben' naca Cristo.

<sup>17</sup> Lao tiempo uzu Abraham hasta bdyinnan tiempo uzu rey David, udaohue chida' tiempo unita'jè'. Lëscan' lao tiempo uzu rey David hasta bdyinnan tiempo yehua'a ben' Babilonia ben' Israel preso yedyi quiejè', udaohue itu chida' tiempo unita'jè'. Lëscan' lao tiempo yehua'a ben' Babilonia ben' Israel preso yedyi quiejè' hasta bdyinnan tiempo golo Cristo, udaohue itu cue' chida' tiempo unita'jè'.

### *Ni rnèn cati golo Jesucristo*

*(Lc. 2.1-7)*

<sup>18</sup> Caora cati golo Jesucristo guca caniga: Zna'nè' María napè' compromiso utzagana'lènè' José. Pero antes binesi' laguedyijè' sujè' tuze, caora na' gucabè' José banu'a María xcuidi'. Pero por nun quie Bichi Be quie Diuzi nu'anè' xcuidi'.

<sup>19</sup> José naquë' ben' huen bire'ennë' gaohuë' María xquia lao yedyi. Re'ennë' usannë' lenë' sin que inezi ja benë'.

<sup>20</sup> Tu racanë' pensari bi huenë', cati ptilalao tu ángel quie Diuzi lenë' lao bichi gala quië'. Na'ra una ángel rëbinë' lëbë':

—José, zi'i suba David luë', bidzebo' siu' María gacanë' zgulo', porque nun quie Bichi Be quie Diuzi banu'anë' xcuidi'.

<sup>21</sup> Lëbë' su tu zi'inë', na' huelo' laobi' JESUS. Cana' huelo' laobi' porque zi'inë' ute uselabi' dula' xquia quie ben' yedyi quiebi'.

<sup>22</sup> Yugulu cabë' guca na', bzunan di'idza' quie Diuzi cabë' una Diuzi lao na'a tu ben' udxogue' xti'idza'në' tiempote. Cani unë' dza na':

<sup>23</sup> Huazu tu nigula cuidi', ben' binesulë be'mbyu, hua'anë' tu zi'inë'.

Na' si' laobi' Emanuel.

Ta inaro xti'idza'ro: Zëlë Diuzi ra'o.

<sup>24</sup> Cati udëlebë José lao bichi gala quienë', bënë' cabë' gudyi ángel quie Diuzi lëbë'. Aozi'në' María para zgulanë'.

<sup>25</sup> Pero biuzulënë' lëbë' cabë' rzulë ja benë' zgulajë' hasta que golo zi'inë' nëro. Na' bënë' lao zi'inë' JESUS.

## 2

### *Uyo ben' psëdi quie bélo yena'jë' Jesús*

<sup>1</sup> Cati golo Jesús lao yedyi Belén ga nebaba Judea, caora na' uzu tu ben' lao Herodes naquë' rey. Na'ra bdyin ja ben' za' zaca' ga rlë obidza, bdyinjë' ciudad Jerusalén. Nacajë' ben' psëdi quie bélo.

<sup>2</sup> Na'ra unabajë':

—¿Gazi zu rey quie ben' Israel, ben' zagolo? Nita'ndo' zaca' ga rlë obidza blë'ëndo' bélo ta naca seña golobi'. Quie lena' za'ndo' ta gapala'nndo'bi'.

<sup>3</sup> Cati unezi rey Herodes cabë' unayaquë', lega ptëbi pensari quienë' lëbë'. Lëscan' yugulu ja ben' ciudad Jerusalén, lega ptëbi pensari quiejë' lëjë'.

<sup>4</sup> Na'ra guzi rey Herodes yugulu ja xan' pxuzi len ja ben' rusëdi ja ley rnao ben' Israel. Na' unabanë' rëbinë' lëjë':

—¿Gan' galo ben' naca Cristo?

<sup>5</sup> Na' ra unajë' rëbijë' lëbë':

—Galoguë' yedyi Belén ga nebaba Judea, porque cani rnën lë'ë guichi bë profeta dza na'te:

<sup>6</sup> Le'e ben' yedyi Belén quie yu nebaba Judá, ba'ala'cazi naca yedyi quiele yedyi dao', hualo ladole tu ben' inabë'ra, ben' inabë' ben' Israel, ben' quie Diuzi.

Cana' rnën lë'ë guichi.

<sup>7</sup> Na'ra balarazi guzi rey Herodes yaca ben' psëdi quie bélo. Unabanë' lëjë' dyë'ëdi bi tiempo golo bélo.

<sup>8</sup> Na' use'ela'në' lëjë' Belén rëbinë' lëjë':

—Uletzio Belén inabale dyë'ëdi bi raca quie xcuidi'. Cati babedzelelebi' nadetixogue'le në'ëdi' tacuenda guidaria' gapala'na'bi'. —Cana' unanë' rëbinë' lëjë'.

<sup>9</sup> Te beyudyi una rey Herodes gudyijë' lëjë' cana', na'ra zio ben' psëdi quie bélo. Na'ra lëbélo blë'ëjë' caora nita'jë' zaca' ga rlë obidza, udyialaona laojë' hasta que bdyinnan laohue ga zu xcuidi'.

<sup>10</sup> Cati blë'ëjë' ga bdyin bélo, lega bedaohuetzeguejë'.

11 Caora uyu'ujë' lu'u yu'u, blë'ëjë' xcuidi' lëbi' zna'bi' María. Na'ra udituzibijë' udapala'një' bdao' na'. Na'ra laosalotejë' caja quiejë' nu'ajë', bë'jë'bi' regalo ta nu'ajë', bë'jë'bi' oro len yalo len ja aceite zio.

12 Beyudyi na', guca tu chopa dza nita'jë' na' cati uxusajë' de que bireya'ala' yeyojë' gan' uza'jë', gan' re' rey Herodes. Quie lena' uzi'jë' neza tula zeyojë' yedyi quiejë'.

*Bzuno José lënë' familia quienë' yedyi tula*

13 Ude beyudyi beza' ja ben' psëdi quie bélo yena'jë' xcuidi', na'ra uxusa José blë'ënë' tu ángel quie Diuzi rëbinë' lëbë':

—Uyasabachi' udë'ëla' bdao' na' len zna'bi'. Uzunolëlo'bi' tziola'obi' yu nebaba Egipto. Na' yega'nla'obi' hasta que inia' luë' gala tzio', porque rey Herodes hueguiloguë'bi' ta gutië'bi'.

14 Na'ra udelebë José, uyananë', uzi'në' xcuidi' len zna'bi' lao rëla ziojë' yu nebaba Egipto.

15 Na'zi bega'një' ulezajë' uzujë' hasta que bdyin hora guti rey Herodes. Cana' guca tacuenda bzu di'idza' quie Diuzi cabë' gudyinë' profeta rëbinë' lëbë' cani: “Yu nebaba Egipto babeyëza' zi'ina' yerobi'.”

*Na'ra bë' rey Herodes mandado gati ja xcuidi'*

16 Cati gucabë' rey Herodes uzi' ja yë' ben' psëdi quie bélo, na'ra bdza'në', bënë' mandado gati ja xcuidi' de chopa iza huio para zanle, bi' necua' Belén len ja bi' necua' yedyi rega'n ga'ala'. Cana' bënë' mandado según cabë' tiempo una ja ben' psëdi quie bélo gudyijë' lënë'.

17 Cana' bzu di'idza' quie profeta Jeremías caora unë':

18 Yero tu rchi' ja ben' yedyi Ramá, rbedyijë' rnaya'jë'. Na' rbedyi ja nigula quie ja ben' Israel por nun quie zi'ijë'. Bireyudycazi cuedyijë' ta yezujë' gusto dan' aguti zi'ijë'.

19 Pero bë' beyudyi guti rey Herodes, caora na' ptilalao tu ángel quie Diuzi lao bichi gala quie José ga zunë' yedyi nebaba Egipto. Na'ra gudyinë' lëbë':

20 —Uyasa, uzi'lë xcuidi' len zna'bi'. Uleyozi lao yedyi nebaba Israel, porque aguti yaca ben' re'en guti xcuidi'.

21 Na'ra uyasa José uzi'në' xcuidi' len zna'bi', ziolënë' lëbi' lao yedyi ga nebaba Israel.

22 Pero cati unezi José rnabë' Arquelao lao laza xuzinë' Herodes, na'ra bdzebinë' yeyonë' na'. Bdzebinë' como dan' aoxusanë' ta bitzionë' estado Judea. Quie lena' zionë' estado Galilea.

23 Caora bdyinnë' na', na'ra zionë' tzesunë' yedyi Nazaret. Cana'ra bzu di'idza' quie ja profeta ca unajë' de quie ina ja benë' naca Jesús ben' yedyi Nazaret.

### 3

*Udixogue' Juan bautista xti'idza' Diuzi lao lato dachi ga bidyia yu'u  
(Mr. 1.1-8; Lc. 3.1-9, 15-17; Jn. 1.19-28)*

1 Na'ra uyo Juan bautista yu nebaba Judea ga naca lato dachi. Uyonë' yetixogue'në' ja benë' xti'idza' Diuzi.

2 Na'ra në' rëbinë' lëjë':

—Reya'ala' utza'le pensari quiele usanle ca tamala ruele, porque baruen bago dza inabë' Diuzi lao yedyi layu.

3 Quie Juan unë' profeta Isaías caora unë': Huazu ben' na' lao lato dachi ga bidyia yu'u. Huanë' zidzo rëbinë' laguedyinë' caniga:

“Huele hueluba neza quiele cuenda huida ben' naca xa'nro, usalole tu neza li.”

4 Guco Juan la'ari' de guitza' quie zaba camello. Na' tu cincho guidi bdze'nè' lè'è'nè'. Udaonè' bëchi'zù, hue'enè' bdyin'dao' quie bezu cera ta rdzela guixi' dao'.

5 Na' rio ja ben' Jerusalén rena'jè' ruzè'nagajè' quienè'. Lèzi rio ja ben' yedyi nebaba Judea len ja ben' nita' ga'ala' ga de yao Jordán.

6 Caora na' cati uxubalèpijè' dula' xquia quiejè', na'ra bè' Juan laojè' lu'u yao Jordán.

7 Cati blè'è Juan bdyin ja ben' partido fariseo len ja ben' partido saduceo za'jè' gan' ru'e Juan lao ja benè', na'ra nè' rëbinè' lèjè':

—Ja bëla rgui'idyi' benè' nacale! ¿Nuži udixogue' le'e ta te ilale cabè' castigo quie Diuzi baza' ga'ala'zi?

8 Ulehue dya'a ta ulu'en nacan li aotza' pensari quiele, aruele quie Diuzi.

9 Bihue pensari bihue Diuzi le'e castigo por nun quie nacale ži'i suba Abraham. Porque rnìa' le'e hasta yo huaca hue Diuzi ben' gaca ži'i Abraham.

10 Ca quie yebandyo baden listo para ichugon yaga ta birbia tazixi ta tzeina, cana' nacarèn quiele. Chi bihue quiele xti'idza' Diuzi ca rnènè', huata' castigo quiele tzirole lao gui' gabila.

11 Nè'èdi' tali ru'a lao benè' conlè nisa yela' gacajè' seña de que aotza' pensari quiejè' aruejè' quie Diuzi. Pero baza' tu ben' zaza'ra zenao nè'èdi'. Lèbè' udze'nè' Bichi Be quie Diuzi lu'u guicho laxta'o ja ben' rale quienè'. Lèzi huenè' mandado tzei yaca ben' birale quienè' lao gui' gabila. Nacarè' ben' ze ca nè'èdi'. Tanto nacarè' ben' ze ca nè'èdi', ni siquiera biyeyažoga' cuioga' guidi yu'u ni'anè'.

12 Bazènè' becue' ta ucha'anè' trigo len bëbi quien. Na'ra yezi'chi'nè' trigo lu'u lidyin. Yeyudyin na' uzeinè' bëbi quien lao gui' ta biyeyulacazi.

### *Bè' Juan lao Jesús*

*(Mr. 1.9-11; Lc. 3.21-22)*

13 Na'ra uza' Jesús yu nebaba Galilea bdyinnè' ga de yao Jordán ga zu Juan cuenda hue' Juan laonè' lèbè'.

14 Na' bigu'un Juan hue'nè' lao Jesús. Lena' unè' gudyinè' Jesús:

—Luè'la reya'ala' hue'lo' laohua'. ¿Na' como bazao' niga ta hua' laolo'?

15 Na'ra una Jesús rëbè' Juan:

—Reya'ala'cazi hue'lo' laohua', porque cana' re'ennan huero ta uzuro duze cabè' una Diuzi.

Na'ra guca Juan de acuerdo, bë'nè' lao Jesús.

16 Na'ra beyudyi bë' Juan lao Jesús, bero Jesús lu'u nisa. Caora na' laoyalote guibá blè'è Jesús uyèzi Bichi Be quie Diuzi ca quie ga rëzi paloma. Bdyinnè' ga zè Jesús.

17 Na'ra unè Diuzi ga zuè' guibá unè':

—Lèzi'ina' ni, nedyè'èda'bi'. Redaohueda' zua' gusto conlè lèbi'.

## 4

### *Gu'un xan' taxi'ibi' iquixi Jesús huenè' tamala*

*(Mr. 1.12-13; Lc. 4.1-13)*

1 Na'ra guca dza uquiè' Bichi Be quie Diuzi Jesús lao lato dachi ga bidyia yu'u. Na' lao lato na' bdyinrè xan' taxi'ibi' gu'unna iquixi Jesús huenè' tamala.

2 Lègan' na' bega'n Jesús chopa galo dza len chopa galo yela, biudaohuè'. Bè' guca lao chopa galo dza, na' uduenè'.

<sup>3</sup> Na'ra ubiga' xan' taxi'ibi' gan' zë Jesús rëbina lënë':

—Chi naco' zi'i Diuzi, bë mandado iyaca yo niga yëta xtila.

<sup>4</sup> Na'ra una Jesús rëbinë' taxi'ibi':

—Lë'ë guichi la'iya quie Diuzi nan ca niga: “Quele tuzi yela' huao gaoro yezi'ro fuerza, den' lëscan' ruen dyiabë' hue quiero ca na Diuzi ta yezi'ro fuerza.”

<sup>5</sup> Na'ra uquië' taxi'ibi' Jesús lao yedyi la'iya Jerusalén. Na'ra pcuëna lënë' guicho idao' rñabë'ra.

<sup>6</sup> Na' rëbinan lënë':

—Chi tali naco' zi'i Diuzi, uquino cuinlo' guicho idao'. Bibi zi' gaquelo', como dan' na guichi la'iya quie Diuzi ca niga:

Ise'ela' Diuzi yaca ángel quienë' ta gapajë' luë'.

Huidajë' idehuia ina'jë' luë' cuenda ni lë'ëti' bigaco' zi' chan' na' ga re' yo.

<sup>7</sup> Na'ra una Jesús gudyinë' xan' taxi'ibi':

—Lëzi narë lë'ë guichi la'iya quie Diuzi: “Bihuenële Diuzi bizinaquezi chi uzunë' di'idza' cabë' unë', chi biuzunë' di'idza' cabë' unë'.”

<sup>8</sup> Tatula uquië'cazi taxi'ibi' lënë' lao ya'a sibi gula. Blu'enan lënë' duzete yedyi de lao yedyi layu. Blu'enan lënë' cabë' naca yela' ze quien.

<sup>9</sup> Na'ra una xan' taxi'ibi' rëbin lënë':

—Duzeten guna' quio' chi quitzo' zibo' tzionla'adyo' në'ëdi'.

<sup>10</sup> Cana'ra una Jesús rëbinë' lënan:

—Beyo, Satanás, porque lë'ë guichi la'iya quie Diuzi nan caniga: “Tzionla'adyi'ro tuzi Diuzi quiero. Tuzi lëbë' huero ca mandado ruenë' quiero.”

<sup>11</sup> Na'ra zeyo taxi'ibi' gan' zë Jesús. Na' laza'te ja ángel, gualcälëjë' lëbë' ta yezi'në' fuerza.

### *Uzulao Jesús ruenë' dyin quie Diuzi estado Galilea*

(Mr. 1.14-15; Lc. 4.14-15)

<sup>12</sup> Cati unezi Jesús de Juan lu'u dyiguiba, bebi'në' zeyoguë' yu nebaba Galilea.

<sup>13</sup> Pero bibega'nnë' yedyi Nazaret, uyoguë' yesunë' yedyi lao Capernaum ga re' ru'a lagun ga naca beza' quie yu nebaba Zabulón len yu nebaba Neftalí.

<sup>14</sup> Cana' guca' ta bzu di'idza' quie Diuzi bzu profeta Isaías lë'ë guichi tiempote. Cani rñën:

<sup>15</sup> Lao yu nebaba Zabulón len yu nebaba Neftalí, ga de neza zion ru'a lagun itzala' yao Jordán, ga re' yu nebaba Galilea, lao yu na' nita' ben' binaca ben' Israel.

<sup>16</sup> Lëja ben' na' rdajë' lao lato lao chula, pero aose'ela' Diuzi ben' gacalë lëjë' cabë' racalë xni' gui' lëjë' ta ilë'ëjë' ga naca chula.

Lëja ben' na' rdajë' lao lato lao chula, pero use'ela' Diuzi ben' gacalë lëjë' cabë' racalë xni' gui' lëjë' ta ilë'ëjë' ga naca chula.

<sup>17</sup> Caora na' uzulao Jesús udixogue'në' benë' xti'idza' Diuzi unë':

—Reya'ala' utza'le pensari quiele, porque baruen bago dza inabë' Diuzi lao yedyi layu.

### *Blidza Jesús tapa ben' rze bela*

(Mr. 1.16-20; Lc. 5.1-11)

<sup>18</sup> Zio Jesús yu'unë' neza zaca' ru'a lagun Galilea. Na' blë'ënë' chopa ben' rze bela. Tunë' laonë' Simón, ben' laorë Pedro. Na' itunë' laonë' Andrés. Naca Andrés bichi Simón. Na' yu'ujë' rulëtojë' yëxo lu'u nisa.

<sup>19</sup> Na'ra una Jesús gudyinë' leyaquë':



—Ulenao në'edi!. Cabè' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

<sup>20</sup> Laohue na'tezi lapsantejë' yëxo quiejë' ziolëjë' Jesús.

<sup>21</sup> Lë'ëti'zi ude Jesús zioquë' mazara cati blë'enë' ichopa ja benë' naca bichë'. Tunë' laonë' Santiago, itunë' laonë' Juan. Nacayaquë' zi'i Zebedeo. Yu'ujë' lao barco len xuzijë' ruda'jë' yëxo quiejë'. Na'ra blidza Jesús lëjë' ta unaojë' lëbë'.

<sup>22</sup> Na'ra lapsanrëtejë' barco len xuzijë' ziolëjë' Jesús.

### *Bzioñe'e Jesús ben' zë*

*(Lc. 6.17-19)*

<sup>23</sup> Zio Jesús yugulu yedyi nebaba Galilea. Ruzioñe'enë' benë' lu'u idao' quiejë' laonan sinagoga tu tu yedyi ga rdenë'. Udixogue' Jesús ca naca tahuen quie xti'idza' Diuzi baruen bagozi dza inabë' Diuzi yedyi layu. Lëscan' beyue Jesús yugulu cue' yela' hue' yu'u ja benë'.

<sup>24</sup> Nezijë' quie Jesús yugulu ben' nita' yedyi nebaba Siria. Na' uquië'jë' yaca ben' redzagalaoja bitezi yela' hue', len ben' yu'u ja taxi'ibi', len ben' raca žuguti, len ben' naži. Na'ra beyue Jesús lëjë'.

<sup>25</sup> Zë ja ben' unao Jesús. Unao ben' yedyi nebaba Galilea, len ben' yedyi nebaba Decápolis, len ben' ciudad Jerusalén, len ben' yedyi nebaba Judea, len ben' nita' yedyi re' itzala' yao Jordán. Tu cana' ja yedyi udaojë' lënë'.

## 5

### *Zu Jesús tu lao ya'a ruzioñe'enë' benë'*

<sup>1</sup> Cati blë'ë Jesús babegu'udi' ben' zë, na'ra urënë' tu lao ya'a ure'në'. Na'ra beyëcho ja ben' quienë' lënë'.

<sup>2</sup> Cana' uzulao Jesús ruzioñe'enë' lëjë'.

### *Ni rnën quie nu ja ben' huaca huen quie lao Diuzi*

*(Lc. 6.20-23)*

Na' una Jesús:

<sup>3</sup> —Yedaohue nu yaca ben' raca yëchi' ca naca dula' xquia quie, dan' naque quiejë' ga rnabë' Diuzi.

<sup>4</sup> Yedaohue nu yaca ben' raque bayëchi' quie dula' xquia ta raca lao yedyi layu, dan' yeyuežela'adyi' Diuzi lëjë'.

<sup>5</sup> Yedaohue nu yaca ben' gaxo, dan' gaque quieyaquë' layu gan' una Diuzi hue'në' lëjë'.

<sup>6</sup> Yedaohue nu yaca ben' re'en inao xneza Diuzi cabë' re'en gao yo'o nu ben' rdue rbili, dan' Diuzicazi gacalënë' lëjë' ta inaoyaquë' xnezë'.

<sup>7</sup> Yedaohue nu yaca ben' reyëchi'la'adyi' ben' tula, dan' yeyëchi'la'adyi' Diuzi lëjë'.

<sup>8</sup> Yedaohue nu yaca ben' anaca yëri laxta'ohue, dan' hualë'ëyaquë' Diuzi.

<sup>9</sup> Yedaohue nu yaca ben' rue dyiabë' cue' chizi laxta'o benë', dan' huëbi Diuzi leyaquë': “Zi'ina' le'e.”

<sup>10</sup> Yedaohue nu yaca ben' racatzegue tamala quie por nun quie ruejë' ca re'en Diuzi, dan' naque quiejë' ga rnabë' Diuzi.

<sup>11</sup> Yedaohuele le'e cati inaya' benë' le'e huenëjë' le'e bizinaquezi, si'jë' le'e yë', inëjë' quiele por nun quie naole xneza'.

<sup>12</sup> Yedaohuele sule gusto como dan' huata' tu tahuen gula quiele gun Diuzi le'e guibá. Yaca ben' profeta, ben' use'ela'Diuzi, bizinaquezi psaca'rë ja benë' lëjë' dza tiempote tu binenita'le.

*Ca quie zedi', ca quie gui', naca ben' nao xneza Jesús  
(Mr. 9.50; Lc. 14.34-35)*

Na' una Jesús:

13 —Ca quie nu zedi' naca quiele. Pero chan' na' abeyula zedi', ¿biži huero ta huen dyin tatula? Bira gue'ennan huenan dyin. Anacan zi ta chu'unron ta utzutzu ulio benë' len.

14 'Ca quie nu gui' ta ilë'ë benë' ga naca chula, cana' naca quiele. Tu yedyi re' lao ya'a, bigaca igüi'onan ta biilë'ëron.

15 Nunu rusë gui' candil uzulen ta iseni'na lu'u cajón. Reya'ala' uzëron tu lu'u yu'u ga naca sibi cuenda ilë'ë ja yugulu ben' yu'u lu'u yu'u.

16 Cana' naca quiele, reya'ala' tale dyë'ëdi lao ja benë' tacuenda ilë'ëjè' ruele tadya'a ca re'en Diuzi huele. Cana' hue ja benë', huejè' ben' ze Xuziro Diuzi, ben' zu guibá.

*Udixogue' Jesús cabë' naca lao ley*

Na' una Jesús:

17 —Bigaquele chi za'a chu'una' ley quie Diuzi ta bënë'në' Moisés. Quele za'a chu'una' cabë' ta una ja profeta, dechan' za'a ta uzua' di'idza' cabë' bzujë' lë'ë guichi la'ya quie Diuzi.

18 Tali ca rnia' le'e, tu lala nede guibá len yedyi layu, ni lë'ëti' ta rna lao ley biten cana'zi. Uzu di'idza' quien yugulute ca rnan.

19 Quie lena' nu ben' birue bala ruzu di'idza' ca mandado rue lë'ë guichi la'ya quie Diuzi, lëscan' rusëdijë' ben' tula ta bihuejè' bala ca mandado ruen, nacajë' ben' latoquiëzi ga r nabë' Diuzi guibá. Pero nu ben' rue bala ruzu di'idza' ca mandado rue lë'ë guichi la'ya quie Diuzi, lëscan' rusëdijë' ben' tula ta huejè' bala ca mandado ruen, nacajë' ben' bala'ana ga r nabë' Diuzi guibá.

20 Porque rnia' le'e, chi bihue quiele quie Diuzi dya'ara, quele cabë' rue ja ben' rusëdi ley quie Moisés len ja ben' partido fariseo, bisaque' yeyole ga r nabë' Diuzi guibá.

*Una Jesús quie yela' rdza'  
(Lc. 12.57-59)*

Na' una Jesús:

21 —Banezile ca gudyi Moisés xuzixta'oro: “Bireya'ala' gutile benë'. Nutezi ben' ruti benë', reya'ala' ichugobë'le quië'.”

22 Pero në'ëdi' rnia' le'e, nutezi ben' idza' bichi laguedyi, huachugobë' Diuzi quië'. Lëscan' nutezi ben' inaya' bichi laguedyi, huarugobë' quië' ga reyudyi yela' r nabë'. Lëscan' nutezi benë' idza' bichi laguedyi yëbinë' lëjè': “Ben' raca loco luë'” zudyizi ruen quienë' tziönë' lao gui' gabila.

23 'Chi zio' nu'alo' gun quio' ru'aba lu'u idao', na' yeza'la'adyo' de ta de quie bichi laguedyo' conlë luë',

24 na'ra pca'n gun quio' lao ru'aba na'zi, zatziolo' tzeguë'zela'adyo' bichi laguedyo'. Na'tera yebi'lo' hue'lo' gun quio' lao ru'aba.

25 'Chi nu ben' rao xquia le'e, iquië'jè' le'e lao juzgado, tu neziolë tu neza, bënë' di'idza' bichi laguedyile, a ver nacala yega'nle yela' bitziolë lao juez. Porque si no, hue juez mandado policía quië', udze'jè' le'e lu'u dyiguiba.

26 Di'idza' li rnia' le'e, biyerole lu'u dyiguiba hasta que udyiale dumi ca ta inaba juez le'e.

*Una Jesús quie ben' rdalë nigula tula, ben' binaca zgule*

Na' una Jesús:

27 —Banezile cabë' una xuzixta'oro Moisés cana'te: “Bireya'ala' talële nigula tula.”

28 Pero në'èdi' rnia' le'e, nutezi ben' rebane ja nigula re'ennè' bi huenè' lènè' nigula, na' lu'u guicho laxta'ohuè' nacan ca quie bagusilëcazinè' lènè'.

29 'Pues ugunro chi tu laolo' yebè ruhua'n luè' dula' xquia, reya'ala' cuiolo'n chu'unlo'n zitu', como dan' dya'alan' initi tu laolo', quele ca ta tzio' dužetio' lao gui' gabila.

30 Lëzi ugunro chi na'alo' yebè ruhua'n luè' dula' xquia, reya'ala' ichugo'n uru'unnan, como dan' dya'alan' initi tu na'alo' quele ca ta tzio' dužetio' lao gui' gabila.

*Una Jesús quie ben' rusan ja nigula quie*

(Mt. 19.9; Mr. 10.11-12; Lc. 16.18)

Na' una Jesús:

31 —Lëscan' una xuzixta'oro Moisés dza na'te: “Nutezi ben' re'en usan nigula quie, reya'ala' ichisanè' guichi ga ru'en di'idza' bira re'ennè' sulènè' nigula. Reya'ala' hue'nè'n nigula quienè', na'tera huazaquè' usannè' nigula quienè'.”

32 Pero në'èdi' rnia' le'e, chi nu ben' rsan žgulè, na' bezi' žgulè' be'mbyu tula, nacan xquia quie nigula na' lao Diuzi. Solamente chan' udalè žgulè' be'mbyu tula, cana'ra huazaque' usan be'mbyu na' žgulè'. Lëscan' nutezi ben' bezi' nigula psan xquiuhue, nacan xquia quienè' lao Diuzi.

*Bireya'ala' ugunro Diuzi ca cuendazi*

Na' una Jesús:

33 —Lëscan' banezile ca una Moisés gudyinè' xuzixta'oro: “Reya'ala' uzulo' di'idza' cabè' unao' huelo' bguntio' Diuzi.”

34 Pero në'èdi' rnia' le'e, bireya'ala' ugunle Diuzi ca cuendazi. Biugunle nu guibá, porque dan' ga re' Diuzi r nabè'nè'.

35 Cana'rè biugunrèle nu yedyi layu, porque dan' ga ruzu ni'a Diuzi. Biugunrèle ciudad Jerusalén, porque dan' ciudad quie Diuzi.

36 Lëzi biugunrèle guichole, porque quele huacale utza'le gacan bezèri gaso ni tu guitza' guichole.

37 Tuzi iquèbile inale tali. Chi inèro ugunro Diuzi ca cuendazi, quie taxi'ibi' za'n dan' rnèro cana'.

*Una Jesús quie ben' yeyue laohue quie laguedyijè'*

(Lc. 6.29-30)

Na' una Jesús:

38 —Lëscan' banezile cabè' una xuzixta'oro Moisés dza na'te: “Chi nu ben' bdyiagui'nè' tu laolo', o tu leilo', o bi ta de quio', napo' derecho udyiagui'lo' tu laohuè', o tu leiyè', o bi ta de quiè' tacuenda iyaca laohue quiè'.”

39 Pero në'èdi' rnia' le'e: Biyeyuele laohue quie ja ben' rue mala quiele. Chi nu ben' aodapa xago', bè'le lato capè' itzala' xago'.

40 Chi nu ben' hueja cuenda luè' lao ja ben' r nabè' ta si'nè' camisa quio', bè'rènè' len chamarra quio'.

41 Chi nu ben' ruego dyi luè' hua'alo' yua' quienè' tu legua, bi'alan chopa legua.

42 Chi nu ben' rnabayèchi' luè' bi cosa, bè'nè'n. Chi nu ben' rnaba presta bi ta de quio', bihuelo' zidi, bè'nè'n ta r nabè'.

*Una Jesús quie yaca ben' rudie ra'o*

(Lc. 6.27-28, 32-36)

Na' una Jesús:

43 —Lëscan' banezile ca una xuzixta'oro dza na'te: “Edyè'èle amigo quiele, udiele ben' rudie le'e.”

<sup>44</sup> Pero në'èdi' rnia' le'e: Edyè'èlale ben' rudieja le'e. Inabale tahuen lao Diuzi quie ja ben' rudze'de' le'e. Huele dya'a quie ja ben' rudie le'e. Ulehue'lè Diuzi di'idza' inabale tahuen quie ja ben' rnaya' dilalè le'e.

<sup>45</sup> Cana' gacale dugalo zi'i Xuziro Diuzi zu guibá. Cana' rue Diuzi lènè' obidza quie'. Useni'nan dužete yedyi layu ga nita' ja ben' mala len ja ben' huen. Na' rse'ela'rè' nisa yo quie' lao ja benè', la'acazi ben' rue tadya'a, la'acazi ben' rue tamala.

<sup>46</sup> Chi rapachi'le tuzi ben' rapachi' le'e, biugunle rl'è Diuzi le'e ben' laxta'o yèri por nun quie ruele cana'. Porque cana' ruerè hasta ben' malaja, ben' binao xneza Diuzi.

<sup>47</sup> Chi rda rnè'èle tuzi ja ben' nubè'zile, biugunle tadya'a gula ruele. Porque hasta ben' binuebè' Diuzi ruerèjè' cana'.

<sup>48</sup> Reya'ala' gacale ben' laxta'o yèri cabè' naca Xuziro Diuzi zu guibá ben' laxta'o yèri.

## 6

### *Bzioñe'e Jesús ra'o cabè' re'ennè' huero*

<sup>1</sup> Na' una Jesús:

—Reya'ala' huele cabè' re'en Diuzi huele du guicho du la'adyi'le, pero bi-huelen tacuendazi ta ilè'è benè' le'e nacale ben' huen. Chi huelen tacuendazi ta ilè'è benè' le'e nacale ben' huen, bigata' quiele ta gun Xuziro Diuzi le'e ga rnabè' guibá.

<sup>2</sup> Lena' cati gacalèle ben' rdziogue bi cosa, biulu'etele ladza inale cani bia' cabè' rue ja ben' rionla'adyi' Diuzi de ladzazi caora riojè' lu'u idao', caora rdajè' tu neza. Cana' ruejè' tacuenda inè benè' quiejè' dya'a. Pero tali ca rnia', tana'zi de babèjè' gan, bibira de hue' Diuzi lèjè' ga rnabè' guibá.

<sup>3</sup> Pero le'e cati gacalèle ben' rdziogue bi cosa, biulu'etele ladza yela' binezi ja benè' chi bi ruele, ba'ala'cazi ben' naca bichile.

<sup>4</sup> Dya'alan' gacalèle benè' balarazi. Na' Xuziro Diuzi rl'è'ènè' cabè' tadya'a ruele balarazi, lènè' gunnè' quiele ga rnabè' guibá.

### *Bzioñe'e Jesús ra'o cabè' reya'ala' huero hue'lèro Diuzi di'idza' (Lc. 11.2-4)*

Na' una Jesús:

<sup>5</sup> —Cati hue'lèle Diuzi di'idza', bihuele ca rue ja ben' rionla'adyi' Diuzi de ladzazi. Lega raxejè' hue'lèjè' Diuzi di'idza' zètela lu'u idao'. Cana' ruejè' con ga ziojè' zaca'lao ja benè'. Pero tali ca rnia', tana'zi de babèjè' gan'. Bibira de hue' Diuzi lèjè' ga rnabè' guibá.

<sup>6</sup> Pero cati hue'lèle Diuzi di'idza', reya'ala' ucui'ole tu tule tu ga negachi'. Tuzile conlè Xuziro Diuzi hue'lèlenè' di'idza'. Na' Xuziro Diuzi rl'è'ènè' cabè' tadya'a ruele balarazi, lènè' gunnè' quiele ga rnabè' guibá.

<sup>7</sup> Cati hue'lèle Diuzi di'idza', biinale di'idza' ladzazi, bihuele zètela di'idza' cabè' rue ben' binuebè' Diuzi. Ruejè' pensari chi uzènaga Diuzi quiejè' nun quie dan' ru'elèjè' Diuzi di'idza' zètela.

<sup>8</sup> Bihuele cabè' rue lèjè', porque dan' Xuziro Diuzi banezinè' bidan' rdzioguele cati zainabale laohuè'.

<sup>9</sup> Lena' reya'ala' hue'lèle Diuzi di'idza' cani:

Xuzindo' Diuzi zulo' guibá, naca la'iya laolo'.

<sup>10</sup> Rbezando' guida dza inabè'lo' lao yedyi layu cabè' rnabè'lo' guibá ga zulo'.

<sup>11</sup> Guno' ta gaondo' quie na'adza cabè' ta rdzioguendo'.

<sup>12</sup> Bezi'ze quiendo' cabè' tamala babèndo' cabè' reziz'èndo' tamala bè ja benè' len nètò'.

13 Gacalao' nēto' ta biiguinondo' lao tamala, ucuasa ucu'olo' tamala za' gaca quiendo'.

Porque tuzo' luë' naco' ga zelaozi yela' r nabë' quio', ga zelaozi yela' huaca quio', ga zelaozi yela' ze quio' tuzioli. Amén.

14 'Cana' rnia' le'e porque chi le'e rzi'zele quie ja ben' rueja tamala quiele, lëscana' huazi'zerë Xuziro Diuzi zu guibá quiele.

15 Pero chi bisi'zele quie laguedyile, bisi'zerë Xuziro Diuzi dula' xquia quiele.

*Bzioñe'e Jesús ra'o cabë' reya'ala' huero ubasi*

Na' una Jesús:

16 —Cati huele ubasi, bihuenëlaole bayëchi' cabë' rue ben' rionla'adyi' Diuzi de ladzazi. Lëjë' ruzutelaojë' bayëchi' tacuenda ilë'ë ja benë' ruejë' ubasi. Pero tali ca rnia', tana'zi de babëjë' gan, bibira hue' Diuzi lëjë'.

17 Pero le'e cati huele ubasi, ulequibi laole, ulequin guichole dya'a.

18 Cana' huele tacuenda bigacabë' ja benë' de que ruele ubasi. Tuzi Xuziro Diuzi zulënë' le'e, gunnë' tadya'a gula quiele guibá ga r nabë'në'.

*Udixogue' Jesús quie lao yela' uña'a*

(Lc. 12.33-34)

Na' una Jesús:

19 —Bireya'ala' uzule guichole huele cuinle ben' uña'a lao yedyi layu ga reyluzin, ga rbiagui'zin, ga rban benë' len.

20 Reya'ala' uzule guichole huele quie Diuzi tacuenda utupale yela' uña'a quiele guibá ga bireyluzin, ga birbiagui'zin, ga bisaque' cuan benë' len. Chi huele cana', nacale ca quie yela' uña'a lao Diuzi.

21 Pues ga rutupa ja benë' yela' uña'a quiejë', chi lao yedyi layu, chi guibá, lena' ulu'en ca bi pensari raquejë', chi quie cuinzijë', chi quie Diuzi.

*Una Jesús quie pensari yani' quiero*

(Lc. 11.34-36)

Na' una Jesús:

22 —Chi ru'ele lato raca guicho laxta'ole pensari dya'a, cana' sí, ruele tadya'a, neyani' pensari quiele rlë'ële racalële benë'.

23 Pero chi ru'ele lato zu guicho laxta'ole yela' zë', cana' sí, huele tamala, nechula pensari quiele, birlë'ële gacalële benë'. Chi lao laza yu'ule pensari dya'a, na' ru'ele lato su guicho laxta'ole yela' zë', lena' naca mala gula quiele, nechulatzegue pensari quiele.

*Ni rnën cabë' naca quie Diuzi len dumi*

(Lc. 16.13)

Na' una Jesús:

24 —Nitu nunu saque' uzu chopa xa'ne, porque dan' udiënë' tunë', na' itunë' idyë'ënë', uzunë' di'idza' quie tunë', na' quie itunë' biuzunë' di'idza'. Cana' naca quiero len Diuzi. Chi nuzu guichoro rza'la'adyi'ro dumi, bisaque' uzuro guichoro Diuzi.

*Diuzi gunnë' yugulute ta rdzioguero*

(Lc. 12.22-31)

Na' una Jesús:

25 —Rnia' le'e, bidëbile quie ta yo'ole, quie ta gaole, quie ta tebanle, ni quie zaba quiele ta gacole. ¿Quele zaca'ra yela' neban quiero quele ca ta gaoro? ¿Quele zaca'ra cuinro quele ca zaba quiero?

26 Ulena'cara cabë' rue ja bguini rdajaba' ladza. Birazajaba', birezi'jaba' usecho udze'tza'ojaba' gaojaba', nechan' Xuziuro Diuzi zu guibá rugaonë'jaba'. ¿Binezile zaca'ra le'e quele ca lëjaba'?

27 ¿Nuži ca le'e huaca huezu huele cuinle igatzo metro yela' huego' nun quie rdëbile quie ta rdzioguele?

28 ¿Bixquien! rdëbile nacala gaca idzela zaba quiele? Ulena'cara cabë' re'eni ja yo guixi'. Biruejan dyin, biruejan la'ari' ta gaca žabajan.

29 Nechan' rnia' le'e, ni rey Salomón, ba'ala'cazi guquë' ben' uña'a gula, bibdyinnë' sutza'ohuë' cabë' zutza'o ja yo guixi' badan gula.

30 Ulena' cabë' rugaco Diuzi žaba guixi' badanzi ta de na'adza, ba'ala'cazi du uxezi uzei benë' len, ¿biži binezile ruetera Diuzi tadya'a quiele quele ca nu ja yo guixi'? Le'e rdzioguele sudyi'ilële Diuzi dyë'ëdi.

31 Lena' bireya'ala' idëbile inale: “¿Ga za' ta gao ta yo'oro? ¿Ga za' žaba quiero?”

32 Le'e bireya'ala' huele cana', porque dan' can' rue ja ben' binuebë' Diuzi. Rdëbijë' rdajë' quilojë' ga idzelejë' ta gaojë' len ta yo'ojë'. Pero cabë' le'e, zu Xuzile ben' zu guibá, nezinë' yugulute bidan' rdzioguele.

33 Hue'le lato inabë' Diuzi le'e, huele ta yu'u ni'a xnezi quie Diuzi ca raxenë'. Na'tera gunnë' yugulute ta rdzioguele.

34 Bidëbile chi bi tazëdi za' quiele du uxe du huidzo, porque durpende chan' du uxezi za'rë cuëchilile gacan reglo. Tu dza tu dza rdëbile quien, huele pensari bi gaca ta cue'lina.

## 7

### *Bireya'ala' inëro quie laguedyiro*

(Lc. 6.37-38, 41-42)

1 Na' una Jesús:

—Bireya'ala' inële quie laguedyile, yela' biinë Diuzi quiele ca ruele.

2 Con cabë' rlë'ële laguedyile, chi ben' huen, chi ben' mala, cana'rë ilëë Diuzi le'e. Con cabë' inële quie laguedyile, cana'rë inë Diuzi quiele ca ruele.

3 ¿Cómo nezile yegunni'ale bigazi tadao' mala rue benë', na' binezile yegunni'ale ca tamala gulatera ruele cuinle?

4 ¿Cómo yëbile laguedyile: “Bencara lato cuioga' bëbi dao' yu'u laolo'”, na' birnao' cuinlo' bichu yaga yu'u laolo'?

5 Le'e ben' rnë di'idza' ladzazi, zaolio bichu yaga yu'u laolo', na'tera ilë'ëlo' yebiolo' bëbi dao' yu'u lao laguedyile.

6 Bireya'ala' hue'le ja beco' ta naca la'iya quie Diuzi, porque biži chan' lalëziba' yegui'imba' le'e. Lëscan' bireya'ala' chu'unle ta naca tatzao' quie Diuzi lao ja cuchi, porque biži chan' utzutzu ulioba'n.

### *Ni nan cabë' reya'ala' huelëro Diuzi*

(Lc. 11.9-13; 6.31)

Na' una Jesús:

7 —Chi inabaro Diuzi bi cosa, gunnë'n. Chi rguiloro ta naca tali quie Diuzi, huadzeleron. Chi ulidzaronë', huequëbinë' quiero.

8 Cana' rnia' le'e, porque nu ben' rnaba lao Diuzi bi cosa, hue'në'n lënë'. Lëscan' nu ben' rguilo ta naca tali quie Diuzi, huadzelenë'n. Nu ben' rulidza Diuzi, huequëbinë' quienë'.

9 ¿Nuži le'e rna'le hue'le yola ži'ile lao laza ta rnababi' pan?

10 ¿Nuži le'e rna'le hue'le bëlala ži'ile lao laza ta rnababi' bela?

11 Chi le'e nacale ben' žë'ë, pero nezile hue'le tahuen ži'ile, jbižira Xuziuro Diuzi zu guibá neziterë' hue'në' tahuen ben' rnaba len laohuë'!

<sup>12</sup> 'Cabë' re'enle huelële laguedyile le'e, cana' reya'ala' huerële len laguedyile. Cana' ruen mandado quiele huele lë'ë guichi ley pca'n Diuzi lao na'a Moisés len guichi bë ja ben' udixogue' xti'idza' Diuzi tiempote.

*Quie lao chopa neza udixogue' Jesús*  
(Lc. 13.24)

Na' una Jesús:

<sup>13</sup> —Taguizi naca ru'a yu'u quie guibá. Lëru'a yu'u na' reya'ala' tzu'ule. Tažera naca ru'a yu'u quie gabila. Lëscan' tala'aga'ra nacarë neza quien. Ben' zë gulara rey'ujë' ru'a yu'u na', rezi'jë' neza na'la.

<sup>14</sup> Pero taguizi naca ru'a yu'u quie guibá. Lëscan' taguizi nacarë neza quien. Lë'ëti'zija naca ja ben' ruzuja di'idza' quia' cabë' rnia'. Lëzije' redzelejë' neza zeyo guibá.

*Cabë' rue benë', cana' yezaquero ca nacayaquë'*  
(Lc. 6.43-44)

Na' una Jesús:

<sup>15</sup> —Gapale cuidado quie ja ben' huizi' yë', ben' rnaja quie Diuzi rnëjë'. Nacajë' ben' za'zija ruejë' gaxo gula cabë' rue beco' zi'ila'. Pero bë' ruezijë', dechan' lu'u laxta'olajë' yu'u yela' snia quiejë', ruejë' ca rue coyote.

<sup>16</sup> Huezuyezaquele cabë' ruejë' chi balejë' nacajë' ben' quie Diuzi. Bicuia bedzuli' lao luba yëchi'. Lëscan' bicuia higo lao yaga yëchi'. Lëcana' rue ja ben' binaca ja ben' quie Diuzi. Birlë'ëro huejë' tadya'a cabë' rue Diuzi.

<sup>17</sup> Yugulu yaga huen rbian tazixi naca dya'a, pero nu yaga median, birbian tadya'a.

<sup>18</sup> Tu yaga huen bisaque' cuian tazixi binaca dya'a. Lëzi tu yaga median bisaque' cuian tazixi naca dya'a.

<sup>19</sup> Yugulu yaga birbia ta gaoro ichuguron ibidyin uzeiron.

<sup>20</sup> Na'ra rnia' le'e, según cabë' ruejë', cana' yezaquele cabë' nacajë', chi nacajë' cabë' quie tu yaga huen, o chi nacajë' cabë' quie tu yaga median.

*Quele yugo ja benë' yeyojë' guibá*  
(Lc. 13.25-27)

Na' una Jesús:

<sup>21</sup> —Quele yugu ja ben' na në'ëdi': "Señor, Señor", yeyojë' guibá ga rnabë' Diuzi, dechan' yaca ben' ruzu di'idza' quie Xuz'a', ben' zu guibá, lëzijë' yeyojë' guibá.

<sup>22</sup> Cati idyin dza hue Diuzi juicio, cana' ina ben' zë në'ëdi': "Señor, Señor, laolo' bzëtondo' udixogue'ndo' benë' xti'idzo'. Lëscana' bzëtondo' laolo' uliondo' taxi'ibi' yu'u ja benë'. Lëscan' bzëtondo' laolo' bëndo' tazë yela' huaca quio'."

<sup>23</sup> Pero cana'ra yëpa'jë': "Binubë'cazida' le'e. Ulebiga' tzala'la, le'e ben' bë ja tamala."

*Pxi'idze' Jesús quie chopa ben' bë yu'u*  
(Lc. 6.47-49; Mr. 1.22)

Na' una Jesús:

<sup>24</sup> —Cani nacan quie yaca ben' ruzënaga ruzu di'idza' quia'. Naca quienë' ca quie tu ben' rionë'e, ben' bë yu'u quie tu lao lachi' ga re'rara yu.

<sup>25</sup> Na'ra ben nisa yosiu', uyala yao, ben be bedun', pero bibyalan, porque re'n tu lao lachi' ga naca yu huala.

<sup>26</sup> Pero ben' ruzënaga, na' birue quienë' ca rnia', naca quienë' ca quie tu ben' tondo, ben' bë yu'u quie tu lao yu yolo, yu bire'ra.

<sup>27</sup> Bè' ben nisa yosiu', bè' uyala yao, bè' ben be bedun', na'ra byala yu'u. Tu casion ze gula guca quiè'.

<sup>28</sup> Cati beyudyi unè Jesús, rebane ja ben' zè nita'ja na' cabè ruè' rusèdiè'.

<sup>29</sup> Porque rusèdinè' lèjè' ca quie ben' de yela' rnabè' quie, quele cabè' rusèdi ja ben' rusèdi ley pca'n Diuzi lao na'a Moisés dza na'te.

## 8

*Beyue Jesús tu ben' raca yela' hue' ca pindo*

*(Mr. 1.40-45; Lc. 5.12-16)*

<sup>1</sup> Cati beyèzi Jesús lao ya'a, ben' zè beyao lènè'.

<sup>2</sup> Caora na' laobiga'te ga'ala' tu ben' raca yela' hue' ta ruzudzo' cuerpo quienè'. Laoditzute zibè' lao Jesús rëbinè' lènè':

—Señor, chi gue'enlo', huu' cule yeyuelo' yela' hue' raca'.

<sup>3</sup> Na'ra udan Jesús na'anè' lènè' rëbinè' lènè':

—Hue'enda' iyaco' yèri.

Cana'zi ta una Jesús, labeyacate yela' hue' racanè'.

<sup>4</sup> Na'ra una Jesús rëbinè' lènè':

—Ni tu ganu quixogue'lo' bi guca beyaco'. Tu uyotezi cuinzo' lao pxuzi. Na' hue'lo' gun quie Diuzi cabè' mandado bè Moisés yela' inezi ja benè' abeyaco' yela' hue' raco'.

*Beyue Jesús tu mozo quie tu capitán ben' romano*

*(Lc. 7.1-10)*

<sup>5</sup> Na'ra zio Jesús ciudad Capernaum. Lèzi laoyote tu ben' naca capitán quie ja soldado quie ciudad Roma ga zè Jesús. Caora na' unabayèchi'nè'

<sup>6</sup> rëbinè' Jesús:

—Señor, de tu mozo quia' raca zhue'bi' zan yu'u. Neseçobi', redzagaolèbi'n, rlatzeguen.

<sup>7</sup> Na'ra rëbi Jesús lènè':

—Uletza' yeyu'abi'.

<sup>8</sup> Na'ra rëbi capitán lènè':

—Señor, binaca' zi ta huelo'nè' ze guidatiu' zan yu'u quia'. Tu bè'zi di'dizá', bè mandado yeyaca mozo quia'. Nezda' huazaque' huelo' tu mandadozi inao',

<sup>9</sup> porque lèzi cana' naca quia'. Zu xa'na', ben' belao rnabè'nè' nè'èdi'. Lèscana' nalaria' soldado ben' rnabi'a. Cati rëpa' tujè': "Tzio' niga", huayonè'. Cati rëpa' itunè': "Uda", huidè'. Cati rëpa' mozo quia' bi ta huebi', ruebi'n. Cana' nacarè quio'.

<sup>10</sup> Cati be Jesús cabè' una capitán rëbinè' lènè', tu rebanezinè' rëbinè' ja ben' zenaolja lènè':

—Tali rnia' le'e, lao yugu ja ben' Israel, binedila' ni tujè' ben' rioñe'e cabè' rioñe'e ben' niga.

<sup>11</sup> Rnia' le'e, ben' zè, ben' binaca ben' Israel, yedyinjè' gatezi parte yedyi layu cue'lèjè' tuze len xuzixta'oro Abraham, len xuzixta'oro Isaac, len xuzixta'oro Jacob ta gaolèjè' lèjè' guibá ga rnabè' Diuzi.

<sup>12</sup> Pero zè ben' Israel, ben' reya'ala' yeyoja guibá ga zu Diuzi, naca quiejè' tzegu'unjè' lao lato lao chula ga cuedyijè' zi'laza gula, ga gaojè' leijè'.

<sup>13</sup> Na'ra rëbi Jesús capitán na':

—Beyo zan yu'u quio'. Huacacazi cabè' azela'adyo'.

Caora na'tezi labeyacate mozo quiè'.

*Beyue Jesús ben' gula quie Pedro*

*(Mr. 1.29-31; Lc. 4.38-39)*



<sup>14</sup> Na'ra uyo Jesús žan yu'u quie Pedro. Na' blë'ënë' žna' nigula quie Pedro denë' žla, raca žhue'në'.

<sup>15</sup> Na'ra caora uže Jesús në'ë, labedubaten. Na'ra labeyasatë' uzulaohuë' ru'enë' laze ta gaojë'.

*Beyue Jesús ben' zë, ben' raca žhue'*

*(Mr. 1.32-34; Lc. 4.40-41)*

<sup>16</sup> Cati aochula, uquië'jë' lao Jesús ben' zëja raca žhue', ben' yu'uja bichi be quie taxi'ibi'. Con tu la'anazi di'idza' rebioğuë' tzala'la taxi'ibi' yu'ujë'. Cana' beyuerënë' yuguja ben' raca žhue'.

<sup>17</sup> Cana' bzun di'idza' cabë' una profeta Isaías caora unë' cani: “Lëbë' begubë' yela' tzen quiero, beyuenë' yela' hue' quiero.”

*Ni rnan quie ja ben' nao Jesús*

*(Lc. 9.57-62)*

<sup>18</sup> Cati blë'ë Jesús ben' zë baneyëcholënë', bënë' mandado udelënë' ja ben' quienë' itzala'la lagun.

<sup>19</sup> Na'ra bdyin tu maestro, ben' rusëdi ley quie Moisés. Na'ra gudyinë' Jesús: —Maestro, re'enda' inaohua' luë' con gatezi zio'.

<sup>20</sup> Na'ra bequëbi Jesús quienë':

—Yaca be'eza', zu beló quiejaba'. Lëscan' ja bguini, dyia lidyijaba'. Pero në'ëdi' naca' bichi yugulu benë', bizu litya' ga idyina' sua'.

<sup>21</sup> Itu ben' nacarécazi ben' quienë' unë' rëbinë' Jesús:

—Señor, ben lato tzetapa' xuzal', porque bagatinë'. Na'tera yeguida' inao-hua' luë'.

<sup>22</sup> Na'ra bequëbi Jesús gudyinë' lënë':

—Unaozi në'ëdi'. Bë lato ucachi' yaca ben' birue quie xti'idza' Diuzi xuzo'.

*Ulëchi Jesús chizi be bedun' len nisa*

*(Mr. 4.35-41; Lc. 8.22-25)*

<sup>23</sup> Na'ra uyu'u Jesús lu'u barco len ja ben' quienë'.

<sup>24</sup> Caora na' bënan tu be bedun' huala gula, rudyigaten nisa rudzon lu'u barco. Pero rasila Jesús cati ruen cana'.

<sup>25</sup> Na'ra uyo yaca ben' quienë' yesebëjë' lënë', rëbijë' lënë':

—¡Señor, psela nëto'! ¡Are'en yëto barco lu'u nisa!

<sup>26</sup> Na'ra unë Jesús rëbinë' lëjë':

—¿Bixquien' lega rdzebile? ¡Biralele ucuasa ucui'o Diuzi ra'o!

Na'ra uyasanë', udilalënë' be bedun' len nisa. Caora na' bguenan ure'n chizi.

<sup>27</sup> Na'ra rebane ja ben' quienë' najë':

—¿Ca nuži naca ben' niga? Lente be bedun', lente nisa ralen quienë'.

*Bebio Jesús taxi'ibi' yu'u chopa ben' Gadara*

*(Mr. 5.1-20; Lc. 8.26-39)*

<sup>28</sup> Cati bdyin Jesús itzala' lagun ga lao yu nebaba Gadara, caora na' labdyinte chopa ben' bro lu'u yerobá dyia na'. Rupatejë' yu'ujë' taxi'ibi'. Na' bdyinjë' lao Jesús. Tantozi nacajë' ben' snia gula, ni tu ganu rerugue te tu neza zaca' ga yu'ujë'.

<sup>29</sup> Na'ra uzulaojan rbedyia'zijan najan rëbijan Jesús:

—¿Bi de quio' conlë nëto' zao' niga, Jesús ži'i Diuzi? ¿Quele baodyialaolalo' bla'lo' huelo' nëto' castigo, na' binedyin hora?

<sup>30</sup> Ga'ala'zi ga zë Jesús yu'u ja cuchi zë. Lëgan' na' la'adyi'jaba' rguilojaba' ta raojaba'.

<sup>31</sup> Na'ra bë ja taxi'ibi' zëdi rëbijan Jesús:

—Chi yebiolo' nēto' tzala'la, ben lato tzu'undo' lu'u cuchila.

<sup>32</sup> Na'ra rēbi Jesús lējan:

—Uletzu'ujaba'.

Na'ra bero ja taxi'ibi' yu'u ja benē' yetzu'ujan lu'u cuchila. Tu chi'zi raca cana', yequinojaba' cuinjaba' tu ru'a ya'a ga naca stēbi. Laga lu'u lagun yetzu'ujaba' uyēpijaba' gutijaba'.

<sup>33</sup> Quie lena' yaca ben' rapa lējaba' bežunojē' dan' bdzebijē' bedyinjē' yedyi quiejē'. Na'ra uzulaojē' ru'ejē' di'idza' cabē' guca quie ja ben' bero ja taxi'ibi'.

<sup>34</sup> Na'ra bro ja ben' zē yedyi na', ziojē' gan' zē Jesús. Laonabayēchi'tejē' rēbijē' lēnē':

—Yerolo' yeyo' lao yu quiendo'.

## 9

### *Beyue Jesús tu ben' zi*

(Mr. 2.1-12; Lc. 5.17-26)

<sup>1</sup> Beyu'u Jesús tatula lu'u barco. Bela'guē' itzala' lagun, bedyinnē' lao yedyi quiē'.

<sup>2</sup> Na' bi'ajē' tu benē' zi, ben' žuba lao belaga nu'a ja benē' lēnē'. Caora blē'ē Jesús cabē' žela'adyi'yaquē' yeyuenē' lēnē', na'ra unē' rēbē' ben' raca žhue':

—Bidzebo', bicha'. Cabē' quie ja dula' xquia quio', aoži'zia'n.

<sup>3</sup> Na'ra bala ja maestro, ben' rusēdija ley quie Moisés, bējē' pensari lu'u guicho laxta'ojē' cani: “Huadza' Diuzi ben' niga cabē' di'idza' unē'.”

<sup>4</sup> Pero como dan' anezi Jesús cabē' pensari racajē', na'ra unē' rēbē' lējē':

—¿Bixquien' racale pensari cana'?

<sup>5</sup> ¿Ca nurlan nacaran yalo hua' quie ben' zi niga? ¿Nacaran yalo chi yēpa'nē': “Aoži'zia' xquia quio'”, o chi nacaran yalo yēpa'nē': “Uyasa, bezi' belaga quio', beyo'”?

<sup>6</sup> Pero como naca' bichi yugulu benē', lena' re'enda' inezile de yela' rnabē' quia' ta si'zia' dula' xquia quie ja ben' nita' lao yedyi layu.

Na'ra unē' rēbinē' ben' zi:

—Beyasa, beyu'a belaga quio'. Beyo žan yu'u.

<sup>7</sup> Na'ra beyasē' zeyoguē' žan yu'u quiē'.

<sup>8</sup> Caora blē'ē ja benē' cabē' bē Jesús, tu bebanezijē'. Na'ra uzulaojē' rapala'njē' Diuzi por nun quie dan' babē'nē' yela' huaca quienē' Jesús.

### *Guzi Jesús Mateo*

(Mr. 2.13-17; Lc. 5.27-32)

<sup>9</sup> Na'ra beza' Jesús ga beyuenē' ben' zi, caora na' blē'ēnē' tu ben' lao Mateo, re'nē' tu ga ruquizunē' quie impuesto. Na'ra unē' rēbē' lēbē':

—Uda, unao nē'ēdi'.

Na'ra uyasa Mateo bēlēnē' lēnē' tuže.

<sup>10</sup> Bizi guca na' tu re'nē' raohuē' žan yu'u, cati bdyin ja ben' zē, ben' huequižu, lenrē ja ben' cacuendazi. Udaolējē' Jesús tuže len ja ben' quienē'.

<sup>11</sup> Pero bē' blē'ē yaca ben' partido fariseo tužezi udaolē Jesús len lējē', na'ra unabajē' ben' quie Jesús rēbijē' lējē':

—¿Bixquien' raolē maestro quiele tužezi len ja ben' huequižu len ja ben' cacuendazi?

<sup>12</sup> Bē' be Jesús cana', na'ra unē' rēbinē' lējē':

—Ca quie ben' zu dya'a, birnaban ben' yeyue lēnē'. Pero ben' raca žhue', rnaban ben' yeyue lēnē'.

<sup>13</sup> Uletzio huele pensari yela' tzioñe'ele bi nan lè'è guichi la'iyá quie Diuzi ga rnan caniga: "Raxera Diuzi yeyèchi'la'adyi'ro benè', quele ca ta hue'ro Diuzi gun." Quele za' rëza' ben' na "bibí xquia naca quia'", sino que za' rëza' ben' nezi de dula' xquia quie tacuenda yetza'jè' pensari quiejè' inaojè' xneza Diuzi.

*Unabajè' Jesús quie ubasi*  
(Mr. 2.18-22; Lc. 5.33-39)

<sup>14</sup> Bdyin ja ben' quie Juan bautista lao Jesús rnabajè' lènè':

—¿Bixquien' nètò' len ja ben' partido fariseo ruetzeguendo' ubasi, na' ja ben' quio' biruejè' ubasi?

<sup>15</sup> Na'ra bequèbi Jesús rëbinè' lèjè':

—Yaca ben' zioja ga raca lani quie huetzagana', bireya'ala' sujè' bayèchi' tu nezu ben' rutzagana' len lèjè'. Pero cati idyin dza birazulè ben' rutzagana' len lèjè', caora na' sí, huazujè' bayèchi' huejè' ubasi.

<sup>16</sup> 'Bisaque' yeda'ro la'ari' cubi binetzèri lè'è la'ari' gula, porque huetzere'nan ígan ru'a la'ari' gula, íchezan len mazara.

<sup>17</sup> Lëscan' bisaque' ca'ro nupi zixi lu'u bolsa guidi gula, porque bè' sulao ilëbin, huedza'n íchezan len. Lao rupatelan cuiagui'. Lena' reya'ala' ca'ron tu lu'u guidi cubi. Cana' sí, bibi gaca quie lao rupaten.

*Beyue Jesús tu nigula raca zhue', besebanrënè' itu nigula baguti*  
(Mr. 5.21-43; Lc. 8.40-56)

<sup>18</sup> Tu raca nerue' Jesús di'idza' len ja benè', cati bdyin tu ben' rnabè' quie ja ben' Israel gan' zè Jesús. Na' gutanè' uzuru'ala' lao Jesús rëbinè' lènè':

—Zabeyudyi guti tu zì'ina' nigula. Pero chan' na' luè' guido' ixubalo' nao' lèbi', huebambi' tatula.

<sup>19</sup> Na'ra uzi'nè' ziolènè' ja ben' quienè'.

<sup>20</sup> Na'ra tu neziojè' tu neza, cati ubiga' tu nigula raca zhue' xcu'udzula Jesús, uzenè' diba zu ni'a zabhè'. Aziote lao chipchopa iza ruzun lènè' uba'a.

<sup>21</sup> Cana' bënë' porque guquenè' chi tu guxuzè' zaba Jesús, yeyaquè'.

<sup>22</sup> Cati beyècho Jesús rnè'è ga zè nigula, rëbinè' lènè':

—Bidzebo', zana'. Como dan' rzudyi'ilèlo' nè'èdi', abeyaco'.

Caora na'tezi labeyacatè'.

<sup>23</sup> Na'ra uzi'nè' zioquè' bdyinnè' zan yu'u quie ben' rnabè', ben' nequiè' lènè'. Na' blè'èrènè' bala yu'ute ja músico listo ta tzecachi'jè' lèbi'. Lèzi cana' blè'èrènè' ru'be gula bayu'uja benè'.

<sup>24</sup> Na'ra unè' rëbinè' lèjè':

—Ulero ga yu'ule niga. Para nè'èdi' quele natibi', dechan' tu rasizibi'.

Na'ra bžidyijè' Jesús cabè' unè'.

<sup>25</sup> Cati beyudyi betzatanè' lèjè', na'ra uyu'unè' ga de nigula baguti, uzenè' na'abi' besebannè'bi'. Caora na' beyasabi'.

<sup>26</sup> Na' tzadi unezi ja ben' quie ja yedyi na' cabè' hë Jesús besebannè' nigula dao' de baguti.

*Beyue Jesús lao chopá ben' laochula*

<sup>27</sup> Lazune Jesús yeza'nè' gan' na' cati unao chopá ben' laochula lènè'. Rbedyiya'zìjè' rëbijè' Jesús:

—¿Beyèchi'la'adyi' nètò', luè' zì'i rey David!

<sup>28</sup> Cati uyu'u Jesús lu'u yu'u, na'ra ubiga'ja ben' laochula laohuè', na'ra unabhè' lèjè':

—¿Rzudyi'ilèle nè'èdi' huaca' yeyua' le'e na'?

Na'ra najè':

—Rzudyi'ilēndo' luē', Señor.

<sup>29</sup> Na'ra udēbi Jesús laojē' rēbinē' lējē':

—Yeyacale con cabē' rzudyi'ilēle nē'ēdi'.

<sup>30</sup> Na'ra labeyacate laojē' dyē'ēdi. Na'ra bē Jesús mandado gudyinē' lējē':

—Nitu nitu biquixogue'le cabē' bia' quiele.

<sup>31</sup> Pero lapencara brojē' cati uzulaojē' rguixogue'jē' tu tu yedyi cabē' bē Jesús quiejē'.

### *Beyue Jesús tu ben' birnē*

<sup>32</sup> Na'ra zeza'jē' zeyojē' cati za' bala ja ben' nequiē' tu ben' birnē lao Jesús, ben' yu'u taxi'ibi'.

<sup>33</sup> Na'ra bebio Jesús tzala'la taxi'ibi' yu'unē'. Caora na' beyacanē' benētenē'. Na'ra rebane ja benē' rnajē':

—Binelē'ēcaziro gaca lao ja yedyi quie ben' Israel cabē' raca niga na'a.

<sup>34</sup> Na'ra na ja ben' partido fariseo:

—Ben' niga rebioguē' taxi'ibi' yu'u ja benē' lao na'a xan' taxi'ibi'.

### *Guque Jesús bayēchi' cabē' rue ja benē'*

<sup>35</sup> Na'ra rda Jesús yugulu yedyi yela len ja yedyi dao', ruxi'dze'nē' lējē' lu'lu idao' sinagoga quiejē'. Rguixogue'nē' lējē' xti'idza' Diuzi, ben' rnabē' lao yedyi layu. Na'ra beyuenē' bitezi yela' hue' yu'u ja benē'.

<sup>36</sup> Bē' rlē'ē Jesús ja benē', guquenē' bayēchi' quiejē', dan' redzagalaojē' rēpi reyēzījē' ca quie ja beco' zi'ila' bizu ben' rapa ja lēba'.

<sup>37</sup> Na'ra unē' rēbinē' ja ben' quienē':

—Tali rnia', lega de dyin quiero gacalēro usēdiro ja benē' cabē' re'en Diuzi huejē', pero biyu'ute ja ben' zē, ben' gacalē usēdi lējē'.

<sup>38</sup> Quie lena' na', reya'ala' inabale lao Diuzi ta ise'elē' ja ben' gacalē ra'o usēdi lējē'.

## 10

### *Betupa Jesús lao chipchopa ben' quienē'*

(Mr. 3.13-19; Lc. 6.12-16)

<sup>1</sup> Na'ra betupa Jesús lao chipchopa ben' quienē'. Bē'nē' lējē' yela' huaca quienē' ta cuiojē' tzala'la taxi'ibi' yu'u ja benē', lēscan' ta yeyuerējē' bitezi yela' hue' yu'u ja benē'.

<sup>2</sup> Cani lao ja chipchopa ben' quie Jesús: tunē' laonē' Simón, ben' laorē Pedro, len bichinē' Andrés, len Santiago, len bichinē' Juan Zi'i Zebedeo,

<sup>3</sup> len Felipe, len Bartolomé, len Tomás, len Mateo, ben' huequižu, len Santiago, zi'i Alfeo, len Tadeo,

<sup>4</sup> len Simón, ben' partido cananista, len Judas Iscariote, ben' pseydin Jesús lao na'a ben' rnabē', ben' bēti lēnē'.

### *Use'ela' Jesús ben' quienē' ta tzetixogue'jē' benē' xti'idza' Diuzi*

(Mr. 6.7-13; Lc. 9.1-6)

<sup>5</sup> Na'ra use'ela' Jesús lao chipchopa ben' quienē' ta tzetixogue'jē' benē' xti'idza' Diuzi. Na'ra zagudyinē' lējē' cabē' huejē', unē' rēbinē' lējē' caniga:

—Tziole puro yedyi quie ja ben' Israel. Bitziole yedyi quie ja ben' tula. Bitziorēle ja yedyi quie ja ben' Samaria.

<sup>6</sup> Uletziotezi yedyi quie ja ben' Israel. Ben' na' naca quiejē' ca quie beco' zi'ila' neniti xa'ne. Cana' naca quiejē' lao Diuzi.

<sup>7</sup> Uletzio tzetixogue'lejē' baruen bagozi dza guida ben' ise'ela' Diuzi ta inabē'nē' lao yedyi layu.

<sup>8</sup> Uleyue yaca ben' raca yela' hue' ta rtao cuinjë' len ja ben' raca zhue'. Uleseban ben' bagutija. Ulebio tzala'la taxi'ibi' yu'u ja benë'. Runa' le'e yela' huaca quia' ta yeyuele ja benë', pero bihuelenan de lažo.

<sup>9</sup> Bihua'ale dumi, ni oro, ni plata, ni cobre.

<sup>10</sup> Ni tu bihua'ale ga udze'le dumi. Tuzi cue' zabale nacole. Tuzi huaracho nuliote tziole. Ni xaga bisele. Nu ben' racalële, lëben' na' naca cuenda quiejë' gunjë' ta rdzioguele.

<sup>11</sup> 'Cati idyinle tu yedyi že o chi tu yedyi dao', quilole ga zu tu ben' dya'a. Na' yega'nle hasta que idyin hora yeza'le.

<sup>12</sup> Bë' tzu'ule žan yu'u quienë', gapala'nlejë' yëbilejë': "Huela'iya Diuzi le'e ta sule chizi."

<sup>13</sup> Chi ben' naca xa'n yu'u ruenë' zi žela'adyi', inabarale lao Diuzi sunë' chizi. Pero chi binaquë' zi ben' rue žela'adyi', bira inabale lao Diuzi ta sunë' chizi.

<sup>14</sup> Chi nu ja ben' bisi'jë' le'e dyë'ëdi, na' chi bire'enjë' uzënarajë' quiele, yerozile žan yu'u o chi yedyi ga bire'enjë' le'e. Usisile bëxte dyia ni'ale cati yerole ta nacan seña binacan dula' quiele chi baodyiagu'jë' hue Diuzi lëjë' castigo.

<sup>15</sup> Tali cabë' rnia' le'e, cati idyin dza gaca juicio, huera Diuzi castigo fuertera quie ja yedyi ga bibejë' le'e bala, quele cabë' bë Diuzi quie ciudad Sodoma len ciudad Gomorra. Bzei Diuzi lao rupate yedyi na' besulatë'n.

### *Unë Jesús cabë' huenë yaca benë' yaca ben' quie'*

<sup>16</sup> Na' una Jesús:

—Ulena'cara ca nia' le'e. Rse'ela' le'e ca quie beco' ži'ila' lado ja lobo. Lena' rnaban huele listo ca quie nu bëla. Rnabarën huele žela'adyi' gaxo ca paloma.

<sup>17</sup> Gapale cuidado, porque huetzehua'arëjë' le'e lao na'a ja ben' rnabë'. Gunrëjë' le'e ži' ga regu'udi'jë' lu'u idao' sinagoga.

<sup>18</sup> Hasta huetzehua'ajë' le'e lao ja ben' gobierno, len lao ja rey, len lao ja ben' rnabë'tera, porque dan' biraxejë' nacale ben' quia'. Cana' sí, huacale inële quia' lao ja ben' Israel len lao ja ben' binaca ben' Israel.

<sup>19</sup> Cati tzehua'ajë' le'e lao na'a ja ben' rnabë', bidëbile quie bižidan' yëbilejë', bidëbile bi huele yëbilejë'. Porque cati babdyin hora saca'le cana', Diuzcazi gunnë' ta inale.

<sup>20</sup> Porque quele le'ecazi cuinle inële, Bichi Be quie Diuzila, inëcazinë' le'e.

<sup>21</sup> 'Cani hue yaca benë', usedyinjë' benë' bi' bichinë' lao na'a ja ben' rnabë' ta gutijë'bi'. Lëzirë ja be'mbyu usedyinjë' ži'ijë' lao na'a ja ben' rnabë' ta gutirëjë'bi'. Na' lazi'izi ja benë' yeyëchojabi' tilajabi' xuzijabi', quilojabi' bihuejabi' ta gutiyacabi' lëjë'.

<sup>22</sup> Ben' zë tzu'uja udie le'e nun quie dan' baralele quia'. Nu ben' sue inao në'ëdi' la'acazi bitezi raca quienë', ben' na' sí, huade ilanë' gaquë' ben' quia'.

<sup>23</sup> Cati baruenë ja benë' quie tu yedyi le'e bizinaquezi, layežunotele yeyole yedyi tula. Tali ca rnia', bicala nedu lao yedyi quie ja ben' Israel tzetale tzetixogue'lejë' xti'idza' cati yeguida' në'ëdi', bichi yugulu benë'.

<sup>24</sup> 'Ca ruenë ja benë' tu maestro, cana' huenë'rëjë' yaca ben' rusëdinë'. Lëscan' ca ruenëjë' tu ben' napa mozo, cana' huenë'rëjë' mozo quienë'.

<sup>25</sup> Nu ben' rsëdi, reya'ala' sunë' dispuesto usaca yaca benë' lëbë' con cabë' rsacajë' maestro quienë'. Lëscan' nu ben' naca mozo, reya'ala' sunë' dispuesto usaca ja benë' lëbë' cabë' rusacajë' xa'nnë'. Chi ina yaca benë'

yëbijë' tu ben' necua' familia: “Naco' xan' taxi'ibi'”, lëscan' yëbijë' zi'inë': “Naco' zi'i xan' taxi'ibi'.”

*Bireya'ala' idzebiro bi ruenë ja benë' ra'o*

*(Lc. 12.2-7)*

<sup>26</sup> Na' una Jesús:

—Quie lena' bireya'ala' idzebile bi ruenë ja benë' le'e. Rnia' le'e ni tu ta rue yaca benë' balarazi yega'nnan cana'zi biyezaca'laona, decazi de huanezan. Lëzi ni tu ta nezi yaca benë' de negachi' yega'nnan cana'zi biyezaca'laona, decazide huanezan.

<sup>27</sup> Cabë' di'idza' ru'elia' le'e bë' baochula, lëdi'idza' na' yëbile ja benë' bë' baoyani'. Lëzi cabë' di'idza' ru'elia' le'e xcu'udzu yu'u, lëdi'idza' na' yëbile ja benë' zaca'loajë'.

<sup>28</sup> Bidzebile bi hue ja benë', porque dan' ba'ala'cazi gacajë' gutijë' le'e, bigacajë' gutijë' bichi be quiele. Reya'ala' idzebile Diuzi, ben' gaca udyiagui' le'e len bichi be quiele ise'elë' le'e len bichi be quiele lao gui' gabila.

<sup>29</sup> Na' ledao'zi zaca' chopa bguini dao' ga ruti'jë'ba', pero ni tu bguini dao' bižu biiguinuba' sino que binezi Xuziro Diuzi biguca bguinuba' layu.

<sup>30</sup> Hasta len guitza' guichoro nezi Diuzi balan naca.

<sup>31</sup> Lena' bireya'ala' idzebile, porque zaca'ra le'e quele ca ja bguini dao'.

*Ni nan quie ben' rnëja cule Jesucristo lao ja benë'*

*(Lc. 12.8-9)*

<sup>32</sup> Na' una Jesús:

—Nutezi ben' rnë cule në'ëdi' lao ja benë', cana'rë inia' cule lëjë' lao Xuza' Diuzi zu guibá.

<sup>33</sup> Pero nu ben' rnë condre në'ëdi' lao ja benë', cana'rë inia' condre lëjë' lao Xuza' Diuzi zu guibá.

*Guta' tazëdi quie ben' nao xneza Jesús*

*(Lc. 12.51-53; 14.26-27)*

<sup>34</sup> Na' una Jesús:

—Biinale bigalo dila quie ja benë' tanun quie dan' bida' lao yedyi layu, sino que hualo dila.

<sup>35</sup> Por nun quie dan' chi gale nu benë' quia', huazu zi'ijë' condre xuzijë', huazu zi'ijë' nígula condre zna'jë', huazu zualidyijë' condre ben' gula quiejë'.

<sup>36</sup> Cana' tzu'ujë' hasta quie udiejë' familiazi quiejë'.

<sup>37</sup> Nu ben' nedyë'ëra nu xuzi znë'ë quele cabë' në'ëdi', binaquë' zi gacanë' ben' quia'. Lëzi nu ben' nedyë'ëra zi'ine, quele cabë' në'ëdi', binacarë' zi gacanë' ben' quia'.

<sup>38</sup> Nu ben' bire'en usacayudyi cuinnë' inaonë' në'ëdi', binaquë' zi gaquë' ben' quia'.

<sup>39</sup> Nu ben' bire'en izane cuine gatinë' por nun quia' në'ëdi', lëben' na' initilanë' yela' neban ta hue' Diuzi lënë' guibá. Pero ben' rzane cuine, ben' zu puesto gati por nun quia' në'ëdi', hue'la Diuzi yela' neban quienë' guibá.

*Unë Jesús cabë' di'idza' zela'adyi' ru'e Diuzi benë'*

*(Mr. 9.41)*

<sup>40</sup> Na' una Jesús:

—Chi nu ben' rezila'adyi' le'e, lëscan' në'ëdi'cazirë rezila'adyi'rëjë'. Chi nu ben' rezila'adyi' në'ëdi', lëscan' rezila'adyi'rëjë' Diuzi, ben' use'ela' në'ëdi'.

<sup>41</sup> Nu ben' rezila'adyi'rë ca una yaca profeta, porque dan' nacayaquë' ben' za'lao Diuzi, na'ra con cabë' hue Diuzi ben' profeta ben' ze, cana' huerë Diuzi lëbë' ben' ze. Nu ben' rezila'adyi'rë ca una tu ben' quie Diuzi, porque dan'

naquë' ben' quie Diuzi, na'tera con cabë' hue Diuzi ben' quienë' ben' ze, cana' huerë Diuzi lëbë' ben' ze.

<sup>42</sup> Nu ben' hue' chan' tu vazozi nisa zaga ben' quia', porque dan' naquë' ben' quia', decazide hue Diuzi lëbë' ben' ze. —Cana' una Jesús gudyinë' leyaquë'.

## 11

*Use'ela' Juan bautista ben' quienë' yena'jë' Jesús  
(Lc. 7.18-35)*

<sup>1</sup> Cati beyudyi pxi'idze' Jesús lao chipchopa ben' quië', caora na' zeyoguë' tzetixogue'në' ja benë' yu'uja yedyi rega'n ga'ala' gan' rdë'.

<sup>2</sup> Nu cati dyiguiba yu'u Juan na' cati unezinë' cabë' barue Cristo. Na'ra use'ela'në' bala ben' quienë' ta tzena'jë' Jesús.

<sup>3</sup> Na'ra unajë' rëbijë' lënë':

—¿Naco' ben' na Diuzi ise'ela'në' o chi ben' tula reya'ala' cuzando'?

<sup>4</sup> Na'ra bequëbi Jesús rëbinë' lëjë':

—Uletzio uletzeguëdyi Juan cabë' rlë'ële rele.

<sup>5</sup> Ulehue' lënë' di'idza' yëbilenë' cabë' babeyaca ja ben' laochula, barelë'ëjë'. Na' ja ben' zi, babeyacajë', baredajë'. Na' ja ben' yu'u yela' hue' ta rutao lëjë', babeyacajë', babezijë'. Na' ja ben' bireja, babeyacajë', bareyëjë'. Na' ja ben' bagutija, babebanrëjë'. Na' ja ben' yëchi', rguixogu'ajë' ca na xti'idza' Diuzi ta inezijë' bi huejë' ta yeyojë' guibá.

<sup>6</sup> Huaca huen quie ben' biusan sudyi'ilë në'ëdi'.

<sup>7</sup> Cati beza' ja ben' quie Juan, na'ra uzulao Jesús ru'elënë' benë' di'idza' rëbinë'jë' ca naca quie Juan. Cani unë':

—¿Bidan' uyole yena'le lao lato dachi ga bidyia yu'u? ¿Uyole yena'le tu yaga yëto ru'a be ni'nila?

<sup>8</sup> Quele lena' uyole yena'le. ¿Bižidan' uyole yena'le chi quele lena' uyole yena'le? ¿O chi uyole yena'le tu ben' zë zabe tzao'? Na' nu ben' zë zabe tzao' bitajë' lao lato dachi ga bidyia yu'u. Quele lena' uyole yena'le.

<sup>9</sup> ¿Cabizi' uyole yena'le? ¿Uyole yena'le tu ben' naca profeta? Talicazi naca Juan profeta. Nacarë' ben' tzaora' ca ja profeta.

<sup>10</sup> Lëquie Juan na', ben' cuialao laohua', quie lëbë' rguixogue' guichi la'ya quie Diuzi cani:

Ise'ela' Diuzi tu ben' cuialao neza ga tza' cuenda tzetixogue'në' yaca benë' huida' në'ëdi'.

<sup>11</sup> Tali rnia' le'e, lao yugu ja benë' baoyu'uja yedyi layu hasta na'a, nitujë' binegacajë' ben' ze ca Juan bautista. Dechan' nu ben' binacate ze ga rnabë' Diuzi guibá, nacacazirë' ben' zera ca Juan.

<sup>12</sup> Desde cati bida Juan bautista hasta na'a, raca ja benë' dila condre yela' rnabë' quie Diuzi. Du rdilajë' rguilojë' bi huejë' ta useyudyi usedujë' lëbë'.

<sup>13</sup> Yugulu ja ben' udixogue' tiempote cabë' na Diuzi, len cabë' na di'idza' bzu Moisés lé'ë guichi hasta cati bla' Juan, unëjë' quie dza zaza'ra cati inabë' Diuzi lao yedyi layu.

<sup>14</sup> Chi ralele ca nia' quie Juan, huanezile babidalanë' lao laza profeta Elías, ben' yeguidacazi.

<sup>15</sup> Reya'ala' tzu'u guicho nagale ca nia'.

<sup>16</sup> ¿Cabi di'idza' inia' le'e ta tzioñe'ele cabë' naca yela' zidi quie ja ben' nita' na'a? Ruejë' ca quie xcuidi' re' lao ye'eya bire'enjabi' quitulëjabi' laguedyi xcuidi'jabi'.

17 Na'ra laguedyi xcuidi'jabi' rucuedyijabi' bdyio tacuenda uya'a ja xcuidi' bire'en quitu. Pero bire'enjabi' uya'ajabi'. Lena' laguedyi xcuidi'jabi' bilajabi' canción bayëchi' tacuenda cuedyi ja xcuidi' bire'en quitu. Pero ni cana' biuredyijabi'.

18 Na'ra bē' bida Juan, biudaotza'onē' bihue'enē' vino. Na' le'e unale quiē' yu'unē' taxi'ibi'.

19 Na'ra bē' bida' nē'ēdi', bichi yugulu benē', raohua' ri'oga' cabē' ta ri'o rao ja benē'. Na' rnēle quia' ben' ri'o raolē'ēna', ben' rdalē ja ben' mala len ja ben' huequižu. Lena' nia' le'e, yela' sin' quie Diuzi nenacazi nacan huen.

*Beginni'a Jesús yaca ben' yedyi birale quienē'*

*(Lc. 10.13-15)*

20 Na' ra uzulao Jesús regunni'anē' ja ben' yedyi gan' babērē' yela' huaca quienē' como ja benē' yu'u na' biptza'jē' pensari quiejē' cabē' gudyinē' lējē'. Na'ra unē' rēbinē' lējē':

21 —¡Bayëchi'zi gaca quie le'e ben' ciudad Corazín! ¡Bayëchi'zi gaca quie le'e ben' ciudad Betsaida! Chan' na' guca milagro lao ciudad quie ja ben' Tiro, len lao ciudad quie ja ben' Sidón cabē' milagro guca lao yedyi quiele tiempote, babetza'jē' pensari quiejē', babeyacajē' ben' quie Diuzi chan' na'. Lēzi cana', chan' cana'cala bagucojē' la'ari' ta nena yu'ujē' bayëchi', na' bda'rējē' de guichojē' cabē' costumbre guta' quiejē' cati renabajē' perdón quiejē' lao Diuzi.

22 Pero nia' le'e, cati idyin dza gaca juicio, castigo hualara gata' quiele, quele ca castigo gata' quie ja ben' ciudad Tiro len ja ben' ciudad Sidón.

23 Lēscana' le'e ben' ciudad Capernaum, bigaquele chi huapala'n Diuzi le'e yeyole guibá, dechan' lao gui' gabilala tzirole, porque chan' na' gucarē milagro lao ciudad Sodoma cabē' milagro guca lao ciudad quiele, nere' ciudad Sodoma nedian hasta na'a chan' cana'cala.

24 Lēzi cana' rnia' le'e, cati idyin dza gaca juicio, huata'rē tu castigo hualara quiele, quele ca castigo gata' quie ja ben' ciudad Sodoma.

*Ben Jesús yela' huezila'adyi' quiero*

*(Lc. 10.21-22)*

25 Lēlao tiempo na' una Jesús rēbinē' Xuzinē' caniga:

—Ben' ze naco' luē' Xuza'. Naco' xan' guibá len yedyi layu. Diuxcalelo' por nun quie dan' bablu'elo' ca naca tali quio' lao yaca ben' nezi rdzioguejē' inezijē'n. Pero pcachi'lo' ca naca tali quio' lao ja ben' na rioñe'ejē', pero bē' nazijē' birioñe'ejē'n.

26 Cana' nacan Xuza', porque cana' re'enlo' gacan. —Cana' una Jesús rēbinē' Xuzinē'.

Na' una Jesús rēbinē' ben' quiē':

27 —Yugulute ta de baben Xuza' nē'ēdi'. Tuzi Xuza' Diuzi nubē'nē' nē'ēdi' naca' zi'inē'. Na' ben' re'en huebē' cabē' naca Diuzi, nē'ēdi' uzioñe'eda' lējē' ta huebē'jē' cabē' naca Diuzi. Tuza' nē'ēdi'lia' lējē' nubē'ndo' Diuzi.

28 Uleda gacalēle nē'ēdi' tuže, yugulu le'e, ben' barexaque quie dula' xquia quie, ben' barexaque cabē' tazēdi' raca quie. Nē'ēdi' guna' huezila'adyi' quiele.

29 Ulehue quiele di'idza' quia' cabē' rnia' le'e. Ulesēdi cabē' naca quia' como dan' naca' ben' zela'adyi', ben' laxta'o gaxo. Chi hue quiele cabē' nia' le'e, huata' yela' huezila'adyi' quiele.

30 Ca naca dyin re'enda' huele, binacatigan zēdi. Ca naca yua' re'enda' hua'ale, binacatigan zi'i.



## 12

*Bezi' ja ben' quie Jesús trigo dza huezila'adyi'*  
(Mr. 2.23-28; Lc. 6.1-5)

1 Na'ra guca dza na' tu dza huezila'adyi', uza' Jesús ziolënë' yaca ben' quienë' udejë' ga nazajë' trigo. Na' nun quie udeue yaca ben' quie Jesús, sulaojë' ralojë' dao quie trigo raojë'n.

2 Cati blë'ë ja ben' fariseo cabë' rue ja ben' quie Jesús, na' unëjë' rëbijë' Jesús: —Una'cara, barue ja ben' quio' dyin ta biru'en lato huejë' dza huezila'adyi'.

3 Na' unë Jesús rëbinë' lëjë':

—¿Binelabale cabë' bë rey David lënë' yaca ben' quië' bë' udeujë' dza na'?

4 Uyu'unë' lu'u idao' rnabë'ra udaohuë' yëta xtila naca gun quie Diuzi ta biru'en lato gaohuë', ni lëbë', ni ben' quië'. Tuzi ja pxuzizi ru'en lato gaojë'n. Pero cala xquia bënë', bënë' cana'.

5 ¿Lëzi binena'le lë'ë ley quie Moisés ga rguixogue'n quie ja pxuzi, ben' rue dyin lu'u idao' rnabë'ra? Bibezi'la'adyi'jë' dza huezila'adyi', pero bëjë' dyin lu'u idao' rnabë'ra, dechan' quele xquia bëjë', bëjë' cana'.

6 Na'ra rnia' le'e, nacara' në'ëdi' balaora ca idao' rnabë'ra.

7 Le'e binetziõe'ele cabë' na lë'ë guichi la'iya quie Diuzi ga una Diuzi: “Re'enda' yeyëchi'la'adyi'le benë'. Lena' nacaran belao quele ca ta udyiale nu bia naca gun quia' ru'aba.” Chi uyoñe'ele cabë' na Diuzi, bigaole xquia ben' bide falta quie.

8 Në'ëdi', bichi yugulu benë', rnabi'a quie yugulute ta raca dza huezila'adyi'.

*Beyue Jesús tu ben' neseco në'ë*  
(Mr. 3.1-6; Lc. 6.6-11)

9 Na'ra uza' Jesús zioquë' uyu'unë' lu'u idao' quieyaquë' laona sinagoga.

10 Na' zu tu be'mbyu neseco në'ë. Na'ra yaca ben' zu na' rguilola'adyi'jë' gaojë' Jesús xquia. Lena' unabajë' lëbë':

—¿Ru'en lato yeyuero benë' dza huezila'adyi'?

11 Na'ra bequëbi Jesús rëbinë' lëjë':

—¿Chi nu le'e zu tu beco' zi'ila' quiele bguinuba' lu'u pozo dza huezila'adyi', quele seguro na' huayole tzeliolëba'?

12 ¿Como binezile zaca'ra tu be'mbyu quele ca tu beco' zi'ila'? Quie lena' ru'en lato yeyuero benë' dza huezila'adyi'.

13 Na'ra una Jesús rëbinë' ben' neseco në'ë:

—Bli nao'.

Na' cati belinë' në'ë, beyacan cabë' naca itzala' në'ë dya'a.

14 Na' uza' ja ben' fariseo ziojë' uzulaojë' rusaque'jë' bi huejë' ta gutijë' Jesús.

*Desde tiempote udixogue' Isaías cabë' hue Jesús*

15 Cati unëzi Jesús gu'unjë' gutijë' lëbë', uzë'ë zioquë' tatula. Na' ben' zë gula zio zënao lëbë'. Reyuenë' yugulu yaca ben' raca zhue'.

16 Na'ra bë Jesús lëjë' mandado ta biquixogue'jë' cabë' bënë' quiejë'.

17 Cana' bë Jesús tacuenda su di'idza' cabë' una profeta Isaías dza na'te caora udixogue'në' ca una Diuzi caniga:

18 Ben' niga ben' rue dyin lao laza', ben' ulioga', nedyë'ëda'në' redaohueda' cabë' ruenë'.

Udzi'a Bichi Be quia' lu'u guicho laxta'onë'.

Huaguixogue'në' yaca ben' nita' lao yedyi layu ca tali rchugubi'a quiejë'.

19 Bihuenë' huenë, biinënë' snia, bihuenë' zëdi tu neza.

20 Xela'adyi'nè' ben' raca bayèchi' quie, yeyèchi'la'adyi'nè' ben' re'en usan xquia quie.

Cana' huenè' hasta que idyinnè' inabè'nè' huenè' tali lao yedyi layu.

21 Sudyi'ilè' yaca ben' nita' lao yedyi layu lènè'.

Cana' udixogue' Isaías tanun quie Diuzi dza na'.

*Udaojë' Jesús xquia najè' yu'unè' taxi'ibi'*

*(Mr. 3.19-30; Lc. 11.14-23; 12.10)*

22 Na'ra uquiè'jè' tu ben' laochula, ben' birnè, lao Jesús. Ben' na' uyu'u taxi'ibi' lu'u laxta'onè'. Beyue Jesús lènè', belè'ènè', benènè'.

23 Na' bebane ja ben' zè unajè' rëbijè' laguedyijè':

—¿Quele ben' niga ži'i David, ben' use'ela' Diuzi?

24 Na' cati be yaca ben' partido fariseo cabè' una ja benè', na'ra unajè' rëbijè' lëjë':

—Yela' huaca quie Beelzebú xan' taxi'ibi' rbio ben' niga yaca taxi'ibi' yu'u laxta'o benè'.

25 Na' gucabè' Jesús cabè' pensari racajè'. Quie lena' unè' rëbinè' lëjë':

—Chi zu tu gobierno nacajè' zè cue' rdilalëjë' laguedyijè', na'ra bisibè'jè' zidza. Lëscan' nu yedyi, o nu familia, chi rdilalëjë' laguedyijè', huadztatjè', bira tzu'ujè' tzaže.

26 Cana' nacarèn quie Satanás. Chi Satanás rbionan yaca taxi'ibi' quienan, chi rdilalënan laguedyinan, bisuenan inabè'nan zidza.

27 Na' le'e nale rbioga' taxi'ibi' yu'u laxta'o benè' tanun quie yela' huaca quie Beelzebú. Na'ra nia' le'e chi nacan cana', ¿nuži ru'e yela' huaca quie ja ben' quiele rbiojë' taxi'ibi'? Na'zi rulu'en quiele nequixile cabè' nale.

28 Nè'èdi' rbioga' yaca taxi'ibi' conlè yela' huaca quie Bichi Be quie Diuzi. Lena' rulu'en abdyin yela' huaca quie Diuzi laole, pero birezaquele abdyin-nan.

29 'Bisague' tzu'u benè' zan yu'u quie tu ben' tzutzu huala ta si'nè' ta de quienè' chi biuquionè' lènè'. Chi uquionè' lènè', na'ra huazaque' si'nè' ta de quienè'. Cana' rua' quie xan' taxi'ibi', ruquioga'nan tacuènda bira inabè'nan.

30 'Nu ben' bizèlè nè'èdi' tzaže, naca quienè' ca quie ben' rudie nè'èdi'. Nu ben' biracalè nè'èdi' rua' dyin quie Diuzi, naca quienè' ca quie ben' rchugu dyin quia'.

31 'Tana' lena' rnia' le'e, zu Diuzi dispuesto si'ženè' yugulu xquia quie ja benè', yugulu di'izda' mala rnèjë', pero chi rna ja benè': "Dyin quie taxi'ibi'" na' dyin quie Bichi Be quie Diuzi na', chi cana' rutasi runiojë' lëbè', bide yela' huazi'ze quiejè' lao Diuzi.

32 Nutezi ben' rnè condre nè'èdi', ben' naca bichi yugulu benè', zu Diuzi dispuesto yezi'ženè' dula' xquia quiejè'. Pero nu ben' rnè: "Dyin quie taxi'ibi'" na' dyin quie Bichi Be quie Diuzi na', biyezi'ze Diuzi dula' xquia de quiejè' dan' unajè' cana'. Tuzioli huanao dula' xquia quiejè' lëjë'.

*Unè Jesús quie ben' mala len quie ben' dya'a*

*(Lc. 6.43-45)*

33 Na' una Jesús:

—Nu yaga dya'a rbian tazixi dya'a, pero nu yaga mala birbian tazixi dya'a. Según cabè' naca tazixi dya'a yaga, lena' rlu'en chi yaga dya'a, chi yaga mala. Ca nu yaga rbian tazixi dya'a, cana' nacarèn quia' como dan' rua' dyin dya'a rcalia' benè'. Lena' ruquixile inale dyin quie taxi'ibi' rua'. Birue taxi'ibi' tadya'a.

<sup>34</sup> ¡Ben' mala gula nacale! Bisaque' inale tadya'a como dan' binacale ben' dya'a. Ca naca di'idza' yu'u ru'ale, cana' nacan ta yu'u lu'u guicho laxta'ole.

<sup>35</sup> Ben' dya'a rnajë' tadya'a, dan' yu'u tadya'a lu'u guicho laxta'ojë'. Pero le'e rnale tamala, dan' yu'u tamala lu'u guicho laxta'ole.

<sup>36</sup> Na'ra rnia' le'e, yugulu di'idza' mala rnë ja benë', huezaca'laon lao Diuzi.

<sup>37</sup> Según bi naque di'idza' rnële dza rdale lao yedyi layu, huachugobë'cazi Diuzi quiele, chi de dula' xquia quiele, chi bide dula' xquia quiele.

*Ben' malaja unabajë' ta hue Jesús tu milagro*

*(Mr. 8.12; Lc. 11.29-32)*

<sup>38</sup> Na'ra yaca ben' partido fariseo len yaca ben' rusëdi ley quie Moisés, unajë' rëbijë' Jesús:

—Maestro, re'enndo' ilë'ëndo' huelo' tu milagro tacuenda inezindo' chi naco' ben' use'ela' Diuzi.

<sup>39</sup> Na' una Jesús rëbinë' lëjë':

—Yaca ben' yu'u tamala lu'u guicho laxta'ohue, ben' rudyiga Diuzi tzala'la, re'entejë' ilë'ëjë' tu milagro ta gaca seña ta inezijë' chi tali use'ela' Diuzi në'edi'. Pero tuzi milagro ilë'ëjë', hualë'ëjë' ca milagro bë Diuzi dza uda profeta Jonás lao yedyi layu.

<sup>40</sup> Ca guca quie Jonás dza na', uyu'unë' lu'u lë'ë tu bela ze tzona dza len tzona yela, cana' gacaré quia' në'edi', ben' naca bichi yugulu benë'. Huayua' lu'u yu tzona dza len tzona yela.

<sup>41</sup> Na'ra rnia' le'e, huezuli yaca ben' yedyi Nínive gaojë' le'e xquia dza gaca juicio como dan' lëjë' sí, ptza'jë' pensari quiejë' caora udixogue' Jonás lëjë' di'idza' quie Diuzi dza na'. Pero le'e, biruzë'nagale quia' ba'ala'cazi nacara' ben' žera ca Jonás.

<sup>42</sup> Lëscana' huezuli reina quie yaca yedyi nebaba Arabia gaohuë' le'e xquia dza gaca juicio como dan' lëbë' sí, uza'në' yedyi quienë' zionë' zitu' gula ta uzë'naguë' ca di'idza' unë rey Salomón, ben' rioñë'e. Pero le'e, biruzë'nagale quia' ba'ala'cazi nacara' ben' žera ca rey Salomón.

*Unë Jesús quie tu taxi'ibi' rero redyin guicho laxta'o benë'*

*(Lc. 11.24-26)*

<sup>43</sup> Na' una Jesús:

—Cati rero bala ja taxi'ibi' lu'u guicho laxta'o ja benë', rdana ga naca bidyi rguilona ga suna. Caora biredzelena ga suna, na'ra rnëna:

<sup>44</sup> “Hueya'a ga beza'a.” Cati abedyinnan beyu'unan lu'u laxta'o ben' na' tatula gan' bronan, caora na' rlë'ëna naca ben' na' ca quie tu yu'u dachi neluba dyë'edi.

<sup>45</sup> Na'ra uyonan yexi'nán igadyi laguedyin ta nacara mala ca lëna. Cana' yu'ujan yugujan lu'u laxta'o ben' na'. Cana' racatera mala quienë' quele cati yu'un tuzin lu'u laxta'onë'. Cana' gacaré quiele nun quie dan' yu'u tamala lu'u guicho laxta'ole.

*Bdyin zna' Jesús lënë' bi' bichinë' gan' zënë' rusëdinë' benë'*

*(Mr. 3.31-35; Lc. 8.19-21)*

<sup>46</sup> Na' neru'elë Jesús benë' di'idza' cati bdyin znë'ë lënë' yaca bi' bichinë'. Bega'një' lali'a reguilojë' lëbë' ta hue'lëjë' lëbë' di'idza'.

<sup>47</sup> Na'ra unë tu ben' zëlë Jesús rëbinë' Jesús:

—Babla' znao' len ja bi' bicho'. Nita'jë' lali'a, re'enjë' hue'lëjë' luë' di'idza'.

<sup>48</sup> Na' una Jesús rëbinë' ben' udixogue' lëbë' cati bdyin znë'ë:

—Babla' zna'a len ja bi' bicha'. Pero nia' le'e, nita'rë ben' naca ca quie zna'a, len ben' naca ca quie bi' bicha' niga.

49 Na' blu'e Jesús gan' zë ja ben' quienë' unë' rëbinë' ben' na':

—Ja ben' rale quia', nacajë' ca quie zna'a, ca quie bi' bicha'.

50 Con nutezi ben' rue quie xti'idza' Xuza', ben' zu guibá, lëlëjè' nacajë' ca quie bi'bicha', ca quie bi' zana', ca quie zna'a.

## 13

*Unë Jesús tu di'idza' quie ben' bë guza*

*(Mr. 4.1-9; Lc. 8.4-8)*

1 Na'ra guca dza na' uza' Jesús zan yu'u uyoguë' yeque'në' ru'a nisa lagun.

2 Na' como dan' begu'udi' ben' zë gan' re'në', uyu'unë' lu'u barco ure'në'. Na' bega'n ja benë' ru'a nisa lagun.

3 Na'ra conlë di'idza' ta nacan irupa iyunala unë Jesús psëdinë' leyaquë' cani:

—Uyo tu be'mbyu guza trigo.

4 Na' ca ruejè' quie trigo, tu ruziozijë'n layu. Na'ra bala bini trigo yeque'jan tu neza. Na' bdyin' bguini aodaoba'n.

5 Ibalan yeque'jan lado yo ga bizubatica yu. Na' laolëtejan dan' žuban yu lasi.

6 Cati bena oba, na' ubidyin dan' biyu'u luena zitu'.

7 Ibalan yeque'jan lado yëchi'. Na' bibë yëchi' lato gue'enin dyë'ëdi.

8 Ibalan yeque'jan ga naca yu dya'a. Na' bë'jan usecho dya'a quien. Balan udyian tu gayuhua žuba' quien. Ibalan udyian tzona galo žuba' quien. Ibalan udyian galobechi žuba' quien.

9 Chi babele dyë'ëdi', ulezënaga can' rnia' na'.

*Una Jesús ga huen dyin di'idza' rusëdinë' benë'*

*(Mr. 4.10-12; Lc. 8.9-10)*

10 Na'ra ubiga' ja ben' quie Jesús ga zënë' unabajë' lëbë':

—¿Bixquien' puro di'idza' ta nacan irupa iyunala rusëdio' benë'?

11 Na' una Jesús rëbinë' lëjè':

—Ruzioñe'e Diuzi le'e bi re'en ina di'idza' rguixogue'n quie yela' rnabë' quie Diuzi. Pero yaca ben' binaca ben' quia', biuzioñe'e Diuzi lëjè'.

12 Nu ben' ruzënaga cabë' rnia', huacalë Diuzi lëbë' ta tzioñe'enë' dyë'ëdi. Pero nu ben' biruzënaga cabë' rnia', huala'adyi'jè' cabë' tadao' abejè'.

13 Tana' lena' rguixogui'a benë' conlë yaca di'idza' ta nacan irupa iyunala, como dan' ba'ala'cazi rlë'ëjè' cabë' rua', ruezijè' ca ben' birlë'ë, ba'ala'cazi rejè' cabë' rnia', ruezijè' ca ben' bire.

14 Cana' naca quejè' cabë' una profeta Isaías dza na' unë':

Ruzënegajè' dyë'ëdi, pero birioñe'ejè'.

Rlë'ëjè' dyë'ëdi, pero biracabè'jè'.

15 Cana' ruejè' dan' yu'u tazidi lu'u guicho laxta'ojè'.

Ruezijè' ca ben' bire, ruezijè' ca ben' netzudi' laohue.

Bire'enjè' ilë'ëjè', nica re'enjè' guejè'.

Bire'enjè' tzioñe'ejè', nica re'enjè' guidajè' ta inaojè' xneza Diuzi yela' na' yezi'zenë' dula' xquia quejè'.

Cana' una Isaías dza na'.

16 Pero le'e sí, raca tahuen gula quiele dan' tali re'enle ilë'ële ca rue Diuzi, tali re'enle guele ca rna Diuzi.

17 Tali ca rnia' le'e, ben' zë, ben' unita' dza na', gu'unjè' ilë'ëjè' cabë' ta rlë'ële, gu'unjè' guejè' cabë' ta rele, pero biuzaque'.

*Udixogue' Jesús ca bi re'en inë di'idza' quie ben' bê guza*  
(Mr. 4.13-20; Lc. 8.11-15)

<sup>18</sup> Na' una Jesús:

—Uzënagale ta inia' le'e ca bi re'en inë di'idza' quie ben' bê guza.

<sup>19</sup> Nu ben' ruzënaga ca naca yela' r nabë' quie Diuzi, pero biralëjè' bihue quieyaquë' xti'idza' Diuzi, hue xan' taxi'ibi' ta gala'adyi'jè' cabë' bejè'. Cana' raca quiejè' ca quie bini trigo yeque'jan tu neza.

<sup>20</sup> Lëscan' nu ben' redaohue ruzënaga xti'idza' Diuzi,

<sup>21</sup> pero bihue quieyaquë'n zidza, naca quiejè' ca quie bini trigo yeque' lado yo ga bižubatica yu biyu'u luena zitu'. Cati raca zëdi quiejè', cati rusaca benë' lëjè' bizinaquezi tanun quie dan' rue quieyaquë' xti'idza' Diuzi, na'ra rusanjè'n, bira rue quieyaquë'n.

<sup>22</sup> Lëscan' nu ben' ruzënaga xti'idza' Diuzi, pero rdëbijè' bi raca quiejè' lao yedyi layu, rza'la'adyi'jè' yela' uña'a, naca quiejè' ca quie bini trigo yeque'n lado yëchi'. Dan' rdëbijè' bi raca quiejè' rza'la'adyi'jè' yela' uña'a, quie lena' biru'en lato huejè' dyin quie Diuzi.

<sup>23</sup> Pero nu ben' ruzënaga xti'idza' Diuzi, na' ralejè'n hue quieyaquë'n, naca quiejè' ca quie bini trigo yeque'n yu dya'a bën usecho. Balan rbian tu gayuhua žuba'. Ibalan rbian tzona galo žuba'. Ibalan rbian galobechi žuba'. Cana' nacajè' ca quie bini trigo. Cana' gacarajè' mazara ben' nao xneza Diuzi.

*Unë Jesús tu di'idza' quie guixi' mala len quie trigo*

<sup>24</sup> Na'ra udixogue' Jesús itu di'idza', unë' rëbinë' lëjè' cani:

—Rnia' le'e naca yela' r nabë' quie Diuzi ca quie tu ben' guza bini trigo layela quie.

<sup>25</sup> Pero du rëla caora rasinë', uyo tu bi' rudie lëbë' guzanë' bini quie guixi' mala lado trigo layela quië'. Na' beza'në' zeyoguë' žan yu'u.

<sup>26</sup> Na'ra gu'uni guixi' mala lëbi len trigo.

<sup>27</sup> Na' uyo ja mozo quienë' yetixogue'jè' lëbë', najè' rëbijè' lëbë': "Señor, baguzando' puro bini trigo layela quio', ¿ga za' guixi' mala den lado trigo quio'?"

<sup>28</sup> Na' una xa'njè' rëbinë' lëjè': "Tu ben' rudie në'ëdi' bê cana'." Na' una mozo quienë' rëbijè' lëbë': "¿Re'enlo' tziondo' tzeguelondo' guixi' mala?"

<sup>29</sup> Pero unë xan' mozo rëbinë' lëjè': "Bihuele cana', dan' hualorële trigo chan' na' galole guixi' mala.

<sup>30</sup> Ulesannan gue'enigaran lëbi. Cati yezi'a usecho quie trigo, cana' hua' mandado zagalo mozo quia' guixi' mala uquiojè'n manojo ibidyin tzeina. Na'tera yezi'jè' trigo yezi'tza'ojè'n žan litya'."

*Unë Jesús tu di'idza' quie tu bini mostaza*  
(Mr. 4.30-32; Lc. 13.18-19)

<sup>31</sup> Na'ra udixogue' Jesús itu di'idza', unë' rëbinë' lëjè' cani:

—Naca yela' r nabë' quie Diuzi ca quie tu bini mostaza ta guza be'mbyu layela quië'.

<sup>32</sup> Tali naca bini mostaza tadao' bicu' ca yaca los demás ja bini. Pero cati re'enin racan tu yaga že, caora na' rdyin bguini rueba' lityiba' lao taca'n.

*Unë Jesús tu di'idza' quie lë'ëti' levadura*  
(Lc. 13.20-21)

<sup>33</sup> Lëscan' udixogue' Jesús itu ejemplo, unë' rëbinë' lëjè' cani:

—Naca yela' r nabë' quie Diuzi ca quie lë'ëti' levadura. Rutupe nigula levadura len tzona medida yëzo trigo ta tzu'un duže cuba, na' chëžin. —Cana' una Jesús rëbinë' lëjè'.

*Con puro di'idza' ta nacan irupa iyunala udixogue' Jesús ja benë'  
(Mr. 4.33-34)*

<sup>34</sup> Na' con puro di'idza' ta nacan irupa iyunala udixogue' Jesús ja benë'. Biudixogue'në' lëjè' con di'idza' binaca di'idza' ta nacan irupa iyunala.

<sup>35</sup> Cana' bënë' tacuenda uzu di'idza' ca di'idza' udixogue' profeta Isaías cabë' rnën lë'ë guichi la'iya cani:

Huaguixogue'në' ja benë' zë di'idza' ta nacan irupa iyunala.

Huanënë' tu ta bineye ja benë' desde dza cati udiXu Diuzi yedyi layu.

*Udixogue' Jesús cabë' re'en inë di'idza' quie guixi' mala ulë lado trigo*

<sup>36</sup> Na' gudyi Jesús ja benë':

—Abeyudyi di'idza'.

Na' bedzatzajë' beza'rë Jesús beyu'unë' zan yu'u. Caora na' bebiga' ja ben' quienë' rëbijë' lëbë':

—Re'enndo' huu' cule yexi'idzo' nëto' quie di'idza' rnën quie guixi' mala ulë lado trigo.

<sup>37</sup> Na'ra una Jesús rëbinë' lëjè':

—Në'ëdi' naca' bichi yugulu benë', naca quia' ca quie ben' raza bini trigo.

<sup>38</sup> Na' dyilayu ni naca quien ca quie layela ga raza' bini trigo. Na' yaca ben' rue quie xti'idza' Diuzi, naca quiejë' ca quie bini trigo. Na' ben' rue cabë' re'en xan' taxi'ibi', naca quiejë' ca quie guixi' mala.

<sup>39</sup> Na' xan' taxi'ibi' naca quien ca quie ben' guza guixi' mala. Bë' rezi'a usecho, lena' rnën quie dza cati iyudyi dyilayu. Na' yaca ángel nacajë' ca quie mozo quia' rezi'jë' usecho.

<sup>40</sup> Cabë' hue ja mozo uzejjë' guixi' mala, cana' gaca quie ben' rue cabë' re'en taxi'ibi' bë' iyudyi dyilayu.

<sup>41</sup> Në'ëdi', bichi yugulu benë', huase'ela' yaca ángel quia' tzexi'jë' yugulu ben' rudze'yela laguedyi, len yugulute yaca los demás ben' napa dula' xquia.

<sup>42</sup> Na' udze'jë' lëjè' lu'u gui' gabila cuedyiya'jë'. Tanto rei rrajë' gaojë' leijë'.

<sup>43</sup> Pero yaca ben' rue quie xti'idza' Diuzi, huata' xni' quiejë' ca tu rna' xni' oba. Cana' gaca quiejë' zujë' ga rnabë' Xuzi-ro Diuzi tuzioli. Ulehue pensari cabë' nia' le'e, dan' ruen zi tzioñe'ele.

*Unë Jesús tu di'idza' quie tu tatzao' negachi'*

<sup>44</sup> Na' una Jesús:

—Yela' rnabë' quie Diuzi nacan ca quie tu tatzao' zaca'n za'ala' gula ta negachi' lu'u yu. Na' caora bedzele tu be'mbyu len, becachi'në'n tatula lu'u yu ga bedzelenë'n. Na'ra redaohuetzeguenë' tzione' tzegueti'në' yugulu ta de quienë' ta yeya'ohué' layu na' ga bedzelenë' tu tatzao'.

*Unë Jesús tu di'idza' quie tu perla zaca'n za'ala' gula*

<sup>45</sup> Na' una Jesús:

—Yela' rnabë' quie Diuzi nacan ca quie tu ben' re'en ga'o tu perla zaca'n za'ala' gula.

<sup>46</sup> Caora abdzelenë' perla na', na'ra tzione' tzegueti'në' yugulu ta de quienë' ta yeya'ohué' perla na'.

*Unë Jesús tu di'idza' quie du yëxo*

<sup>47</sup> Na' una Jesús:

—Yela' rnabë' quie Diuzi nacan ca quie du yëxo rudze' benë' lu'u nisadao' ga tzu'u yugu cue' bela.

<sup>48</sup> Caora abedza' bela du yëxo, na'ra rebiojën ru'a yu bidyi. Na' rbe'jë' rsërejë' bia dya'a, redze'jë'ba' lu'u ga'. Na' reru'unjë' tzala'la bia binaca dya'a.

49 Cana' gaca cati iyudyi quie dyilayu. Huayo ja ángel ta tzesëreyaquë' ben' mala len ben' dya'a.

50 Na' huaru'unyaquë' yaca ben' mala lu'u gui' gabila cuedyiya'jè'. Tanto rei rlajë' gaojë' lejè'.

*Unë Jesús tu di'idza' quie tu tagula len tu tacubi*

51 Na'ra unaba Jesús rëbinë' lëjë':

—¿Baoyoñe'ele yugulu cabë' ta aonia' le'e?

Na' unajë' rëbijë' Jesús:

—Aja' Señor, aoyoñe'endo' yugun.

52 Na' una Jesús rëbinë' lëjë':

—Tahuen na' aoyoñe'ele, dan' nu ben' rsëdi guichi la'iya quie Diuzi, na' rioñe'enë' cabë' nan, naca quienë' ca quie ben' xan' yu'u, ben' gabi rdziogue quie. Aozì'në' tagula ta pca'n xuzinë' quienë'. Lëscan' bënë' gan tazëra tacubi. Tana' lena' bibi rdzioguenë' zan yu'u quienë'.

*Cabë' bë Jesús cati bedyinnë' yedyi quienë' Nazaret*

(Mr. 6.1-6; Lc. 4.16-30)

53 Cati beyudyi bë'lë Jesús leyaquë' di'idza', na' bezë'ë zeyoguë'.

54 Na' bedyinnë' yedyi quië', uzulaohuë' rusëdië' ja benë' lu'u idao' sinagoga. Na'ra beban ja benë' rëbijë':

—¿Ga uyo ben' niga huesëdi como rioñe'enë' ta zë? ¿Cómo raquë' rue milagro?

55 Na' zi'i carpintero naquë'. Znë'ë naca María. Naca bichinë' Santiago, len José, len Simón, len Judas.

56 Lëscana'rë bi' zannë', nita'jabi' ladoro niga. ¿Ga psëdinë' cabë' dan' rnënë' ra'o? —Cana' unajë' quie Jesús.

57 Pero bibëjë' lëbë' casa cabë' unë'. Na' una Jesús rëbinë' lëjë':

—Con gатеzi tzio ben' rguixogue' di'idza' quie Diuzi, nita' ben' hue lëbë' casa. Pero ben' lao yedyi quië' len ben' naca familia quië', bihuejë' lëbë' casa. —Cana' una Jesús rëbinë' lëjë'.

58 Tana' lena', bibë Jesús zë milagro gan', dan' bibëjë' casa quienë'.

## 14

*Cabë' guca cati bëtijë' Juan bautista*

(Mr. 6.14-29; Lc. 9.7-9)

1 Na'ra guca dza na' naca Herodes gobernador, ben' r nabë' estado Galilea. Na' udixogue' yaca benë' Herodes cabë' rue Jesús.

2 Na'ra una Herodes rëbinë' laguedyinë':

—Ben' rue cana' naquë' Juan bautista. Bebannë' bezë'ë ga yu'u ja ben' huati. Tana' de fuerza quië' ruenë' milagro.

3 Na' aozì' Herodes žgula bichinë' Felipe. Lënigula na' laohuë' Herodías. Na' tanun quie Herodías bë Herodes mandado bëxuyaquë' Juan, bdze'jë' lëbë' lu'u dyiguiba, pquiojë' lëbë' caden.

4 Cana' bë Herodes como dan' una Juan gudyinë' lëbë':

—Bireya'ala' huela'onë' ca nigula quo'.

5 Na' gu'un Herodes gutinë' Juan, pero bdzebinë' ja benë' dan' rlë'ëjë' Juan ben' rnë lao laza Diuzi.

6 Na' cati uzu dza lani quie Herodes, uyo zi'i nigula Herodías ta bya'abi' lao ja ben' yu'u ja ga raca lani. Lega yaxe Herodes cabë' bëbi'.

7 Tanto yaxenë' cabë' bëbi' unë' rëbinë' lëbi':

—Con bitezi ta inabo' nē'ēdi', naguncaza'n, ruguntia' Diuzi.

<sup>8</sup> Na'ra como dan' abega'nlēbi' zna'bi' di'idza' cabē' inababi' lēbē', na'ra unabi' rēbibi' Herodes:

—Re'enda' gunlo' nē'ēdi' guicho Juan bautista dyian tu lu'u plato.

<sup>9</sup> Cati be rey Herodes cabē' una nigula dao', guquenē' bayēchi'. Pero bēnē' mandado huejē' cabē' unababi' lēbē', como dan' cana' abgunnē' Diuzi, babe ben' yu'uja lanī ca di'idza' bē'lēnē' nigula dao'.

<sup>10</sup> Na'ra bēnē' mandado yechugojē' luba' Juan ga yu'unē' lu'u dyiguiba.

<sup>11</sup> Na' yechugojē'n yesanjē' guicho Juan dyian lu'u plato. Bezi' nigula dao' len, beyu'ebi'n zna'bi'.

<sup>12</sup> Na' bdyin ben' quie Juan bezi'jē' cuerpo quienē' ta pcachi'jē'n. Ude na', uyojē' yetixogue'jē' Jesús.

*Bgao Jesús ga'yo' mila benē'*

*(Mr. 6.30-44; Lc. 9.10-17; Jn. 6.1-14)*

<sup>13</sup> Na' cati unezi Jesús cabē' guca quie Juan, na'ra uzē'ē zioquē' cuinzē' lu'u barco bdyinnē' ru'a lagun ga bizu ja benē'. Pero cati unezi ja benē' gan' zio Jesús, na' uza'jē' ziojē' ru'a yu bidyi yetilajē' lēbē'.

<sup>14</sup> Cati beo Jesús lu'u barco, blē'ēnē' nita' ja ben' zē rbezajē' lēbē'. Na' beyēchi'la'adyi'nē' lējē', beyuenē' ja ben' raca žhue' nu'ajē'.

<sup>15</sup> Como dan' barala, na' uyo ja ben' quie Jesús yeguēdyijē' lēbē':

—Baodze' na'a. Gabi yu'u dyia niga. Na' gudyijē' yeyojē' ja yedyi re' ga'ala' ta ga'ojē' ta gaojē'.

<sup>16</sup> Na' una Jesús rēbinē' lējē':

—Biruen zi yeyojē'. Ulehue'jē' ta gaojē'.

<sup>17</sup> Na' unajē' rēbijē' Jesús:

—Ga'yo'zi yēta xtila len chopazi bela de. Gabira bide.

<sup>18</sup> Na' una Jesús rēbinē' lējē':

—Uleguncaran niga.

<sup>19</sup> Na'ra bē Jesús mandado cue' ja benē' lao guiži. Na' aozī'nē' ga'yo' yēta xtila len chopa bela. Na' bēxunē'n unē'ē guibá rēbinē' Diuzi: “Diuxcalelo'.” Na' bžužunē' yēta xtila, bē'nē'n ja ben' quienē', udisijē'n bē'jē'n benē'.

<sup>20</sup> Yugulujē' udaojē' beloje' dyē'ēdi. Beyudyi bedaojē', bedza' chipchopa ga' naga ta yožo bega'n.

<sup>21</sup> Ga'yo' mila be'mbyu udaoja, apartela ja nigula len ja xcuidi'.

*Uza' Jesús lao nisa*

*(Mr. 6.45-52; Jn. 6.16-21)*

<sup>22</sup> Na'ra bē Jesús mandado tzu'u ja ben' quienē' lu'u barco ta cuialaojē' lēbē' tziojē' itzala' lagun. Na' bega'n Jesús ta yese'elē' ja benē' yeyojē' zan yu'u quiejē'.

<sup>23</sup> Bē' beyudyi bese'elē' ja benē' zan yu'u quiejē', na'ra zio Jesús urēnē' lao ya'a tzegue'lēnē' Diuzi di'idza' cuinzinē'. Cati uxin, nezu Jesús na' cuinzinē'.

<sup>24</sup> Na' nezu Jesús lao ya'a cati abdyin barco gatzo lagun. Na'ra uzulao rda be bedun', bdā'n nisa lē'ē barco, redyigan len guzu xcu'udzula, biru'en lato tenan.

<sup>25</sup> Na' du balara rza' Jesús lao nisa ubiguē' ga'ala' ga re'jē' lu'u barco.

<sup>26</sup> Cati blē'ē ja ben' quienē' lēbē' rza'nē' lao nisa, na'ra bdzebijē' ure-dyiya'jē' unējē':

—jLudza' ben' huati rza' na'!

<sup>27</sup> Na' unē Jesús rēbinē' lējē':

—jNē'ēdi' Jesús! jBidzebile!



28 Na' una Pedro rëbinë' Jesús:

—Señor, chi luë' na', ben lato sa' lao nisa guida' gan' zao'.

29 Na' una Jesús rëbinë' lëbë':

—Uda, chi'.

Na' uyëzi Pedro lao barco uzulaohuë' rza'në' lao nisa ta idyinnë' ga zë Jesús.

30 Caora gucabë' Pedro rda be bedun' fuerte gula, na' bdzebinë' uzulaohuë' bëtoquë' lu'u nisa. Lena' uredyia'në' rëbinë' Jesús:

—Psela në'ëdi', Señor.

31 Na'ra labëxute Jesús në'ë rëbinë' lënë':

—¿Bizi ledao'zi zudyi'ilëlo' në'ëdi'! ¿Bixquien' rdzebo'?

32 Cati beyu'ujë' lu'u barco, na' uleza be.

33 Na'ra yaca ben' yu'u lu'u barco, udituzibijë' lao Jesús rëbijë' lëbë':

—Luë' sí, tali naco' zi'i Diuzi.

*Beyue Jesús ben' raca zhue', ja ben' quie yu nebaba Genesaret*

*(Mr. 6.53-56)*

34 Na' udejë' lao lagun bdyinjë' itzala' lagun ga nebaba Genesaret.

35 Caora bezaque ja ben' nita' na' Jesús na', na'ra use'ela'jë' di'ida' lao yugulu ben' yedyi nita'ja na'. Na' nu'ajë' ben' raca zhue' bdyinjë' ga zë Jesús.

36 Na' unabajë' chi bihue'në' lato guxujë' siquiera diba zu ni'a zabë'. Na' yugulu ja ben' bëxuja len, beyacajë'.

## 15

*Unë Jesús quie ta nuen benë' badza' lao Diuzi*

*(Mr. 7.1-23)*

1 Na'ra uza' bala ben' partido fariseo len bala ben' rusëdi ley quie Moisés, uza'jë' ciudad Jerusalén bdyinjë' ga zu Jesús. Na' ubiga'jë' rëbijë' lëbë':

2 —¿Bixquien' birue ja ben' quio' cabë' naca costumbre quie xuzixta'oro' Birguibijë' na'ajë' cati zagaojë' tacuenda ilë'ë Diuzi lëjë' nacajë' yëri.

3 Na' una Jesús rëbinë' lëjë':

—¿Bixquien' reru'unle tzala'la cabë' mandado bë Diuzi huero, na' nenaole costumbre ruele ta biuna Diuzi?

4 Dza tiempote una Diuzi: “Gapala'nle xuzi zna'le.” Lëscan' una Diuzi: “Nu ben' rnaya' quie xuzi znë'ë, reya'ala' gatinë'.”

5 Pero le'e rnale ru'en lato ina benë' yëbijë' xuzi zna'jë': “Bibi de guna' le'e, dan' yugulu ta de quia' habi'a Diuzi gacan gun quienë'.”

6 Le'e rnale chi yëbïro xuzi zna'ro cana', bira nacan cuenda quiero gacalëro xuzi zna'ro. Cana' rudyigale tzala'la cabë' mandado bë Diuzi huero, na' nenaole costumbre ruele ta biuna Diuzi.

7 ¡Le'e ben'rnë di'ida' de ladzazi! Dyë'ëdi uduxogue' ben' profeta Isaiás cabë' raca quiele caora bzunë' di'ida' lë'ë guichi la'ïya quie Diuzi dza na'. Lëdi'ida' na' rnën caniga:

8 Lëben' niga rionela'adyi'jë' Diuzi de di'ida'zi, birionela'adyi'jë' në'ëdi' du guicho du la'adyi'jë'.

9 Bibi sirve gapala'një' Diuzi.

Ta racazi la'adyi'jë' rusëdijë' benë', yë' rzi'jë' rnajë' cana' una Diuzi.

10 Na'ra guzi Jesús ja benë' rëbinë' lëjë':

—Ulezëcara nagale ta tzioñe'ele:

11 Ca ta tzu'u lu'u ru'a benë' gaojë', binacajë' badza' lao Diuzi. Pero di'ida' mala rero lu'u ru'ajë', lena' nuen benë' badza' lao Diuzi. —Cana' una Jesús rëbinë' lëjë'.

12 Na'ra ubiga' ja ben' quie Jesús ga zënë' rëbjië' lëbë':

—¿Bigucabë'lo' bdza' ja ben' partido fariseo cabë' unao' bachi?

13 Na' una Jesús rëbinë' lëjë':

—Nacajë' ca quie guixi' mala. Na' bizi puro bini dya'a raza Xuza' Diuzi zu guibá. Yugulu ta biguza Xuza' Diuzi, huadolon len luanan.

14 Ulesan quiejë'. Nacajë' ca quie ben' laochula, ben' tzehua'a itu ben' laochula. Chi tzehua'a tu ben' laochula itu ben' laochula tu neza, rupatejë' iguinujë' lu'u yëro.

15 Na' una Pedro rëbinë' Jesús:

—Yexi'idzo' nëto' bi re'en ina di'idza' baonao'.

16 Na' una Jesús rëbinë' lëjë':

—¿Lente le'e biuyoñe'erële?

17 ¿Binezile yugu ta rao benë' zion lu'u lë'ëjë', te na' yeguichijë'n binuen lëjë' badza' lao Diuzi?

18 Pero di'idza' mala rero lu'u ru'ajë', len ulën laxta'ojë'. Lena' nuen lëjë' badza' lao Diuzi.

19 Cati rero pensari mala lu'u laxta'ojë', caora na' rutijë' laguedyijë', rdalëjë' nigula quie ben' tula, rdalëjë' nigula cuidi', rbanjë' quie laguedyijë', rzi'jë' yë' laguedyijë', ru'ejë' di'idza' bizo.

20 Chi ruejë' cana', nacajë' badza' lao Diuzi. Pero chi raojë' du bineyëri na'ajë', lena' binuen lëjë' badza' lao Diuzi. —Cana' una Jesús rëbinë' lëjë'.

### *Tu nigula binaca ben' Israel gulënë' quie Jesús*

*(Mr. 7.24-30)*

21 Na' uza' Jesús zioguë'. Na' ga bdyinnë' nacan ga'ala' ga re' ciudad Tiro len ciudad Sidón.

22 Na' uza' tu nigula Cananea, ben' nita' ciudad na', zioguë' bdyinnë' ga zu Jesús. Rbedyiya'në' unë' rulidzanë' Jesús:

—Señor, zi'i rey David luë', beyëchi'la'adyi' në'ëdi'. Yu'u taxi'ibi' lu'u laxta'oz i'ina' nigula. Lega ruluquen lëbi'.

23 Pero ni tu di'idza' biunë Jesús. Na' ubiga' ja ben' quië' unajë' rëbjië' lëbë':

—Ulaolo' nigula ni, dan' za'në' zenaonë' ra'oz, rbedyiya'në'.

24 Na' una Jesús rëbinë' lëbë':

—Lao ja ben' Israelzi aose'ela' Diuzi në'ëdi'. Nacajë' ca quie beco' zi'ila' aoniti tu neza.

25 Na' ubiga' nigula ga zë Jesús, uditzunë' zibinë' laohuë' unë' rëbinë' lëbë':

—Señor, gualë në'ëdi'.

26 Na'ra una Jesús rëbinë' lëbë':

—Bireya'ala' si'ro yela' huao ta rega'n rao yaca xcuidi', tzechu'unron ta gao yaca beco' dao'.

27 Pero na' una nigula na' rëbinë' Jesús:

—Sí, Señor, pero lente yaca beco' dao' raoyacaba' yaca pedazo rguino layu ga rao yaca xcuidi'.

28 Na' una Jesús rëbinë' lëbë':

—Zana', dan' rzudyi'ilëlo' në'ëdi' dyë'ëdi gula, huacan cabë' re'enlo'. —Cana' una Jesús rëbinë' lëbë'.

Na'ra lëhora na'tezi, beyaca zi'inë' dya'a.

### *Beyue Jesús ja ben' zë, ben' raza mala quieja*

29 Na' uza' Jesús zioguë' udenë' ru'a lagun quie Galilea, bdyinnë' urënë' ure'në' tu lao ya'a.

<sup>30</sup> Na' bdyin ja ben' zë ga zë Jesús. Nu'ajë' nu ben' zi, len ben' laochula, len ben' biraca rnë, len ben' neseco në'ë, len ben' neseco ni'e. Nu'ajë' zë ben' raca zhue'. Na' udixojë' lëjë' laohuë', beyuenë' lëjë'.

<sup>31</sup> Cana' beban ja benë' cati blë'ëjë' cabë' bë Jesús quie ben' naca mala quie. Blë'ëjë' benë' biraca inë, blë'ëjë' abelë'ë ben' laochula. Na'ra unajë' rëbijë' laguediyjë': "Naca Diuzi quie ben' Israel ben' ze." Cana' unajë'.

*Bgao Jesús tapa mila benë'*  
(Mr. 8.1-10)

<sup>32</sup> Na' guzi Jesús yaca ben' quienë' unë' rëbinë' lëjë':

—Reyëchi'la'adya' yaca ben' niga, dan' baguca tzona dza zulëjë' në'ëdi' niga, abeya ta gaojë'. Bireya'ala' yese'ela'jë' zan yu'u quiejë', dan' binegaojë' usu'unan lëjë' tu neza.

<sup>33</sup> Na' una ja ben' quienë' rëbijë' lëbë':

—Bizi huero idzeleroyela' huao ta gao ja ben' zë niga. Gabi yu'u dyia ni.

<sup>34</sup> Na' una Jesús rëbinë' lëjë':

—¿Bala yëta xtila de quiele?

Na' unajë' rëbijë' Jesús:

—Gadyizin len tu chopazi bela dao'.

<sup>35</sup> Na' ra bë Jesús mandado cue' ja benë' layu.

<sup>36</sup> Na' uzi'në' bëxunë'n bë'në'n ben' quie', udisijë'n bë'jë'n yaca benë'.

<sup>37</sup> Na' aodaojë' yugulujë' belojë'. Ude beyudyi na', bedza' gadyi chicuiti tayožo bega'n.

<sup>38</sup> Na' aodao tapa mila be'mbyu, apartela nigula len xcuidi'.

<sup>39</sup> Ude beyudyi udaojë', bese'ela' Jesús lëjë' zan yu'u quiejë'. Na' uyu'unë' lu'u barco uza'në' zionë' yu nebaba Magdala.

## 16

*Ja ben' partido fariseo len ja ben' partido saduceo gu'unjë' hue Jesús tu milagro ta ilë'ëjë'*

(Mr. 8.11-13; Lc. 12.54-56)

<sup>1</sup> Na'ra uyo ben' partido fariseo, len ben' partido saduceo yena'jë' Jesús ta huejë' trampa quienë' ta gaojë' lëbë' xquia chi bihue ca ta inabajë' huenë'. Cana' unabajë' huenë' tu milagro quie zan guibá ta ilë'ëjë'.

<sup>2</sup> Pero na' una Jesús rëbinë' lëjë':

—Como dan' rna' zna guibá du zadze', na'ra inale: "Huen dya'a uxe."

<sup>3</sup> Lëscan' cati zë beo zna guibá du ziladao', na'ra inale: "Bihuen dya'a na'a." Pero rnia' le'e, ben' tondo nacale. Banezile bi ta ilë'ële ta yezaque'le chi huen dya'a, chi bihuen dya'a, du na'a, du uxe. Pero binezile bi ta ilë'ële ta yezaque'le bi raca lao yedyi layu dza quiele.

<sup>4</sup> Yela' ben' mala quiele, yela' psanla'adyi' Diuzi quiele, rnabale hua' milagro ilë'ële. Pero rnia' le'e, tuzi milagro ilë'ële, huelë'ële gaca quia' cabë' milagro guca quie ben' profeta Jonás.

Te beyudyi una Jesús cana', psannë' lëjë' uza'në' ziogué'.

*Bireya'ala' gacaro pensari ca pensari raca ja ben' partido fariseo len ja ben' partido saduceo*

(Mr. 8.14-21)

<sup>5</sup> Na' uza' Jesús lënë' yaca ben' quienë' ziojë' itzala' lagun. Na' agula'adyi' ja ben' quie Jesús hua'ajë' yëta xtila.

6 Na'ra una Jesús rëbinë' lëjë':

—Cani rnia' le'e, gapale cuidado quie levadura quie ben' partido fariseo len ben' partido saduceo.

7 Na' uzulao ja ben' quie Jesús rëbijë' laguedyijë':

—Quie dan' binu'aro yëta xtila unë' ra'o cana'.

8 Caora na' gucabë' Jesús cabë' pensari racajë', na'ra unë' rëbinë' lëjë':

—¿Bixquien' rdëbile quie yëta xtila? ¡Binegalele dyë'ëdi quia'!

9 ¿Binetzioñe'ele cabë' naca quia'? ¿Agula'adyi'le cabë' bia' quie lao ga'yo' yëta xtila? ¿Bireza'la'adyi'le bala ga' naga ta yožo bega'n bezi'le?

10 ¿Lëzi bireza'la'adyi'le cabë' bia' quie gadyi yëta xtila bzožoga'n udao ja tapa mila ja benë'? ¿Bireza'la'adyi'le bala chicuiti ta yožo bega'n bezi'le?

11 ¿Bixquien' biuyoñe'ele quele quie yëta xtila unia' caora unia' le'e ta gapale cuidado quie levadura quie ben' partido fariseo len ben' partido saduceo?

12 Na'ra uyoñe'ejë' biunë' Jesús quie levadurazi ta rudze'jë' yëta xtila. Unë're Jesús quie pensari raca ja ben' partido fariseo len ja ben' partido saduceo. Unë' reya'ala' gapajë' cuidado ta bigacajë' pensari ca pensari raca ja ben' partido fariseo len ja ben' partido saduceo.

*Unë' Pedro naca Jesús Cristo, ben' use'ela' Diuzi*

*(Mr. 8.27-30; Lc. 9.18-20)*

13 Cati bdyinlë Jesús yaca ben' quienë' yu nebaba Cesarea de Filipino, na'ra unë' rëbinë' ja ben' quie':

—¿Bizi rna ja benë' naca' në'ëdi', bichi yugulu benë'?

14 Na'ra una ja ben' quie Jesús rëbinë' lëbë':

—Balajë' rnajë' naco' Juan bautista. Ibalajë' rnajë' naco' profeta Elías, o chi profeta Jeremías. Ibalajë' rnajë' naco' tu ben' profeta tula, ben' unita' dza na'la.

15 Na' una Jesús rëbinë' lëjë':

—¿Cabizi ina le'e naca' në'ëdi'?

16 Na'ra una Simón Pedro rëbinë' lëbë':

—Luë' naco' Cristo, zii' Diuzi, ben' neban tuzioli.

17 Na'ra una Jesús rëbinë' Pedro:

—Tahuen gula baonao', Simón, zii' Jonás. Quele benë' bzioñe'enë' luë' cabë' naca' në'ëdi', dechan' Xuzá' Diuzi zu guibá.

18 Në'ëdi' rnia' luë' naco' Pedro, ta inaro xti'idza'ro “yo”. Con cabë' unao' quia' unao' naca' zii' Diuzi, cana' cuioga' yaca ben' gale quia', yaca ben' rue quie xti'idza'. Ba'ala'cazi chi yugulu taxi'ibi' huejan dila ta udyiagu'jan ja ben' rale quia', bisuejan huejan gan.

19 Guna' luë' yela' rnabë' quia' ta tzetixogue'lo' ja benë' bi huejë' ta tzu'ujë' ga rnabë' Diuzi. Con cabë' yëbo'jë' huejë', nacan zi huejë'n, na' huazu Diuzi puesto con ca inao'. Lëscan' con cabë' yëbo'jë' bihuejë', nacan zi bihuejë'n, na' lëscan' huazu Diuzi puesto con ca inao'.

20 Na' ra gudyi Jesús lëjë' ta biquixogue'jë' benë' de que lëbë' naquë' Cristo.

*Udixogue' Jesús cabë' gaca quie cati gatinë'*

*(Mr. 8.31—9.1; Lc. 9.22-27)*

21 Na'ra uzulao Jesús ruxi'idze'në' yaca ben' quie' de que ruen zi yeyonë' ciudad Jerusalén. Ruxi'idze'në' lëjë' cabë' usaca yaca benë', len ja ben' rnabë', len ja xan' pxuzi, len ja ben' rusëdi ley quie Moisés lëbë', na' gutijë' lëbë', pero huebannë' lao tzona dza.

22 Na'ra uquië' Pedro Jesús tzala'la uzulaonë' rdilanë' Jesús rëbinë' lëbë':

—¡Bigue'en Diuzi gaca quio' cabë' nao', Señor! ¡Nica gacazi quio' luë' cana'!

<sup>23</sup> Na'ra uyëcho Jesús ta inë Pedro laohuë' rëbinë' lëbë':

—Bebiga' tzala'la, Satanás. Tazëdi gula ruelo' quia'. Biraco' pensari quie Diuzi. Pensari quie benë' yu'ulo'.

<sup>24</sup> Na'ra una Jesús rëbinë' ja ben' quienë':

—Chi nu ben' re'en inao në'ëdi', re'ennan bira inaoyaquë' ca rna pensari quieyaquë'. Re'ennan bidzebiyaquë' naoyaquë' në'ëdi' yugu dza, ba'ala'cazi ruen žudyi guti benë' leyaquë'.

<sup>25</sup> Nu ben' rdzebi inao në'ëdi', dan' rdzebinë' gatinë' tanun quia', bihue' Diuzi lëbë' yela' neban tuzioli. Pero nu ben' inao në'ëdi' birdzebinë' gatinë' tanun quia', hue' Diuzi lëbë' yela' neban tuzioli.

<sup>26</sup> ¿Bizi gan de quie nu benë' anaca quie lao yugulute ta de lao yedyi layu, chi bigata' yela' neban quie' tuzioli? ¿Ca gacala dumi re'ennan ta ga'o yaca benë' yela' naban tuzioli?

<sup>27</sup> Naca' bichi yugulu benë'. Huaya'a, pero na' yeguida' tatula lao yedyi layu, zeyu'a yela' r nabë' quie Xuza'. Caora na' yeguidalia' yaca ángel quienë' ta ichugulia' quie ja benë', quizoga'jé' cabë' bëjë' dza udajë' lao dylayu, chi bëjë' tahuen, chi bëjë' tamala.

<sup>28</sup> Tali rnia' le'e, binegati bala le'e nita' niga len në'ëdi' tu binelë'ë inabi'a lao yedyi layu, në'ëdi' bichi yugulu benë'.

## 17

*Ca guca bë' betza' cuin Jesús zaca'lao lao yaca ben' quienë'*

(Mr. 9.2-13; Lc. 9.28-36)

<sup>1</sup> Na'ra guca lao xopa dza, uquië' Jesús Pedro, len Santiago, len Juan bi' bichi Santiago, uza'jé' ziojë' tu lao ya'a sibi.

<sup>2</sup> Na' zë Jesús laojë' cati betza' cuinnë', una' laohuë' ca xni' oba. Na' zabë' betza'n una'n bezëri gula ca xni' gui'.

<sup>3</sup> Na'ra blë'ëjë' labdyinte Moisés len Elías ru'eljë' Jesús di'idza'.

<sup>4</sup> Na' una Pedro rëbinë' Jesús:

—Señor, tahuen na' nita'ndo' niga. Chi re'enlo', huendo' tzona yu'u guizidao'. Huendo' tun quio', huendo' itun quie Moisés, len itun quie Elías.

<sup>5</sup> Na' tu raca zë Pedro nanë' cana', cati za' tu beo bezëri gula bdubin lëjë'. Na' lu'u beo na' bejë' tu rchi' benë' unënë' në':

—Lëzi'ina' niga, lega nedyë'ëda'në'. Lega rexeda' ca ruenë'. Ulezënaga cabë' rnanë'.

<sup>6</sup> Na' cati be ja ben' quie Jesús cana', na' udze'jé' gutajë' layu guzu ru'ala dan' bdzebitzeguejë'.

<sup>7</sup> Na'ra bebiga' Jesús gan' dejë' na' blapanë' lëjë' unë' rëbinë' lëjë':

—Uleyasa, bidzebile.

<sup>8</sup> Na' cati beyasajë', rna'jé' tuzi Jesús zënë' na'. Ganura nita' len lëbë'.

<sup>9</sup> Na' bë' zeza'jé' zeyëzije' lë'ë ya'a na', una Jesús rëbinë' lëjë':

—Biquixogue'le ja benë' cabë' ta blë'ële guca quia', në'ëdi', ben' naca bichi yugulu benë'. Caora agutia' bebana', na'ra huazaque' quixogue'lejë'.

<sup>10</sup> Na'ra una ja ben' quie Jesús rëbijë' lënë':

—Rna yaca ben' rusëdi ley quie Moisés de que za' guida Elías tanëro, na'ra guida ben' ise'ela' Diuzi. ¿Ta balejë' rnajë' cana'?

<sup>11</sup> Na' una Jesús rëbinë' lëjë':

—Tali na' za' guida Elías tanëro, ucuezanë' dužete cuenda guida itu ben' ise'ela' Diuzi.

<sup>12</sup> Pero në'ëdi' rnia' le'e, abida Elías, pero bibezaque ja benè' chi lèbè'. Psacajè' lèbè' bizinaquezi. Lëscan' në'ëdi', ben' naca bichi yugulu benè', usacajè' në'ëdi' bizinaquezi.

<sup>13</sup> Na'ra gucabè' ben' quie Jesús unènè' quie Juan bautista caora unè': "Tali na' za' guida Elías tanèro."

*Byue Jesús tu xcuidi' byu yu'ubi' taxi'ibi' mala gula*

(Mr. 9.14-29; Lc. 9.37-43)

<sup>14</sup> Cati bedyinjè' ga negu'udi' ja benè', na'ra ubiga' tu be'mbyu gan' zè Jesús uditzunè' zibiné' laohué' unè' rëbinè' lèbè':

<sup>15</sup> —Señor, ¿biyeyèchi'la'adyo' zì'ina'? Racabi' zuguti. Lega rusacan lèbi'. Tazè lasa babzalan lèbi' lao gui' len lu'u nisa.

<sup>16</sup> Ni rdehua'abi' lao ja ben' quio', pero birzaque'jè' yeyuejè'bi'.

<sup>17</sup> Na' una Jesús rëbinè' ben' zu na':

—Le'e biralele quia'. Biyu'ule pensari dya'a. ¿Gaca tu tiempo sulia' le'e, na' bigalele quia'? ¿Gaca tu tiempo sulia' le'e, na' birioñe'ele? Yexi'bi' niga.

<sup>18</sup> Na'ra udila Jesús taxi'ibi' yu'u lu'u laxta'o xcuidi' byu. Na' bebioguè' lenan. Cana' labeyacatebi'.

<sup>19</sup> Ude beyudyi na', uquiè' ben' quie Jesús lèbè' tzala'la unajè' rëbijè' lèbè':

—¿Bixquien' biuzaque'ndo' yebiondo' taxi'ibi'?

<sup>20</sup> Na' una Jesús rëbinè' lèjè':

—Biuzaque'le dan' binegalele dyè'ëdi. Tali rnia' le'e, naca bini mostaza tu bini dao' bicu'zi. Na' chi hue quiele xti'idza' Diuzi la'acazi lè'ëti'dao' bicu'zi ca tadao' bicu' naca bini mostaza, huazaque' yèbile tu ya'a: "Beyo yesu na'la", na' huayon. Pues huazaque' huele yugulute.

<sup>21</sup> Pero ca naca taxi'ibi' bebioga' na'a, chi biulidzale Diuzi, chi bihuele ubasi, bisaque' cuiolen yeyon.

*Udixogue' Jesús tatula cabè' gaca quiè' bè' gatinè'*

(Mr. 9.30-32; Lc. 9.43-45)

<sup>22</sup> Tu raca rdalè Jesús ben' quienè' estado Galilea, udixogue'nè' lèjè' cabè' gaca quienè' dan' naquè' bichi yugulu benè'. Unè' usedyin ja benè' lèbè' lao na'a ja ben' rudie lèbè'

<sup>23</sup> ta gutijè' lèbè', pero huebannè' tatula gaca lao tzona dza. Cati be yaca ben' quienè' cabè' unè', guque'jè' bayèchi' gula.

*Unè Jesús quie impuesto quie idao' r nabè'ra*

<sup>24</sup> Na'ra uza' Jesús lènè' ja ben' quiè' ziojè' bdyinjè' ciudad Capernaum. Na' uyo ben' huequižu quie idao' r nabè'ra yena'jè' Pedro unajè' rëbijè' lèbè':

—¿Biquižu maestro quie impuesto quie idao' r nabè'ra?

<sup>25</sup> Na' una Pedro rëbinè' lèjè':

—Aja', huaguižunè'n.

Na' uza' Pedro zionè' žan yu'u. Cati bdyinnè' žan yu'u, na' una Jesús rëbinè' lèbè':

—¿Bi ca inao', Simón? ¿Cati ruquižu ja rey impuesto, nuži ruquižujè'? ¿Ruquižujè' ben' yedyi quiejè' o chi ruquižojè' ben' za' yedyi tula?

<sup>26</sup> Na' una Pedro rëbinè' lèbè':

—Ruquižujè' ben' za' yedyi tula.

Na' una Jesús rëbinè' lèbè':

—Tana' lena' biruen zi quižu ben' yedyi quie rey impuesto.

<sup>27</sup> Pero ta biidza' nitujè' ra'o, quižoro quie impuesto. Na' uyo ru'a lagun, bdze' yèchi' lu'u nisa. Cati guèbi bela len, yeya'ala'n len lèba', caora na' ixa'lo'

ru'aba' yedzelelo' centavo ta quizulo' para luë' len në'ëdi' quie impuesto. Na' uyo yetizo'n na'a.

## 18

*¿Nuži ben' nacara ben' belao?*

(Mr. 9.33-37; Lc. 9.46-48)

<sup>1</sup> Na'ra bebiga' yaca ben' quie Jesús unajë' rëbijë' lëbë':

—¿Nuži ben' nacara ben' belao entre nëto'?

<sup>2</sup> Na' guži Jesús tu xcuidi' byu bzunë'bi' gatzo la'ojë'.

<sup>3</sup> Unë' rëbinë' lëjë':

—Tali rnia' le'e, chi biutza'le pensari quiele, galele quie Diuzi ca rale nu xcuidi' quie xuzibi', bisaque' tzirole guibá ga r nabë' Diuzi.

<sup>4</sup> Nu ben' rzudyi'ilë Diuzi cabë' rzudyi'ilë xcuidi' xuzibi', lëben' na' nacara ben' belao guibá ga r nabë' Diuzi.

<sup>5</sup> Nu ben' rzi' xcuidi' ca bi' niga tanun quia', nuen quienë' lente në'ëdi' rzi'rënë'.

*Unë Jesús nacan zudyi gula huero tamala*

(Mr. 9.42-48; Lc. 17.1-2)

<sup>6</sup> Na' una Jesús:

—Nu ben' rudze'yela tu xcuidi' rale quia' ta huebi' tamala, hue Diuzi lëbë' castigo že gula. Tadya'acala quienë' erio tu yo že luba'në' tzechu'unjë' lëbë' lu'u yao že ga naca zitu' gula, quele ca castigo hue Diuzi lëbë'.

<sup>7</sup> Nacan bayëchi' gula quie ja ben' nita' lao yedyi layu, dan' birdziogue nu rudze'yela lëjë' huejë' tamala. Nita'cazi nu rudze'yela ja benë' huejë' tamala, pero hue Diuzi castigo že gula nu ben' rudze'yela benë' huejë' tamala.

<sup>8</sup> 'Quie lena', chi rnën le'e huelële ni'a na'ale tamala, nacalan dya'a ichugulen chu'unlen zitu' tzirole guibá ca ben' nedypa ni'a në'ë, quele ca ta tzirole gui' gabila tuzioli len ni'a na'ale.

<sup>9</sup> Lëscan' chi rnën le'e huelële laole tamala, nacalan dya'a cuiolen chu'unlen zitu' tzirole guibá ca ben' nero yolaohue, quele ca ta tzirole gui' gabila len rupa la'a yolaole.

*Unë Jesús tu di'idza' quie beco' zi'ila', bia uniti*

(Lc. 15.3-7)

<sup>10</sup> Na' una Jesús:

—Bireya'ala' ilë'ële zi' nu xcuidi' rale quia'. Rnia' le'e ze zu ángel, ben' rapa ja xcuidi', zujë' lao Xuza' Diuzi zu guibá yugu dza.

<sup>11</sup> Në'ëdi', ben' naca bichi yugulu benë', uza'a bida' lao dyilayu tacuenda ute usela' yugu ben' nita' lao yedyi layu como dan' yela' napa xquia quiejë' tziójë' lao gui' gabila.

<sup>12</sup> ¿Bica nale? Chi rapa tu be'mbyu tu gayuhua beco' zi'ila', na' aoniti tuba', ¿quele uca'nnë'jaba' na'azi tu tzediloguë' bia uniti?

<sup>13</sup> Chi yedzelenë'ba', lega yedaohuenë' biunitiba'. Redaohuenë' quie yaca bia biuniti, pero redaohueteranë' quie bia uniti bedzela.

<sup>14</sup> Lëscan' Xuziro Diuzi zu guibá, bire'ennë' initi ni tu xcuidi'.

*Cabë' reya'ala' huero si'zero quie laquedyiro*

(Lc. 17.3)

<sup>15</sup> Na' una Jesús:

—Chi bë tu ben' rue quie xti'idza' Diuzi tu tamala quio', reya'ala' hue'lao'në' tu di'idza' rupazile ta inezinë' ca tamala bënë' quio'. Cana' gacalëlo'në' usannë' tamala, huenë' tadya'a.

16 Pero chi bihuené' casa quio', na' reya'ala' guēzo' ichopa tzona ben' rue quie xti'idza' Diuzi ta gacajé' testigo. Cana' inita' chopa tzona ben' naca testigo quio' cabé' naca di'idza' hue'lao'né'.

17 Chi bihuené' casa quie ja testigo quio', na'ra yēbo' ja yugulu ben' rue quie xti'idza' Diuzi cabé' dan' bēné' quio'. Na' chi bihuené' casa quie ja yugulu ben' rue quie xti'idza' Diuzi, na'ra reya'ala' ilé'ēlené' ca nu ben' binuebé' chi zu Diuzi, ilé'ēlené' ca nu ben' mala gula.

18 Tali rnia' le'e, con cabé' yēbile yaca ben' rue quie xti'idza' Diuzi ta hueyaqué' quie ben' bē tamala, nacan zi hueyaqué'n, huazu Diuzi puesto con ca inale. Lēzi con cabé' yēbile yaca ben' rue quie xti'idza' Diuzi ta bihueyaqué' quie ben' bē tamala, nacan zi bihueyaqué'n, lēscan' huazu Diuzi puesto con ca inale.

19 Lēzi rnia' le'e, chi chopa le'e bega'nle de acuerdo hue'lēle Xuza' Diuzi zu guibá di'idza', inabale bi ta re'enle huené', na' huené' ca ta unabale huené'.

20 Lēzi rnia' le'e, ga regu'udi' chopa tzona ben' rale quia', rulidzajé' nē'ēdi', nazua' gatzo la'ojé'.

21 Na'ra bebiga' Pedro ga zē Jesús uné' rēbiné' lēbē':

—Señor, ¿bala lasa ruen zi si'zia' quie ben' rue quie xti'idza' Diuzi ca tamala ruené' quia'? ¿Lao gadyi lasazi si'zia' quiené'?

22 Na'ra una Jesús rēbiné' Pedro:

—Quele lao gadyi lasazi si'zelo' quiené', pero con balatezi lasa inabané'n si'zelo' quiené'.

### *Bzu Jesús tu ejemplo quie tu mozo, ben' bigu'un si'ze quie laguedyi*

23 Na' una Jesús:

—Na' rnia' le'e cabé' r nabé' Diuzi. Ruené' ca nu rey, ben' bēlē ja mozo quiené' cuenda gaca tu reya'ala'jé' quiené'.

24 Uzulaoné' ruené' cuenda len ja mozo quie' cati yexi'né' tuné', ben' reya'ala' quiené' dumi ze gula.

25 Pero como bide dumi ta yeguižugué' quie rey, na'ra bē rey mandado guti'né' yugulu ta de quiené', huené' dyin sin lažu len nigula quiené' len ži'iné' ta yela' ta reya'ala'né' quie rey.

26 Na'ra udituzibi mozo na' lao rey na', unabayēchi'né' rēbiné' rey: “Señor, uži'ze quia'. Nayequžuga'n duženan.”

27 Na' beyēchi'la'adyi' rey na' lēbē', uné' rēbiné' lēbē': “Huazi'zia' quio', gabi reya'alo' quia'. Anaco' libre.”

28 Cati beroné' gan' zu rey na', na'ra bedilané' itu mozo laguedyi'né', ben' reya'ala' quiené' tu chopa tzona dumi dao'. Na' aozené' du luba'né' rēbiné' lēnē': “¡Uđižu ta reya'alo' quia'!”

29 Na'ra udituzibi laguedyi'né' unabayēchi'né' rēbiné' lēnē': “Señor, uži'ze quia'. Nayequžuga'n duženan.”

30 Pero bigu'unné', na' uyoné' yedze'né' lēnē' lu'u dyiguiba ta yeguižuné'n.

31 Cati blē'ē ja mozo tula cabé' bēné' quiené', lega beyēchi'la'adyi'jé' lēnē' uyojé' yeguēdyijé' rey na' ca ta użacané'.

32 Na'ra guži rey na' mozo quie' uné' rēbiné' lēnē': “¡Ben' mala gula naco'! Nē'ēdi' uži'zia' quio' ca ta reya'alo' quia' como dan' unabayēcho' laohua'.

33 Reya'ala' yeyēchi'la'adyi'rao' laguedyilo' cabé' bia' nē'ēdi', beyēchi'la'adya' lué'.”

34 Na'ra bdza'tzegue rey na' lēnē'. Bēné' mandado udze'jé' lēnē' lu'u dyiguiba ta yeguižuné'n ta reya'ala'né' quiené'.

35 Na' bē' beyudyi di'idza' una Jesús, uné' rēbiné' ben' quiené':



—Cabè' bē rey na', cana'rē hue Xuza' Diuzi zu guibá conlè le'e, chi bisi'zele quie laguedyile du guicho du la'adyi'le cabè' tamala bēnè' quiele, lēscan' bisi'ze Diuzi le'e cabè' tamala ruele. —Cana' una Jesús rēbinè' lējè'.

## 19

*Unē Jesús cabè' naca quie ben' rusan laguedyi*  
(Mr. 10.1-12; Lc. 16.18)

<sup>1</sup> Te beyudyi una Jesús cana', uza'nē' estado Galilea, ziolēnē' yaca ben' quiè' estado Judea itzala' yao Jordán.

<sup>2</sup> Na' unao ja ben' zè lēbè' ga zioguè' beyuenē' ja ben' raca žhue'.

<sup>3</sup> Na'ra bebiga' chopa tzona ben' partido fariseo ga zè Jesús ta huejè' lēbè' trampa gaojè' lēbè' xquia. Tana' unajè' rēbijè' lēbè':

—¿Ta bala nitu nitu biru'en lato usanjè' nigula quiejè'?

<sup>4</sup> Na' una Jesús rēbinè' lējè':

—¿Binena'le cabè' rnè lē'è la'iya guichi quie Diuzi? ¿Binenezile cabè' bēnè' cati ulēchinè' dylayu, bzaloguè' tu be'mbyu len tu nigula?

<sup>5</sup> Lēscan' una Jesús rēbinè' lējè':

—Quie lena' rusan be'mbyu xuzi žnè'è ta sulēnè' nigula quienè', gacajè' tuzi.

<sup>6</sup> Cati banacajè' tuzi, bira naca quiejè' ca quie chopa benè'. Dyin quie Diuzi nuelējè' tuzi. Tana' lena' biru'en lato usanjè' laguedyijè'.

<sup>7</sup> Na' unajè' rēbijè' lēbè':

—¿Bixquien', chi', bē' Moisés lato ichisa be'mbyu guichi ga rue'n di'idza' bira re'ennè' sulēnè' nigula? Na' hue'nè' nigula guichi ta usannè' lēnè'.

<sup>8</sup> Na' una Jesús rēbinè' lējè':

—Yela' zidi quie ja benè' bē' Moisés lato usanjè' nigula quiejè'. Pero dza ulēchi Diuzi dylayu, bigu'unnè' hue yaca benè' cana'.

<sup>9</sup> Nē'ēdi' rnia' le'e, chi rusan be'mbyu nigula quiè', na' uzi'nè' nigula tula, lena' nacan xquia quiè' lao Diuzi. Chi psannè' lēbè' dan' udalēnè' be'mbyu tula, lena' binacan xquia quiè' lao Diuzi. Lēscan' chi yezi' be'mbyu tu nigula psan xquiuhue, lena' nacan xquia quiè' lao Diuzi.

<sup>10</sup> Na' una ben' quie Jesús rēbinè' lēbè':

—Chi nacan cabè' rnao' quie be'mbyu len nigula quienè', bisi'calanè' nigula.

<sup>11</sup> Na' una Jesús rēbinè' lējè':

—Quele yugu ja benè' rioñe'ejè' cabè' rnè lē'è guichi la'iya quie Diuzi. Yaca ben' bē' Diuzi yela' rioñe'e quie, lējè' rioñe'ejè'n.

<sup>12</sup> Bala ja be'mbyu binaca quiejè' sulējè' nigula. Cana' naca quiejè' cati golotejè'. Ibala ja be'mbyu binaca quiejè' sulējè' nigula, dan' ulio benè' bini quiejè'. Ibala ja benè' bisulējè' nigula tacuenda huejè' puro dyin quie Diuzi. Nu ben' ruzēnaga cabè' rnia', reya'ala' uzēnagajè' dyè'ēdi.

*Bēla'iya Jesús ja xcuidi'*  
(Mr. 10.13-16; Lc. 18.15-17)

<sup>13</sup> Na'ra nequiè' ja benè' bala ja xcuidi' ga zè Jesús ta guxonè' guichojabi' ta huela'iyane' lējabi' hue'lēnè' Diuzi di'idza' tanun quiejabi'. Pero ja ben' quienè' uzulaojè' rdilajè' ja ben' nequiè' ja xcuidi'.

<sup>14</sup> Na' una Jesús rēbinè' ben' quiè':

—Ulesan quiejè'. Guidagara ja xcuidi' sulējabi' nē'ēdi'. Nu ben' tzio ga rnbè' Diuzi ruen zi sudyi'ilējè' Diuzi cabè' rzudyi'ilè' xcuidi' len xuzijabi'.

<sup>15</sup> Na' bēxonè' guicho ja xcuidi' ta bēla'iyane' lējabi'. Ude na' uzè'è zioguè'.

*Tu ben' ru'abe nacanë' ben' uña'a bë'lënë' Jesús di'idza'*  
(Mr. 10.17-31; Lc. 18.18-30)

<sup>16</sup> Na'ra uyo tu ben' ru'abe yena'në' Jesús. Na' unanë' rëbinë' lëbë':

—Maestro, ben' huen naco'. ¿Ca bi reya'ala' hua' ta gata'yela' neban quia' tuzioli?

<sup>17</sup> Na' una Jesús rëbinë' lënë':

—Ben' huen unao' në'ëdi'. Tahuen na' unao' në'ëdi' cana', como dan' tuzi Diuzi naquë' ben' huen. Na' chi re'enlo' tzio' guibá gata'yela' neban quio' tuzioli, ruen zi hue quio' cabë' naca mandamiento quie Diuzi.

<sup>18</sup> Na' unanë' rëbinë' Jesús:

—¿Ca bi mandamiento reya'ala' hue quia'?

Na' una Jesús rëbinë' lënë':

—Bigutio' benë', bitalao' žgula ben' tula, bicuanlo' quie benë', bisiu'yë'.

<sup>19</sup> Gapala'nlo' xuzi žnao', edyë'ëlo' benë' ca nedyë'ëlo' cuinlo'.

<sup>20</sup> Na' una ben' ru'abe rëbinë' Jesús:

—Yugulute cabë' nao', rua'nan cati nacatia' xcuidi'. ¿Bižira ta rdziogueda' hua'?

<sup>21</sup> Na' una Jesús rëbinë' lënë':

—Chi re'enlo' huelo' yugulu ca re'en Diuzi huelo', uyo yeguëti' ta de quio', bë' ja ben' yëchi' centavo quien. Chi huelo' cana', na'ra gata' tadya'a quio' ga zu Diuzi guibá. Na' guido' inaolo' në'ëdi'.

<sup>22</sup> Pero cati be ben' ru'abe ca una Jesús, na'ra zeyonë' raquenë' bayëchi' dan' nacanë' ben' uña'a gula.

<sup>23</sup> Na'ra una Jesús rëbinë' ja ben' quië':

—Tali rnia' le'e, zëdi gula nacan tzio yaca ben' uña'a guibá ga zu Diuzi.

<sup>24</sup> Rnia' le'e tatula, cabë' nacan zëdi gula te tu camello lu'u ni'a yëchi', cana' nacarën zëdi quie ben' uña'a tzionë' ilë'ënë' ga zu Diuzi guibá.

<sup>25</sup> Na' bë' be ja ben' quie Jesús cabë' unë', tu bebanzijë' unajë' rëbijë' laguedyijë':

—¿Ca nuži saque' tzio guibá ga zu Diuzi?

<sup>26</sup> Na' una' Jesús rëbinë' lëjë':

—Ca ta bigaca ja benë' huejë', Diuzi sí, racanë' ruenë'n como dan' raca rue Diuzi yugulute.

<sup>27</sup> Na'ra una Pedro rëbinë' Jesús:

—Señor, nusando' yugulu ta de quiendo' ta inaondo' luë'. ¿Ca biži ta gaca quiendo' guibá?

<sup>28</sup> Na' una Jesús rëbinë' lëjë':

—Tali rnia' le'e, cati idyin dza yecubi yugulute ta de na'a, cati cui'a në'ëdi', ben' naca bichi yugulu benë', xlatoga', na'ra le'e, ben' unao në'ëdi', caora na' cue'rële lao chipchopa xlatole ta ichugulile lao chipchopa cue' ben' Israel.

<sup>29</sup> Rnia' le'e, yugu ben' psan žan yu'u quie, o chi nu biche, o chi nu zane, o chi nu xuze žnë'ë, o chi nu žgule, o chi nu ži'ine, o chi nu layu quie tanun quia' në'ëdi', hue'ra Diuzi lëbë' tu gayuhua lasa mazara ca ta psannë'. Lëži hue' Diuzi lënë' yela' neban quienë' tuzioli.

<sup>30</sup> Pero bala ben' naca ben' belao niga lao yedyi layu, bira gacajë' ben' belao dza yedyinjë' ga zu Diuzi. Lëscan' bala ben' binaca ben' belao niga lao yedyi layu, huacajë' ben' belao dza yedyinjë' ga zu Diuzi.

## 20

*Unë Jesús tu di'idza' quie ja ben' bë dyin*

<sup>1</sup> Na' una Jesús:

—Na' rnia' le'e cabè' rue Diuzi. Ruenè' ca nu ben' xan' layela, ben' uyo balara yegue'lè benè' di'idza' ta yezi'jè' usecho quie bedzuli' quienè'.

<sup>2</sup> Na' bè'lènè' ben' hue dyin quienè' di'idza' ta quižuguè' lèjè' tu dumi plata tu dza. Ude na' use/elè' lèjè' tzeguejè' dyin layela quienè'.

<sup>3</sup> Ude na' uzè'è' zioguè' ca du las nueve quie zila. Na' blè'ènè' bala ben' rda cana'zi la'o yedyi.

<sup>4</sup> Na' unè' rëbinè' lèjè': "Uletziorè le'e, tzeguele dyin yezi'le usecho quia'. Naquizuga' le'e quie tu dza quiele." Na' uyojè' hue dyin quienè'.

<sup>5</sup> Na' uzè'è' zioguè' tatula ca du la'odza, bènè' cabè' bènè' zila quie ben' hue dyin quienè'. Lèzi uzè'è' zioguè' tatula ca du las tres quie zadze', bènè' cabè' bènè' la'odza quie ben' hue dyin quienè'.

<sup>6</sup> Na'ra uzè'è' zioguè' la'o yedyi tatula ca du las cinco quie zadze'. Na' bedilanè' ibala ja ben' rdaja cana'zi. Na' unè' rëbinè' lèjè': "¿Bixquien' rda le'e niga cana'zi bedu dza, gabi dyin ruele?"

<sup>7</sup> Na' unajè' rëbijè' lèbè': "Rdando' cana'zi como dan' nitu nunu bida ina nètò' huendo' dyin." Na'ra unè' rëbinè' lèjè': "Uletziorè le'e tzeguele dyin layela quia'. Naquizuga' le'e quie tu dza quiele."

<sup>8</sup> Cati baodze', na'ra unè' xan' layela rëbinè' ben' quižu mozo: "Guži ja mozo na', quižulo'jè'. Tanëro quižulo' ben' uyu'u cati beyudyite dyin. Na'ra quižulo' ben' uyu'u tanëro."

<sup>9</sup> Na'ra ude ja ben' yu'u ja dyin ca du las cinco quie zadze'. Na' aodizuguè' lèjè' quie bedu dza quiejè' tu huio dumi plata.

<sup>10</sup> Na'ra ude ja ben' yu'u ja dyin tanëro. Na' guquejè' huaguižuguè' lèjè' mazara. Pero udizuguè' lèjè' tu huiocazi dumi plata.

<sup>11</sup> Bè' uzi'jè' xlažujè' rnèjè' rdza'jè' rëbijè' xa'n layela:

<sup>12</sup> "Ja ben' uyu'u cati beyudyite dyin, ca tu horazi bèjè' dyin. Na' udizulo'jè' lèbi len nètò' bëndo' dyin bedu dza aozuendo' tala bedu dza."

<sup>13</sup> Na' una xan' layela rëbinè' tu ben' uyu'u dyin tanëro: "Bicha', quele tamala bia' quio'. ¿Quele bega'nro di'idza' quižuga' luè' tu dumi plata quie tu dza quio'?"

<sup>14</sup> Ni de xlažulo', beyo. Chi re'enda' quižuga' ben' uyu'u cati beyudyite dyin lèbi cabè' aodizuga' luè', abihuena quio'.

<sup>15</sup> ¿O chi bire'enlo' hua' ca re'enda' len dumi quia'? ¿O chi raquezè'lo' nè'èdi' dan' rua' tadya'a?"

<sup>16</sup> Na' una Jesús rëbinè' lèjè':

—Na'ra nè'èdi' rnia' le'e, bala ben' binaca ben' belao niga lao yedyi layu, huacajè' ben' belao dza yedyinjè' ga zu Diuzi. Lëscan' bala ben' naca ben' belao niga lao yedyi layu, bira gacajè' ben' belao dza yedyinjè' ga zu Diuzi. Rëzi Diuzi ben' zè, ben' inao xnezè', pero balazijè' guida inao xnezè'.

*Unè Jesús tatula cabè' gaca cati gatinè'*  
(Mr. 10.32-34; Lc. 18.31-34)

<sup>17</sup> Na' uza' Jesús lènè' chipchopa ben' quienè' ziojè' ciudad Jerusalén. Na' tu neza gužinè' lèjè' tzala'la unè' rëbinè' lèjè':

<sup>18</sup> —Ablè'èle bazioro ciudad Jerusalén gan' usedyin benè' nè'èdi' lao na'a xan' pxuzi, len lao na'a ben' rusèdi ley quie Moisés. Na' rusaque'jè' nè'èdi' nacala ca huejè' gutijè' nè'èdi' lao na'a ben' naca bichi yugulu benè'.

<sup>19</sup> Na' lèjè' usedyinjè' nè'èdi' lao na'a ben' za' yedyi tula ta utitujè' nè'èdi', gunjè' nè'èdi' zi', uda'jè' nè'èdi' lè'è yaga cruzo gatia'. Pero huebana' lao tzona dza.

*Unaba zna' Santiago len Juan tu cule lao Jesús  
(Mr. 10.35-45)*

<sup>20</sup> Na'ra bebiga' rupa zi'i Zebedeo, Juan len Santiago, len zna'jè' ga zè Jesús. Na' uditzu zna'jè' zibinë' lao Jesús ta inabè' lèbè' tu cule.

<sup>21</sup> Na'ra una Jesús rëbinè' lèbè':  
—¿Bizi dan' re'enlo' hua' quio'?

Na' unè' rëbinè' Jesús:

—Chi bihuu' cule, huelo' mandado cue' zi'ina' niga cuëto' cati bare'lo' xlatolo' r nabè'lo'. Rnaba' huu' mandado cue'bi' tubi' zaquè' yebè, itubi' cue'bi' zaquè' yega'.

<sup>22</sup> Na'ra una Jesús rëbinè' lèjè':

—Binezile cabè' dan' aonabale nè'èdi'. ¿Huazuele sacale cabè' usaca benè' nè'èdi'? ¿Huazuele yedzagalaole cabè' yedzagalaohua'?

Na' unajè' rëbijè' lèbè':

—Aja', huazuendo'.

<sup>23</sup> Na' una Jesús rëbinè' lèjè':

—Tali ca nale. Usaca benè' le'e cabè' usacajè' nè'èdi', na' yedzagalaole cabè' yedzagalaohua'. Pero quele nè'èdi' hua' mandado ta cue'le cuëta' tzala' huio. Xuza' Diuzi huenè' mandado nu ben' cue' cuëta' tzala' huio.

<sup>24</sup> Cati be ichi ben' quie Jesús cabè' unaba Santiago len bichinë' Juan, na'ra bdza'jè' lèjè'.

<sup>25</sup> Pero guzi Jesús lèjè' unè' rëbinè' lèjè':

—Le'e nezile dyè'èdi' cabè' rue ja ben' naca gobierno, r nabè'jè' zi'laza. Redaohuejè' huejè' mandado zèdi hue ja benè'.

<sup>26</sup> Pero le'e, bireya'ala' huele cana'. Nu ben' r nabè' quie ja ben' rue quie xti'idza' Diuzi, ruen zi gacalèjè' laguedyijè'.

<sup>27</sup> Lèscan' nu ben' belao quie ja ben' rue quie xti'idza' Diuzi, ruen zi huejè' pensari bi huejè' ta gata' tadya'a quie laguedyijè'.

<sup>28</sup> Huele cabè' rua' nè'èdi', ben' bichi yugulu benè'. Quele bida' ta hue ja benè' tadya'a quia'. Bida' ta hua' tadya'a quiejè', gatia' lao lazajè' gacajè' libre, bira inao dula' xquia quiejè' lèjè'.

*Byue Jesús chopa ben' laochula  
(Mr. 10.46-52; Lc. 18.35-43)*

<sup>29</sup> Cati uza'jè' yedyi Jericó, unao ben' zè gula Jesús.

<sup>30</sup> Na' ga udejè' re' chopa ben' laochula cuëta neza. Cati bejè' za' Jesús, na'ra urediyajè' unajè' rëbijè' Jesús:

—Señor, zi'i suba xuzixta'oro rey David luè'. Beyèchi'la'adyi'nèto'.

<sup>31</sup> Na' udila ja benè' lèjè' rëbijè' lèjè' ta cue'jè' chizi. Pero urediyajè'rajè' zidzo gula unajè' rëbijè' Jesús:

—Señor, zi'i suba xuzixta'oro rey David luè'. Beyèchi'la'adyi' nèto'.

<sup>32</sup> Na'ra uleza Jesús guzinè' ja ben' laochula, unè' rëbinè' lèjè':

—¿Bizi dan' re'enle hua' quiele?

<sup>33</sup> Na' unajè' rëbijè' Jesús:

—Señor, re'enndo' yelè'èndo'.

<sup>34</sup> Na'ra beyèchi'la'adyi' Jesús lèjè', uzenè' laojè' labelè'ètejè' unaojè' Jesús.

## 21

*Cabè' guca cati bdyin Jesús ciudad Jerusalén  
(Mr. 11.1-11; Lc. 19.28-40; Jn. 12.12-19)*

<sup>1</sup> Na' bdyinjè' yedyi Betfagé ga nacan ga'ala' ga re' ciudad Jerusalén. Lëscan' nacan ga'ala' ga re' tu ya'a laona ya'a Olivos. Na'ra use'ela' Jesús chopa ben' quienè'

<sup>2</sup> rëbinè' lëjè':

—Uletzio yedyi na'. Na' yedzelele tu burra nerioba' lëba' zi'iba'. Ulexëdyiba' ulequiè'ba' niga.

<sup>3</sup> Chi ina benè' rëbijè' le'e: “¿Bixquien' iquiè'leba'?” na' yëbilejè': “Re'en Señor na' lëba'. Na' laidesantendo'ba' itu chí.” —Cana' una Jesús rëbinè' lëjè'.

<sup>4</sup> Cana' guca ta uzu di'idza' quie Diuzi ta bzu ben' profeta lè'è guichi. Lëdi'idza' nan caniga:

<sup>5</sup> Uleyëbi ben' ciudad Jerusalén caniga:

“Le'e ben' ciudad Jerusalén, ulena', aza' rey quiele, naquè' ben' gaxo, dyianè' tu burra, zi'i bia ru'a yua.”

<sup>6</sup> Na'ra uyo ja ben' quiè', bëjè' cabè' mandado bë Jesús huejè'.

<sup>7</sup> Na' uquiè'jè' burra len zi'iba' uxubajè' zabajè' xcu'udzuba', na' udyia Jesús lëba', ziojè' bdyinjè' ciudad Jerusalén.

<sup>8</sup> Ben' zè nita'jè' tu neza udixujè' zabajè' ga ude Jesús. Ibalajè' uchugujè' taca' palma udixurèjè'n tu neza ga udenè'.

<sup>9</sup> Na' ja ben' zioja dyialao lao Jesús len ja ben' zioja zenao lëbè', uzulaojè' rnèjè' zidzo rnajè':

—¡Ben' ze luè', zi'i rey David! La'iya naco' zao' lao na'a Diuzi. ¡Ben' ze Diuzi!

<sup>10</sup> Cati uyu'u Jesús ciudad Jerusalén, na' bebane ja benè' unajè' rëbijè' laguedyijè':

—¿Nu'zi ben' niga?

<sup>11</sup> Ibalajè' unajè' rëbijè' lëjè':

—Ben' profeta Jesús, ben' yedyi Nazaret quie estado Galilea.

*Belao Jesús ja ben' yu'u huèti' lu'u idao' rnabè'ra*

(Mr. 11.15-19; Lc. 19.45-48; Jn. 2.13-22)

<sup>12</sup> Ude na' uyu'u Jesús lu'u idao' rnabè'ra belao huè' ja ben' yu'u huèti' lu'u idao' rnabè'ra na'. Bzalè' ja mesa quie ja ben' rutza' dumi. Lëscan' bzalè' silla quie ja ben' yu'u huèti' paloma.

<sup>13</sup> Na' unè' rëbinè' lëjè':

—Lè'è guichi la'iya quie Diuzi rnan caniga: “Idao' rnabè'ra quia' nacan ga hue'lè ja benè' Diuzi di'idza'. Pero le'e abetza'len ruelen ca beló ga regu'udi' ben' uban.”

<sup>14</sup> Na' lu'u idao' rnabè'ra ga zè Jesús, ubiga' bala ben' laochula len ben' zi, na' beyuenè' lëjè'.

<sup>15</sup> Pero ja xan' pxuzi len ja ben' rusèdi ley quie Moisés, bdza'jè' cati blè'èjè' cabè' milagro bë Jesús. Lëscan' bdza'jè' cati bejè' rnè ja xcuidi' zidzo lu'u idao' rnabè'ra najabi': “Ben' ze luè', zi'i rey David.”

<sup>16</sup> Na' bdza'jè' unajè' rëbijè' Jesús:

—¿Abelo' cabè' na ja xcuidi'?

Na' una Jesús rëbinè' lëjè':

—Aja', beda' cabè' rnajabi'. Pero le'e, ¿cómo binelabale cabè' nan quiejabi' lè'è guichi la'iya quie Diuzi? Rnèn nan caniga:

Dyin bë Diuzi rula ja xcuidi' dao', bi' nera'adyi', alabanza huen gula.

<sup>17</sup> Na'ra psan Jesús lëjè' uza'nè' ciudad Jerusalén ziolènè' yaca ben' quiè' yedyi Betania. Na' bega'njè' tu yela.

*Bdze'de' Jesús yaga higo dan' bidyian tazixi*

(Mr. 11.12-14, 20-26)

18 Na' beteyu zila, uzë'ë ziolënë' yaca ben' quië' ciudad Jerusalén. Na' tu neza zioguë' cati uduenë'.

19 Na' blë'ënë' zu tu yaga higo cuëta neza. Na' udenë' unë'ë ta yedzelenë' tazixi quien, pero gabi bedzelenë'. Na' una Jesús:

—Bira cuiacazi yaga ni tazixi.

Na' laobidyite yaga higo.

20 Cati blë'ë ja ben' quië' cabë' guca quie yaga higo, na'ra bebanejë' unajë' rëbijë' Jesús:

—¿Cabizi guca quie yaga higo laobidyiten?

21 Na' una Jesús rëbinë' lëjë':

—Tali rnia' le'e, chi rzudyi'ilële Diuzi du guicho du la'adyi'le, huazaque' huele cabë' bia' quie yaga higo. Na' quele tuzi quie len huele, pero lëscan' huazaque'rë huele mandado te tu ya'a tzion lu'u nisadao', na' huayonan.

22 Con bita inabale lao Diuzi hue'lëlenë' di'idza', chi rzudyi'ilële Diuzi du guicho du la'adyi'le, gunnë'n quiele.

### *Cabë' naca quie yela' r nabë' quie Jesús*

(Mr. 11.27-33; Lc. 20.1-8)

23 Na'ra beyu'u Jesús lu'u idao' r nabë'ra tatula. Na' tu zunë' rusëdinë' benë' cati ubiga' ja xan' pxuzi, len ja ben' r nabë' quie ja ben' Israel, unajë' rëbijë' Jesús:

—¿Bi yela' r nabë' de quio'? ¿Nu quie yela' r nabë' blaolo' ben' yu'u huëti' lu'u idao' r nabë'ra?

24 Na' una Jesús rëbinë' lëjë':

—Lëscan' re'enda' inaba' le'e tu di'idza'. Chi iquëbile quia' dyë'ëdi, na'ra inia' le'e nu quie yela' r nabë' blaohua' ben' yu'u huëti' lu'u idao' r nabë'ra.

25 ¿Nuzi use'ela' Juan ta hue'në' lao benë'? ¿Use'ela' Diuzi lëbë'? ¿O chi ta racazi la'adyi'në' bidë'?

Na' uzulaojë' najë' rëbijë' lagedyijë':

—Chi yëbironë': "Diuzi use'elë' lëbë'", na' huanë' ra'o: "¿Bixquien' bigulele quienë'?"

26 Pero chi yëbironë': "Ta racazi la'adyi'në' bidë'", caora na' huadza' ja ben' yedyi ra'o, dan' najë' rnë Juan tanun quie Diuzi.

27 Na'ra unajë' rëbijë' Jesús:

—Binezindo' nu ben' use'ela' lëbë'.

Na' una Jesús rëbinë' lëjë':

—Lëscan' në'ëdi, biinia' le'e nu quie yela' r nabë' blaohua' ben' yu'u huëti' lu'u idao' r nabë'ra.

### *Unë Jesús tu di'idza' quie ben' zu chopa zi'ine*

28 Na' una Jesús lëjë':

—¿Bi ca inale ca naca di'idza' inia' le'e? Uzu tu be'mbyu zu chopa zi'inë'. Na' yëbë' tubi': "Zi'ina', tzio' na'a yeziu' usecho quie bedzuli' quia'."

29 Na' una zi'inë' rëbinë' lëbë': "¡Bian quia' tza'a!" Pero ude na' beyuebi' pensari uyocazibi' hue dyin.

30 Na' uyo xuzijabi' yaguëdyinë' itu zi'inë': "Zi'ina', tzio' na'a yeziu' usecho quie bedzuli' quia'." Na' unabi' rëbibi' xuzibi': "Hue'encazi tza'a." Pero Biuyobi'.

31 Na' inaba' le'e: ¿Nula zi'inë' bë cabë' re'ennë' huejabi' lao rupatejabi'?

Na' unajë' rëbijë' Jesús:

—Bi' gudyë' tanëro.

Na'ra una Jesús rëbinë' lëjë':

—Tali rnia' le'e, ja ben' nale ben' mala gula, len ja nigula ruti' gusto quie, za' lějè' yeyu'ujè' ga r nabè' Diuzi ca le'e.

<sup>32</sup> Bida Juan bautista udxogue'nè' le'e cabè' reya'ala' huele ta hue quiele xti'idza' Diuzi, na' bigulele quienè'. Pero yaca ben' mala gula len ja nigula ruti' gusto quie, lějè' sí, gulejè' quienè'. Pero le'e ba'ala'cazi blè'èle cabè' bè Juan, biptza'le pensari quiele ta galele quienè'.

*Unè Jesús tu di'idza' quie ben' mala, ben' hue dyin*

*(Mr. 12.1-12; Lc. 20.9-19)*

<sup>33</sup> Na' una Jesús:

—Uzè nagale ca naca itu di'idza' inia' le'e. Uzu tu xan' layela, ben' guza bedzuli'. Bè'nè' tu li'o psioguè'n. Lèzi udxunè' tu yo laga' ga usinè' nisa bedzuli'. Bè'rènè' tu yu'u sibi de yo ga cuia ben' rapa bedzuli'.

'Na' pca'nnè'n lao na'a ben' hue dyin, uza'nè' zionè' zitu'.

<sup>34</sup> Cati bdyin tiempo quie usecho quie bedzuli', na'ra use'elè' ja mozo quienè' tzenabajè' ben' hue dyin quie usecho ta redu'ula' ben' xan' layela yezi'nè'.

<sup>35</sup> Pero bèxo ben' hue dyin ja ben' uyo. Na' bè'jè' quie tunè', bètijè' itunè', na' udijè' yo itunè'.

<sup>36</sup> Na' use'ela' xan' layela ja mozo tula. Pero bècazi ben' hue dyin quiejè' lèbi ca ben' uyo tanèro.

<sup>37</sup> 'Abeyudyi bějè' cana', use'elè' zi'inè', guquenè' chi huaparajè' zi'inè' bala'ana.

<sup>38</sup> Pero cati blè'è ja ben' hue dyin abdyin zi'i xan' layela, na'ra unajè' rëbijè' laguedyijè': "Bi' za' ni, lèbi' gaque quiebi' layela. Uletza' gutirobi' ta gaque quiero layela de niga."

<sup>39</sup> Cana' bějè', bèxojè' lèbi', bebiojabi' layela, bètijè' lèbi'.

<sup>40</sup> Na' una Jesús unabanè' lějè':

—Cati yedyin xan' layela, ¿bi'zi reya'ala' huenè' quie ja ben' hue dyin?

<sup>41</sup> Na' unajè' rëbijè' Jesús:

—Yela' ben' mala quiejè', reya'ala' gutinè' lějè', biyèchi'la'adyi'nè' lějè'. Reya'ala' uca'nnè'n lao na'a ben' hue dyin, ben' tula, ben' tzesan quie usecho ta redu'ula' ben' xan' layela yezi'nè' tiempo quienan.

<sup>42</sup> Na' una Jesús rëbinè' lějè':

—¿Binelabale cabè' nan lè'è guichi la'iya quie Diuzi? Rnan caniga: Yo laga' uru'un ben' rue huecua', lèyo na' bezi' Diuzi, bzunè'n ga rzulao besu. Dyin dya'a bè Diuzi beyuenè'n yo belao ta guxu'n besu.

<sup>43</sup> Tana' lena' inia' le'e, como dan' biralele quia', cana' naca quiele ca quie ben' rue huecua', ben' uru'un yo. Quie lena' bicuio Diuzi le'e gacale ben' hue dyin quienè'. Na' huabio Diuzi ben' tula, ben' tzesan ca quie usecho ta reya'ala' Diuzi yezi'nè'.

<sup>44</sup> Nu ben' bire'en gale quia', gaca quienè' ca quie ben' bguino lao yo, guquè' hue' ze. Lèscan' nu ben' chu'un nè'èdi' tzala'la, huachugulia' quienè'. Gaca quienè' ca quie ben' pxa'da' yo lènè'.

<sup>45</sup> Na' cati be ja xan' pxuzi len ja ben' partido fariseo cabè' na ejemplo unè Jesús, na'ra gucabè'jè' rnè Jesús quiejè'.

<sup>46</sup> Na' gu'unjè' guxujè' Jesús, pero bdzebijè' idza' ja ben' yedyi, dan' na ja ben' yedyi rnè Jesús tanun quie Diuzi.

1 Na' bzu Jesús itu di'idza' unè' rëbinè' lëjè':

2 —Na' rnia' le'e cabè' rue Diuzi r nabè'nè'. Ruenè' ca nu rey, ben' bē tu lani cati ptzagana' zī'inè'.

3 Na' use'ela' rey ben' tzelidza ja ben' guida lao lani, pero bigu'unjè' guidajè'.

4 Na' use'ela' rey na' ben' tula ta tzelidzajè' ja ben' guida lao lani unè' rëbinè' lëjè': "Uleyëbijè' abëtia' ja bëdyihuaga quia', bia naca ja re'ene, bapsiña'a ta gaojè'. Yugun nacan puesto laguidatejè'."

5 Pero bibida ben' reya'ala' guida. Tunè' uyonè' layela quienè'. Itunè' uyonè' huëti' quiè'.

6 Na' los demás, bëxujè' ben' use'ela' rey tzalidza lëjè', bë'jè' lëjè' zi', bëtijè' lëjè'.

7 Na'ra bdza'tzegue rey na'. Use'elè' soldado quienè' tzeguëtijè' lëjè', tzezejè' yedyi quiejè'.

8 Na' una rey rëbinè' ben' tzelidza: "Yugun nacan puesto guida ja benè'." Pero ben' blidzajè' guidaja, bigu'un rey na'. Na' unè':

9 "Uletzio tzetale tu neza tzelidzale con nu ben' yedzagale ta guidajè' lani quie huetzagana'." Cana' unè' gudyinè' ben' tzelidza.

10 Na' uzal'jè' yetajè' tu neza utupajè' ben' bedzagajè', la'acazi ben' mala, la'acazi ben' dya'a. Cana' bedza' ja benè' žan yu'u quie rey.

11 Na'ra uyu'u rey lu'u yu'u ta inè' ben' bdyinja. Na' blë'ënè' re' tu be'mbyu, pero binaconè' žabanè' ca naca žaba ben' bdyin ga raca lani quie huetzagana'.

12 Na' una rey rëbinè' lënè': "Bicha', žbizi guca uyu'ulo' re'lo' ni, binacolo' zabo' ca naca žaba ben' bdyin ga raca lani quie huetzagana'?" Na' ure'nè' chizi.

13 Na' una rey rëbinè' ben' ru'e laze: "Ulequio ni'a na'anè'. Ulechu'unne' lao lato chula ga cuedyinè' gao leinè'."

14 Rëzi Diuzi ben' zë, ben' inao xnezè', pero balazijè' guida inao xnezè'.

### *Unabajè' Jesús ca naca quie impuesto*

*(Mr. 12.13-17; Lc. 20.20-26)*

15 Na'ra uyo ja ben' partido fariseo bega'njè' di'idza' len laguedyijè' huejè' trampa quie Jesús ta quilojè' di'idza' ta gaojè' lëbè' xquia.

16 Na' use'ela'jè' ibala ben' naca partido quiejè' tuže len bala ben' naca partido Herodes, unajè' rëbijè' Jesús:

—Maestro, nezindo' rnao' tali, rusëdio' benè' ca naca xneza Diuzi. Tuzicazi ca ru'elao' benè' di'idza'.

17 Unacara cabè' naca tu pensari quio': žRnabando' luè' chi run Diuzi lato quizoro impuesto lao rey quie ben' romano?

18 Na'ra gucabè' Jesús cabè' modo reguilojè' ta huejè' tamala quiè'. Na' unè' rëbinè' lëjè':

—Ben' huizi' yè' nacale. žBixquien' re'enle huele trampa quia'?

19 Ulelu'ecara nē'ëdi' bi naque dumi ruquizole impuesto.

Na' blu'ejè' lëbè' tu dumi denario.

20 Bè' blë'ë Jesús len, na' unabanè' lëjè':

—žNu ben' zu laohue lë'ë dumi? žBi na letra dyia lë'ën?

21 Na' unajè' rëbijè' Jesús:

—Lao rey quie ben' romano zu lë'ën.

Na'ra una Jesús rëbinè' lëjè':



—Ulehue' ben' naca gobierno ta redu'ulanë' si'në'. Lëscan' ulehue' Diuzi ta redu'ulanë' si'në'.

<sup>22</sup> Cati bejë' cabë' una Jesús, na'ra tu bega'nzije' rebanejë'. Na' psanjë' quie' zeyojë'.

*Unabajë' Jesús cabë' raca quie ben' baguti yeban*

(Mr. 12.18-27; Lc. 20.27-40)

<sup>23</sup> Lëdza na'tezi uyo bala ja ben' partido saduceo yena'jë' Jesús. Na'ra birale ja ben' partido saduceo chi hueban ben' huati. Tana' lena' unajë' rëbijë' Jesús:

<sup>24</sup> —Maestro, una Moisés chi guti tu be'mbyu zu žgule, na' ganu ži'inë' zu, reya'ala' yezi' ben' bichinë' xcula ben' guti tacuenda su ži'ijë' lao laza ži'i ben' guti.

<sup>25</sup> Na' guca dza na' uzu gadyi bichi be'mbyu yedyi quiendo'. Na' ptzagana' ben' nëro, pero gutinë' ganu ži'inë' uzu. Lena' abezi' ben' bichinë', ben' urupe, nigula quienë'.

<sup>26</sup> Lëscan' guti ben' urupe ganu ži'inë' uzu. Lena' abezi' ben' bichinë', ben' uyune, nigula quienë'. Pero cabë' guca quie ben' nëro len ben' urupe, lëscana' guca quie ben' uyune len los demäs yaca bichinë' hasta lao gadyi bichijë'.

<sup>27</sup> Ude na' gutirë nigula quiejë'.

<sup>28</sup> Na'ra inabando' luë', cati yeban ja ben' baguti, žnulajë' naquë' quiejë' lëbë' lao gadyijë' como yugujë' uzulëjë' lëbë'?

<sup>29</sup> Na' una Jesús rëbinë' lëjë':

—Le'e sí, nequixile como dan' binezile cabë' rnan lë'ë guichi la'ya quie Diuzi. Lëscan' binezile ca naca yela' huaca quienë'.

<sup>30</sup> Cati babeban ja ben' baguti, bisulëjë' laguedyijë' ca žgulajë' ca xquiujë'. Gaca quiejë' ca quie yaca ángel quie Diuzi, ben' yu'uja guibá.

<sup>31</sup> Na' quie ben' baguti yeban, žbinelabale lë'ë guichi la'ya quie Diuzi cabë' unë' le'e? Unë' caniga:

<sup>32</sup> “Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob.” Cana' una Diuzi. Lena' nia' le'e, Diuzi rlë'enë' lëjë' ca ben' neban, como dan' rlë'ë Diuzi tuzicazi ca ben' neban len ben' aguti.

<sup>33</sup> Cati be ja benë' cabë' una Jesús quie ben' guti beban, na'ra tu bebanezijë' cabë' di'idza' rusëdinë' ja benë'.

*Unë Jesús quie chopa mandamiento belo*

(Mr. 12.28-34)

<sup>34</sup> Cati unezi ben' partido fariseo cabë' bë Jesús quie ben' partido saduceo, biubinjë' binajë' yëbijë' Jesús, na'ra begu'udi'jë' ga zë Jesús.

<sup>35</sup> Na' tu ben' quiejë', ben' rusëdi ley quie Moisés, gu'unnë' huenë' trampa quie Jesús. Cana' unë' rëbinë' lëbë':

<sup>36</sup> —Maestro, žnula mandamiento nacaran belo quie ley pca'n Diuzi lao na'a Moisés?

<sup>37</sup> Na' una Jesús rëbinë' lëbë':

—“Idyë'ëro xa'nro Diuzi du guicho du la'adyi'ro.”

<sup>38</sup> Lëlena' nacaran mandamiento belaora.

<sup>39</sup> Derë itu mandamiento nacarën belo. Ilë'ëti'zi birnën lëbi ca mandamiento belaora. Len rnan caniga: “Idyë'ële laguedyile cabë' nedyë'ële cuinle.”

<sup>40</sup> Na' nia' le'e duže ca na ley pca'n Diuzi lao na'a Moisés len duže ca una ja ben' profeta dza na', nacan quie chopa mandamiento belo.

*Unaba Jesús: žNu ži'inë' naca Cristo?*

(Mr. 12.35-37; Lc. 20.41-44)

41 Tu raca nenegu'udi' ja ben' partido fariseo,

42 na' una Jesús rëbinë' lëjë':

—¿Bi ca nale quie ben' naca Cristo? ¿Nu ži'inë' naquë'?

Na' unajë' rëbijë' lëbë':

—Ži'i rey David naquë'.

43 Na' una Jesús rëbinë' lëjë':

—¿Ca biži guca caora una rey David, du yu'unë' Bichi Be quie Diuzi, unë' naca Cristo Señor quienë'? Porque cana' una David caora unë' caniga:

44 Una Diuzi rëbinë' ben' naca Señor quia':

“Ure' cuëta' zaquë' yebë niga, hasta idyin dza cuëcha' xni'alo' yaca ben' rudie luë'.”

Cana' una rey David.

45 Na' rnaba' le'e, ¿cómo naca Cristo ži'i suba rey David, chi cuin rey David unë' naca Cristo Señor quienë'?

46 Na' ni tu di'idza' biubinjë' yëbijë' lëbë'. Desde dza na', bira beyažojë' inabarajë' lëbë' bi di'idza'.

## 23

*Udao Jesús ben' partido fariseo len ben' rusëdi ley quie Moisés xquia (Mr. 12.38-40; Lc. 11.37-54; 20.45-47)*

1 Na'ra una Jesús rëbinë' ja benë' nita' na' len ja ben' quienë':

2 —Ja ben' rusëdi ley quie Moisés, len ja ben' partido fariseo, nacan dyin quiejë' rusëdijë' benë' cabë' nan lë'ë guichi ley ta pca'n Diuzi lao na'a Moisés.

3 Na' reya'ala' hue quiele ca inajë', pero binaole huele cabë' ruejë', como dan' biruejë' tuzi ca najë'.

4 Ruejë' ca quie ben' rugua'a yua' zi' gula laguedyi, tu ta bisueyaquë'. Pero biyeyëchi'la'adyi'jë' yaca benë' ni siquiera ledao'zi ta gacalëjë' lëjë'.

5 Tuzi ta ilë'ë benë' lëjë' dya'a ruejë', pero bë' ruezijë' raxejë' uda'jë' tu guichi dao' quie Diuzi žbasijë'. Raxejë' utubijë' itu guichi quie Diuzi žichojë'. Raxejë' gacojë' žabajë' tona.

6 Re'enjë' cue'jë' ga naca tzao' cati raojë' ga raca lani. Lëscan' re'enjë' cue'jë' ga rbe' ben' bala'ana lu'u idao' sinagoga.

7 Re'enjë' gapala'n benë' lëjë' dyë'ëdi du tu neza. Raxejë' yëbi ja benë' lëjë': “Maestro.”

8 Bihuele lato ta ina ja benë' le'e: “Maestro”, porque yugulule naca tuzi bichile, lëscan' tuzi në'ëdi' naca' maestro quiele.

9 Lëzi nitu nitu ben' nita' lao yedyi layu, bihuele lato yëbilejë': “Xuza”, porque tuzi Xuziro zu, ben' zu guibá.

10 Lëscan' bihuele lato ta ina ja benë' le'e: “Xa'na' luë'”, porque tuzi në'ëdi' naca' xa'nle.

11 Na' rnia' le'e, con nu ben' racalë laguedyi, lënë' nacarë' ben' belao ladole.

12 Porque nu ben' rue že cuine, lëben' na' nacarë' ben' yëchi' lao Diuzi. Pero nu' ben' birue cuine ben' že, lëben' na' nacarë' ben' že lao Diuzi.

13 ‘Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Ruza'agale hue quie benë' xti'idza' Diuzi. Le'e birue quiele xti'idza' Diuzi, lëscan' bire'enle hue quie ben' tula xti'idza' Diuzi.

14 ‘Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Rgubale yu'u quie ja nigula guti xquiuhue, però ta ilë'ë ja benë' le'e ben' rue quie ca rna Diuzi, na' ru'elële Diuzi di'idza' zë.

15 '¡Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Ratale con gatezi ta quilole nu ben' hue quie cabë' ruele. Pero nu ben' usëdile ta hue quie cabë' ruele, huacaterajë' ben' malara ta tziojë' gui' gabila ca le'e.

16 '¡Huaca bayëchi' quiele! Re'enle ulu'ele ben' tula ga tzionë', pero ben' laochula le'e. Na' le'e nale: "Chi ruguntero Diuzi ruzëtoro idao' rnabë'ra chi bi tu ta huero, biruen zi hueron. Pero chi ruguntero Diuzi ruzëtoro oro re' lu'u idao' rnabë'ra, lenan sí, ruen zi hueron."

17 ¡Pero inia' le'e, ben' tondo, ben' laochula le'e! Binaca la'iya oro cuinzin. Tanun quie re'n lu'u idao' rnabë'ra, tana' naca la'iyán. Naca idao' rnabë'ra la'iyaran ca oro re' lu'un.

18 Lëscan' rnarële: "Chi ruguntero Diuzi ruzëtoro ru'aba chi bi tu ta huero, biruen zi hueron. Pero chi ruguntero Diuzi ruzëtoro gun dyia ru'aba, lenan sí, ruen zi hueron."

19 Pero inia' le'e, ¡ben' tondo, ben' laochula le'e! Binaca la'iya gun cuinzin. Tanun quie dyian ru'aba, tana' naca la'iyán. Naca ru'aba la'iyaran ca gun dyia laonan.

20 Chi ruguntero Diuzi ruzëtoro ru'aba chi bi tu ta huero, quele tuzi ru'aba ruzëtoro como dan' tuzi naca ru'aba len gun.

21 Chi ruguntero Diuzi ruzëtoro idao' rnabë'ra chi bi tu ta huero, quele tuzi idao' rnabë'ra ruzëtoro como tuzi naca idao' rnabë'ra len Diuzi, ben' zu lu'un.

22 Lëscan' chi ruguntero Diuzi ruzëtoro guibá chi bi tu ta huero, cana' ruzëtorëro Diuzi lënë' xlatoguë' ga re'në'.

23 '¡Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Lentë ja la'aga' ta ruen zi' yela' huao quiele ru'ele Diuzi tu cue'na quie lao chi cue'na, pero biruele bala quie ta naca belaoa quie mandamiento quie Diuzi. Biruele tali. Bireyëchi'la'adyi'le benë'. Birue quiele quie Diuzi du guicho du la'adyi'le. Tanëro reya'ala' huele ta nacara belao quie Diuzi, na'tera hue'le Diuzi tu cue'na quie lao chi cue'na quie ta de quiele.

24 ¡Le'e re'enle ulu'ele ben' tula ga tzionë', pero ben' laochula le'e! ¡Le'e ruele ze ta naca lë'ëti'zi, na' biruele ze ta naca belao!

25 '¡Le'e ben' rusëdi ley quie Moisés, len le'e ben' partido fariseo, nacan bayëchi' gula quiele! Biruele tuzi ca nale. Rguibile dyë'ëdi xcu'udzula taza len plato. Na' rudze'le lu'un ta rbanle quie benë' rzi'lejë' yë'.

26 Le'e ben' partido fariseo, nacale ca ben' laochula. Nacale ca taza plato neyëri xcu'udzun, pero yu'u lu'un ta bayatza. Uletza' pensari yu'u lu'u guicho laxta'ole, na'tera gacale yëri duzele lao Diuzi.

27 '¡Le'e ben' rusëdi ley quie Moisés, len le'e ben' partido fariseo, huaca bayëchi' gula quiele! Biruele tuzi ca nale. Nacale ca quie ta rucua'jë' ga de ben' huati. Rudze'jë'n ta bezëri xcu'udzun, pero lu'unan yu'u chita quie ben' huati len ta bayatza.

28 Cana' naca quie le'e. Rlë'ë ja benë' le'e ben' huen, pero bë' ruezile biruele tuzi ca nale, yu'u pensari mala lu'u guicho laxta'ole.

29 '¡Le'e ben' rusëdi ley quie Moisés, len le'e ben' partido fariseo, huaca bayëchi' gula quiele! Biruele tuzi ca nale. Le'e rucua'le ba quie ben' huati, ben' uidxogüe' xti'idza' Diuzi dza na'te. Lëzi ruetza'ole ba quie ja ben' bë quie xti'idza' Diuzi dza na'te.

30 Na' lëzi rnale rëbile laguedyile: "Chan' ra'o nita'ro dza unita' xuzixta'oro, bigu'unro guti xuzixta'oro ja ben' uidxogüe' xti'idza' Diuzi."

31 Ca di'idza' rnële ruzë'en dyë'ëdi nezile bëti xuzixta'ole ben' uidxogüe' xti'idza' Diuzi dza na'te.

32 Na' le'e re'enle useyudyile huele cabë' uzulao xuzixta'ole.

<sup>33</sup> 'Le'e ruele ca rue bëla rgui'idyi' laga cabë' bë xuzixta'ole! ¿Bizi ca huele ta bihue Diuzi le'e castigo tziöle gui' gabila?

<sup>34</sup> Quie lena' ise'ela' laole ja ben' quixogue' xti'idza' Diuzi, ben' nezi rusëdi quie Diuzi. Pero le'e gutile balajë', na' ibalajë' uda'le lëjë' lë'ë yaga cruzo. Na' ibalajë' hue'le zi' lu'u idao' sinagoga quiele ulaolejë' tu tu yedyi.

<sup>35</sup> Cana' hue Diuzi dula' quiele, dan' bëtile ja ben' quienë', desde dza cati ure' dyilayu caora bëti Caín Abel, hasta dza bëtijë' Zacarías, ben' naca zi'í Berequías. Bëti xuzixta'ole lëbë' ru'a idao' r nabë'ra ga'ala' ga zu ru'aba.

<sup>36</sup> Tali rnìa' le'e, huida dula' xquia quie xuzixta'ole, ben' bëti ben' quie Diuzi, gacan zba'aga' le'e.

*Gucayëchi' Jesús cabë' rue yaca ben' ciudad Jerusalén*

*(Lc. 13.34-35)*

<sup>37</sup> Na' una Jesús:

—Ben' ciudad Jerusalén, ben' ciudad Jerusalén, le'e rutila ja ben' rguixogue' xti'idza' Diuzi. Le'e rguile yo ja ben' rse'ela' Diuzi laole. Zë lasa gu'unda' gapa' le'e ca rapa biu zi'iba' zan xilaba', pero bigu'unle.

<sup>38</sup> Ilë'ëti'zi idachi ciudad quiele yega'nnan cana'zi.

<sup>39</sup> Tana'rnìa' le'e, ilë'ëti'zi bira ilë'ële në'ëdi'. Cati idyin dza inale: “Naca la'iya ben' use'ela' Diuzi”, na'tera ilë'ële në'ëdi' tatula. —Cana' una Jesús rëbinë' lëjë'.

## 24

*Una Jesús huabiagui' idao' r nabë'ra*

*(Mr. 13.1-2; Lc. 21.5-6)*

<sup>1</sup> Na'ra bero Jesús lu'u idao' r nabë'ra, uza'në' zioquë' cati bebiga' ben' quienë' ga zënë'. Na' uzulaojë' rebanejë' ca naca idao' r nabë'ra.

<sup>2</sup> Na' una Jesús rëbinë' lëjë':

—Ulena' cabë' naca idao' r nabë'ra. Pero tali rnìa', huabiagui'n dužeten, ni tu yo bira yega'nnan xcu'udzu laguedyin.

*Pxi'idze' Jesús cabë' gaca cati idyin dza iyudyi dyilayu*

*(Mr. 13.3-23; Lc. 21.7-24; 17.22-24)*

<sup>3</sup> Na'ra uza'jë' ziojë' ga zu tu ya'a laona ya'a Olivos. Na' ure' Jesús cati bebiga' ja ben' quie' ga re'në' tu ganu dyila', unajë' rëbijë' lëbë':

—Re'enndo' inao' nëto' bata cuiagui' idao' r nabë'ra. Lëzi re'enndo' inao' bizi gaca cati yeguido' tatula, na' lëscana'rë cati iyudyi quie dyilayu.

<sup>4</sup> Na' una Jesús rëbinë' lëjë':

—Gapale cuidado ta bisì' benë' le'e yë'.

<sup>5</sup> Huida ben' zë inajë' napajë' yela' r nabë' quia'. Lëscan' inajë': “Naca Cristo”. Pero huazi'jë' yë' ben' zë.

<sup>6</sup> Ina ja benë' ga raca dila, ga sulao dila, pero bidzebile, dan' ruen zi gacacazi cana'. Nerdziogue idyin dza iyudyi dyilayu.

<sup>7</sup> Dila zë gaca tu yedyi conlë ja ben' yedyi tula. Na' yedyi zë gaca ubin, gaca yela' hue', gaca užu'.

<sup>8</sup> Cana' gaca cati sulao yedzagalao ja benë'.

<sup>9</sup> Na' usedyin benë' le'e lao na'a ja ben' r nabë' ta usacajë' le'e bizinaquezi, gutijë' le'e. Udie benë' le'e dan' nacale ben' quia'.

<sup>10</sup> Lëdza na' usan ben' zë bira galejë' quia'. Udiejë' laguedyijë', usedyinjë' laguedyijë' lao na'a ben' r nabë'.

<sup>11</sup> Huida ben' zë, ben' huezi' yë', inajë' rnëjë' tanun quie Diuzi, pero ben' zë si'jë' yë'.

12 Tantozi gaca tazëdi, bira idyë'ë yaca benë' laguedyijë'.

13 Pero nu ben' sue biusan inao në'ëdi' dza zunë' lao dyilayu, huazi' Diuzi lëjë' yeyojë' guibá.

14 Huayo ja benë' tzetixogue'jë' xti'idza' Diuzi duze yedyi layu ta inezijë' zu Diuzi dispuesto yeyojë' tzasulëjë' lëbë' ga r nabë'në'. Te na', yeyudyi quie dyilayu.

15 'Bzu profeta Daniel di'idza' lë'ë guichi cabë' naca tu ta udyiagui' benë', ratza Diuzi len. Reya'ala' tzioñe'ele cabë' nia' le'e. Caora ilë'ële badyia tu ta udyiagui' benë', ratza Diuzi len lu'u idao' r nabë'ra,

16 na'ra reya'ala' yežuno ja ben' nita' estado Judea yeyojë' guixi' dao'.

17 Chi nita'jë' lali'a, tanto ruguinte yežunojë', bireya'ala' yeyu'ujë' lu'u yu'u quiejë' si'jë' bi ta de.

18 Lëscana' chi zujë' layela, reya'ala' yežunojë' biyeza'jë' yeyojë' tzeži'jë' zabajë'.

19 Gaca bayëchi' quie ja nigula nu'a ži'ine len ja nigula zu xcuidi' ra'adyi' dza na'.

20 Reya'ala' hue'lële Diuzi di'idza' ta gacalënë' le'e ta biužunole tiempo ruen zaga, nica dza huezila'adyi'.

21 Cana' lega yedzagalao yaca benë'. Desde dza cati ure' dyilayu, binedzagalao yaca benë' cabë' yedzagalao ben' yežuno dza zeza'. Lëscan', bë' yeyudyi bezagalaojë', ganura ben' tula yedzagalao cabë' lëjë'.

22 Chi biichugu Diuzi dza yedzagalaojë', biilajë'. Pero huachugu Diuzi dza na' cuenda gacalënë' yaca ben' ulionë'.

23 'Chi ina ja benë' yëbijë' le'e: "Ulena', ni zu Cristo", chi yëbijë' le'e: "Ulena', na' zu Cristo", bigalele quiejë'.

24 Huida ja ben' huizi' yë' huejë' cuinjë' Cristo, huejë' cuinjë' ben' inë tanun quie Diuzi. Huejë' milagro tacuenda si'jë' yë' len ben' ulio Diuzi, pero bihuejë' gan si'jë' ben' ulio Diuzi yë'.

25 Baonia' le'e huaca tu ta binegaca.

26 Tana' lena' chi ina benë' yëbijë' le'e: "Ulena', na' zu Cristo lao lato dachi", bitziole na'. Chi yëbijë' le'e: "Ulena', na' zu Cristo lu'u yu'u", bigalele quiejë'.

27 Bigalele quiejë' como dan' cati yeguida' në'ëdi', bichi yugulu benë', hualë'ë yaca benë' në'ëdi' cabë' ilë'ë benë' xni' yesa cati rëpin ga rlë obidza rdi xni'n hasta ga reyen obidza.

28 Caora rlë'ële recho ja bëchi ladza, cana' inezile de tazigo raojaba'. Lëcana' gaca inezile gan' gaca can' baonia'.

*Ni nan cabë' gaca cati yeguida Cristo tatula  
(Mr. 13.24-37; Lc. 21.25-33; 17.26-30, 34-36)*

29 Na' una Jesús:

—Layeyudyite dza yedzagalaojë', na'ra yechula obidza, bira ina' xni' biu', huaguinu bélo gan dyian, huazisi yugulu ta dyia guibá.

30 Hualë'ë benë' tu ta binelë'ëjë' guibá. Lena' ulu'en abdyin dza yeguida' në'ëdi', bichi yugulu benë'. Na' huabedyi yugulu ja ben' nita' lao yedyi layu, hualë'ëjë' në'ëdi', bichi yugulu benë', za'a lu'u beo. Hualë'ëjë' taže de yela' huaca quia', taže de yela' r nabë' quia'.

31 Na'ra ise'ela' yaca ángel quia' ta cuedyijë' trompeta quiejë' zidzo gula. Caora na' yegu'udi' ja ben' ulioga' në'ëdi' sa'jë' duze yedyi layu guidajë' ga zua'.

32 'Ulehue pensari ca raca quie yaga higo. Cati naca taca'n re'ene, na' rasi la'aga' quien, na' nezile bazeza' biu' uba.

<sup>33</sup> Lëscan' cati ilë'ële araca cabë' baonia' le'e, reya'ala' inezile baruen bagozi dza iyudyi quie dyilayu.

<sup>34</sup> Tali rnia' le'e, tu bineya zi'i suba ben' nita' na'a, bë' gaca cabë' baonia' le'e.

<sup>35</sup> Huade quie ta dyia guibá len lao dyila yu cana'zi, pero quie di'idza' rnia', biten cana'zi. Decazide gacan.

<sup>36</sup> 'Nunu nezi bata idyin dza iyudyi dyilayu. Binezi ja ángel dyia guibá, binezda' në'ëdi' zi'i Diuzi. Tuzi Xuza' Diuzi nezinë'.

<sup>37</sup> 'Cabë' guca dza uzu Noé dyilayu, lëscana' gaca cati yeguida' në'ëdi', bichi yugulu benë', tatula.

<sup>38</sup> Na' dza na' cati baruen bago gaca juicio nisa, bigulejë'. Nita'jë' ri'o raojë', rutzagana' ja zi'ijë' hasta bdyin dza cati uyu'u Noé lu'u barco quienë'.

<sup>39</sup> Na' bigucabë'jë' bi gaca quiejë' hasta dyin dza guca juicio nisa, cana' bi'a nisa yugulujë' gutijë'. Lëscana' gaca cati yeguida' në'ëdi', bichi yugulu benë', tatula.

<sup>40</sup> Cati idyin dza na', chi zu chopa benë' layela, na' yequië' ja ángel tunë', itunë' yega'n.

<sup>41</sup> Lëscana' chi zu chopa nigula hueto, na' yequië' ja ángel tunë', itunë' yega'n.

<sup>42</sup> Ulesu listo como dan' binezile bi hora yeguida' në'ëdi' naca' xa'nle.

<sup>43</sup> Ulehue pensari can' nia' le'e. Chi nezi xa'n yu'u bi hora guida ben' uban du rêla, huazunë' listo ta ina'në' bihuenë' lato tzu'u ben' uban lu'u yu'u quienë' cuannë'.

<sup>44</sup> Quie lena', sule listo, como dan' cati ruele pensari biguida', huida', lëhora na' cati guida' në'ëdi', bichi yugulu benë'.

*Unë Jesús tu ejemplo quie tu mozo*  
(Lc. 12.41-48)

<sup>45</sup> Na' una Jesús:

—Rnia' le'e tu ejemplo quie tu mozo, ben' rioñe'e ruzu di'idza'. Na' pca'n xa'nnë' lënë' ta ugaonë' ja ben' mozo quienë'. Na' uza'në' zioguë'.

<sup>46</sup> Na' huatzaxe xa'nnë' lënë' cati yedyinnë' ilë'ënë' rue mozo za' cabë' ta bënë' lëbë' mandado.

<sup>47</sup> Tali rnia' le'e, uca'n xa'nnë' lao na'anë' yugulu ta de quienë'.

<sup>48</sup> Pero chi biruenë' tahuen, chi raquenë' biyedyinneza xa'nnë',

<sup>49</sup> chi usacanë' ja mozo quienë' bizinaquezi, chi rdalënë' ben' žudyi tuže hue'e,

<sup>50</sup> na' yedyin xa'nnë' cati raquenë' biyedyin xa'nnë',

<sup>51</sup> na'ra hue xa'nnë' lëbë' castigo ca castigo hue Diuzi ben' birue tuzi ca nayaquë'. Huayojë' gui' gabila ga cuedyiya'jë', ga gaojë' lejijë'.

## 25

*Unë Jesús tu di'idza' quie chi nigula cuidi'*

<sup>1</sup> Na' una Jesús:

—Re'enda' inia' le'e tu di'idza' cabë' rue Diuzi inabë'në' cati idyin dza na'. Nacan ca quie chi nigula cuidi', ben' uza'ja zioja ga raca huetzagana'. Nu'ajabi' lámpara yudzo aceite ta tziojabi' lidyi bibyu utzagana' ta tzelezajabi' lëbi' guidabi'.

<sup>2</sup> Na' guca ga'yo' nigula listo. Na' iga'yo'jabi' bigucajabi' listo.

<sup>3</sup> Na' ja nigula binaca listo bibi'ajabi' tu frasco huio aceite ta yeyudzo lámpara bë' bebidyi aceite quien.

<sup>4</sup> Pero ja nigula listo bi'ajabi' tu frasco huio aceite len lámpara quiejabi'.

5 Na' udzē bi'byu utzagana' guidabi'. Na' unan gasijabi' gusijabi'.

6 Na'ra ca du gatzo yela bejabi' rbedyiyi' ja benē' unajē': "¡Baza' bi'byu utzagana'! ¡Ulero gapala'nlebi'!"

7 Na' uyasa ja nigula cuidi' yugujabi' bga'ala'jabi' lámpara quiejabi'.

8 Na' lao ga'yo'jabi' biguca listo gudyijabi' iga'yo'jabi' naca listo rēbijabi' lējabi': "Ulegun ledao' aceite quiele nēto', dan' bareyula lámpara quiendo'."

9 Na'ra una ga'yo'jabi' listo rēbijabi' lējabi': "Bigunndo'n, dan' chí gunndo'n, bigaquen quiendo' lente le'e. Uletzio tzegue'len ga ruti'nē'n ta gata' quiele."

10 Na' tu zio ja ga'yo'jabi' biguca listo tzegue'jabi' aceite, tu na' bdyin bi'byu utzagana'. Na' uyu'u iga'yo'jabi' de aceite quie conlē bi'byu utzagana' lu'u yu'u ga raca huetzagana'. Na' besiojē' yu'u.

11 Ude na' bedyin iga'yo'jabi' unajabi' rēbijabi' bi'byu utzagana': "¡Señor, Señor, usalu yu'u tzu'undo'!"

12 Na' una bi'byu utzagana' rēbibi' lējabi': "Tali binubē'da' le'e."

13 Na' una Jesús rēbinē' ben' quienē':

—Ulehue listo, dan' binezile bi dza, bi hora, yeguida' nē'ēdi', bichi yugulu benē', tatula.

*Unē Jesús tu di'idza' quie tu xan' mozo, ben' pca'n dumi lao na'ajē'*

14 Na' una Jesús:

—Re'enda' inia' le'e itu di'idza' cabē' rue Diuzi r nabē'nē'. Ruenē' ca tu ben' re'en tzio yedyi tula. Tu zaza'nē' tzione' guzinē' ja mozo quienē' ta pca'nnē' centavo quienē' lao na'ajē'.

15 Na' bi'zi tu ben' mozo quiē' bē'nē' cadu ga'yo' mila dumi plata. Itunē' bē'nē' cadu chopa mila dumi plata. Itunē' bē'nē' cadu tu mila dumi plata. Bē'nē' quie quiejē' dumi cabē' nezinē' rueljē' dyin dumi. Na'ra uzē'ē' zioгуē'.

16 Ben' mozo, ben' uzi' ga'yo' mila na', bēlēnē'n dyin bēnē' gan iga'yo' mila zi'inan.

17 Lēscan' ben' uzi' chopa mila, bēlēnē'n dyin bēnē' gan ichopa mila zi'inan.

18 Pero na' ben' uzi' tu mila, uyonē' yecachi'nē'n yeguenē' tu yero ga bdze'nē'n lu'u yu.

19 'Bē' guca zē dza, na' bedyin xan' ja ben' mozo guzinē' lējē' beyuelēnē' lējē' žubaba.

20 Na' tanēro bdyin ben' uzi' ga'yo' mila yesannē' dumi. Na' unē' rēbinē' xa'nnē': "Señor, benlo'nē' ga'yo' mila. Na' ni de iga'yo' mila zi'inan ta bia' gan."

21 Na' una xa'nnē' rēbinē' lēbē': "Tahuen gula cabē' bao'. Mozo dya'a naco', ruzulo' di'idza' quia'. Tadya'a bēlao' tadao' pca'na' lao nao', tana' uca'na' lao nao' tažera, idaohuero suro tuže."

22 Na' taorupe bdyin ben' uzi' chopa mila yesannē' dumi. Na' unē' rēbinē' xa'nnē': "Señor, benlo'nē' chopa mila. Na' ni de ichopa mila zi'inan ta bia' gan."

23 Na' una xa'nnē' rēbinē' lēbē': "Tahuen gula cabē' bao'. Mozo dya'a naco', ruzulo' di'idza' quia'. Tadya'a bēlao' tadao' pca'na' lao nao', tana' uca'na' lao nao' tažera, idaohuero suro tuže."

24 Pero na' taoyune bdyin ben' uzi' tu mila. Na' unē' rēbinē' xa'nnē': "Señor, nezda' naco' ben' re'en mozo quie ta huejē' dyin gaca zi'inan dumi quio'. Huetzagao' mandado ja mozo quio' ta yezi'jē' usecho gaca zi'inan quio'.

25 Lena' bdzeba' udyiaya'a dumi quio'. Tana' yecacha'n lu'u yu. Na' ni de dumi quio'. Gabi guca quien."

26 Na' una xa'nnē' rēbinē' lēnē': "Mozo mala žan huēdi naco'. Nezilo' huetzaguia' mandado ja mozo quia' ta yezi'jē' usecho gaca zi'inan quia'.

27 Tana' reya'ala' huelao' dyin dumi quia' ta gaca zi'inan cuenda cati yela' tatula yezi'a dumi quia' len zi'inan."

28 Na' una xa'nnë' rëbinë' ben' nita'ja na': "Uleguba tu mila dumi nezi'në'. Ulehue'n ben' nezë chi mila.

29 Nu ben' ruelë dypin ta pca'na' lao në'ë, hue'ra'lënë' tazëra gacaran sobre. Pero nu ben' biruelë dyin ta pca'na' lao në'ë, hueguba' ta pca'na' lao në'ë.

30 Na'ra uledze' mozo žan huëdi niga lao lato chula ga cuedyinë', ga yedzagalaonë', ga gao leinë'." —Cana' una Jesús rëbinë' lëjë'.

### *Unë Jesús cabë' huenë' dza gaca juicio*

31 Na' una Jesús:

—Cati yeguida' në'ëdi', bichi yugulu benë', huabi'a xlatoga'. Hueguidalia' ja ángel quia'. Huapala'n ja benë' në'ëdi'.

32 Na' yegu'udi' yugulu ben' tu tu yedyi de lao dyilayu laohua'. Useria' ja benë' cuioga'jë' chopa cue' cabë' rue ben' rapa beco' zi'ila', rbioguë' beco' zi'ila' tzala'la, na' rbioguë' chivo itzala'la.

33 Cana' huabioga' ben' nao xneza' zaquë' yebë, pero huabioga' ben' binao xneza' zaquë' yega'.

34 Na' inia' yëba' ja ben' zu zaquë' yebë: "Uleda le'e, ben' neyëri laxta'ohue lao Diuzi. Uletzu'u guibá ga arnabë' xuzá, ga pcuezanë' desde dza cati ure'te dyilayu.

35 Lena' naca quiele, como dan' cati udua', benle në'ëdi' ta udaohua'. Cati ubilida', benle në'ëdi' ta hua'a. Cati uza'a yedyi tula bla'a žan yu'u quiele, benle posada quia'.

36 Cati bdziogueda' žaba', benle në'ëdi' ta gucua'. Cati guca' žhui'a, cati guta' dyiguiba, bidale bedena'le në'ëdi'." Cana' yëba' lëjë'.

37 Na'ra ina ben' neyëri laxta'ohue lao Diuzi yëbijë' në'ëdi': "Señor, žbata blë'ëndo' luë' uduelo', na' benndo' ta udaolo'? žBata blë'ëndo' luë' ubililo', na' benndo' ta hue' elo'?"

38 žBata blë'ëndo' luë' uzao' yedyi tula blao' žan yu'u quiendo', na' benndo' posada quio'? žBata blë'ëndo' bdzioguelo' žabo', na' benndo' gucolo'?"

39 žBata blë'ëndo' luë' guta'lo' lu'u dyiguiba, na' bedena'ndo' luë'?"

40 Na'ra inia' yëba'jë': "Tali rnia' le'e, yugute ta babële beyëchi'la'adyi'le bicha', ben' nao xneza', la'acazi ben' yëchi' gula, cana' beyëchi'la'adyi'le në'ëdi'."

41 Na'ra inia' yëba' ja ben' nita' zaquë' yega': "Ulebiga' tzala'la le'e ben' yu'u de' lao Diuzi. Uletzio qui' gabila ta bireyula tuzioli ta pcueza Diuzi quie xan' taxi'ibi' len ja ángel quienan.

42 Lena' gaca quiele tzirole, como dan' cati udua', bibenle në'ëdi' ta gaohua'. Cati ubilida', bibenle në'ëdi' ta yo'oga'.

43 Cati uza'a yedyi tula bla'a žan yu'u quiele, bibenle posada quia'. Cati bdziogueda' žaba', bibenle ta gacua'. Cati guca' žhui'a, guta' lu'u dyiguiba, bibidale bedena'le në'ëdi'." Cana' yëba' lëjë'.

44 Na'ra inajë' yëbijë' në'ëdi': "Señor, žbata blë'ëndo' luë' uduelo'? žBata blë'ëndo' luë' ubililo'? žBata blë'ëndo' luë' uzao' yedyi tula blao' žan yu'u quiendo'? žBata blë'ëndo' luë' bdzioguelo' žabo'? žBata blë'ëndo' luë' guca' žhue'lo'? žBata blë'ëndo' luë' guta'lo' lu'u dyiguiba, na' bibeyëchi'la'adyi'ndo' luë'?"

45 Na' inia' yëba'jë': "Tali rnia' le'e, yugute ta bibële bibeyëchi'la'adyi'le ja ben' nao xneza', la'acazi ben' yëchi' gula, cana' bibeyëchi'la'adyi'le në'ëdi'."



46 Caora na' tziojë' gui' gabila ta bireyula tuzioli. Pero ja ben' neyëri laxta'ohue lao Diuzi, huayojë' tzesulëjë' Diuzi guibá tuzioli. —Cana' una Jesús rëbinë' lëjë'.

## 26

*Cabë' bëjë' psaque'jë' ta guxujë' Jesús*  
(Mr. 14.1-2; Lc. 22.1-2; Jn. 11.45-53)

1 Cati beyudyi una Jesús cana', na' unë' rëbinë' ben' quienë':

2 —Como banezile, ichopa dzazi idyin ga'ala' lani pascua. Na' usedyin benë' në'ëdi', bichi yugulu benë', lao na'a ben' rnabë' ta uda'jë' në'ëdi' lë'ë yaga cruzo. —Cana' una Jesús.

3 Na'ra caora na', begu'udi' ja ben' naca xan' pxuzi, len yaca los demás ben' rusëdi ley quie Moisés, len ben' rnabë' quie ben' Israel, begu'udi'jë' lali'a palacio quie Caifás, ben' naca xan' pxuzi rnabë'ra iza na'.

4 Na' psaque'jë' bi huejë' ta guxujë' Jesús balarazi gutijë' lëbë'.

5 Cana' unajë' rëbijë' laguedyijë':

—Bireya'ala' gutironë' tu neraca lani ta biidza' ja benë' ra'o.

*Tu nigula blatonë' aceite tzao' guicho Jesús*  
(Mr. 14.3-9; Jn. 12.1-8)

6 Na'ra uza' Jesús lënë' yaca ben' quië' ziojë' yedyi Betania uyu'ujë' yu'u quie Simón, ben' guca yela' hue' ta ruzudzo' cuerpo quienë' dza na'.

7 Na' ubiga' tu nigula ga re' Jesús lao mesa. Nu' anë' tu frasco yo alabastro yudzo aceite tzao' ta rla'n zixi zëo. Na' blatonë'n guicho Jesús.

8 Cati blë'ë ja ben' quie Jesús cabë' bë nigula, na'ra bdza'jë' unajë' rëbijë' laguedyijë':

—¿Bixquien' beditoguë' aceite cana'?

9 Reya'ala' guti'në'n zaca'n dumi ze tacuenda gacalënë' ben' yëchi'.

10 Na' be Jesús cabë' rnajë', na' unë' rëbinë' lëjë':

—¿Bixquien' ruele zëdi nigula niga? Tadya'a bënë' quia'.

11 Nita'cazi ben' yëchi' ladole yugu dza. Pero në'ëdi', baruen bago dza bira sulia' le'e.

12 Lena' blatonë' aceite rla'n zixi zëo guichoga', dan' baruen bago dza gatia' udze'jë' cuerpo quia' lu'u beló yo.

13 Tali rnia' le'e, con gatitezi tzetixogue' benë' xti'idza' Diuzi inajë' cabë' re'en Diuzi gata' yela' neban quie yaca benë' tuzioli, quixogue'rëjë' cabë' bë nigula niga quia'. Cana' yeza'la'adyi'jë' cabë' bënë' quia'.

*Psaque' Judas ta usedyinnë' Jesús lao na'a ben' rnabë'*  
(Mr. 14.10-11; Lc. 22.3-6)

14 Na'ra uyo tu ben' quie Jesús, ben' lao Judas Iscariote, yegue'lënë' ja xan' pxuzi di'idza'.

15 Na' una Judas rëbinë' lëjë':

—¿Gaca gunle në'ëdi' chan' usedyina' Jesús lao na'ale?

Na' udižujë' lëbë' galobechi dumi plata.

16 Na'ra rusaque' Judas nacala huenë' ta usedyinnë' Jesús lao na'a ja xan' pxuzi.

*Udao Jesús rtze' lani pascua*  
(Mr. 14.12-25; Lc. 22.7-23; Jn. 13.21-30; 1 Co. 11.23-26)

17 Dza nëro uzu dza lani, dza rao ja ben' Israel yëta xtila biyu'un levadura, bebiga' ja ben' quie Jesús ga zënë' unajë' rëbijë' Jesús:

—¿Ga re'lenlo' usiña'ndo' ta gaoro quie lani pascua?

18 Na' una Jesús rëbinë' lëjë':

—Uletzio ciudad Jerusalén tzena'le tu ben' zu na'. Na' yëbilenë': “Cani una maestro: Baruen bago dza gatia'. Quie lena' gaolia' ja ben' quia' quie lani pascua zan yu'u quio'.”

19 Na' bë ja ben' quie Jesús cabë' bënë' lëjë' mandado. Uyojë' psiña'jë' ta gaoyë' rtze' quie lani pascua.

20 Cati bagula, bdyin Jesús ure'lënë' ja chipchopa ben' quië' lao mesa.

21 Tu raca neyu'ujë' raojë', una Jesús rëbinë' lëjë':

—Tali rnia' le'e, ladole zu tu ben' usedyin në'ëdi' lao na'a ben' rñabë'.

22 Na' guquejë' bayëchi' gula. Na' unë' tu huiojë' rëbijë' Jesús:

—Señor, ¿quele në'ëdi' hua' cabë' unao'?

23 Na'ra una Jesús rëbinë' lëjë':

—Nu ben' udyilë në'ëdi' tuže yëta quie lu'u plato dyia niga, lëbë' usedyinnë' në'ëdi' lao na'a ben' rñabë'.

24 Decazide gaca quia' në'ëdi', bichi yugulu benë', cabë' rñën lë'ë guichi la'iya quie Diuzi. Pero bayëchi' gula ta za' gaca quie ben' usedyin në'ëdi' lao na'a ben' rñabë'. Tadya'acala quienë' chan' biuzunë' lao yedyi layu.

25 Na' una Judas, ben' usedyin Jesús lao na'a ben' rñabë', rëbinë' lëbë':

—Maestro, ¿quele në'ëdi' hua' cabë' unao'?

Na' una Jesús rëbinë' lëbë':

—Aja', luë' na'.

26 Na' tu raca neraojë', bëxu Jesús yëta xtila unë' rëbinë' Diuzi: “Diuxcalelo'." Na' bzužunë'n bë'në'n ja ben' quië' unë' rëbinë' lëjë':

—Ulegao, lëlen nacan ca quie cuerpo quia'.

27 Ude na', bëxunë' tu copa vino nisa bedzuli', unë' rëbinë' Diuzi: “Diuxcalelo'." Na' bë'në'n ja ben' quienë' unë' rëbinë' lëjë':

—Uleyo'on yugulule. Lëlen nacan

28 ca quie ren quia'. Lena' ilatoga' gatia' cuenda yega'ntza'olë Diuzi le'e tacubi, lëscan' cuenda gata' yela' huezi'ze quie yaca ben' zë.

29 Pero rnia' le'e, bira yo'oga' vino nisa bedzuli' tatula. Hasta que idyin dza zulële në'ëdi' ga rñabë' Xuza' Diuzi, na'tera yo'oga' tacubi tatula.

*Una Jesús cabë' hue Pedro usannë' lëbë'  
(Mr. 14.26-31; Lc. 22.31-34; Jn. 13.36-38)*

30 Na' ude beyudyi bilajë' tu himno, uza'jë' ziojë' ya'a Olivos.

31 Na' una Jesús rëbinë' ja ben' quienë':

—Huasanle në'ëdi' yugulule na'ayela. Gaca quiele ca rnan lë'ë guichi la'iya quie Diuzi: “Hue' Diuzi lato guti ja benë' xan' beco' zi'ila', na'tera huedzatza ja beco' zi'ila' quienë'.”

32 Pero iyudyi guti ja benë' në'ëdi', huebana' tatula, huabialaohua' laole tzirole estado Galilea.

33 Na'ra una Pedro rëbinë' Jesús:

—Ba'ala'cazi yugulujë' usanjë' luë', pero në'ëdi', busancaza' luë'.

34 Na' una Jesús rëbinë' Pedro:

—Tali rnia' luë', tu binecuedyi biu na'ayela, huëbo' benë' binubë'lo' në'ëdi' tzoza lasa.

35 Na' una Pedro rëbinë' Jesús:

—Ba'ala'cazi chi gutirëjë' në'ëdi' len luë', biyëpa' ja benë' binubë'da' luë'.

Cana'rë una yaca los demás ben' quie Jesús.

*Bè'lè Jesús Diuzi di'idza' tu ga lao Getsemaní**(Mr. 14.32-42; Lc. 22.39-46)*

36 Na'ra bdyinlè Jesús ja ben' quienè' ga lao Getsemaní, na' unè' rëbinè' lèjè':  
—Ni ulecue' tu raca tza'a ni' tzegue'lia' Diuzi di'idza'.

37 Na' uquiè' Jesús Pedro len chopa zi'i Zebedeo, udyialaorajè' ilè'èti' ga uzulao guque Jesús bayèchi' gula.

38 Na' una Jesús rëbinè' lèjè':

—Tanto raqueda' bayèchi' gula, re'ennan gutin nè'èdi'. Le'e yega'nle niga, pero bigasile huele nè'èdi' tuze.

39 Na'ra udyialaoranè' ilè'èti' gutanè' guzu ru'ala layu, bè'lènè' Diuzi di'idza' unè' rëbinè' Diuzi:

—Xuzà' Diuzi, chi saque' ucachi' ucui'olo' nè'èdi' ca naca tazèdi gula baza' gaca quia'. Nacan ca quie tu tasla' gula yo'oga'. Pero bihuelo' cabè' re'enda', huelo' cabè' re'encazo' gaca.

40 Na' zeza'nè' bedyinnè' ga nita' ja ben' quienè'. Cati blè'ènè' arasijè', na'ra unè' rëbinè' Pedro:

—¿Quele biuzaque'le bigasile ni tu hora ta huele nè'èdi' tuze?

41 Bigasile. Ulehue'lè Diuzi di'idza' tacuenda bihue xan' taxi'ibi' le'e gan huele xquia ca tazèdi gula baza' quiele. Tali re'enle huelèle nè'èdi' tuze, pero nerdzioguele fuerza quie Diuzi ta huele cabè' re'enle huele.

42 Na' taorupe zio Jesús yegue'lènè' Diuzi di'idza' unè' caniga:

—Xuzà' Diuzi, chi bisaque' te cana'zi ca naca tazèdi gula baza' gaca quia', na'ra gacacazi ca re'enlo'.

43 Na'ra zeza'nè' bedyinnè' tatula ga nita' ja ben' quienè', pero nerasijè', dan' lega yu'u bichi gala laojè'.

44 Na' psannè' lèjè' zioquè' taoyune lasa yegue'lènè' Diuzi di'idza'. Unè' rëbinè' Diuzi cabè' unè' taorupe.

45 Na'ra zeza'nè' tatula bedyinnè' ga nita' ja ben' quienè'. Na' unè' rëbinè' lèjè':

—Na'a sí, gasile yezi'la'adyi'le. Abdyin hora usedyin benè' nè'èdi', bichi yugulu benè', lao na'a ben' napaja dula' xquia.

46 Ulechasa, tzioro. Baza' ben' usedyin nè'èdi' lao na'a ben' rnabè'.

*Bëxujè' Jesús preso**(Mr. 14.43-50; Lc. 22.47-53; Jn. 18.2-11)*

47 Na' nezè Jesús ru'enè' di'idza' cati bdyin Judas, ben' naca ben' quienè' lao chipchopajè'. Bdyinlènè' ja ben' zè nu'ajè' macheta, nu'ajè' yaga. Bdyinjè' use'ela' ja xan' pxuzi len ja ben' rnabè' lèjè'.

48 Na' Judas, ben' usedyin Jesús lao na'ajè', bega'nlènè' lèjè' di'idza' dza na' caora gudyinè' lèjè' cani:

—Con ben' gaohua' tu situ xa'ague, lëben' na' guxule preso.

49 Na' ubiga' Judas ga zè Jesús unè' rëbinè' lèbè':

—¡Padiux, Maestro!

Caora na' udaohuè' Jesús tu situ.

50 Na' una Jesús rëbinè' lèbè':

—Padiux, bicha'. ¿Bi ruelo' zao' niga?

Na'ra ubiga'jè' bëxujè' Jesús preso uquiè'jè' lèbè'.

51 Caora na' ulio tu ben' quie Jesús macheta quienè', uchugunè' naga ben' naca mozo quie xan' pxuzi.

52 Na' una Jesús rëbinè' lènè':

—Bedze' macheta quio' lu'u lidyin. Nu ben' rdilaja conlè macheta, lëlëcazin gutin lènè'.

53 ¿Binezo' ca huelëcazi Xuza' në'ëdi'? Chan' inaba' xuza', ise'elë' mazla tzona galo chi mila ja ángel ta gacalëjë' në'ëdi'.

54 Pero chi inaba' xuza' ta ise'elë' ja ángel, na' bisaque' gaca quia' cabë' rnën lë'ë guichi la'iya quie Diuzi ca reya'ala' gaca quia'.

55 Na'ra una Jesús rëbinë' ja ben' bdyin bëxu lëbë':

—¿Abrole nu'ale macheta, nu'ale yaga, ta guxule në'ëdi'? ¿Raqule në'ëdi' ben' uban? Yugu dza rbi'a lu'u idao' rnabë'ra rusëdia' benë', pero bibëxule në'ëdi' caora na'.

56 Pero cana' guca tacuenda uzu di'idza' cabë' di'idza' quie Diuzi bzu ben' profeta lë'ë guichi dza na'te.

Na'ra psanla'adyi' ja ben' quie Jesús lëbë' bžunojë'.

*Psedyinjë' Jesús lao na'a ben' rnabë'*

(Mr. 14.53-65; Lc. 22.54-55, 63-71; Jn. 18.12-14, 19-24)

57 Na' uquië' ben' bëxu Jesús preso lao Caifás, ben' naca xan' pxuzi rnabë'ra. Lena' negu'udi' ja ben' rusëdi ley quie Moisés, len ja ben' rnabë'.

58 Pero zio Pedro naohuë' lëjë' zitu'la, bdyinnë' lali'a yu'ute quie xan' pxuzi rnabë'ra. Na' uyu'unë' ure'në' lado ja policia ta ilë'ënë' cabizi gaca iyudyin.

59 Na' rusaque' ja xan' pxuzi, len yugu ja ben' rnabë' quie idao' rnabë'ra bi huejë' ta gaojë' Jesús xquia ta gutijë' lëbë', ba'ala'cazi tafalso gaojë' lëbë' xquia.

60 Pero bibedzelejë' ca inajë', ba'ala'cazi unë ja ben' zë di'idza' falso contra lëbë'. Na' beyudyite bdyin chopa testigo falso.

61 Na' unajë' rëbijë' ben' nita'ja na':

—Lëben' niga unë': "Udyiaya'a idao' rnabë'ra, na' yelisa'n tatula lao tzona dza."

62 Na'ra uzuli xan' pxuzi rnabë'ra, unë' rëbinë' Jesús:

—¿Bixquien' birequëbo'? ¿Bi ca nao' dan' rnëjë' cabë' unao'?

63 Pero chizi bega'n Jesús. Na' una xan' pxuzi rnabë'ra rëbinë' Jesús:

—Rguntia' Diuzi zu guibá, guenë' chi rnao' tali. Unë nëto' chi tali naco' Cristo, ži'i Diuzi.

64 Na' una Jesús rëbinë' lëbë':

—Tali naca' Cristo, ži'i Diuzi, cabë' unao'. Lëscan' inia' le'e, hualë'ële në'ëdi', bichi yugulu benë', cati cui'a zaquë' yebë cuëta Diuzi, ben' de yela' rnabë' že quie. Lëscan' hualë'ële në'ëdi' cati yeguida' tatula lao beo zë žan guibá.

65 Na'ra tantozi bdza' xan' pxuzi rnabë'ra, uchezanë' zabë' unë' rëbinë' ja ben' nita' na':

—Rnaya' ben' niga Diuzi cabë' rnë'. Bira rnaban testigo tula. Abele cabë' di'idza' unë' rnaya'në' Diuzi. ¿Bi ca nale huero quienë'?

66 Na' unajë' rëbijë' xan' pxuzi rnabë'ra:

—Napë' dula' xquia, reya'ala' gatinë'.

67 Na'ra bda'jë' žen' laohuë', bë'jë' lëbë' zi'. Ibalajë' udijë' laohuë',

68 unajë' rëbijë' lëbë':

—Chi naco' Cristo, unacara nu udi luë'.

*Una Pedro binubë'në' Jesús*

(Mr. 14.66-72; Lc. 22.56-62; Jn. 18.15-18, 25-27)

69 Tu neraca cana', ure' Pedro lali'a. Na' ubiga' tu nigula rue dyin lao xa'ne ga re' Pedro unanë' rëbinë' lëbë':

—Lëscana' luë', rdalërao' Jesús, ben' estado Galilea.

70 Na'ra una Pedro rëbinë' lënë':

—Binubë'da' nu ben' nao'.

71 Na' zio Pedro zënë' ru'a puerta cati blè'è itu nigula zè na'. Na'ra una nigula na' rëbinè' ja ben' zè na':

—Lëscan' lëben' na' rdalërënè' Jesús, ben' yedyi Nazaret.

72 Na' una Pedro rëbinè' lëjè':

—Ruguntia' Diuzi binubè'da' ben' na'.

73 Tu chí'zi ude beyudyi na', ubiga' ja ben' nita'ja na' ga zè Pedro, unajè' rëbijè' Pedro:

—Tali luè' nacarao' ben' quie ben' na' como dan' nenate cabè' ruelo' ru'elo' di'idza'.

74 Na'ra rugunte Pedro Diuzi hue Diuzi lëbè' castigo chi binacan tali cabè' rnè'. Na' unè' rëbinè' ja ben' nita' na':

—Binubè'da' nu ben' nale cana'.

Caora na' laoredyite tu biu.

75 Na' beza'la'adyi' Pedro cabè' una Jesús gudyinè' lëbè': "Tu binecuedyi biu na'ayela, na' tzona lasa yëbo' benè' binubè'lo' nè'èdi'." Na' bero Pedro zionè' uredyinè' zi'laza gula.

## 27

### *Psedynjè' Jesús lao na'a Pilato (Mr. 15.1; Lc. 23.1-2; Jn. 18.28-32)*

1 Na' cati uyani' na', bega'n yugu ja xan' pxuzi, len ja ben' r nabè' quie ben' Israel di'idza' bi huejè' ta gutijè' Jesús.

2 Na'ra nuquiojè' Jesús psedynjè' lëbè' lao na'a Poncio Pilato, ben' naca gobernador.

### *Cabè' guca guti Judas*

3 Cati blè'è Judas cabè' ruejè' quie Jesús gutijè' lëbè', na'ra beyaquenè' cabè' bënë'. Na' uyonè' yesannè' lao ja xan' pxuzi, len ja ben' r nabè' galobechi dumi plata ta udižujè' lëbè'.

4 Na' unè' rëbinè' lëjè':

—Abia' tu xquia, psedyina' tu ben' bibi dula' xquia quie de lao na'ale, na' gutilenè'.

Pero na' unajè' rëbijè' lëbè':

—¿Bi cuenda quie nëto'? Nacan cuenda quio' luè'.

5 Na'ra bzala Judas dumi plata lu'u idao' r nabè'ra uyoguè' bdze'nè' du quienè' uzè ladza ta gutinè'.

6 Na' bezi' ja xan' pxuzi dumi plata unajè' rëbijè' laguedyijè':

—Bireya'ala' udze'ro dumi niga lu'u caja ga yu'u gun quie Diuzi, como dan' xlažo quie ben' bëti benè' na'.

7 Na'ra labega'ntejè' di'idza' bi huejè' conlè dumi yeya'ojè' tu cue' layu ga ucachi'jè' ben' binaca ben' Israel. Na' layu beya'ojè' laona layu quie ben' rue taza plato dza na'.

8 Pero na'a biralaona cana'. Anexuba ja benè' laona layu quie ren. Cana' laona hasta na'adza.

9-10 Cana' uzu di'idza' cabè' una profeta Jeremías dza na'. Lèdi'idza' na' rnèn caniga: "Aodizu ben' Israel galobechi dumi plata precio quienè'. Lëdumi aozijè' beya'ojè' tu cue' layu quie ben' rue taza plato. Cana' una Diuzi gudyinè' nè'èdi'." Cana' una profeta Jeremías.

### *Zè Jesús lao Pilato (Mr. 15.2-5; Lc. 23.3-5; Jn. 18.33-38)*

11 Na'ra uquiè'jè' psedyinjè' Jesús lao na'a ben' naca gobernador. Na' una ben' naca gobernador rëbinè' Jesús:

—¿Naco' rey quie ben' Israel?

Na' una Jesús rëbinè' lëbè':

—Naca' rey quiejè' cabè' unao'.

12 Cati rao ja xan' pxuzi, len ben' r nabè' Jesús xquia, bibequëbinè'.

13 Na' una Pilato rëbinè' Jesús:

—¿Quele birelo' cabè' najè' raojè' luè' xquia?

14 Pero bibequëbi Jesús tatula. Tana' lena' lega beban gobernador.

*Pchugulijè' gati Jesús*

(Mr. 15.6-20; Lc. 23.13-25; Jn. 18.38—19.16)

15 Na' de tu costumbre quiejè' yebio gobernador tu ben' preso yu'u lu'u dyiguiba tu raca lani pascua. Na' yebio gobernador nutezi ben' re'en ja benè' yero.

16 Na' yu'u tu ben' lao Barrabás lu'u dyiguiba. Nezi ja benè' dyè'èdi naquè' ben' mala.

17 Na'ra bè' begu'udi' ja benè', na' una Pilato rëbinè' lëjè':

—¿Ca nužilajè' re'enle yebioga' lu'u dyiguiba? ¿Re'enle yebioga' Barrabás? ¿O chi re'enle yebioga' Jesús, ben' na use'ela' Diuzi lëbè'?

18 Cana' unè' rëbinè' lëjè' dan' gucabè'nè' yela' zè' quie ben' r nabè' psedyinjè' Jesús lao na'anè'.

19 Na'ra tu ure' Pilato ga ruenè' justicia, caora use'ela' zgulè' di'idza' gudyinè' lëbè': "Usanlo' quie ben' na', dan' bibi xquia napè'. Uxusa' udiyele cabè' raca quienè'. Lega rdëbida' quio' chi biusanlo'nè'."

20 Pero bè'lè ja xan' pxuzi len ja ben' r nabè' ja benè' di'idza' ta inabajè' ta yero Barrabás, pero ta gutijè' Jesús.

21 Na' una gobernador rëbinè' lëjè' tatula:

—¿Nulajè' lao rupajè' re'enle yebioga' lu'u dyiguiba?

Na' unajè' rëbijè' lëbè':

—Barrabás.

22 Na' unaba Pilato rëbinè' lëjè':

—¿Biži hua' quie Jesús, ben' na use'ela' Diuzi lëbè'?

Na' yugutejè' unajè' rëbijè' Pilato:

—¡Uda'lo'nè' lè'è yaga cruzo!

23 Na' una Pilato rëbinè' lëjè':

—¿Biži xquia bënë'?

Pero na' unajè' zidzo rëbijè' lëbè':

—¡Uda'lo'nè' lè'è yaga cruzo!

24 Cati gucabè' Pilato bisaque' gaca areglo, lëzi blè'ënè' bdza' ja benè', na' bënë' mandado yexi'jè' nisa udibinë' nè'è lao ja benè', unè' rëbinè' lëjè':

—Binaca cuenda quia' nè'èdi' dan' gatinè'. Rnia' le'le gabi xquia bënë'. Nacan cuenda quiele.

25 Na' una yugujè' rëbijè' lëbè':

—Cuenda quiendo' len ži'indo' nacan dan' gatinè'.

26 Na'ra bebio Pilato Barrabás lu'u dyiguiba. Bënë' mandado udi ja soldado Jesús guidi, na' uda'jè' lëbè' lè'è yaga cruzo.

27 Na' uquiè' ja soldado Jesús lao palacio. Caora na' begu'udi' yugu ja lagueydi soldado quiejè', bzujè' lëbè' gatzo la'ohue.

28 Na' ulëchojè' zabè', bgacojè' lëbè' tu la'ari' žna.

29 Na' bdze'jè' guichoguè' tu coron yèchi', psejè' lèbè' tu xaga zaca' nè'è yebè. Na'ra udituzjè' zibijè' laohuè' rutitujè' lèbè' unajè' rëbijè' lèbè':

—¡Viva luè', Rey quie ben' Israel!

30 Lëscan' bda'jè' lèbè' zen'. Na' begubajè' xaga zenè' udijè'n guicho Jesús.

31 Ude beyudyi ptitujè' lèbè', belèchojè' tu la'ari' zna guconè', begacojè' lèbè' zabacazè'. Na' uquiè'jè' lèbè' ta uda'jè' lèbè' lè'è yaga cruzo.

*Cabè' guca bda'jè' Jesús lè'è yaga cruzo*

(Mr. 15.21-32; Lc. 23.26-43; Jn. 19.17-27)

32 Na' du tu neza bedilajè' tu ben' yedyi Cirene laonè' Simón. Na' bëjè' mandado hua'anè' yaga cruzo.

33 Cana' bdyinjè' ga laona Gólgota, ta inaro xti'idza'ro: Ya'a chita guicho ben' huati.

34 Na' bè'jè' ta yo'oguè' vino nequixi tasla' gula. Bè' hue'enè'n ledao' bicu', bigu'unne' yo'oguè'n.

35 Na' ude beyudyi bda' soldado lèbè' lè'è yaga cruzo, na'ra bëjè' suerte bè'jè' laze zabè'. Cana' uzu di'idza' bzu ben' profeta lè'è guichi dza na'. Lèdi'idza' rnan caniga: “Bèjè' suerte bè'jè' laze zaba'.”

36 Na'ra ure' soldado ta rapajè' lèbè'.

37 Na' guicho cruzo bdyiajè' tu letrero ga rguixogue'n ca bi xquia bènè' dan' bëtijè' lèbè'. Lè'è letrero unan caniga: “Jesús, Rey quie ben' Israel.”

38 Lëscan' bda'rèjè' chopa ben' uban lè'è ichopa yaga cruzo. Bzujè' tun zaquè' yebè cuèta Jesús, itun bzujè' zaquè' yega'.

39 Na' ude ja benè' ptitujè' lèbè' ruta guicho laojè'.

40 Unajè' rëbijè' lèbè':

—Luè' unao' udyiagu'lo' idao' r nabè'ra, na' yeyuelo'n lao tzona dza, psela cuinlo' na'a. Chi tali ži'i Diuzi luè', beyèzi lè'è yaga cruzo.

41 Lëscan' ja xan' pxuzi, len ja ben' rusèdi ley quie Moisés, len ja ben' partido fariseo, len ja ben' rnabè' ptitujè' lèbè'. Na' unajè' rëbijè' laguedyijè':

42 —Pte pselanè' ben' tula, nechan' biuzaque'nè' uselanè' cuinnè'. Chi tali naquè' Rey quie ben' Israel, hueyèzè' lè'è yaga cruzo ta galero quienè'.

43 Lëscan' unè' zudyi'ilènè' Diuzi. Ca rusela Diuzi lèbè' na'a chi tali raque Diuzi lèbè' como dan' unè' naquè' ži'i Diuzi.

44 Na' lente ben' uban, ben' bda'rèjè' lè'è yaga cruzo, ptiturèjè' lèbè'.

*Cabè' guca guti Jesús*

(Mr. 15.33-41; Lc. 23.44-49; Jn. 19.28-30)

45 Na' bechula lao duže ciudad na'. Cadu la'odza uzulaon, na' beyudyin ca du las tres quie zadzè'.

46 Lèhora na'tezi uredyia' Jesús zidzo unè':

—Elí, Elí, ¿lama sabactani? —ta inaro xti'idza'ro: Xuza' Diuzi, Xuza' Diuzi, žbixquien' apsanla'adyo' nè'èdi'?

47 Na' be ja ben' nita' na' cabè' una Jesús. Na' unajè' rëbijè' laguedyijè':

—Profeta Elías rëži ben' niga.

48 Caora na' lazioe tu ben' zu na' yexi'nè' tu ta naca yun' ca ži'ila' laona esponja. Na' bdze'nè'n lu'u vino sla' bzunè'n lao yaga ta bdyinnan sibi ga da' Jesús ta supinè'n.

49 Pero una ibala ja ben' zè na' rëbijè' lèbè':

—Psan na'. Ya' ina'ro chi guida Elías uselanè' ben' niga.

50 Na' uredyia' Jesús zidzo tatula, gutinè'.

<sup>51</sup> Lëhora na'tezi bre'eza la'ari' zë gatzo lao' idao' r nabè'ra. Babre'ezan gucan chopa la'a. Lëscan' guca uzu' ula'an yo yela.

<sup>52</sup> Na' beyalo beló yo ga yu'u ben' huati. Beban ja zë ben' baguti, ben' bë quie xti'idza' Diuzi dza uzujë'.

<sup>53</sup> Cati abeban Jesús, na'ra brojë' lu'u beló yo, uyojë' ciudad naca la'iya Jerusalén. Na' blë'ë ja ben' zë lëjë'.

<sup>54</sup> Na' cati blë'ë xan' soldado lënë' ja soldado quienë' cabë' guca uzu' len itu ta guca, na'ra bdzebijë' unajë' rëbijë' laguedyijë'.

—Tali naca ben' ni ži'i Diuzi.

<sup>55</sup> Na' nita' ja nigula zë zitu' rna'jë' cabë' raza quie Jesús. Gucalëjë' unaojë' lëbë' desde dza uza'në' estado Galilea.

<sup>56</sup> Na' zëlë lëjë' María Magdalena, len María žna' Santiago, len José, len žna' yaca ži'i Zebedeo.

*Pcachi'jë' Jesús lu'u beló yo  
(Mr. 15.42-47; Lc. 23.50-56; Jn. 19.38-42)*

<sup>57</sup> Cati agula, bdyin tu ben' uña'a, ben' yedyi Arimatea laohuë' José. Naquë' ben' nao xneza Jesús.

<sup>58</sup> Na' uyone' yena'në' Pilato unabanë' cuerpo quie Jesús ta tzechachi'në'n. Na' bë Pilato mandado ta hue'jë' lëbë' cuerpo quie Jesús.

<sup>59</sup> Na' uži' José cuerpo quie Jesús, bdubinë'n tu la'ari' yëri.

<sup>60</sup> Na' yehua'anë'n bdze'në'n lu'u tu beló yo ta zabeyudyi bënë'. Na' zaotacorë' ru'a beló yo tu yo že gula ta naca laga'. Ude beyudyi na', bezë'ë zeyoguë'.

<sup>61</sup> Na' ru'a beló yo na' ure' María Magdalena lënë' itu María tula.

*Pca'një' ja soldado ga pcachi'jë' Jesús*

<sup>62</sup> Na' beteyu na' dza saodo, dza huezila'adyi' quiejë', uyo ja xan' pxuzi, len ja ben' partido fariseo yena'jë' Pilato

<sup>63</sup> unajë' rëbijë' lëbë':

—Señor, nëto' reza'la'adyi'ndo' cabë' una ben' huizi' yë' na' cati uzuë', unë' hueza'në' ga de ben' huati huebannë' tatula lao tzona dza.

<sup>64</sup> Tana' lena' ruen zi huelo' mandado gapa ja soldado ru'a beló yo lao tzona dza. Cana' bisaque' tzio ja ben' quienë' du rëla tzelanjë' cuerpo quienë' tacuenda yëbijë' ja benë': "Beza'në' ga de ben' huati bebannë'." Chi huaca hue ben' quienë' cana', mazara yë' si'jë' benë'.

<sup>65</sup> Na' una Pilato rëbinë' lëjë':

—Ni nita' tu cue' soldado, ben' gapa ja ru'a beló yo. Ulequië'jë' ta gapajë' dyë'ëdi ru'a beló yo.

<sup>66</sup> Na'ra uyojë' uquië'jë' soldado. Pquichijë' tu sello ga nedila ru'a yo ta nutacojë' ru'a beló. Na' pca'një' ja soldado, ben' rapa ru'a beló yo.

## 28

*Cabë' guca cati beban Jesús  
(Mr. 16.1-8; Lc. 24.1-12; Jn. 20.1-10)*

<sup>1</sup> Cati uyani' dza tula du bala dza domingo, uyo María Magdalena lënë' itu María tula yena'jë' ru'a beló yo.

<sup>2</sup> Caora na' lagucate tu uzu' nun quie uyëzi tu ángel quie Diuzi guibá, bdubanë' yo nutacojë' ru'a beló, ure'në' laonan.

<sup>3</sup> Na' ruseni' laohuë' ca xni' yesa. Lëscan' zabë' rna'n raza titi' bezëri gula.



4 Cati blë'ë ja soldado ángel, na' lega bdzebijë' użizan lëjë' byalajë' layu, gutajë' ca quie ben' huati.

5 Na' una ángel rëbinë' ja nigula:

—Bidzebile. Ne zda' reguilole Jesús, ben' guti lë'ë yaga cruzo.

6 Bira zunë' niga. Abebannë' cabë' unë' gaca quienë'. Uledacara, ulena' ga bdze'jë' cuerpo quienë'.

7 Uletzio tzeguedyile ja ben' quienë' abeza'në' ga de ben' huati, abebannë'. Huabialaohué' le'e tu neza Galilea. Na'te hualë'ële lëbë'. Lena' ruen zi quixogui'a le'e.

8 Na' du rdzebi ja nigula, uza'jë' taria gan de beló yo, ziojë' redaohuejë' tzeguedyijë' ja ben' quie Jesús cabë' guca.

9 Na' ptlilao Jesús lëjë' tu neza ugapë' diuzi lëjë'. Na' ibiga'jë' gan zë Jesús gutajë' layu bda' ru'ajë' uyonela'adyi'jë' lëbë'.

10 Na' una Jesús rëbinë' lëjë':

—Bidzebile. Uletzio tzeguedyile ja bicha' ben' quia' ta tziojë' Galilea. Na'te ilë'ëjë' në'ëdi'.

### *Cabë' una ja soldado guca quie cuerpo quie Jesús*

11 Tu raca nezio ja nigula tu neza, uza' bala ja soldado uyojë' ciudad Jerusalén yeguëdyijë' ja xan' pxuzi cabë' guca quiejë'.

12 Na' uyo ja xan' pxuzi yeguëdyijë' ja ben' rnabë' ta yega'një' di'idza' bi huejë'. Na' bë'jë' ja soldado dumi ze.

13 Na' unajë' rëbijë' ja soldado:

—Cani yëbile benë'. Du rëla du rasile, bida ja ben' quie Jesús, bedelanjë' cuerpo quienë'.

14 Chi inezi gobernador cabë' guca quiele, nëto' gacalëndo' le'e ta bibi zëdi gaca quiele.

15 Na'ra uzi' ja soldado dumi, uyojë' yeguëdyijë' ja benë' cabë' gudyi xan' pxuzi len ja ben' rnabë' lëjë'. Cabë' una ja soldado guca quie cuerpo quie Jesús, cana' na ja benë' guca quien hasta na'adza.

### *Use'ela' Jesús ben' quienë' tzetixogue'jë' benë' xti'idzë'*

*(Mr. 16.14-18; Lc. 24.36-49; Jn. 20.19-23)*

16 Na' uza' ja chiptu ben' quie Jesús ziojë' estado Galilea. Na' bdyinjë' ga zu tu ya'a, ga gudyi Jesús lëjë' tziojë' dza na'te.

17 Lëgan' na' blë'ëjë' Jesús uyonela'adyi'jë' lëbë'. Na' nita' ja ben' quienë' biralejë' chi lëbë'.

18 Na' ubiga' Jesús gan' nita' ja ben' quienë' unë' rëbinë' lëjë':

—Apca'n Diuzi lao na'a inabi'a lao duze guibá len duze dyilayu.

19 Tana' lena' inia' le'e, uletzio duze yedyi layu tzetixogue'le ja benë' xti'idza', usëdilejë' inaojë' xneza'. Ulehue' lao ja ben' nao xneza' uzëtole Diuzi, uzëtole në'ëdi', uzëtole Bichi Be quienë'.

20 Na' usëdilejë' huejë' duze cabë' baonia' le'e. Bigala'adyi'le sulia' le'e tuzioli hasta iyudyi dyila yu. Amén.

## DI'IDZA' LA' IYA BZU SAN MARCOS LĚ'Ě GUICHI

*Udixogue' Juan bautista xti'idza' Diuzi*  
(Mt. 3.1-12; Lc. 3.1-9, 15-17; Jn. 1.19-28)

<sup>1</sup> Cani guca dza na' cati uzulao Juan udixogue'nĚ' quie Jesucristo, ben' naca zi'i Diuzi.

<sup>2</sup> Azio zĚra iza bzu profeta Isaías xti'idza' Diuzi lĚ'Ě guichi. Cana' udixogue' Diuzi dan' rnĚn caniga:  
Huase'ela' tu ben' cuialao neza ga tzio' cuenda tzetixogue'nĚ' yaca benĚ' huido' luĚ'.

<sup>3</sup> Huazu ben' na' lao lato dachi ga bidyia yu'u, huanĚ' zidzo yĚbinĚ' laguedy-inĚ' caniga:  
“Huele hueluba neza quiele cuenda huida ben' naca xa'nro, usalole tu neza li.”

<sup>4</sup> Cana' guca bida Juan lao lato dachi ga bidyia yu'u, bĚ'nĚ' lao yaca benĚ'. Cana' unĚ' gudyyinĚ' leyaquĚ' de quie reya'ala' utza'yaquĚ' pensari quieyaquĚ', hueyaquĚ' lato ta hue' Juan laoyaquĚ' cuenda yezi'ze Diuzi dula' xquia quieyaquĚ'.

<sup>5</sup> Uyo yaca ben' quie estado Judea len yaca ben' ciudad JerusalĚn, bdyinyaquĚ' ga zĚ Juan. Caora uxubalĚpiyaquĚ' ca tamedian bĚyaquĚ', na'ra bĚ' Juan laoyaquĚ' lu'u yao Jordán.

<sup>6</sup> Guco Juan la'ari' de guitza' quie zaba camello. LĚscan' tu cincho guidi bdze'nĚ' lĚ'ĚnĚ'. UdaonĚ' bĚchi'zu, hue'enĚ' bdyin'dao' quie bezu cera ta rdzela guixi' dao'.

<sup>7</sup> Na'ra udixogue'nĚ' yaca ben' uyo ga zĚnĚ' gudyyinĚ' leyaquĚ':

—Ben' zeza'ra zenao nĚ'Ědi', nacarĚ' ben' ze ca nĚ'Ědi'. Tanto nacarĚ' ben' ze ca nĚ'Ědi', ni lĚ'Ěti' bibi zaca' ni siquiera biyeya'zoga' cuioga' guidi yu'u ni'anĚ'.

<sup>8</sup> NĚ'Ědi' ru'a laole conlĚ nisa, pero ben' zeza'ra zenao nĚ'Ědi', udze'nĚ' Bichi Be quie Diuzi lu'u guicho laxta'ole.

*BĚ' Juan lao Jesŭs*  
(Mt. 3.13-17; Lc. 3.21-22)

<sup>9</sup> Na'ra uza' Jesŭs yedyi Nazaret quie estado Galilea zionĚ' bdyinnĚ' ga zĚ Juan. LĚgan' na' bĚ' Juan laonĚ' lu'u yao Jordán.

<sup>10</sup> Cati bero Jesŭs lu'u yao, blĚ'ĚnĚ' uyalo guibá, blĚ'ĚnĚ' uyĚzi Bichi Be quie Diuzi ca rĚzi biu bdyinnĚ' ga zĚ Jesŭs.

<sup>11</sup> Na'ra unĚ' Diuzi ga zuĚ' guibá unĚ':

—LuĚ' naco' zi'ina', nedyĚ'Ěda' luĚ'. Lega redaohueda' ca ruelo'.

*Gu'un xan' taxi'ibi' iquixi Jesŭs huenĚ' tamala*  
(Mt. 4.1-11; Lc. 4.1-13)

<sup>12</sup> Na'ra uquiĚ' Bichi Be quie Diuzi Jesŭs lao lato dachi ga bidyia yu'u.

<sup>13</sup> LĚgan' na' uzunĚ' lao chopa galo dza ga uzurĚ yaca bia guixi'. Na'ra bdyinrĚ Satanás ga zĚ Jesŭs gu'unnan iquixi Jesŭs huenĚ' tamala. Pero na'ra use'ela' Diuzi yaca ángel quienĚ' ta gacalĚyaquĚ' Jesŭs.

*Uzulao Jesŭs udixogue'nĚ' yaca benĚ' xti'idza' Diuzi*  
(Mt. 4.12-17; Lc. 4.14-15)

<sup>14</sup> Caora baode bdze'yaquĚ' Juan lu'u dyiguiba, na'ra uza' Jesŭs zionĚ' yaca yedyi nebaba Galilea ta tzetixogue'nĚ' xti'idza' Diuzi.

15 Na'ra una Jesús gudyinè' leyaquè':

—Babbyin hora cati inabè' Diuzi lao yedyi layu. Reya'ala' utza'le pensari quiele, hue quiele xti'idza' Diuzi.

*Guzi Jesús tapa yaca ben' rze bela*

(Mt. 4.18-22; Lc. 5.1-11)

16 Na'ra uza' Jesús zioguè' ru'a lagun Galilea. Na' blè'ènè' Simón len bichinè' Andrés. Rueyaquè' dyin quieyaquè' rudze'yaquè' du yèxo lu'u nisa ta tzu'u yaca bela.

17 Na'ra una Jesús rëbinè' leyaquè':

—¡Ulenao nè'èdi'! Cabè' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

18 Caora na' lapsanteyaquè' du yèxo quieyaquè', bira užeyaquè' bela, ziolëyaquè' lèbè'.

19 Bizi cati uza'ra Jesús ilè'èti', blè'ènè' chopa zi'i Zebedeo, tunè' laonè' Santiago, itunè' laonè' Juan. Re'yaquè' lu'u barco dao' quieyaquè' reguibayaquè' du yèxo quieyaquè'.

20 Na' caora guzi Jesús leyaquè', pca'nyaquè' barco dao' quieyaquè' lao na'a xuziyaquè' len itu mozo, ziolëyaquè' Jesús.

*Bebio Jesús tu bichi be mala*

(Lc. 4.31-37)

21 Na' uza'yaquè' zioyaquè' bdyinyaquè' yedyi Capernaum. Cati bdyin dza saodo, dza huezila'adyi' quieyaquè', uyu'u Jesús lu'u idao' quieyaquè' laona sinagoga ta usèdinè' yaca ben' bedupa na'.

22 Na'ra tu bebanziyaquè' ca gudyi Jesús leyaquè', como dan' rusèdinè' leyaquè' ca ben' de yela' r'nabè' quie cuinzè', cala ca yaca ben' rusèdi ley pca'n Diuzi lao na'a Moisés.

23 Na' lu'u idao' ga zè Jesús bdyin tu ben' yu'u bichi be mala lu'u laxta'onè'. Caora na' uredyiyi' bichi be mala yu'u ben' na' rëbinan Jesús:

24 —¿Bixquien' zao' niga ga zundo', luè' Jesús, ben' yedyi Nazaret? ¿Quele zao' niga ta tilalao' udyiaguì'lo' nètò'? Nubè'da' luè', naco' ben' la'iya, ben' use'ela' Diuzi.

25 Na'ra udila Jesús lëbin, rëbinè' bichi be mala:

—¡Bira inèlo'! ¡Bero gan' yu'ulo' lu'u laxta'o ben' niga!

26 Caora na' tu r'zizizi ben' na' zènè' yu'unè' bichi be mala, na'ra uredyiyi'n beronan gan yu'un zeyonan.

27 Cana' tu bebanzi yaca benè', du rdzebiyaquè' unëyaquè' rëbiyaquè' lagedyiyaquè':

—¿Nuzi naca ben' niga? ¿Bizi huesèdi cubi ruenè'? ¿Como hasta yaca bichi be mala raleyacan quiènè'?

28 Cana' guca luegozi unezi yaca ben' nita' yedyi nebaba Galilea cabè' rue Jesús.

*Beyue Jesús ben' gula quie Simón Pedro*

(Mt. 8.14-15; Lc. 4.38-39)

29 Na'ra cati beroyaquè' idao' sinagoga, uza' Jesús zioguè' len Santiago len Juan bdyinyaquè' lidyi Simón len Andrés.

30 Na' de ben' gula quie Simón lao belaga yu'unè' zla. Quie lena' gudyiyaquè' Jesús cabè' raca quiènè'.

31 Caora na' ude Jesús gan' de nigula na' lao belaga. Ca bdyin Jesús na', bëxunè' na'a nigula, uchisanè' lèbè'. Ca uyasè', caora na' bero tala yu'unè'. Na'ra bë nigula na' ta udaoyaquè'.

*Beyue Jesús yaca ben' zë, ben' raca zhue'**(Mt. 8.16-17; Lc. 4.40-41)*

<sup>32</sup> Na'ra caora gula uxin banaca chula, uquië' yaca benë' nu ben' raca zhue', len nu ben' yu'u bichi be mala lu'u laxta'ohuë', bdyinyaquë' gan' zë Jesús.

<sup>33</sup> Na' bedupa yugulu ben' yedyi na' lali'a yu'u ga zë Jesús.

<sup>34</sup> Na' nacala yela' hue' racayaquë', beyue Jesús leyaquë', bebionë' bichi be mala yu'uyaquë'. Bibë'në' lato inëyacan como neziyacan nu naquë'.

*Udixogue' Jesús xti'idza' Diuzi yaca yedyi nebaba Galilea**(Lc. 4.42-44)*

<sup>35</sup> Na'ra du bala cati nenaca chula, uyasa Jesús zionë' ru'a yedyi ta hue'lënë' Diuzi di'idza'.

<sup>36</sup> Caora uyasa Simón len yaca compañero quienë', blë'ëyaquë' ganu Jesús dyila', caora na' uza'yaquë' yediloyaquë' lëbë'.

<sup>37</sup> Na' cati bedzeleyaquë' lëbë', unëyaquë' rëbiyaquë' lëbë':

—Ben' zë za', rguiloyaquë' luë'.

<sup>38</sup> Na'ra una Jesús rëbinë' leyaquë':

—Tzioro lao yedyi tula gan' nacara ga'ala' cuenda quixogue'ria' leyaquë' xti'idza' Diuzi. Tana' lena' bida' lao yedyi layu.

<sup>39</sup> Na'ra uyo Jesús yugulu yedyi nebaba Galilea, uyu'unë' lu'u idao' sinagoga quieyaquë' udixogue'në' yaca ben' nita' na' xti'idza' Diuzi, bebionë' yaca bichi be mala yu'uyaquë'.

*Beyue Jesús tu ben' yu'u yela' hue' ca pindo**(Mt. 8.1-4; Lc. 5.12-16)*

<sup>40</sup> Na'ra bebiga' tu ben' yu'u yela' hue' ca pindo gan' zë Jesús, uditzu zibinë' lao Jesús unëyëchi'në' rëbinë' Jesús:

—Uzi'ze quia'. Chi re'lenlo', huaca yeyuelo' në'ëdi'.

<sup>41</sup> Na'ra beyëchi'la'adyi' Jesús lëbë'. Blinë' në'ë bëxunë' lëbë' unë' rëbinë' lëbë':

—Re'enda' hua' ca nao'. Hueyua' luë' na'a.

<sup>42</sup> Caora na' lapsante yela' hue' quië' lëbë', labeyacatë'.

<sup>43</sup> Na'ra unë Jesús rëbinë' ben' na':

<sup>44</sup> —Ni tu nunu yëbo' can' babia' quio'. Tuzi ta rnia', uyo yalu'e cuinlo' lao pxuzi. Na' bë'në' tu ta reya'ala' hue'lo'në' cabë' rnë lë'ë ley quie Moisés dan' babeyëri'lo'. Cana' huelo' ta inezi yaca benë' babezi yela' hue' yu'ulo'.

<sup>45</sup> Pero zio ben' na' udixogue'në' laguedyinë' cabë' guca quië'. Quie lena' bira uzaque' tzeta Jesús zaquë'lao la'o yaca yedyi. Puro ru'a yedyi ga bidyia yu'u udanë'. Pero uza' yaca benë' quie quie yedyi quieyaquë' zioyaquë' bdyinyaquë' ga rda Jesús.

**2***Beyue Jesús tu ben' zi**(Mt. 9.1-8; Lc. 5.17-26)*

<sup>1</sup> Bë' baode chopa tzona dza, na' bedyin Jesús ciudad Capernaum. Tzadi unezi yaca benë' bedyin Jesús zan yu'u quienë'.

<sup>2</sup> Quie lena' bedupa yaca ben' zë gan' zë Jesús. Tanto bedupa yaca ben' zë, lente lali'a bedza'yaquë'. Na' udixogue' Jesús leyaquë' xti'idza' Diuzi.

<sup>3</sup> Na'ra bdyinra itapa benë' len belaga ga žuba tu ben' ži.

4 Pero biužaque' tzu'ulëyaquë' ben' zi lu'u yu'u gan' zë Jesús, dan' nita' ben' zë. Quie lena' urëyaquë' lun yu'u, udubayaquë' yaga daco' lun yu'u, bzuyaquë' tu yëro ta pchizayaquë' belaga layu ga žuba ben' zi.

5 Caora blë'ë Jesús cabë' bëyaquë' rzudyi' ilëyaquë' lëbë' de que huacanë' yeyuenë' ben' zi, na'ra unë Jesús rëbinë' ben' zi:

—Bicha', baozi'žia' dula' xquia quio'.

6 Biži bago ure' chopa tzona ben' rusëdi ley ta pca'n Diuzi lao na'a Moisés. Na'ra bëyaquë' pensari unayaquë':

7 “¿Bixquien' una ben' niga cana'? Barnaya'në' Diuzi unë' cana' como dan' tuzi Diuzi huaca si'že dula' xquia quiero, quele ben' ni.”

8 Pero gucabë' Jesús ca naca pensari quieyaquë'. Lena' una Jesús rëbinë' leyaquë':

—¿Bixquien' ruele pensari cana'?

9 ¿Ca nurlan nacaran yalo hua' quie ben' zi niga? ¿Nacaran yalo chi yëpa'në': “Aozì'žia' dula' xquia quio’”, o chi yëpa'në': “Uyasa, bezi' belaga quio', beza' beyo”?

10 Pues naca' bichi yugulu benë'. Na'ra ulu'ena' le'e de yela' rnabë' quia' lao yedyi layu ta yezi'žia' dula' xquia quie yaca benë'.

Na'ra una Jesús rëbinë' ben' zi:

11 —Rnia' luë', uyasa, bezi' belaga quio', beyo žan yu'u quio'.

12 Caora na' uyasa ben' zi, bezi'në' belaga quie', zeyoguë', udenë' gan' nita' yaca benë'. Na' bëyaquë' Diuzi ben' ze unayaquë':

—Ni tu lasa binelë'ëro cabë' bë ben' ni.

### *Guzi Jesús Levi*

(Mt. 9.9-13; Lc. 5.27-32)

13 Na' uyo Jesús ru'a lagun Galilea tatula. Caora babedupa ben' zë ga zë Jesús, na'ra psëdinë' leyaquë'.

14 Bë' beyudyi na', uza' Jesús zionë' udenë' blë'ënë' Levi, ži'i Alfeo, re'në' ga re' ben' huequižu. Na' una Jesús rëbinë' lëbë':

—Unao në'ëdi'.

Na'ra uza'në' žiolënë' Jesús.

15 Bë' baode chopa tzona dza, uyo Jesús yetaonë' žan yu'u quie Levi. Lëscan' uyorë zë ben' huequižu len zë ben' de dula' xquia quie, ure'rëlëyaquë' Jesús lënë' yaca ben' quienë'. Guca ben' zë, ben' unao lëbë'.

16 Pero caora blë'ë yaca ben' rusëdi ley quie Moisés len yaca ben' partido fariseo cabë' rue Jesús, raonë' tzaže len ben' huequižu len ben' de dula' xquia quie, na'ra unayaquë' rëbiyaquë' ben' quie Jesús:

—¿Bixquien' ri'o rao maestro quiele tzaže len ben' huequižu len ben' de dula' xquia quie?

17 Na' cati babe Jesús cabë' unayaquë', na'ra unë'në' rëbinë' leyaquë':

—Yaca ben' biraca žhue', biruen ži guida médico ta yeyuenë' leyaquë'. Pero nu ben' raca žhue', sí ruen ži guida médico. Quele za' rëža' ben' nazi bibi xquia rue, dechan' za' rëža' ben' re'en yezi dula' xquia quie.

### *Unabayaquë' Jesús quie ubasi*

(Mt. 9.14-17; Lc. 5.33-39)

18 Na'ra guca tu dza rue ben' quie Juan bautista len ben' partido fariseo ubasi, na' bdyin chopa tzona benë' ga zë Jesús unayaquë' lëbë':

—¿Bixquien' birue yaca ben' quio' ubasi cabë' rue ben' quie Juan len ben' partido fariseo?

19 Na' una Jesús gudyinë' leyaquë':

—¿Rnaba' le'e chi rue yaca ben' bdyin ga raca huetzagana' ubasi tu nezu bi' utzagana' len leyaquë'? Tu nezu bi' utzagana' len leyaquë', birueyaquë' ubasi.

<sup>20</sup> Pero chi guida ben' rudie ben' utzagana', chi guxuyaquë' lëbi', hueyaquë' lëbi' zi', tzehua'ayaquë' lëbi' ga tula, na'ra hue yaca amigo quie bi' utzagana' ubasi.

<sup>21</sup> Lëscan' una Jesús rëbinë' leyaquë':

—Bisaque' ta' la'ari' cubi lé'ë la'ari' gula chi binetzërin, porque huetzere'nan ìcanan ru'a la'ari' gula, na' ichezan len mazara.

<sup>22</sup> Lëscan' bisaque' ca'ro nupi ùixi lu'u bolsa guidi gula, porque bë' sulao ilëbin, huedza'n ichezan len. Cana' huabiagui' lao rupa cue'ten. Quie lena' ruen zi ca'ro nupi ùixi lu'u bolsa guidi cubi.

*Na' aoditzu yaca ben' quie Jesús dao trigo dza huezila'adyi'*

*(Mt. 12.1-8; Lc. 6.1-5)*

<sup>23</sup> Na'ra bdyin tu dza saodo, dza huezila'adyi' quieyaquë', uza' Jesús lënë' yaca ben' quie' udeyaquë' layela ga neduza trigo. Na' uditzu yaca ben' quie Jesús dao trigo ta gaoyaquë'n.

<sup>24</sup> Na'ra una yaca ben' partido fariseo rëbiyaquë' Jesús:

—¿Bixquien' rue yaca ben' quio' dyin rguitzuyaquë' dao quie trigo dza huezila'adyi', dza bireya'ala' huero dyin?

<sup>25</sup> Na' una Jesús rëbinë' leyaquë':

—¿Binulabale lé'ë guichi cabë' bë' rey David dza uduenë' lënë' yaca ben' quie'?

<sup>26</sup> Uyu'u rey David lu'u idao' rnabë'ra cati naca Abiatar xa'n pxuzi rnabë'ra, uzi'në' yëta xtila naca la'iya ta ru'eyaquë' Diuzi. Na' udaonë'n bë'në'n len yaca ben' dzaganë', udaoyaquë' ta bireya'ala' gaoyaquë', ta reya'ala' gao yaca pxuzizi.

<sup>27</sup> Na' unë' rëbinë' leyaquë':

—Udixu Diuzi dza huezila'adyi' ta gacalën yaca benë'. Quele udixu Diuzi dza huezila'adyi' ta gaca xa'nyaquë'.

<sup>28</sup> Naca' bichi yugulu benë'. De yela' rnabë' quia' hua' mandado bi hue yaca benë' dza huezila'adyi'.

### 3

*Buye Jesús tu ben' neseco në'ë*

*(Mt. 12.9-14; Lc. 6.6-11)*

<sup>1</sup> Na'ra uyu'u Jesús tatula lu'u idao' sinagoga. Lëgan' na' zë tu ben' neseco në'ë.

<sup>2</sup> Bizi na' rbë'nao yaca benë' Jesús chi hueyuenë' ben' neseco në'ë dza saodo, dza huezila'adyi', tacuenda gaoyaquë' lëbë' xquia.

<sup>3</sup> Na' unë' Jesús gudyinë' ben' neseco në'ë:

—Uda uzé gatzó la'o niga.

<sup>4</sup> Na'ra una Jesús rëbinë' yaca ben' nita' na':

—¿Bizi reya'ala' huero dza huezila'adyi'? ¿Reya'ala' huero tadya'a o tamala? ¿Reya'ala' uselaro benë' o gutiro benë'?

Pero bega'nyaquë' chizi, bibi unayaquë'.

<sup>5</sup> Na'ra du rdza'në' una'në' leyaquë' dyë'ëdi. Guquenë' bayëchi' nun quie yela' zidi quieyaquë'. Na' unë' rëbinë' ben' neseco në'ë:

—Bli na'alo'.

Bizi ca blinë' në'ë beyacaten dya'a.

<sup>6</sup> Na'ra uza' yaca ben' partido fariseo zioyaquë' ta hue'lëyaquë' ben' partido Herodes di'idza' bi hueyaquë' ta gutiyaquë' Jesús.

*Bdyin yaca ben' zë ru'a lagun ga zë Jesús*

<sup>7</sup> Pero uza' Jesús zionë' ru'a lagun Galilea. Lëscan' ziorë yaca ben' zë, ben' uza' yedyi nebaba Galilea, unaoyaquë' Jesús.

<sup>8</sup> Cati unezi yaca benë' cabë' tahuen gula bë Jesús, na'ra uza'yaquë' yedyi nebaba Judea, len ciudad Jerusalén, len yedyi nebaba Idumea, len yedyi re' itzala'la yao Jordán, len yedyi Tiro, len yedyi Sidón, bdyinyaquë' ga zënë' ta ilë'ëyaquë' lëbë'.

<sup>9</sup> Quie lena' bë Jesús mandado yaca ben' quië' ta tzioyaquë' tzexi'yaquë' tu barco ga tzu'unë' como dan' ben' zë pquiyaquë' lëbë'.

<sup>10</sup> Cana' guca quienë' como dan' tanto beyuenë' yaca ben' raca zhue', pquiyaquë' bëxuyaquë' lëbë' ga zë'.

<sup>11</sup> Na' caora blë'ë yaca bichi be mala lëbë', udituz zibiyacan urediyi'yacan unayacan Jesús:

—Zi'i Diuzi luë'.

<sup>12</sup> Pero udila Jesús leyaican ta biyëbiyacan benë' naquë' zi'i Diuzi.

*Bë Jesús nombrar chipchopa ben' quienë'*

*(Mt. 10.1-4; Lc. 6.12-16)*

<sup>13</sup> Na'ra uza' Jesús zionë' ga zu tu lë'ë ya'a. Lëgan' na' guzi Jesús ben' re'ennë' gaca nombrar ben' quienë'. Na' uza'yaquë' zioyaquë' bdyinyaquë' ga zë Jesús.

<sup>14</sup> Na'ra bënë' nombrar chipchopa ben' gaca ben' quienë', ben' rue lëbë' tuze, ben' ise'ela' ta quixogue'yaquë' xti'idza' Diuzi.

<sup>15</sup> Lëscan' bënë' yela' rnabë' ta yeyueyaquë' ben' raca zhue', lëscan' ta cuioyaquë' yaca bichi be mala yu'u yaca benë'.

<sup>16</sup> Cani naca lista quie chipchopa ben' ulionë': Ulionë' tu ben' lao Simón, ben' uxubanë' laohuë' Pedro.

<sup>17</sup> Ulionë' tu ben' lao Santiago len bichinë' Juan. Nacayaquë' zi'i Zebedeo. Uxubanë' laoyaquë' Boanerges, ta inaro xti'idza'ro: Zi'i hueziu' como dan' nacayaquë' ben' rgüin'.

<sup>18</sup> Lëscan' ulionë' tu ben' lao Andrés, len tu ben' lao Felipe, len tu ben' lao Bartolomé, len tu ben' lao Mateo, len tu ben' lao Tomás, len itu ben' lao Santiago, zi'i Alfeo, len tu ben' lao Tadeo, len itu ben' lao Simón, ben' naca partido cananeo.

<sup>19</sup> Lëscan' ulionë' Judas Iscariote, ben' psedyin Jesús lao na'a yaca ben' rnabë'.

*Unayaquë' yu'u Jesús taxi'ibi'*

*(Mt. 12.22-32; Lc. 11.14-23; 12.10)*

Beyudyi ulio Jesús chipchopa ben' quienë', ziolënë' leyaquë' bdyinyaquë' zan yu'u.

<sup>20</sup> Na' tantozi bedupa ben' zë tatula ga zënë', bibë'n lato ni siquiera ta gaoyaquë'.

<sup>21</sup> Cati unezi yaca familia quienë' cabë' raca quienë', uza'yaquë' tzexi'yaquë' lëbë', como dan' nayaquë' naquë' ben' luco.

<sup>22</sup> Lëscan' yaca ben' rusëdi ley quie Moisés, ben' uza' ciudad Jerusalén, unayaquë' rëbiyaquë' laguediyayaquë':

—Bayu'u ben' ni Beelzebú, ben' naca xan' yaca bichi be mala. Yela' huaca quie xan' taxi'ibi' raca rbionë' yaca bichi be mala.

<sup>23</sup> Na'ra guzi Jesús leyaquë' unë' gudyinë' leyaquë' cani.

—¿Bizi hue xan' taxi'ibi' Satanás ta yebionë' laguedyi taxi'ibi'?

24 Chan' tu cue' gobierno gaca zë cue' partido, chan' tilalëyaquë' laguediyiaquë' ben' naca partido, bisue gobierno huen dyin zidza.

25 Lëscan' chi tu cue' familia raca rdilalëyaquë' familia quieyaquë', bisueyaquë' tzu'uyaquë' zan yu'u tzaže zidza.

26 Chi cuin Satanäs rdyiagui'nan dyin quienan, bisaque' sue dyin quienan zidza, hueyudyi huedu quiën.

27 'Bisaque' tzu'u benë' lu'u yu'u quie tu ben' tzutzu huala ta cubayaquë' ta de quiënë' chi zuë' zan yu'u. Tanëro rnaban uquiyoaqué' lëbë', na'ra huazaque' cubayaquë' ta de quiënë'.

28 'Tu ta naca li rnia' le'e, zu Diuzi dispuesto si'zenë' bitezi tamala rue yaca benë'. Lëscan' zuë' dispuesto si'zenë' bitezi di'idza' mala rnë yaca benë',

29 pero nu ben' na di'idza' contra Bichi Be quie Diuzi, biyezi'ze Diuzi leyaquë', huanao dula' xquia quieyaquë' leyaquë' tuzioli.

30 Cana' una Jesús gudyinë' leyaquë', dan' unayaquë' yu'unë' bichi be mala.

*Ga zë Jesús bdyin znë'ë len bi' bichinë'*

*(Mt. 12.46-50; Lc. 8.19-21)*

31 Na' beyudyi una Jesús, bdyin znë'ë len yaca bi' bichinë' yu'u ga re'në', pero bega'nuyaquë' lali'a dan' nadza' benë' lu'u yu'u. Na' gudyiyaquë' ben' ulidza lëbë'.

32 Biži yaca ben' re' neyëcho ga re' Jesús unayaquë' rëbियाquë' Jesús:

—Abdyin žnao' len yaca bi' bicho', rguiloayaquë' luë'.

33 Na' una Jesús rëbinë' leyaquë':

—¿Nuži naca žna'a? ¿Nuži naca bi' bicha'?

34 Caora na' una' Jesús yaca ben' re' neyëcho ga re'në', unënë' rëbinë' leyaquë':

—Yugu le'e ben' re' niga, nacale ca quie žna'a, nacale ca quie bi' bicha'.

35 Në'ëdi' rnia' nutezi ben' rue quie cabë' re'en Xuza', naquë' ca bi' bicha', ca bi' zana', ca žna'a.

## 4

*Bzu Jesús tu di'idza' quie ben' raza bini trigo*

*(Mt. 13.1-9; Lc. 8.4-8)*

1 Bezulao Jesús tatula usëdinë' yaca benë' ru'a lagun Galilea. Tanto bdupa ben' zë, uyu'u Jesús tu lu'u barco dao' zën lao nisa. Na' ure' Jesús lu'u barco na', pero bega'n yaca benë' ru'a lagun.

2 Con di'idza' ta nacan irupa iyunala psëdi Jesús leyaquë'. Cani unë' psëdinë' leyaquë':

3—Uzëcara nagale ca nia' le'e. Uyo tu ben' raza bini trigo.

4 Según ca razayaquë' bini trigo, ruzalë' bini trigo layu. Na'ra bala bini trigo yaque'n tu neza ga bdyinte yaca bguini besa'oba'n udaoba'n.

5 Ibala bini trigo yaque'n ga de yo, ga binacan tubelaozi yu. Na'ra lëbini na' laolënezaten dan' yaque'n ga binacan tubelaozi yu.

6 Pero cati bena oba zi', na'ra byëtzona ubidyin como dan' biuyu'u luena zitu' lu'u yu.

7 Ibala bini trigo yaque'n ga ilë guixi' yëchi'. Na' bë' gu'unin, bibë guixi' yëchi' lato gue'eni bini trigo dyë'ëdi. Quie lena' bibi usecho bë'nan.

8 Pero ibala bini trigo yaque'n ga naca tubelaozi yu ga ulëna gu'unin dyë'ëdi bë'nan usecho dya'a. Bala dyigo' bi'an galobechi bini, ibalan bi'an tzona galo bini, ibalan bi'an tu gayuhua bini.

9 Na'ra una Jesús:

—Le'e babe ulezë nagale can' unia'.



*Una Jesús ga hue dyin di'idza' rusëdinë' benë'  
(Mt. 13.10-17; Lc. 8.9-10)*

<sup>10</sup> Na' cati ude beyudyi na', bega'n Jesús lënë' chipchopa ben' quienë' len itu chopa ben' zë ga'ala' ga zë'. Na'ra unabayaquë' Jesús bi re'en ina di'idza' gudyinë' leyaquë'.

<sup>11</sup> Lena' unë Jesús rëbinë' leyaquë':

—Ruzioñe'e Diuzi le'e bi re'en ina di'idza' rguixogue'n quie yela' rnabë' quienë'. Pero quie yaca ben' biruzënaga cabë' rnia', rnia' leyaquë' conlë puro di'idza' ta naca irupa iyunala

<sup>12</sup> como dan' ba'ala'cazi rlë'ëyaquë' dyë'ëdi, rueziaquë' ca ben' birlë'ë, ba'ala'cazi reyaquë' dyë'ëdi, rueziaquë' ca ben' bire, como dan' bire'enyacuë' utza'yaquë' pensari quieyaquë' yezi'ze Diuzi dula' xquia quieyaquë'.

*Ga bexi'idzë' Jesús bi re'en ina di'idza' quie ben' guza bini trigo  
(Mt. 13.18-23; Lc. 8.11-15)*

<sup>13</sup> Na' una Jesús rëbinë' leyaquë':

—¿Biuyoñe'ele bi re'en ina di'idza' ta nacan irupa iyunala quie ben' guza bini trigo? ¿Biži huele ta tzioñe'ele bi re'en ina di'idza' binenia' le'e?

<sup>14</sup> Naca ben' raza bini trigo ca quie ben' rguixogue' xti'idza' Diuzi.

<sup>15</sup> Bala benë' nacayaquë' ca quie bini trigo yaque'n tu neza bezi' bguini aodaoba'n. Ruzënegayaquë' xti'idza' Diuzi, pero beyudyi bzënegayaquë'n, lardyinte xan' taxi'ibi' ta cuionë' ca di'idza' uyu'u lu'u guicho laxta'oyaquë'.

<sup>16</sup> Ibala benë' nacayaquë' ca quie bini trigo yaque'n lao yo ga binacan tubelaozi yu. Ruzënegayaquë' raxeyaquë' xti'idza' Diuzi.

<sup>17</sup> Pero binacayaquë' ca quie bini trigo yu'un luena zitu' lu'u yu. Birega'n xti'idza' Diuzi lu'u guicho laxta'oyaquë'. Cati rue yaca benë' leyaquë' bizinaquezi nun quie ruzënegajë' xti'idza' Diuzi, na'ra rusanyaquë' bira rue quieyaquë' xti'idza' Diuzi.

<sup>18</sup> Ibala benë' nacayaquë' ca quie bini trigo yaque'n ga rlë guixi' yëchi'. Ruzënegayaquë' xti'idza' Diuzi.

<sup>19</sup> Pero rza'la'adyi'yaquë' ta de lao yedyi layu. Nun quie rzi' dumi quieyaquë' leyaquë' yë', lega re'enyacuë' gata' quieyaquë' zë cosa. Quie lena' binacayaquë' ca quie bini trigo ru'en usecho.

<sup>20</sup> Pero ibala benë' ruzënegayaquë' xti'idza' Diuzi, rue quieyaquë' len. Nacayaquë' ca quie bini trigo yaque'n ga naca tubelaozi yu. Balayaquë' nacayaquë' ca quie dyigo' bi'an galobechi bini, ibalayaquë' nacayaquë' ca quie dyigo' bi'an tzona galo bini, ibalayaquë' nacayaquë' ca quie dyigo' bi'an tu gayuhua bini.

*Bzu Jesús tu di'idza' quie tu lámpara  
(Lc. 8.16-18)*

<sup>21</sup> Lëscan' una Jesús rëbinë' leyaquë':

—Nunu uga'ala' lámpara ta utacaron caja, ni ta ucachi'ron žan belaga. Ruen zi uzuro lámpara sibi ta cuëchin žni' dužete.

<sup>22</sup> Cana' nacarën quie yaca benë'. Yugulu ta pcachi' yaca benë', huadyin dza yebio Diuzi ta pcachi'yaquë', na' cuionë'n zaca'lao ta ilë'ë ja benë' len. Lëscan' yugulu di'idza' negachi' rnë yaca benë', huadyin dza quixogue' Diuzi ca di'idza' negachi' unayaquë'.

<sup>23</sup> Ulezënaga ca rnia'.

<sup>24</sup> Lëscan' unë' rëbinë' leyaquë':

—Ulehue quiele cabè' babele baonia'. Cabè' ruele racalèle lagueyile, cana' hue Diuzi iyacalènè' le'e. Na' mazara iyacalè Diuzi le'e, ben' ruzènaga xti'idzè'.

<sup>25</sup> Nu ben' hue quie ta tzioñe'enè' bi na xti'idza' Diuzi, uzioñe'era Diuzi lèbè' mazara. Pero nu ben' bihue quie ta tzioñe'enè' bi na xti'idza' Diuzi, hueguba Diuzi hasta tadao' lè'èti' baoyoñe'enè'.

*Bzu Jesús tu di'idza' cabè' rlè bini trigo*

<sup>26</sup> Lèscan' una Jesús rèbinè' leyaquè':

—Naca yela' r nabè' quie Diuzi ca quie bi raca quie bini trigo cati raza benè' len lu'u yu.

<sup>27</sup> Bè' beyudyi bènè' guza, caora na' rezè'è redyinnè' zan yu'u ratanè' rasinè' quie rtze', rasanè' quie zila. Cana' ruenè' rde dza tu rlè bini trigo re'enina, binezi ben' na' birue bini trigo ta ilèna gue'enina.

<sup>28</sup> Na'ra tu cuinzi yu rsegulan bini. Tanèro rlèn len la'aga' dao' quien. Na' bè' banacan tahuala, ilè dao' quien. Bè' bardzatza dao' quien, cana' cuian trigo.

<sup>29</sup> Cati aobidyí trigo, na'ra rchugujè'n rezi'jè'n, dan' babdyin dza quie usecho quien.

*Bzu Jesús tu di'idza' quie tu bini dao' bicu'*

*(Mt. 13.31-32; Lc. 13.18-19)*

<sup>30</sup> Lèscan' una Jesús rèbinè' leyaquè':

—¿Con bidan' utilalèbi yela' r nabè' quie Diuzi? ¿Con bi di'idza' re'ennan ta uzioñe'eda' le'e?

<sup>31</sup> Naca yela' r nabè' quie Diuzi ca quie tu bini mostaza ta raza benè' lu'u yu. Naca bini mostaza bini dao' bižu gula.

<sup>32</sup> Pero cati bayu'un lu'u yu, hualèna hue'enina gacan tu yaga že gula. Tanto naca tona xu'uzan quien, hasta huida yaca bguini, bia dyia xile, ta yezila'adyi'ba' ga zè žula quien.

*Puro lao na'a di'idza' ta nacan irupa iyunala psèdi Jesús yaca benè'*

*(Mt. 13.34-35)*

<sup>33</sup> Cana' una Jesús psèdinè' yaca benè' xti'idza' Diuzi. Bzunè' zè di'idza' ta gacalèn leyaquè' ta tzioñe'eyaquè'.

<sup>34</sup> Puro lao na'a di'idza' ta nacan irupa iyunala psèdi Jesús yaca benè', pero cati zuè' tuzinè' len yaca ben' quiè', caora na' pxi'idze'nè' leyaquè' bi re'en ina di'idza' ta nacan irupa iyunala.

*Udila Jesús be bedun' len nisa*

*(Mt. 8.23-27; Lc. 8.22-25)*

<sup>35</sup> Cati bagula uxin banaca chula, na' una Jesús rèbinè' yaca ben' quiè':

—Ya' tzioro itzala' lagun.

<sup>36</sup> Na'ra udeyaquè' ga zè yaca ben' na', uyu'uyaquè' lu'u barco ga ure' Jesús uza'yaquè' zioyaquè' itzala' lagun. Lèscan' ziorè ichopa tzona barco nu'an benè' len leyaquè'.

<sup>37</sup> Binedyinyaquè' itzala' lagun cati uzulao rda tu be bedun' fuerte gula. Tanto raca be bedun', ben gan uyudzo nisa lu'u barco, ilè'èti'zi bibedza' nisa lu'u barco.

<sup>38</sup> Na' zaquè' žbam barco ure' Jesús rasinè' lao xcugonè'. Pero psebè yaca ben' quiè' lèbè', unayaquè' rèbiyaquè' lèbè':

—¡Maestro! ¿Birdèbilo' gala' gatiro lu'u nisa?

<sup>39</sup> Na'ra uyasa Jesús udilanè' be bedun'. Lèscan' unè' gudyyinè' nisa:

—¡Ure' chizi! ¡Bira huu' zèdi!

Caora na' uleza be bedun', bega'n chizi lao lagun.

40 Na'ra una Jesús rëbinë' yaca ben' quië':

—¿Bixquien' rdzebile? ¿Bixquien' biralele ute usela Diuzi ra'o?

41 Pero bega'n yaca ben' quienë' rdzebiyaquë' unayaquë' rëbiyaquë' laguediyaquë':

—¿Nuži naca ben' niga como hasta be bedun' len nisa ralen quienë'?

## 5

*Beyue Jesús tu ben' yu'u bichi be mala*

(Mt. 8.28-34; Lc. 8.26-39)

1 Na'ra bdyin Jesús lënë' yaca ben' quienë' itzala' lagun gan' nita' yaca ben' Gadara.

2 Ca bro Jesús lu'u barco, labdyinte tu ben' yu'u bichi be mala gan' zë Jesús. Babronë' ga dyia yaca beló ga rucachi'yaquë' ben' huati.

3 Yugu dza, yugu yela, zunë' na' ga dyia beló. Ni tu ben' nita' na' biuzueyaquë' uquiyoaqué' lëbë' con caden.

4 Zë lasa pquiyoaqué' lënë' con caden na'anë' len ni'anë', pero uchugunë'n bzužu pquinonë'n. Nitu nunu uzue ucaxo lëbë'.

5 Yugu dza, yugu yela, udanë' ga dyia beló du lë'ë ya'a, rbedyiya'në' rzi'në' yo rguinë' cuinnë'.

6 Caora blë'ënë' Jesús zitu'la, na'ra uyu'unë' be zionë' yeditzu žibinë' lao Jesús.

7 Na' uredyiya' bichi be mala yu'unë' rëbina Jesús:

—¿Bixquien' zao' niga? Luë' Jesús, ži'i Diuzi zu sibi. Rnabayëcha' luë' lao Diuzi ta biutzagalaolo' në'ëdi'.

8 Cana' una bichi be mala rëbina Jesús como dan' gudyi Jesús len:

—Bichi be mala luë', bero ben' ni.

9 Na' unaba Jesús rëbinë' len:

—¿Bi laolo'?

Na' bequëbina rëbina Jesús:

—Xopa mila laohua' dan' nacando' zë.

10 Lëscan' unabayëchi'në' Jesús ta biuse'ela' Jesús leyacan ga naca zitu'.

11 Biži ga'ala' gan' zë Jesús nita' yaca cuchi zë lao leda'. Rqui'nyacaba' ta yedzeleyacaba' bi gaoyacaba'.

12 Na' unabayëchi' yaca bichi be mala rëbiyacan Jesús:

—Huu' cule ise'elo' nëto' gan' nita' yaca cuchi. Ben lato tzu'undo' leyacaba'.

13 Na'ra bë' Jesús lato ta tzu'uyacan lu'u yaca cuchi. Cana' beroyacan be'mbyu beyu'uyacan yaca cuchi. Na' nita' cadu chopa mila cuchi lao leda' na'. Caora beyu'u yaca bichi be mala lu'u yaca cuchi, na' uxitiyacaba' beyëziyacaba' lë'ë leda' uyu'uyacaba' lu'u nisa ga gutiyacaba'.

14 Na' biži bžuno yaca ben' rapa cuchi. Du rdzebiyaquë' yetixogue'yaquë' du tu neza len la'o yedyi bi guca. Lena' bdyin yaca benë' ta ina'yaquë' na'.

15 Na' caora bdyinyaquë' ga zë Jesús, blë'ëyaquë' ben' babero yaca bichi be mala. Blë'ëyaquë' are'në' chizi, banaanë' žabanë', babeyu'unë' pensari. Na' lega bdzebiyaquë'.

16 Na' yaca ben' blë'ë cabë' bë Jesús, udixogue'yaquë' yaca ben' bdyin na' cabë' guca quie ben' uyu'u bichi be mala, lëscan' cabë' guca quie yaca cuchi.

17 Na'ra unabayëchi'yaquë' Jesús ta biyega'nnë' yu nebaba yedyi quieyaquë'.

18 Caora beyu'u Jesús lu'u barco, unaba ben' bero yaca bichi be mala chi bigun Jesús lato ta tziolënë' Jesús gan' tzioguë'.

19 Pero bibë' Jesús lëbë' lato. Lena' unë' gudyinë' ben' na':

—Beyo žan yu'u quio' yetixogue' familia quio' cabë' guca quio' beyëchi'la'adyi' Diuzi luë'.

<sup>20</sup> Na'ra zeyonë' tzetixogue'në' yaca ben' nita' gan' de chi yedyi quie yu laona Decápolis yugulu cabë' bë Jesús quienë'. Na'ra caora be yaca benë' can' unë', bega'nyaquë' bebanziyaquë'.

*Beseban Jesús zi'i Jairo, beyuenë' nigula bda' zbe zabë'  
(Mt. 9.18-26; Lc. 8.40-56)*

<sup>21</sup> Na'ra beyu'u Jesús lu'u barco uzë'ë zionë' itzala' lagun. Caora bdyinnë' na', babedupa ben' zë gan' zënë'. Na' bega'n Jesús ru'a lagun na'.

<sup>22</sup> Na' bdyin tu xan' idao' sinagoga laonë' Jairo gan' zë Jesús. Caora blë'ënë' Jesús, uditzu žibinë' laohuë'.

<sup>23</sup> Na' unabayëchi'në' rëbinë' Jesús:

—Barati ži'ina'. Chi huu' cule, žbisao' ta ideda'lo' nao' ži'ina' cuenda yeyuelo'bi' ta bigatibi'?

<sup>24</sup> Na'ra ziolë Jesús lëbë', pero lëscan' ziorë yaca ben' zë pqui'yaquë' Jesús.

<sup>25</sup> Na' entre yaca ben' ziolë Jesús uzu tu nigula raca quie biu' quienë' chopa tzona lasa tu biu'. Bazio chipchopa iza ruen quienë' cana'.

<sup>26</sup> Uyonë' yenë' zë ben' médico, beya dumí quienë' bënë' gasto, pero biuzi' yela' hue' quienë' remedio. Na' remedio uzi'në', bigucalën lëbë', bdyiagui'n mazara lëbë', izi'ra bëna.

<sup>27</sup> Na'ra babe nigula na' cabë' reyue Jesús ben' raca žhue'. Quie lena' yesënë' xcu'udzu Jesús ga zë yaca benë', bda'në' žbenë' žabë'.

<sup>28</sup> Cana' bë nigula na' como dan' guquenë': “Čhi uda' žbia' žaba Jesús, hueyaca'.”

<sup>29</sup> Na'ra caora bda'në' žbenë' žaba Jesús, bebidyi ren, bero yela' hue' yu'unë', gucabë'në' babeyacanë'.

<sup>30</sup> Lëscan' gucabë' Jesús babeyuenë' nu ben' raca žhue' conlë yela' huaca quienë'. Quie lena' beyëchoguë' rnë'ë yaca ben' zë xcu'udzë', unë' rëbinë' leyaquë':

—ČNuži bda' zbe žaba'?

<sup>31</sup> Na'ra una yaca ben' quië' rëbiyaquë' lëbë':

—Rlë'ëlo' ruqui' yaca benë' luë', na'ra nao', “ČNuži bda' zbe në'ëdi'?”

<sup>32</sup> Pero una' Jesús yaca ben' zë na' ta idzelenë' nu ben' bda' zbe lëbë'.

<sup>33</sup> Na'ra unezi nigula bi guca quienë'. Quie lena' du ržizinë', du rdzëbinë', bebiga'në' uditzu žibinë' lao Jesús, gudyinë' lëbë' cabë' guca quienë'.

<sup>34</sup> Na' una Jesús rëbinë' nigula na':

—Žana', babeyaco' nun quie rzudyi'ilëlo' në'ëdi'. Beyo žan yu'u quio', bira idëbo'. Apsan yela' hue' quio' luë'.

<sup>35</sup> Neru'elë Jesús nigula na' di'idza' cati bdyin chopa tzona ben' uza' yu'u quie ben' naca xan' idao' sinagoga. Na' unayaquë' rëbiyaquë' xan' sinagoga:

—Baguti ži'ilo'. Bira cule huelo' maestro žëdi.

<sup>36</sup> Pero bibë Jesús casa ca unayaquë'. Na' unë' rëbinë' xan' sinagoga:

—Bidzebo'. Sudyi'ilëlo' në'ëdi'.

<sup>37</sup> Na'ra bibë' Jesús lato tziolë yaca ben' zë na' len lëbë'. Na' uquië'në' Pedro, len Santiago, len Juan bichi Santiago.

<sup>38</sup> Cati bdyinyaquë' ru'a yu'u quie xan' sinagoga, blë'ë Jesús nita' ben' zë, yu'uyaquë' ru'be, rbedyiya'yaquë'.

<sup>39</sup> Caora uyu'u Jesús lënë' tzona ben' quië' lu'u yu'u na', unë' rëbinë' yaca ben' nita' na':

—ČBixquien' ru'ule ru'be rbedyiya'le? Ba'ala'cazi agutibi', raca quiebi' ca quie bi' rasizi.

40 Pero bzidyiaquë' ca una Jesús. Caora na' bë Jesús mandado yeroyaquë' lu'u yu'u. Na' uquië' Jesús tzona ben' quië' len xuzi zna' bidao' huati. Uyu'uayaquë' lu'u cuarto ga de bi' huati.

41 Na' bëxu Jesús na'abi' unë' rëbinë'bi':

—Talita cumi —ta inaro xti'idza'ro: Zana', rnia' luë', uyasa.

42 Caora beyudyi una Jesús cana', uyasa nigula dao' bedabi'. Baozubi' chipchopa iza. Na' bega'n xuzi zna' bidao' tu bebanzitzegueyaquë'.

43 Pero gudyi Jesús leyaquë' ta biquixogue'yaquë' yaca benë' cabë' bënë' quie bidao' huati. Lëscan' bënë' mandado ta hue'yaquë'bi' ta gaobi'.

## 6

### *Ca guca cati uda Jesús yedyi Nazaret (Mt. 13.53-58; Lc. 4.16-30)*

1 Na'ra uza' Jesús zionë' bedyinnë' yedyi quienë' lënë' yaca ben' quienë'.

2 Caora guca dza saodo, dza huezila'adyi' quieyaquë', uyu'u Jesús lu'u idao' sinagoga ta usëdinë' yaca ben' bdupa na'. Na' tu rebanzi yaca ben' bzënaga can' unë'. Lena' unayaquë' rëbiyaquë' laguediyiaquë':

—¿Gazi yesëdi ben' niga? ¿Biži bënë' banaquë' ben' de yela' rioñe'e quie? ¿Biži ruenë', ruenë' ta binelë'ëro?

3 Pues naca ben' niga ben' rcha'a yaga. Zi'i María naquë'. Naca Santiago, len José, len Judas, len Simón bi' bichinë'. Ni nita' ladoro yaca bi' zannë'.

Quie lena' bibëyaquë' casa quienë'.

4 Lena' una Jesús rëbinë' leyaquë':

—Nu ben' rguixogue' xti'idza' Diuzi, rapala'ncazi yaca benë' lëbë'. Pero ben' yedyi quienë', len familia quienë', len ben' zu žan yu'u quienë', birapala'nyaquë' lëbë'.

5 Quie lena' bibë Jesús yela' huaca quienë' ladoyaquë'. Tu chopazi ben' raca žhue' bda'në' në'ë beyuenë' leyaquë'.

6 Na' bebanzi Jesús dan' tu bzëmagaziyaquë' can' unë', na' bibëyaquë' lëbë' casa. Na'ra uza' Jesús zioquë' yaca yedyi nita' ga'ala', uzulaonë' rguixogue'në' yaca ben' nita' yaca yedyi na' xti'idza' Diuzi.

### *Use'ela' Jesús yaca ben' quienë' ta tzetixogue'yaquë' xti'idza' Diuzi (Mt. 10.5-15; Lc. 9.1-6)*

7 Caora na' betupa Jesús chipchopa ben' quienë', bë'në' yela' huaca quienë' ta yebioyaquë' yaca bichi be mala yu'u benë'. Na'ra chopa huioyaquë' use'elë' leyaquë' tu tu yedyi.

8 Na'ra bënë' mandado bihua'ayaquë' bi cosa tu neza. Bënë' mandado tuzi xaga hua'ayaquë'. Bihua'ayaquë' ni yëxo, ni yëta, ni dumi.

9 Reya'ala' udeyaquë' huaracho, reya'ala' gacoyaquë' tu cue'zi žabayaquë'.

10 Na' una Jesús rëbinë' leyaquë':

—Lu'u yu'u gan' idyinle, na' yega'nle hasta que yeza'le yeyole yedyi tula.

11 Caora abdyinle tu yedyi, chi bire'en yaca benë' si'yaquë' le'e dyë'ëdi, chi bire'enyacuë' uzëmagayaquë' quiele, na'ra yerole gan', usisile ni'ale ta gasi bëxte dyia ni'ale ta ulu'en quieyaquë' dula' quieziyaquë' nenao dula' xquia quieyaquë' leyaquë'. Nacan tali ca rnia' le'e, cati abdyin dza gaca juicio, huedzagalaora ben' bibzënaga quiele mazara ca ben' ciudad Sodoma len ben' ciudad Gomorra.

12 Na'ra zioyaquë' tzetixogue'yaquë' benë' gudiyiaquë' leyaquë' ca re'en Diuzi utza'yaquë' pensari quieyaquë'.

13 Lëscan' bebioyaquë' yaca bichi be mala yu'u yaca benë', bzuyaquë' aceite guicho yaca ben' raca žhue', beyacayaquë'.

*Ca guca cati guti Juan bautista*

(Mt. 14.1-12; Lc. 9.7-9)

14 Na'ra bdyin dza be rey Herodes cabè' rue Jesús nun quie ru'e yaca benè' di'idza' cabè' ruenè'. Na' guque rey Herodes pensari nè':

—Babeban Juan bautista. Quie lena' ruenè' milagro. —Cana' una rey Herodes na'.

15 Na' una bala benè' rëbiyaquè' laguedyiaquè':

—Naquè' Elías, ben' udixogue' xti'idza' Diuzi dza na'.

Na' ibala yaca benè' unayaquè':

—Naquè' ben' rguixogue' xti'idza' Diuzi cabè' bē ben' unita' tiempote.

16 Caora be rey Herodes cabè' una yaca benè', na'ra unè':

—Ben' na' naquè' Juan, ben' bia' mandado uchuguyaquè' luba'nè'. Na'ra babebannè' tatula. —Cana' una rey Herodes na'.

17 Lëcana' bē rey Herodes, bënë' mandado bēxo yaca soldado Juan bdze'yaquè' lëbè' lu'u dyiguiba. Nun quie žgulanè' Herodías bënë' mandado pquioyaquè' lëbè' con caden lu'u dyiguiba. Pues guca Herodías žgula ben' tula, ben' lao Felipe. Pero baoži' rey Herodes žgula Felipe, bazulënë' lëbè'.

18 Quie lena' una Juan dza na'te gudyinè' rey Herodes:

—Bireya'ala' sulao' nigula quie bi' bicho' Felipe.

19 Quie lena' lega udie Herodías Juan gu'unne' gutinè' lëbè', pero biubinnè' bi huenè' ta gutinè' lëbè'.

20 Cana' guca quie Herodías como dan' nezi rey Herodes naca Juan ben' huen, ben' la'iya. Quie lena' bdzebi Herodes bibè'nè' lato hue nigula na' tamala Juan. Lëscan', ba'ala'cazi biuyoñe'e rey Herodes dyè'edi cabè' gudyi Juan lëbè', bzënaguè' quienè' con gusto.

21 Pero bdyin dza rbè'nidyi Herodías cabè' huenè' ta gati Juan. Lëdza na' bē rey Herodes tu lani quie dza cumpleaños quienè'. Bè'nè' ta gao yaca ben' rnabè' lao na'anè', len yaca ben' naca xan' soldado quienè', len yaca los demás ben' belao, ben' nita' yedyi nebaba Galilea.

22 Na' uyu'u tu nigula dao', bi' naca ži'i Herodías, gan' raca lani na' ta uya'abi' zaquè'lao lao yaca ben' na'. Caora na' lega yaxe Herodes len yaca ben' raolënë' rtze' cabè' bya'a nigula dao' na'. Na' una Herodes rëbinè' bi' nigula dao':

—Con bitezi ta inabo' nē'edi', naguna'n.

23 Na'ra bguntenè' Diuzi hue'nè' nigula dao' con ta inababi', ba'ala'cazi inababi' gatzo yedyi ga rnabè'nè'.

24 Na' bero nigula dao' yeguèdyibi' žna'bi' rëbibi' lëbè':

—¿Biži inaba' rey na'?

Na' una žna'bi' rëbinè' lëbi':

—Unaba guicho Juan bautista.

25 Na'ra beyu'u nigula dao' ga re' rey na', na' gudyibi' lënë':

—Re'enda' laguntegazo' guicho Juan bautista tu lu'u plato.

26 Na' guqueyèchi' rey Herodes dan' unaba nigula dao' guicho Juan. Pero como babguntenè' lao Diuzi, babe yaca ben' zē lao lani quienè' ca ta unè' gudyinè' nigula dao', biužaque' yëbinè'bi' bihue'nè'.

27 Quie lena' luegozi bënë' mandado uyo tu soldado ta txexi'nè' guicho Juan.

28 Na' uyo soldado uyu'unè' lu'u yu'u dyiguiba, uchugunè' luba' Juan, zeyu'anè'n tu lu'u plato ga raca lani, bē'nè'n nigula dao' na'. Na' uyo nigula yezambi'n lao žna'bi'.

29 Cati unezi yaca ben' quie Juan agutinè', caora na' uza'yaquè' yexi'yaquè' cuerpo quienè' ta pcachi'yaquè' lëbè'.

*Bgao Jesús lao ga'yo' mila benë'*  
(Mt. 14.13-21; Lc. 9.10-17; Jn. 6.1-14)

<sup>30</sup> Bë' beyudyi na', bedyin yaca ben' quie Jesús gudyiyaquë' lëbë' yugulu ta bëyaquë' psëdiyaquë' yaca benë'.

<sup>31</sup> Na' una Jesús rëbinë' leyaquë':

—Uletza' tziro ru'a yedyi ga binita' benë' cuenda yezila'adyi'ro.

Cana' una Jesús dan' tantozi rdyin ben' rdyin, zaza' ben' zaza', ni siquiera bibë'n nan lato ta gaoyaquë'.

<sup>32</sup> Na'ra uza' Jesús lënë' yaca ben' quië', uyu'uyaquë' lu'u barco ta tziyo-aquë' ru'a yedyi ga nunu nita'.

<sup>33</sup> Pero blë'ë yaca ben' zë azio Jesús bezaqueyaquë' lëbë'. Quie lena' uyu'uyaquë' be, uza'yaquë' quie quie yedyi quieyaquë' zioyaquë' bdyinyaquë' rbezayaquë' ga idyïn Jesús.

<sup>34</sup> Caora bdyin Jesús na', blë'ënë' nita' ben' zë rbezayaquë' lëbë'. Na' beyëchi'la'adyi'në' leyaquë', como dan' naca quieyaquë' ca quie yaca beco' zi'ila' neniti xa'ne. Na'ra bezulao Jesús rusëdinë' leyaquë' di'idza' zëra.

<sup>35</sup> Caora baoya' dza, baza' rdze', una yaca ben' quië' rëbnyaquë' lëbë':

—Bardze' barala, quele biyu'u dyia niga.

<sup>36</sup> Mejorla yese'elo' yaca benë' yeyoyaquë' la'o yedyi ga'ala' ta ga'oyaquë' ta gaoyaquë', porque bide ta gaoyaquë' niga.

<sup>37</sup> Na' una Jesús rëbinë' yaca ben' quië':

—Ulehue' ta gaoyaquë'.

Na' unayaquë':

—¿Re'enlo' tzegue'endo' chopa gayuhua dumi denario yëta xtila ta gaoyaquë'?

<sup>38</sup> Na' una Jesús rëbinë' leyaquë':

—¿Bala yëta xtila nu'ale? Uletzio tzena'le.

Na'ra caora uneziyaquë' unayaquë' Jesús:

—Ga'yo' yëta xtila len chopa bela.

<sup>39</sup> Na' bë Jesús mandado ure' yaca benë' tu cue' huioyaquë' lao guiži.

<sup>40</sup> Na' gan' ure'yaquë', ure' ben' ure' tu gayuhua. Na' re' ben' ure'rë igatzo gayuhua.

<sup>41</sup> Caora na' uzi' Jesús lao ga'yo' yëta xtila len chopa bela. Bë' bazënë'n, unë'ë ladza rëbinë' Diuzi diuxcalelo'. Na' bzužunë'n bë'n laze. Bë'në'n yaca ben' quië' ta udisiyaquë'n gao yaca benë'. Lëscan' bzužurënë' yaca bela ta gaoyaquë'.

<sup>42</sup> Na' udao yuguluteyaquë', udaoyaquë' ca tu beloyaquë'.

<sup>43</sup> Bega'nra ichipchopa ga' naga yëta xtila yužo len bela yužo ta bezi'yaquë'n.

<sup>44</sup> Naca yaca ben' udao ca du ga'yo' mila be'mbyu, apartela nigula len xcuidi'.

*Uza' Jesús lao nisa*  
(Mt. 14.22-27; Jn. 6.16-21)

<sup>45</sup> Na' bë Jesús mandado yeyu'u yaca ben' quienë' lu'u barco cuenda cuialaonezayaquë' lëbë' idyinyaquë' gan' de ciudad Betsaida, tu rëbi Jesús yaca benë' ta yeyoyaquë' zan yu'u quieyaquë'.

<sup>46</sup> Caora bedzatza yaca benë', uza'në' zionë' lë'ë ya'a ta hue'lënë' Diuzi di'idza'.

<sup>47</sup> Biži barala uxin zio yaca ben' quie Jesús bega'nnyaquë' gatzo la'o lagun. Na' bega'n Jesús nezënë' ru'a yu bidyi quie lagun.

<sup>48</sup> Na' blè'è Jesús raca rdilalè ben' quienè' be bedun', biru'en lato ta usa'yaquè' barco lao lagun. Na' ilè'èti'zi tzeni', bebiga' Jesús ga re'yaquè' lu'u barco rza'nè' lao nisa ta tenè' ga re' barco na'.

<sup>49</sup> Cati blè'èyaquè' zio Jesús rzè'è tu lao nisa, guqueyaquè' chi ludza' ben' huati.

<sup>50</sup> Na' lega bdzebiyaquè' urediya'yaquè'. Pero una Jesús rëbinè' leyaquè': —Bidzebile, nè'èdi' za' niga.

<sup>51</sup> Caora uyu'u Jesús lu'u barco gan' yu'uyaquè', na' lapsante be bedun'. Pero lega rebanetzegueyaquè'.

<sup>52</sup> Cana' guca quieyaquè', como dan' binetziõe'eyaquè' cabè' yela' huaca bè Jesús quie yèta xtila. Nenacan zidi lu'u guicho laxta'oyaquè'.

*Byue Jesús yaca ben' raca zhue' yu nebaba Genesaret  
(Mt. 14.34-36)*

<sup>53</sup> Na'ra zioyaquè' bdyinyaquè' ru'a lagun ga de yaca yedyi nebaba Genesaret. Lëgan' na' pquioyaquè' barco quieyaquè' ru'a lagun.

<sup>54</sup> Caora broyaquè' lu'u barco labezaquete yaca ben' nita' na' Jesús na'.

<sup>55</sup> Na' uyu'uyaquè' be, uyoyaquè' yugu yedyi de na', yexi'yaquè' yaca ben' raca zhue', uxubayaquè' leyaquè' lao belaga, yesanyaquè' leyaquè' ga nezियाquè' zu Jesús.

<sup>56</sup> Con ga ude Jesús, chi yedyi dao', chi yedyi že, chi ciudad, udixoyaquè' belaga gan' žuba ben' raca zhue' du tu neza, unabayaquè' cule hue' Jesús lato ta uda'yaquè' siquiera tacayaquè' ni'a žabanè'. Na' yugu ben' bda' taque žabanè', bero yela' hue' yu'uyaquè'.

## 7

*Una Jesús quie ta nuen benè' badza' lao Diuzi  
(Mt. 15.1-20)*

<sup>1</sup> Na'ra guca dza bdyin bala ben' naca partido fariseo len bala ben' rusèdi ley quie Moisés, ben' uza' ciudad Jerusalén, bebiga'yaquè' ga zè Jesús.

<sup>2</sup> Na' blè'èyaquè' rao bala ben' quie Jesús du binequibi na'ayaquè'. Quie lena' udaoyaquè' leyaquè' xquia.

<sup>3</sup> (Cani rue yaca ben' naca partido fariseo len yaca los demás ben' Israel. Nenaoyaquè' costumbre quie xuzixta'oyaquè', bigaoyaquè' chi binequibi na'ayaquè' zè lasa. Pero quele rguibi na'ayaquè' dan' nacan besu, dechan' dan' inayaquè' cana' yeyèri laxta'oyaquè' lao Diuzi.

<sup>4</sup> Lëscan', caora rioyaquè' lao ye'eya redyinyaquè' zan yu'u, bigaoyaquè' chi binegazuyaquè' yao. Lëscan' dera zè costumbre nenaoyaquè', rguibyaquè' nu taza, nu candi, nu yaca traste de guiba. Lente belaga quieyaquè' rguibyaquè' como dan' inayaquè' cana' yeyèrin lao Diuzi.)

<sup>5</sup> Na'ra una yaca ben' naca partido fariseo len yaca ben' rusèdi ley quie Moisés, rëbiyaquè' Jesús:

—¿Bixquien' binao yaca ben' quio' costumbre quie xuzixta'oro? Raoyaquè' du binequibi na'ayaquè'.

<sup>6</sup> Na'ra una Jesús rëbinè' leyaquè':

—Dyè'èdi una Moisés cabè' ruele, biruele cabè' nale. Cana' una Moisés caora bzunè' di'idza' lè'è guichi nan ca niga:

Yaca ben' niga rapala'nyaquè' Diuzi de di'idza'zi, birapala'nyaquè' lèbè' du guicho du la'adyi'yaquè'.

<sup>7</sup> Bibi sirve rionla'adyi'yaquè' Diuzi.

Puro mandado quie benè' rusèdiyaquè' nayaquè' mandado quie Diuzi na'.



<sup>8</sup> Lëscan' unarë Jesús:

—Le'e rutele di'idza' quie Diuzi tzala'la tacuenda huele costumbre quie xuzixta'ole. Lena' rguibile candi quiele, rguibile vaso quiele. Lena' dera costumbre ta naca lëbizi quiele ruele quie xuzixta'ole.

<sup>9</sup> Lëscan' unaranë':

—Rutele tzala'la ca naca mandamiento quie Diuzi ta inaole costumbre quiele.

<sup>10</sup> Dyë'ëdi rnën lë'ë guichi bë Moisés: “Reya'ala' gapala'nle xuzile len zna'le.” Lëscan' rnën: “Nu ben' rudze'de' xuzi znë'ë, reya'ala' gatinë'.”

<sup>11</sup> Pero le'e nale chi yëbi benë' xuzi znë'ë: “Bide ta gacalia' le'e, como dan' yugulu ta de quia' nacan gun quie Diuzi.”

<sup>12</sup> Na'ra le'e nale chi yëbi benë' xuzi znë'ë cana', biruen zi gacalënë' xuzi znë'ë.

<sup>13</sup> Cana' rutele tzala'la ca naca mandamiento quie Diuzi ta inaole costumbre quiele. Lëscan' rusëdile ži'ile ta inaorëyacabi' hueyacabi' cabë' ruele. Lëscan' zëra costumbre de quiele nacan lëbi ca costumbre naole quie xuzixta'ole.

<sup>14</sup> Na'ra beyëži Jesús yaca benë' tatula unë' rëbinë' leyaquë':

—Ulezëcara nagale ta tzioñe'ele cabë' rnia'.

<sup>15</sup> Quele ta gao yaca benë' nuen leyaquë' badza' lao Diuzi, dechan' pensari median rero lu'u guicho laxta'oyaquë', lëlena' nuen leyaquë' badza' lao Diuzi.

<sup>16</sup> Nu le'e re'en ye, ulezë nagale.

<sup>17</sup> Na'ra uza' Jesús zionë' bdyinnë' zan yu'u quienë'. Caora na' unaba yaca ben' quië' lëbë' ca bi re'en ina di'idza' unë' bachi.

<sup>18</sup> Na' unë' rëbinë' leyaquë':

—¿Lëscan' le'e birioñe'ele? ¿Binezile ta rao yaca benë' binuen leyaquë' badza' lao Diuzi,

<sup>19</sup> como biru'un lu'u laxta'oyaquë', dechan' ru'un lu'u lë'ëyaquë', te na' rguichiyaquë'n?

Cana' una Jesús pxilidze'në' ra'o yugulu yela' hua'o nacan ta gaoro, binuen ra'o badza' lao Diuzi.

<sup>20</sup> Lëscan' una Jesús cani:

—Yaca pensari median rero lu'u guicho laxta'o benë', lëlena' nuen leyaquë' badza' lao Diuzi.

<sup>21</sup> Nun quie pensari median rero lu'u guicho laxta'o benë', quie lena' rtilayaquë' nigula cuidi', rbanyaquë' quie laguedyiaquë', rutiyaquë' laguedyiaquë', rtilayaquë' zgula laguedyiaquë',

<sup>22</sup> rza'la'adyiyaquë' ta de quie laguedyiaquë', rueyaquë' tabayatza, rzi'yaquë' yë', rguiloayaquë' nigula yugu dza, racazë'jë' laguedyiaquë', rueyaquë' ze cuinyaquë', biyu'uyaquë' gracia.

<sup>23</sup> Cana' naca tamala rero lu'u guicho laxta'o yaca benë' nuen leyaquë' badza' lao Diuzi.

*Bebio Jesús bichi be mala yu'u ži'i nigula, ben' Sirofenicia  
(Mt. 15.21-28)*

<sup>24</sup> Na'ra uza' Jesús gan' žiogüë' bdyinnë' ga naca yu nebaba ciudad Tiro len ciudad Sidón. Bdyinnë' tu lu'u yu'u zu na', pero bigu'unnë' inezi yaca benë' gan' bdyinnë', pero bedzelecazi yaca benë' gan' bdyinnë'.

<sup>25</sup> Lëscan' laonezite tu nigula yu'u ži'inë' bichi be mala ga bdyin Jesús. Quie lena' uza'në' bdyinnë' ga zë Jesús uditzu žibinë' laohuë'.

<sup>26</sup> Na'ra lënigula na' binaquë' ben' Israel, naquë' ben' Sirofenicia. Bidë' unabë' chi biyebio Jesús bichi be mala yu'u ži'inë'.

<sup>27</sup> Na' una Jesús rëbinë' nigula na':

—Tanëro ruen zi gacalia' yaca ben' Israel, ben' naca ca quie zi'ina', como dan' binacan huen si'ro yela' huao ta gao yaca xcuidi', na' tzechu'unro'n ta gao yaca beco' dao'.

<sup>28</sup> Na' una nigula rëbinë' Jesús:

—Laga can' nao', Señor, pero lente yaca beco' dao' raoyacaba' yaca pedazo rguino layu ga rao yaca xcuidi'.

<sup>29</sup> Na'ra una Jesús rëbinë' lëbë':

—Tahuen baonao'. Beyo zan yu'u quio'. Babero bichi be mala yu'u zi'ilo'.

<sup>30</sup> Caora na' bezë'ë zeyoguë' bedyinnë' zan yu'u, blë'ënë' žuba zi'inë' nigula lao belaga, babero bichi be mala yu'ubi'.

### *Reyue Jesús tu ben' xcuedzo, ben' rcaca ru'e*

<sup>31</sup> Na'ra uza' Jesús yu nebaba ciudad Tiro, len yu nebaba ciudad Sidón. Udenë' ga re' chi yedyi bdyinnë' ru'a lagun Galilea.

<sup>32</sup> Lëgan' na' ga bdyinnë', bdyin yaca ben' nequië' tu ben' xcuedzo, ben' rcaca ru'e. Unabayaquë' chi biudë'ë në'ë ben' na'.

<sup>33</sup> Na'ra ubiga' Jesús tzala'la len ben' na', pqui Jesús zbenë' lu'u naga ben' na', blëpinë' žen' quienë' zbenë' bda'në'n lao ludyi ben' xcuedzo, ben' rcaca ru'e.

<sup>34</sup> Caora na' unë'ë guibá, uzi'la'adyi'në' unë' rëbinë' ben' na':

—¡Efata! —ta inaro di'idza' quiero: ¡Beyalo!

<sup>35</sup> Caora na' beyalo naga ben' na' barenë'. Lëscan' beyaca ludyinë' benë'në' dyë'ëdi.

<sup>36</sup> Na'ra bë Jesús mandado yaca ben' quië' ta biyëbiyaquë' can' bënë' quie ben' na'. Pero ca bënë' leyaquë' mandado, cana' mazara gudyyaquë' yaca benë' cabë' bë Jesús quie ben' na'.

<sup>37</sup> Lega bega'nyaquë' bebanyaquë' cabë' ruenë' unayaquë' rëbiyaquë' laguedyyaquë':

—Yugulu ta rue Jesús nacan dya'a. Hasta yaca ben' xcuedzo, reyuenë' leyaquë' reyeyaquë', lëscan' hasta yaca ben' birnë, reyuenë' leyaquë' renëyaquë'.

## 8

### *Bgao Jesús tapa mila benë' (Mt. 15.32-39)*

<sup>1</sup> Guca dza na' bedupa yaca ben' zë gan' zë Jesús. Na' babeya ta nu'ayaquë' ta gaoyaquë'. Lena' guzi Jesús yaca ben' quienë', unë' rëbinë' leyaquë':

<sup>2</sup> —Bareyëchi'la'adya' yaca ben' nita' niga, dan' bazio tzona dza na'a nita'lëyaquë' në'ëdi', na' babeya ta nu'ayaquë' ta gaoyaquë'.

<sup>3</sup> Chan' yese'ela'yaquë' zan yu'u quieyaquë' binegaoyaquë', usu'unan leyaquë' tu neza, dan' balayaquë' uza'yaquë' zitu'.

<sup>4</sup> Na' una yaca ben' quie Jesús rëbiyaquë' lëbë':

—¿Pero biži huero ta gao yaca ben' nita' niga ga bidyia yu'u?

<sup>5</sup> Na' una Jesús rëbinë' leyaquë':

—¿Bala yëta xtila nu'ale?

Na' bequëbiyaquë':

—Gadyin nu'ando'.

<sup>6</sup> Na'ra bë Jesús mandado ure' yaca benë' layu, uzi'në' yëta xtila nu'a yaca ben' quië', blidzë' Diuzi rëbinë' lëbë': “Xcalelo'.” Na' bžuzuguë'n bënë'n yaca ben' quië' ta udisiyaquë'n bë'yaquë'n yaca benë'.

<sup>7</sup> Lëscan' nu'a ben' quienë' chopa tzona bela dao'. Na' uzi' Jesús lëba', blidzë' Diuzi ta bëla'iyänë'ba', hënë' mandado ta udisi yaca ben' quienë' leyacaba', bë'yaquë'ba' yaca benë'.

<sup>8</sup> Na' udaoyaquë' hasta beloyaquë'. Bizi tayuzo bega'n sobre igadyi chicuiti gucan.

<sup>9</sup> Na' yaca ben' udao gucayaquë' cadu tapa mila. Na' bë Jesús mandado yedzatzayaquë' zeyoyaquë' zan yu'u quieyaquë'.

<sup>10</sup> Caora na' uyu'unë' lu'u barco lënë' yaca ben' quië' uza'yaquë' zioyaquë' yu nebaba Dalmanuta.

*Unabayaquë' ulu'e Jesús tu yela' huaca quienë'*

(Mt. 16.1-4; Lc. 12.54-56)

<sup>11</sup> Na'ra bdyin yaca ben' naca partido fariseo gan' zë Jesús, uyu'ulëyaquë' lëbë' huenë. Na' ta hueyaquë' lëbë' prueba unabayaquë' ulu'enë' leyaquë' tu yela' huaca quienë' ladza ta ilë'ëyaquë'.

<sup>12</sup> Na' uzi'la'adyi' Jesús unë' gudyinë' leyaquë':

—¿Bixquien' re'en yaca ben' nita' na'a ilë'ëyaquë' hua' tu yela' huaca quia' ladza? Tali rnia' le'e, bihua' tu yela' huaca quia' ladza ta ilë'ëyaquë'.

<sup>13</sup> Na' pca'n Jesús yaca ben' naca partido fariseo, beyu'unë' lu'u barco lënë' yaca ben' quië', zioyaquë' itzala' lagun.

*Una Jesús quie levadura quie ben' naca partido fariseo*

(Mt. 16.5-12)

<sup>14</sup> Bizi gula'adyi' yaca ben' quie Jesús ta nu'ayaquë' ta gaoyaquë'. Tuzi yëta xtila bi'ayaquë' lu'u barco na'.

<sup>15</sup> Na' una Jesús rëbinë' leyaquë':

—Huele pensari. Gapalë cuidado cabë' naca levadura quie ben' naca partido fariseo, len ben' naca partido Herodes.

<sup>16</sup> Na' una yaca ben' quie Jesús rëbiyaquë' laguediyayaquë':

—Dan' rdzioguero yëta xtila ta gaoro, lena' unë' cana'.

<sup>17</sup> Pero gucabë' Jesús ca naca pensari quieyaquë' biuyoñe'eyaquë' cabë' unë'. Cana' unë' rëbinë' leyaquë':

—¿Bixquien' nale rdzioguele yëta xtila ta gaole? ¿Bixquien' binetzioñe'ele, nica reyuele pensari? ¿Bixquien' naca zidi lu'u guicho laxta'ole?

<sup>18</sup> ¿Quele birle'ële dyë'ëdi cabë' rua'? ¿Quele birele dyë'ëdi cabë' rnia'? ¿Quele agula'adyi'le?

<sup>19</sup> Cati bzužuga' ga'yo' yëta xtila bia' laze ta gao ga'yo' mila be'mbyu, ¿bala ga' naga ta yuzo bega'n?

Na' unayaquë':

—Chipchopa ga' naga.

<sup>20</sup> Na' una Jesús rëbinë' leyaquë':

—Lëscan' cati bzužuga' gadyi yëta xtila bia' laze ta gao tapa mila be'mbyu, ¿bala chicuiti nadza' bega'n?

Na' unayaquë':

—Gadyi chicuiti.

<sup>21</sup> Na'ra una Jesús rëbinë' leyaquë':

—¿Binetz'u'ule pensari ca naca yela' huaca quia'?

*Beyue Jesús tu ben' laochula, ben' yedyi Betsaida*

<sup>22</sup> Na'ra bdyinyaquë' yedyi Betsaida ga uquië' yaca ben' yedyi na' tu ben' laochula ga zë Jesús. Na' unabayaquë' Jesús tu cule ta udë'ë në'ë lao ben' laochula.

23 Na' uže Jesús na'a ben' laochula uquiè'nè' lèbè' ru'a yedyila. Tanèro bda'nè' žen' lao ben' laochula, na'tera bda'nè' nè'è lao ben' na', unabanè' lèbè' chi barelè'ènè'.

24 Na' una ben' laochula rëbinè' Jesús:

—Barelè'èda' yaca benè'. Rna'yaquè' ca quie yaca yaga, pero rza'yaquè'.

25 Na'ra beda' Jesús nè'è lao ben' laochula tatula. Con cana' bena' ben' na' dyè'èdi, beyaca laohuè', belè'ènè' dyè'èdi.

26 Na' bē Jesús mandado zeyo ben' na' zan yu'u quiè', unè' rëbinè' lèbè':

—Bitzatao' la'o yedyi. Biyëbo' benè' cabè' bia' quio' beyaca laolo'.

*Una Pedro naca Jesús ben' Cristo, ben' use'ela' Diuzi*

*(Mt. 16.13-20; Lc. 9.18-21)*

27 Na' uza' Jesús ziolènè' yaca ben' quiè' yedyi Cesarea de Filipino. Na' du tu neza unaba Jesús rëbinè' leyaquè':

—¿Cabiži rna yaca benè' naca' nè'èdi'?

28 Na' una yaca ben' quiè' rëbiyaquè' Jesús:

—Rna balayaquè' naco' Juan bautista, babebanlo' tatula. Ibalayaquè' rnayaquè' naco' Elías, na' ibalayaquè' rnayaquè' naco' itu ben' uduxogue' xti'idza' Diuzi tiempote.

29 Na'ra una Jesús rëbinè' leyaquè':

—Na' le'e, ¿nuži nale naca'?

Na' una Pedro rëbinè' Jesús:

—Luè' naco' ben' Cristo, ben' use'ela' Diuzi.

30 Pero bē Jesús mandado ta nitu nunu yëbiyaquè' nu naquè'.

*Una Jesús ca gaca bē' bagatinè'*

*(Mt. 16.21-28; Lc. 9.22-27)*

31 Na'ra uzulao Jesús rusèdinè' yaca ben' quiè' cabè' gaca quienè' yedza-galaotzeguenè' gatinè' dza zaza'ra. Gudyinè' leyaquè' naquè' bichi yugulu benè', usebi'n yaca ben' gula, len yaca xan' pxuzi, len yaca ben' rusèdi ley quie Moisés lèbè'. Lëscan' gudyinè' leyaquè' gutiyaquè' lèbè', pero huebannè' tatula gaca lao tzona dza.

32 Cana' una Jesús gudyinè' leyaquè'. Na'ra uquiè' Pedro Jesús tzala'la tu neza uzulaonè' rdilanè' Jesús, dan' una Jesús can'.

33 Pero beyëcho Jesús unè'è dyè'èdi yaca ben' quiè', udilè' Pedro rëbinè' lèbè':

—Übiga' tzala'la Satanás. Biraco' pensari quie Diuzi, raco' pensari quie benè'zi.

34 Na'ra guži Jesús yaca ben' quiè' len yaca los demás ben' nita' na', unè' gudyinè' leyaquè':

—Chi nu yaca benè' re'en inao nè'èdi', ruen zi bira inaoyaquè' ca rna pensari quieyaquè'. Ruen zi bidzebiyaquè' inaoyaquè' nè'èdi' yugu dza, ba'ala'cazi ruen žudyi guti yaca benè' leyaquè'.

35 Nu ben' rdzebi inao nè'èdi', dan' rdzebinè' gatinè' tanun quia', bihue' Diuzi lèbè' yela' neban tuzioli. Pero nu ben' inao nè'èdi', birdzebinè' gatinè' tanun quia' len tanun quie xti'idza' Diuzi, hue' Diuzi lèbè' yela' neban tuzioli.

36 ¿Biži gan de quie nu ben' anaca quiè' lao yugulute ta de lao yedyi layu, chi bigata' yela' neban quienè' tuzioli'?

37 ¿Ca gacala dumi re'ennan ta ga'o yaca benè' yela' neban tuzioli'?

38 Chi nu ben' chu'unla'adyi' nè'èdi' yedue'yaquè' hue quieyaquè' can' rnia' zaca'lao lao yaca ben' nita' lao yedyi layu, ben' birue quie xti'idza' Diuzi, ben' rue xquia, lëscan' nè'èdi', bichi yugulu benè', huaru'unla'adya' leyaquè'

cati yeguida' inabi'a lao yedyi layu ca rey. Zeyu'a yela' huaca quie Xuza' Diuzi len yaca ángel naca la'ya quienë'.

## 9

<sup>1</sup> Lëscan' una Jesús rëbinë' leyaquë':

—Tali rnia' le'e, binegati bala le'le nita' niga len në'ëdi' tu binelë'ële ca naca yela' rna'bë' quie Diuzi.

*Cabë' guca bë' betza' cuin Jesús zaca'lao lao yaca ben' quienë'*  
(Mt. 17.1-13; Lc. 9.28-36)

<sup>2</sup> Guca lao xopa dza, uza' Jesús uquië'në' Pedro, len Santiago, len Juan zioyaquë' urëyaquë' lao leda' ga zu tu ya'a ze. Caora badiyaquë' laona, na' bazë Jesús zaca'lao lao yaca ben' quië' cati betza' cuinnë'.

<sup>3</sup> Na' guca žabanë' tu la'ari' bezëri di. Ni tu yaca ben' rguibi la'ari' bisaque'yaquë' quibiyaquë' la'ari' gacan bezëri ca guca žabanë'.

<sup>4</sup> Na' blë'ëyaquë' abdyin Elías len Moisés ru'elëyaquë' Jesús di'idza'.

<sup>5</sup> Na'ra una Pedro rëbinë' Jesús:

—Maestro, tahuen na' nezëndo' lëndo' luë' niga. Ben lato huendo' tzona yu'u dao' de guizi. Huendo' tun quio', itun quie Moisés, itun quie Elías.

<sup>6</sup> Na' bega'n ben' quie Jesús rdzebiyaquë'. Pero dan' unë Pedro na', binezinë' bi në'.

<sup>7</sup> Na'ra bdyin tu beo bdubin leyaquë' gan' nita'yaquë'. Bizi lado beo na' beyaquë' rchi' Diuzi unë' rëbinë' leyaquë':

—Lëzi'ina' niga, lega nedyë'ëda'në'. Ulezënaga cabë' rnanë'.

<sup>8</sup> Caora na' blë'ëyaquë' ituzi Jesús zënë', ganura blë'ëyaquë'.

<sup>9</sup> Na' cati reyëziyaquë' lë'ë ya'a, bë Jesús mandado nitu nunu yëbiyaquë' cabë' blë'ëyaquë' hasta quie gatinë' na' yebannë' lëbë', ben' naca bichi yugulu benë'.

<sup>10</sup> Quie lena' nitu nunu gudiyiyaquë' cabë' blë'ëyaquë' gan', pero bë'yaquë' di'idza' entre lëziyaquë' como dan' biuyoñe'eyaquë' bi na di'idza' quië' caora unë' gatinë' na' yebannë' tatula.

<sup>11</sup> Na' unayaquë' rëbiyaquë' Jesús:

—¿Tabala na' ca ina yaca ben' rusëdi ley quie Moisés de que tanëro ruen zi yeguida Elías, na'tera guida ben' ise'ela' Diuzi?

<sup>12</sup> Na'ra una Jesús rëbinë' leyaquë':

—Tabala na' hueguida Elías tanëro ta yecubinë' yugulute. ¿Quele binezile dan' rna lë'ë guichi la'ya quie Diuzi cabë' gaca quia' në'ëdi', bichi yugulu benë'? Rnën lë'ë guichi na' dan' yedzagalaohua' usaca' yaca benë' në'ëdi' bizinaquezi.

<sup>13</sup> Pero rnia' le'e, babida ben' naca Elías, pero na' psaca'yaquë' lëbë' bizinaquezi laga con ca rna lë'ë guichi la'ya quie Diuzi.

*Beyue Jesús tu bi'byu yu'u bichi be mala*  
(Mt. 17.14-21; Lc. 9.37-43)

<sup>14</sup> Ude beyudyi na', zeza'yaquë' bdyinyaquë' ga nita' yaca los demás ben' quie Jesús. Na' blë'ëyaquë' nita' ben' zë gan'. Na' nita'rë yaca ben' rusëdi ley quie Moisés uyu'uyaquë' huenë len yaca ben' quie Jesús.

<sup>15</sup> Caora blë'ëyaquë' Jesús, bega'nyaquë' bebanziyaquë', uyu'uyaquë' be, bdyinyaquë' ga zë Jesús, gapayaquë' lëbë' diuzi.

<sup>16</sup> Na' una Jesús gudyinë' yaca ben' quië':

—¿Bizi una ben' rusëdi ley quie Moisés uyu'uyaquë' huenë len le'e?

<sup>17</sup> Caora na' una tu ben' zë ga'ala' rëbinë' Jesús:

—Maestro, nequi'a tu zi'ina' byu niga. Yu'ubi' bichi be mala, biraca inëbi', biraca yebi'.

<sup>18</sup> Con gatezi rede yela' hue' xi'ibi' da'abi', rguinlëbi' yu. Bë' debi' layu, rulio rulibibi', rao leibi', raca bdyin' ru'abi'. Dan' raca quiebi' cana', bayëchi' gula raca quiebi'. Aonaba' yaca ben' quio' chi biyebioyaquë' bichi be mala yu'ubi', pero biuzaque'yaquë'.

<sup>19</sup> Na' una Jesús rëbinë' yaca ben' nita' na':

—¡Ay, le'e ben' birale! ¿Bala iza re'ennan yega'nlia' le'e hasta que galele cabë' rnia'? ¿Bala iza re'ennan sueda' sulia' le'e? Uletzexi'bi' guidabi' niga.

<sup>20</sup> Na' yexi'yaquë'bi'. Caora blë'ë bichi be mala Jesús, bë' na' guca quie bi'byu ca žuguti. Na' bgu'umbi' layu, rzizibi', rdulabi', raca bdyin' ru'abi'.

<sup>21</sup> Na' unaba Jesús rëbinë' xuzibi':

—¿Gaca bazio na' ulëna?

Biži unë xuzibi':

—Nenacatebi' xcuidi' ulëna.

<sup>22</sup> Zë lasa babzalan lëbi' lagui', babzalan lëbi' lu'u yao ta udyiagui'n lëbi', pero birzaque'n. Na' chan' gaco' yeyuelo'bi', yeyëchi'la'adyo' nëto' gacalëlo' nëto'.

<sup>23</sup> Na'ra una Jesús gudyinë' lëbë':

—Binao' chan' gaco'. Chi rzudyi'ilëlo' në'ëdi', huaca huelo' yugulute.

<sup>24</sup> Biži na' unë xuzi xcuidi' na' zidzo rëbinë' Jesús:

—Rzudyi'ilia' luë', gacalao' në'ëdi' ta sudyi'ilia' luë' mazara.

<sup>25</sup> Caora blë'ë Jesús bdupa yaca ben' zë ga zënë', na' udilanë' bichi be mala unë rëbinë'n:

—Dyin quio' bire birnë bi' niga. Rnia' luë', bero gan' yu'ulo' na', bira huelao'bi' fatula.

<sup>26</sup> Na' uredyiya' bichi be mala pxizin bi'byu tatula, bega'mbi' debi' ca ben' huati. Lena' una yaca ben' nita' na':

—Bagutibi'.

<sup>27</sup> Na'ra bëxo Jesús na'abi' ta bechisanë'bi', bezubi'.

<sup>28</sup> Ude beyudyi na', caora uyu'u Jesús lënë' yaca ben' quië' lu'u yu'u, na' unayaquë' rëbiyaquë' Jesús:

—¿Bixquien' biuzaque'ndo' yebiondo' bichi be mala?

<sup>29</sup> Na' una Jesús rëbinë' leyaquë':

—Ca naca bichi be mala bebïoga', chi bihue'lële Diuzi di'idza', chi bihuele ubasi, biyerona.

*Tatula una Jesús cabë' gaca quienë' bë' gatinë'*

*(Mt. 17.22-23; Lc. 9.43-45)*

<sup>30</sup> Na' beza' Jesús lënë' yaca ben' quië' zioyaquë' yedeyaquë' estado Galilea. Na' bigu'un Jesús inezi yaca benë' yedeyaquë' gan' na',

<sup>31</sup> dan' ruzioñe'enë' yaca ben' quienë', gudyinë' leyaquë' cabë' gaca quië', ben' naca bichi yugulu benë'. Na'ra gudyinë' leyaquë' usedyin yaca benë' lëbë' lao na'a ben' rnabë' ta gutiyaquë' lëbë', pero gaca lao tzona dza huebannë' tatula.

<sup>32</sup> Pero biuyoñe'e yaca ben' quië' can' unë' gudyinë' leyaquë'. Na' bibeyažoyaquë' inabayaquë' lëbë'.

*Unë Jesús quie ben' nacara belo*

*(Mt. 18.1-5; Lc. 9.46-48)*

<sup>33</sup> Biži bdyin Jesús lënë' yaca ben' quië' ciudad Capernaum tatula, beyu'uyaquë' lu'u yu'u gan' uza'yaquë'. Na' una Jesús rëbinë' yaca ben' quië':

—¿Biži di'idza' ru'elële laguedyile dan' zeza'le huenë cati zeza'ro tu neza?

34 Pero bibequëbiyaquë' bega'nyaquë' chizi dan' zeza'yaquë' rnëyaquë' tu neza quie nula leyaquë' nacara ben' belao.

35 Na' ure' Jesús gudyinë' yaca chipchopa ben' quienë' ta ibiga'yaquë' gan' re'në'. Na' unë' rëbinë' leyaquë':

—Nu le'e re'en gaca ben' belaoa entre le'e, ruen zi gaquë' ben' zenaote quie le'e, ben' gacalë laguedyi.

36 Na'ra guzi Jesús tu xcuidi' bzunë'bi' gatzo la'o gan' nita'yaquë'. Te na' uzi'në'bi' bdyianë'bi' lažibinë' unë' gudyinë' leyaquë':

37 —Nu ben' rzi' tu xcuidi' ca bi' niga lao laohua' në'ëdi', rzi'rënë' në'ëdi'. Na' tu ben' rzi' në'ëdi', quele tuzä' në'ëdi' rzi'në', lëscan' rzi'rënë' ben' pse'ela' në'ëdi'.

*Nu ben' birue condre ra'o, nacacazi quieyaquë' ca quie ben' rnëcule ra'o  
(Lc. 9.49-50; Mt. 10.42)*

38 Na'ra una Juan rëbinë' Jesús:

—Maestro, bablë'ëndo' rda tu benë' rzëtoguë' rnanë' laolo' rebiogüë' bichi be mala yu'u benë'. Na'ra gudyindo'në' bira huenë'n dan' binaquë' tu cue' quiero.

39 Pero una Jesús rëbinë' leyaquë':

—Gabi yëbile nu ben' rue cana', como dan' chi nu yaca benë' rueyaquë' yela' huaca rzëtouyaquë' laohua', quele condre në'ëdi' rnëyaquë'.

40 Nu ben' birue condre ra'o, nacacazi quieyaquë' ca quie ben' rnëcule ra'o.

41 Nutezi ben' gun le'e bi cosa siquiera tu vaso nisa nun quie nacale ben' quia', huaguizücazi Diuzi lëbë'.

*Nacan zudyi gula chi huero xquia  
(Mt. 18.6-9; Lc. 17.1-2)*

42 'Nutezi ben' rudze'yela tu xcuidi' rale quia' ta huebi' xquia, hue Diuzi lëbë' castigo huala gula. Tadya'acala quienë' irio tu yo ze len du luba'në' tzechu'una yaca benë' lëbë' lu'u yao ze, quele ca castigo hue Diuzi lëbë'.

43 Chi rnën le'e huelële na'ale tamala, nacaran dya'a ichugulen tziolo guibá ca ben' nedyipa në'ë, quele ca zu rupa na'ale tziolo gui' gabila ga bireyulan,

44 ga gao bëla benë' tuzioli, bireyula gui'.

45 Lëscan' chi rnën le'e huelële ni'ale tamala, nacaran dya'a ichugurëlen tziolo guibá ca ben' nedyipa ni'e, quele ca zu rupa ni'ale tziolo gui' gabila bireyulan,

46 ga gao bëla benë' tuzioli, bireyula gui'.

47 Lëscan' chi rnën le'e huelële laole tamala, nacaran dya'a cuiolen tziolo guibá ca ben' nero yolaohue, quele ca ta tziolo gui' gabila len rupa la'a yolaole,

48 ga gao bëla benë' tuzioli, bireyula gui'.

49 'Cabë' rudze' benë' zedi' lu'u bë'ëla', cana' udze' Diuzi gui' lu'u benë'.

50 De ga hue zedi' dyin, pero chan' aodyiagui'n, bira huen dyin, ¿bizi huero ta iyacan huen dyin tatula? Quie lena' bigacale ca ben' aodyiagui', ben' birue dyin, mejorla nita'lële laguedyile dyë'ëdi, bitilale.

## 10

*Una Jesús quie ben' rsan laguedyi  
(Mt. 19.1-12; Lc. 16.18)*

1 Na'ra uza' Jesús lënë' yaca ben' quië' ciudad Capernaum zioyaquë' estado Judea, lëscan' zioyaquë' tzala'la yao Jordán. Con ga zioyaquë' redupa yaca benë' gan' zë Jesús. Na' ca modo quie Jesús, bezulaonë' rusëdinë' yaca benë'.

<sup>2</sup> Bizi na' bdyin chopa tzona ben' naca partido fariseo gan' na' ta hueyaquë' trampa quie Jesús iguionë' lao di'idza' quienë'. Quie lena' unabayaquë' lëbë' chi ru'en lato usan yaca benë' nigula quieyaquë'.

<sup>3</sup> Na' una Jesús bequëbinë' leyaquë':

—¿Bi na lë'ë guichi bë Moisés?

<sup>4</sup> Na' unayaquë' rëbiyaquë' lëbë':

—Bë' Moisés lato hue yaca benë' tu guichi ta usanyaquë' nigula quieyaquë'.

<sup>5</sup> Na'ra una Jesús rëbinë' leyaquë':

—Yela' zidi quie yaca benë' bë' Moisés lato usanyaquë' nigula quieyaquë'.

<sup>6</sup> Pero binacan cana' dza na' caora ulëchi Diuzi dyilayu udixonë' yugulu ta de. “Lëdza na' bzaloguë' chopa benë', tu be'mbyu len tu nigula.”

<sup>7</sup> Quie lena' rsan yaca be'mbyu xuzi znë'ë ta rzulënë' nigula quienë'.

<sup>8</sup> Cana' naca quieyaquë' ca quie tuzi benë'. Bira nacayaquë' chopa, dechan' nacayaquë' ca quie tuzi benë'.

<sup>9</sup> Quie lena' bireya'ala' usan yaca benë' laguedyiaquë' como dan' bë Diuzi gacayaquë' tuzi.

<sup>10</sup> Bizi caora bdyin Jesús lënë' yaca ben' quië' lu'u yu'u, na' unabarayaquë' Jesús quie ben' rsan laguedyi.

<sup>11</sup> Na' una Jesús:

—Nu ben' rsan nigula quie, na' rzulënë' nigula tula, nacan xquia quienë' lao Diuzi, bënë' yela' stu' quie nigula quienë'.

<sup>12</sup> Lëscan' chi rsan nigula be'mbyu quienë', na' rzulënë' be'mbyu tula, nacan xquia quienë' lao Diuzi, bënë' yelä' stu' quie be'mbyu quienë'.

*Bëla'iya Jesús yaca xcuidi'*

*(Mt. 19.13-15; Lc. 18.15-17)*

<sup>13</sup> Na'ra bdyin yaca benë' gan' zë Jesús nequië'yaquë' zi'iaquë' ta uda'në' në'ë guichoyacabi' huela'iyane' leyacabi'. Pero udila yaca ben' quie Jesús yaca ben' nequië' zi'ine.

<sup>14</sup> Caora blë'ë Jesús udila yaca ben' quië' leyaquë', na' bdza'në' unë' rëbinë' yaca ben' quië':

—Bidzunle yaca xcuidi'. Guidagarayacabi' ni como dan' ca naca quieyacabi', rue quieyacabi' ca rna xuziyacabi', lëcana' nacarën quie ben' zio rue quie Diuzi.

<sup>15</sup> Tali rnä' le'e, chi nu yaca ben' birue quieyaquë' xti'idza' Diuzi ca rue xcuidi' quie xuzibi', bisaque' yeyoyaquë' guibá gan' zu Diuzi.

<sup>16</sup> Na' bdyia Jesús tu huio xcuidi' lažibinë' bdë'ë në'ë guichoyacabi' bëla'iyane' yuguluyacabi'.

*Tu ben' uña'a bë'lënë' Jesús di'idza'*

*(Mt. 19.16-30; Lc. 18.18-30)*

<sup>17</sup> Na'ra caora beyu'u Jesús neza azeyolënë' yaca ben' quië', na' bdyin tu ben' yuu'u be, uditzu žibinë' lao Jesús unë' rëbinë' lëbë':

—Maestro, ben' huen naco'. Nainao', ¿ca biži reya'ala' hua' ta gata' yelä' neban quia' tuzioli?

<sup>18</sup> Na' una Jesús:

—¿Bixquien' nao' naca' ben' huen? Tahuencazi nao' cana', como tuzi Diuzi naquë' ben' huen.

<sup>19</sup> Luë' banezilo' ca rna lë'ë guichi la'iya quie Diuzi: “Biutilo' nigula quie ben' tula. Bigutio' benë'. Bicuanlo' quie benë'. Bisiu' benë' yë'. Uđapala'n xuzo' len žnao'.”

<sup>20</sup> Na'ra unë ben' na' rëbinë' Jesús:



—Yugulu ca rnao', rue quiecaza'n za'caza' naohua'n desde nacatia' xcuidi'.

<sup>21</sup> Caora na' una' Jesús laohuè' nedyè'ënè' lèbè', unè' rëbinè' lèbè':

—De tu ta nerdzioguelo' huelo'. Bèti' yugulu ta de quio', na' uzi' dumi na', bè' yaca ben' yèchi' len. Cana' gunra Diuzi tažera quio' bè' yedyinlo' guibá. Na' uda unao nè'èdi' gaco' ben' quia'.

<sup>22</sup> Pero cati be ben' na' can' una Jesús, na' bega'nnè' guquenè' beyèchi' gula, como dan' naquè' ben' uña'a huala gula.

<sup>23</sup> Na' una' Jesús yaca ben' quiè' unè' rëbinè' leyaquè':

—Zèdi gula nacan quie ben' uña'a ta yeyoyaquè' guibá gan' zu Diuzi.

<sup>24</sup> Na'ra bebanzi yaca ben' quie Jesús cabè' unè' quie ben' uña'a. Pero tatula unè' rëbinè' leyaquè':

—Bicha', zèdi gula nacan ta yeyo ga zu Diuzi yaca ben' rzudyi'ilè dumi quieyaquè' ta gacalèn leyaquè' yeyoyaquè' guibá.

<sup>25</sup> Nacaran yalo te tu camello naga yèchi', quele ca ta tzu'u ben' uña'a guibá gan' zu Diuzi.

<sup>26</sup> Na' bebanzi yaca ben' quie Jesús unayaquè' rëbiyaquè' laguedyiaquè':

—Chi nacan zèdi gula quie ben' uña'a, ¿nuzi saque' yeyo guibá gan' zu Diuzi?

<sup>27</sup> Na' una' Jesús leyaquè' unè':

—Tu ta bisaque' hue yaca benè', Diuzi sí, huazaque'nè' huenè'n, como dan' raca Diuzi ruenè' yugulute.

<sup>28</sup> Na' una Pedro rëbinè' Jesús:

—Señor, nèto' bapca'nndo' yugulu ta de quiendo' cuenda za'ndo' naondo' luè'.

<sup>29</sup> Na' una Jesús rëbinè' leyaquè':

—Nacan tali can' rnia' le'e. Con nuti'tezi ben' pca'n nu yu'u quieyaquè', nu bichi, nu zane, nu xuzi, nu znè'è, nu žgule, nu ži'line, nu layela quie, nun quie naoyaquè' nè'èdi' rue quieyaquè' xti'idza' Diuzi,

<sup>30</sup> hueyu'era Diuzi tu gayuhua mazara quieyaquè' dza rdayaquè' lao yedyi layu. Hueyu'era Diuzi quieyaquè' nu yu'u, nu bichi, nu zane, nu znè'è, nu ži'line, nu layela quie, ba'ala'cazi rue yaca benè' lèyaquè' bizinaquezi. Lèscan' hue' Diuzi lèyaquè' yela' neban tuzioli bè' bayedyinyaquè' guibá gan' zu Diuzi.

<sup>31</sup> Pero bala ben' naca ben' belao niga lao yedyi layu, bira gacayaquè' ben' belao dza yedyinyaquè' ga zu Diuzi. Lèscan' bala ben' binaca ben' belao niga lao yedyi layu, huacayaquè' ben' belao dza yedyinyaquè' ga zu Diuzi.

### *Una Jesús tatula cabè' gaca bè' gatinè'*

*(Mt. 20.17-19; Lc. 18.31-34)*

<sup>32</sup> Na' bè' beza' Jesús lènè' yaca ben' quiè', zeyu'uyaquè' neza ta yedyinyaquè' ciudad Jerusalén. Na' udyialao Jesús lao yaca ben' quiè'. Na' tu bebanzi yaca ben' quiè' birdzebi Jesús tzionè' ciudad Jerusalén. Na' unao yaca ben' quienè' lèbè' du rdzebiyaquè' bi gaca quieyaquè'. Na' guži Jesús leyaquè' ta tzežeyaquè' lèbè' gudyinè' leyaquè' bi gaca quienè' ciudad Jerusalén.

<sup>33</sup> Cana' una Jesús rëbinè' leyaquè':

—Ulezëcara nagale. Tzioro Jerusalén ga usaca' yaca benè' nè'èdi', ben' naca bichi yugulu benè', tamala. Usedyinyaquè' nè'èdi' lao na'a yaca xan' pxuzi len yaca ben' rusèdi ley quie Moisés. Huachugubè'yaquè' quia' inayaquè' reya'ala' gatia'. Na' usedyinyaquè' nè'èdi' lao na'a yaca ben' uza' yedyi tula.

34 Na' utitu yaca ben' uza' yedyi tula në'ëdi'. Hueyaquë' në'ëdi' zi', uda'yaquë' zen' laohua', gutiyaquë' në'ëdi'. Pero bè' gaca lao tzona dza, huebana' tatula.

*Unaba Santiago len Juan tu cule lao Jesús*

(Mt. 20.20-28)

35 Na'ra Santiago len Juan, ben' ži'i Zebedeo, ubiga'yaquë' ga zë Jesús unayaquë' rëbiyaquë' lëbë':

—Maestro, re'enndo' gunlo' ca ta inabando' luë'.

36 Na' una Jesús rëbinë' leyaquë':

—¿Biži re'enle guna' le'e?

37 Na' unayaquë' rëbiyaquë' Jesús:

—Re'enndo' guno' lato ta cue'ndo' tzala' huio cuëtala'o' ga tzerelo' inabë'lo' lao yedyi layu.

38 Na' una Jesús rëbinë' leyaquë':

—Binezile cabiži inabale guna'. ¿Huazuele sacale cabë' usaca benë' në'ëdi'? ¿Huazuele yedzagalaole cabë' yedzagalaohua'?

39 Na' bequëbiyaquë' rëbiyaquë' Jesús:

—Huazuendo'.

Na' biži una Jesús rëbinë' leyaquë':

—Tali na' ca nale. Usacacazi benë' le'e cabë' usacayaquë' në'ëdi', lëscan' yedzagalaocazile cabë' yedzagalaohua'.

40 Pero bisaque' guna' le'e lato cue'le tzala' huio cuëta' ga tzeri'a como dan' binaca parte quia' guna' le'e lato cue'le cuëta'. Naca parte quie Diuzi hue'në' lato nu ben' cue' cuëta' lë'ëna'.

41 Na'ra cati uneži yaca los demás ben' quie Jesús cabë' unaba Santiago len Juan hue'në' quieyaquë', na' bdza'yaquë' leyaquë'.

42 Pero guži Jesús leyaquë' unë' rëbinë' leyaquë':

—Le'e nezile dyë'ëdi' cabë' rue yaca ben' naca gobierno, rnabë'yaquë' ži'laza. Lega rueyaquë' mandado žëdi ta rue yaca benë'.

43 Pero le'e bireya'ala' huele cana'. Nu le'e re'en gaca ben' že entre le'e, reya'ala' gaquë' ben' gaxo, ben' gacalë laguedyi.

44 Nu le'e re'en gaca ben' belao entre le'e, reya'ala' gaquë' ca quie mozo quiele.

45 Hasta në'ëdi', ben' naca bichi yugulu benë', quele bida' ta gaca yaca benë' ca yaca mozo quia', bida' ta gaca' ca quie mozo quieyaquë'. Lëscan' bida' ta gatia' quizuga' quie xquia quieyaquë' cuenda gata' yelä' neban quieyaquë' tuzioli.

*Byue Jesús ben' laochula, ben' lao Bartimeo*

(Mt. 20.29-34; Lc. 18.35-43)

46 Na' bdyin Jesús lëhë' yaca ben' quië' yedyi Jericó. Caora udeyaquë' yedyi, na' bazëyaquë' ru'a yedyi, caora na' bdupa yaca ben' zë gan' zënë'. Biži cuëta neza ure' tu ben' laochula, ben' lao Bartimeo. Naquë' ži'i Timeo, ure'në' tu neza rnabë' caridad.

47 Na'ra caora benë' baza' Jesús, ben' yedyi Nazaret, uzulaonë' rnënë' židzo rëbinë' Jesús:

—Jesús, ži'i suba rey David, yeyëchi'la'adyo' në'ëdi'!

48 Na' udila yaca benë' lëbë' gudyiyaquë' ta cue'në' chizi, pero unëre' židzora uredyiya'në':

—Ži'i suba rey David, yeyëchi'la'adyo' në'ëdi'.

49 Na' biži uleza Jesús unë' rëbinë' yaca ben' nita' na':

—Uleyëbi ben' na' guidë' ni.

Na' uyoyaquë' yexi'yaquë' lëbë' gudyiyaquë' lëbë':

—Bidzebo', uzuli, ya', como dan' rēzi Jesús luè'.

<sup>50</sup> Na' ulēchonè' gabán quienè', laozulitenè' zionè' ga zè Jesús.

<sup>51</sup> Na'ra una Jesús rēbinè' lēbè':

—¿Bizi re'lenlo' hua' quio'?

Na' una ben' laochula:

—Maestro, re'enda' yeyuelo' laohua'.

<sup>52</sup> Na' una Jesús rēbinè' lēbè':

—Dan' rzudyi'ilēlo' nē'ēdi', quie lena' babeyaca laolo'. Baoca, yeyo.

Bizi caora una Jesús cana', beyaca laohuè' belè'ēnè', ziolēnè' Jesús tu neza.

## 11

### *Cabè' guca bē' uyo Jesús ciudad Jerusalén* (Mt. 21.1-11; Lc. 19.28-40; Jn. 12.12-19)

<sup>1</sup> Na'ra bdyinyaquè' ga zu tu ya'a laonan ya'a Olivos. Baruen bago ta idyinyaquè' ciudad Jerusalén. Lēscan' banacaten ga'ala' len yedyi Betfagé len yedyi Betania. Na' use'ela' Jesús chopa ben' quiè'

<sup>2</sup> unè' rēbinè'yaquè':

—Uletzio yedyi re' ni'. Bè' zaidyinle ru'a yedyi, huadzelele tu burra dao' nerioba' nunu necuia lēba'. Na' ixēdyileba' yequiè'leba' nila. Yeyudyi uhuenta'ba' dyin, natzesanleba'.

<sup>3</sup> Chi inaba yaca benè' le'e bixquien' rexēdyileba', na' yēbilyaquè': Re'en xa'nndo' lēba'. Bè' yeyudyi uhuenè'ba' dyin, cana' idesanndo'ba'.

<sup>4</sup> Na' uza'yaquè' bdyinyaquè' tu neza gan' zè burra dao' nerioba' cuèta ru'a yu'u. Na' pxēdyiyaquè'ba'.

<sup>5</sup> Bizi na' unè yaca ben' nita' bago unayaquè' rēbiyaquè' ben' quie Jesús:

—¿Bixquien' rxēdyile burra dao' na'?

<sup>6</sup> Na'ra bequēbiyaquè' gudyiyaquè' yaca ben' nita' na' cabè' gudyi Jesús leyaquè'. Na'ra psan yaca benè' leyaquè' yequiè'yaquè' burra dao'.

<sup>7</sup> Na' zeza'yaquè' bedyinlēyaquè' ga zè Jesús. Ulēchyaquè' gabán quieyaquè' uxubayaquè'n xcu'udzu burra dao', udyia Jesús lēba'.

<sup>8</sup> Na' uza'yaquè' zioyaquè' uduxu yaca benè' gabán quieyaquè' tu neza ta gapala'nyaquè' lēbè'. Lēscan' uchugo yaca benè' bena yaga dyia la'aga' uduxuyaquè'n tu neza gan' te Jesús.

<sup>9</sup> Na' yaca ben' zenaolēbè' tu neza len yaca ben' udyialao lao len lēbè', uzulaoyaquè' rbedyiyayaquè' unayaquè':

—¡Naca Xuziro Diuzi ben' ze! ¡Ben' la'iya naco', bido' tanun quie Diuzi!

<sup>10</sup> ¡La'iya naca xlato' ta zeza'ra lao xlato xuzixta'oro rey David! ¡Naca Xuziro ben' ze!

<sup>11</sup> Cana' bdyin Jesús ciudad Jerusalén, uyu'unè' lu'u idao' r nabè'ra zu na'. Te beyudyi una'nè' duze cabè' naca na', na' zeza'lēnè' lao chipchopa ben' quienè' zioyaquè' yedyi Betania dan' baza' rdze'.

### *Bdze'de' Jesús yaga higo ta bidyian tazixi* (Mt. 21.18-19)

<sup>12</sup> Na' beteyu zila, beza'nè' Betania ziolēnè' yaca ben' quiè' cati uduenè'.

<sup>13</sup> Na' blē'è Jesús zitu' zu tu yaga higo badyian la'aga'. Na' uyoguè' ta inè'è chi bidyian tazixi. Pero bibi tazixi dyian, puro la'aga' dyian dan' quele tiempo quien.

<sup>14</sup> Na' unè Jesús gudyinè' yaga:

—Desde na'a bira cuialo' tazixi ta gao yaca benè'.

Bizi na' be yaca ben' quiè' cabè' unè' rēbinè' yaga.

*Blaos Jesús yaca ben'yu'u huëti' ru'a idao' rnabë'ra*  
(Mt. 21.12-17; Lc. 19.45-48; Jn. 2.13-22)

15 Na'ra bedyinyaquë' ciudad Jerusalén, uyo Jesús tatula ru'a idao' rnabë'ra, blaohuë' yaca ben'yu'u huëti' gan'. Bzalanë' layu mesa quie yaca ben' ruzta' dumi. Bzalanë' silla que yaca ben' ruti' biu.

16 Bibë' Jesús lato ta te yaca benë' len yua' quieyaquë' ru'a idao' rnabë'ra na'.

17 Na' una Jesús rëbinë' yaca ben'yu'u huëti':

—Lë'ë guichi la'ya quie Diuzi rnan cani: “Lu'u idao' rnabë'ra ni nacan ga ulidza ben' quie yugulu nación Diuzi.” Pero le'e aptza'len ruelen ca quie beló ga yu'u ben' uban.

18 Na' yeguedyi yaca benë' yaca xan' xuzi len yaca ben' rusëdi ley quie Moisés cabë' bë Jesús quie yaca ben'yu'u huëti' ru'a idao' rnabë'ra. Na' uzulaoyaquë' regulola'adyi'yaquë' bi hueyaquë' ta gutiyaquë' Jesús, dan' rdzebiyaquë' lëbë' nun quie raxe yaca benë' ca na Jesús rusëdinë' leyaquë'.

19 Na' baoya' dza, zeza' Jesús ziolënë' yaca ben' quië' zeyoyaquë' Betania.

*Ca guca quie yaga higo aobidyin*  
(Mt. 21.20-22)

20 Caora uyenì' dza tula, beza'yaquë' uyu'uyaquë' neza blë'ëyaquë' aobidyin yaga higo lente lue quien.

21 Na' beza'la'adyi' Pedro cabë' una Jesús quie yaga higo, na' unë' rëbinë' Jesús:

—Maestro, una'cara, aobidyin yaga higo bdze'de'lo'.

22 Na' una Jesús rëbinë' leyaquë':

—Sudyi'ilële Diuzi.

23 Tali rnia' le'e, con nutezi ben' yëbi ya'a niga: “Beyo, yeyu'u lu'u nisadao'”, na' chi du guicho du la'adyi'yaquë' rzudyi'ilëyaquë' Diuzi, huenë' ca yëbiyaquë' ya'a, na'ra huaca quie ya'a ca yëbiyaquë'n.

24 Quie lena' rnia' le'e, cati hue'lële Diuzi di'idza' ta inabalenë' bi cosa, chi rzudyi'ilële Diuzi du guicho du la'adyi'le gun Diuzi ca ta inabalenë', na'ra guncazinë'.

25 Lëscan' cati hue'lële Diuzi di'idza', chi nede tu tamala bë yaca benë' quiele, yezi'zele quieyaquë'. Cana' huezi'zerë Xuziro Diuzi zu guibá dula' xquia quiele.

26 Pero chi biyezi'zele quieyaquë', lëscan' biyezi'ze Xuziro Diuzi zu guibá dula' xquia quiele.

*Unabayaquë' Jesús nu ben yela' rnabë' quienë'*  
(Mt. 21.23-27; Lc. 20.1-8)

27 Na'ra beza'yaquë' zioyaquë' bedyinyaquë' ciudad Jerusalén tatula. Na' caora uyu'u Jesús lu'u idao' rnabë'ra rdanë' na', caora na' bdyin yaca xan' pxuzi len yaca ben' rusëdi ley quie Moisés ga rdë'.

28 Na' unayaquë' rëbiyaquë' Jesús:

—Una nëto', ¿nu ben yela' rnabë' quio', dan' bablaolo' ben'yu'u huëti' lu'u idao' rnabë'ra?

29 Na' una Jesús gudyinë' leyaquë':

—Lëscan' re'enda' inaba' le'e tu di'idza'. Chi yeqüëbile ta inaba' le'e, na' inia' le'e nu ben yela' rnabë' quia' dan' bia' cana'.

30 Na' inaba' le'e: ¿Nu'zi use'ela' Juan ta bë'në' lao yaca benë'? ¿Use'ela' Diuzi lëbë' o ta racazi la'adyi'në' bidë'?

<sup>31</sup> Na'ra uzulaoyaquë' rtzaloyaquë' ru'elëyaquë' laguediyaquë' di'idza' nayaquë':

—¿Cabizi yëbironë'? Chan' yëbironë': “Diuzi use'elë' lëbë'”, tana' huanë' ra'o: “¿Bixquien' bigulele quienë'?”

<sup>32</sup> Pero bisaque' yëbironë': “Ta racazi la'adyi'në' bidë'.”

Na' bdzebiyaquë' yëbiyaquë' Jesús can', como dan' neziyaquë' huadza' yaca benë' leyaquë' nun quie rna yaca benë' naca Juan ben' use'ela' Diuzi, ben' rguixogue' xti'idzë'.

<sup>33</sup> Quie lena' unayaquë' rëbiyaquë' Jesús:

—Binezindo'.

Na'ra una Jesús rëbinë' leyaquë':

—Lëscan' në'ëdi', biinia' le'e nu ben yela' r nabë' quia', dan' bablaohua' ben' yu'u huëti' lu'u idao' r nabë'ra.

## 12

*Bzu Jesús tu di'idza' quie yaca ben' hue dyin, yaca ben' mala*

(Mt. 21.33-46; Lc. 20.9-19)

<sup>1</sup> Na'ra una Jesús di'idza' ni rëbinë' benë':

—Uzu tu ben' guza bedzuli' layela quienë'. Lëscan' psioguë'n ulëchinë'n corale, udixonë' tu yo laga' ga usinë' nisa bedzuli'. Lëscan' bënë' tu yu'u de yo ga cuia benë' ta gapayaquë' bedzuli' quienë'.

'Na'ra bënë'n lao na'a yaca benë' naca ladyinë'ë, uza'në' zioguë' zitu'.

<sup>2</sup> Bizi cati bdyin biu' quie usecho quie bedzuli', na' bese'ela' xan' layela tu ben' zu laohuë' ta tzenabanë' tu ta redu'ulanë' si'në' quie bedzuli' quienë'.

<sup>3</sup> Pero bela'cala bë'yaquë' zi' ben' use'ela' xa'nyaquë'. Na' beza'në' gabi zeyu'anë'.

<sup>4</sup> Na'ra bese'ela' ben' xan' layela ben' tula zioguë'. Pero lagazi udiyaquë' lëbë' yo, bë'yaquë' guicho ben' na' zi', ptasi bnioyaquë' lëbë'.

<sup>5</sup> Na' bizi bese'ela' xan' layela ben' tula zioguë', pero bëtiyaquë' lënë'. Te na' bese'ela' xan' layela ben' zë, uyo tu huio tu huioyaquë'. Con bala ben' use'ela' xan' layela bë'yaquë' zi', ibalayaquë' bëtiyaquë'.

<sup>6</sup> 'Bizi ga beyudyicala uzu tu zi'i xan' layela, lega nedyë'ënë' lëbë'. Na' use'elë' zi'inë' unë': “Decazide gapala'nyaquë' zi'ina'.”

<sup>7</sup> Pero bë' blë'ë yaca ben' naca ladyinë'ë layela babbyin zi'i xa'nyaquë', na'ra unayaquë' rëbiyaquë' laguediyaquë': “Bi' niga, gaca quiebi' layu niga cati bagati xuzibi'. Uletza' gutirobi' cuenda si'ro layu niga gacan quiero.”

<sup>8</sup> Na' bëxoyaquë'bi' bëtiyaquë'bi', ulioyaquë'bi' gan' de layela.

<sup>9</sup> Na'ra unaba Jesús yaca benë' nita' na' unë':

—¿Cabizi reya'ala' hue ben' naca xan' layela? Decazide huedyinnë' gan' de layela quienë' ta gutinë' yaca ben' nu'enë' ladyinë'ë, hue'në' yaca ben' tula gaca ladyina'ayaquë' layela quienë'.

<sup>10</sup> Lëscan' una Jesús rëbinë' leyaquë':

—¿Binena'le ca rnën lë'ë guichi quie Diuzi? Cani rnën:

Yo laga' ta baoru'un yaca ben' hue huecua', lëyo na' besi' Diuzi bzunë'n ga naca belao, ga rzulao bezu.

<sup>11</sup> Cana' bë Diuzi.

Nacan tadya'a gula.

Nacan zi' ta yebanziro.

<sup>12</sup> Na'ra gu'unyaquë' guxuyaquë' Jesús udze'yaquë' lëbë' lu'u dyiguiba como dan' gucabë'yaquë' unë Jesús di'idza' na' condre leyaquë'. Pero

como dan' bdzebiyaquë' bi hue yaca benë' quieyaquë', psanyaquë' quienë', beza'yaquë' zeyoyaquë'.

*Unabayaquë' Jesús ca naca quie impuesto*

(Mt. 22.15-22; Lc. 20. 20-26)

<sup>13</sup> Ude beyudyi na', use'ela'yaquë' chopa tzona ben' naca partido fariseo len ichopa tzona ben' naca partido quie rey Herodes ta tzenabayaquë' Jesús di'idza' ta hueyaquë' trampa quienë' chi biguinonë' lao di'idza' quienë' ta saque' gaoyaquë' lëbë' xquia.

<sup>14</sup> Quie lena' bdyinyaquë' gan' zë Jesús unayaquë' rëbiyaquë' lëbë':

—Maestro, banezindo' luë' rusëdio' yaca benë' di'idza' naca li. Na' biru' cuenda bi naque yaca benë' sino rusëdio' leyaquë' tali xneza Diuzi. Unacara nëto': ¿Ru'en lato quizoro quie impuesto quie ben' naca gobierno romano? ¿Reya'ala' quizoron o chi bireya'ala' quizoron?

<sup>15</sup> Pero gucabë' Jesús ca naca pensari mala yu'uyaquë' birueyaquë' ca rnayaquë'. Na' unë' rëbinë' leyaquë':

—¿Bixquien' re'enle cuëchile trampa quia'? Uletzexi' tu dumi plata ta ina'a.

<sup>16</sup> Na'ra yexi'yaquë' tu dumi plata. Na' caora blë'në'n, unë' rëbinë' leyaquë':

—¿Nu guicho, nu laohue da' lë'në'n?

Na' bequëbiyaquë' unayaquë' Jesús:

—Da' lë'në'n guicho laohue ben' naca gobierno quie ben' romano.

<sup>17</sup> Na'ra una Jesús rëbinë' leyaquë':

—Ulehue' ben' naca gobierno fa redu'ulanë' si'në'. Lëscan' ulehue' Diuzi ta redu'ulanë' si'në'.

Na' tu bebanziyaquë' can' unë'.

*Unabayaquë' Jesús quie ben' baguti beban*

(Mt. 22.23-33; Lc. 20.27-40)

<sup>18</sup> Tana' uyorë' yaca ben' partido Saduceo gan' zë Jesús. Na' leyaquë' rnayaquë' biyeban yaca ben' baguti. Quie lena' unayaquë' rëbiyaquë' Jesús:

<sup>19</sup> —Maestro, ca naca di'idza' bzu Moisés lë'ë guichi, rnën chi baguti tu be'mbyu, na' bega'n žgulanë' tu cuinzë', nunu ži'iyaquë' uzu, reya'ala' yezi' bichinë' nigula quie ben' baguti tacuenda yezu xcuidi' yezi' lao ben' baguti.

<sup>20</sup> Na' ugunro guca gadyi bichiyaquë'. Na' ben' nëro uzi'në' nigula quienë'. Pero ni tu ži'iyaquë' biuzu gutinë'.

<sup>21</sup> Na' biži ben' urupe bezi'në' nigula quie ben' bichinë', ben' baguti. Lëzi gutirënë', nunu ži'iyaquë' uzurë. Na' biži ben' uyune bezi'rënë' nigula quie ben' bichinë', ben' baguti. Lëzirë gutirënë' nunu ži'iyaquë' uzurë.

<sup>22</sup> Cana' guca quie lao gadyityaquë', yaca ben' uzulë nigula. Gabeyudyi-cala quie nigula gutirënë'.

<sup>23</sup> Na'ra chi tali na' yeban yaca ben' huati, ¿ca nurlayaquë' naca žgulayaquë' nigula na', como dan' lao gadyi bichiyaquë' uzulëyaquë' lëbë'?

<sup>24</sup> Na' bequëbi Jesús rëbinë' leyaquë':

—Lega nequixile como dan' binezile cabë' rnën lë'ë guichi la'iya quie Diuzi. Lëscan' binezile cabë' naca yela' huaca quie Diuzi.

<sup>25</sup> Cati babeban yaca ben' baguti, na' bira sulëyaquë' laguediyayaquë' ca žgulayaquë', ca xquiuyaquë'. Gaca quieyaquë' ca quie yaca ángel quie Diuzi, ben' yu'uyaca guibá.

<sup>26</sup> Pero quie ben' baguti yeban, žbinelabale lë'ë guichi la'iya quie Diuzi cabë' gudyi Diuzi Moisés dza na' caora uzë Moisés gan' re' yaga ra'ala' gui' birena? Lëgan' na' una Diuzi rëbinë' Moisés: “Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob.”

<sup>27</sup> Cana' una Diuzi gudyiné' leyaquë', ba'ala'cazi bagutiyaquë' azio zë iza caora. Lena' rulu'en rlë'ë Diuzi leyaquë' ca ben' neneban, quele ca ben' baguti. Tana' lena' lega nequixile.

*Una Jesús quie tu mandamiento r nabë'ra*

(Mt. 22.34-40)

<sup>28</sup> Na'ra bdyinrë tu ben' rusëdi ley quie Moisés. Dyë'ëdi babenë' cabë' di'idza' bequëbi Jesús yaca benë'. Na' como nezinë' dyë'ëdi requëbi Jesús bi pregunta rnaba yaca benë', unë' rëbinë' lëbë':

—¿Ca nurla mandamiento r nabë'ran ra'o hue quiero len?

<sup>29</sup> Na' una Jesús rëbinë' lëbë':

—Cani naca mandamiento r nabë'ran ra'o: “Ulezëcara nagale, le'e ben' Israel. Tuzi Diuzi quiero zu, ganura Diuzi tula zu.

<sup>30</sup> Reya'ala' idyë'ëro Diuzi quiero du guicho du la'adyi'ro.” Lena' naca mandamiento r nabë'ran ra'o.

<sup>31</sup> Lëscan' derë itu mandamiento nacan belao reya'ala' hue quiero. Cani rnën: “Reya'ala' idyë'ëro laguedyiro cabë' nedyë'ëro cuinro.” Tuzi len naca mandamiento r nabë'ra quiero, hue quiero len.

<sup>32</sup> Na'ra una ben' rusëdi ley quie Moisés rëbinë' Jesús:

—Tahuen gula na' cabë' unao', Maestro. Nacan tali unao' tuzi Diuzi zu, ganura Diuzi tula zu.

<sup>33</sup> Lëscan' zaca'ran lao Diuzi idyë'ëronë' du guicho du la'adyi'ro, lëscan' idyë'ëro laguedyiro ca nedyë'ëro cuinro. Lena' zaca'ran lao Diuzi quele ca yaca bia rutiro ruzeiro ru'aba ta hue'roba' Diuzi.

<sup>34</sup> Na'ra caora be Jesús cabë' di'idza' dya'a una ben' na', na' unë' rëbinë' lëbë':

—Ilë'ti'zi nerdzioguelo' gaco' ben' tzu'u guibá ga r nabë' Diuzi.

Na'ra nitu yaca ben' nita' na' beyažoyaquë' inabayaquë' lëbë' di'idza' mazara.

*Naca ben' Cristo Señor quie rey David*

(Mt. 22.41-46; Lc. 20.41-44)

<sup>35</sup> Na'ra rusëdi Jesús yaca ben' bdupa lu'u idao' r nabë'ra, unë' rëbinë' leyaquë':

—¿Ca bizi ina yaca ben' rusëdi ley quie Moisés, como nayaquë' naca Cristo zi'isuba rey David?

<sup>36</sup> Porque cuin rey David, du yu'unë' Bichi Be quie Diuzi, unë' cani:

Una Diuzi rëbinë' ben' naca Señor quia': “Ure' cuëta' zaquë' yebë niga hasta idyin dza cuëcha' xni'alo' yaca ben' rudie luë'.”

<sup>37</sup> Quie lena' rnaba' le'e, ¿cómo naca Cristo zi'isuba rey David, chi cuin rey David unë' naca Cristo Señor quienë'?

Bizi lega redaohue yaca benë' can' una Jesús.

*Udao Jesús xquia yaca ben' rusëdi ley quie Moisés*

(Mt. 23.1-36; Lc. 11.37-54; 20.45-47)

<sup>38</sup> Na'ra ca rusëdi Jesús yaca benë', unë' rëbinë' leyaquë':

—Gapale cuidado bihuele ca rue yaca ben' rusëdi ley quie Moisés. Lega rexeyaquë' la'ari' naca tona. Lega rexeyaquë' gapala'n yaca benë' leyaquë' ga rdayaquë' tu neza.

<sup>39</sup> Lega rexeyaquë' cue'yaquë' ga rbe' ben' bala'ana chi lu'u idao' sinagoga, chi ga raca lani.

<sup>40</sup> Zidza rulidzayaquë' Diuzi cuenda ilë'ë yaca benë' leyaquë' ben' quie Diuzi, pero bë' rueziyaquë' dan' regulola'adyi'yaquë' bi hueyaquë' ta

cubayaquë' ta de quie yaca nigula baguti xquiuhue. Quie lena' huera Diuzi leyaquë' tu castigo huala gula.

*Una Jesús quie tu nigula guti xquiuhue bdze'në' gun quie idao' (Lc. 21.1-4)*

<sup>41</sup> Na' guca tu dza zë Jesús lu'u idao' r nabë'ra blë'ënë' rudze' yaca benë' dumi quieyaquë' lu'u caja ga yu'un gun quie idao'. Blë'ënë' rudze' zë ben' uña'a yalao dumi lu'u caja na'.

<sup>42</sup> Lëscan' blë'ënë' bdze' tu nigula guti xquiuhue chopo dumi dao' lasi de cobre ta zaca'n ledao'zi lu'u caja na'.

<sup>43</sup> Na'ra guzi Jesús yaca ben' quië', unë' gudyinë' leyaquë':

—Tali rnia' le'e, nigula na' naquë' ben' yëchi' gula, aguti xquiuhue', pero ca naca dumi bdze'në' lu'u caja, nacaran dumi ze quele ca ta bdze' yaca ben' uña'a.

<sup>44</sup> Ta bega'nnan sobre quieyaquë' bdze'yaquë' lu'u caja na'. Pero lëngula ben' yëchi', bdze'në' ca tu dumi dao' dezi quienë' ta ra'onë' ta raonë'.

## 13

*Una Jesús huabiagui' idao' r nabë'ra (Mt. 24.1-2; Lc. 21.5-6)*

<sup>1</sup> Na'ra cati bro Jesús lu'u idao' r nabë'ra, unë' tu ben' quienë' rëbinë' lëbë': —¡Maestro, una' ca naca badan yo necua' besu, una' ca naca badan idao' r nabë'ra.

<sup>2</sup> Pero na' una Jesús rëbinë' lëbë':

—Bablë'ëlo' ca re' idao' r nabë'ra niga nacan taže. Pero huadyin dza ni tu yo bira yega'nnan lao laguedyin, huabiagui' dužeten.

*Ga ru'en di'idza' cabë' gaca cati baruen bago iyudyi dyilayu (Mt. 24.3-28; Lc. 21.7-24; 17.22-24)*

<sup>3</sup> Na'ra uza'yaquë' zioyaquë' ga zu ya'a Olivos tzala' berobayu gan' re' idao' r nabë'ra. Biži na' caora ure' Jesús gan', bebiga' Pedro, len Santiago, len Juan, len Andrés, beroyaquë' tzala'la len Jesús unayaquë' rëbiyaquë' lëbë':

<sup>4</sup> —Re'enndo' inao' nëto' bata gaca can' unao'. ¿Cabizi seña gata' cati baruen bago iyudyi yedyi layu?

<sup>5</sup> Na' una Jesús rëbinë' leyaquë':

—Gapale cuidado tacuenda nunu si' le'e yë',

<sup>6</sup> porque huida ben' zë inayaquë' nun quia' bidayaquë', inayaquë' nacayaquë' Cristo, pero yë' rzi'yaquë'.

<sup>7</sup> Pero cati rele rna yaca benë' raca dila yaca yedyi len yaca yedyi tula, rnayaquë' ruen žudyi gaca dila mazara yedyi, biidzebile, porque re'en ca re'ena gacan can', pero nezura ta gaca tu bineyudyi yedyi layu.

<sup>8</sup> Huadila yaca yedyi conlë yaca yedyi tula, huadila yaca gobierno conlë yaca gobierno tula. Gaca užu' ni'nila. Lëzi huata' ubin, huata' zëdi lao yedyi layu. Pero cala beyudyi na' ta yedzagalao yaca benë', dechan' uzulaozin na' cabë' ta yedzagalaoyaquë'.

<sup>9</sup> Gapale cuidado porque usedyin yaca benë' le'e lao na'a yaca ben' r nabë', lëscan' huaguiaquë' le'e lu'u yaca idao' sinagoga. Usedyinyaquë' le'e lao yaca ben' naca gobernador, len lao yaca ben' naca rey ta uquëpiyaquë' le'e dan' naole hue quiele xti'idza'. Cana' huaguixogue' leyaquë' xti'idza' Diuzi tanun quia' në'ëdi'.

<sup>10</sup> Zayeyudyi quie yedyi layu, huaguixogue' yaca benë' xti'idza' Diuzi duže yedyi layu.



11 Lëscan' cati tzehua'ayaquë' le'e lao na'a yaca ben' r nabë', bidëbile quie bizi dan' yëbilyaquë', ni siquiera bihuele pensari. Yëbilyaquë' ca di'idza' udze' Diuzi guichole lëhora na', porque quele le'e cuinle inële, dechan' Bichi Be quie Diuzi gunnë' ta yeyëbilyaquë'.

12 Lëscan' usedyin benë' hasta bi' bichiyaquë' lao na'a yaca ben' r nabë' ta gutiyaquë' leyaquë'. Lëzi usedyin benë' ži'iyaquë' lao na'a ben' r nabë', hasta usedyin yaca xcuidi' xuzi žna'yaquë' cuenda guti yaca ben' r nabë' leyaquë'.

13 Huadie yaca ben' nita' lao yedyi layu le'e, dan' naole xneza'. Pero nu ben' nao në'ëdi' du guicho du la'adyi', ben' biusan në'ëdi' hasta dza gatië', huata' yela' neban quienë' tuzioli.

14 'Bzu profeta Daniel di'idza' lë'ë guichi dza tiempote rguixogue'n quie ta naca bayatza gula, ta rudiyagui' benë'. (Reya'ala' tziõe'e nu ben' rulaba di'idza' ni.) Caora ilë'ële badyian ga bireya'ala' cuian, na' racate baguin izuno yaca ben' nita' estado Judea tziyoaquë' ga zu ya'a.

15 Lëscan' lëdza na', chi nita' yaca benë' lali'a quie yu'u quieyaquë', bireya'ala' yeyu'uyaquë' lu'u yu'u ta si'yaquë' bi cosa quieyaquë', reya'ala' laižunoteyaquë'.

16 Lëzi chi nita' yaca benë' layela quieyaquë' rueyaquë' dyin, bireya'ala' yeyoyaquë' žan yu'u ta si'yaquë' ni žabayaquë', reya'ala' laižunoteyaquë'.

17 Gaca beyëchi' gula quie yaca nigula nu'a ži'ine len yaca nigula ruga'adyi ži'ine dza gaca can' rnia'.

18 Ulidzale Diuzi ta bigaca quiele izunole biu' zaga.

19 Cana' rnia' como dan' baza' dza lega huala gula yedzagalao yaca benë'. Na' yedzagalaorayaquë' quele ca yaca los demás benë'. Desde ulëchi Diuzi dyilayu, bibedzagalao yaca benë' cabë' yedzagalao yaca ben' nita' dza yedyi yedu quie yedyi layu.

20 Chi bihue Diuzi uchugunë' dza yedzagalaoyaquë', ni tuyaquë' bisueyaquë', huabiagui' yuguluyaquë'. Pero huachugu Diuzi dza na' nun quie nedyë'ënë' yaca ben' quienë', ben' uliogüë' gaca ben' quienë'.

21 'Chi ina yaca benë' rëbiyaquë' le'e: "Ulena'cara, ni zu Cristo", o "Ulena'cara, na' zu Cristo", bigalele quieyaquë'.

22 Huida yaca ben' huizi' yë' inayaquë' nacayaquë' Cristo, inayaquë' nacayaquë' ben' rguixogue' xti'idza' Diuzi. Hueyaquë' milagro, hueyaquë' seña tacuenda si'yaquë' yë' hasta yaca ben' ulio Diuzi.

23 Pero le'e, ulehue listo. Lena' baonia' le'e ca ta binegaca quiele cuenda inezile sule listo.

*Cabë' gaca bë' yeguida Jesús, ben' naca bichi yugulu benë'*  
(Mt. 24.29-35, 42-44; Lc. 21. 25-36)

24 'Pero lëdza na', cati beyudyi bedzagalaotzegue yaca benë', huechula obidza bira gata' xni' quie te dza, lëscan' huechula biu' bira gata' xni' biu'.

25 Lëscan' huaguinu yaca beló dyian guibá. Huazisi yugulu ta dyia guibá huaguinun.

26 Na'ra hualë'ë yaca benë' në'ëdi', bichi yugulu benë'. Hualë'ëyaquë' yeguida' lao beo zë ladza, zeyu'a yela' huaca quia'.

27 Na' ise'ela' yaca ángel quia' ta tzetupayaquë' yaca ben' quia', yaca ben' ulioga', la'acazi nita'yaquë' zitu' lao yedyi layu, la'acazi nita'yaquë' zitu' guibá —Cana' una Jesús.

28 Lëscan' una Jesús rëbinë' leyaquë':

—Ulehue pensari cabë' naca quie yaga higo. Caora badyia benue len la'aga' cubi quien, banezile baza' biu' yo.

<sup>29</sup> Lëscan' caora rlë'ële baraca lao yedyi layu cabë' rnia' le'e niga, huanezile baza' bago dza yeyudyi dyilayu, ilë'ëti'zi rdziogue.

<sup>30</sup> Tali rnia' le'e, tu bineya zi'i suba ben' nita' na'a bë' gaca cabë' baonia' le'e.

<sup>31</sup> Huade quie ta dyia guibá len lao yedyi layu cana'zi, pero ca naca di'idza' rnia', biten cana'zi. Decazide gacan.

<sup>32</sup> Pero ca bi hora, ca bi dza yeguida' tatula, nitu nunu nezi. Binezi yaca ángel zu guibá, binezi ni siquieria në'ëdi', zi'i Diuzi. Tuzi Xuza' Diuzi nezinë' bë' gaca yeguida' tatula.

<sup>33</sup> Quie lena' ulesu listo, gapale cuidado, uleulidza Diuzi yugu dza como dan' binezile bë' yeguida' lao yedyi layu.

<sup>34</sup> Banaca quia' ca quie tu ben' uza' zio zitu'. Caora binetzionë', rca'nnë' mozo quië' žan yu'u quië' ta gapayaquë' ta de quienë', bë'në' bi dyin hueyaquë'. Lëscan' pca'nnë' tu mozo fa së' cuëta ru'a yu'u ta cuezë' bë' yela'në'.

<sup>35</sup> Ulesu listo como dan' binezile bë' yeguida' tatula. Binezile chi yeguida' zadzë', chi yeguida' du gatzo yela, chi yeguida' cati rbedyi biu, chi yeguida' du zila.

<sup>36</sup> Gapale cuidado ta sule puesto caora yeguida'.

<sup>37</sup> Ca ta rnia' le'e, lëscan' rnëria' yugulu benë': Ulesu listo.

## 14

### *Beguilola'adyi'yaquë' bi hueyaquë' ta gutiyaquë' Jesús (Mt. 26.1-5; Lc. 22.1-2; Jn. 11.45-53)*

<sup>1</sup> Na'ra ichopa dza gala' lani pascua cati gaoyaquë' yëta xtila binequixi levadura. Na' beguilola'adyi' yaca xan' pxuzi len yaca ben' rusëdi ley quie Moisés bi hueyaquë' ta guxuyaquë' Jesús balarazi gutiyaquë' lëbë'.

<sup>2</sup> Na' unayaquë' rëbiyaquë' laguedyiaquë':

—Biguxuro Jesús tu raca lani cuenda na' biidza' yaca ben' yedyi bitiläyaquë' ra'o.

### *Bdze' tu nigula aceite rla' zixi žeo guicho Jesús (Mt. 26.6-13; Jn. 12.1-8)*

<sup>3</sup> Na'ra caora bedyin Jesús lënë' yaca ben' quië' yedyi Betania, na' uyu'unë' lidyí tu ben' lao Simón, ben' yu'u yela' hue' ca pindo. Biži caora bare'yaquë' lao mesa gaoyaquë', bdyin tu nigula nu'ë frasco de yo laona alabastro. Lu'u frasco na' nedza'n tubelaozi aceite rla' zixi žeo laonan nardo. Na' aceite na' ruhueyaquë'n dyin rla'oyaquë'n yaca ben' huati. Na' ula' nigula frasco na' blatoguë' aceite guicho Jesús.

<sup>4</sup> Na' bala ben' re' na' bdza'yaquë' unayaquë' rëbiyaquë' laguedyiaquë':

—¿Bixquien' bedito nigula ni aceite?

<sup>5</sup> Mejorla chi bëti'në'n como dan' zaca'n tzona gayuhua dumi denario tacuenda si'në' dumi hue'në'n yaca ben' yëchi'.

Na' udilayaquë' nigula na'.

<sup>6</sup> Pero na' una Jesús rëbinë' leyaquë':

—Ulesan quie nigula. ¿Bixquien' ruelëlenë' zëdi? Tadya'a gula babënë' quia'.

<sup>7</sup> Nita'cazi yaca ben' yëchi' conlë le'e yugu dza. Con batatezi re'enle, huaca gacälële leyaquë'. Pero në'ëdi' bisua' len le'e tuzioli.

<sup>8</sup> Ca ta huaca hue nigula ni, cana' bënë' quia'. Badyialaonë' blatoguë' aceite rla' zixi žeo cuerpo quia' quie dza gatia' igacha'.

<sup>9</sup> Tali rnia' le'e, con gatatezi rguixogue' yaca benë' xti'idza' Diuzi duže yedyi layu, huanëyaquë' cabë' bē nigula ni para nē'ēdi', cana' yeza'la'adyi' yaca benë' cabë' bēnē' quia'.

*Bega'nlē Judas di'idza' lenyaca xan' pxuzi ta usedyinnē' Jesús lao na'ayaquë' (Mt. 26.14-16; Lc. 22. 3-6)*

<sup>10</sup> Na'ra uyo Judas Escariote yegue'lēnē' yaca xan' pxuzi di'idza' cuenda yega'nlēnē' leyaquë' di'idza' ta usedyinnē' Jesús lao na'ayaquë'. Na' naca Judas ben' quie Jesús entre chipchopa ben' naca ben' quienē'.

<sup>11</sup> Na' lega bedaohue yaca xan' pxuzi cabë' gudyi Judas leyaquë'. Bega'nlēyaquë' lēbē' di'idza' ta hue'yaquë' lēbē' dumi. Na'ra uzulao Judas beguilola'adyi'nē' bi huenē' usedyinnē' Jesús lao na'a yaca xan' pxuzi.

*Udaoyaquë' rtze' quie lani pascua (Mt. 26.17-29; Lc. 22.7-23; Jn. 13.21-30; 1 Co. 11.23-26)*

<sup>12</sup> Bizi dza nēro quie lani pascua udaoyaquë' yēta xtila binequixi levadura, bētiyaquë' tu beco' zī'ila' ta beza'la'adyi'yaquë' ca guca quie xuzixta'oyaquë' dza uza'yaquë' nación Egipto. Lēdza na' una yaca ben' quie Jesús rēbiyaquë' lēbē':

—¿Gaži re'enlo' tziondo' tzaquendo' ta gaoro rtze' quie lani pascua?

<sup>13</sup> Na'ra use'ela' Jesús chopa ben' quienē' gudyinē' leyaquë':

—Uleyo ciudad Jerusalén. Bē' baidyinle hualē'ēle tu be'mbyu zeyu'a tu re'e yudzon nisa. Lēben' na' reya'ala' inaole.

<sup>14</sup> Cati babeyu'unē' lu'u yu'u, reya'ala' yēbile xan' yu'u ga beyu'unē': “Cani una Maestro: ¿Gaži zu lu'u cuarto ga gaolēnē' yaca ben' quiē' rtze' quie lani pascua?”

<sup>15</sup> Na'ra hualu'e xan' yu'u le'e tu lu'u cuarto naca chopa xcuia. Lēgan' na' tzaquele ta gaoro.

<sup>16</sup> Na' uza' chopa ben' quie Jesús zioyaquë' ciudad Jerusalén. Caora bedyinyaquë' guca quieyaquë' laga ca gudyi Jesús leyaquë' gaca. Na' tu lu'u cuarto na' bēyaquë' ta gaoyaquë' rtze' quie lani pascua.

<sup>17</sup> Caora bagula, bedyin Jesús lēnē' yaca ben' quiē' gan' gaoyaquë'.

<sup>18</sup> Na' cati baore'yaquë' ta gaoyaquë', una Jesús rēbinē' yaca ben' quiē':

—Tali rnia' le'e, ladoro ni re' tu ben' raoléro tuže, ben' usedyin nē'ēdi' lao na'a yaca ben' r nabē'.

<sup>19</sup> Bizi uzulao raqueyēchi'yaquë' uzulaoyaquë' r nabayaquë' tu huioyaquë' lēbē':

—¿Quele nē'ēdi' hua' cabë' nao' na'?

<sup>20</sup> Na' una Jesús rēbinē' leyaquë':

—Entre lao chipchopale niga, huario tu ben' laguedyiro hue can' rnia'. Tzaže rudyilēnē' nē'ēdi' yēta xtila lu'u plato niga.

<sup>21</sup> Pues cani gaca quia' nē'ēdi', bichi yugulu benē', decazide gaca quia' cabë' na lē'ē guichi la'iya quie Diuzi. Pero bayēchi' gula gaca quie ben' usedyin nē'ēdi' lao na'a ben' r nabē'. Nacaran dya'a quienē' chi bigolocalanē'.

<sup>22</sup> Tu neraoyaquë' rtze', uzi' Jesús tu yēta xtila, bēla'iyānē'n bžuzunē'n udisinē'n bē'nē'n yaca ben' quiē'. Na' unē' gudyinē' leyaquë':

—Ulegaona. Naca yēta xtila niga ca quie cuerpo quia'.

<sup>23</sup> Lēzi uzi' Jesús tu vaso nisa bedzuli'. Beyudyi bēla'iyānē'n, bē'nē'n yaca ben' quiē' tu huioyaquë' lao yuguluyaquë'.

<sup>24</sup> Na'ra una Jesús rēbinē' leyaquë':

—Naca nisa bedzuli' ni ca quie ren quia'. Lena' ilatoga' gatia' cuenda yega'ntza'olē Diuzi le'e tacubifa. Lena' ilatoga' cuenda gata' yela' huezi'že quie ben' zē lao Diuzi.

25 Tali rnia' le'e, bira yo'oga' vino nisa bedzuli' tatula. Hasta idyin dza zulële në'ëdi' ga r nabë' Diuzi, na'tera yo'oga' tacubi tatula.

*Unë Jesús cabë' hue Pedro huananë' binubë'në' lëbë'*  
(Mt. 26.30-35; Lc. 22.31-34; Jn. 13.36-38)

26 Ude beyudyi bilayaquë' tu alabanza, na' uza'yaquë' zioyaquë' ga zu ya'a Olivos.

27 Na'ra una Jesús rëbinë' leyaquë':

—Yugulule usanla'adyi'le në'ëdi' na'ayela. Cabë' rnën lë'ë guichi la'iya quie Diuzi cani: “Hua' mandado gati ben' naca xa'n zi'ila', na' yedzatza yaca beco' zi'ila' quienë'.”

28 Pero cati bagutia' bebana', na'ra huabialaohua' laole tu neza Galilea.

29 Na' una Pedro rëbinë' lëbë':

—Ba'ala'cazi usanla'adyi' yugulu benë' le'e, pero në'ëdi' biusanla'adya' luë'.

30 Na' una Jesús rëbinë' Pedro:

—Tali rnia' luë'. Na'ayela, cati zacuedyi biu chopa lasa, huëbo' yaca benë' binubë'lo' në'ëdi' tzona lasa.

31 Bizi unë Pedro du guicho du la'adyi'në' rëbinë' Jesús:

—Ba'ala'cazi re'ennan gatilia' luë' tuže, pero biyëpa' yaca benë' binubë'da' luë'.

Na' lëscan' cana' una yaca los demás ben' quië' con ca beyaquë' gudyi Pedro Jesús.

*Bë'lë Jesús Diuzi di'idza' ga lao Getsemani'*  
(Mt. 26.36-46; Lc. 22.39-46)

32 Na' uza'yaquë' zioyaquë' bdyinyaquë' tu ga lao Getsemani'. Na' una Jesús rëbinë' leyaquë':

—Ulecueza ni. Huaya'a ta hue'lia' Diuzi di'idza'.

33 Bizi uquië'në' Pedro, len Santiago, len Juan, uza'yaquë' ilë'ëti'. Caora bdyinyaquë' na', lega uzulaon rutëbin lëbë', lega gucayëchi'tzeguenë'.

34 Lena' una Jesús rëbinë' leyaquë':

—Lega raqueda' bayëchi'. Baruen gutin në'ëdi'. Ulecueza në'ëdi' niga. Bigasile.

35 Na'ra udenë' ilë'ëti' gan' nita' yuna ben' quië', gutanë' ruzu ru'ala layu, blidzë' Diuzi chi bisaquë' ucachi' ucui'o Diuzi ca tazëdi gula za' gaca quië'.

36 Na' blidzë' Diuzi unë':

—Xuza' Diuzi, huaco' huelo' yugulute. Ucachi' ucui'olo' ca tazëdi gula za' gaca quia'. Pero bihuelo' cabë' re'enda' në'ëdi', huelo' cabë' re'encazo' gaca.

37 Na'ra uyasa Jesús beza'në' bedyinnë' gan' de yuna ben' quië', blë'ënë' barasiyaquë'. Na' una Jesús rëbinë' Pedro:

—Simón, ¿barasio'? ¿Quele biuzuelo' ina'hualo' ni tu hora?

38 Bigasile. Ruen zi ulidzale Diuzi tacuenda bihue taxi'ibi' le'e gan huele xquia ca tazëdi gula baza' quiele. Tali re'enle huelële në'ëdi' tuže, pero nerdzioguele fuerza ta huele cabë' re'enle.

39 Na'ra zio Jesús tatula gan' baoyoguë', na' blidzë' Diuzi tatula unë' gudyinë' lëbë' ca di'idza' unë' tanëro.

40 Na' beza'në' bedyinnë' tatula gan' de yuna ben' quië'. Blë'ënë' nerasiyaquë' nun quie dan' yu'u bichi gula laojë'. Lena' bibequëbiyaquë' ca di'idza' gudyi Jesús leyaquë'.

41 Na' uza' Jesús zionë' tatula ta hue'lënë' Diuzi di'idza'. Caora bedyinnë' ta beyuna lasa gan' de yuna ben' quië', unë' rëbinë' leyaquë':

—Na'a sí, tahuencazi gasile yezila'adyi'le. Zelao tu cana'zi. Babdyin hora usedyinyaquë' në'ëdi', ben' naca bichi yugulu benë', lao na'a yaca ben' de dula' xquia quie.

42 Ulechasa, tzioro. Baza' ben' usedyin në'ëdi' lao na'ayaquë'.

*Bëxuyaquë' Jesús bëyaquë' lëbë' preso*

(Mt. 26.47-56; Lc. 22.47-53; Jn. 18.2-11)

43 Biži bineyudyi ina Jesús cana', caora labdyinte Judas, ben' naca ben' quie Jesús lado chipchopa ben' quienë'. Na' bdyinlënë' ben' zë, ben' use'ela' yaca xan' pxuzi, len yaca ben' rusëdi ley quie Moisés, len los demás yaca ben' rñabë'. Nu'ayaquë' macheta len yaga.

44 Na' bega'nlë Judas leyaquë' di'idza' huenë' seña ta ulu'enë' leyaquë' nu ben' naca Jesús. Lena' unë' gudyinë' leyaquë':

—Nu ben' gaohua' xague psitu, lëben' na' naca Jesús. Laguxutelenë' iquië'lenë' dyë'ëdi.

45 Na' ca bdyinnë' gan' zë Jesús bebiga'në' unë' rëbinë' lëbë':

—Maestro, Maestro.

Na'ra udaohuë' psitu xaguë'.

46 Caora na' bëxuyaquë' Jesús bëyaquë' lëbë' preso.

47 Biži ulio tu ben' quie Jesús macheta quienë' udinë'n uchugunë' naga criado quie ben' rñabë'ra quie yaca xan' pxuzi.

48 Na'ra una Jesús rëbinë' yaca ben' nita' na':

—¿Barza'le nu'ale macheta, nu'ale yaga ta guxule në'ëdi' huele në'ëdi' preso ca quie ta guxule huele preso tu ben' uban'?

49 Yugu dza zulia' le'le lu'u idao' rñabë'ra psëdia' yaca benë', pero bibëxule në'ëdi' caora na'. Pero re'en ca re'ena uzun xti'idza' Diuzi ca rñën lë'ë guichi la'iya quie Diuzi.

50 Na'ra yaca ben' quie Jesús psanla'adyi'yaquë' lëbë', bzunoyaquë'.

*Bzuno tu ben' ru'abe du guidinë'*

51 Biži bdyin tu bi'byu gan'. Na' nadubinë' tu la'ari' yua' naonë' Jesús. Biži na' bëxuyaquë' lëbë',

52 pero udubanë' la'ari' yua' nadubinë', bzunonë' dú guidinë'.

*Zë Jesús lao yaca ben' rñabë'*

(Mt. 26.57-68; Lc. 22.54-55, 63-71; Jn. 18.12-14, 19-24)

53 Na'ra uquië'yaquë' Jesús ga re' ben' naca xan' pxuzi rñabë'ra. Na' begu'ludi' yaca xan' pxuzi, len yaca ben' rñabë', len yaca ben' rusëdi ley quie Moisés.

54 Biži unao Pedro Jesús zitu'la. Bdyinnë' lali'a yu'u quie ben' naca xan' pxuzi rñabë'ra. Na' ure'në' ru'a gui' len yaca policía ta yedze'enë'.

55 Na'ra yaca xan' pxuzi len yaca los demás ben' rñabë', beguilola'adyi'yaquë' ta gaoyaquë' Jesús xquia cuenda gata' causa guti'yaquë' lëbë', pero biuzaquë'yaquë'.

56 Balayaquë' unëyaquë' di'idza' falso conlë Jesús, pero biunëyaquë' tuzi ca inëyaquë'.

57 Na' uzuli ibalayaquë' unërëyaquë' di'idza' falso conlë lëbë' rëbiyaquë' laguedyiaquë':

58 —Nëto' bendo' unë' udyiagui'në' idao' rñabë'ra quie xuzixta'oro, unë' cati gata lao tzona dza, yeyuenë' idao' rñabë'ra tula, ta bibë yaca benë'.

59 Pero nica ca unayaquë' quie idao' rñabë'ra, biuyu'urë xnezi ca unayaquë'.

60 Na'ra uzuli ben' naca xan' pxuzi rnabë'ra unë' rëbinë' Jesús:

—¿Bixquien' birequëbo'? ¿Bi ca nao' quie di'idza' rnëyaquë' conlë luë'?

61 Pero uzë Jesús chizi, bibequëbinë'. Tatula una ben' naca xan' pxuzi rnabë'ra rëbinë' Jesús:

—¿Naco' ben' Cristo, ži'i Diuzi la'iya?

62 Na' una Jesús rëbinë' lëbë':

—Në'ëdi' ze. Lëscan' hualë'ële në'ëdi', ben' naca bichi yugulu benë', cati bari'a zaquë' yebë cuëta lë'ë Diuzi, ben' de yela' huaca quie. Lëscan' hualë'ële në'ëdi' cati yeguida' lao yedyi layu tu lao beo zë ladza.

63 Na'ra nun quie dan' lega bdza' ben' naca xan' pxuzi rnabë'ra, pchezë' zabë' unë' rëbinë' yaca ben' nita' na':

—¿Cabizira testigo re'ennan inë conlë ben' niga?

64 Babele unë' di'idza' ta inaya'në' Diuzi. ¿Bizi huero quienë'?

Na' unayaquë' yuguluyaquë' de que reya'ala' gatinë'.

65 Na'ra uzulaoyaquë' bda'yaquë' lëbë' zen', pcachi'yaquë' laohuë' udy-  
ibiyaquë' lëbë' begoro, unayaquë' gudyiyaquë' lëbë':

—¿Una nuži udyibi luë' begoro!

Lëscan' udyibirë yaca policia lëbë' begoro.

*Una Pedro binubë'në' Jesús*

(Mt. 26.69-75; Lc. 22.56-62; Jn. 18.15-18, 25-27)

66 Ga zë Pedro lali'a bdyin tu criada quie ben' naca xan' pxuzi rnabë'ra.

67 Bizi caora blë'ë bi' criada re' Pedro redzë'në' cuëta gui', na' una'bi' lëbë'  
dyë'ëdi unabi':

—Lëzi luë' naco' ben' quie Jesús, ben' yedyi Nazaret.

68 Na' una Pedro gudyinë' lëbi':

—Binubi'a ben' na', nica nezda' bi inao'.

Na' beronë' zënë' cuëta ru'a yu'u. Caora na' uredyi biu tu.

69 Bizi tatula una' bi' criada Pedro unëbi' rëbibi' yaca ben' nita' na':

—Naca ben' ni tuže len leyaquë'.

70 Pero tatula unë Pedro binubë'në' Jesús. Na' guca itu chi' cati una yaca  
ben' nita' na' gudyiyaquë' Pedro:

—Talicazi naco' tuže len leyaquë', como dan' naco' ben' Galilea rnëlo' ca  
rnë ben' Galilea.

71 Na' una Pedro bdze'de'në' cuinnë' bguntenë' Diuzi gudyinë' leyaquë':

—Binubi'a nu ben' nale cana'.

72 Caora na' laoredyite biu taorupe. Na'ra beza'la'adyi' Pedro cabë' gudyi  
Jesús lëbë' unë': “Ca zacuedyi biu chopa lasa, huëbo' yaca benë' binubë'lo'  
në'ëdi' tzona lasa.” Caora na' beyuenë' pensari cabë' una Jesús, na' uredyinë'.

## 15

*Zë Jesús lao Pilato*

(Mt. 27.1-2, 11-14; Lc. 23.1-5; Jn. 18.28-38)

1 Caora baoyani' dza tula, bedupa yaca xan' pxuzi, len yaca ben' gula, len  
yaca ben' rusëdi ley quie Moisés, len yaca los demás ben' rnabë', bëyaquë'  
junta. Pquioyaquë' Jesús uquië'yaquë' psedyinyaquë' lëbë' lao na'a Pilato.

2 Na' unaba Pilato rëbinë' Jesús:

—¿Tabala naco' rey quie ben' Israel?

Na'ra bequëbi Jesús rëbinë' Pilato:

—Ca unao', cana' naca' quia'.

3 Bizi na' udao yaca xan' pxuzi Jesús xquia ze.

4 Lena' una Pilato rëbinë' Jesús:

—¿Bixquien' birequëbo'? Huala rao yaca ben' niga luë' xquia.

5 Pero bega'n Jesús chizi, bibequëbinë'. Quie lena' biubin Pilato bi pensari huenë' quie Jesús.

*Pchugubë'yaquë' gati Jesús  
(Mt. 27.15-31; Lc. 23.13-25; Jn. 18.38-19.16)*

6 Na' de tu costumbre quie Pilato yebionë' tu ben' preso yu'u lu'u dyiguiba tu raca lani pascua. Na' yebio Pilato nutezi ben' re'en yaca benë' yero.

7 Na'ra lu'u dyiguiba yu'u yaca ben' bëti benë', ben' udilalë gobierno. Na' yu'urë tu ben' lao Barrabás lu'u dyiguiba, ben' nuelë leyaquë' tuze.

8 Na' bdyin yaca benë' ga zë Pilato unabayaquë' chi biyebionë' tu ben' yu'u lu'u dyiguiba según ca naca costumbre.

9 Cana' una Pilato rëbinë' leyaquë':

—¿Re'enle yebioga' ben' na naquë' rey quie ben' Israel?

10 Cana' una Pilato, porque gucabë'në' yela' zë' quie yaca xan' pxuzi pseyinyaquë' Jesús laohuë'.

11 Na' bega'n yaca xan' pxuzi di'idza' ta yëbiyaquë' yaca benë' ta inabayaquë' yebio Pilato Barrabás.

12 Na' una Pilato rëbinë' yaca ben' nita' na':

—¿Bizi re'enle hua' quie ben' na naquë' rey quie ben' Israel?

13 Na' urediyi'yaquë' bequëbiyaquë':

—¡Uda'lo'në' lë'ë yaga cruzo!

14 Bizi na' una Pilato gudyinë' leyaquë':

—¿Bizi xquia bënë'?

Pero tatula urediyi'yaquë':

—Uda'lo'në' lë'ë yaga cruzo.

15 Na'ra como bigu'un Pilato idza' yaca benë' lëbë', bzuë' di'idza' bebioguë' Barrabás lu'u dyiguiba. Lëscan' bënë' mandado qui yaca soldado Jesús guidi, na'tera uda'yaquë' lëbë' lë'ë yaga cruzo gatinë'.

16 Bizi uquië' yaca soldado Jesús zioyaquë' bdyinyaquë' lali'a quie palacio (di'idza' quieyaquë' laona pretorio). Na' guziyaquë' yaca los demás ben' naca soldado laguedyiyaquë'.

17 Caora na' bgacoyaquë' Jesús tu la'ari' morado, bdze'yaquë' tu coron yëchi' guichonë'.

18 Lëscan' urediyi'yaquë' pttuyaquë' lëbë' unayaquë':

—¡Viva rey quie ben' Israel!

19 Caora na' udiyaquë' yaga guichonë', bda'yaquë' zen' laohuë', ptiyuaquë' uditzu zibiyaquë' bëyaquë' ca quie ben' rapala'n lëbë'.

20 Beyudyi pttuyaquë' lëbë', na' belëchoyaquë' la'ari' morado, begacoyaquë' lëbë' zabë', uquië'yaquë' lëbë' ta uda'yaquë' lëbë' lë'ë yaga cruzo gatinë'.

*Bda'yaquë' Jesús lë'ë yaga cruzo  
(Mt. 27.32-44; Lc. 23.26-43; Jn. 19.17-27)*

21 Na' du tu neza gan' zioyaquë', bedzagayaquë' tu ben' yedyi Cirene laohuë' Simón, ben' xuzi Alejandro len Rufo. Bezë'ë layela ga uyoguë'. Na'ra bë yaca soldado mandado bi'anë' yaga cruzo nu'a Jesús.

22 Na' zioyaquë' bdyinyaquë' ga laona Gólgota (ta inaro xti'idza'ro: Ya'a chita guicho ben' huati).

23 Bizi bë'yaquë' lëbë' vino nequixi tasla' gula laona mirra, pero bigu'unnë' yo'onë'n.

24 Na'ra bda' yaca soldado lëbë' lë'ë yaga cruzo. Te beyudyi na', bëyaquë' sorteo ca nu xlažoyaquë' gaca quieyaquë' žaba Jesús.

25 Baruen las nueve te dza cati bda'yaquë' Jesús lë'ë yaga cruzo.

26 Na' guicho cruzo bdyiayaquë' tu letrero ga rguixogue'n bi causa de quienë' dan' bëtiyaquë' lëbë'. Lë'ë letrero rnën caniga: “Rey quie ben' Israel.”

27 Lëzi bda'rëyaquë' chopa ben' uban lë'ë yaga cruzo. Bzuyaquë' tun zaquë' yebë' cuëta Jesús, itun bzuyaquë' zaquë' yega'la.

28 Cana' guca quienë' bzun di'idza' ca rnën lë'ë guichi la'iya quie Diuzi cani: “Pscayaquë' lëbë' ca ben' mala.”

29 Na'ra ptasi bnio yaca ben' rede gan' neda' Jesús lë'ë yaga cruzo. Uredyiya'yaquë' tu rtulazi guichoyaquë' unayaquë' rëbiyaquë' Jesús:

—Luë' nao' huadyiagui'lo' idao' rnabë'ra, na'tera yecubo'n gaca lao tzona dza,

30 psela cuinlo', beyëzi lë'ë yaga cruzo.

31 Lëscan' ptitu yaca xan' pxuzi len yaca ben' rusëdi ley quie Moisés lëbë', unayaquë' gudyiyaquë' laguedyiyaquë':

—Pselanë' ben' tula, na' bigaquë' uselanë' cuinnë'.

32 Chi Cristo luë', chi rey quie ben' Israel luë', beyëzi lë'ë yaga cruzo ilë'ëndo', na'tera galendo' quio'.

Hasta ichopa yaca ben' neda'lë yaga cruzo cuëta lë'ë Jesús, ptasi bniorëyaquë' lëbë'.

### *Ca guca cati guti Jesús*

(Mt. 27.45-56; Lc. 23.44-49; Jn. 19.28-30)

33 Caora бага'ala' la'odza, bechula lao duže ciudad na' hasta reda tzona.

34 Caora na' uredyiya' Jesús unë':

—Eloi, Eloi, ¿lama sabactani? —ta inaro xti'idza'ro: Xuza' Diuzi, Xuza' Diuzi, ¿bixquien' bapsanla'adyo' në'ëdi'?

35 Na'ra una yaca ben' nita' bago rëbiyaquë' laguedyiyaquë':

—Ulezë nagale, rëžinë' Elías.

36 Na' laziote tu ben' nita' na' yexi'në' tu ta naca yun' ca ži'ila' laona esponja. Na' bdze'në'n lu'u vino sla' bzunë'n lao yaga ta bdyinnan sibi ga da' Jesús ta supinë'n. Pero una bala yaca ben' nita' na':

—Psan quienë'. Ya' ina'ro chi guida Elías ta uchizanë' lëbë'.

37 Na'ra uredyiya' Jesús gutinë'.

38 Caora na', bre'eza la'ari' na'alan lu'u idao' rnabë'ra, gucan chopa la'a.

39 Na' uzë xan' yaca soldado zaquë'lao lao Jesús. Caora blë'ënë' cabë' uredyiya' Jesús gutinë', unë' rëbinë' laguedyinë':

—Tali naca ben' ni ži'i Diuzi.

40 Lëzi lëgan' na' nita'rë yaca nigula rna'yaquë' Jesús zitu'la. Ladoyaquë' na' zu María Magdalena, len María žna' Santiago bi' nëchi', len José, len Salomé.

41 Lëleyaquë' unaoyaquë' Jesús cati udanë' lao yaca yedyi nebaba Galilea gualëyaquë' lëbë'. Lëzi nita'rë yaca nigula tula, ben' uyolënë' Jerusalén.

### *Pcachi'yaquë' Jesús*

(Mt. 27.57-61; Lc. 23.50-56; Jn. 19.38-42)

42 Na' gula rdze' dza bëyaquë' ta gaoyaquë' quie dza huezila'adyi'.

43 Bdyin tu ben' yedyi Arimatea laonë' José. Naquë' tu ben' rnabë' entre yaca ben' rnabë' quie ben' Israel. Rbezë' dza inabë' Diuzi lao duže yedyi layu. Na' beyažoguë' uyoguë' ga zu Pilato yenabanë' chi bihue'në' lato tzecachi'në' cuerpo quie Jesús.



44 Na' bebanzi Pilato lagutite Jesús. Na' gužë' ben' naca xan' soldado unabanë' lëbë' chi tali baguti Jesús.

45 Caora gudyi xan' soldado Pilato tali na' baguti Jesús, na'ra bënë' lato ta yeyu'a José cuerpo quie Jesús.

46 Na' uyo José yegue'në' tu la'ari' ta yetupanë' cuerpo quie Jesús. Na' bezi'në' cuerpo quie Jesús betubinë'n la'ari', bdze'në'n lu'u tu beló yo ta uqui'n yaca benë' segün ca naca costumbre quieyaquë'. Na' uzi'në' tu yo ta'a, bda'në'n ru'a beló yo.

47 Biži María Magdalena, len María žna' José, blë'ëyaquë' gan' bdžë' José cuerpo quie Jesús.

## 16

### *Ca guca cati beban Jesús*

(Mt. 28.1-10; Lc. 24.1-12; Jn. 20.1-10)

1 Caora baode dza saodo, dza huezila'adyi' quieyaquë', uyo María Magdalena, len María Žna' Santiago, len Salomé ta ga'oyaquë' aceite rla' žixi žeo ta ula'oyaquë' cuerpo quie Jesús.

2 Na' caora uyani' zila dao' dza domingo, dza nëro quieyaquë', uyoyaquë' gan' zu beló yo gan' de cuerpo quie Jesús.

3 Na' unayaquë':

—¿Nuži yëbiro ta cubayaquë' yo ta'a da' ru'a beló?

4 Cati bdyinyaquë' gan', blë'ëyaquë' bira da' yo ta'a ru'a beló yo.

5 Na' uyu'uyaquë' lu'u beló yo, blë'ëyaquë' tu ángel nacanë' ca tu forma bi'byu ru'abe. Re'në' zaquë' yebë lu'u beló yo, naconë' tu la'ari' bezëri. Na' lega bdzebiyaquë'.

6 Na'ra unë ángel na' rëbinë' leyaquë':

—Bidzebile. Baza'le dena'le Jesús, ben' yedyi Nazaret, ben' guti lë'ë yaga cruzo. Bira denë' niga, babebannë'. Ulena'cara ga uidxoyaquë' cuerpo quienë'.

7 Uleyo uletzeguëdyi Pedro len yaca los demás yaca ben' quie Jesús de que huabialaohuë' laole neza Galilea. Hualë'ëlenë' gan' con ca rnia'.

8 Biži na' hero yaca nigula lu'u beló yo. Du rdzebiyaquë' du rziziyaquë' uyu'uyaquë' be. Nitu nunu ben' bedilayaquë' tu neza bigudyiyaquë' cabë' blë'ëyaquë' como can' rdzebiyaquë'.

### *Ptilalao Jesús María Magdalena*

(Jn. 20.11-18)

9 Biži beyudyi beban Jesús dza domingo, dza nëro quieyaquë', tanëro ptilalaohuë' María Magdalena, ben' bebio Jesús gadyi bichi be mala.

10 Na'ra uyo María tzetixogue'në' yaca ben' unao Jesús dza na'. Bega'nyaquë' guqueyëchi'yaquë' urediyayaquë' nun quie dan' guti Jesús.

11 Na' cati beyaquë' cabë' gudyi María leyaquë' de que beban Jesús, blë'ë María lëbë', biguleyaquë' quienë'.

### *Ptilalao Jesús chopa ben' nao xnezanë'*

(Lc. 24.13-35)

12 Te beyudyi na', betza' cuin Jesús yetilalaohuë' chopa ben' zio layela, ben' nao xnezë'.

13 Na' lëscan' uyoyaquë' yetixogue'yaquë' yaca los demás ben' nao xneza Jesús de que babebannë', den' biguleyaquë' quieyaquë'.

*Use'ela' Jesús yaca ben' quië' ta tzetixogue'yaquë' xti'idza' Diuzi  
(Mt. 28.16-20; Lc. 24.36-49; Jn. 20.19-23)*

<sup>14</sup> Te beyudyi na', ptilalao Jesús yaca chiptu ben' quienë' tu re'yaquë' lao mesa neraoyaquë'. Na'ra udilanë' leyaquë' nun quie yela' zidi quieyaquë' biguleyaquë' quie ben' gudyi leyaquë' blë'ëyaquë' lëbë' bebannë'.

<sup>15</sup> Na' una Jesús gudyinë' leyaquë':

—Uletzio lao duže yedyi layu tzetixogue'le yugulu benë' xti'idza' Diuzi.

<sup>16</sup> Na' nu ben' gale quia', ben' nao xneza', ben' si' laohue, huazi' Diuzi lëbë' guibá. Pero nu ben' bigale quia', ben' binao xneza', huachugubë' Diuzi quienë' yeyonë' gui' gabila.

<sup>17</sup> Cani naca seña hue yaca ben' inao xneza'. Du rzëtoyaquë' laohua' huebioyaquë' yaca bichi be mala yu'u yaca benë'. Huacayaquë' inayaquë' di'idza' quie ben' tula.

<sup>18</sup> Chi guxuyaquë' bëla rgui'idiyi', bibi hueba' quieyaquë'. Chi yo'oyaquë' tu ta naca veneno, bibi huena quieyaquë'. Chi uda' na'ayaquë' yaca ben' raca zhue', hueyacayaquë'.

*Beyëpi Jesús ladza zeyonë' guibá  
(Lc. 24.50-53)*

<sup>19</sup> Bë' beyudyi unë Señor quiero Jesús cana', beyëpinë' ladza zeyonë' guibá ga re'në' zaquë' yebë quie Diuzi.

<sup>20</sup> Na' uza' yaca ben' quie Jesús ta quixogue'yaquë' xti'idza' Diuzi duže yedyi layu. Guçalë Señor quiero Jesús leyaquë', bënë' yela' huaca quienë' ta ulu'en xti'idza' Diuzi na' rguixogue'yaquë'. Amén.

## DI'IDZA' LA' IYA BZU SAN LUCAS LĒ'Ē GUICHI

### *Garzulao di'idza'*

<sup>1</sup> Yaca ben' zē bazuyaquē' di'idza' lē'ē guichi ta yu'u ni'a xnezi con ca guca quiendo' dza na'.

<sup>2</sup> Bzuyaquē' di'idza' lē'ē guichi ca ta una yaca ben' blē'ē cabē' guca desde dza zasu Jesús. Lēleyaquē' udixogue'rēyaquē' di'idza' la'iya quie Diuzi.

<sup>3</sup> Lēscan' nē'ēdi' unaba'yudya' dyē'ēdi cabē' guca desde dza ga uzulaon quie Jesús. Lēlena' raqueda' tahuen na' hua' itu guichi ni ta ise'ela'n laolo' bicha' Teófilo.

<sup>4</sup> Lēlena' rua' cuenda inezile dyē'ēdi nacan di'idza' li ca ta udixogue'yaquē' luē'.

### *Garguixogue' tu ángel cabē' gaca bē' su Juan bautista*

<sup>5</sup> Lēdza na' uzu rey Herodes r nabē'nē' estado Judea, zurē itu ben' naca pxuzi laonē' Zacarías. Naquē' tu cue' len yaca ben' nao pxuzi lao Abías. Naca nigula quie Zacarías ži'i suba Aarón, ben' gucarē pxuzi dza na'te. Lēbē' laohuē' Elisabet.

<sup>6</sup> Blē'ē Diuzi leyaquē' ben' dya'a. Bzuyaquē' di'idza' ca rna ley yu'u di'idza' la'iya quie Diuzi. Lēlena' nunu saque' gao leyaquē' xquia.

<sup>7</sup> Pero nunu ži'iyaquē' uzu, dan' guca Elisabet ben' bidyi. Lao rupayaquē' nacayaquē' ben' gula.

<sup>8</sup> Biži bdyin dza babedula' turno quie tu cue' pxuzi ben' nacalē Zacarías tzaže. Babedula' turno rioyaquē' lu'u idao' r nabē'ra, dan' nacayaquē' pxuzi ta hue'lēyaquē' Diuzi di'idza'.

<sup>9</sup> Ca costumbre quie yaca pxuzi bedula' Zacarías uyu'uguē' lu'u idao' r nabē'ra ta udze'nē' dzen yalo lao becugo.

<sup>10</sup> Biži caora rei dzen yalo lao becugo, na'ra nita' yaca ben' zē lali'a ridzayaquē' Diuzi.

<sup>11</sup> Caora na' ptilalao tu ángel quie Diuzi bazēguē' zaquē' yebē lao becugo.

<sup>12</sup> Biži caora blē'ē Zacarías tu ángel, tu bdzebizinē', bira ubinnē' bi nē'.

<sup>13</sup> Na'ra una ángel rēbinē' Zacarías:

—Zacarías, bidzebo', babe Diuzi ca naca oración quio' rnalo'. Nigula quio' Elisabet hua' ži'inē' huazu ži'ilo' ixubo' laobi' Juan.

<sup>14</sup> Lega yedaohuela'obi'. Lēscan' yedaohuerē yaca ben' zē cati bazubi'.

<sup>15</sup> Cana' gaca quiele dan' huacabi' ben' ze, huacabi' ben' bala'ana lao Diuzi. Biyo'obi' vino, biyo'obi' ta xudyibi'. Huayu'ubi' Bichi Be que Diuzi desde yu'utebi' lu'u lē'ē žna'bi'.

<sup>16</sup> Huacalēbi' yaca ben' zē, ben' Israel, ta yetza'yaquē' pensari quieyaquē' ta yenaoyaquē' xneza Diuzi.

<sup>17</sup> Lēbi' cuialaonezabi' ta quixogue'bi' benē' baza' ben' ise'ela' Diuzi. Con ca bē profeta Elías, bēnē' yela' huaca quie Diuzi, cana' huerē ži'ilo' yedze'bi' pensari quie Elías lu'u guicho laxta'o yaca benē' ta bitilalē xuziyaquē' len ži'iyaquē', lēscan' ta galerē yaca ben' birale quie Diuzi. Cana' huebi' tacuenda chežilā'adyi' yaca benē' yezi'yaquē' ben' ise'ela' Diuzi.

<sup>18</sup> Biži na' unaba Zacarías ángel:

—¿Cabizi hua' ta inezda' gaca quia' cabē' baonao'? Porque nē'ēdi' banaca' ben' gula. Lēscana' ben' gula naca nigula quia'.

<sup>19</sup> Na'ra una ángel rēbinē' lēbē':

—Në'ëdi' laohua' Gabriel. Rua' mandado rue Diuzi. Use'elë' në'ëdi' ta detixogui'a luë' ca tadya'a hue Diuzi quio'.

<sup>20</sup> Ca naca bigulelo' can' baonia' luë', huega'nlo' bira gaca inëlo' hasta que idyin dza galo xcuidi' quio'. Uzun di'idza' can' baonia' cati idyin dza.

<sup>21</sup> Biži yaca ben' nita' lali'a, rbezayaquë' ta yero Zacarías rebanyaquë' dan' rdzëtzegue Zacarías lu'u idao' r nabë'ra.

<sup>22</sup> Babero Zacarías lu'u idao' r nabë'ra bedapa' ru'anë' bira guca inënë'. Biži yaca benë' gucabë'yaquë' guca quië' ca ben' uxusa. Blë'ënë' tu ta blë'ënë' lu'u idao' r nabë'ra. Biži señazi ruenë' rlu'enë' benë' bira guca inënë'.

<sup>23</sup> Babeyudyi ca tu dza uzunë' lu'u idao' r nabë'ra, na' bezë' zeyoguë' žan yu'u quienë'.

<sup>24</sup> Ude beyudyi guca can', žgulë' Elisabet, banu'a ži'inë', bega'nnë' zunë' žan yu'u quienë' lao ga'yo' biu'.

<sup>25</sup> Na'ra unë': "Ca ta bacuan bë Diuzi quia' ta bira inë yaca benë' quia' bizinaquezi."

### *Udixogue' tu ángel cabë' gaca galo Jesús*

<sup>26</sup> Biži bezu lao xopa biu' bë'lë ángel Gabriel Elisabet di'idza', bese'ela' Diuzi lëbë' tatula lao yedyi Nazaret ga nebaba Galilea.

<sup>27</sup> Bese'elë' lëbë' ta tzanë'ë tu nigula cuidi', ben' binehuebë' be'mbyu. Lë'lëbi' laobi' María. Lë'nigula na' banapabi' di'idza' len bi' lao José ta utzaganayacabi'. Naca José ži'i suba rey David.

<sup>28</sup> Biži uyu'u ángel lu'u yu'u ga zu María, unë' rëbinë' lëbi':

—Padiux, raxetzague Diuzi ca ruelo'. Zucazi Diuzi rnë'ë luë'. Huela'iya Diuzi luë' ca nurla yaca nigula tula.

<sup>29</sup> Na'ra cati blë'ë María ángel, tu bebanzibi' cabë' gudyi ángel lëbi'. Cana' guquebi': "¿Bixquien' una ángel në'ëdi' cana'?"

<sup>30</sup> Na'ra una ángel rëbinë' lëbi':

—María, bidzebo' huacalëcazi Diuzi luë'.

<sup>31</sup> Na'ra huayu'u bdao' byu lu'u yu'uzixo'. Na' ixubo' laobi' Jesús.

<sup>32</sup> Huacabi' ben' ze lao Diuzi. Huacabi' ži'i Diuzi zu guibá. Hue' Diuzi yela' rnabë' quienë' ta inabë'në' ca unabë' xuzixta'onë' rey David.

<sup>33</sup> Cana' inabë'në' tuzioli yaca ben' Israel. Biyeyudyi yedu yela' rnabë' quienë'.

<sup>34</sup> Biži unaba María ángel:

—¿Como gaca quia' con ca baonao', den' binesulia' be'mbyu?

<sup>35</sup> Biži una ángel rëbinë' María:

—Huayëzi Bichi Be quie Diuzi ga zulo'. Ca idubi tu beo, cana' huadubi yela' huaca quie Diuzi zu sibi luë'. Lëbdao' su na', huacabi' ben' naca la'ya quie Diuzi, huacabi' ži'i Diuzi.

<sup>36</sup> Lëzi ben' diadza quio' Elisabet, huazurë ži'inë' ba'ala'cazi banaquë' ben' gula, ben' una yaca benë' naquë' nigula bidyi. Biži na'a lao xopa biu' banu'a ži'inë'.

<sup>37</sup> Para Diuzi bibi žëdi gaquenë' tu ta huenë'.

<sup>38</sup> Na'ra una María rëbibi' ángel:

—Nacacaza' ben' hue dyin quie Diuzi. Hue'encazi huegara Diuzi quia' cabë' baonao'.

Na'ra beza' ángel zeyoguë'.

### *Uyo María yeyubibi' Elisabet*

<sup>39</sup> Lëdza na', laoza'te María ziobi' yedyi ga zu ya'a, yedyi nebaba Judea.

<sup>40</sup> Bizi cati bdyimbi' ga zu lidyi Zacarías, na' uyu'ubi' lu'u yu'u rgapabi' diuzi Elisabet.

<sup>41</sup> Caora be Elisabet bgapa María lëbë' diuzi, cana' bda bdao' yu'u lu'u yu'u'uzixinë'. Bizi caora na' uyu'u Bichi Be quie Diuzi lëbë'.

<sup>42</sup> Na'ra unë Elisabet zidzo rëbinë' María:

—Babëla'iya Diuzi luë' cala ca nurla yaca nigula. Lëzi babëla'iyane' zi'ilo'.

<sup>43</sup> ¿Nuzi naca' në'ëdi' babido' idenao' në'ëdi'? Naco' luë' zna' ben' ise'ela' Diuzi.

<sup>44</sup> Ca naca bido' rgapo' në'ëdi' diuzi, caora na' bda bdao' yu'u lu'u yu'u'uzixa' redaohuebi'.

<sup>45</sup> Tadya'a gula gaca quio' bagulelo' con can' baona Diuzi como dan' uzucazin di'idza' can' baonanë'.

<sup>46</sup> Na'ra una María:

Raxeda' rnia' naca Diuzi ben' ze gula.

<sup>47</sup> Redaohue guicho laxta'ohua' ca rue Diuzi, ben' ute usela në'ëdi'.

<sup>48</sup> Babeyëchi'la'adyi' Diuzi në'ëdi', naca' ben' hue dyin quienë'.

Huana yaca ben' zaza' zanita' tahuen gula guca quia'.

<sup>49</sup> Naca Diuzi ben' r nabë' lao yugulute.

Tadya'a gula bënë' quia'.

Naca Diuzi ben' la'iya.

<sup>50</sup> Tuzioli reyëchi'la'adyi'në' yaca ben' rapala'n lëbë'.

<sup>51</sup> Bënë' yela' huaca quienë'.

Pcaxonë' yaca ben' rue ze cuine.

<sup>52</sup> Begubë' yela' r nabë' quie yaca ben' r nabë', bë'në'n yaca ben' yëchi', ben' ruzu di'idza' quie'.

<sup>53</sup> Yaca ben' udue, bipca'nnë' leyaquë' sin gaoyaquë', pero yaca ben' uña'a, bega'nyaquë' biguta' ta gaoyaquë'.

<sup>54</sup> Gucalënë' yaca ben' yedyi Israel, yaca ben' quienë'.

Bigulala'adyi'në' leyaquë' beyëchi'la'adyi'në' leyaquë'.

<sup>55</sup> Cana' bënë' ca naca di'idza' bega'nlënë' xuzixta'oro, bënë' ca naca di'idza' bega'nlënë' Abram len diadza quienë' para tuzioli.

<sup>56</sup> Bizi guca lao tzona biu' uzu María lidyi Elisabet. Ude na' beza'bi' zeyobi' lidyibi'.

### *Ca guca cati baozu Juan bautista*

<sup>57</sup> Bizi bdyin uya' biu' ta su bdao' quie Elisabet, na' uzu tu bidao' byu quie'.

<sup>58</sup> Bë' unezi yaca ben' diadza quienë', len yaca ben' lao yedyi baozu bdao' quienë', bdyinyaquë' dena'yaquë' lëbë' ca tahuen gula guca quienë'.

<sup>59</sup> Bizi guca lao xuna dza, bdyin yaca ben' uzu tu xëdyidao' cuin bdao' según ca naca ley quieyaquë'. Cana' gu'unyaquë' yeyu'eyaquë' laobi' ca lao xuzibi' Zacarías.

<sup>60</sup> Na'ra una zna' bdao':

—Biyeyu'ero laobi' lao xuzibi'. Hue'ro laobi' Juan.

<sup>61</sup> Bizi unayaquë' rëbiyaquë' lëbë':

—¿Bixquien' ilaobi' Juan? Ni tu yaca ben' diadza quio' bizu yaca ben' lao cana'.

<sup>62</sup> Na'ra bëyaquë' seña unabayaquë' xuzi bdao' ta ineziyaquë' ca bizi re'en xuzibi' ilaobi'.

<sup>63</sup> Na'ra unabane' tu yaga ta'a bzuguë' letra bzunë': “Laobi' Juan.” Bizi tu bega'nziyaquë' bebanyaquë' can' guca.

<sup>64</sup> Bizi caora na' benë' Zacarías, ruenë' Diuzi ben' ze.

<sup>65</sup> Bega'n yaca ben' lao yedyi tu bebanziyaquë'. Na' bë'lë yaca ben' nita' yedyi nebaba Judea laguediyaquë' di'idza' cabë' guca quieyaquë'.

<sup>66</sup> Ca naca lao yugulu ben' unezi, gucayaquë' pensari unayaquë' rëbiyaquë' laguediyaquë':

—¿Ca bëzi gaca quie xcuidi' na'?

Cana' unajë' dan' talicazi bëla'iya Diuzi lëbi'.

### *Bë Zacarías Diuzi ben' ze*

<sup>67</sup> Na'ra Zacarías, ben' naca xuzi bdao', du yu'unë' Bichi Be quie Diuzi, unë' cabë' re'en Diuzi inënë'. Lëlena' unë' cani:

<sup>68</sup> Ben' ze naca Diuzi quie ben' ra'o, ben' Israel, como dan' babidë' len ra'o, nacaro ben' quiënë', bapte pselanë' ra'o.

<sup>69</sup> Baose'elë' tu ben' ute usela ra'o, ben' de yela' huaca quie.

Lëlebë' naquë' zi'i suba rey David, ben' naca siervo quie Diuzi.

<sup>70</sup> Cana' naca di'idza' bega'nlë Diuzi xuzixta'oro tiempote.

Conlë yaca ben' udixogue' di'idza' la'iya quienë', cana' udixogue' Diuzi bin' huenë'.

<sup>71</sup> Unë' ute uselanë' ra'o quie yaca ben' rudie rdza' ra'o.

<sup>72</sup> Unë' yeyëchi'la'adyi'në' yaca ben' naca xuzixta'oro.

Bigala'adyi'në' huenë' cabë' di'idza' naca la'iya bega'nlënë' leyaquë'.

<sup>73</sup> Lëscan' para ra'o, bega'nlënë' ra'o di'idza'.

Cana' naca di'idza' bega'nlë Diuzi xuzixta'oro Abraham.

<sup>74</sup> Unë' ute uselë' ra'o bibi hue yaca ben' rudie rdza' ra'o para naoro xnezë' sin idzebiro.

<sup>75</sup> Cana' gacaro ben' hue quie lëbë', ben' naca la'iya quienë' dza rdaro lao yedyi layu.

<sup>76</sup> Na'ra luë' zi'ina', huaco' ben' quixogue' xti'idza' Diuzi zu guibá, como dan' huabialaonezo' lao ben' ise'elá' Diuzi ta tzetixogue'lo' benë' de que huida ben' ise'ela' Diuzi.

<sup>77</sup> Cana' huelo' cuenda inezi yaca ben' Israel cabë' bë Diuzi ta ute uselanë' ra'o, yezi'zenë' dula' xquia quiero.

<sup>78</sup> Tanun quie nedyë'ë Xuziro Diuzi ra'o reyëchi'la'adyi'në' ra'o, aose'elë' tu ben' uzioñe'e ra'o desde guibá ga zuë'.

<sup>79</sup> Cana' bë Diuzi cuenda tzioñe'e yaca ben' rda lao lato lao chula, yaca ben' ruen žudyi gatiyaca.

Cana' bë Diuzi quiero cuenda gacalënë' ra'o, yedzeleru naoro xnezë', cue' chizi lu'u guicho laxta'oro.

Cana' una Zacarías dza na'.

<sup>80</sup> Bëzi xcuidi' gu'unibi'labezi, gucabi' bi' huala, yu'ubi' Bichi Be quie Diuzi. Na'ra uzubi' lao lato ga bidyia yu'u hasta bdyin dza uzulaobi' rguixogue'bi' yaca ben' Israel xti'idza' Diuzi.

## 2

### *Ca guca bë'uzu Jesús*

*(Mt. 1.18-25)*

<sup>1</sup> Bëzi lao dza na', uzu tu ben' naca gobierno, ben' rnabë'ra laohuë' Augusto. Na' bënë' mandado ta guca censo quie lao duže yedyi con ga rnabë'në'.

<sup>2</sup> Lëcenso na' gucan tanëro caora uyo Cirenio gobernador quie yu nebaba Siria.

<sup>3</sup> Gucan quie lao yugulute yaca ben' con gatezi nita'yaquë' de yeyoyaquë' lao yedyi ga goloyaquë' tacuenda tzu'u laoyaquë' lao lista.

4 Cana' guca bero José yedyi Nazaret ga nebaba Galilea zioguè' yedyi Belén ga nebaba Judea. Lègan' na' ga golo rey David como dan' naca José ben' diadza quie rey David.

5 Bedyin José len María Belén para tzu'u laoyaquè' lao lista. Naca María bi' banapalè di'idza' José ba'ala'cazi banu'a zi'ibi'.

6 Bi'zi banita'yaquè' Belén na', bdyin dza golo bdao' quie María.

7 Bi'zi golo bdao' nèro quie María. Beyudyi na' bezi'yaquè' bdao' be-tubiyaquè'bi' la'ari' bexubayaquè'bi' lao yaga žan yu'u ga yu'u bēdyihuaga. Cana' guca quieyaquè', dan' biguta' lato lu'u yu'u quie yaca benè' gasiyaquè'.

*Ptilalao yaca ángel yaca ben' rapa beco' zi'ila'*

8 Bi'zi ga'ala' ga re' Belén nita' yaca ben' rapa beco' zi'ila'. Rega'nlēyaquè' beco' zi'ila' quieyaquè' layela ta rapayaquè'ba' yedu yela.

9 Lēcana' labdyinte tu ángel quie Diuzi gan' nita' yaca ben' rapa beco' zi'ila'. Caora na' bdyin yela' huaca quie Diuzi ulēchin xni' gan' nita'yaquè'. Lega bega'nyaquè' bdzebiyaquè'.

10 Na'ra una ángel rēbinè' leyaquè':

—Bidzebile, porque nē'ēdi' nu'a tu di'idza' dya'a nacan ta yedaohue lao yugulte benè'.

11 Lēlena' rnia' le'e agolo tu bdao' yedyi Belén ga golo rey David. Lēbdao' na' ute uselabi' yaca benēchi'. Bagolo ben' naca Cristo, ben' use'ela' Diuzi.

12 Ta inezile nacan tali ca rnia', huedzelele bdao' bdubibi' la'ari' žubabi' lao yaga žan yu'u ga yu'u bēdyihuaga.

13 Bi'zi yesazi bdyinra yaca ángel zēra, ben' za' guibá gan' zē ángel, ruejē' Diuzi ben' ze unayaquè':

14 ¡Ben' ze Diuzi zu sibi!

¡Huaca tadya'a gula quie yaca ben' nita' lao yedyi layu, ben' hue quie Diuzi!

15 Bi'zi babeyudyi na', beyēpi yaca ángel guibá. Na' bega'n yaca ben' rapa beco' zi'ila' nayaquè' rēbiyaquè' laguedyiyaquè':

—Huayoro tzena'ro can' guca yedyi Belén con ca baona Diuzi ra'o.

16 Cana' uza'yaquè' zioyaquè' taria bdyinyaquè' ga zu María len José len bdao' žubabi' lao yaga žan yu'u ga yu'u yaca bēdyihuaga.

17 Ca blē'ēyaquè' bdao', cana'ra bē'yaquè' di'idza' con can' gudyi ángel leyaquè' cabè' guca uzu bdao'.

18 Ca naca be lao yugulte yaca ben' nita' gan', lega bebanyaquè' can' una yaca ben' rapa beco' zi'ila'.

19 Bi'zi María nezizi lu'u laxta'onē' ca naca una yaca benè'. Cana' gucanē' pensari ca unajē'.

20 Na' beza' yaca ben' rapa beco' zi'ila' zeyoyaquè' rueyaquè' Diuzi ben' ze ca ta beyaquè' len ca ta blē'ēyaquè'. Bzucazi Diuzi di'idza' con ca una ángel gudyinè' leyaquè'.

*Blu'eyaquè' bdao' pxuzi lu'u idao' r nabè'ra*

21 Guca lao xuna dza bzuyaquè' bdao' tu xēdyidao' ca costumbre quieyaquè'. Bi'zi na' pxubayaquè' lao bdao' JESUS cabè' una ángel ilaobi' tu bīnehua'a María bdao'.

22 Bi'zi baoya' dza ta yeyēri nigula según ca rna lē'ē guichi yu'u ley quie Moisés. Caora na' uza'yaquè' ziolēyaquè' bdao' ciudad Jerusalén ta ulu'eyaquè' bdao' pxuzi lu'u idao' r nabè'ra.

23 Bëyaquë' cana' bzuyaquë' di'idza' con ca naca ley quie Diuzi yu'u lë'ë guichi. Cani rnan lë'ë guichi: "Naca yugulu bdao' byu nëro bi' naca la'iya lao Diuzi."

24 Lena' uyoyaquë' yehua'ayaquë' biu ta uzio pxuzi ren quieba' lao becugo ga zu idao' rñabë'ra. Bzuyaquë' di'idza' cabë' rguixogue'n lë'ë guichi la'iya quie Diuzi cani: "Reya'ala' tzehua'ale lao pxuzi tu pare biu lasi, na' chi bizu biu lasi, hua'ale chopa paloma dao'." Cana' rnën lë'ë guichi.

25 Lëtiempo na' uzu tu ben' lao Simeón zunë' Jerusalén. Naquë' ben' dya'a, rapala'nnë' Diuzi, rbezanë' dza guida ben' ise'ela' Diuzi, ben' ute usela ben' Israel. Yu'ucazi Simeón Bichi Be quie Diuzi.

26 Babzioñe'e Bichi Be quie Diuzi lëbë' de que tu binegatinë' hualë'ënë' ben' naca Cristo, ben' ise'ela' Diuzi.

27 Conlë Bichi Be quie Diuzi ziolë Simeón lu'u idao' rñabë'ra. Bizi cati ziolëyaquë' bdao' lu'u idao' rñabë'ra ta uzuyaquë' di'idza' con ca na lë'ë guichi ley,

28 lëhora na' uzi' Simeón bdao' bnidaguë' bdao' uxubanë'bi' lao zichonë' bëguë' Diuzi ben' ze unë':

29 Xuza' Diuzi, huaca usanlo'në' gatia' cue' chizi lu'u guicho laxta'ohua', dan' babzulo' di'idza' con ca unao' në'ëdi', naca' ben' rue ca mandado re'lenlo' hua'.

30 Conlë laohua' bablë'ëda' ben' ute usela yaca benëchi'.

31 Aose'elo'në' bidë' lao yedyi layu cuenda ilë'ë yaca benëchi' lëbë'.

32 Naquë' ca xni' gui' useni' ta ilë'ë ben' rda lao lato lao chula, yaca ben' binaca ben' Israel.

Nun quienë' gapala'n yaca ben' nita' lao yedyi layu yaca ben' Israel, yaca ben' naca ben' quio'.

33 Na' beban José len zna' bdao' cabë' una Simeón quie bdao'.

34 Na'ra bëla'iya Simeón bdao' gudyinë' María zna' Jesús:

—Naca laza xcuidi' quio' usanla'adyi' Diuzi ben' Israel, yaca ben' bichezila'adyi' lëbi'. Lëzi nacarë lazabi' yezi' Diuzi ben' Israel, yaca ben' chezila'adyi' lëbi'. Huaca quiebi' bichezila'adyi' ben' zë lëbi'.

35 Lëcana' ulu'en ca naca pensari yu'u lu'u laxta'o quie quie yaca benë'. Den' para quio' luë', huacan bayëchi'. Huacan ca quie chezi tu espada huen chopa la'a laxta'olo'.

36 Lëgan' na' uzu tu nigula laohuë' Ana. Udixogue'rënë' di'idza' la'iya quie Diuzi. Banaquë' ben' gula, naquë' zi'i Fanuel, ben' diadza quie Aser. Nenacatë' cuidi' uzi' xquiuhuë' lëbë'. Uzulë'në' xquiuhuë' lao gadyi iza, ude na' guti xquiuhuë'.

37 Bizi tu litza' bega'nnë' napë' tapa galo tapa iza. Pero bipsanla'adyi'në' quie idao' rñabë'ra. Zucazë' te dza len rtze' rulidzë' Diuzi ruenë' ubasi.

38 Cana' bdyin Ana gan' zëyaquë' rëbinë' Diuzi diuxcalelo'. Na'ra uzulao-huë' rguixogue'në' ca naca quie bdao' Jesús para yaca ben' nita' rbeza dza guida ben' ise'ela' Diuzi, ben' ute usela yaca ben' Israel.

### *Bedyinyaquë' yedyi Nazaret*

39 Babeyudyi guca lao yugulute cabë' mandado rue ley quie Diuzi, na'ra beza'yaquë' zeyoyaquë' estado Galilea bedyinyaquë' yedyi quieyaquë' Nazaret.

40 Na' bizi gu'uni bdao', gucabi' bi' huala, bi' rioñe'e. Bëla'iya Diuzi lëbi'.

### *Cabë' guca bega'n Jesús lu'u idao' rñabë'ra*

41 Yugu iza rio José len zna' Jesús ciudad Jerusalén ga ra'ala' lani pascua ta rezala'adyi' yaca ben' Israel dza uza' xuzixta'oyaquë' nación Egipto.



42 Cati uya' Jesús lao chipchopa iza, uyolèbi' xuzi zna'bi' lani ciudad Jerusalén con ca naca biu' benèbi' quieyaquè' rueyaquè' lani pascua.

43 Bizi babeyudyi lani, beza' José len zna' Jesús zeyoyaquè' bigucabè'yaquè' chi bega'n Jesús ciudad Jerusalén.

44 Gucayaquè' pensari zeza' Jesús len yaca ben' zeza' uyorè lani. Cana' guca lao tu dza beza'yaquè'. Caora rna'yaquè' ganu Jesús zeza', udayaquè' rguiloayaquè'bi' lado diazda quieyaquè', len yaca ben' nubè'yaquè', den' ganu Jesús zeza' leyaquè'.

45 Nunu bedzeleyaquè'. Na' beza'yaquè' zeyoyaquè' ciudad Jerusalén tatula ta yeguiloyaquè'bi'.

46 Bizi guca lao tzona dza na', bedzeleyaquè'bi' lu'u idao' r nabè'ra. Re'bi' lado yaca ben' rusèdi di'idza' yu'u lu'u guichi la'iya quie Diuzi. Rzènegabi' ca rnayaquè' rnababi' leyaquè' tu chopa di'idza'.

47 Ca naca yugulu ben' rzènaga can' nabi', tu bega'nziyaquè' bebanziyaquè' ca naca yela' rioñe'e quiebi', lèzi bebanziyaquè' ca naca di'idza' bedyi'ibi' gudyibi' leyaquè'.

48 Bizi caora blè'è xuzi zna'bi' lèbi', tu bega'nziyaquè' bebanziyaquè'. Na'ra unè zna'bi' rëbinè' lèbi':

—Zi'ina', ¿bixquien' bao' cana'? Rdèbindo' quio'. Aodalia' xuzo' reguilondo' luè'.

49 Cana'ra una Jesús rëbinè' leyaquè':

—¿Bixquien' rdale regulole nè'èdi'? ¿Binezile ruen zi uzua' di'idza' hua' mandado quie Xuza'?

50 Bizi leyaquè' biuyoñe'eyaquè' can' una Jesús.

51 Cana' beza'yaquè' zeyoyaquè' yedyi Nazaret, pero ralecazi Jesús quie xuzi zna'bi'. Na' zna'bi' nudze'nè' lu'u guicho laxta'onè' cabè' hë Jesús.

52 Ca naca Jesús na' gu'unibi' uya'abi' pensari. Blè'è Diuzi lèbi' nacabi' bi' huen. Lèzi blè'èrè yaca benè' nacabi' bi' huen.

### 3

#### *Udixogue' Juan bautista xti'idza' Diuzi lao lato ga bidyia yu'u (Mt. 3.1-12; Mr. 1.1-8; Jn. 1.19-28)*

1 Bizi guca lao chi'inu' iza uzu tu ben' lao Tiberio, naquè' gobierno rnabè'ra. Caora na' uzurè itu ben' lao Poncio Pilato, naquè' gobierno quie estado Judea. Lèzi uzurè itu ben' lao Herodes, naquè' gobierno quie estado Galilea. Lèzi uzurè tu bichi Herodes, ben' lao Felipe, naquè' gobierno quie yu nebaba Iturea len yu nebaba Traconite. Lèzi uzurè itu ben' lao Lisantias, naquè' gobierno quie yu nebaba Abilinia.

2 Lèscan' lèiza na', naca Anás len Caifás yaca pxuzi rnabè'ra. Bizi Diuzi bè'nè' tu di'idza' Juan, zi'i Zacarías. Na' zu Juan lao lato ga bidyia yu'u.

3 Cana' uyo Juan lao duze ru'a yao Jordán unè' rëbinè' benè': “Reya'ala' yetza'le pensari quiele cuenda yezi'ze Diuzi dula' xquia quiele, cana'ra hua' laole.”

4 Gucan can' ca bzu Isaiás di'idza' lè'è guichi la'iya quie Diuzi dza na'. Naquè' ben' udixogue' xti'idza' Diuzi unè':

Huazu ben' na' lao lato dachi ga bidyia yu'u, huanè' zidzo rëbinè' laguedyinè' caniga: “Huele hueluba neza quiele cuenda huída ben' naca xa'nro, usalole tu neza li.

5 Yesedza'le ga naca pozo, yeyuele ba'a ga naca loma, yebiolile ga naca neza yuco, yupa'ale ga naca neza stèbi.

6 Cana' ilè'è lao yugulute benèchi' ca hue Diuzi ta ute uselanè' leyaquè'.”

<sup>7</sup> Na'ra cati bdyin yaca benë' ga zë Juan ta hue'në' laoyaquë', lëscan' bdyinrë yaca ben' rnabë' quieyaquë'. Cana' una Juan rëbinë' leyaquë':

—¿Ca naca bëla bia mala, cana' nacaréle! ¿Ca nuži udxogue' le'e ta ilale ca naca tu castigo huala gula baza' bago ilë'ële?

<sup>8</sup> Ulehue quiele tadya'a cuenda ulu'en talicazi aptza'le pensari quiele. Bira inale: “Bihue Diuzi ra'o castigo nun quie nacaro ži'i suba Abraham.” Porque rnia' le'e, hasta len yo niga huazaque' hue Diuzi yaca ben' naca ži'isuba Abraham.

<sup>9</sup> Ca naca quie yaga birbia tažixi, cana' naca quiele. Bade yebandyo puesto ta ichugon yaca yaga birbia tažixi tzu'un tzeina lagui'.

<sup>10</sup> Na'ra unaba yaca benë' nayaquë':

—¿Cabiži re'lenlo' huendo'?

<sup>11</sup> Na'ra una Juan rëbinë' leyaquë':

—Chi de chopa cue' žabale, ulesi' tu cue'n ulehue'n ben' bide zabe. Lëscan' nu yela' huao quiele, ulehue'n ben' bide ta gao.

<sup>12</sup> Biži bdyinrë yaca ben' huequižu ta hue' Juan laoyaquë'. Biži unayaquë' rëbiyaquë' Juan:

—Maestro, ¿cabiži ca huendo'?

<sup>13</sup> Na'ra una Juan rëbinë' leyaquë':

—Ca tu rueži mandado lao ley uquižule yaca benë', bira uquižuleyaquë' de mazara.

<sup>14</sup> Lëzi unabarë bala yaca ben' naca soldado unayaquë':

—Biži nëto', ¿cabiži ca huendo'?

Na'ra una Juan rëbinë' leyaquë':

—Bicubale bicuanle quie benë'. Ni ta utzebile gaole leyaquë' xquia, chi bibi rueyaquë'. Lëscan' ulechezila'adyi' ca tu ta ražule.

<sup>15</sup> Na' biži yaca benë' raqueyaquë' Juan naquë' ben' Cristo.

<sup>16</sup> Na'ra una Juan rëbinë' lao yuguluteyaquë':

—Tali në'ëdi' ru'a laole con nisa, pero zaza'ra ben' udze' Bichi Be quie Diuzi lu'u guicho laxta'o ben' rue quie xti'idza' Diuzi. Pero ben' birue quie xti'idza' Diuzi, udze'në' lëjë' lao gui' gabila. Dera yela' rnabë' quie' ca në'ëdi'. Tanto naquë' ben' belao, ni lë'ëti' bibi zaca' ni siquiera biyeyažoga' cuioga' guidi yu'u ni'anë'.

<sup>17</sup> Bazënë' beladzo' ta ulubë' trigo. Te na' yetupë' trigo yezi'tza'onë'n. Lëzi utuparë' guixi' uzalanë'n lagui' ga tzeina lao gui' bireyula. —Cana' una Juan gudyinë' leyaquë'.

<sup>18</sup> Lëscan' gudyinë' leyaquë' di'idza' zëra unë' udxogue'në' yaca benë' di'idza' la'iya quie Diuzi.

<sup>19</sup> Lëzi udilarë' Herodes, ben' naca gobierno, dan' bezulënë' Herodías žgula bichinë' Felipe. Lëzi udilarënë' lëbë' dan' bëranë' tamala.

<sup>20</sup> Na' biži Herodes, lao laza uzënaguë' quie Juan, bërelë' mazara tamala, bdze'guë' Juan lu'u dyiguiba.

*Ca guca bë' Juan lao Jesús*

*(Mt. 3.13-17; Mr. 1.9-11)*

<sup>21</sup> Ca zatzio Juan lu'u dyiguiba, cati nezënë' ru'enë' lao benë', lëzi bë'në' lao Jesús. Ca zë Jesús rlidzë' Diuzi, cana' uyalo guibá.

<sup>22</sup> Biži caora na' ga zë Jesús, uyëzi Bichi Be quie Diuzi ca rëzi biu. Na'ra unë Diuzi ga zuë' guibá unë':

—Ži'ina' luë'. Nedyë'ëda' luë'. Lega redaohueda' ca ruelo'.

*Ga rguixogue'n quie xuzixta'o Jesucristo*

*(Mt. 1.1-17)*

<sup>23</sup> Jesús bazunë' ca du galobechi iza cati uzulaonë' uduxogue'në' di'idza' la'iya quie Diuzi. Según ca una yaca benë' naquë' zi'i José, dechan' naquë' zi'i suba Elí, ben' naca xuzi María.

<sup>24</sup> Na' naca Elí zi'i Matat, na' naca Matat zi'i Leví, na' naca Leví zi'i Melqui, na' naca Melqui zi'i Jana, na' naca Jana zi'i José,

<sup>25</sup> na' naca José zi'i Matatías, na' naca Matatías zi'i Amós, na' naca Amós zi'i Nahum, na' naca Nahum zi'i Esli, na' naca Esli zi'i Nagai,

<sup>26</sup> na' naca Nagai zi'i Maat, na' naca Maat zi'i Matatías, na' naca Matatías zi'i Semei, na' naca Semei zi'i José, na' naca José zi'i Judá,

<sup>27</sup> na' naca Judá zi'i Joana, na' naca Joana zi'i Resa, na' naca Resa zi'i Zorobabel, na' naca Zorobabel zi'i Salatiel, na' naca Salatiel zi'i Neri,

<sup>28</sup> na' naca Neri zi'i Melqui, na' naca Melqui zi'i Adi, na' naca Adi zi'i Cosam, na' naca Cosam zi'i Elmodam, na' naca Elmodam zi'i Er,

<sup>29</sup> na' naca Er zi'i Josué, na' naca Josué zi'i Eliezer, na' naca Eliezer zi'i Jorim, na' naca Jorim zi'i Matat,

<sup>30</sup> na' naca Matat zi'i Leví, na' naca Leví zi'i Simeón, na' naca Simeón zi'i Judá, na' naca Judá zi'i José, na' naca José zi'i Jonán, na' naca Jonán zi'i Eliaquim,

<sup>31</sup> na' naca Eliaquim zi'i Melea, na' naca Melea zi'i Mainán, na' naca Mainán zi'i Matata, na' naca Matata zi'i Natán,

<sup>32</sup> na' naca Natán zi'i rey David, na' naca rey David zi'i Isaí, na' naca Isaí zi'i Obed, na' naca Obed zi'i Booz, na' naca Booz zi'i Salmón, na' naca Salmón zi'i Naasón,

<sup>33</sup> na' naca Naasón zi'i Aminadab, na' naca Aminadab zi'i Aram, na' naca Aram zi'i Esrom, na' naca Esrom zi'i Fares, na' naca Fares zi'i Judá,

<sup>34</sup> na' naca Judá zi'i Jacob, na' naca Jacob zi'i Isaac, na' naca Isaac zi'i Abraham, na' naca Abraham zi'i Taré, na' naca Taré zi'i Nacor,

<sup>35</sup> na' naca Nacor zi'i Serug, na' naca Serug zi'i Ragau, na' naca Ragau zi'i Peleg, na' naca Peleg zi'i Heber, na' naca Heber zi'i Sala,

<sup>36</sup> na' naca Sala zi'i Cainán, na' naca Cainán zi'i Arfaxad, na' naca Arfaxad zi'i Sem, na' naca Sem zi'i Noé, na' naca Noé zi'i Lamec,

<sup>37</sup> na' naca Lamec zi'i Matusalén, na' naca Matusalén zi'i Enoc, na' naca Enoc zi'i Jared, na' naca Jared zi'i Mahalaleel, na' naca Mahalaleel zi'i Cainán,

<sup>38</sup> na' naca Cainán zi'i Enós, na' naca Enós zi'i Set, na' naca Set zi'i Adán, na' naca Adán zi'i Diuzi.

## 4

### *Gu'un xan' taxi'ibi' iquixi Jesús huenë' tamala* (Mt. 4.1-11; Mr. 1.12-13)

<sup>1</sup> Du yu'u Jesús Bichi Be quie Diuzi zeyoguë' ru'a yao Jordán tatula. Pquië' Bichi Be quie Diuzi lëbë' lao lato ga bidyia yu'u.

<sup>2</sup> Bizi guca uzuguë' lao lato lao chopa galo dza. Na' uyo xan' taxi'ibi' gan' zënë' re'ennan ta iquixi Jesús huenë' tamala. Ca tu lao dza uzunë' na', biudaonë' lega uduenë'.

<sup>3</sup> Na'ra una xan' taxi'ibi' rëbin lëbë':

—Chi dula'adyo' naco' zi'i Diuzi, bë yo niga iyacan yëta xtila.

<sup>4</sup> Na'ra rëbi Jesús len:

—Lë'ë guichi la'iya quie Diuzi rnan caniga: “Cala yela' huaozi uteban yaca benë', lëscan' ca naca di'idza' rnë' Diuzi, utebannan leyaquë'.”

<sup>5</sup> Bizi na'a, xan' taxi'ibi' uquië'n lëbë' lao ya'a sibi, na' blu'en lëbë' lao duze yedyi layu.

<sup>6</sup> Bizi una xan' taxi'ibi' rëbin lëbë':

—Guna' luè' lao yugulu yela' rnabè' quie yedyi layu niga nun quie nacan ladyina'a. Na' hua'a len nu ben' raxeda' hua'a len.

<sup>7</sup> Chi quitzo žibo' laohua' tzionla' adyo' në'èdi', na' guna' lao yuguluten luè'.

<sup>8</sup> Na'ra una Jesús rëbinè'n:

—Bebiga' tzala'la, Satanás, porque lè'è guichi ga yu'u di'idza' la'iya quie Diuzi rnan caniga: “Tuzi Diuzi tzionla' adyi'ro uzuro di'idza' ca mandado ruenè'.”

<sup>9</sup> Ude na' uquiè' xan' taxi'ibi' lèbè' ciudad Jerusalén, urèlèna lèbè' guicho lun idao' rnabè'ra. Na' unan rëbin lèbè':

—Chi dula' adyo' naco' ži'i Diuzi, uxiti gan' niga para layu.

<sup>10</sup> Bigaco' ži' iguinolo' layu como cana' rnan lè'è guichi la'iya quie Diuzi nan:

Ise'ela' Diuzi ángel quienè' ta ina'yaquè' luè' ta bibi gaca quio'.

<sup>11</sup> Hueyuxuyaquè' luè' ta bibi gaca quio', ni yo bihuenan ži' ni'alo'.

<sup>12</sup> Na'ra una Jesús rëbinè'n:

—Lèzi rnarèn lè'è guichi la'iya rnan: “Bihuenèle Diuzi bizinaquezi chi uzunè', chi biuzunè' di'idza' cabè' unè'.”

<sup>13</sup> Bizi bira ubin xan' taxi'ibi' bihuena ta iquixi Jesús huenè' tamala, cana' guca bebiga'n zeyon bibènan Jesús zèdi tu ch'i'.

### *Uzulao Jesús psëdinè' yaca benè' estado Galilea*

(Mt. 4.12-17; Mr. 1.14-15)

<sup>14</sup> Bizi Jesús, du yu'unè' Bichi Be quie Diuzi, zeyoguè' bedyinnè' estado Galilea. Cana' guca gudyi yaca ben' laguedyiaquè' quie quie yedyi re' ga'ala' cabè' rue Jesús.

<sup>15</sup> Psëdinè' leyaquè' lu'u idao' con ga yedyi uyoguè'. Yuguluyaquè' udapala'njè' lèbè'.

### *Beyo Jesús yedyi Nazaret*

(Mt. 13.53-58; Mr. 6.1-6)

<sup>16</sup> Na'ra beyo Jesús yedyi Nazaret ga bgulanè'. Bizi dza saodo, dza huezila' adyi' quieyaquè', uyu'unè' lu'u idao' sinagoga ca rionè' yugu dza huezila' adyi'. Na' uzulinè' rlabè' lè'è guichi ga yu'u di'idza' la'iya quie Diuzi.

<sup>17</sup> Na' bè'yaquè' lèbè' guichi la'iya ta bzu profeta Isaías. Caora blinè'n, na' yetilè' ga rnan cani:

<sup>18</sup> Yu'ucazi Bichi Be quie Diuzi në'èdi' nun quie dan' ulionè' në'èdi' ta quixogui'a di'idza' la'iya quienè' yaca ben' yèchi'.

Lèzi use'ela'rè' në'èdi' ta yeyuežia' yaca ben' raca bayèchi' quie,

lèzi ta hua' libre ca ben' nao xquia quieyaquè' leyaquè',

lèzi ta yelè'è yaca ben' nechula laohue, lèzi ta ute usela' yaca ben' baožaca ži',

<sup>19</sup> lèzi ta quixogui'a yaca benè' babbyin dza hue Diuzi tu cule že quieyaquè'.

<sup>20</sup> Ude na' betubinè' guichi yu'u di'idza' la'iya quie Diuzi, beyu'enè'n ben' naca cuenda lu'u idao' sinagoga, na' bebe'nè'. Bizi yugulu yaca ben' yu'u lu'u idao' sinagoga, bega'nziyaquè' rebanyaquè' rna'yaquè' lèbè'.

<sup>21</sup> Cana' unè' gudyinè' leyaquè':

—Ca naca na'a, babzun di'idza' lè'è guichi bablaba' bele. —Cana' unè'.

<sup>22</sup> Na'ra yugulu benè' unèyaquè' dya'a quienè', tu bega'nyaquè' bebanziyaquè' ca naca di'idza' dya'a gula unè Jesús. Na' bizi unayaquè' rëbiyaquè' laguedyiaquè':

—¿Cala bi' niga ži'i Josè?

<sup>23</sup> Na'ra una Jesús rëbinè' leyaquè':

—Tali huanale në'èdi' cani: “Chi tali naco' ben' rue milagro, bë itun ni ilè'èndo'.” Lëscan' inale në'èdi': “Ca ta babendo' bao' milagro yedyi Capernaum, cana' bërè itun niga yedyi quio' ilè'èndo'.”

<sup>24</sup> Bizi nernë Jesús rëbinë' leyaquë':

—Tali ca rnia' le'e, con gatezi de yedyi rda ben' rguixogue' xti'idza' Diuzi, hualë'ë yaca benë' lëbë' dya'a. Na' biži ben' lao yedyi quienë' biilë'ëyaquë' lëbë' dya'a.

<sup>25</sup> Tali ca rnia' le'e, unita' zë nigula guti xquiuhue yedyi quie yaca ben' Israel dza na' caora uzu profeta Elías. Lëdza na' biben nisayo lao tzona iza yugatzo. Lega ubin huala gula guta' lao yedyi quiejë'.

<sup>26</sup> Pero biuse'ela' Diuzi Elías con garla nita' nigula guti xquiuhue. Tuzi yedyi Sarepta, na' uzu tu nigula guti xquiuhue, lëgan' na' use'ela' Diuzi Elías ga rega'nnan ga'ala' para yedyi Sidón.

<sup>27</sup> Lëzirë unita' zë ben' yu'u yela' hue' ca mal de pindo yedyi Israel caora uzurë ben' naca profeta Eliseo dza na'. Na'ra lëdza na' nurla nuyaca ben' yu'u yela' hue' ca mal de pindo beyaca. Tuzi Naamán, ben' za' yu nebaba Siria, lëben' na' beyaca.

<sup>28</sup> Ca naca yaca ben' yu'u lu'u idao' sinagoga, bdza'tzegueyaquë' babeyaquë' can' una Jesús.

<sup>29</sup> Na'ra uzulyaquë' bëxoyaquë' lëbë' lao yedyi uquië'yaquë' lëbë' lao ya'a zu cuëta yedyi ta utulayaquë' lëbë' zanle.

<sup>30</sup> Pero tu brozi Jesús ladoyaquë' zioguë' ga tula.

### *Beyue Jesús ben' yu'u bichi be xi'ibi'*

(Mr. 1.21-28)

<sup>31</sup> Biži na' bdyin Jesús yedyi Capernaum ga nebaba Galilea. Lëgan' na' uyu'unë' idao' sinagoga ta psëdinë' yaca benë' dza huezila'adyi'.

<sup>32</sup> Bizi yaca benë' tu bebanziyaquë' ca di'idza' rnë' rusëdinë' leyaquë' como dan' cabë' rna ben' rnabë', cana' unë'.

<sup>33</sup> Biži lu'u idao' sinagoga zë tu ben' yu'u bichi be xi'ibi'. Lëben' na' uredyiyane' unë':

<sup>34</sup> —Psan nëto'. ¿Bixquien' zao' ta huelo' nëto' zëdi? Jesús ben' yedyi Nazaret luë'. ¿Cala zao' udyiagui'lo' nëto'? Nubë'da' luë' naco' ben' la'ya, ben' use'ela' Diuzi.

<sup>35</sup> Na'ra udila Jesús bichi be xi'ibi' rëbinë'n:

—¡Chizi, bero ben' na' gan' yu'ulo'!

Caora na' bero bichi be xi'ibi' be'mbyu gan' yu'una, bgu'unnë' layu, denë' zaquë'lao yaca ben' nita' rna'. Na' beron zeyon, ni lë'ëti' bibi zi' guquë'.

<sup>36</sup> Na' bega'n yuguluyaquë' bdzebiyaquë' nayaquë' rëbiyaquë' laguedyiyaquë':

—¿Cabizi una ben' niga? De yela' rnabë' quienë' rnabë'në' yaca taxi'ibi' reron ga yu'uyacan benë'.

<sup>37</sup> Na' cana' guca unezi yaca benë' nita' lao duze yedyi rega'n ga'ala' cabë' bë Jesús.

### *Beyue Jesús ben' gula quie Simón Pedro*

(Mt. 8.14-15; Mr. 1.29-31)

<sup>38</sup> Biži babero Jesús lu'u idao' sinagoga zioguë' zan yu'u quie Simón. Biži ben' gula quie Simón yu'unë' zla huala. Na'ra unabayëchi'yaquë' lao Jesús ta tzanë'ë lëbë'.

<sup>39</sup> Na'ra ude Jesús zionë' gan' de ben' yu'u tala huala. Caora udila Jesús xan' zla, cana' beron, laoyasatenë' bë' laze ta udaoyaquë'.

*Beyue Jesús ben' zë, ben' raca zhue'*

*(Mt. 8.16-17; Mr. 1.32-34)*

<sup>40</sup> Baza' rdze' yehua'a yaca benë' ben' yu'u nacala yela' hue' gan' zë Jesús. Na'ra caora bda' në'ë quie quieyaquë', cana' beyacayaquë'.

<sup>41</sup> Ca naca yaca ben' raca zhue', lëzirë bero bichi be xi'ibi' rbediyi'yacan nayacan rëbiyacan Jesús:

—Luë' naco' zi'i Diuzi.

Bi'zi udila Jesús leyacan bibë'në' lato inëyacan dan' neziyacan lëbë' naquë' Cristo, ben' use'ela' Diuzi.

*Uda Jesús rguixogue'në' xti'idza' Diuzi estado Galilea*

*(Mr. 1.35-39)*

<sup>42</sup> Baoyani' dza tula, bro Jesús zioquë' ru'a yedyila ta sunë' tuzë'. Bi'zi yaca benë' reguiloyaquë' lëbë' na' bedzeleyaquë' gan' zënë'. Re'enyacuë' yega'n Jesús sunë' lënë' leyaquë' gan'.

<sup>43</sup> Na'ra una Jesús rëbinë' leyaquë':

—De tza'a yedyi tula ta tzetixogu'i'a yaca benë' ca r nabë' Diuzi reya'ala' hue quieyaquë' xti'idzë'. Quie lena' use'ela' Diuzi në'ëdi'.

<sup>44</sup> Cana' uyo Jesús udixogue'në' xti'idza' Diuzi lu'u idao' sinagoga quie yaca yedyi estado Galilea.

## 5

*Ca tu milagro bë Jesús con yaca ben' rze bela*

*(Mt. 4.18-22; Mr. 1.16-20)*

<sup>1</sup> Bi'zi bdyin dza uzëguë' ru'a nisa lagun Genesaret. Lega bdyin yaca ben' zë gula hasta rquidi'yaquë' lëbë' dan' re'enyacuë' uzë'nagayaquë' xti'idza' Diuzi.

<sup>2</sup> Na'ra blë'ë Jesús chopa barco dachi zën bago ru'a nisa. Bero yaca ben' rze bela lu'un, re'yaquë' ru'a lagun rguibiyaquë' duyëxo ta rzeyaquë' bela.

<sup>3</sup> Na' uyu'u Jesús tu lu'u barco. Bi'zi barco na' nacan quie Simón. Na' gudyinë' Pedro ta udyiganë'n ta bicue'n ga'ala' ru'a nisa. Na' ure'në' laona uzulaohuë' rusëdinë' yaca benë'.

<sup>4</sup> Babeyudyi psëdinë' yaca benë', na' unë' rëbinë' Simón:

—Ya'lë barco ni ga naca zitu' lao lagun niga. Na' uledze' yëxo quiele lu'u nisa tacuenda tzu'un bela.

<sup>5</sup> Na' una Simón rëbinë' lëbë':

—Maestro, bedu yela uyu'undo' ta sendo' bela, pero ni tuba' bibdula' quiendo'. Den' chi luë' nao', udzi'a yëxo lu'u nisa.

<sup>6</sup> Bi'zi babdze'yaquë' yëxo lu'u nisa uyu'una bela zë gula. Tanto bedza'n uyu'un bela na', urügu du lë'ë yëxo.

<sup>7</sup> Cana' bëlëyaquë' na'ayaquë' seña ta guida ben' yu'u lu'u barco tula ta gacalëyaquë' leyaquë'. Na'ra zioyaquë' psedza'yaquë' bela lao rupate barco. Tanto yela' zi'i quieyacan, bare'en yetuyacan lu'u nisa.

<sup>8</sup> Bi'zi bë' blë'ë Simón Pedro can' guca, na' uditzu žibinë' ure'në' lao Jesús unë' rëbinë' lëbë':

—Bibi zaca' conlë luë', porque naca' ben' napa dula' xquia.

<sup>9</sup> Una Simón can', dan' bdzebinë' lente yaca ben' zëlënë'. Blë'ëyaquë' can' guca uzëyaquë' bela zë gula.

<sup>10</sup> Lëzi Santiago len bichibi' Juan, ži'i Zebedeo, nacayaquë' tuzi len Simón, bdzebitzegueyaquë'. Na'ra una Jesús rëbinë' Simón:

—Bidzebo', desde na'a cabë' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

11 Biži babedyinyaquë' len barco quieyaquë' ru'a nisa, na' pca'nyaquë'n uzi'yaquë' uza'yaquë' ziolëyaquë' Jesús.

*Beyue Jesús ben'yu'u yela' hue' ca mal de pindo*  
(Mt. 8.1-4; Mr. 1.40-45)

12 Biži bazu Jesús lao yedyi, bdyin tu ben'yu'u yela' hue' ca mal de pindo. Biži bē' blē'ēnē' Jesús, uditzu žibinē' ure'nē' bda'te laohuē' layu unabayēchi'nē' rēbinē' Jesús:

—Señor, chi re'enlo' huaca yeyuelo' nē'ēdi'.

13 Na'ra bda' na'a Jesús ben' na' rēbinē' lēbē':

—Re'enda' yeyua' luē'.

Ca unē' cana', biži labežite yela' hue' naca ca mal de pindo yu'u ben' na'.

14 Na'ra bē' Jesús mandado rēbinē' lēbē':

—Ni tu nunu yēbo' can' babia' quio'. Tuzi ta rnia' luē', uyo yalu'e cuinlo' lao pxuzi. Na' bē' pxuzi tu ta reya'ala' hue'lo'nē' ca ta rnabē' lē'ē guichi ley quie Moisés tanun quie babeyēri'lo'. Huelo' can' ta inezi yaca benē' babeži yela' hue' yuyu'ulo'.

15 Pero mazera unezi yaca benē' cabē' rue Jesús. Bdyin ben' zē gula gan' zēnē' ta rzēnagayaquë' ca rnē', lēzirē ta yeyuerēnē' nacala yela' hue' yu'uyaquë'.

16 Biži zio Jesús lao lato ga binita' yaca benē'. Lēgan' na' rulidzē' ru'elēnē' Diuzi di'idza'.

*Beyue Jesús tu ben' zi*  
(Mt. 9.1-8; Mr. 2.1-12)

17 Biži bdyin tu dza rusēdi Jesús yaca benē'. Lēgan' na' re' yaca ben' naca partido fariseo len yaca ben' rsēdi ley quie Moisés. Uza'yaquë' yedyi quie estado Galilea len yedyi quie estado Judea, len ciudad Jerusalén. Biži na'a, conlē yela' huaca quienē', gucalē Diuzi Jesús, beyuenē' yaca ben' raca žhue'.

18 Lēscana' bdyin yaca ben' nu'a ben' ži lao belaga. Re'enyaquë' udze'yaquë' lēbē' lu'u yu'ute ta quixoyaquë' lēbē' lao Jesús.

19 Biži biužaquë'yaquë' tzu'ulëyaquë' ben' ži lu'u yu'u dan' nita' ben' zē gula. Na' urëyaquë' lun yu'u udubayaquë' teja, bzuyaquë' tu yero cuenda pchizayaquë' belaga ga žuba ben' ži, psedyinyaquë' lēbē' gatzo lao' ga nita' benē' zaquë'lao lao Jesús.

20 Caora blē'ē Jesús rueyaquë' pensari huaca Jesús yeyuenē' ben' ži, na'ra unē' rēbinē' lēbē':

—Rnia' luē', aoži'zia' dula' xquia quio'.

21 Biži yaca ben' rsēdi ley quie Moisés, len yaca ben' naca partido fariseo, gucayaquë' pensari unayaquë': “¿Nuži ben' niga rnaya'nē' Diuzi rnē' can'? Ni tu benē' bisaquë' yezi'žeyaquë' dula' xquia quie laguedyiyaquë'. Tuzi Diuzi naquë' ben' yezi'že quiero.”

22 Na'ra banezi Jesús cabē' naca pensari racayaquë'. Na' una Jesús rēbinē' leyaquë':

—¿Bixquien' racale pensari cana'?

23 ¿Ca nurlan nacaran yalo hua' quie ben' ži niga? ¿Nacaran yalo chi yēpa'nē': “Aoži'zia' dula' xquia quio'”, o chi nacaran yalo yēpa'nē': “Uyasa, beži' belaga quio', beza', beyo'”?

24 Pues can' hua' ta ulu'ena' le'e de yela' rnabē' quia', naca' bichi yugulu benē', ta yezi'zia' dula' xquia quie yaca ben' nita' lao yedyi layu.

Na'ra unē' rēbinē' ben' ži:

—Rnia' luē', beyasa, beži' belaga quio', beyo žan yu'u quio'.

25 Cana' labeyasate ben' zi zaca'lao yaca ben' nita' rna', bezi'nè' yada quiè' ga uzubanè'. Na' bezè'è zeyoguè' zan yu'u quiè' ruenè' Diuzi ben' ze.

26 Bizi lao yugulute yaca ben' nita' rna', bëyaquè' Diuzi ben' ze. Tu bebanziyaquè' can' guca quie ben' zi. Du rdzebiyaquè' unayaquè' rèbiyaquè' laguedyiaquè':

—Tu ta binelè'ëro babè ben' niga.

### *Ulio Jesús Leví*

*(Mt. 9.9-13; Mr. 2.13-17)*

27 Ude beyudyi bë Jesús can', uzè'è zioquè' blè'ënè' tu ben' huequižu laonè' Leví. Lèben' na' re'nè' ga rquižuguè' benè'. Na' unè' rëbinè' lèbè':

—Uda, unao nè'èdi'.

28 Bizi uzuli Leví pca'nnè' ta de quienè' zioquè' naohuè' Jesús.

29 Ude na', bë Leví tu lani ze zan yu'u quienè' ruenè' Jesús ben' ze. Lèzi bdyinrè mazara ben' huequižu, len yaca ben' tula ure'yaquè' lao mesa.

30 Bizi yaca ben' naca partido fariseo, len yaca ben' rsèdi ley quie Moisés udilayaquè' ben' quie Jesús unayaquè' rèbiyaquè' leyaquè':

—¿Bixquien' raole ri'olèle tzaže len yaca ben' huequižu, len yaca ben' de dula' xquia quie?

31 Na'ra una Jesús rëbinè' leyaquè':

—Ben' zu dya'a, ben' biruca žhue', biruen zi guida ben' yeyue lèbè'. Pero ben' raca žhue', ruen zi guida ben' yeyue lèbè'.

32 Cala bida' rbioga' yaca ben' raca pensari bibi dula' xquia quie de, dechan' bida' rbioga' yaca ben' nezi de dula' xquia quie tacuenda yetza'yaquè' pensari quieyaquè'.

### *Unabayaquè' Jesús quie ubasi*

*(Mt. 9.14-17; Mr. 2.18-22)*

33 Na'ra unabayaquè' rèbiyaquè' Jesús:

—Ablè'èndo' yaca ben' quie Juan len yaca ben' naca partido fariseo, ruyaquè' ubasi rli dzayaquè' Diuzi yugu dza, na' yaca ben' quio', ¿bixquien' ri'o raoziyaquè', biruejè' ubasi?

34 Na'ra una Jesús rëbinè' leyaquè':

—¿Re'enle hue yaca ben' naca amigo, yaca ben' babdyin gan' raca huetzagan' ubasi tu nezu ben' utzagan' len yaca amigo quienè'?

35 Bizi rnia' le'e, huadyin dza cati bira zulè ben' utzagan' len yaca amigo quienè'. Lèscan'ra hue yaca amigo quienè' ubasi.

36 Lèzi unè' Jesús itu ejemplo cani:

—Bireya'ala' yeda' la'ari' cubi lè'è la'ari' gula cati binetzèri la'ari' cubi. Huaza'laoran ichezan la'ari' gula, udyiaqui'ran len, biyega'nnan lèbizi.

37 Lèscan' bireya'ala' ca'ro nupi zixi tu lu'u guidi bolsa gula, porque chi ca'ro nupi zixi lu'u guidi bolsa gula, huachezan len huabiaguì' lao rupa cue'n.

38 Lena' re'ennan tzudzu nupi zixi lu'u bolsa guidi cubi ta sibe'n zi dza, birezan. Lècana' bicuiaguì' lao rupaten.

39 Lèscan' quie nu ben' ri'o puro nupi huala bire'enaquè' yo'oyaquè' nupi zixi. Huanayaquè': "Nupi huala nacaran huen ta yo'oro."

## 6

### *Uditzu ben' quie Jesús lao trigo dza huezila'adyi'*

*(Mt. 12.1-8; Mr. 2.23-28)*



<sup>1</sup> Biži guca tu dza huezila'adyi', uza' Jesús lënë' yaca ben' quienë' zioyaquë' udeyaquë' layela ga neduza trigo. Na' uditzu yaca ben' quienë' laon ta rchibiyaquë'n ta gaoyaquë'n.

<sup>2</sup> Na'ra una yaca ben' naca partido fariseo rëbiyaquë' Jesús:

—¿Bixquien' ruele dyin uditzule lao bini trigo na'a dza huezila'adyi', dza bireya'ala' huero dyin?

<sup>3</sup> Na'ra una Jesús rëbinë' leyaquë':

—¿Binelabale lë'ë guichi la'iya quie Diuzi cabë' bë rey David dza uduenë' lënë' yaca benë' quienë'?

<sup>4</sup> Uyu'unë' lu'u idao' rñabë'ra, uži'në' yëta xtila naca la'iya ta ru'e pxuzi Diuzi. Na' udao rey David len, lëscan' bë'në'n yaca ben' dzaganë'. Caora na' udaoyaquë' ta bireya'ala' gaoyaquë'. Udaoyaquë' ta reya'ala' gao pxuzizi.

<sup>5</sup> Na' unë' Jesús rëbinë' leyaquë':

—Në'ëdi', bichi yugulu benë', de yela' rñabë' quia' ta hua' mandado bi hue yaca benë' dza huezila'adyi'.

### *Beyue Jesús tu ben' neseco në'ë*

*(Mt. 12.9-14; Mr. 3.1-6)*

<sup>6</sup> Biži bezu itu dza, dza huezila'adyi', uyu'u Jesús lu'u idao' sinagoga bezulahuë' rusëdiguë' benë'. Biži na'a zë tu ben' neseco në'ë yebë.

<sup>7</sup> Lëzi zërë ben' rsëdi ley quie Moisés, len yaca ben' naca partido fariseo, rbe'naoyaquë' chi hueyue Jesús ben' neseco në'ë dza huezila'adyi' tacuenda ga gaoyaquë' lëbë' xquia.

<sup>8</sup> Pero banezi Jesús ca naca pensari quieyaquë'. Na'ra unë' blidzë' ben' na'a bidiy:

—Rnia' luë', uzuli uda, desë gatzo lao' ni.

Na'ra ude ben' neseco në'ë, yasënë' gatzo lao'.

<sup>9</sup> Na'ra una Jesús rëbinë' leyaquë':

—Re'enda' inabacara' le'e tu di'idza' ¿ca bidan' reya'ala' huero dza huezila'adyi'? ¿Ru'en lato huero tahuen o huero tamala? ¿Ru'en lato ute uselaro benë' o chi gutiro benë'?

<sup>10</sup> Biži Jesús una'në' yaca ben' nita' gan' zënë'. Ude na' unë' rëbinë' ben' neseco në'ë:

—Bli na'alo'.

Caora bli na'a ben' neseco në'ë, beyacaten dya'a.

<sup>11</sup> Biži yaca ben' nita' na', lega bdza'tzegueyaquë' unayaquë' rëbiyaquë' laguediyayaquë':

—¿Ca bizi huero quie ben' niga ta bira huenë' ca ruenë'?

### *Ulio Jesús lao chipchopa ben' gaca ben' quienë'*

*(Mt. 10.1-4; Mr. 3.13-19)*

<sup>12</sup> Biži bezu dza tula uza' Jesús uyoguë' ga zu tu ya'a ta hue'lënë' Diuzi di'idza'. Lao bedu yela bë'lënë' Diuzi di'idza'.

<sup>13</sup> Biži baoyeni' dza tula, gužinë' yaca ben' quië', ulioguë' lao chipchopa yaca ben' gaca ben' quië', ben' gaca apóstol.

<sup>14</sup> Lëyaca ben' rguixogue'n laohue niga: Ulioguë' Simón, na' uxuba Jesús laohuë' Pedro. Lëscan' ulioguë' Andrés, bi' bichi Simón, len Santiago, len Juan, len Felipe, len Bartolomé,

<sup>15</sup> len Mateo, len Tomás, len Santiago ži'i Alfeo, len Simón, ben' naca tu cue' partido cananista,

<sup>16</sup> len Judas, bi' bichi Santiago, len Judas Iscariote, ben' usedyin Jesús lao na'a yaca ben' rñabë'.

*Psëdi Jesús yaca ben' zë**(Mt. 4.23-25)*

<sup>17</sup> Na' beyëzi Jesús lao ya'a len yaca ben' quienë'. Yazëyaquë' ga naca yu lachi'. Lëgan' na' nita' ben' zë. Lëgan' na' zërë ben' uza' estado Judea, len ben' nita' ciudad Jerusalén, len yaca ben' uza'rë bago ru'a nisadao' ga re' yedyi Tiro len yedyi Sidón. Lëleyaquë' bdyinyaquë' ta uzënagayaquë' bi na Jesús len ta yeyue Jesús yaca ben' raca žhue'.

<sup>18</sup> Yaca ben' redzagalao, yaca ben' yu'u bichi be xi'ibi', beyue Jesús leyaquë' beyacayaquë'.

<sup>19</sup> Lao yugulu yaca benë' re'enyacuë' uda' na'ayaquë' Jesús, dan' nezियाquë' con yela' huaca quienë' yeyuenë' leyaquë' chi bi yela' hue' yu'uyaquë'.

*Ca gaca ta yedaohuero len ca gaca ta biyedaohuero**(Mt. 5.1-12)*

<sup>20</sup> Na'ra una' Jesús yaca ben' quienë' na' unë':

—Yedaohue le'e chi racayëchi'le ca naca dula' xquia babële, dan' naca quiele ga r nabë' Diuzi.

<sup>21</sup> Yedaohue le'e chi re'enle gata' ta yu'u ni'a xnezi quie Diuzi cabë' gue'en ben' rdue gaohuë', porque dan' gata'cazi quiele ca re'enle gata'.

Yedaohue le'e chi racayëchi'le rbedyile ca dula' xquia de lao yedyi layu, porque dan' huadyin dza sule gusto užidyile.

<sup>22</sup> Yedaohue le'e cati rudie benë' le'e, cati rbioyaquë' le'e tzala'la, cati utasi unioyaquë' le'e, cati inëyaquë' nacale ben' mala tanun quie dan' naole në'ëdi', ben' naca bichi yugulu benë'.

<sup>23</sup> Reya'ala' yedaohuetzeguele bë' gaca quiele cana', dan' huata' tu tadya'a gula quiele cati bazule guibá. Con can' psaca xuzixta'o yaca ben' nita' na'a, udila unëlyaquë' yaca ben' udixogue' xti'idza' Diuzi, cana' usacarëyaquë' le'e.

<sup>24</sup> Beyëchi' gula nacan quie le'e, ben' uña'a, ben' binao xneza Diuzi, porque ca tu ta dezi lao dyilayu niga naca quiele, bira gata' mazara.

<sup>25</sup> Beyëchi' gula nacan quie le'e, ben' detzague ta gao, ben' birlidza Diuzi, porque huadyin dza tuele, bira gata' ta gaole.

Beyëchi' gula nacan quie le'e, ben' redaohue ružidyi, ben' birue quie xti'idza' Diuzi, porque huadyin dza cuedyile cabë' bayëchi' za' gaca quiele.

<sup>26</sup> Beyëchi' gula nacan quie le'e, chi ilë'ë yugulu benë' le'e ben' dya'a, dechan' binacale ben' dya'a, porque cana' bë xuzixta'o ben' niga, blë'ëyaquë' ben' dya'a ben' nazi rguixogue'yaquë' xti'idza' Diuzi, den' ben' huizi' yë'.

*Reya'ala' idyë'ëro yaca ben' rudie ra'o**(Mt. 5.38-48; 7.12)*

Na' una Jesús rëbinë' leyaquë':

<sup>27</sup> —Pero le'e ben' ruzënaga ca rnía', reya'ala' idyë'ële yaca ben' rdza' rgüin' le'e, huele tadya'a lële ben' rudie le'e.

<sup>28</sup> Inabale tadya'a lao Diuzi quie ben' rudze'de' le'e, ulidzale Diuzi gaca tahuen quie ben' rutasi runio le'e.

<sup>29</sup> Chi nu benë' rgapa' xagale, ulehue'në' itzala'n capanë'. Chi nu benë' rguba gabán quiele, ulehue'në' lente camisa quiele.

<sup>30</sup> Ulehue' nutezi benë' ta inabayaquë' le'e. Chi nu yaca ben' aozì'yaquë' ta de quiele, biyenabalen.

<sup>31</sup> Ulehuelë yaca benë' con cabë' re'enle huelë yaca benë' le'e.

<sup>32</sup> Chi le'e nedyë'ële tuzi ben' nedyë'ë le'e, bihuele pensari tadya'a ruele, porque lente yaca ben' mala ruerëyaquë' can'.

<sup>33</sup> Chi le'e ruele tadya'a len tuzi ben' rue tadya'a len le'e, bihuele pensari tadya'a ruele, porque lente yaca ben' mala ruerëyaquë' can'.

<sup>34</sup> Chi le'e hue'le presta tuzi ben' runrë le'e presta, bihuele pensari tadya'a ruele, porque lente yaca ben' mala ru'erëyaquë' presta tuzi ben' ru'erë presta leyaquë'.

<sup>35</sup> Pero le'e, reya'ala' idyë'ële ben' rudie le'e, reya'ala' huelële yaca benë' dya'a, reya'ala' hue'leyaquë' ta inabayaquë' presta, biinabale yeyueyaquë' laohue quiele. Chi huele cabë' rnia', tazera gun Diuzi quiele. Chi huele cabë' rnia', leña' ulu'en tali nacale ben' quie Diuzi zu sibi. Rnia' le'e, huele ca rue Diuzi, porque naca Diuzi ben' dya'a gula. Tuzi ca rue Diuzi ruenë' tadya'a lente yaca ben' birëbi lëbë' diuxcalelo', ben' birue tahuen.

<sup>36</sup> Reya'ala' idyë'ële yaca benë' cabë' nedyë'ë Xuziro Diuzi yaca benë'.

*Bireya'ala' inëbızoro quie laguedyiro*  
(Mt. 7.1-5)

Na' una Jesús:

<sup>37</sup> —Biinëbızole quie laguedyile, cana' biyeyue bizo Diuzi len le'e. Biudyiagui'le laguedyile, yela' na' biudyiagui'rë Diuzi le'e. Yezi'zele quie laguedyile, yela' na' yezi'zerë Diuzi quiele.

<sup>38</sup> Hue'le ta de quiele ben' bide quie, cana' yeyun Diuzi le'e ta de quienë'. Ca rue Diuzi biyeyunnë' lë'ëti'zin, hueyunnë' mazara ta yuñ'a'a ta de quienë'. Con ca huelële laguedyile, cana' huelë Diuzi le'e.

<sup>39</sup> Na'ra una Jesús unë' tu chopa di'idza' ni:

—¿Huazaque' usa' tu ben' laochula itu ben' laochula? ¿Cala huaguinu lao rupateyaquë' lu'u ga naca stëbi?

<sup>40</sup> Nu ben' bineyudyi huesëdi quie, binegaquë' ca raca maestro quienë'. Pero nu ben' babeyudyi huesëdi quie, na'ra gacanë' ca tu raca maestro quienë'.

<sup>41</sup> ¿Como dyë'ëdi rna'le bëbi dao' yu'u lu'u lao bi' bichile? ¿Na' laole le'e, birna'le yu'un bicho yaga?

<sup>42</sup> ¿Como reya'azole rëbile bi' bichile: “Bicha', ben lato yebioga' bëbi dao' yu'u laolo'”? ¿Na' birezaquele quiele cuinle yu'un bicho yaga? ¿Le'e ben' birue tuzi ca nale! Tanëro ulebïo bicho yaga yu'u lu'u laole, cana'ra hualë'ële dyë'ëdi ta yebïole bëbi dao' yu'u lao bi' bichile.

*Según ca naca ta rbialao yaga, rlë'ëro chi yaga dya'a, chi yaga median*  
(Mt. 7.17-20; 12.33-35)

Na' una Jesús:

<sup>43</sup> —Birbia yaga dya'a tu ta naca sla'. Lëzirë birbia tazixi yaga median.

<sup>44</sup> Pues quie quie yaga rlë'ëro chi yaga dya'a, chi yaga median, según ca naca ta rbialaon. Bicua higos lao yaga yëchi'. Lëscan' bicua bedzuli' lao luba yëchi'.

<sup>45</sup> Lëzi be'mbyu huen, di'idza' huen rero lu'u laxta'onë' rnënë'. Na' biži be'mbyu mala, di'idza' mala rero lu'u laxta'onë' rnënë'. Porque dan' según ca naca ta yu'u lu'u laxta'o benë', chi tahuen, chi tamala, cana' iron lu'u laxta'oyaquë' inëyaquë'.

*Ga ru'en di'idza' quie lao rupa cue' ga bëyaquë' yu'u*  
(Mt. 7.24-27)

Na' una Jesús:

<sup>46</sup> —¿Bixquien' nale në'ëdi!, “Señor, Señor”, na' birue quiele ca rnia'?

<sup>47</sup> Nia' le'e ca naca quie ben' nao në'ëdi!, ben' rue quie ca nia'.

<sup>48</sup> Lēcana' naca quie ben' bē yu'u quie, pqui'nnē' zitu' lu'u yu ta pcua'nē' besu quie yu'u. Caora baben tu yusiu' huala, biuzaque'n usuri'n besu, dan' yu'un zitu' yu.

<sup>49</sup> Na' bizi ben' re ca rnia', pero biruenē' nē'ēdi' casa ca rnia', naca quiē' ca quie ben' pcua' besu delao yuzi. Caora baben tu yusiu' huala, caora na' pquinun besu, bguinu yu'u, bega'nten lao lato.

## 7

### *Beyue Jesús ben' criado quie ben' romano, ben' naca xan' soldado (Mt. 8.5-13)*

<sup>1</sup> Bizi cati beyudyi unē Jesús gudyinē' yaca benē', na' bezē'ē zioguē' yedyi Capernaum.

<sup>2</sup> Lēgan' na' zu tu ben' romano, ben' rnabē' soldado, naquē' capitán. Bizi zu tu criado quienē', ben' nedyē'ēnē', tahuala raca zhue'nē', bagazi gatinē'.

<sup>3</sup> Bizi cati be capitán babdyin Jesús gan', na' use'elē' tu ben' rnabē' quie yaca ben' Israel ta inabayēchi'nē' chi biguida Jesús yeyuenē' ben' de raca zhue'.

<sup>4</sup> Bizi bē' bdyinyaquē' ga zē Jesús, na' unēyēchi'yaquē' rēbiyaquē' lēbē':

—Ben' naca xan' soldado, naquē' ben' huen, zaca'nē' huelo' ca cule re'ennē',

<sup>5</sup> dan' rlē'ēnē' yaca ben' yedyi quiero ben' huen. Lēlēbē' bēnē' mandado bēyaquē' idao' sinagoga quiero.

<sup>6</sup> Na'ra uza' Jesús ziolēnē' leyaquē'. Bizi baidyinyaquē' bago zan yu'u quie xan' soldado, na' use'ela' xan' soldado yaca ben' nacalēnē' amigo rēbiyaquē' Jesús:

—Señor, ni tu bigaco' zēdi, porque bibi zaca' ta guido' tzu'ulo' lu'u yu'u quia'.

<sup>7</sup> Tana' lena' bibeyazoga' guida' cuina' dena'a luē'. Con tu di'idza'zi inao' iyaca criado quia' hueyacabi'.

<sup>8</sup> Bizi zu ben' rnabē' nē'ēdi'. Lēzirē nacara' ben' rnabē' quie soldado. Cati hua' mandado ga tzioyaquē', huayoyaquē'. Lēzi cati hua' mandado guidayaquē', huidayaquē'. Lēzi cati rueria' mandado criado quia', ruebi' yugute ta rua'bi' mandado.

<sup>9</sup> Cati be Jesús ca una xan' soldado, tu bebanzi Jesús ca unē'. Na'ra una'nē' ga nita' yaca ben' nao lēbē', unē' rēbinē' leyaquē':

—Tali načan. Ni tu yaca ben' Israel, binelē'ēda' ben' hue quie cabē' rue ben' niga, rzudyi'ilēnē' nē'ēdi'.

<sup>10</sup> Bizi bē' bedyin yaca ben' use'ela' xan' soldado zan yu'u quiē', bedyinyaquē' rna'yaquē' babeyaca ben' criado, ben' raca zhue'.

### *Beseban Jesús zi'i nigula nati xquiuhue*

<sup>11</sup> Baode guca can', na' uza' Jesús ziolēnē' yaca ben' quienē' yedyi lao Naín. Lēzi ziorē ben' zē len leyaquē'.

<sup>12</sup> Bizi cati bdyin Jesús bago ru'a yedyi, blē'ēnē' banu'ayaquē' ben' huati ta tzacachi'yaquē' lēbi'. Bizi bi' guti nacabi' zi'i nigula nati xquiuhue. Tuzi bi' na' uzu quienē'. Ziolē yaca ben' zē, ben' lao yedyi, len nigula na'.

<sup>13</sup> Bizi bē' blē'ē Jesús nigula na', beyēchi'la'adyi'nē' lēbē', unē' rēbinē' lēbē':

—Bicuedyo'.

<sup>14</sup> Na' ubiga' Jesús yeda' nē'ē lē'ē caja quie bi' huati. Cana' uleza yaca ben' nu'a lēbi'. Na'ra unē Jesús rēbinē' bi' huati:

—Xcuidi', rnia' luē': ¡Beyasa!

15 Caora na' uyasabi' gan' debi' lu'u caja quiebi', are'bi', rnëbi'. Na'ra beyu'e Jesús lëbi' zna'bi'.

16 Biži caora blë'ë yaca ben' nita' na', lega bdzebiyaquë'. Bëyaquë' Diuzi ben' ze unayaquë' rëbiyaquë' laguediyiaquë':

—Babla' tu ben' rue yela' huaca, ben' use'ela' Diuzi ladoro gan' nita'ro.

Lëzi unarëyaquë':

—Diuzi baose'elë' ben' ni ta gacalënë' ben' Israel, ben' yedyi quienë'.

17 Cana' guca unezi yaca ben' quie estado Judea, len yaca ben' yedyi re' bago con can' bë Jesús.

*Aose'ela' Juan ben' quienë' ta yenabayaquë' Jesús tu di'idza' (Mt. 11.2-19)*

18 Biži be Juan cabë' yela' huaca bë Jesús nun quie gudyi ben' quienë' lëbë' cabë' rue Jesús.

19 Cana' gužinë' chopa ben' quienë' ta uyoyaquë' yenabayaquë' Jesús chi tali naquë' ben' una Diuzi ise'ela'në', ben' rbezayaquë' guida, o chi cala lëbë'.

20 Yaca ben' use'ela' Juan bdyinyaquë' ga zë Jesús rëbiyaquë' lëbë':

—Use'ela' Juan bautista nëto' ta denabando' luë' chi naco' ben' una Diuzi ise'ela'në', o chi reya'ala' nita'ndo' cuzando' guida ben' tula.

21 Biži caora nita'lëyaquë' Jesús, blë'ëyaquë' beyue Jesús nacala yela' hue' mala yu'u yaca benë', beyacayaquë'. Lëzi blë'ëyaquë' bebionë' bichi be xi'ibi' yu'u yaca benë', blë'ëyaquë' beyuenë' yaca ben' laochula, ben' birlë'ë, belë'ëyaquë'.

22 Na'ra una Jesús rëbinë' yaca ben' quie Juan:

—Uleyo uletzetixogue' Juan ca ta babia' bablë'ële babele. Uleyëbinë' quie yaca ben' laochula, barelë'ëyaquë', lëscan' quie yaca ben' zi, baredayaquë', lëscan' quie yaca ben' yu'u yela' hue' ca mal de pindo, areyëriyaquë', lëscan' quie yaca ben' xcuedzo, bareyeyaquë', lëscan' quie yaca ben' baguti, rebanyaquë' tatula. Na' biži yaca ben' yëchi', rguixogui'ayaquë' di'idza' la'iya quie Diuzi.

23 Yedaohue yaca ben' biyeyati inao në'ëdi'. —Cana' una Jesús gudyinë' ben' quie Juan.

24 Biži cati zeyo yaca ben' use'ela' Juan, na' uzulao Jesús rëbinë' yaca benë' ca naca quie Juan, unë' rëbinë' leyaquë':

—¿Nuži uyole yena'le lao lato ga bidyia yu'u? ¿Uyole yena'le tu ben' yun'la'adyi' ca raca tu zisi ržizi rdan bë' rda be bedun'?

25 Chi biuyole yena'le ben' yun'la'adyi', ¿nuži uyole yena'le? ¿Uyole yena'le ben' zutzao', ben' naco la'ari' dya'a? Le'le dyë'ëdi banezile ben' naco la'ari' dya'a, ben' zu lu'u yu'u dya'a, nita'yaquë' lao' yedyi ga zu rey, binita'yaquë' lao lato ga bidyia yu'u.

26 Pues ca rnia' le'le, ¿nuži uyole yena'le? ¿Uyole yena'le ben' rguixogue' di'idza' la'iya quie Diuzi? Talicazi rguixogue' Juan di'idza' la'iya quie Diuzi. Nacarë' ben' ze ca ben' udixogue' xti'idza' Diuzi dza na'tela.

27 Lëquie Juan rnën lë'ë guichi la'iya quie Diuzi cani:

Huase'ela' ben' cuialao neza tzetixogue'në' yaca benë' yëbinë' leyaquë' cani: “Ca rue ben' rluba neza, ben' rue dya'a xnezi, cana' huele utza'le pensari quiele, dan' baza' ben' ise'ela' Diuzi.”

Cana' rnën lë'ë guichi la'iya quie Diuzi.

28 Na'ra ca rnia' le'le, entre lado yaca ben' nita' lao yedyi layu niga, nunura ben' udixogue' xti'idza' Diuzi zu nacara ze ca Juan. Na' biži, ben' zu guibá, ben' birnabë'tica ga zu Diuzi, nacaranë' ze ca Juan.

29 Na' biži yaca ben' huequižu, ben' bē' Juan laohue, len yaca los demás ben' bē' Juan laohue, caora beyaquē' ca una Jesús, bezaqueyaquē' naca Diuzi ben' rue tali, ben' rue ta yu'u ni'a xnezi.

30 Na' biži yaca ben' partido fariseo, len yaca ben' rusēdi ley quie Moisés, yaca ben' bibē lato hue' Juan laohue, bigu'unyaquē' ca tadya'a gu'un Diuzi hue Juan quieyaquē'.

31 Na' una Jesús rēbinē' yaca ben' na':

—¿Ca bi ejemplo ulu'en cabē' naca pensari quie yaca ben' nita' na'a? ¿Ca bi ejemplo rnaban ta hua' di'idza' cabē' rueyaquē'?

32 Rue yaca ben' nita' na'a ca quie xcuidi' re' lao ye'eya rēbiyacabi' laguediyacabi': “Rcuedyindo' flauta, na'ra biquitule biuya'ale. Rulando' canción bayēchi', lēscan' biuredyile.”

33 Cana' naca quiele, porque bida Juan bautista, biudaonē' pan, bihue'enē' vino, na' le'e unale yu'unē' bichi be xi'ibi'.

34 Lēzi nē'ēdi', bichi yugulu benē', bida' raohua' ri'oga', na' le'e unale naca' ben' ri'o raolé'ē, ben' naca amigo quie ben' de dula' xquia quie, len yaca ben' huequižu.

35 Pero yaca ben' naocazi xneza Diuzi, lēleyaquē' rulu'eyaquē' ca naca quie yela' rioñe'e quie Diuzi.

*Jesús unēnē' di'idza' ni zan yu'u quie Simón, ben' naca partido fariseo*

36 Biži gudyi tu ben' naca partido fariseo Jesús chi biguidē' zan yu'u quienē' ta gaohuē'. Na'ra bdyin Jesús uyu'unē' lu'u yu'u ure'nē' lao mesa.

37 Lēlao yedyi na' zu tu nigula mala. Caora unezinē' babdyin Jesús zan yu'u quie ben' naca partido fariseo, na'ra uzē'ē zan yu'u quie' nu'ē tu frasco alabastro yudzon aceite rla' zixi zēo.

38 Na' ure'nē' xni'a Jesús uzulaonē' rbedyinē', rla'onē' nisa rero laohuē' ni'a Jesús. Ude na' rzi'nē' guitza' guichonē' resebidyinē' ni'a Jesús, raonē' situ ni'a Jesús, uzī'nē' aceite rla' zixi zēo, bla'onē'n ni'a Jesús.

39 Biži ben' naca partido fariseo, ben' bē' ta udao Jesús, cati blē'ēnē' cabē' bē nigula, na' guquē' pensari unē': “Chi tali ben' niga naquē' ben' use'ela' Diuzi, huacabē'nē' ca naca nigula rqui' lēnē', dan' naquē' nigula mala.”

40 Na'ra una Jesús rēbinē' Simón:

—Simón, re'enda' inia' luē' tu di'idza'.

Na'ra una Simón rēbinē' Jesús:

—Una nē'ēdi', maestro.

41 Na'ra una Jesús rēbinē' lēbē':

—Uzu chopa be'mbyu reya'ala'yaquē' dumi quie ben' rue presta dumi. Tunē' reya'alē' ga'yo' gayuhua dumi plata. Na' itunē' reya'alē' gatzo gayuhua.

42 Na' como lao rupayaquē' biuzaque'yaquē' yeyu'eyaquē' ben' unabayaquē' presta dumi, quie lao rupateyaquē' bezi'ze ben' unabayaquē' presta dumi. Na'ra rnaba' luē' tu di'idza': Lao rupayaquē', ¿ca nulayaquē' lao rupayaquē' reya'ala' gacayaquē' agradecer mazara quie ben' na'?

43 Na'ra una Simón rēbinē' Jesús:

—Raqueda' ben' reya'ala' yalao quie ben' bē presta dumi.

Na'ra una Jesús rēbinē' lēbē':

—Napo' rson cabē' unao'.

44 Biži beyēcho Jesús rna'nē' gan' zē nigula, unē' rēbinē' Simón:

—¿Rlē'ēlo' nigula niga? Nē'ēdi' baoyu'a lu'u yu'u quio', na' bibenlo' nisa tzēri ni'a. Na' nigula niga baodibinē' ni'a con nisa uredyinē' besebidyinē'n con guitza' guichonē'.

<sup>45</sup> Baoyu'a lu'u yu'u quio', na' biudaolo' situ xaga' ca naca costumbre de quiero. Pero desde uyu'a lu'u yu'u quio', birsan nigula ni raonë' situ ni'a.

<sup>46</sup> Bibla'olo' aceite guichoga' ca naca costumbre de quiero, na' nigula niga babla'onë'n ni'a aceite rla' Zixi zeo.

<sup>47</sup> Quie lena' rnia' luë', ca tu ta nedyë'ë nigula niga në'ëdi', lena' rulu'en nezinë' de yela' huenitlao quienë' ca nacala tamala babënë'. Pero nu ben' bë' lë'ëti'zi tamala, lëzi lë'ëti'zi nedyë'ënë' ben' bezi'ze quienë'.

<sup>48</sup> Na'ra una Jesús rëbinë' nigula:

—Abezi'zia' ca naca dula' xquia babao'.

<sup>49</sup> Na' bi'zi yaca ben' dyarë lao mesa, yaca ben' bdyinrë udaorë, unayaquë' laguedyiaquë':

—¿Nu'zi naca ben' niga yezi'zenë' quie dula' xquia quie benë'?

<sup>50</sup> Na'ra una Jesús rëbinë' nigula:

—Dan' rzudyi'ilëlo' në'ëdi', babeyëri'lo lao Diuzi. Beyo, bira idëbilo' quie dula' xquia quio'.

## 8

### *Gucalë yaca nigula Jesús*

<sup>1</sup> Ude beyudyi' uzu Jesús lidyi Simón, na' uza'lënë' lao chipchopa ben' quienë'. Zioyaquë' yedyi tu yedyi rguixogue'në' yaca benë' cabë' naca yela' r nabë' quie Diuzi.

<sup>2</sup> Lëzi ziorë yaca nigula len Jesús. Lëyaca nigula beyue Jesús yela' hue' yu'uyaquë', bebionë' bichi be xi'ibi' yu'uyaquë'. Ladoyaquë' na' ziorë ben' lao Maria Magdalena. Lë'lëbë' bebio Jesús gadyi bichi be xi'ibi' uyu'unë'.

<sup>3</sup> Lëzi ziorë tu nigula lao Juana, žgula ben' lao Chuza, ben' naca gobierno quie rey Herodes. Lëzi ziorë itu nigula lao Susana, len yaca nigula bë'rë ta de quieyaquë' ta gucalëyaquë' Jesús.

### *Ga una Jesús tu di'idza' quie ben' raza bini trigo*

(Mt. 13.1-9; Mr. 4.1-9)

<sup>4</sup> Bi'zi ca zioyaquë' yedyi tu yedyi bdyin yaca ben' zë ga zë Jesús. Caora babdupa ben' zë gan' zënë', na'ra unë' tu di'idza' ta nacan irupa iyunala rëbinë' leyaquë' cani:

<sup>5</sup> —Zio tu ben' gaza bini trigo. Caora rzalanë' bini trigo ca costumbre quieyaquë', bala bini yaque'n tu neza, na' ude ja benë' bliojë'n, lëscan' aodaorë yaca bguini len.

<sup>6</sup> Ibala bini trigo yaque'n lao yo ga žuba tzaye'zi yu. Bë' ulën ubidyin, dan' binacan tubelaozi yu.

<sup>7</sup> Ibala bini trigo yaque'n ga rlë guixi' yëchi'. Bi'zi guixi' yëchi' gu'unin, na' bdyiagui'n bini trigo.

<sup>8</sup> Ibala bini trigo yaque'n ga naca tubelaozi yu. Gu'unin huen bë'n usecho dya'a. Udyian tu gayuhua bini trigo quie lao tu ni'an.

Beyudyi unë Jesús di'idza' unë' zidzo unë':

—Le'e babe, ulezë nagale can' rnia'.

### *Una Jesús ga huen dyin di'idza' rusëdinë' benë'*

(Mt. 13.10-17; Mr. 4.10-12)

<sup>9</sup> Na'ra unaba yaca ben' quie Jesús ga huen dyin di'idza' unë'.

<sup>10</sup> Na'ra unë' rëbinë' yaca ben' quië':

—Uzioñë'ecazi Diuzi le'e ca naca quie yela' r nabë' quienë'. Na' yaca ben' tula, rëba' leyaquë' conlë di'idza' ta nacan irupa iyunala como dan' ba'ala'cazi rlë'ëyaquë', rueyaquë' ca ben' birlë'ë, ba'ala'cazi reyaquë', rueyaquë' ca ben' birioñë'e.

*Ga bexi'idzè' Jesús quie di'idza' unè'  
(Mt. 13.18-23; Mr. 4.13-20)*

Na' una Jesús:

11 Cani naca quie di'idza' ta nacan irupa iyunala: Bini trigo ruen ca quie xti'idza' Diuzi.

12 Na' bini yaque' tu neza, ruen ca quie benè' babzënaga xti'idza' Diuzi, pero biži za' xan' taxi'ibi' reguban ca naca di'idza' babeyaquè' ta bira hue quieyaquè'n, biyeyëriyaquè' lao Diuzi.

13 Na' bini yaque' lao yo ga žuba tzaye'zi yu, ruen ca quie ben' babzënaga xti'idza' Diuzi, na' uyezila'adyi'yaquè'n bē quieyaquè'n tu chi'. Pero dan' nacayaquè' ca quie lue bini biuyu'un zitu' yu, quie lena' tu chi'zi bē quieyaquè'n. Cati guta' zēdi quieyaquè', na' psanyaquè', bira bē quieyaquè'n.

14 Na' bini yaque' ga rlē guixi' yēchi', ruen ca quie ben' bzënaga xti'idza' Diuzi, pero bibē quieyaquè'n. Naoziyaquè' neza quieyaquè', rdēbiyaquè' quie dza rdayaquè' lao yedyi layu, rza'la'adyi'yaquè' ta de lao dyilayu. Lēlēyaquè' naca quieyaquè' ca quie bini bibè' usecho.

15 Na' bini yaque' lao tubelaozi yu, ruen ca quie ben' bzënaga xti'idza' Diuzi, na' bēyaquè' quieyaquè'n. Du guicho du la'adyi'yaquè' naoyaquè'n. Lēlēyaquè' naca quieyaquè' ca quie bini bē' usecho dya'a.

*Unè Jesús tu di'idza' quie tu lámpara  
(Mr. 4.21-25)*

Na' una Jesús:

16 —Nunu uga'ala' lámpara ta utacoron caja, ni ta ucachi'ron zan belaga. Ruen zi uzuro lámpara sibi ta useni'n ta ilē'ē ben' za' tzu'u lu'u yu'u.

17 Cabè' naca quie lámpara, cana' nacarēn quie yaca benè'. Yugulu ta pcachi' yaca benè', huadyin dza yebio Diuzi ta pcachi'yaquè', cuionè'n zaca'lao ta ilē'ē ja benè' len. Lēscan' yugulu di'idza' negachi' rnē yaca benè', huadyin dza quixogue' Diuzi ca di'idza' negachi' unayaquè'.

18 Ulezē nagale dyē'ēdi. Nu ben' rue quie ta tzioñe'enè' bi na xti'idza' Diuzi, uzioñe'era Diuzi lēbē' mazara, pero nu ben' bihue quie ta tzioñe'enè' xti'idza' Diuzi, hueguba Diuzi hasta tadao' baoyoñe'enè'.

*Unè Jesús quie znē'ē len bi' bichinē'  
(Mt. 12.46-50; Mr. 3.31-35)*

19 Biži bdyin žna' Jesús len yaca bi' bichinē' gan' zēnē', pero biuzaque' tzu'uyaquè' lu'u yu'u dan' nita' yaca ben' zē gula gan' zēnē'.

20 Na'ra tu ben' zē gan' zēnē' unè' rēbinē' lēbē':

—Lali'a babdyin žnao' len yaca bi' bicho'. Re'enyaquè' hue'lēyaquè' luè' di'idza'.

21 Biži una Jesús rēbinē' yaca ben' nita' rzēnaga:

—Con nu ben' rzēnaga rue quienè' xti'idza' Diuzi, lēleyaquè' naquè' ca quie žna'a, ca quie bi' bicha'.

*Udila Jesús be bedun'  
(Mt. 8.23-27; Mr. 4.35-41)*

22 Biži dza tula uyu'u Jesús lēnē' yaca ben' quiè' lu'u barco, na' unè' rēbinē' leyaquè':

—Tziuro tzala'la lagun.

23 Na'ra uza'yaquè' lēyaquè' tzala'la lagun. Na' tu zaidyinrayaquè' guta' Jesús gusinè'. Cana' uzulao rda tu be bedun' huala gula lao nisa, baredza' nisa lu'u barco bare'ennan yeton.



24 Na'ra psebë yaca ben' quienë' lëbë', unayaquë' rëbiyaquë' lëbë':

—¡Maestro! ¡Maestro! ¡Bareto barco lu'u nisa!

Cana' uyasa Jesús udilanë' be bedun' ta rda lao nisa. Lëcana' lapsanten laore'ten chizi.

25 Na'ra unë' rëbinë' yaca ben' quienë':

—¿Bixquien' biuzudyi'ilële Diuzi ta ute uselanë' ra'o?

Bizi leyaquë' du rdzebiyaquë', unayaquë' rëbiyaquë' laguedyiaquë':

—¿Nuži ben' niga rnabë'në' be bedun' len nisa ralen quienë'?

*Beyue Jesús tu ben' yedyi Gadara, ben' yu'u bichi be mala  
(Mt. 8.28-34; Mr. 5.1-20)*

26 Bizi bdyinyaquë' yu nebaba Gadara ta re'n tzala' lagun gan' nebaba estado Galilea.

27 Bizi bë' bero Jesús lu'u barco, caora na' ubiga' tu ben' yedyi na'. Baoca zidza yu'unë' bichi be xi'ibi'. Rdanë' du guidinë', biraconë' zabanë'. Nica zuzë' zan yu'u, den' zunë' ga rcachi'yaquë' ben' huati.

28 Cati blë'ënë' Jesús, na' uditzu žibinë' ure'në' lao Jesús uredyia'në' rëbinë' Jesús:

—¿Bixquien' zao' niga huelo' në'ëdi' zëdi? Nubë'da' luë' Jesús, ži'i Diuzi zu guibá. Rnabayëcha' laolo' ta biutzagalaolo' në'ëdi'.

29 Cana' una ben' na' dan' bë' Jesús mandato ta yero bichi be xi'ibi' yu'unë', dan' rnabë'cazin yu'un lëbë'. Bizi baoca zë lasa rquioyaquë' lëbë' na'anë' len ni'anë', pero ružužu ruquinonë'n, ržunonë' rquie'n lëbë' lao lato ga bidyia yu'u.

30 Na'ra unaba Jesús len:

—¿Bi laolo'?

Na' bequëbin rëbin lëbë':

—Xopa mila laohua'.

Cana' unan dan' neyë yaca taxi'ibi' uyu'u ben' na'.

31 Na'ra una yaca bichi be xi'ibi' unabayëchi'yacan ta biuse'ela' Jesús leyacan lu'u yero zitu' gula ga yedzagalaoyacan.

32 Lëgan' na' nita' cuchi zë lao ya'a yu'uyacaba' huao. Na' unabayëchi'yacan Jesús ta tzetzu'uyacan yaca cuchi. Na'ra bë'në' lato leyacan tzetzu'uyacan cuchi.

33 Cana' guca bero yaca bichi be xi'ibi' ben' na', zioyacan yetzu'uyacan cuchi. Bizi ca uyu'uyacan cuchi, uxitiyacaba' lu'u barranca bguinuyacaba' lu'u nisa ga gutiyacaba'.

34 Bizi caora blë'ë yaca ben' rapa cuchi cabë' guca quieyacaba', na' bdzebiyaquë' uza'yaquë' zioyaquë' tzëtixogue'yaquë' yaca ben' lao yedyi len yaca ben' zio layela cabë' guca.

35 Cana' zio yaca benë' tzena'yaquë' cabë' guca. Cati bdyinyaquë' gan' zë Jesús, blë'ëyaquë' ben' uyu'u bichi be xi'ibi'. Blë'ëyaquë' are'në' chizi xni'a Jesús, anaconë' zabanë', abeyu'unë' pensari. Caora na', tu bega'nziyaquë' bdzebiyaquë'.

36 Ca naca yaca ben' blë'ë, udixogue'yaquë' cabë' guca quie ben' uyu'u bichi be xi'ibi' beroyacan gan' uyu'uyacan.

37 Nun que can' guca, gudyi yaca ben' yedyi Gadara ta yeza' Jesús yeyoguë' ga tula, dan' rdzebiyaquë' can' guca. Na' beza' Jesús beyu'unë' lu'u barco zeyoguë'.

38 Pero tu bineza' Jesús, unabayëchi' ben' uyu'u bichi be xi'ibi' chi bisaque' tziolënë' lëbë' con ga zioguë'. Bizi una Jesús gudyinë' lëbë':

39 —Bigaca sao!. Beyo žan yu'u quio', yetixogue' yaca ben' nita' žan yu'u quio' con cabè' bē Diuzi quio' beyaco'.

Na'ra beza'nè' zeyoguè' udixogue'nè' yaca benè' lao yedyi con cabè' bē Jesús beyuenè' lèbè'.

*Ni ru'en di'idza' quie nigula bda' zbe zaba Jesús len quie ži'i Jairo, bi' guti (Mt. 9.18-26; Mr. 5.21-43)*

40 Biži cati bedyin Jesús tatula ga uzè'è itzala' lagun, biži yaca benè' bezi'yaquè' lèbè' dyè'èdi dan' nita'yaquè' rbezayaquè' lèbè'.

41 Lèscan' bdyin tu ben' lao Jairo, naquè' ben' napa dyin lu'u idao' sinagoga. Lèlèbè' bdyinnè' uditzu žibinè' žni'a Jesús. Na' unabè' cule lao Jesús ta tzio Jesús žan yu'u quienè'.

42 Unè' cana' dan' zu tuzi ži'inè' nigula. Lèži'inè' nigula na' chipchopa iza zubi', na' debi' raca žhue'bi' bagatibi'. Ca naca zio Jesús lènè' leyaquè' lado yaca benè', lega rquidi' yaca benè' lèbè' gan' zionè' yu'unè' neza.

43 Lèladoyaquè' na' zio tu nigula zu uba'a aoca lao chipchopa iza. Aoy-onè' lao médico zè, bènè' gasto dumi quiè'. Ni tu médico biužaquè'yaquè' yeyueyaquè' lèbè'.

44 Lèlèbè' yasè' bago xcu'udzu Jesús bda'nè' žbenè' žaba Jesús. Ca bda'nè' žbenè' žaba Jesús, laolezate quie uba'a quienè'.

45 Biži una Jesús rëbinè' leyaquè':

—ŽNuži bda' zbe zaba'?

Na'ra una yugo yaca benè' zè na' rëbiyaquè' Jesús:

—Nunu bda' zbe žabo'.

Lèscan' una Pedro len yaca ben' laguedyinè', rëbiyaquè' lèbè':

—Maestro, rquidi' yaca benè' luè' de lao rupala'ate, na' como rnao': “ŽNuži bda' zbe zaba'?”

46 Na'ra una Jesús:

—Zu tu ben' bda' zbe žaba', dan' gucabè'da' bro yela' huaca quia' beyaca ben' bda' zbe zaba'.

47 Biži cati blè'è nigula gucabè' Jesús can' bē nigula, du rdzebinè' bdyinnè' uditzu žibinè' žni'a Jesús. Na' unè' udixogue'nè' zaquè'lao lao yaca benè', dan' bda'nè' žbenè' žaba Jesús. Lèži udixogue'rènè' beyacanè' caora bda'nè'n.

48 Biži una Jesús rëbinè' nigula:

—Zana', dan' zudyi'ilèlo' nē'èdi', babeyaco'. Beyo, cue' chizi lu'u guicho laxta'olo'.

49 Caora zè Jesús nernènè', cati bdyin tu ben' uza' žan yu'u quie Jairo, ben' napa dyin lu'u idao' sinagoga. Na' unè' rëbinè' Jairo:

—Baguti ži'ilo'. Bira cule huelo' Maestro zèdi.

50 Biži cati be Jesús ca unè', na' unè' rëbinè' Jairo:

—Biidzebo'. Sudyi'ilèlo' nē'èdi' con lèžin hueyaca ži'ilo'.

51 Cati bdyinyaquè' žan yu'u quie Jairo, bibè'nè' lato nurla tzu'ulènè' lu'u yu'u. Na' uyu'ulènè' Pedro, len Jacobo, len Juan, len xuzi žna' xcuidi'.

52 Biži rbedyi lao yuguluyaquè' raca beyèchi' quieyaquè' quie bi' huati. Na' una Jesús rëbinè' leyaquè':

—Bicuedyile. Le'e nale bagutibi', pero nē'èdi' nia' rasizibi'.

53 Biži yaca benè' bžidiyyaquè' quienè', dan' unè' can', dan' baneziyaquè' banati xcuidi'.

54 Na'ra bèxo Jesús na'a xcuidi' huati, na' unè' židzo unè':

—Xcuidi', uyasa.

<sup>55</sup> Ca unë' cana', babeban xcuidi' labeyasatebi'. Na' bē Jesús mandado ta hue'yaquë' ta gao xcuidi'.

<sup>56</sup> Biži xuzi žna' xcuidi' huati, tu bega'nziyaquë' bebanyaquë' can' guca. Na' gudyi Jesús leyaquë':

—Ni tu nunu yëbile cabë' bia' quie bi' huati.

## 9

### *Use'ela' Jesús lao chipchopa ben' quienë'*

(Mt. 10.5-15; Mr. 6.7-13)

<sup>1</sup> Na'ra betupa Jesús lao chipchopa ben' quienë' bē'nē' yela' huaca quienë' ta yebioyaquë' bichi be xi'ibi' yu'u yaca benë', lëscan' ta yeyueyaquë' nacala yela' hue' yu'u yaca benë'.

<sup>2</sup> Use'ela'në' leyaquë' tzetixogue'yaquë' yaca benë' de que baza' dza inabë' Diuzi lao yaca ben' nita' lao yedyi layu, lëzi ta yeyueyaquë' ben' raca žhue'.

<sup>3</sup> Na'ra una Jesús rëbinë' leyaquë':

—Bë' baziole yu'ule neza, ni tu bibi hua'ale, ni tu yaga, ni tu yëxo, ni ta gaole, ni dumí. Nica hua'ale chopa cue' žabale, tu cue'zin hua'ale.

<sup>4</sup> Ga idyine žan yu'u quie benë' ga gasile, biutza'le. Tuzi ga gasile hasta que idyin dza yeza'le.

<sup>5</sup> Čhi ga bire'enaquë' yezi'yaquë' le'e, uleza' lao yedyi, gusile bëxte yu dyia ni'ale ta gacan tu seña de que bibë quieyaquë' xti'idza' Diuzi.

<sup>6</sup> Na' beza'yaquë' zioyaquë' lao dužete yedyi ta quixogue'yaquë' ca hue Diuzi ta gata' yela' neban quiejë' tuzioli, lëzi ta yeyueyaquë' yaca ben' raca žhue' lao duže gan' rdayaquë'.

### *Cabë' bē Herodes bënë' mandado bëtiyaquë' Juan*

(Mt. 14.1-12; Mr. 6.14-29)

<sup>7</sup> Caora na' Herodes, ben' naca gobernador, unezinë' lao dužete cabë' rue Jesús. Na' rdëbinë' raguë' pensari, dan' rna yaca benë' rnayaquë' quie Jesús naquë' Juan bautista babëbannë' tatula.

<sup>8</sup> Na' balayaquë' rnayaquë' quie Jesús naquë' profeta Elías abela'në' tatula. Na' ibalayaquë' rnayaquë' quie Jesús naquë' ben' udixogue' xti'idza' Diuzi tiempote, ben' beban tatula.

<sup>9</sup> Biži una Herodes rëbinë' laguedyinë':

—Në'ëdi' bia' mandado ichuguyaquë' luba' Juan agutinë'. ¿Na' nuži ben' rda ruenë' cabë' ca di'idza' ru'e yaca benë'?

Na'ra Herodes gu'unnë' ilë'ënë' Jesús.

### *Bgao Jesús lao ga'yo' mila be'mbyu*

(Mt. 14.13-21; Mr. 6.30-44; Jn. 6.1-14)

<sup>10</sup> Biži bē' bedyin yaca ben' quienë' gan' zu Jesús, caora na' gudyiyaquë' lëbë' con can' bëyaquë' gan' uyoyaquë'. Na'ra uquië' Jesús leyaquë' ziolë'në' leyaquë' tu lao lato ga rega'nnan ga'ala' yedyi Betsaida.

<sup>11</sup> Bë' unezi yaca benë' azioquë' ru'a yedyila, na' zioyaquë' gan' zënë'. Na' bezi'në' leyaquë' udixogue'në' leyaquë' quie yela' rnabë' quie Diuzi. Lëzi beyuerënë' yaca ben' raca žhue'.

<sup>12</sup> Biži bardze' bara' dza, ubiga' yaca ben' quië' gan' zënë' rëbiyaquë' lëbë':

—Gudyi yaca benë' yeyoyaquë' con ga re' yedyi ga'ala' ta tzetiloyaquë' ta gaoyaquë' ta yezila'adyi'yaquë', porque gan' žero niga, bide ta gaoyaquë'.

<sup>13</sup> Na'ra una Jesús rëbinë' yaca ben' quienë':

—Ulehue' yaca benë' ni ta gaoyaquë'.

Na'ra unayaquë' rëbiyaquë' Jesús:

—Binu'ando' tazë. Ga'yo'zi yëta xtila len ichopa bela ta nu'ando'. Lëzin de chi bitziondo' tzegue'ndo' mazara ta gao yaca ben' niga. —Cana' unayaquë' rëbiyaquë' Jesús.

14 Na' bizi nita' ca du ga'yo' mila be'mbyu gan' zë Jesús. Na'ra una Jesús rëbinë' yaca ben' quienë':

—Uleyëbiyaquë' cue'yaquë' lao gatzo gayuhua huioyaquë'.

15 Cana' ure'yaquë' lao gatzo gayuhua huioyaquë' lao yuguluyaquë'.

16 Na'ra uzi' Jesús lao ga'yo' yëta xtila len lao chopa bela bazënë'n. Na' unë'ë ladza unë' rëbinë' Diuzi “Diuxcalelo.” Ude na', bë'në'n yaca ben' quienë' ta quisiyaquë'n hue'yaquë' ta gao yaca ben' re'.

17 Bizi udao yuguluteyaquë' beloyaquë'. Ude na' besedza'yaquë' chip-chopa ga' naga yaca ta yožo began'.

*Una Pedro naca Jesús ben' Cristo, ben' use'ela' Diuzi*

*(Mt. 16.13-19; Mr. 8.27-29)*

18 Bizi bdyin tu dza zulë Jesús yaca ben' quienë' tu cuinziyaquë' cati bë'lë Jesús Diuzi di'idza'. Na' unë' rëbinë' yaca ben' quienë':

—¿Nuži na yaca benë' naca' në'ëdi'?

19 Na'ra una yaca ben' quienë' rëbiyaquë' lëbë':

—Balayaquë' nayaquë' luë' naco' Juan bautista, na' ibalayaquë' nayaquë' naco' Elías. Pero ibalayaquë' nayaquë' naco' ben' udixogue'rë xti'idza' Diuzi tiempote, ben' beban.

20 Caora na' unë' rëbinë' yaca ben' quienë':

—¿Na'a le'e, nuži nale naca' në'ëdi'?

Na' unë Pedro:

—Luë' naco' ben' Cristo, ben' use'ela' Diuzi.

*Una Jesús ca gaca quienë' cati gatinë'*

*(Mt. 16.20-28; Mr. 8.30-9.1)*

21 Bizi Jesús unë' gudyinë' leyaquë' dyë'ëdi ta biyëbiyaquë' benë' naquë' ben' Cristo, ben' use'ela' Diuzi.

22 Na' unë' rëbinë' leyaquë':

—Në'ëdi', bichi yugulu benë', lega yedzagalaohua'. Yaca ben' rnabë', len yaca xan' pxuzi, len yaca ben' rsëdi ley quie Moisés, huaru'unla'adyi'yaquë' në'ëdi', gutiyaquë' në'ëdi'. Pero te gaca lao tzona dza, huebana'.

23 Lëzi unarë' rëbinë' leyaquë':

—Chi nu yaca ben' re'en inao në'ëdi', ruen zi bira inaoyaquë' ca rna pensari quieyaquë'. Ruen zi biidzebiyaquë' naoyaquë' në'ëdi' yugu dza, ba'ala'cazi ruen zudyi guti ja benë' leyaquë'.

24 Chi nu yaca ben' rdzebi inaoyaquë' në'ëdi', dan' rdzebiyaquë' gatiyaquë' tanun quia', bigata' yela' neban quiejë' tuzioli. Pero nu yaca ben' bibdzebi inaoyaquë' në'ëdi', bibdzebiyaquë' gatiyaquë' tanun quia', lëlëyaquë' huata'cazi yela' neban quieyaquë' tuzioli.

25 ¿Bizi gan de quie nu benë' anaca quie' lao yugulute ta de lao yedyi layu, chi bigata' yela' neban quie' tuzioli?

26 Chi nu ben' chu'unla'adyi' në'ëdi' yedue'yaquë' hue quieyaquë' can' baonia', lëzi në'ëdi', bichi yugulu benë', huaru'unla'adya' leyaquë' cati yeguida' inabi'a lao yedyi layu ca rey. Zeyu'a yela' huaca quie Xuz'a Diuzi len yaca ángel naca la'iya quienë'.

27 Tali ca rnia' le'e, binegati bala le'e nita' niga len në'ëdi' tu binelë'ële ca naca yela' huaca quie Diuzi.

*Ca guca bë' betza' cuin Jesús zaca'lao lao yaca ben' quienë'*

*(Mt. 17.1-8; Mr. 9.2-8)*

28 Bizi bè' guca lao xuna dza una Jesús cana', urënë' tu lao ya'a ta hue'lënë' Diuzi di'idza'. Na' uquië'në' Pedro, len Santiago, len Juan.

29 Bizi ca uzulaonë' ru'elënë' Diuzi di'idza', cana' betza' laohuë' len zabanë' gucan bezëri di.

30 Caora na' labdyinte Moisés len Elías ga zë Jesús, ru'elëyaquë' lëbë' di'idza'.

31 Na' tu xni' ze ure' gan' zëyaquë' tu ru'elëyaquë' lëbë' di'idza' unayaquë' ca gaca quienë' gatinë' ciudad Jerusalén.

32 Ba'ala'cazi Pedro len ben' laguedyinë' barnatzeguen gasiyaquë', bega'nyaquë' rna'yaquë' ca naca yela' huaca quie Jesús blu'en ga zënë' len chopa ben' ru'elënë' di'idza'.

33 Bizi bè' beza' yaca ben' bè'lë Jesús di'idza', na' una Pedro rëbinë' Jesús: —Maestro, tahuen na' zundo' lëndo' luë' niga. Ben lato huendo' tzona yu'u dao' de guizi. Huendo' tun quio', itun quie Moisés, itun quie Elías. —Cana' una Pedro den' binezinë' bi në'.

34 Bizi ca naca ru'e Pedro di'idza', bdyin tu beo bdubin leyaquë' gan' nita'yaquë'.

35 Bizi lado beo na' beyaquë' rchi' Diuzi unë' rëbinë' leyaquë'.

—Lëzi'ina' niga, ben' nedyë'ëda'. Ulezënaga quië' cabë' në' na'.

36 Ude beyaquë' rchi' Diuzi, blë'ëyaquë' ituzi Jesús zënë' na'. Ganura nita' len lëbë'. Na' bega'nyaquë' bira unëyaquë'. Lëzi bibi gudyyiyaquë' yaca benë' ca guca quieyaquë' ca blë'ëyaquë'.

*Beyue Jesús tu bi' yu'u bichi be xi'ibi'*

*(Mt. 17.14-21; Mr. 9.14-29)*

37 Bizi bezu dza tula, beyëziyaquë' ga zu ya'a. Caora na' uyo ben' zë gula yetilalaoyaquë' Jesús.

38 Na'ra unë tu ben' zë ladoyaquë' unëguë' zidzo:

—Maestro, bè tu cule, ina'lo' ži'ina' niga. Zelao tuzi lëbi' naca ži'ina'.

39 Yu'ubi tu bichi be mala ruxun lëbi' rbedyyiya'bi'. Rde na' reru'unnan lëbi' layu, naca bdyin' ru'abi'. Lega rulëtzaguen lëbi', bire'ennan usannan lëbi'.

40 Bagudya' yaca ben' quio' ta yebioyaquë' bichi be mala yu'ubi', pero biužaque'yaquë'.

41 Na'ra una Jesús rëbinë' yaca benë':

—¡Le'e, ben' zidi yaladyi!, biralele! ¿Ca balala dza re'ennan sëlia' le'e sueda' can' ruele? Yaxi' ži'ilo' dehua'abi' niga.

42 Bizi cati bdyin bi' yu'u taxi'ibi' bago gan' zë Jesús, udi taxi'ibi' lëbi' layu, pxizeran lëbi'. Na'ra udila Jesús bichi be xi'ibi' yu'ubi' beron zeyon beyacabi'. Ude na' beyu'enë'bi' xuzibi'.

43 Bizi bega'n yugulu ben' nita' na' bebanyaquë' ca naca yela' huaca quie Diuzi bë Jesús.

*Udixogue' Jesús tatula ca gaca bë' gatinë'*

*(Mt. 17.22-23; Mr. 9.30-32)*

Tu reban yaca benë', na' una Jesús rëbinë' yaca ben' quienë':

44 —Ulezënaga dyë'ëdi con can' nia'. Në'ëdi', bichi yugulu benë', usedyin yaca benë' në'ëdi' lao na'a ben' rudie në'ëdi'.

45 Bizi yaca ben' quienë' biuyofne'eyaquë' ca unë'. Binedyin hora ta tziöne'eyaquë' can' unë'. Lëzi bireyažoyaquë' inabayaquë' yexi'idzë' leyaquë' cabizi unë'.

*Una Jesús ca nurla ben' quienë' nacara belao*

*(Mt. 18.1-5; Mr. 9.33-37)*

46 Bizi yaca ben' quie Jesús rtzaloyaquë' unayaquë':

—¿Nurla ra'o gacararo belao cati idyinro ga zu Diuzi?

<sup>47</sup> Pero nezi Jesús ca naca pensari racayaquë'. Lëcana' uzi'në' tu xcuidi' bzënë'bi' cuëta lë'ënë'.

<sup>48</sup> Na'ra unë' rëbinë' yaca ben' quienë':

—Chi nu yaca ben' rezi' xcuidi' niga tanun quia', lëscan' rezi'rëyaquë' në'ëdi'. Chi nu yaca ben' rezi' në'ëdi', lëscan' rezi'rëyaquë' ben' use'ela' në'ëdi'. Quie lena', nu le'e racalë laguedyi, biruele belao cuinle, lëben' na' nacaré' ben' belao entre le'e lao yugulule.

*Nu ben' birue condre ra'o, nacacazi quieyaquë' ca quie ben' rnëcule ra'o (Mr. 9.38-40)*

<sup>49</sup> Na'ra una Juan rëbinë' Jesús:

—Maestro, bablë'ëndo' rda tu ben' rzëtoguë' laolo' rebiogüë' bichi be xi'ibi' yu'u benë'. Begadyindo'në' udilalëndo'në', dan' ruenë' cana' birdalënë' ra'o.

<sup>50</sup> Na'ra una Jesús rëbinë' Juan:

—Bihuegadyile ben' rue can', dan' nu ben' birue condre ra'o, nacacazi quieyaquë' ca quie ben' rnëculë' ra'o.

*Jesús udilë' Santiago len Juan*

<sup>51</sup> Biži baruen bago idyin dza yeyo Jesús guibá, na' uzë'ë du la'adyi'në' bdze'në' neza zionë' ciudad Jerusalén.

<sup>52</sup> Na' aose'elë' ben' quienë' udyialaoyaquë' zioyaquë' tu yedyi quie estado Samaria ta quiloyaquë' lato ga idyinyaquë'.

<sup>53</sup> Biži yaca ben' Samaritano, bigu'unyaquë' hueyaquë' lato ta yega'nyaquë' gan', dan' nezियाquë' bazioyaquë' ciudad Jerusalén.

<sup>54</sup> Biži cati be yaca ben' quie Jesús cabë' bë yaca ben' Samaritano, na'ra una Santiago len Juan rëbiyaquë' Jesús:

—Señor, ¿re'lenlo' guëziro gui' za' guibá ta uzeina utachin leyaquë' cabë' bë profeta Elías dza na'la?

<sup>55</sup> Na'ra una' Jesús leyaquë' udilanë' leyaquë' unë' rëbinë' leyaquë':

—Le'e binezile ca pensari calëla yu'ule, dan' unale cana'.

<sup>56</sup> Në'ëdi', bichi yugulu benë', cala bida' ta aodyiaya' yaca benë', bida' ta ute usela' leyaquë'.

Na' uzi'yaquë' zioyaquë' yedyi tula.

*Ni rnan quie ja ben' nao Jesús*

*(Mt. 8.19-22)*

<sup>57</sup> Biži azioyaquë' yu'uyaquë' neza cati bdyin tu ben' unë' rëbinë' Jesús:

—¿Señor, huaza'lia' luë' con gatezi tzio'?

<sup>58</sup> Na'ra una Jesús rëbinë' lëbë':

—Zu beló ga rasi yaca be'ëza'. Lëzi dyiarë lidyí bguini ga rasiyacaba'. Pero në'ëdi', bichi yugulu benë', bizu lidyá' ga idyina' sua'.

<sup>59</sup> Na'ra una Jesús rëbinë' ben' itu:

—Uda, unao në'ëdi'.

Na' bequëbinë' rëbinë' Jesús:

—Señor, ben në'ëdi' lato tzetapa' xuzá', dan' bagatinë'.

<sup>60</sup> Na'ra una Jesús rëbinë' lëbë':

—Bë lato ucachi' yaca ben' birue quie xti'idza' Diuzi xuzo'. Pero na' luë', uda ta quixogue'lo' benë' xti'idza' Diuzi ca naca yela' r nabë' quienë'.

<sup>61</sup> Na'ra una itu ben' rëbinë' Jesús:

—Señor, re'enda' inaohua' luë', pero ben lato tzeguedya' yaca ben' zu žan yu'u, chi usanyaquë' në'ëdi' ta inaohua' luë'.

<sup>62</sup> Na'ra una Jesús rëbinë' lëbë':

—Nu ben' birna' tuzi xneza' inaonè' n'è'di', chi reyèchonè' rna'nè' xcu'udzule, lena' rulu'en rnan quienè' inaonè' neza tula. Na' binaca quienè' ga zu Diuzi rnabè'nè'.

## 10

### *Use'ela' Jesús tzona galo chi ben' quienè'*

<sup>1</sup> Bè' ude unè Jesús di'idza', na' ulioguè' itzona galo chi benè' ta use'ela'nè' chopa huioyaquè' zioyaquè' yedyi tu yedyi ta udyialaonezayaquè' con gan' tzio Jesús.

<sup>2</sup> Na'ra unè' rëbinè' leyaquè':

—Tali rnia' le'e, nita' ben' zè, ben' rbeza uzènaga xti'idza' Diuzi, naca quieyaquè' ca quie usecho. Pero tu chopaziyaquè' naca ben' rezi' usecho quie Diuzi, ben' rguixogue' xti'idzè'. Tana' lena', ruguin inabale Diuzi ise'elè' mazara ben' yezi' usecho, ben' quixogue' xti'idzè'.

<sup>3</sup> Na' uletzio le'e. Yeza'la'adyi'le rse'ela' le'e naca quiele ca quie beco' zi'ila' tziole lado yaca ben' naca ca lobo.

<sup>4</sup> Bihua'ale dumi, bihua'ale yèxo, bihua'ale ni itu cue' guidi uliole. Lèzi bitzèle hue'lèle yaca benè' zè di'idza' tu neza gan' ziole.

<sup>5</sup> Cati bayu'ule lu'u yu'u quie benè', reya'ala' inale yèbile xan' yu'u: “Huabèchi Diuzi chizi lu'u guicho laxta'ole gan' zule niga.”

<sup>6</sup> Chi rezi'yaquè' le'e dyè'di, cana' huabe' chizi lu'u guicho laxta'oyaquè'. Pero chi birezi'yaquè' le'e dyè'di, bicue' chizi lu'u guicho laxta'oyaquè'.

<sup>7</sup> Cati idyinle yu'u gan' idyinle, na'azi sule, na'azi gaole yo'ole con ta runyaquè'. Nu ben' rue dyin, napè' derecho quižu xa'nnè' lèbè'. Tuzi yu'u gan' idyinle na' yega'nle.

<sup>8</sup> Cati idyinle tu yedyi ga rezi'yaquè' le'e, ulegao ta udyiayaquè' laole gaole.

<sup>9</sup> Lèzi yeyuele ben' raca zhue' yedyi gan' idyinle yèbileyaquè': “Babdyin dza hue quiele xti'idza' Diuzi.”

<sup>10</sup> Chi yedyi gan' bdyinle bigu'unyaquè' yezi'yaquè' le'e, uleta lao neza quieyaquè' inale cani:

<sup>11</sup> “Bèxte yu quie yedyi ni uda'n lu'u huaracho quiendo', usisindo'n yedyibin ta nacan tu seña bibè quiele xti'idza' Diuzi. Ruen zi inezile babdyin dza hue quiele xti'idza' Diuzi.”

<sup>12</sup> Rnia' le'e, dza gaca juicio, huata'ra castigo huala quie ben' yedyi bibezi' le'e. Huacaran mazara cabè' bè Diuzi quie yaca ben' ciudad Sodoma dza na'la.

### *Ni rnèn quie yaca yedyi bibè quie xti'idza' Diuzi (Mt. 11.20-24)*

Na' una Jesús:

<sup>13</sup> —¡Bayèchi' gula gaca quie le'e, ben' yedyi Corazín! ¡Lèzi bayèchi' gula gaca quie le'e, ben' yedyi Betsaida! Chi blè'è ben' yedyi Tiro len ben' yedyi Sidón ca yela' huaca bè Diuzi lao le'e, biunaoyaquè' huerayaquè' tamala quieyaquè' dza na'la. Chi blè'èyaquè', abetza'yaquè' pensari quieyaquè', gucoyaquè' la'ari' gaso, bdyiayaquè' de guichoyaquè' ta ulu'en baneziyaquè' ca tamala bëyaquè'.

<sup>14</sup> Quie lena', cati bdyin dza hue Diuzi juicio, huata'ra castigo huala gula quiele, cala ca castigo gaca quie ben' yedyi Tiro len ben' yedyi Sidón.

<sup>15</sup> Na'ra le'e, ben' yedyi Capernaum, biinale rlè'è Diuzi le'e ben' huen yeyole guibá, dechan' le'e yeyole lao gui' gabila.

Na' una Jesús rëbinè' yaca ben' quiè':

16 —Nu yaca ben' ruzēnaga quiele, cana' ruzēnagarēyaquē' quia'. Nu yaca ben' rusebi' le'e, cana' rusebi'rēyaquē' nē'ēdi'. Chi nu ben' rusebi' nē'ēdi', cana' rusebi'rēyaquē' ben' use'ela' nē'ēdi'.

*Cabē guca cati bedyin tzona galo chi ben' quie Jesús*

17 Na'ra cati bedyin tzona galo chi yaca ben' use'ela' Jesús, redaohueyaquē' unayaquē' rēbīyaquē' lēbē':

—Señor, lente yaca bichi be xi'ibi' guleyacan quiendo' cati bzētondo' laolo'.

18 Na'ra una Jesús rēbinē' leyaquē':

—Blē'ēda' hguino xan' taxi'ibi' Satanás zan guibá, uyēzin ca rēzi bdyito hueziu'.

19 Na'ra guna' le'e yela' huaca quia' ta nuliote yaca bēla, na' nuliote yaca xuni', bibi hueyacaba' quiele. Lēscan' guna' le'e yela' huaca quia' ta huele gan xan' taxi'ibi' bihuelēnan le'e.

20 Tahuen na' rale yaca taxi'ibi' quiele. Pero lena' binacaten ta yedaohuele. Nacaran ta yedaohuele dan' bazu laole lē'ē guichi quie Diuzi de guibá.

*Bedaohue Jesús unēnē'*

*(Mt. 11.25-27; 13.16-17)*

21 Lēhora na', du yu' Jesús Bichi Be quie Diuzi, lega redaohuenē' unē':

—Xuza' Diuzi, naco' ben' ze, naco' ben' rnabē' guibá len lao yedyi layu. Luē' pcacho' yela' huaca quio' quie yaca ben' na rioñe'e. Na' blu'elo' yela' huaca quio' yaca ben' rale quio' ca rue xcuidi' ralebi' quie xuzibi'. Cana' bao' xuz'a, dan' cana' re'enlo' gaca.

22 Lao na'a babēn xuz'a yugulute. Nunu nuebē' nē'ēdi' ca nuebē' xuz'a nē'ēdi'. Lēscan' nunu nuebē' xuz'a ca nuebi'a xuz'a. Yaca ben' baolioga', lēleyaquē' nuebē'yaquē' xuz'a.

23 Bīzi una' Jesús yaca ben' quienē', unē' rēbinē' lēziyaquē':

—Tahuen gula naca quie le'e, dan' rlē'ēle cabē' rua'.

24 Rnia' le'e can', dan' yaca ben' zē, ben' udxogue' xti'idza' Diuzi dza na', len yaca ben' naca rey, gu'unyaquē' ilē'ēyaquē' ca naca ta rlē'ēle, pero biblē'ēyaquē'. Gu'unyaquē' yeyaquē' ca naca ta rele, pero bibeyaquē'.

*Ga unē Jesús quie ben' Samaria*

25 Bīzi tu dza tula, uyo tu ben' rusēdi ley quie Moisés gan' zē Jesús ta huenē' Jesús prueba ca bi di'idza' yequēbinē'. Na' unē' rēbinē' Jesús:

—Maestro, ¿ca bi reya'ala' hua' ta gata' yela' neban quia' tuzioli?

26 Na'ra una Jesús rēbinē' lēbē':

—¿Bīzi rna lē'ē guichi ley quie Moisés? ¿Ca bi ca inao' rnēn?

27 Na'ra bequēbi ben' rusēdi ley quie Moisés unē' rēbinē' Jesús:

—“Reya'ala' idyē'ēro Diuzi quiero du guicho du la'adyi'ro. Lēzi reya'ala' idyē'ēro lagueyiro cabē' nedyē'ēro cuinro.”

28 Bīzi una Jesús rēbinē' lēbē':

—Lagazi unao'. Chi hue quio' ca unao', huata' yela' neban quio' tuzioli.

29 Pero ben' rusēdi ley quie Moisés, gu'unnē' gacalēnē' cuinnē' cabē' di'idza' gudyinē' Jesús. Cana' unē' rēbinē' Jesús:

—¿Nuži ben' naca lagueyia'?

30 Na'ra una Jesús rēbinē' lēbē':

—Uza' tu ben' ciudad Jerusalén zionē' yedyi Jericó. Bīzi tu neza gan' zionē', na' bro yaca ben' uban ulanyaquē' ta nu'ē. Bē'yaquē' lēbē' zi', pca'nyaquē' lēbē' du guidinē'. Bega'nnē' tu neza, ilē'ēti'zi bigutinē'.

31 Bīzi na' zio tu pxuzi tu neza gan' de ben' na'. Bīzi bē' blē'ēnē' ben' de tu neza, na' udenē' tzala'la zioquē' yu'unē' neza.



<sup>32</sup> Lëscan' uderë tu ben' naca zi'i suba Leví gan' de ben' naca zi'. Lëzi cati blë'ënë' ben' na', tu udezinë' zionë' yu'unë' neza.

<sup>33</sup> Lëzi zio tu ben' uza' tu yedyi quie estado Samaria tu neza gan' de ben' naca zi'. Biži ca blë'ënë' lëbë' gan' denë', na' beyëchi'la'adyi'në' lëbë'.

<sup>34</sup> Na'ra ubiga'në' gan' de ben' naca zi', bla'onë' aceite len vino gan' naca hue'. Ude na' ptubinë' la'ari' lao hue'. Na' pçuënë' lëbë' xcu'udzu bia quienë' uquië'në' lëbë' con gan' idyinyaquë' yega'nyaquë'. Lëgan' na' unë'ë lëbë'.

<sup>35</sup> Biži bezu dza tula, tu binesë'ë, ulio ben' Samaria chopa dumi plata bënë'n ben' naca xan' yu'u gan' bdyinyaquë'. Na' unë' rëbinë' lëbë': "Gapo' na' hue'lo' ta gao ben' niga. Chi biguque dumi niga, na' aozala'ora' quizuga' bë' yedia' tatula."

<sup>36</sup> Na' una Jesús rëbinë' ben' rusëdi ley quie Moisés:

—Pues rnaba' luë', lao yuna yaca ben' ude na', ¿ca nurlayaquë' naca ben' laguedyi ben' guca zi'?

<sup>37</sup> Na'ra una ben' rsëdi ley quie Moisés rëbinë' Jesús:

—Ben' beyëchi'la'adyi' ben' guca zi'.

Na'ra una Jesús rëbinë' lëbë':

—Beyo, bërë con cabë' bë ben' na', ben' beyëchi'la'adyi' ben' guca zi'.

### *Ga bdyin Jesús lïdyi Marta len María*

<sup>38</sup> Na' uza' Jesús uyu'unë' neza zionë' bdyinnë' ga de tu yedyi. Lëgan' na' zu tu nigula laonë' Marta. Lëlëbë' bezi'në' Jesús zan yu'u quienë'.

<sup>39</sup> Na' zu tu zila Marta laonë' María. Ure'në' xni'a Jesús ta uzënananë' cabë' rna Jesús.

<sup>40</sup> Pero lega rdyine Marta quie dyin quienë' rusiña'në' ta gaoyaquë'. Na'ra ubiga'në' ga re' Jesús unë' rëbinë' lëbë':

—Señor, ¿bixquien' birdëbilo' quia' në'ëdi'? Apca'n zila' María në'ëdi'. Tuza' rua' dyin niga. Gudyi zila' tu di'idza' yeguidabi' gacalëbi' në'ëdi'.

<sup>41</sup> Na'ra una Jesús rëbinë' lëbë':

—Marta, Marta, lega rdyinelo' rdëbilo' quie dyin quio'.

<sup>42</sup> Pero ta uzënagaro xti'idza' Diuzi nacaran belao. Cabë' rue María, re'bi' ruzënagabi' can' nia', lena' nacaran huen. Bisaque' yëpa'bi': "Beyo, bicue'lo' rzënago' can' rnia'."

## 11

### *Ga psëdi Jesús yaca ben' quienë' ta hue'lëyaquë' Diuzi di'idza'*

(Mt. 6.9-15; 7.7-11)

<sup>1</sup> Biži bdyin tu dza uzu Jesús tu lao lato ga bëlënë' Diuzi di'idza'. Bë' beyudyi bëlënë' Diuzi di'idza', na' unë' tu ben' quienë' rëbinë' lëbë':

—Señor, psëdi nëto' cabë' huendo' ta hue'lëndo' Diuzi di'idza' cabë' bë Juan psëdinë' yaca ben' quienë'.

<sup>2</sup> Na'ra una Jesús rëbinë' yaca ben' quienë':

—Cati hue'lële Diuzi di'idza', inale cani:

Xuzindo' Diuzi zulo' guibá, naca la'iya laolo'.

Rbezando' guida dza inabë'lo' lao yedyi layu cabë' rnabë'lo' guibá ga zulo'.

<sup>3</sup> Guno' ta gaondo' quie na'adza cabë' ta rdzioguendo'.

<sup>4</sup> Bezi'ze quiendo' tamala bëndo' cabë' rezi'zendo' tamala bë yaca benë' len nëto'.

Gacalao' nëto' ta biiguinondo' lao tamala, ucuasa ucui'olo'tamala za' gaca quiendo'. Amén.

<sup>5</sup> Lëzi unarë Jesús rëbinë' leyaquë':

—Ugunro lao tu le'e tzirole gatzo yela lidity tu amigo quiele yëbilenë: "Amigo, ben në'ëdi' tzona yëta xtila

<sup>6</sup> como dan' babla' tu bi' amigo quia' zan yu'u. Na' bibi de ta hua'abi' gaobi'."

<sup>7</sup> Lëzi ugunro bequëbi ben' zu lu'u yu'u unë': "Bihuelo' në'ëdi' zëdi, dan' baneyeyo yu'u quia'. Lëzi arasi yaca xcuidi' quia' ržubayacabi' lao cama len në'ëdi'. Bisaque' chasa' guna' luë' dan' rnabo'."

<sup>8</sup> Pues rnia' le'e, chi lëbë' biuyasë' hue'në' ta rnaba ben' na', ba'ala'cazi naquë' bi' amigo quienë', re'en ca re'ennan chasë' hue'në' yugulu ta rdziogue amigo quienë' tacuenda bira bizëdi huenë' lëbë'.

<sup>9</sup> Cani rnia' le'e: Ulenaba Diuzi ta rdzioguele, na' gunnë'n. Ulequilo tali quie Diuzi, na' huadzelan. Ulelidza Diuzi gan' zunë', na' huenë' quiele.

<sup>10</sup> Ruen zi huele cana', porque nu ben' rnaba Diuzi ta rdzioguenë', na' hue'në'n. Lëscan' nu ben' rguilo tali quie Diuzi, na' huadzenë'n. Lëscan' nu ben' rulidza Diuzi gan' zunë', na' huenë' quienë'.

<sup>11</sup> ¿Bi ca nale le'e xuzi xcuidi'? ¿Hue'le ži'ile yola lao laza inababi' yëta xtila? Lëzi, ¿hue'le ži'ile bëlala lao laza inababi' bela?

<sup>12</sup> Lëzi, ¿hue'le ži'ile xuni'la lao laza inababi' chita?

<sup>13</sup> Chi le'e, ben' rda lao yedyi layu niga, chi nezile hue'le ži'ile tu tadya'a, na' bizi Xuzile Diuzi zu guibá, neziranë' ca le'e hue'në' benë' tu tadya'a, hasta udze'në' Bichi Be quienë' lu'u guicho laxta'o yaca ben' unaba len.

*Ga una benë' bebio Jesús bichi be xi'ibi' conlë yela' huaca quie xan' taxi'ibi' (Mt. 12.22-30; Mr. 3.19-27)*

<sup>14</sup> Bizi bdyin tu dza bebio Jesús tu bichi be xi'ibi' yu'u tu ben' bero. Caora bero bichi be xi'ibi' gan' yu'un, labeyacate ben' na', benë'në'. Na'ra bega'n yaca benë' bebanyaquë' cabë' guca quienë'.

<sup>15</sup> Cana' una bala benë' rëbiyaquë' laguedyiaquë':

—Conlë yela' huaca quie Beelzebú, ben' naca xan' taxi'ibi', rebio ben' niga bichi be xi'ibi' yu'u yaca benë'.

<sup>16</sup> Bizi ibalayaquë' unabayaquë' hue Jesús tu yela' huaca quie Diuzi žan guibá chi tali naquë' ben' use'ela' Diuzi.

<sup>17</sup> Pero banezi Jesús cabë' pensari raca yaca benë'. Na' unë' rëbinë' leyaquë':

—Chi tu cue' gobierno gaca zë cue' partido, chi tilalëyaquë' laguedyiaquë' ben' naca partido, bisue gobierno inabë'yaquë' zidza. Lëzi chi gata' dila quie yaca ben' žan yu'u, huaroyaquë' huadzatzaquë', bira saque' suyaquë' tuzi.

<sup>18</sup> Lëzi cana' nacarë quie Satanás. Chi rbio Satanás laguedy bichi be xi'ibi'n yu'u benë', bira saque' inabë'nan zidza. Nia' le'e cana', como dan' nale conlë yela' huaca quie Beelzebú rebioga' bichi be xi'ibi' yu'u yaca benë'.

<sup>19</sup> Pero chi nacan tali ca nale, ¿bizi nale quie yaca ben' naca le'e tuže, yaca ben' rebio bichi be xi'ibi' yu'urë yaca benë'? Lena' huanayaquë' le'e bisaque' taxi'ibi' yebion laguedy xi'ibi'n.

<sup>20</sup> Pero conlë yela' huaca quie Diuzi rebioga' bichi be xi'ibi' yu'u yaca benë'. Lena' ulu'en azëcazi ladole yela' huaca quie Diuzi.

<sup>21</sup> Baruen quie Satanás ca quie tu ben' huala, ben' nuxu espada quie, ben' rapa lao yugulute ta de quie. Bisaque' tzu'u ben' tula si' ta de quienë'.

<sup>22</sup> Na'ra chi guida tu ben' hualara ca lëbë', ben' dera yela' huaca quie, huenë' gan' uaxonë' lëbë'. Cana' cubanë' espada quienë' ta rzugadyilënë'. Cana' si'në' lao yugulute ta de quienë'.

<sup>23</sup> Nu ben' birnëcule në'ëdi', condre në'ëdi' zënë'. Lëzi nu ben' biracalë në'ëdi', condre në'ëdi' ruenë'.

*Ni rnan quie tu bichi be xi'ibi' beron beyu'un*  
(Mt. 12.43-45)

Na' una Jesús:

24 —Bizi cati bero tu bichi be xi'ibi' ga yu'un benè', na' rdan tu lao lato bidyi rguilon ga tzu'unan yezila'adyi'n. Bizi cati birdzela ga tzu'un, na' racan pensari: “Hueya'a tatula gan' broga' ta yeyu'a tatula.”

25 Bizi bè' yedyinnan gan' brona be'mbyu, anaca quienè' ca quie tu zan yu'u neluba dya'a, bega'nnan dya'a gula.

26 Na'ra tzion tzaxi'n igadyi bichi be xi'ibi' nacara mala ca len. Na'ra tzu'u yuguluyacan be'mbyu. Bizi ben' na' huacara mala quienè' cabè' naca quienè' tanëro.

*Ni rnën quie ben' naca huen quie*

27 Tu rnë Jesús rëbinè' benè', na' unè tu nigula zidzo rëbinè' Jesús:

—Naca huen quie nigula bi'a bga'adyi' luè'.

28 Na'ra una Jesús rëbinè' lëbè':

—Nacara huen quie ben' re rzënaga ca rna Diuzi, na' rue quieyaquè'n.

*Unaba ben' mala ulu'e Jesús tu yela' huaca za' guibá*

(Mt. 12.38-42; Mr. 8.12)

29 Bizi bdyinra yaca ben' zë gan' zë Jesús, na' uzulaonè' unè' rëbinè' leyaquè':

—Ben' mala naca ben' nita' na'a. Rnabarëyaquè' hua' yela' huaca ta za' guibá ilè'ëyaquè'. Pero bihua' yela' huaca ta za' guibá ca re'ënyaquè'. Ca yela' huaca bë Diuzi lënè' profeta Jonás, cana' huerënè' lënè' në'ëdi'.

30 Cabè' guca quie Jonás, bë Diuzi yela' huaca len lëbè' ta blu'enè' yaca ben' nita' yedyi Nínive ga use'ela' Diuzi lëbè', lëzi cana' gacarè quia' në'ëdi', bichi yugulu benè'. Hue Diuzi len në'ëdi' tu yela' huaca ta ulu'enè' yaca ben' nita' na'a de que use'ela'nè' në'ëdi'.

31 Dza gaca juicio cati ichuguli Diuzi quie yaca ben' nita' na'a, lëcana' guida nigula rnabè' lao yedyi nebaba Arabia ta ichugubè'nè' quiele. Cana' huenè' como dan' lëbè' uzè'ë yedyi re' zitu' zioquè' yezënaguè' ca ta rioñe'e Salomón dza na'la. Pero ladole zua' në'ëdi', ben' rnabè'ra ca Salomón, na' le'e biruzënegale quia'.

32 Lëzi dza gaca juicio cati ichuguli Diuzi quie yaca ben' nita' na'a, lëcana' guida yaca ben' unita' yedyi Nínive dza na'la ta ichugubè'yaquè' quiele. Cana' hueyaquè' como dan' leyaquè' betza'yaquè' pensari quieyaquè' caora cati bdyin Jonás udixogue'nè' leyaquè' xti'idza' Diuzi. Pero ladole zua' në'ëdi', ben' rnabè'ra ca Jonás, na' le'e biruzënegale quia'.

*Una Jesús quie ben' yu'u pensari quie Diuzi*  
(Mt. 5.15; 6.22-23)

Na' una Jesús:

33 —Ni tule biuga'ala'le lámpara ucui'olen ga negachi', nica quixolen zan caja. Ruen zi ixubalen sibi ta useni'n ta ilè'ë yaca ben' za' tzu'u yu'u.

34 Naca laole ca quie tu lámpara rseni'n lu'u guicho laxta'ole. Chi ina'le dyè'ëdi hue quiele xti'idza' Diuzi, lena' rulu'en quiele yu'u pensari quie Diuzi lu'u guicho laxta'ole. Pero chi biina'le dyè'ëdi, chi bihue quiele xti'idza' Diuzi, lena' rulu'en quiele rdale lao lato lao chula.

35 Gapale cuidado hue quiele xti'idza' Diuzi ta bitale lao lato lao chula.

36 Chi rue quiele du guicho du la'adyi'le xti'idza' Diuzi, cana' tzioñe'ele ca naca tali quie Diuzi, cana' gaca quiele ca quie ben' zë lámpara ta useni'n ilè'ënè' ga zionè'.

*Ga rao Jesús xquia yaca ben' partido fariseo, len yaca ben' rusèdi ley quie Moisés*

(Mt. 23.1-36; Mr. 12.38-40; Lc. 20.45-47)

<sup>37</sup> Bizi babeyudyi unè Jesús cana!, na'ra gudyi tu ben' partido fariseo Jesús ta tzionè! Zan yu'u quienè! ta gaonè!. Na' zio Jesús uyu'unè! lu'u yu'u quienè! yaque'nè! ru'a mesa.

<sup>38</sup> Na'ra tu bebanzi ben' partido fariseo rnè'è ta biudibi na'a Jesús tu zagaonè!. Biunao Jesús ca naca costumbre unaoyaquè! rnayaquè! dan' rguibi na'ayaquè!, cana' neyèriyaquè! lao Diuzi.

<sup>39</sup> Na'ra una Jesús rëbinè! lëbè!:

—Le'e ben' partido fariseo, rguibile xcu'udzu plato taza quiele, pero le'e yu'u pensari mala lu'u guicho laxta'ole, rbanle ruele tamedian quie laguedyile.

<sup>40</sup> ¡Le'e ben' zidi! ¿Binezile re'en Diuzi huerèle yèri lu'u guicho laxta'ole?

<sup>41</sup> Pero chi re'enle huele yèri lu'u guicho laxta'ole, ulehue! ta de quiele yaca ben' yèchi!. Na'tera gacale yèri duzele.

<sup>42</sup> ¡Bayèchi! gula naca quie le'e, ben' partido fariseo! Bizi lente guixi! cuan ru'ele Diuzi tu cue'n quie lao chi cue'na. Pero biruele bala ta yu'u ni'a xnezi quie Diuzi, nica nedyè'èle Diuzi. Lena' zaca'ra huele, cala ca ta ru'ele Diuzi tu cue'n quie lao chi cue'na, pero rupaten reya'ala' huele.

<sup>43</sup> ¡Bayèchi! gula naca quie le'e, ben' partido fariseo! Lega raxele cue'le silla ga rbe' yaca ben' bala'ana lu'u idao' sinagoga. Na' lèzi lega raxele gapala'n benè! le'e ga ziole yu'u neza.

<sup>44</sup> ¡Bayèchi! gula naca quie le'e, ben' rusèdi ley quie Moisés, len le'e, ben' partido fariseo! Le'e biruele tuzi ca nale. Naca quiele ca quie yerobá nadacon bëbi. Na' bizi yaca benè! rdeyaquè! laonan bineziyaquè! chi yerobá na'.

<sup>45</sup> Na'ra una tu ben' rusèdi ley quie Moisés rëbinè! Jesús:

—Maestro, ca di'idza' unèlo!, lèzi rnërao' condre nêto!.

<sup>46</sup> Na'ra una Jesús rëbinè! leyaquè!:

—¡Bayèchi! gula naca quie le'e, ben' rusèdi ley quie Moisés! Ruele cabè! rue ben' rucua' yua' zi'i gula lao laguedyin tu ta bisueyaquè!. Re'enle inao yaca benè! le'e, hue quieyaquè! ca inale, na' inale cana' re'en Diuzi hueyaquè!, ba'ala'cazi zèdi gula nacan ta hue quieyaquè! len. Na'ra le'e ni lè'èti! biyeyèchi!la'adyi!le yaca benè! gacalèle leyaquè! ta hue quieyaquè! len.

<sup>47</sup> ¡Bayèchi! gula naca quie le'e, ben' rusèdi ley quie Moisés! Como dan' cabè! bè xuzixta'ole dza na'la bëtiyaquè! nu ben' uda udixogue' xti'idza' Diuzi, cana' re'enle huerèle.

<sup>48</sup> Nacale de acuerdo con can' bè xuzixta'ole. Chi le'e uzurèle dza uzu xuzixta'ole, lèzi bëtile yaca ben' uda udixogue' xti'idza' Diuzi. Gucalèle lëbizi xuzixta'ole.

<sup>49</sup> 'Yela' rioñe'e quie Diuzi unè! cani: “Huase'ela' yaca ben' quixogue' di'idza' quia' laoyaquè!. Na'ra gutiyaquè! balayaquè!, na' hualaoyaquè! ibalayaquè!.”

<sup>50</sup> Pero le'e, ben' nita' na'a, huazi' Diuzi cuenda quiele quie yela' guti quie yugulu yaca ben' udixogue' xti'idza' Diuzi, desde dza ure'lao yedyi layu.

<sup>51</sup> Pues desde dza ulato ren quie Abel hasta dza bëtiyaquè! Zacarías lu'u idao' xcu'udzu becugo, lèlëna' huazi' Diuzi cuenda quiele.

<sup>52</sup> ¡Bayèchi! gula naca quie le'e, ben' rusèdi ley quie Moisés! Le'e ruza'agale tzioñe'e yaca benè! xti'idza' Diuzi. Le'e birioñe'ele xti'idza' Diuzi, nica ru'ele lato tzioñe'e yaca ben' re'en tzioñe'e len. —Cana' una Jesús gudyinè! leyaquè!.

<sup>53</sup> Bē' una Jesús can' gudyinē' leyaquē', na'ra bdza'tzeguera yaca ben' rusēdi ley quie Moisés, len yaca ben' partido fariseo. Caora na' uzulaoyaquē' rueyaquē' lēbē' zēdi unabayaquē' lēbē' mazara di'idza'.

<sup>54</sup> Lega rbe'naoyaquē' lēbē' re'enaquē' hueyaquē' trampa quie Jesús ca di'idza' yequēbinē' tacuenda ga gaoyaquē' lēbē' xquia.

## 12

### *Ga unē Jesús quie ben' r'lidza Diuzi de di'idza' ladzazi*

<sup>1</sup> Bizi banita' ben' zē gula ga zē Jesús. Tantozi babdupa ben' zē, barquidi'yaquē' laguediyaquē'. Na'ra una Jesús rēbinē' yaca ben' quienē':

—Gapale cuidado bihue de ca rue yaca ben' naca partido fariseo, dan' nacayaquē' ben' r'lidza Diuzi de di'idza' ladzazi.

<sup>2</sup> Yugulu ta bē yaca benē' negachi'zi, decazide yezacalaon quieyaquē' lao Diuzi cabē' bēyaquē'. Ni tu ta bē yaca benē' raqueyaquē' chi nunu blē'ē, decazide yezacalaon quieyaquē' lao Diuzi cabē' bēyaquē'.

<sup>3</sup> Yugulu ca naca di'idza' negachi' rna yaca benē', huadyin dza yezacalaon quieyaquē' lao Diuzi cabē' di'idza' unayaquē'. Lēzi yugulu di'idza' raque yaca benē' di'idza' negü'o, huadyin dza inēzi yugulu benē' cabē' di'idza' unayaquē'.

### *Ni ru'en di'idza' quie nu ben' reya'ala' idzebiro*

(Mt. 10.26-31)

Na' una Jesús:

<sup>4</sup> —Le'e amigo quia', rnia' le'e: Biidzebile nu ben' re'en guti le'e, como dan' bē' bagutiyaquē' le'e, bira bide bihueyaquē' quiele.

<sup>5</sup> Ta rnia' le'e nu ben' reya'ala' idzebile. Reya'ala' idzebile Diuzi como dan' de yela' r nabē' quienē' yezi'nē' yela' neban quie yaca benē', na' udze'nē' leyaquē' lu'u gui' gabila.

<sup>6</sup> Lēscan' rnia' le'e: ¿Cala ruti'yaca benē' ga'yo' bguini dao' lao chopa dumi dao' lasi? Na' bizi la'acazi nacaba' bguini dao' bizu, birala'adyi' Diuzi quieyacaba'.

<sup>7</sup> Ta rnia' le'e, hasta guitza' guichole nulaba Diuzi lao yuguluten. Biidzebile, zaca'rale lao Diuzi mazara ca yaca bguini dao'.

### *Ni ru'en di'idza' quie yaca ben' birnē cule Jesucristo*

(Mt. 10.32-33; 12.32; 10.19-20)

Na' una Jesús:

<sup>8</sup> —Ta rnia' le'e, nu ben' rnē cule nē'ēdi' lao yaca ben' nita' lao yedyi layu, lēzi nē'ēdi', bichi yugulu benē', huania' cule leyaquē' lao yaca ángel quie Diuzi.

<sup>9</sup> Pero nu yaca ben' bichezila'adyi' nē'ēdi' lao yaca ben' nita' lao yedyi layu, lēzi nē'ēdi' bichezila'adya' leyaquē' lao yaca ángel quie Diuzi.

<sup>10</sup> Nu ben' rnēxi'ibi' condre nē'ēdi', bichi yugulu benē', ru'en lato yezi'ze Diuzi quieyaquē'. Pero nu ben' rnēxi'ibi' condre Bichi Be quie Diuzi, biyezi'ze Diuzi quieyaquē'.

<sup>11</sup> Cati usedyinyaquē' le'e lao na'a ben' napa dyin lu'u idao' sinagoga, o chi lao na'a yaca juez, o chi lao na'a yaca ben' r nabē', bidēbile bi di'idza' inale yequēbile yēbilyaquē'.

<sup>12</sup> Cati idyin hora inale yequēbile yēbilyaquē', caora na' huacalē Bichi Be quie Diuzi le'e bi inale yequēbile yēbilyaquē'.

### *Ga rue zudyi quie ben' uña'a*

<sup>13</sup> Bizi lado yaca ben' na', uzē tu benē' unē' rēbinē' Jesús:

—Maestro, aguti xuza'. Gudyi ben' bicha' gunnè' ta de quie xuza' ca tu ta redu'uleda' si'a.

<sup>14</sup> Na'ra una Jesús rëbinè' lëbè':

—Rnia' luè', binacan dyin quia' para hua'a laze quiele quie ta de quie xuzile.

<sup>15</sup> Lëscan' unè' rëbinè' leyaquè':

—Gapale cuidado ta bisa'la'adyi'le ta de lao yedyi layu, como dan' nacaran belao quiele gata' yela' neban quiele tuzioli, cala ca ta sa'la'adyi'le ta de lao yedyi layu.

<sup>16</sup> Na'ra una Jesús tu ejemplo cani:

—Uzu tu ben' uña'a. Guzanè' lao yu quienè'. Lega guca usecho quienè'.

<sup>17</sup> Bizi ben' uña'a guquè' pensari unè': “¿Ca bizi hua'”? Bide ga udzi'a usecho quia', dan' lega gucana.”

<sup>18</sup> Lena' guquè' pensari unè': “Banezda' ca ta hua'. Uquinuga' yu'u ga udzi'a usecho, bigaquen. Lena' huera' tazera tacuenda gaquen ga udzi'a usecho quia' len yugulu ta de quia'.”

<sup>19</sup> Lëscan' guquè' pensari unè' cuinzinè': “Lega guca usecho quia'. Huaquen lao zè iza. Quie lena' abdyin hora yezila'adya', zua' contento, yo'oga', gaohua'.”

<sup>20</sup> Pero na' una Diuzi rëbinè' ben' uña'a: “Ben' tondo luè', na'ayela gatio'. Na' yugulu ta de quio', ¿nuži gaca quie len?”

<sup>21</sup> Cana' nacan quie ben' uña'a chi ruezanè' quiè' cuinzinè' dza rdanè' lao yedyi layu. Na' biži Diuzi rl'è'nè' lëbè' ben' yèchi' gula.

*Rna'cazi Diuzi ben' nao xnezè'*

*(Mt. 6.25-34)*

<sup>22</sup> Beyudyi una Jesús cana', unè' rëbinè' yaca ben' quienè':

—Con ca rnia' le'e, bidèbile ga za' ta gaole. Bidèbile ga za' ta gacole.

<sup>23</sup> Nacaran belao hue quiele xti'idza' Diuzi dza rdale lao yedyi layu, cala ca ta idèbile ga za' ta gaole, ta gacole.

<sup>24</sup> Ulena'cara ca raca quie yaca bguini. Birazara'nyacaba', biruerëyacaba' ga udze'yacaba' ta gaoba', den' rgaocazi Diuzi leyacaba'. Na' biži le'e, jzaca'rale ca yaca bguini!

<sup>25</sup> Nitu nitule, ba'ala'cazi rdèbitzeguele, bisaque' uda'rale ni itu hora ta yezurale lao yedyi layu bè' beya dza quiele.

<sup>26</sup> Na' chi ni ilè'èti' bisaque' uda'rale yezurale lao yedyi layu bè' beya dza quiele, çbixquien' rdèbile ga za' ta gaole, ga za' ta gacole?

<sup>27</sup> Ulena'cara ca re'eni yaca yo. Birueyacan dyin, bira'aban yèla. Na' biži rnia' le'e, ni rey Salomón, ba'ala'cazi guconè' la'ari' tzaol', la'ari' baquitu, bibetilan lëbizi yela' baquitu quie yo.

<sup>28</sup> Cabè' rue Diuzi rapè' yo ta de lao layèla, ba'ala'cazi gaca tu chopa dza huabidyin tzu'un lagu' tzeina, cana' huaparè Diuzi le'e, pero mazara le'e, ben' rdèbi ga za' ta gaole, ga za' ta gacole.

<sup>29</sup> Quie lena', bitale idèbile quilole ga za' ta gaole, ga za' ta yo'ole.

<sup>30</sup> Bihuele cana', dan' cana' rue yaca ben' rda lao yedyi layu, rdèbiyaquè' bi ta gata' quieyaquè'. Pero zucazi Xuziro Diuzi, rnè'è le'e, banezinè' bi ta rdzioguele.

<sup>31</sup> Ta nacaran belao hue quiele inaole xneza Diuzi, lëcana' gunnè' lao yugulute ta rdzioguele.

*Una Jesús ga reya'ala' gata' yela' uña'a quiero*

*(Mt. 6.19-21)*

Na' una Jesús:

32 —Bidzebile, nacale ca quie beco' zi'ila' quia', bia napa'. Ba'ala'cazi naca tu chopale, lega redaohue Xuziro Diuzi gunnè' lato yedyinle ga zunè' rnahè'nè'.

33 Uleguti' ta de quiele. Dumi dan' guti'le ta de quiele, na' ulehue'n ben'bide quie. Cana' huacara tadya'a quiele guibá, gun Diuzi quiele ta de guibá. Na' ta gata' quiele guibá, bisaque' cuan benè' len, nica nu tzu'u udyiagui' len.

34 Con ga re'enle gata' yela' uña'a quiele, chi lao yedyi layu, chi guibá, lena' ulu'en ca bi pensari racale, chi quie cuinzile, chi quie Diuzi.

*Reya'ala' suro puesto cuezaro yeguida Cristo*

Na' una Jesús:

35 —Ulesu listo, ulehue ca rue ben' ruga'ala' lámpara quie, barbezè' chi ben' idyin zan yu'u.

36 Reya'ala' huele ca rue ben' zu rapa zan yu'u quie xa'ne, ben' rbeza bē' yedyin xa'nnè' gan' tzioguè' ga raca huetzagana'. Rbezè' ulidza xa'nnè' lèbè' ru'a yu'u ta isaloguè' ta yeyu'u xa'nnè'.

37 Tahuen gula naca quie ben' rapa yu'u bē' yedyin xa'nnè', ilè'ènè' zuè', rnè'è birasinè'. Lèlena' nacan tali rnia' le'e, cuin xa'nnè' huabèchinè' lèbè' lao mesa, hue'nè' laze ta gao ben' rapa yu'u.

38 Lèzi tahuen gula naca quie ben' rapa yu'u chi zuè' rnè'è birasinè' bē' yedyin xa'nnè', ba'ala'cazi du gatzo yela, ba'ala'cazi du bala.

39 Uzēnagale ca rnia' le'e ni. Chi tu ben' xan' yu'u ineziguè' bi hora idyin ben' uban, na'ra sunè' inè'è bigasinè', bihuè'nè' lato ta tzu'u ben' uban lu'u yu'u ta cuannè' ta de quienè'.

40 Na' bizi le'e, ulesu listo cuezale yeguida', como dan' caora bibi pensari racale yeguida', lao durpendizi yeguida' lao yedyi layu nē'ēdi', bichi yugulu benè'.

*Ni rnēn quie ben' bzu di'idza' len ben' bibzu di'idza' (Mt. 24.45-51)*

41 Na'ra una Pedro rēbinè' Jesús:

—¿Señor, unēlo' di'idza' ta nacan irupa iyunala para nēto'zi o chi unēlo'n lao duzetela?

42 Na'ra una Jesús rēbinè' lèbè':

—Rnia' di'idza' ta nacan irupa iyunala para nutezi ben' rioñe'e, para nutezi ben' ruzu di'idza' ca rna xa'nnè'. Lēben' na' hue xa'nnè' ladyina'anè' ta inè'è ben' nita' zan yu'u quienè' ta hue'nè' ta gaoyaquè' caora idyin hora gaoyaquè'.

43 Tahuen gula gaca quie ben' zu rapa yu'u quie xa'nnè', chi bē' yedyin xa'nnè' ilè'ènè' rzuguè' di'idza' con can' gudyinè' xa'nnè' lèbè'.

44 Tali ca rnia', ben' naca xan' yu'u, hue'nè' ladyina'a yugulu ta de quienè' lao na'a ben' udapa yu'u quiè'.

45 Bizi chan' ben' zu rapa zan yu'u quie xa'nnè', chi racanè' pensari huadzè xa'nnè' biyedyinnezè', chi sulaonè' tilalènè' inèlènè' yaca ben' rue dyin zan yu'u quie xa'nnè', chi sulaocalanè' gaonè' yo'onè' xudyinè',

46 na'ra bē' yedyin xa'nnè' dza birbezè' yedyin xa'nnè', hualè'ènè' can' ruenè', huenè' lèbè' tu castigo huala gula, ise'elè' lèbè'ta tzionè' lado yaca los demás ben' bibzu di'idza' quiè'.

47 Nu ben' zu lao xa'nnè' nezinè' ca ta re'en xa'nnè' huenè', den' bibzunè' di'idza' huenè' ca gu'un xa'nnè', huata' castigo huala gula quienè'.

48 Pero nu ben' zu lao xa'nnè', pero binezinè' ca ta re'en xa'nnè' huenè', pues ba'ala'cazi reya'ala' gata' castigo quienè' cabè' bènè', pero dan' biunezinè' can' bènè', yubè'ēzi castigo gata' quienè'. Nu ben' bē' Diuzi taze, lèlèbè'

yenaba Diuzi yeyu'enë' tazera. Lëscan' nu ben' pca'n Diuzi tazë lao në'ë, lëlëbë' yenaba Diuzi usedyinnë' tazëra lao në'ë.

*Una Jesús huario yaca benë' chopacue'*  
(Mt. 10.34-36)

Na' una Jesús:

<sup>49</sup> —Në'ëdi' bida' ta cuëcha' ca quie gui' lao yedyi layu. Lena' re'entzegueda' ga'ala'n na'.

<sup>50</sup> Baza' dza gatia' lë'ë yaga cruzo. Lega rutëbin në'ëdi' rbeza' bë' yeyudyi gatia'.

<sup>51</sup> Na' rnia' le'e, ¿raquele bida' lao yedyi layu ta bira gata' zëdi huedila quiele? Rnia' le'e, cala lena' bida', dechan' bida' ta iro chopacue' yaca ben' nita' lao yedyi layu.

<sup>52</sup> Ga sulaon na'a, ga sulaon quie dza zaza'ra. Huaca quie lao ga'yo' ben' nita' zan yu'u, huaroyaquë' chopacue'. Tzonayaquë' huaca condre quie chopayaquë'. Na' ichopayaquë' huaca condre quie tzonayaquë'.

<sup>53</sup> Huaca xuzi zna' xcuidi' condre quie zi'iyaquë'. Na' huaca zi'iyaquë' condre quie xuzi zna'yacabi'. Huaca zna' be'mbyu condre quie zualidyinë'. Na' huaca zualidyinë' condre quie ben' gula quiebi'.

*Reya'ala' huero pensari cabë' raca quiero*  
(Mt. 16.1-4; Mr. 8.11-13)

<sup>54</sup> Na'ra una Jesús rëbinë' yaca ben' nita' na':

—Cati rlë'ële rasa beo ga reguin obidza, lena' inale huen nisayo, na'ra huen cabë' nale.

<sup>55</sup> Lëzi cati rlë'ële baza' be tzala' ga reguin obidza, lena' inale huen zla, na'ra huen cabë' nale.

<sup>56</sup> Le'e ben' rlidza Diuzi de di'idza' ladzazi, banezile huele pensari can' hue beo len can' hue be, ¿na' bixquien' binezile huele pensari can' raca quiele dza rdale lao yedyi layu?

*Reya'ala' yega'ntza'olëro ben' reya'ala'ro quie*  
(Mt. 5.25-26)

Na' una Jesús:

<sup>57</sup> —¿Bixquien' biracale pensari ca naca tali ca reya'ala' huele?

<sup>58</sup> Chi zu tu ben' reya'ala'le quie, na' re'ennë' quizole quienë' uquië'në' le'e lao ben' napa dyin, ruen zi yega'ntza'ole laonë' tu neza tu binedyinë' lao ben' napa dyin. Chi baziolëlenë' lao juez, hue juez mandado udze' policia le'e lu'u dyiguiba.

<sup>59</sup> Na' rnia' le'e, gabi yerole hasta que quizole yugulute ca ta reya'ala'le.

## 13

*Nacan belao yetza'ro pensari quiero*

<sup>1</sup> Lëhora na' bdyin yaca benë' rëbiyaquë' Jesús can' bë Pilato bëtinë' chopacue' tzona ben' estado Galilea. Pquixinë' ren quieyaquë' len ren quie bia guixi' ta bdyiayaquë' lao becugo quie idao' rna'bë'ra zu ciudad Jerusalén.

<sup>2</sup> Na' una Jesús rëbinë' leyaquë':

—¿Ca biži pensari racale cabë' guca quie yaca ben' Galilea? ¿Raquele nacarayaquë' ben' bëra tamala quie, cala ca yaca ben' lao yedyi quiele?

<sup>3</sup> Na'ra rnia' le'e, binacan can'. Na' le'e, chi biyetza'le pensari quiele inaole xneza Diuzi, biyezi' Diuzi le'e.



<sup>4</sup> ¿Ca bizi pensari racale cabè' guca quie yaca chi'inu'betzona yaca ben' guti bdaco' torre Siloé leyaquè'? ¿Raquale nacarayaquè' ben' de dula' xquia quie, cala ca yaca los demás ben' nita' lao ciudad Jerusalén?

<sup>5</sup> Lena' rnia' le'e, binacan can'. Na' le'e chí biyetza'le pensari quiele inaole xneza Diuzi, biyezi' Diuzi le'e.

*Unë Jesús tu di'idza' quie tu yaga higo bidyian tazixi*

<sup>6</sup> Na'ra una Jesús tu ejemplo ni:

—Uzu tu be'mbyu zu tu yaga higo quienè' lao layela quienè'. Na'ra uzè'è zioguè' tzena'nè'n chi badyian higo, na' blè'ènè' ni tu higo bidyia lao yaga.

<sup>7</sup> Na'ra una ben' zu yaga higo quie, rëbinè' ben' rapa layela quiè': “Una'cara, azio tzona iza rida' dena'a yaga higo ni chi dyian tazixi, pero ni tu higo binelè'èda' cuialaonan. Mejorla ichugulo'n, ¿bixquien' ru'eron lato zun layu niga, chi birbian higo?”

<sup>8</sup> Na'ra una ben' rapa layela rëbinè' xa'nnè': “Señor, psan quien, bi-ichuguron zazugaran itu iza na'a. Ta hua' cuècha' tu pozo žannan tacuenda udyia'n bena.

<sup>9</sup> Con ca hua' quien, a ver chi bicuian tazixi. Pero chi bicuian tazixi, na'tera ichuguron.”

*Beyue Jesús tu nigula xcu'udzu bego dza huezila'adyi'*

<sup>10</sup> Uzu tu dza saodo, dza huezila'adyi' quieyaquè', uyu'u Jesús lu'u idao' sinagoga ga rsëdinè' yaca benè'.

<sup>11</sup> Lëgan' na' zë tu nigula raca žhue'nè'. Azio chi'inu'betzona iza uyu'unè' tu bichi be xi'ibi', na' beca'nnan lëbè' bego, bira guca yelinè'.

<sup>12</sup> Bizi cati blè'è Jesús lëbè', na' guzinè' lëbè' unè' rëbinè' lëbè':

—Nigula, hueyua' luè' ca naca yela' hue' yu'ulo'.

<sup>13</sup> Na'ra bda' na'anè' xcu'udzu nigula. Caora bda'nè' nè'è nigula, lal-belitenè'. Na' uzulaonè' ruenè' Diuzi ben' že.

<sup>14</sup> Pero lega bdza' ben' napa dyin lu'u idao' sinagoga, dan' beyue Jesús ben' xcu'udzu bego dza huezila'adyi'. Na'ra unè ben' napa dyin lu'u idao' sinagoga rëbinè' yaca benè':

—Xopa dza nacan ta huero dyin. Lëdza na' reya'ala' guida ben' raca žhue' ta iyacayaquè', cala na'adza huezila'adyi'.

<sup>15</sup> Na'ra una Jesús rëbinè' lëbè':

—Luè' ben' rlidza Diuzi de di'idza' ladzazi, ¿cala rxëdyo' huaga quio' o burro quio' ta tzhua'alo'ba' yo'oba' nisa dza huezila'adyi'?

<sup>16</sup> Na' nigula niga naquè' ži'i suba Abraham. Na' bizi xan' taxi'ibi' Satanás nuquion lëbè' nuen bego xcu'udzunè' azio chi'inu'betzona iza. Na' bizi luè', ¿bixquien' nao' bireya'ala' yexëdya' tanuquio xan' taxi'ibi' nigula ni dza huezila'adyi'?

<sup>17</sup> Bizi caora una Jesús can', bedue'tzegue yaca ben' rue condre lëbè'. Pero yaca los demás benè', lega redaohueyaquè' blè'ëyaquè' ca yela' huaca babè Jesús.

*Unë Jesús tu di'idza' quie bini mostaza*

(Mt. 13.31-32; Mr. 4.30-32)

<sup>18</sup> Na'ra una Jesús rëbinè' yaca benè':

—¿Ca bizi hua' ta yexi'idza' le'e ca naca ga rnabè' Diuzi? ¿Ca bi di'idza' re'ennan inia' le'e ta inezile dyè'èdi?

<sup>19</sup> Nacan ca quie tu bini mostaza ta guza tu benè' lao layu quiè'. Na' bizi bini mostaza, lá'acazi tu bini dao' bicu', pero gu'unin gucan tu yaga že gula. Na' bdyin yaca bia xila bëyacaba' lidyiba' lao taca'n.

*Unë Jesús tu di'idza' quie levadura  
(Mt. 13.33)*

<sup>20</sup> Lëscan' una Jesús rëbinë' leyaquë':

—¿Ca bi di'idza' re'ennan inia' le'e ta inezile dyë'ëdi ca naca ga arnabë' Diuzi?

<sup>21</sup> Nacan ca quie tu levadura ta rzi' nigula rla'adyi'në'n con tzona medida yezo. Conlë lena' rëzin duže cuba racan taže.

*Ga unë Jesús quie ru'a yu'u naca gui  
(Mt. 7.13-14, 21-23)*

<sup>22</sup> Na'ra uza' Jesús uyu'unë' neza tatula zionë' ciudad Jerusalén. Na' ga rdyinnë' tu tu yedyi neza ciudad Jerusalén uzulaonë' rguixogue'në' xti'idza' Diuzi.

<sup>23</sup> Na'ra unaba tu benë' lëbë' rëbinë' lëbë':

—Señor, ¿huezi' Diuzi ben' zë yeyoyaquë' guibá o chi tu chopaziyaquë'?

<sup>24</sup> Na'ra una Jesús rëbinë' lëbë':

—Naca gui ru'a yu'u guibá. Dula'adyi'le ulehue quiele tacuenda saque' tzu'ule lëru'a yu'u naca gui. Rnia' le'e, ben' zë gula inita' gue'enaquë' tzu'uyaquë', pero bisaque'.

<sup>25</sup> Caora bapsio ben' xan' yu'u na', biži le'e inita'le lali'a, na' ibiga'le ru'a yu'u, uxidyile ru'a yu'u, na' inale: “Señor, isalolo' ru'a yu'u niga.” Na' biži ben' xan' yu'u inënë' lu'u yu'ute yëbinë' le'e: “Binubë'da' nu le'e.”

<sup>26</sup> Na'ra le'e inale yëbile ben' xan' yu'u: “Aodaolëndo' luë', bahue'lëndo' luë' tuzi. Lëzi psëdio' yaca benë' yedyi quiendo' xti'idza' Diuzi.”

<sup>27</sup> Na'ra inë ben' xan' yu'u yëbinë' le'e: “Baonia' le'e, binubë'da' le'e. Uleyo bira huele në'ëdi' zëdi, le'e ben' mala.”

<sup>28</sup> Quie lena' cuedyile zi'laza gula gao leile caora ilë'ële Abraham, len Isaac, len Jacob, len yaca los demás ben' udixogue' xti'idza' Diuzi dza na'la anita'yaquë' guibá, na' biži le'e, naca bayëchi' quiele inita'le lali'a.

<sup>29</sup> Rnia' le'e, huída yaca ben' uza' lao duže yedyi layu yegu'udi'yaquë' guibá ta cue'yaquë' lao mesa quie Diuzi ta gaoyaquë'.

<sup>30</sup> Bala ben' nita' lao yedyi layu niga, binacajë' ben' ze, pero huacajë' ben' ze dza yedyinjë' ga zu Diuzi. Lëscan' bala ben' naca ben' ze lao yedyi layu niga, bira nacajë' ben' ze dza yedyinjë' ga zu Diuzi.

*Uredyi Jesús cabë' bë yaca ben' nita' ciudad Jerusalén  
(Mt. 23.37-39)*

<sup>31</sup> Lëdza na' bdyin yaca ben' partido fariseo gudyiyaquë' Jesús:

—Uza' uyo ga tula, dan' re'en rey Herodes gutinë' luë'.

<sup>32</sup> Na' una Jesús rëbinë' leyaquë':

—Uleyo uletzegüedyi lëben' mañoso ca rnia' le'e, nia': “Itu chopa tzona dza sua' yebioga' bichi be xi'ibi' yu'u yaca benë', yeyueria' yaca ben' raca žhue'. Na' baruen bago dza iyudyi hua' dyin quia'.”

<sup>33</sup> Pero decazide hua' dyin cabë' dyin nagun Diuzi hua'. Nerdziogue itu chopa tzona dza ga idyintia' ciudad Jerusalén como dan' lëciudad na' nacan ciudad pa rutiyaquë' ben' rguixogue' xti'idza' Diuzi.

<sup>34</sup> Le'e ben' ciudad Jerusalén, rutila yaca ben' za' rguixogue' xti'idza' Diuzi. Lëzi le'e ben' ciudad Jerusalén, rguile yo yaca ben' use'ela' Diuzi laole. Zë lasa gu'unda' gapa' le'e cabë' rue nu biu bena', rapaba' ži'iba', rguëdyiba' ži'iba' žan xilaba'. Pero na' le'e, bigu'unle.

<sup>35</sup> Lena' apsanla'adyi' Diuzi le'e. Na'ra rnia' le'e, ibaba dza bira ilë'ële në'ëdi'. Hasta quie idyin dza yëbile në'ëdi': “Ben' naca la'iya luë', ben' use'ela' Diuzi, na'tera ilë'ële në'ëdi' tatula.”

## 14

*Beyue Jesús tu ben'yu'u gui*

<sup>1</sup> Biži bezu dza tula, dza huezila'adyi'. Caora na' zio Jesús ta gaohuè' zan yu'u quie ben' napa dyin, ben' naca partido fariseo. Na'ra rbè'nao yaca ben' laguedyinè' chi bi hue Jesús dza huezila'adyi'.

<sup>2</sup> Na' lègan' na' zè tu ben' yu'u yela' hue' gui.

<sup>3</sup> Na'ra una Jesús rëbinè' yaca ben' rusèdi ley quie Moisés, len yaca ben' naca partido fariseo:

—¿Biži na lao ley? ¿Ru'en lato yeyua' ben' raca zhue' dza huezila'adyi'?

<sup>4</sup> Caora na' bega'nyaquè' chizi, bira unëyaquè'. Na'ra bëxunè' na'a ben' yu'u gui, beyuenè' lëbè'. Ude na' una Jesús gudyinè' ben' beyuenè': “Aoca, beyo.”

<sup>5</sup> Na' una Jesús gudyinè' ben' partido fariseo:

—Chi nu le'e rguino burro o huaga quiele lu'u barranca, ba'ala'cazi nacan dza huezila'adyi', ¿quele huayole tzaliöleba'?

<sup>6</sup> Na'ra bira ubinyaquè' bi yëbiyaquè' lëbè'.

*Ga unë Jesús quie ben' rue lani*

<sup>7</sup> Bè' blè'è Jesús ca rue yaca ben' bdyin ga zè'è, blè'ënè' rsereyaquè' ga cue'yaquè' re'ënyaquè' cue'yaquè' ga cue' ben' bala'anara.

<sup>8</sup> Na' unè' rëbinè' leyaquè' tu di'idza':

—Cati ziole ga raca huetzagana', bicue'le ga rbe' ben' bala'anara. Biži chan' zaza'ra ben' nacara belao cue'nè' gan' re'lo' na'.

<sup>9</sup> Biži bare'lo' ga rbe' ben' bala'anara, na' inè ben' rue lani yëbinè' luè': “Uzuli, bè' lato cue' ben' niga gan' bare'lo'.” Cati inanè' luè' cana', cana' yedue'lo' yeyolo' tzare'lo' xcu'udzula.

<sup>10</sup> Na' ca ta reya'ala' huele cati tziöle lani, cue'le xcu'udzutela. Na'ra cati ilè'è ben' rue lani re'lo' xcu'udzutela, na'ra inè' luè': “Amigo, ude nila cue'lo' ga rbe' ben' bala'anara.” Cana' gaca bala'ana quiele len yaca ben' bare' lao mesa.

<sup>11</sup> Na' rnia' le'e, nu ben' rue ze cuine, huadyin dza hue Diuzi lëbè' ben' yube'ëzi. Na' biži nu ben' rue yube'ëzi cuine, huadyin dza hue Diuzi lëbè' ben' ze. —Cana' una Jesús rëbinè' leyaquè'.

<sup>12</sup> Lëzi unërè Jesús rëbinè' ben' rue lani:

—Cati huelo' lani biguèzo' ben' naca amigo quio', ni bi' bicho', ni xuzi znao', nica ben' uña'a, como dan' huadyin dza yeyueyaquè' laohue quio', gunrëyaquè' ta gaolo'. Conlè lëzin yeyuen laohue quio'.

<sup>13</sup> Na' ca ta reya'ala' huelo' cati huelo' lani, reya'ala' guèzo' yaca ben' yëchi', len yaca ben' ca guicho ca lao, len yaca ben' zi, len yaca ben' laochula.

<sup>14</sup> Chi huelo' cana', cana' gata' tahuen gulara quio' yedaohuelo' bè' idyin dza useban Diuzi ben' bè quie xti'idza'nè'. Huata' tadya'a quio' lao Diuzi dan' bè'lo' ta udao yaca ben' raca bayëchi' quie, ba'ala'cazi bide dumi ta quizoyaquè'n ni ta yeyueyaquè' laohue quio'.

*Ga unë Jesús tu di'idza' quie ben' rëzi ben' gao yaca*

<sup>15</sup> Biži bè' be tu ben' re' lao mesa cabè' una Jesús, na'ra unè':

—Lega gaca huen quie ben' gao yela' huao ga zu Diuzi rnabè'nè'.

<sup>16</sup> Na'ra una Jesús rëbinè' lëbè':

—Uzu tu be'mbyu dza na', bè'nè' laze ta gao yaca ben' zè, ben' guëzinè'.

<sup>17</sup> Bè' beyudyi bapcuezè' ta gao yaca benè' guëzinè', na' use'ela'nè' criado quienè' unè' rëbinè' lëbè': “Uyo, yexi' yaca ben' guida gao yaca. Banaca laze ta gaoyaquè'.”

18 Bizi yaca ben' rëzinë' ta gao, unabayaquë' ta yezi'zenë' quieyaquë'. Na'ra ben' nëro unë' gudiyinë' criado quie ben' na': "Zabeyudyi hua'a tu layu. Len re'enda' tzena'a. Ta nacan' nia' luë' yëbo'në' yezi'zenë' quia'."

19 Na' unë' ben' urupe rëbinë' ben' zio tzexi' lëbë': "Baozia' ga'yo' pare bëdyihuaga. Lëba' tza'liä' hua'ba' prueba. Lena' nia' bisaque' sa'a, yezi'zenë' quia'."

20 Na' una ben' uyune rëbinë' ben' zio tzexi' lëbë': "Zabeyudyi ptzagana'a. Yela' na' bisaque' sa'a."

21 Bizi bë' bedyin criado, na' udixogue'në' xa'nnë' cabë' gudiyi yaca benë' lëbë'. Na'ra bdza'tzegue xa'nnë' unë' rëbinë' criado quie: "Uyo yena' la'o yedyi, yexi' yaca ben' yëchi', len yaca ben' ca guicho ca lao, len yaca ben' zi, len yaca ben' laochula."

22 Na'ra bedyin criado quie ben' na' unë' rëbinë' lëbë': "Señor, babia' ca mandado bao'. Pero nerunnan lato guidara benë'."

23 Na'ra una xa'nnë' tatula rëbinë' lëbë': "Uyo yena' la'o yedyi du tu neza. Bë bala iquie'lo'yaquë' cuenda yedza' yaca benë' lu'u yu'u quia'."

24 Yela' na' rnä', ni tu yaca ben' baguza' tanëro, ben' bibida gao quia', bira de lato gaoyaquë' ta pceua'."

### *Ruen zi inaoro xneza Cristo*

25 Ben' zë gula zenaoyaquë' Jesús. Na'ra unë' rëbinë' leyaquë':

26 —Chi nu ben' re'en inao në'ëdi', ruen zi idyë'ëranë' në'ëdi' cala ca xuzë', ca znë'ë, ca žgulanë', ca zi'inë', ca bi' bichinë', ca bi' zannë', cala ca yela' neban quienë'. Chi binedyë'ëranë' në'ëdi' cala ca familia quienë', ca yela' neban quienë', bisaque' gacanë' ben' quia'.

27 Nu ben' rdzebi inao xneza' nun quie ruen zudyi guti benë' lëbë', bisaque' gacanë' ben' quia'.

28 Chi le'e re'enle huele tu yu'u ¿cala reya'ala' huele pensari usaque'le chi huaque dumi quiele ta useyudyile yu'u?

29 Chi tu ben' uzulaohue rcua'në' lu'u yu barbëchinë' xni'a besu, na' bizi chi biguque dumi quienë' ta useyudyinë' yu'u, na' yaca ben' ilë'ë, utituyaquë' uzidyiaquë' lëbë'.

30 Na' inayaquë' quienë': "Ben' niga aozulaonë' ruenë' yu'u quienë', na' biguque dumi quienë' ta useyudyinë'n."

31 Chi zu tu rey, na' zu itu rey re'ennë' tilalënë' lëbë'. Na' napë' chi mila soldado. Na' bizi itu rey napë' galo mila soldado quienë'. Caora cati baza' tilarëyaquë', ¿cala reya'ala' huenë' pensari chi huaque chi mila soldado quienë' ta tilalënë' ben' napa galo mila soldado?

32 Chi bapsaquenë' bisuenë' tilalënë' itu rey, na'ra tu nezu itu rey zitu', reya'ala' ise'ela'në' tu ben' tzio lao lazë' ta tzeguedyinë' itu rey ta yega'ntza'oyaquë' bitilayaquë'.

33 Lena' unia' le'e ta inezile nuti'tezile re'enle inaole në'ëdi', chi bisule puesto ta usanle yugulu ta de quiele inaole në'ëdi', bisaque' gacale ben' quia'.

### *Ga ru'en di'idza' quie zedi' bira nacan sna'a* (Mt. 5.13; Mr. 9.50)

Na' una Jesús:

34 —De ga hue zedi'dyin chi nacan sna'a. Pero chi bira nacan sna'a, ¿ca bizi huero ta iyacan sna'a?

35 Bibi dyin huena, ni para quie layu, ni para bena. Nacan ta chu'unro. Nule babe, ulezë'naga cabë' baonia'.

## 15

*Unë Jesús tu ejemplo quie tu beco' zi'ila' bia uniti  
(Mt. 18.10-14)*

1 Bi'zi yaca ben' zë, ben' huequi'zu len yaca ben' nao neza mala, begu'udi'yaquë' zë lasa gan' zë Jesús ta uzë'nagayaquë' cabë' unë'.

2 Na' bi'zi yaca ben' partido fariseo, len yaca ben' rusëdi ley quie Moisés, rtzaloyaquë' can' rue Jesús, unayaquë' rëbiyaquë' laguedyiaquë'.

—Ben' niga rezi'në' yaca ben' nao neza mala, raolënë' leyaquë' tza'ze.

3 Na' tu di'idza' ni una Jesús rëbinë' leyaquë':

4 —Chi zu tu gayuhua beco' zi'ila' quiele, na' aoniti tuba', ¿cala uca'nle yaca bia biuniti ga nita'yacaba' dya'a? ¿Cala huayole tzedilole itu bia neniti hasta que yedzeleleba'?

5 Bë' yedzeleleba' ¿cala lega yedaohuele huezi'leba' yequië'leba' zan yu'u?

6 Na' bë' bedyinle zan yu'u quiele ¿cala guë'zile yaca ben' naca amigo quiele? ¿Cala yëbiyaquë': "Huero lani, dan' babedzeleda' beco' zi'ila' quia', bia uniti"?

7 Lena' rnia' le'e, cabë' guca quie xan' beco' zi'ila', cana' nacarë quie Diuzi. Yedaohueranë' quie tu ben' bëtza' pensari quie, ben' unao neza mala, na' inaonë' xneza Diuzi, cala ca yaca ben' zë, yaca ben' ziocazi nao xnezë'.

*Unë Jesús tu di'idza' quie tu dumi ta uniti*

Na' itu di'idza' ni una Jesús rëbinë' leyaquë':

8 —Lëzi rnia' le'e, chi zu tu nigula de chi dumi plata quië', na' bëxo tun, ¿cala uga'ala'në' lámpara quië', ulubanë' lu'u yu'u quienë' dyë'ëdi, yeguilonë'n hasta que yedzelenë'n?

9 Na' bi'zi bë' bedzelenë'n, lega bedaohuenë'. Na' guë'zinë'yaca amiga quienë' inë' yëbinë' leyaquë': "Huero tu lani, dan' babedzeleda' dumi quia' ta uniti."

10 Lëzi rnia' le'e, can' guca bedaohue nigula, cana' yedaohuerë yaca ángel quie Diuzi cati yetza' pensari quie tu ben' unao neza mala, na' inaonë' xneza Diuzi.

*Unë Jesús tu di'idza' quie tu ben' uzu chopa zi'inë' byu*

11 Lëscan' una Jesús rëbinë' leyaquë':

—Uzu tu be'mbyu uzu chopa zi'inë' byu.

12 Na' bi'zi zi'inë' byu, bi' nëchi'la, unabi' rëbibi' xuzibi': "Xuza', ¿bigunlo' në'ëdi' ta redu'uleda' si'a? Na'ra xuzibi' bë'në' laze, bë'në'bi' ta redu'ulebi' si'bi'.

13 Bi'zi guca tu chopa tzona dza, ptupa zi'inë' nëchi' ta de quiebi' bi'abi' yuguluten. Na' uza'bi' ziobi' yedyi re' zifu' ga beditobi' dumi quiebi' uyu'ubi' pensari mala ca bëbi'.

14 Pero bë' beditobi' yugulu ta de quiebi', na' bdyin dza guca tu ubin huala gula yedyi na'. Bira guta' ta gaobi', na' lega uduebi'.

15 Na'ra uza'bi' ziobi' tzetilobi' bi' dyin huebi' lao tu ben' zu lao yedyi gan' bdyimbi'. Na' bi'zi ben' na' use'ela'në'bi' ga de layu quienë' ta gapabi' cuchi quienë'.

16 Tanto uduebi' gu'umbi' gaobi' ca ta bë'yaquë' yaca cuchi ta gaoba'. Pero na' lëbi' nunu bë' ta gaobi'.

17 Na'ra gucabi' pensari: "¡Nacala ben' zë rueyaquë' dyin zan yu'u quie xuza', birdziogueyaquë' ta gaoyaquë'! ¡Na' niga në'ëdi' ruda'a huatia' yela' rdue quia'!

18 Yeza'cala' yeya'a žan yu'u quie xuza' ta yëpa'në': Xuza', uži'že quia'. Baoquixa' lao Diuzi. Baoquixa' laolo'.

19 Bira bizaca' inao' në'ëdi' naca' ži'ilo'. Bë në'ëdi' cuenda ca nu ben' rue dyin quio'."

20 Na'ra beza'bi' beyu'ubi' neza zeyobi' žan yu'u quie xuzibi'.

'Nezeza'bi' tu neza zitu' caora blë'ë xuzibi' bazeza'bi'. Na' beyëchi'la'adyi'në' lëbi' zionë' udëdyinë'bi' udaonë'bi' situ xagabi'.

21 Na' biži una bi'byu na' rëbibi' xuzibi': "Xuza', uži'že quia'. Baoquixa' lao Diuzi. Baoquixa' laolo'."

22 Na' biži una xuzibi' rëbinë' yaca bi' criado quië': "Uletzio cuiole tu cue' la'ari' dya'ara ta ugacolebi'. Lëzi uletzexi' tu anillo ta udze'le žbebi' len itu cue' guidi ta udze'le ni'abi'.

23 Lëzi uletzio tzexi'le tu bëdyihuaga, bia nacara nu'unu, bia gutiro gaoro ta huero lani.

24 Cana' huero como dan' ži'ina' niga anaca quiebi' ca quie tu ben' baguti beban. Aonitibi', pero na'abela'bi' bazulëbi' ra'o niga." Na' uzulaoyaquë' rueyaquë' lani.

25 Na' biži ži'inë' bi' huaca, nega'mbi' layela. Bë' beza'bi' layela bedyimbi' bago gan' tu yu'u, bebi' rgüedyi raca hueya'a.

26 Na'ra gužibi' tu criado quie xuzibi' unababi' lëbi' bi guca žan yu'u.

27 Na' una bi' criado rëbibi' lëbi': "Babela' bi' bicho'. Na' bë xuzo' mandado babëtiyaquë' tu bëdyihuaga nu'unu, dan'abela' bi' bicho' dya'a, bibi guca quiebi'."

28 Na' biži bi' bichibi' huaca, lega rdza'bi' bire'embi' yeyu'ubi' lu'u yu'u. Lena' bro xuzibi' unabanë' cule laobi' ta yeyu'ubi' lu'u yu'u.

29 Na'ra una bi' bichibi' huaca rëbibi' xuzibi': "Luë' nezo' dyë'ëdi gula azio zë iza zua' rua' dyin quio'. Bireguitzoga' di'idza' quio'. Ni tu lasa bibenlo' në'ëdi' ni tu chivo ta gütia' hua' lani gaolia' yaca bi' amigo quia'.

30 Na' ži'ilo' niga,abela'bi' tatula. Baoyobi' beditobi' dumi babë'lo'bi' conlë yaca nigula mala. Na' luë' babetio' bëdyihuaga nu'unu ta gaole huele lani."

31 Na'ra una xuzibi' rëbinë'bi': "Ži'ina', zucazo' ni len në'ëdi' yugu dza. Tana' lena' yugulu ta de quia' nacacazin quio'.

32 Pero nacacazin huen huero lani yedaohuero, dan'abela' bi' bicho'. Naca quiebi' ca quie ben' baguti beban. Aonitibi' bela'bi' bazulëbi' ra'o tatula." —Cana' una Jesús gudyinë' leyaquë'.

## 16

*Unë Jesús tu di'idza' quie tu ben' guca ladyinë'ë quie xa'ne, bëguë' tamala*

1 Lëzi cani una Jesús rëbinë' yaca ben' quienë':

—Uzu tu ben' uña'a zu tu ben' nu'enë' ladyina'anë' ta de quienë'. Na' biži una yaca benë' unayaquë' rëbiyaquë' lëbë': "Ben' nu'elo' ladyinë'ë ta de quio', lega rueditoguë' ta de quio'."

2 Na'ra ben' naca xa'nnë' gužinë' lëbë' yëbinë' lëbë': "Žiži bëlo' conlë ta de quia' de que na yaca benë' rueditolo' ta de quia'? Besio cuenda quie dyin babao', dan' bira re'enda' gaca ladyinao' ta de quia'."

3 Na' biži ben' naca ladyinë'ë ta de quie xa'ne, na' guquë' pensari: "Žca biži hua' chi yeguba xa'na' xchina'? Biraca' hua' dyin guixi'. Lëzi reduë'da' ta'a tu tu yu'u inaba' ta gaohua'."

4 Na'a banezda' ca hua' cuenda inita' ben' gacalë në'ëdi' cati babeguba xa'na' xchina'."

<sup>5</sup> Na'ra guzinè' tu huio yaca ben' reya'ala' quie xa'nnè'. Na'ra unabè' ben' nêro rëbinè' lëbè': "¿Gaca tu reya'alo' quie ben' xa'na'?"

<sup>6</sup> Na'ra bequëbinè' unè': "Reya'ala' tu gayuhua frasco aceite." Na' una ben' naca ladyinè'è rëbinè' lëbè': "Ni zia' guichi nexubo' lao xa'na'. Caga na'a ure' bè itu guichi de gatzò gayuhuazi."

<sup>7</sup> Bizi na' unè' rëbinè' ben' urupe: "Na' luè', ¿gacaži reya'alo' quie xa'na'?" Na'ra una ben' na': "Reya'ala' tu gayuhua bolsa bini trigo." Na'ra unè' rëbinè' lëbè': "Ni zia' guichi nexubo' lao xa'na'. Caga na'a bè itu guichi de tapa galozì."

<sup>8</sup> Na' bizi xan' ben' na', bezaquenè' ca bè ben' bènè' ladyinè'è, naquè' listo ta si'nè' benè' yè'.

Na' una Jesús rëbinè' yaca ben' quienè':

—Lëcana' nacan quie yaca ben' rda birnao xneza Diuzi, lega rze-bila'adyi'yaquè' nacayaquè' listo ta si'yaquè' benè' yè', cala ca yaca ben' rda rnao xneza Diuzi.

<sup>9</sup> ¿Cabiži re'enle inia' le'e quie ben' guca ladyinè'è? ¿Re'enle inia' le'e huele ca lëbè' si'le ben' yè' cuenda gata' dumi quiele hue'len yaca ben' re'enle gaca amigo quiele? ¿Re'enle inia' le'e cana' huele tacuenda gacalè amigo quiele le'e ta yezi' Diuzi le'e sulëlenè' tuzioli?

<sup>10</sup> 'Bigaca inia' le'e can', como dan' chi nu ben' rapa dyè'èdi tadao' lè'èti' nu'e xa'nnè' lëbè', lena' ulu'ena quienè' gaparè' dyè'èdi tazèra hue' xa'nnè' lëbè'.

<sup>11</sup> Lëzi chi le'e ziole rueditole con ganzi ta de quiele lao yedyi layu niga, ¿cómo na'a gue'enrèle gun Diuzi le'e ta de quienè' guibá?

<sup>12</sup> 'Chi le'e biziole gapale dyè'èdi ta de quie ben' tula, ¿bixquien' raquele gun Diuzi ta gata' quiecazile?

<sup>13</sup> Nu ben' rue dyin lao xa'ne, bisaque' uzunè' chopa xa'nnè'. Huata' zèdi quiè' quie lao rupa yaca ben' xa'nnè'. Tuè' huatzaxenè', na' ituè' bitzaxenè'. Tuè' biuzunè' di'idza' quiè', na' ituè' uzunè' di'idza' quiè'. Chi rza'la'adyi'le dumi, bisaque' huele dyin quie Diuzi. —Cana' una Jesús gudyinè' leyaquè'.

<sup>14</sup> Bizi yaca ben' naca partido fariseo, unita'yaquè' rzënegayaquè' can' una Jesús quie dumi. Dan' lega rexeyaquè' gata' dumi quieyaquè', tana' lena' uzulaoyaquè' rtituyaquè' lëbè'.

<sup>15</sup> Na'ra una Jesús rëbinè' leyaquè':

—Le'e, lega re'enle il'è'è yaca benè' le'e ben' huen. Pero nezi Diuzi ca naca pensari mala yu'u lu'u guicho laxta'ole. Rapa yaca benè' le'e bala'ana, pero Diuzi ratzanè' ca ruele.

### *Ga rnèn quie ley len quie yela' r nabè' quie Diuzi*

Na' una Jesús:

<sup>16</sup> —Hasta dza uzu Juan lao yedyi layu unabè' ley quie Moisés len di'idza' ca una yaca ben' profeta. Desde lëdza na' rguixogue' yaca benè' de que baza' dza inabè' Diuzi lao yedyi layu. Lëcana' baregu'udi' yaca ben' zè, yaca ben' re'en hue bala inabè' Diuzi leyaquè'.

<sup>17</sup> 'Pero ca naca quie lao ley, nacaran yalo yeyudyi yedu quie guibá len yedyi layu, cala ca biuzun di'idza' ca rnan lè'è guichi ga yu'u ley quie Diuzi.

### *Unè Jesús quie ben' r san laguedyi*

(Mt. 19.1-12; Mr. 10.1-12)

Na' una Jesús:

<sup>18</sup> —Chi tu be'mbyu bapsannè' nigula zulënè', na' bezi'nè' nigula tula, aoquixinè' nacan xquia quienè' lao Diuzi. Na' lëzi, chi tu be'mbyu bezi'nè' nigula psan xquiuhue, aoquixinè' nacan xquia quienè' lao Diuzi.

*Ga una Jesús quie tu ben' uña'a len tu ben' yēchi' lao Lázaro*

Na' una Jesús:

<sup>19</sup> —Lēscan' inia' le'e, uzu tu ben' uña'a guconē' la'ari' dya'a, la'ari' baquitu. Na' biži ruenē' lani yugu dza, udaonē' tadya'a gula.

<sup>20</sup> Lēscan' uzu tu ben' yēchi' gula laonē' Lázaro. Lega dyianē' yedzo' zidzo. Na' rbe'nē' layu ru'a yu'u quie ben' uña'a yugu dza.

<sup>21</sup> Biži ben' yēchi' rbezē' rnē'ē chi hue' ben' uña'a lē'ēti' ta began' udaohuē'. Na' yaca beco' ubiga'yacaba' rlē'ēyacaba' yedzo' dyianē'.

<sup>22</sup> Biži bdyin dza guti Lázaro. Na'ra bequiē' yaca ángel lēbē' ta sunē' guibá gan' zu Abraham. Na' lēzi ben' uña'a gutinē' pcachi'yaquē' lēbē' lu'u yu.

<sup>23</sup> Na'ra uyu'unē' lu'u gui' gabila ga redzagalaohuē'. Cati bechisa laonē' rnē'ē zitu' ga zu Abraham len Lázaro.

<sup>24</sup> Na'ra uredyiyā'nē' zidzo unē': "Xuza' Abraham, beyēchi'la'adyi' nē'ēdi', use'ela' Lázaro ula'onē' zbenē' nisa ta guidē' dedze'nē'n lu'u ru'a yeya'ala' lē'ēti' gan' yu'a niga, porque lega tahuala redzagalaohua' gan' yu'a lagui' niga."

<sup>25</sup> Na'ra una Abraham gudyinē' lēbē': "Zi'ina', beza'la'adyi' guca dya'a gula quio' dza uzulo' lao yedyi' layu. Na' biži Lázaro niga, biguca dya'a quienē'. Lena' rezila'adyi'nē' zunē' niga len nē'ēdi'. Na' luē' redzagalaolo' gan' yu'ulo'.

<sup>26</sup> Lēzi zu tu barranca ga nita'ndo' niga. Na' bisaque' guidando' ga zulo'. Lēzi luē' bisaque' guido' niga."

<sup>27</sup> Na'ra unē ben' uña'a rēbinē' Abraham: "Rnabayēcha' laolo', xuza' Abraham, ta ise'elo' Lázaro žan yu'u quie xuza'

<sup>28</sup> gan' nita' ga'yo' bi' bicha' ta yēbinē' leyacabi' can' raca quia' niga tacuenda biguidayacabi' gan' yu'a niga redzagalohua'."

<sup>29</sup> Na'ra una Abraham rēbinē' lēbē': "Decazi guichi' ga yu'u xti'idza' Diuzi ta pca'nnē' lao na'a Moisés len yaca los demás ben' uidxogue' xti'idzē'. Lena' reya'ala' hueyaquē' bala ulabayaquē'n."

<sup>30</sup> Na'ra unē ben' na' rēbinē' Abraham: "Nacan tali ca nao', xuza' Abraham, pero chi tzio tu ben' baguti beban tzetixogue'nē' leyacabi', cana' yetza'yacabi' pensari quieyacabi'."

<sup>31</sup> Na'ra una Abraham rēbinē' lēbē': "Chi bihueyacabi' bala cabē' di'idza' yu'u lē'ē guichi' la'iya quie Diuzi ta pca'nnē' lao na'a Moisés, len yaca los demás ben' uidxogue' xti'idzē', nica yetza'yacabi' pensari quieyacabi' ba'ala'cazi tzio tu ben' baguti beban tzetixogue'nē' leyacabi'."

## 17

*Ruen zudyi gula quie ben' udze'yela laguedyi*

*(Mt. 18.6-7, 21-22; Mr. 9.42)*

<sup>1</sup> Na' una Jesús rēbinē' yaca ben' quiē':

—Birdziogue nu ben' udze'yela laguedyi ta inēn leyaquē' hueyaquē' tamala. Pero hue Diuzi tu castigo huala gula quie ben' udze'yela laguedyi.

<sup>2</sup> Quie nu ben' rudze'yela xcuidi', huacaran huen quienē' chi uquiyoaquē' tu yo že luba'nē', na' uzalayaquē' lēbē' lu'u yao že gatinē' lu'u nisa, cala ca castigo hue Diuzi lēbē'.

<sup>3</sup> Ulegapa cuidado cabē' ruele.

Uletila bi' bichile chan' uquixibi' bēbi' condre le'e. Na' chi betza'bi' pensari quiebi', ulezi'ze quiebi'.

<sup>4</sup> Ba'ala'cazi baoquixibi' babēbi' condre le'e gadyi lasa lao tu dza, ba'ala'cazi gadyi lasa bidabi' unabi' le'e: "Uzi'ze quia', bira hua' cana", ulezi'ze quiebi'.



*Ruen yaca ben' quie Jesús zi sudyi'ilëyaquë' Diuzi dyë'ëdi*

5 Na' una yaca ben' quie Jesús rëbiyaquë' lëbë':

—Gacalao' nëto' ta sudyi'ilëndo' Diuzi dyë'ëdi.

6 Na' una Jesús rëbinë' leyaquë':

—Chi tali sudyi'ilële Diuzi, la'acazi lë'ëti'zi, huazaque' yëbile tu yaga: “Uza', uyo yetzu'u lu'u yao ze”, na' yaga hualen quiele cabë' yëbilen.

*Ga ru'en di'idza' ca reya'ala' hue ben' nao xneza Diuzi*

Na' una Jesús:

7 —Chi zu tu ben' rue dyin zan yu'u quiele ¿cala tanëro reya'ala' usiña'në' ta gaole, te na' huazaque' gaorënë', ba'ala'cazi babënë' dyin bedu dza?

8 ¿Cala tali na' yëbilyaquë': “Psiña' ta gaohua', te aodaohua' bahua'a, natera huazaque' gaolo' yo'olo'”?

9 ¿Cala tali na' biyëbile ben' rue dyin zan yu'u quiele: “Diuxcalele babële ca ta re'enda' huele”, como dan' ca ta reya'ala' huecaziyaquë' bëyaquë'?

10 Lëscan' cana' nacarën quie le'e. Caora babeyudyi babële yugulu ca una Diuzi le'e, na'tera reya'ala' yëbile Diuzi: “Nacando' ben' bibi zaca'te inao' nëto' diuxcalele, como dan' ca ta reya'ala'cazi huendo' bëndo'.” —Cana' una Jesús gudyinë' leyaquë'.

11 Na' uza' Jesús uyu'unë' neza ta zionë' ciudad Jerusalén udenë' lao beza' estado Galilea ga sulao estado Samaria.

12 Bë' bdyinnë' gan' de tu yedyi, lëgan' na' bro chi ben' yu'u yela' hue' ca mal de pindo. Bega'nyaquë' zitu' con gan' zë Jesús.

13 Na' urediyi'yaquë' zidzo rëbiyaquë' lëbë':

—Jesús, Maestro, yeyëchi'la'adyo' nëto' ca nacando'!

14 Cati blë'ë Jesús leyaquë' cabë' nacayaquë', unë' rëbinë' leyaquë':

—Uletzio uletzelu'e cuinle lao pxuzi.

Caora na' uza'yaquë' zioyaquë'. Biži tu neza gan' zioyaquë' beži yela' hue' yu'uayaquë'.

15 Na'ra bë' blë'ë tunë' babezinë' ca naca yela' hue' yu'unë', na' bebi'në' zeyonë' gan' zë Jesús unënë' zidzo ruenë' Diuzi ben' ze.

16 Na' ure'në' uditzu žibinë' lao Jesús, bda'te laohue layu ta rëbinë' Jesús: “Diuxcalelo'.” Lëben' na' naquë' ben' estado Samaria.

17 Na'ra una Jesús rëbinë' lëbë':

—¿Cala chi le'e beyaca? ¿Ganaži iga yaca ben' beyacarë'?

18 Lëben' niga, ben' binaca ben' Israel, ¿tuzi lëbë' bebi'në' zeza'në' niga ta ruenë' Diuzi ben' ze?

19 Na'ra una Jesús rëbinë' lëbë':

—Bezuli, beyo. Dan' rzudyi'ilëlo' Diuzi, lena' babeži yela' hue' yu'ulo'.

*Udixogue' Jesús ca gaca bë' yeguidë' tatula lao yedyi layu*

(Mt. 24.23-28, 36-41)

20 Na' bdyin tu dza una yaca ben' partido fariseo rëbiyaquë' Jesús:

—¿Bata sulao inabë' Diuzi lao yedyi layu?

Na' una Jesús rëbinë' leyaquë':

—Bide bi ilë'ële cati sulao inabë' Diuzi lao yedyi layu.

21 Bisaque' yëbile benë': “Barnabë' Diuzi yedyi ni' o “Barnabë' Diuzi yedyi na'” como dan' pensari yu'u lu'u guicho laxta'ole, lena' inabë' Diuzi.

22 Na' bezu dza tula una Jesús rëbinë' yaca ben' ituenë':

—Huadyin dza cati gue'enle sulia' le'e siquiera fiu dzaži, pero bisaque'.

23 Lëdza na' ina yaca benë' le'e: “Bazunë' ni' o “Bazunë' na'” na' bigalele quieyaquë'. Bitzirole inaole leyaquë' ga zioyaquë'.

24 Cabè' rlè'èle quie bdyito hueziu' ratzo rtinan žan guibá, cana' ilè'èle nè'èdi', bichi yugulu benè', cati idyin dza yeguida' lao yedyi layu.

25 Pero ca naca na'a, ruen zi yedzagalaotzaguia' usebi' yaca ben' nita' na'a nè'èdi'.

26 Cabè' bē yaca ben' unita' lao yedyi layu tiempote caora uzu Noé, cana' huerē yaca ben' inita' lao yedyi layu caora yeguida' tatula nè'èdi', bichi yugulu benè'.

27 Ri'o raoyaquē', rtzagana'yaquē', rtzagana'rē ži'iyaquē' hasta bdyin dza uyu'u Noé len familia quienē' lu'u barco quienē'. Lēcana' ben yusiu' huala gula, guca juicio quie nisa, guti lao yuguluteyaquē'.

28 Lēzi cana' bēre yaca ben' unita' lao yedyi layu tiempote caora uzu Lot. Ri'o raoyaquē', ra'o ruti'yaquē', razara'nyaquē' rueyaquē' yu'u quieyaquē'.

29 Pero cati bro Lot ciudad Sodoma, lēcana' bžexo Diuzi juicio gui', uyēzin žan guibá, bētin yuguluteyaquē'.

30 Lēzi cana' gacarē quie yaca benē' inita' dza bē' yeguida' lao yedyi layu nè'èdi', bichi yugulu benè'.

31 'Lēdza bē' yeguida' tatula, chi inita' yaca benē' lali'a, bireya'ala' yeyu'uyaquē' lu'u yu'u quieyaquē' ta cuioyaquē' ta de quieyaquē' nun quie dan' ruen baguinzi ižunoyaquē'. Lēscan' chí ziorēyaquē' layela, bireya'ala' yeyoyaquē' žan yu'u quieyaquē' nun quie dan' ruen baguinzi ižunoyaquē'.

32 Bigalala'adyi'le cabē' guca quie žgula Lot.

33 Nu ben' rdzebi gati, yela' na' binaoyaquē' nè'èdi', bigata' yela' neban quieyaquē' tuzioli. Pero nu yaca ben' birdzebi gati, yaca ben' nao nè'èdi', huata' yela' neban quieyaquē' tuzioli.

34 'Cani rnia' le'e, lēyela cati yeguida' tatula, useria' yaca ben' nao nè'èdi', na' iquiē' yaca ángel leyaquē'. Por ejemplo, chi rasi chopa benē' tzaže lao belaga, iquiē' yaca ángel tunē', na' yega'n itunē'.

35 Chi zu chopa nigula rutuyaquē' tzaže lao guichi, iquiē' yaca ángel tunē', na' yega'n itunē'.

36 Chi zu chopa be'mbyu rueyaquē' dyin tzaže layela, iquiē' yaca ángel tunē', na' yega'n itunē'.

37 Bē' beyaquē' can' unē', na'ra unayaquē' rēbiyaquē' lēbē':

—¿Gaži gaca can' baonao', Señor?

Na'ra bequēbinē' rēbinē' leyaquē':

—Caora rlè'èle rēcho yaca bēchi ladza, cana' inezile de ta zigo raoyacaba'. Lēcana' gaca inezile gan' gaca can' baonia'.

## 18

### *Una Jesús tu di'idza' quie tu nigula bagui xquiuhue len tu juez mala*

1 Una Jesús tu di'idza' ni psēdinē' yaca ben' quienē' ca ta reya'ala' hue'lēyaquē' Diuzi di'idza' yugu dza. Bireya'ala' yeyatiyaquē', bireya'ala' usanla'adyi'yaquē' ulidzayaquē' Diuzi.

2 Na'ra unē' rēbinē' leyaquē':

—Biži de tu yedyi ga uzu tu juez birapala'nnē' Diuzi, nica rapala'nnē' benē'.

3 Lēlao yedyi na', lēzi uzurē tu nigula, ben' baguti xquiuhue. Riotezi rionē' lao juez ta rnbē' huenē' justicia quiē' len quie ben' raca dilalēnē'.

4 Baguca zē lasa bigu'un juez huenē' justicia quie nigula. Biži na'ra guca juez pensari unē': "Ba'ala'cazi nunu rdzeba', nica Diuzi, nica yaca benē'.

<sup>5</sup> por nun quie dan' nigula niga rdazi rdè' ruenè' nē'èdi' zèdi, tana' lena' huacalia'nè' hua' justicià quiè' cuenda bira guidè' hueranè' nē'èdi' zèdi. Bardanè'èda' rdazi rdanè' ruenè' nē'èdi' zèdi."

<sup>6</sup> Na' una Jesús rēbinè' leyaquè':

—Cana'la bè juez mala pensari ca unè'.

<sup>7</sup> Na' nia' le'e, ¿bizi raquele ca hue Diuzi? ¿Raquele bigacalè Diuzi yaca ben' quienè', ben' rulidza lèbè' yugu dza yugu yela? ¿Raquele huadzè Diuzi bigacalènè' yaca ben' quienè'?

<sup>8</sup> Rnia' le'e, bitzè Diuzi. Labezi gacalènè' yaca ben' quiè'. Pero cati yeguida' nē'èdi', bichi yugulu benè', ¿huadzeleda' ben' rzudyi'ilè Diuzi, lao yedyi layu?

*Una Jesús tu di'idza' quie tu ben' partido fariseo len tu ben' huequižu*

<sup>9</sup> Lèzi itu di'idza' ni una Jesús quie yaca ben' rlè'è cuine ben' dya'a, na' rlè'èyaquè' laguedyiaquè' ben' mala. Na' una Jesús:

<sup>10</sup> —Uyo chopa benè' lu'u idao' r nabè'ra ta ulidzayaquè' Diuzi. Tunè' naquè' ben' partido fariseo. Na' itunè' naquè' ben' huequižu pquizunè' benè' mazara ca ta redu'ulanè' si'nè'.

<sup>11</sup> Bizi zutezi ben' partido fariseo rulidzanè' Diuzi unè' cani: "Xuza' Diuzi, nia' diuxcalelo' como dan' binaca' ca ben' uban, binaca' ca ben' mala, binaca' ca ben' rutilè nigula quie ben' tula. Binaca' ca ben' huequižu niga.

<sup>12</sup> Nē'èdi' rua' ubasi chopa lasa lao tu xman. Na' runa' tu cue' lao chi cue' ca tu ta rua' gan." Cana' unè' gudyinè' Diuzi.

<sup>13</sup> Na' bizi ben' huequižu, bega'nnè' zè' zitu'la gan' zè ben' fariseo. Nica reyažonè' yechisa laonè' ladza. Na' uzulaonè' rcudyinè' ru'achu'unnè' unè' rēbinè' Diuzi: "Xuza' Diuzi, beyèchi'la'adyi' nē'èdi' como dan' de dula' xquia quia'."

<sup>14</sup> Na'ra inia' le'e, bezi'ze Diuzi dula' xquia de quie ben' huequižu, zeyoguè' žan yu'u quienè'. Bizi quie ben' partido fariseo nenaocazi dula' xquia quiè' lèbè'. Rnia' le'e, nu ben' rue žè cuine, huadyin dza hue Diuzi lèbè' ben' yube'ezi. Na' bizi nu ben' rue yube'ezi cuine, huadyin dza hue Diuzi lèbè' ben' žè.

*Bèla'ya Jesús yaca xcuidi'*

*(Mt. 19.13-15; Mr. 10.13-16)*

<sup>15</sup> Na' guca dza bdyin yaca benè' gan' zè Jesús, nequiè'yaquè' xcuidi' quieyaquè' ta uquichinè' na'anè' ta huela'iyane' leycabi'. Na' bizi cati blè'è yaca ben' quie Jesús nequiè'yaquè' xcuidi' quieyaquè', na' udilayaquè' leyaquè'.

<sup>16</sup> Na'ra guzi Jesús yaca ben' quienè' rēbinè' leyaquè':

—Biudzunle yaca xcuidi'. Guidagarayacabi' ni como dan' ca naca quieyacabi', rue quieyacabi' quie xuziyacabi', lēcana' nacarèn quie ben' zio rue quie xti'idza' Diuzi.

<sup>17</sup> Tali ca rnia' le'e, chi nu yaca ben' birue quieyaquè' xti'idza' Diuzi ca rue xcuidi' quie xuzibi', bisaque' yeyoyaquè' guibá gan' zu Diuzi.

*Tu ben' uña'a bè'lènè' Jesús di'idza'*

*(Mt. 19.16-30; Mr. 10.17-31)*

<sup>18</sup> Bizi bdyin tu ben' r nabè' gan' zè Jesús, na' unè' rēbinè' lèbè':

—Maestro, ben' huen naco'. Nainao', ¿ca bizi reya'ala' hua' ta gata' yela' neban quia' tuzioli?

<sup>19</sup> Na' una Jesús rēbinè' lèbè':

—¿Bixquien' nao' naca' ben' huen? Tahuencazi nao' cana', como tuzi Diuzi naquè' ben' huen.

<sup>20</sup> Luè' banezilo' ca rna lè'è guichi la'iya quie Diuzi: "Biutilo' nigula quie ben' tula. Bigutio' benè'. Bicianlo' quie benè'. Bisiu' benè' yè'. Lèzi udapala'n xuzo' len žnao'."

<sup>21</sup> Na'ra unè ben' na' rëbinè' Jesús:

—Yugulu ca rnao', ruequiecaza' len za'caza' naohua'n desde nacatia' xcuidi'.

<sup>22</sup> Bè' be Jesús can' unè', na'ra unè' rëbinè' lèbè':

—De tu ta nerdzioguelo' huelo'. Bèti' yugulu ta de quio', na' bè'n yaca ben' yèchi'. Cana' gunra Diuzi taže quio' bè' yedyinlo' gan' zunè' guibá. Na' uda unao nè'èdi' gaco' ben' quia'.

<sup>23</sup> Na' bizi bè' be ben' na' ca una Jesús, na' bega'nnè' guquenè' beyèchi' gula, como dan' naquè' ben' uña'a huala gula.

<sup>24</sup> Caora blè'è Jesús guqueyèchi'nè', na'ra unè' rëbinè' yaca benè':

—Zèdi gula nacan quie yaca ben' uña'a ta yeyoyaquè' guibá gan' zu Diuzi.

<sup>25</sup> Nacaran yalo te tu camello naga yèchi', cala ca ta yeyu'u ben' uña'a guibá gan' zu Diuzi.

<sup>26</sup> Na' yaca ben' be can' unè', unayaquè' rëbियाquè' lèbè':

—Chi nacan zèdi gula yeyu'u yaca ben' uña'a guibá gan' zu Diuzi, ¿ca nuži saque' yeyu'u?

<sup>27</sup> Na'ra una Jesús rëbinè' leyaquè':

—Tu ta bisaque' hue yaca benè', Diuzi sí, huazaque'nè' huenè'n.

<sup>28</sup> Na' bizi unè Pedro rëbinè' Jesús:

—Señor, nêto' bapca'nndo' yugulu ta de quiendo' cuenda za'ndo' inaondo' luè'.

<sup>29</sup> Na'ra una Jesús rëbinè' lèbè':

—Nacan tali can' rnia' le'e. Con nuti'tezi ben' pca'n nu yu'u, nu xuzi, nu žnè'è, nu bichi, nu žgule, nu ži'ine tanun quie dan' bazionè' naonè' xneza Diuzi,

<sup>30</sup> hueyu'era Diuzi tažera quienè' dza rdanè' lao yedyi layu cala ca tu ta pca'nnè'. Na' bè' yedyinnè' guibá gan' zu Diuzi, hue'nè' lèbè' yela' neban tuzioli.

*Una Jesús tatula cabè' gaca quiè' gatinè'*

*(Mt. 20.17-19; Mr. 10.32-34)*

<sup>31</sup> Na' guži Jesús lao chipchopa ben' quienè' ubiga'yaquè' tzala'la unè' rëbinè' leyaquè':

—Uletza' tziuro ciudad Jerusalén ga uzu di'idza' ca di'idza' bzu yaca ben' quie Diuzi lè'è guichi dza na'te. Lè'è lèguichi na' rguixogue'n cabè' usaca' yaca benè' nè'èdi', bichi yugulu benè'.

<sup>32</sup> Na' yaca ben' yedyi quia' usedyinyaquè' nè'èdi' lao na'a ben' tula ta utituyaquè' utasi unioyaquè' nè'èdi', uda'yaquè' zen' laohua'.

<sup>33</sup> Lèzi huaguiyaquè' guti'yaquè' nè'èdi'. Bizi bè' gaca lao tzona dza, huebana' yeroga' gan' ucachi'yaquè' nè'èdi'.

<sup>34</sup> Pero yaca ben' quie Jesús biuyoñe'eyaquè' cabè' gudyi Jesús leyaquè'. Binacan quieyaquè' fa tziõe'eyaquè' can' unè'.

*Beyue Jesús tu ben' laochula, ben'yedyi Jericó*

*(Mt. 20.29-34; Mr. 10.46-52)*

<sup>35</sup> Bagazi idyinyaquè' yedyi Jericó, na' re' tu ben' laochula tu neza gan' zioyaquè' rnabè' caridad.

<sup>36</sup> Bizi bè' be ben' laochula rde yaca ben' zè gula, caora na' unabanè' yaca ben' bin' guca dan' rdezi rdeyaquè'.

<sup>37</sup> Na'ra unayaquè' rëbियाquè' lèbè':

—Huade Jesús, ben' yedyi Nazaret, gan' re'lo' niga.

<sup>38</sup> Quie lena' uné' zidzo:

—¡Jesús, Zi'i suba rey David, beyëchi'la'adyi' nē'ëdi'!

<sup>39</sup> Biži yaca ben' dyialao laohuë', rdilayaquë' lëbë' ta bira inënë', pero unërë' zidzora uné':

—Zi'i suba rey David, beyëchi'la'adyi' nē'ëdi'.

<sup>40</sup> Biži uleza Jesús, bënë' mandado yexi'yaquë' ben' laochula. Caora bdyinnë' ga'ala' gan' zë Jesús, na'ra unaba Jesús lëbë':

<sup>41</sup> —¿Ca biži re'enlo' hua' quio'?

Na' bequëbi ben' laochula nē':

—Señor, re'enda' yelë'ëda'.

<sup>42</sup> Na'ra una Jesús rëbinë' lëbë':

—Babeyaco', barelë'ëlo' na'a nun quie rzudyi'ilëlo' Diuzi.

<sup>43</sup> Ca tu beyudyizi uné' cana', labelë'ëte ben' laochula, uži'në' zionë' naonë' Jesús ruenë' Diuzi ben' ze. Lëzi yaca ben' blë'ë can' bënë' quie ben' laochula, bëyaquë' Diuzi ben' ze.

## 19

### *Uyo Jesús lidyí Zaqueo*

<sup>1</sup> Na'ra bē' bdyin Jesús yedyi Jericó udenë' lao yedyi na'.

<sup>2</sup> Lëlao yedyi na' uzu tu ben' uña'a laonë' Zaqueo. Nacanë' xan' ben' huequizu.

<sup>3</sup> LëZaqueo re'ennë' ilë'ënë' Jesús cuenda huebë'në' lëbë'. Pero birzaque'në' ilë'ënë' lëbë', dan' lega bgu'udi' yaca ben' zë gula. Na' lëbë' naquë' ben' chaco, binaquë' ben' huego'.

<sup>4</sup> Na'ra zionë' taria udyialaonë' bdyinnë' gan' zu tu yaga laona sicómoro cuëta neza gan' zio Jesús. Biži na' urënë' lao yaga ta ilë'ënë' Jesús dyë'ëdi.

<sup>5</sup> Biži cati bdyin Jesús gan', bechisa laonë' rna'në' lao yaga gan' dyia Zaqueo. Na' uné' rëbinë' lëbë':

—Zaqueo, labe beyëzi gan' dyialo' como dan' žan yu'u quio' idyina' na'.

<sup>6</sup> Biži Zaqueo labezi beyëzinë' gan' dyianë' lao yaga. Bedaohuenë' bequë'në' Jesús žan yu'u quienë'.

<sup>7</sup> Bë' blë'ë yaca benë' bazio Jesús žan yu'u quie Zaqueo, na'ra uzuloyaquë' rtzaloyaquë' rëbiyaquë' laguedyiyaquë' unayaquë' bazio Jesús yedyinnë' žan yu'u quie tu ben' huezi' yë', ben' mala gula.

<sup>8</sup> Na'ra bare'yaquë' lu'u lidyí Zaqueo, uzulinë' uné' rëbinë' Jesús:

—Señor, hua' yaca ben' yëchi' gatzo ta de quia'. Chi baozia' benë' yë' ulana' quieyaquë', na' yeyu'ayaquë' lao tapa cue' ta aozia' quieyaquë'.

<sup>9</sup> Na'ra una Jesús rëbinë' Zaqueo:

—Lena' rulü'en tali abetza'lo' pensari quio', na' barue quio' xti'idza' Diuzi. Banaco' dugalo ži'i suba Abraham.

<sup>10</sup> Nē'ëdi', bichi yugulu benë', bida' lao yedyi layu ta ute usela' ben' ruen žudyi quie yeyoyaquë' lao gui' gabila.

### *Una Jesús tu di'idza' quie ben' bē' ben' gaca ladyinë'ë dumi*

<sup>11</sup> Tu nerzënaga yaca benë' ca rna Jesús, unë' itu di'idza' dan' barega'n ga'ala' ga re' ciudad Jerusalén, lëscan' dan' guqueyaquë' ilë'ëti'zi rdziogue ta idyin dza inabë' Diuzi lao yedyi layu.

<sup>12</sup> Na'ra uné' rëbinë' leyaquë':

—Uzu tu ben' bala'ana. Na' uzë'ë zionë' yedyi re' zitu' ta cuioyaquë' lëbë' gaquë' rey yedyinnë' tatula ta inabë'në' lao yedyi quienë'.

13 Pero tu zaironë' sa'në', na' guzinë' lao chi yaca ben' hue'në' ladyinë'ë. Na' bë'në' quie quieyaquë' tu dumi že. Tana' unë' gudyinë' leyaquë': "Ulehue negocio conlë dumi babëna' le'e. Na' bë' yeguida' huero cuenda."

14 Na' bizi yaca ben' lao yedyi quienë', lega rudieyaquë' lëbë'. Caora na' use'ela'yaquë' yaca benë' zio zenaoyaquë' lëbë' ta yëbiyaquë' ben' re' yedyi gan' zioyaquë': "Birexendo' ben' ni ta gaquë' rey quiendo'."

15 Pero gucacazinë' rey quieyaquë'. Ude na' bedyinnë' lao yedyi quienë'. Cati bedyinnë', na' guzinë' yaca ben' nu'enë' ladyinë'ë dumi quienë' ta inezinë' gaca tu ta bëlëyaquë' gan dumi quienë'.

16 Na'ra unë ben' nëro rëbinë' lëbë': "Señor, dumi benlo' në'ëdi', babëlia'n gan ichi cue' mazara ca tu ta benlo' në'ëdi'."

17 Na'ra una rey na' rëbinë' lëbë': "Tahuen gula babao'. Na' nun quie bzulo' di'idza' bao' huen conlë lë'ëti'zi pca'na' lao na'alo', na'ra gaco' ben' rnabë' quie lao chi yedyi."

18 Lëzi bdyin ben' urupe unë' rëbinë' rey na': "Señor, dumi quio' benlo' në'ëdi', babëlia'n gan iga'yo cue' mazara ca tu ta benlo' në'ëdi'."

19 Na'ra una rey na' rëbinë' lëbë': "Gaco' ben' rnabë' lao ga'yo' yedyi."

20 Bizi bdyin ben' uyune unë' rëbinë' rey na': "Señor, ni zeyu'a dumi benlo' në'ëdi'. Ptuba'n la'ari' bdze'tza'ohua'n."

21 Bibëlia' dumi quio' negocio, dan' rdzeba' chan' initin idza'lo' në'ëdi', dan' nezda' naco' ben' reguë'ë bire'enlo' initü ta de quio'. Nezda' ruelao' dumi quio' negocio ga gacan seguro hue guichon."

22 Na'ra una rey na' rëbinë' ben' na': "Ben' mala gula naco'. Con can' rnao' rulu'en quio' aoquixo' bibë quio' huelo' ca re'enda'. Chi nezo' naca' ben' reguë'ë, ben' rue negocio ga gacan seguro hue guichon,

23 ¿bixquien' biyelëcho' dumi quia' lao banco ta cuenda hue guichon yezi'a dumi quia' len guichon bë' yela' žan yu'u?"

24 Na'ra una rey na' gudyinë' yaca ben' nita' na': "Ulesi' dumi bi'a ben' na', na' ulehue'na ben' bi'a chi dumi."

25 Na' unayaquë' rëbiyaquë' rey na': "Pero Señor, badecazi chi dumi quienë'."

26 Na' una rey na' rëbinë' leyaquë': "Nu ben' rue quie ca ta pca'n xa'nnë' ladyinë'ë, lëlëbë' hue'ra xa'nnë' lëbë' mazara. Pero nu ben' birue quie ca ta pca'n xa'nnë' ladyinë'ë, hueguba xa'nnë' ca ta bë'në' lëbë'.

27 Pero ca naca yaca ben' rudie në'ëdi', yaca ben' birexe gaca' rey quieyaquë', uletexi'yaquë' gutileyaquë' zaquë' laohua' ni."

### *Bdyin Jesús ciudad Jerusalén*

*(Mt. 21.1-11; Mr. 11.1-11; Jn. 12.12-19)*

28 Bë' beyudyi una Jesús cana', beyu'uyaquë' neza tatula uza'yaquë' zioyaquë' ciudad Jerusalén.

29 Cati baruen bago idyinyaquë' yedyi Betfagé len yedyi Betania, ga nacan ga'ala' gan' zu tu ya'a Olivos, lëgan' na' use'ela'në' chopa ben' quienë'.

30 Na' unë' gudyinë' leyaquë':

—Uletzio yedyi re' ni' ga'ala'. Bë' idyinlen gan', huatzaxacale tu burra nerioaba', bia nitu nunu necuia. Uxëdyileba' nadahua'aleba' niga.

31 Chi ilë'ë yaca benë' le'e inayaquë' le'e bixquien' rxëdyileba', na' reya'ala' yëbilyaquë' re'en Señor lëba' ta cuianë'ba'.

32 Na'ra uza' yaca ben' quie Jesús zioyaquë' gan' use'ela'në' leyaquë'. Na' laga guca quieyaquë' cabë' gudyi Jesús leyaquë' yexacayaquë' lëgan' nerio burra.

33 Na' caora barxëdyiyaquë' burra, cana' bdyincazi xan' burra, na' unë' rëbinë' leyaquë':

—¿Bixquien' rxëdyile burra quia'?

34 Na'ra unayaquë' rëbiyaquë' lëbë':

—Re'en Señor lëba' ta cuianë'ba'. Bë' idyinnë' gan' ziondo', nadesando'ba'.

35 Na' bequië'yaquë'ba' gan' zë Jesús, uxubayaquë' žabayaquë' xcu'udzu burra ta udyianë' lëba'.

36 Tu neyu'u Jesús neza zionë' ciudad Jerusalén, ulëchoyaquë' žabayaquë' uduxuyaquë'n tu neza gan' tenë'.

37 Caora bdyinyaquë' gan' zu leto quie ya'a Olivos, cana' uzulao yaca ben' zio nao Jesús unëyaquë' zidzo. Lega redaohueyaquë' bëyaquë' Diuzi ben' že ca naca yela' huaca bënë' blë'ëyaquë'.

38 Lena' unayaquë' zidzo:

—Ben' naca la'ya ben' niga. Naquë' rey quiero. Diuzi use'ela'në' lëbë'. Redaohue yaca ben' nita' guibá ca ruenë'. Naca Diuzi ben' že gula. —Cana' unayaquë'.

39 Na' bizi nita' bala yaca ben' partido fariseo lado yaca ben' zio nao Jesús. Na' unayaquë' rëbiyaquë' lëbë':

—Maestro, reya'ala' tilo' yaca ben' za' nao luë' niga ta bira inayaquë' can' nayaquë'.

40 Na' bequëbi Jesús rëbinë' leyaquë':

—Rnia' le'e, chi yega'n yaca ben' niga chizi, huanë yaca yo ni zidzo lao lazayaquë'.

41 Cati bdyinyaquë' ga'ala' ga re' ciudad Jerusalén, na' blë'ënë' ciudad na', na' uredyinë'.

42 Quie lao ciudad na' unë' cani:

—Bida' ta ucuasa ucu'oga' le'e cue' chizi laxta'ole tuzioli, pero bire'enle birezaquële në'ëdi'. Quie lena' baode quiele na'a.

43 Baza' dza gaca bayëchi' gula quiele. Huala' yaca ben' zë, yaca ben' rudie le'e. Huayëchoyaquë' lao ciudad quiele uza'agayaquë' le'e.

44 Gutiyaquë' le'e len žgulale len ži'ile. Yela'te uquinuyaquë' yu'u quiele. Cana' gaca quiele como dan' bibë quiele në'ëdi' dza bida' gu'unda' sulia' le'e tuže.

*Blaos Jesús yaca ben' yu'u huëti' lu'u idao' r nabë'ra*

*(Mt. 21.12-17; Mr. 11.15-19; Jn. 2.13-22)*

45 Na'ra uyu'u Jesús lu'u idao' r nabë'ra blaonë' yaca ben' yu'u ra'o ruti'.

46 Na' unë' rëbinë' leyaquë':

—Lë'ë guichi gan' yu'u di'idza' la'ya quie Diuzi nan cani: “Lu'u idao' r nabë'ra ni nacan ga rlidza yaca benë' Diuzi.” Pero le'e abetza'len ruelen ca quie beló ga yu'u ben' uban. —Cana' una Jesús gudyinë' leyaquë'.

47 Pero yugu dza rio Jesús lu'u idao' r nabë'ra ruxi'idze'në' yaca benë'. Pero yaca xan' pxuzi, len yaca ben' rusëdi ley quie Moisés, len yaca ben' napa dyin quie lao yedyi, reguilola'adyi'yaquë' rna'yaquë' ca hueyaquë' ta gutiyaquë' lëbë'.

48 Pero biubinyaquë' bi hueyaquë' ta gutiyaquë' lëbë', como dan' nita' yaca ben' zë gula rexeyaquë' uzë'nagayaquë' can' rnë'.

## 20

*Bë'yaquë' di'idza' quie yela' r nabë' quie Jesús*

*(Mt. 21.23-27; Mr. 11.27-33)*

<sup>1</sup> Bizi bdyin tu dza zè Jesús lu'u idao' r nabè'ra ruxi'idzè' yaca benè' ca re'en Diuzi hueyaquè' ta yeyèri laxta'oyaquè' laohuè'. Na' bdyin yaca xan' pxuzi, len yaca ben' rusèdi ley quie Moisés, len yaca ben' napa dyin quie yulao'.

<sup>2</sup> Na'ra unayaquè' rèbiyaquè' lèbè':

—Una nètò' ¿nu ben yela' r nabè' quio', dan' bablaolo' yaca ben' yu'u huèti' lu'u idao' r nabè'ra?

<sup>3</sup> Na' una Jesús rèbinè' leyaquè':

—Lèscan' re'enda' inaba' le'e tu di'idza'. Na' yequèbile quia':

<sup>4</sup> ¿Nu' use'ela' Juan bautista? ¿Use'ela' Diuzi lèbè' o ta racazi la'adyi'nè' bidè'?

<sup>5</sup> Na'ra uzulaoyaquè' rtzaloyaquè' ru'elèyaquè' laguedyiaquè' di'idza' unayaquè':

—¿Cabizi yèbironè'? Chan' yèbironè': “Diuzi use'elè' lèbè'”, na' huanè' ra'o: “¿Bixquien' bigulele quienè'?”

<sup>6</sup> Na' chi yèbironè': “Ta racazi la'adyi'nè' bidè'”, na' huadza' yaca benè' ra'o, ruen žudyi huaguiyaquè' ra'o yo, gutiyaquè' ra'o como dan' rnayaquè' use'ela' Diuzi Juan rguixogué'nè' xti'idzè'.

<sup>7</sup> Na'ra unayaquè' rèbiyaquè' Jesús:

—Binezindo' nu ben' use'ela' Juan bautista.

<sup>8</sup> Lèzi unarè Jesús rèbinè' leyaquè':

—Lèscan' nè'èdi', biinia' le'e nu ben yela' r nabè' quia' bablaohua' yaca ben' yu'u huèti' lu'u idao' r nabè'ra.

*Una Jesús tu di'idza' quie ben' mala, ben' guca ladyinè'è quie xa'ne  
(Mt. 21.33-44; Mr. 12.1-11)*

<sup>9</sup> Na'ra una Jesús itu di'idza' ni rèbinè' yaca benè':

—Uzu tu ben' guzanè' bedzuli' lao layu quienè'. Ude na' pca'nnè'n lao na' yaca ben' gaca ladyinè'è layela quienè'. Na' uzè'è zioguè' yedyi re' zitu'.

<sup>10</sup> Bizi cati bdyin biu' quie usecho quie bedzuli', na' bese'ela' xan' layela tu ben' zu laohuè' ta tzenabanè' tu ta redu'ulanè' si'nè' quie bedzuli' quienè'. Pero bela'cala bè'yaquè' zi' ben' use'ela' xa'nyaquè'. Na' beza'nè' gabi zeyu'anè', bedyinè' lao xa'nnè'.

<sup>11</sup> Na'ra bese'ela' ben' xan' layela ben' tula zioguè'. Pero lèzi utasi unioy-aquè' lèbè', bè'yaquè' lèbè' zi', gabi bè'yaquè' lèbè'. Na' zeyoguè' bedyinè' lao xa'nnè', gabi zeyu'anè'.

<sup>12</sup> Bizi ben' xan' layela, tatula bese'ela'nè' ben' tula, ben' uyune. Lèzi bè'ryaquè' lèbè' hue', blaoyaquè' lèbè', gabi zeyu'anè'.

<sup>13</sup> “Pues guca ben' xan' layela pensari unè': “¿Ca bizira hua'? Na' ise'ela' zi'ina' bi' nedyè'èda'. Cati ilè'èyaquè' lèbi', chica huapala'nyaquè' lèbi'.”

<sup>14</sup> Pero bè' blè'è yaca ben' naca ladyinè'è layela babdyin zi' xi' nyaquè', na'ra unayaquè' rèbiyaquè' laguedyiaquè': “Bi' niga gaca quiebi' layu niga cati bagati xuzibi'. Uletza' gutirobi' cuenda si'ro layu niga gacan quiero.”

<sup>15</sup> Na'ra bèxoyaquè'bi', ulioyaquè'bi' gan' de layela, bè'tiyaquè' lèbi'.

Na'ra unaba Jesús yaca ben' nita' na' tu di'idza' unè':

—¿Cabizi hue xan' layela len leyaquè'?

<sup>16</sup> Pues huedyinnè' gan' de layela quienè' ta gutinè' yaca ben' nu'enè' ladyinè'è, hue'nè' yaca ben' tula gaca ladyina'ayaquè' layela quienè'.

Na'ra caora be yaca benè' cabè' una Jesús, na' unayaquè' rèbiyaquè' lèbè':

—Birda chi tamala be yaca ben' guca ladyinè'è layela.

<sup>17</sup> Na'ra una Jesús leyaquè' unè' rèbinè' leyaquè':

—Chi nacan can' rnale, ¿ga huen dyin di'idza' yu'u lè'è guichi la'iya quie Diuzi rnèn caniga?:



Yo laga' ta baoru'un ben' hue huecua', lëyo na' bezi' Diuzi bzunë'n ga naca belao, ga rzulao besu.

18 Na' rnia' le'e, nu yaca ben' iguino lëlaho yo na', huayožo iguinoyaquë'. Lëscan' chi iguino yo idacon leyaquë', huatzutzon leyaquë'.

*Unabayaquë' Jesús ca naca quie impuesto*

(Mt. 21.45-46; 22.15-22; Mr. 12.13-17)

19 Na'ra yaca xan' pxuzi, len yaca ben' rusëdi ley quie Moisés, gu'unyaquë' guxuyaquë' Jesús luegozi, dan' bezaqueyaquë' quieyaquë' unë Jesús di'idza' quie yaca ben' guca ladyinë'ë layela. Pero bibeyažoayaquë' bi hueyaquë' quienë', dan' rdzebiyaquë' bi hue yaca benë' quieyaquë'.

20 Biži cabë' beguilola' adyi'yaquë' bëyaquë', use'ela'yaquë' ben' ruezii cuine ca ben' bala'ana ta tzenabayaquë' Jesús di'idza' chi iquixinë' inë' calëla tacuenda ga saque' gaoyaquë' lëbë' xquia lao ben' naca gobierno.

21 Quie lena' bdyinyaquë' gan' zë Jesús unayaquë' rëbiyaquë' Jesús:

—Maestro, banezindo' luë' rxi'idze'lo' yaca benë' di'idza' naca li. Na' biru' cuenda bi naque yaca benë', sino rxi'idze'lo' benë' tali ca naca xneza Diuzi.

22 Unacara nëto': ¿Ru'en lato quízero quie impuesto quie ben' naca gobierno romano? ¿Huaguízero o biquízero?

23 Pero banezi Jesús ca naca pensari mala yu'uyaquë' reguilola' adyi'yaquë' bi hueyaquë' quienë'. Na' unë' rëbinë' leyaquë':

—¿Bixquien' re'enle cuëchile trampa quia'?

24 Uleulu'ecara në'ëdi' tu dumi. ¿Nu guicho, nu laohue da' lë'en?

Na'ra unayaquë' rëbiyaquë' lëbë':

—Da' lë'ë dumi nu guicho, nu lao ben' naca gobierno.

25 Na' una Jesús rëbinë' leyaquë':

—Ulehue' ben' naca gobierno ta redu'ulanë' si'në'. Lëscan' ulehue' Diuzi ta redu'ulanë' si'në'.

26 Na' gabi užaque'yaquë' ga iquixi Jesús ca di'idza' rnë' lao benë'. Bela'cala tu bebanziyaquë' can' unë'. Babira biubinyaquë' bi yëbiyaquë' lëbë'.

*Unabayaquë' Jesús quie ben' baguti beban*

(Mt. 22.23-33; Mr. 12.18-27)

27 Ude na' uyorë yaca ben' partido saduceo gan' zë Jesús. Na'ra rna yaca ben' partido saduceo biyeban yaca ben' baguti. Quie lena' unayaquë' rëbiyaquë' Jesús:

28 —Maestro, ca naca di'idza' bzu Moisés lë'ë guichi, rnën chi baguti tu be'mbyu, na' bega'n žgulanë' tu cuinzë', nunu ži'yaquë' uzu, ruen zi yezi' bi' bichinë' nigula quie ben' baguti tacuenda yezu xcuidi' yezi' lao ben' baguti.

29 Na' ugunro guca gadyi bichiyaquë'. Na' ben' nëro uzi'në' nigula quienë'. Pero ni tu ži'yaquë' biuzu gutinë'.

30 Na' biži ben' urupe bezi'në' nigula quie ben' bichinë', ben' baguti. Lëzi gutirënë', nunu ži'yaquë' uzurë.

31 Na' biži ben' uyune bezi'rënë' nigula quie ben' bichinë', ben' baguti. Lëzirë gutirënë' nunu ži'yaquë' uzurë. Cana' guca quie lao gadyiteyaquë', yaca ben' uzulë nigula.

32 Ga beyudyicala quie nigula, gutirënë'.

33 Na'ra chi tali na' yeban yaca ben' huati, ¿ca nurlayaquë' naca žgulayaquë' nigula na', como dan' lao gadyi bichiyaquë' uzulëyaquë' lëbë'?

34 Na' bequëbi Jesús rëbinë' leyaquë':

—Lao yedyi layu niga rzulë be'mbyu nigula, lëscan' rzulë nigula be'mbyu.

35 Pero yaca ben' yeban yeyo guibá ga zu Diuzi, bira sulëyaquë' laguediyayaquë' ca nu žgulayaquë', ca nu xquiuyaquë'.

<sup>36</sup> Lëscan' bira gatiyaquë'. Cabë' bigati yaca ángel, cana' bigatirëyaquë'. Tali nacayaquë' zi'i Diuzi, dan' babebanyaquë' huatzezulëyaquë' Diuzi tuzioli.

<sup>37</sup> Na' rguixogue' yaca di'idza' bzu Moisés lë'ë guichi de que yeban yaca ben' baguti. Caora zë Moisés gan' re' yaga ra'ala' gui' bireina, lëgan' na' una Diuzi gudyinë' Moisés: "Naca' Diuzi quie xuzixta'olo' Abraham, len quie xuzixta'olo' Isaac, len quie xuzixta'olo' Jacob."

<sup>38</sup> Cana' una Diuzi quieyaquë', ba'ala'cazi bagutiyaquë' azio zë iza caora. Lena' rulu'en rlë'ë Diuzi leyaquë' ca ben' neneban, cala ca ben' baguti. Pues rlë'ë Diuzi yugulu benë' ca yaca ben' neban. Birlë'ënë' leyaquë' ca ben' baguti.

<sup>39</sup> Bizi bala yaca ben' rusëdi ley quie Moisés, ben' nita' na', ruzënagayaquë' bi na Jesús, unayaquë' rëbiyaquë' Jesús:

—Tahuencazi cabë' baonao', Maestro.

<sup>40</sup> Na' bizi bira biubinyaquë' bi di'idza' inabayaquë' lëbë'.

*Naca ben' Cristo Señor quie rey David*

(Mt. 22.41-46; Mr. 12.35-37)

<sup>41</sup> Na'ra una Jesús rëbinë' leyaquë':

—Nacan tali ca nale, nale naca ben' Cristo zi'i rey David.

<sup>42</sup> Pero cuin rey David, caora bzunë' di'idza' lë'ë guichi Salmos, unë' cani: Una Diuzi rëbinë' ben' naca Señor quia': "Ure' cuëta' zaquë' yebë niga,

<sup>43</sup> hasta idyin dza cuëcha' xni'alo' yaca ben' rudie luë'."

<sup>44</sup> Quie lena' rnaba' le'e: ¿Cómo naca ben' Cristo zi'i rey David, chi cuin rey David unë' naca ben' Cristo Señor quienë'?

*Udao Jesús quia yaca ben' rusëdi ley quie Moisés*

(Mt. 23.1-36; Mr. 12.38-40; Lc. 11.37-54)

<sup>45</sup> Na' ben' zë nita' bzënagayaquë' ca una Jesús caora unë' rëbinë' yaca ben' quienë':

<sup>46</sup> —Gapale cuidado bihuele ca rue yaca ben' rusëdi ley quie Moisés. Lega rexeyaquë' gacoyaquë' la'ari' naca tona. Lega rexeyaquë' gapala'n yaca benë' leyaquë' ga rdayaquë' tu neza. Lega rexeyaquë' cue'yaquë' ga rbe'ben' bala'ana, chi lu'u idao' sinagoga, chi ga raca lani.

<sup>47</sup> Zidza rulidzayaquë' Diuzi cuenda ilë'ë yaca benë' leyaquë' ben' quie Diuzi, pero bë' ruezियाquë' regulola'adyi'yaquë' bi hueyaquë' ta cubayaquë' ta de quie yaca nigula baguti xquiuhue. Quie lena' huera Diuzi leyaquë' tu castigo huala gula.

## 21

*Una Jesús quie tu nigula guti xquiuhue bdze'në' gun quie idao'*

(Mr. 12.41-44)

<sup>1</sup> Na' guca tu dza zë Jesús lu'u idao' rnabë'ra blë'ënë' rudze' yaca ben' uña'a dumi quieyaquë' lu'u caja ga yu'un gun quie idao' rnabë'ra.

<sup>2</sup> Lëzi blë'ënë' bdze' tu nigula guti xquiuhue chopa dumi dao' lasi de cobre lu'u caja na'.

<sup>3</sup> Na' una Jesús rëbinë' yaca ben' quienë':

—Tali rnia' le'e, nigula na' naquë' ben' yëchi', aguti xquiuhue', pero ca naca dumi bdze'në' lu'u caja, nacaran dumi ze cala ca ta bdze' yaca ben' uña'a.

<sup>4</sup> Ta bega'nnan sobre quieyaquë' bdze'yaquë' lu'u caja na', pero lë'nigula ben' yëchi', bdze'në' ca tu dumi dao' dezi quienë' ta ra'onë' ta raonë'.

*Una Jesús huabiagu' idao' rnabë'ra*

(Mt. 24.1-2; Mr. 13.1-2)

<sup>5</sup> Na'ra yaca ben' quie Jesús, bē'lēyaquē' laguediyaquē' di'idza' unayaquē' quie idao' rnabē'ra de que nacan badan gula, len yo necua' besu, len tu ta psala'adyi' yaca benē' bē'yaquē' quie idao'.

<sup>6</sup> Na'ra una Jesús rēbinē' leyaquē':

—Huadyin dza iguino duze ca ta rna'le niga. Ni tu yo bira yega'nnan xcu'udzu laguedyin.

*Ga ru'en di'idza' cabē' gaca baruen bago dza iyudyi dyilayu*  
(Mt. 24.3-28; Mr. 13.3-23)

<sup>7</sup> Na'ra yaca ben' quie Jesús unabayaquē' Jesús rēbiyaquē' lēbē':

—Maestro, ¿bata gaca can' rnao'? ¿Ca biži gaca ta ulu'en nēto' cati baruen bago dza gaca can' rnao'?

<sup>8</sup> Na' una Jesús rēbinē' leyaquē':

—Gapale cuidado ta bisī' yaca benē' le'e yē'. Porque huida ben' zē inayaquē': “Nē'ēdi' naca' Cristo.” Lēscan' inayaquē': “Abdyin hora yeyudyi yedu quie dyila yu.” Pero bigalele quieyaquē'.

<sup>9</sup> Lēzi cati babele baozulao huedila, rdilalē nación conlē itu nación, lēscan' rdilalē benē' conlē gobierno quieyaquē', bidzebile. Huata'cazi huedila quie lao yedyi layu, pero nerdziogue idyīn dza yeyudyi yedu quie lao yedyi layu.

<sup>10</sup> Lēscan' una Jesús rēbinē' leyaquē':

—Huaca dilalē tu nación itu nación. Huaca dilalē tu yedyi itu yedyi.

<sup>11</sup> Lēscan' ni'nizi quie lao yedyi layu huaca uzu' huala, huata' ubin, huata' yela' hue'. Lēscan' hualē'ē yaca benē' ta utzebin leyaquē' za'n guibá huazēn ladza.

<sup>12</sup> Pero tu zagaca can', guxu yaca benē' le'e hueyaquē' le'e bizinaquezi. Iquiē'yaquē' le'e lu'u yaca idao' sinagoga ta gaoyaquē' le'e xquia. Lēscan' udze'yaquē' le'e lu'u dyiguiba, usedyinyaquē' le'e lao na'a ben' naca gobierno dan' baralele baza'le naole nē'ēdi'.

<sup>13</sup> Cana' gaca quiele tacuenda inēle cule nē'ēdi' laoyaquē'.

<sup>14</sup> Bidēbile ca bi yēbilyaquē' cuenda gacalēle cuinle laoyaquē'.

<sup>15</sup> Bidēbile como dan' gacalia' le'e bi di'idza' yequēbile yeyēbilyaquē' cuenda inita' yaca ben' rudie le'e chizi, bira ibinyaquē' bi inayaquē' le'e.

<sup>16</sup> Hasta ben' naca familia quiele, len ben' naca amigo quiele, huazi'yaquē' le'e yē'. Usedyin nu xuzile, nu bichile, nu diadza quiele, nu amigo quiele le'e lao na'a ben' rnabē'. Gutiyaquē' bala le'e.

<sup>17</sup> Huadi yaca ben' nita' lao yedyi layu le'e dan' naole xneza'.

<sup>18</sup> Pero bibi gaca quiele, ni tu guitza' guichole bicuiaguin'.

<sup>19</sup> Chi hue quiele busianla'adyi'le naole xneza', huata' yela' neban quiele tuzioli.

<sup>20</sup> Cati ilē'ēle baneyēchote yaca soldado ciudad Jerusalén, huanezile baruen bago dza udyiaguī'yaquē' lao ciudad na'.

<sup>21</sup> Na'ra yaca ben' nita' estado Judea, ruguinte izunoyaquē' tzioyaquē' ga zu ya'a. Lēscan' yaca ben' nita' ciudad Jerusalén, ruguinte eroyaquē' tzioyaquē' huažuno. Lēscan' yaca ben' nita' lao layela, bireya'ala' yeyoyaquē' ciudad Jerusalén.

<sup>22</sup> Lēdza gaca can' nacan dza hue Diuzi castigo. Nacan dza uzucazi yugulu di'idza' ca di'idza' yu'u lē'ē guichi la'iya quie Diuzi.

<sup>23</sup> Huaca bayēchi' gula quie yaca nigula nu'a bdao', len yaca nigula ruga'adyi bdao' dza gaca can'. Lega yedzagalao yaca ben' Israel, hue Diuzi leyaquē' tu castigo huala gula.

<sup>24</sup> Na' guti yaca soldado balayaquē'. Na' ibalayaquē' uquioyaquē' hueyaquē' leyaquē' preso iquiē'yaquē' leyaquē' yaca yedyi zē, yedyi tula.

Tana' lena' inabë' yaca ben' za' yedyi tula lao ciudad Jerusalén hasta idyin dza bira hue Diuzi lato inabë'yaquë' lao ciudad na'.

*Ca guca bë' yeguida ben' naca bichi yugulu benë' lao yedyi layu tatula (Mt. 24.29-35, 42-44; Mr. 13.24-37)*

Na' una Jesús:

<sup>25</sup> —Ude na' huata' ta naca seña ladza. Huechula obidza, bira gata' xni' biu', huaguino yaca bélo. Huaca tondo yaca ben' nita' lao yedyi layu. Huadzebiyaquë' yeyaquë' xchi' nisadao' ruen ru'be huala gula ga rbiga' rdan ru'a yu bidyi.

<sup>26</sup> Huayun'yaquë' tanto idzebiyaquë' ca gaca quieyaquë' lao yedyi layu. Huazisi huaguino yaca bélo dyian guibá.

<sup>27</sup> Lëcana' hualë'ë yaca ben' nita' lao yedyi layu në'ëdi', bichi yugulu benë'. Hualë'ëyaquë' yeguida' lao beo zë ladza. Hualë'ëyaquë' në'ëdi' de yela' huaca quia'.

<sup>28</sup> Cati baraca can' rnia', na'ra bidzebile, reya'ala' yechisa guichole ina'le ladza como dan' ilë'ëti'zi rdziogue ute usela' lé'e ca ta raca quiele.

<sup>29</sup> Lëzirë unë Jesús itu di'idza' ni, unë' rëbinë' leyaquë':

—Ulena'cara ca raca quie yaga higo o bitezi yaga tula.

<sup>30</sup> Cati ilë'ële bagusin la'aga' gula, barebian la'aga' re'ene quien, banezile baza' biu' oba.

<sup>31</sup> Lëzirë cati ilë'ële baraca cabë' rnia' le'e, reya'ala' inezile baza' dza inabë' Diuzi lao yedyi layu.

<sup>32</sup> Tali rnia' le'e, tu bineya zi'isuba ben' nita' na'a, bë' gaca cabë' rnia' le'e.

<sup>33</sup> Huade quie ta dyia guibá len lao yedyi layu cana'zi, pero ca naca di'idza' rnia' le'e, biten cana'zi. Decazide huazun di'idza' cabë' rnia' le'e.

<sup>34</sup> Ulegapa cuidado, bihue'le lato gacale zidi tzu'u pensari mala lu'u guicho laxta'ole. Bihuele tabayatza, bihuele hue'e, bidëbile quie ta gaole, bidëbile quie ta gacole, yela' na' biyebanle dza yeguida'.

<sup>35</sup> Porque cabë' rdzebi bia guixi' bë' rdacoba' lu'u trampa, cana' yedzebi yaca ben' nita' lao duže yedyi layu dza yeguida'.

<sup>36</sup> Lena' nia' le'e, ulesu listo. Ulehue'lë Diuzi di'idza' yugu dza, yugu yela, cuenda ucuasa ucu'onë' le'e ca tamala za' gaca lao yedyi layu. Ulehue quiele cuenda yetilalaole në'ëdi', bichi yugulu benë'. —Cana' una Jesús rëbinë' leyaquë'.

<sup>37</sup> Ruxi'idze' Jesús yaca benë' lu'u idao' r nabë'ra te dza. Na' bizi quie sadze' rionë' ga zu ya'a lao Olivos ga reguesinë'.

<sup>38</sup> Bizi yaca ben' zë rdinyaquë' yugu zila lu'u idao' r nabë'ra ta rzëmagayaquë' ca di'idza' ruxi'idzë' leyaquë'.

## 22

*Beguilola'adyi'yaquë' bi hueyaquë' ta gutiyaquë' Jesús (Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup> Na' baruen bago ta hue yaca ben' Israellani pascua ta gaoyaquë' yëta xtila binequixi levadura.

<sup>2</sup> Bizi yaca xan' pxuzi len yaca ben' rusëdi ley quie Moisés, lega reguilola'adyi'yaquë' bi hueyaquë' ta gutiyaquë' Jesús. Pero bireyažoayaquë', dan' rdzebiyaquë' idza' yaca benë' leyaquë'.

<sup>3</sup> Na' bizi tu ben' naca ben' quie Jesús lado ichiptu yaca ben' quie Jesús bë'në' lato uyu'u xan' taxi'ibi' Satanás lu'u laxta'onë'. Lëben' na' laonë' Judas Iscariote.

4 Na' uyo Judas tzegue'lënë' di'idza' yaca xan' pxuzi, len yaca ben' napa dyin quie idao' rnabê'ra ta yeguilola'adyi'yaquë' bi hueyaquë' ta usedyinnë' Jesús lao na'ayaquë'.

5 Leyaquë' lega bedaohueyaquë' bega'nlēyaquë' lēbē' di'idza' ta hue'yaquë' lēbē' dumi.

6 Na' uzulaonē' beguilola'adyi'nē' bi huenē' ta usedyinnē' Jesús lao na'ayaquë' cati nunu ben' nita'.

*Ga ru'en di'idza' ca gaoyaquë' quie lani pascua  
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

7 Bdyincazi dza bēyaquë' lani pascua cati gaoyaquë' yēta xtila ta binequixi levadura, lēscan' gutirēyaquë' beco' zi'ila' quie lani pascua.

8 Lena' una Jesús rēbinē' chopa ben' quienē', Pedro len Juan:

—Uletzio ta ucuezale ta gaoro rtze' quie lani pascua.

9 Na'ra unabayaquë' rēbiyaquë' lēbē':

—¿Gaži re'enlo' tziondo' ta tzacueizando' ta gaoro?

10 Biži na' una Jesús rēbinē' leyaquë':

—Uletzio ciudad Jerusalén. Caora babdyinle ru'a ciudad, lēgan' na' yedilale tu be'mbyu zeyu'a tu re' yudzo nisa. Lēben' na' inaole gan' zeyonē' yedyinnē' žan yu'u.

11 Na' tzu'ule yēbile ben' naca xan' yu'u: “Cani na Maestro: ¿Gaži zu lu'u yu'u ga gaolēndo'nē' rtze' quie lani pascua?”

12 Na'ra ulu'enē' le'e tu lu'u yu'u že de chopa xcua ga baneluban banacan dya'a. Lēgan' na' ucuezale ta gaoro.

13 Na' uza'yaquë' zioyaquë' gucan laga con can' gudyi Jesús leyaquë'. Lēgan'na' pcuezaquë' ta gaoyaquë' rtze' quie lani pascua.

14 Cati bdyin hora gaoyaquë' quie rtze', na' uza' Jesús ziolēnē' yaca ben' quienē' uyu'uyaquë' lu'u yu'u ure'yaquë' lao mesa.

15 Na'ra una Jesús rēbinē' leyaquë':

—Lega bare'enda' gaolia' le'e rtze' quie lani pascua tu zagatia'.

16 Rnia' le'e, bira gaolia' le'e rtze' quie lani pascua. Caora babzu di'idza' ca una Diuzi arnabē'nē' lao yedyi layu, cana'tera gaolia' le'e rtze' quie lani pascua tatula.

17 Na'ra uži'nē' tu copa, bazēnē'n lao nē'ē, unē' rēbinē' Diuzi:

—Diuxcalelo'.

Ude na' unē' rēbinē' leyaquë':

—Uleguxun tu tule, uleyo'on.

18 Rnia' le'e, bira yo'oga' nisa quie bedzuli'. Caora babdyin dza arnabē' Diuzi lao yedyi layu, cana'tera yo'oga' nisa bedzuli' tatula.

19 Na' uži'nē' tu yēta xtila bazēnē'n lao nē'ē unē' rēbinē' Diuzi:

—Diuxcalelo'.

Ude na' unē' rēbinē' leyaquë':

—Lēyēta xtila ni nacan ca quie cuerpo quia'. Huatia' cuenda gata' yela' huezi'že quiele lao Diuzi. Cabē' aodaoro rtze' niga, cana' huerēle ta yeza'la'adyi'le nē'ēdi' cabē' bia' quiele.

20 Lēzirē, ude beyudyi udaoyaquë', bezi'nē' itu copa unē' rēbinē' leyaquë':

—Naca nisa bedzuli' yudzu copa ni ca quie ren quia'. Lena' ilatoga' gatia' cuenda yega'ntza'olē Diuzi le'e tacubila. Lena' ilatoga' cuenda gata' yela' huezi'že quiele lao Diuzi.

21 'Pero tu ben' re' len nē'ēdi' lao mesa ni, lēben' na' usedyinnē' nē'ēdi' lao na'a ben' rudie nē'ēdi'.

<sup>22</sup> Nè'èdi', bichi yugulu benè', banugunnan gatia'. Pero bayèchi' gula gaca quie ben' usedyin nè'èdi' lao na'a ben' rudie nè'èdi'.

<sup>23</sup> Na'ra unayaquè' rèbiyaquè' laguediyaquè':

—¿Nuži ra'o usedyinronè' lao na'a ben' rudie lèbè'?

*Ga bëyaquè' tu huenè quie nulayaquè' gacara belao*

<sup>24</sup> Na'ra yaca ben' quie Jesús uyu'uyaquè' huenè len laguediyaquè' ca nulayaquè' gacara ben' belao entre leyaquè'.

<sup>25</sup> Pero na' una Jesús rèbinè' leyaquè':

—Yaca ben' naca gobierno lao yedyi layu niga, lega dyiabè'yaquè' hue yaca benè' ca ta re'enaquè'. Na' nayaquè' nacayaquè' ben' belao.

<sup>26</sup> Pero na' le'e bireya'ala' huele ca rueyaquè'. Bireya'ala' hue cuinle ben' belao. Reya'ala' gacalèle laguedyile. Reya'ala' ilè'èle cuinle ca ben' criado. Chi huele cana', tali na' nacale ben' belao ca re'en Diuzi.

<sup>27</sup> Quie lao ben' nita' lao yedyi layu niga, rbe'cazi xa'nyaquè' lao mesa ta gaoyaquè' ta rudyia criado quieyaquè'. Pero nè'èdi', la'acazi naca' xa'nle, zua' ladole rua' ca quie criado quiele.

<sup>28</sup> Na' como dan' bipsanla'adyi'le nè'èdi' dza cati guca zèdi gula quia',

<sup>29-30</sup> quie lena', guna' le'e lato cue'le gaole yo'ole len nè'èdi' lao mesa quia' ga yedyina' inabi'a. Lèscan' guna' le'e lato cue'le ga gaca xlatole ichugolile quie lao chipchopa cue' ben' Israel. Cabè' bè Xuza', pca'nnè' yela' rnabè' quienè' ta inabi'a, cana' hueria' quiele, uca'na' yela' rnabè' quia' ta inabè'le.

*Ga una Jesús quie Pedro huananè' binubè'nè' lèbè'*

*(Mt. 26.31-35; Mr. 14.27-31; Jn. 13.36-38)*

<sup>31</sup> Lèzi unèrè Jesús:

—Simón, Simón, re'en xan' taxi'ibi' Satanás huelèn le'e prueba, chi usanla'adyi'le nè'èdi', chi biusanla'adyi'le nè'èdi'. Re'ennan usisin le'e ca rsisi benè' bini trigo.

<sup>32</sup> Pero bablidza' Diuzi ta gacalènè' luè' ta biusanla'adyo' nè'èdi'. Na'ra cati barenaolo' xneza' tatula, na' utipalo' yaca ben' bicho', ben' nao xneza', ta inaorayaquè' mazara xneza'.

<sup>33</sup> Na'ra una Simón rèbinè' Jesús:

—Zucaza' dispuesto tzalia' luè', ba'ala'cazi udze'yaquè' ra'o lu'u dyiguiba, o chi gutiyaquè' ra'o.

<sup>34</sup> Na' una Jesús rèbinè' lèbè':

—Pedro, rnia' luè', bala tu binecuedy biu, huanao' tzona lasa binubè'lo' nè'èdi'.

*Baidyin hora yedzagalao Jesús*

<sup>35</sup> Na'ra una Jesús rèbinè' leyaquè':

—Cati use'ela' le'e ga uyole dza na', bibi'ale yèxo, bibi'ale dumi, bibi'ale itu cue' guidi ta uliole, ¿bdzioguele bi ta bdzioguele?

Na' unayaquè' rèbiyaquè' Jesús:

—Bibi bdzioguendo'.

<sup>36</sup> Bizi una Jesús rèbinè' leyaquè':

—Babetza' ca nia' huele. Chi de yèxo quiele, reya'ala' hua'alen, lèzi hua'arèle dumi. Chi bide macheta quiele, guti'le gabán quiele ta ga'ole macheta quiele hua'alen.

<sup>37</sup> Lena' rnia' le'e, decazide uzun di'idza' gan' rnèn quia' lè'è guichi la'ya quie Diuzi cani: “Hualè'èyaquè' nè'èdi' ben' mala.” Pues uzucazi yugulu di'idza' gan' rnèn quia' lè'è guichi la'ya.

<sup>38</sup> Na'ra unayaquè' rèbiyaquè' lèbè':

—Señor, decazi chopa macheta quiendo'.

Na' bequëbi Jesús unë':

—Conlë læcazin hue'ennan.

*Bë'lë Jesús Diuzi di'idza' ga laona Getsemani*

(Mt. 26.36-46; Mr. 14.32-42)

<sup>39</sup> Na'ra ca rue Jesús yugu rdze!, uza'në' zionë' gan' zu ya'a lao Olivos. Lëscan' uza'rë yaca ben' quienë' ziolëyaquë' lëbë'.

<sup>40</sup> Bë' bdyinyaquë' gan', na'ra unë' rëbinë' leyaquë':

—Ulidzale Diuzi cuenda yezi'le fuerza ta bihue xan' taxi'ibi' le'e gan bihuele xquia ca tazëdi baza' gaca quiele.

<sup>41</sup> Lëgan' na' bega'n yaca ben' quienë' udyialao Jesús ilë'ëti' ca tu ga rdyin yo cati reru'unron. Na' ure'në' uditzu zibinë' layu blidzë' Diuzi.

<sup>42</sup> Na' unë' rëbinë' Diuzi:

—Xuza' Diuzi, inaba' laolo' ucuasa ucu'olo' në'ëdi' ca tazëdi gula baza' gaca quia'. Nacan ca quë tu ta naca sla' ruen zi yo'oga'n. Pero zua' dispuesto gaca quia' cabë' re'leno' luë', cala ca re'enda' në'ëdi'.

<sup>43</sup> Biži na' bdyinte tu ángel za' guibá gan' zënë', gucalënë' lëbë' bezi'në' fuerza.

<sup>44</sup> Na' tanto bedzagalaonë' guquenë' bayëchi' gula, gucanë' nisa yesa blaton layu nacan ca ren quienë' tu rlidzë' Diuzi du guicho du la'adyi'në'.

<sup>45</sup> Biži bë' beyudyi blidzë' Diuzi, na' bezulinë' zeyoguë' gan' nita' yaca ben' quienë', blë'ënë' barasiyaquë', dan' banexaqueyaquë' tanto rdëbiyaquë' racayëchi'yaquë'.

<sup>46</sup> Lena' una Jesús rëbinë' leyaquë':

—¿Bixquien' rasizile? Ulechasa ulelidza Diuzi cuenda yezi'le fuerza ta bihue xan' taxi'ibi' le'e gan bihuele xquia ca tazëdi gula baza' gaca quiele.

*Guxuyaquë' Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Nerna Jesús ru'elënë' yaca ben' quië' di'idza' cati bdyin Judas gan' zënë' dyialaotenë' lao yaca ben' ziolënë' lëbë' tuze. Lëcana' ubiga'në' gan' zë Jesús udaonë' situ xaganë'. Naca Judas tuže len ichiptu yaca ben' quie Jesús.

<sup>48</sup> Na'ra una Jesús rëbinë' lëbë':

—Judas, con tu situ baodaolo' xaga', ¿lena' babao' entregar në'ëdi', bichi yugulu benë'?

<sup>49</sup> Na' biži cati blë'ë yaca ben' quie Jesús bi raza quienë', na'ra unayaquë' rëbiyaquë' lëbë':

—Señor, ¿re'leno' cuiondo' macheta quiendo' tilalëndo' leyaquë'?

<sup>50</sup> Biži na' ulio tu ben' quie Jesús macheta quienë', udinë' ben' criado quie xan' pxuzi, uchugunë' naguë' yebë.

<sup>51</sup> Pero na' una Jesús rëbinë' lëbë':

—Psan quieyaquë', cana'zi.

Ude na' bda' Jesús në'ë naga ben' na', labeyacaten.

<sup>52</sup> Na'ra una Jesús gudyinë' yaca xan' pxuzi, len yaca ben' napa dyin quie idao' rnabë'ra, len yaca los demás ben' rnabë', ben' ziorë guxu lëbë':

—¿Cala ben' uban raquele naca' dan' nu'ale macheta, nu'ale yaga za'le guxule në'ëdi'?

<sup>53</sup> Cati uzulia' le'e lu'u idao' rnabë'ra yugu dza, nica beyazole guxule në'ëdi'. Pero na'ra abdyin hora quiele cati huelële në'ëdi' ca ta rnan quiele le'e, ben' rda lao lato laochula.

*Una Pedro binubë'në' Jesús**(Mt. 26.57-58, 69-75; Mr. 14.53-54, 66-72; Jn. 18.12-18, 25-27)*

54 Na' bëxuyaquë' lëbë' uquië'yaquë' lëbë' zan yu'u quie xan' pxuzi. Na' ziorë Pedro zitu'la zenaonë' leyaquë'.

55 Cati bdyinyaquë' na', ulëchiyaquë' gui' lali'a gan' rbe'yaquë' neyëchoyaquë' ru'a gui' ta yedze'yaquë'. Na' ure'rë Pedro ladoyaquë'.

56 Biži tu nigula, bi' naca criada, bë' blë'ëbi' Pedro re'në' ru'a gui', na' bega'mbi' rna'bi' lao Pedro. Beyudyi una'bi' lëbë' dyë'ëdi, na' unëbi' rëbibi' lëbë':

—Lëzi ben' re' niga, naquë' ben' quie ben' na'.

57 Na' una Pedro rëbinë' lëbi':

—Nigula, binubë'da' ben' nao' can'.

58 Bë' guca itu chi', blë'ë ben' tula Pedro gan' re'në'. Na' una ben' na' rëbinë' lëbë':

—Lëzi luë' nacarao' ben' quieyaquë'.

Pero na' una Pedro rëbinë' lëbë':

—Binaca' ben' quieyaquë'. Binubë'da' ben' na'.

59 Biži bë' guca ca itu hora, na' unë itu ben' nita' na' rëbinë' Pedro:

—Tali naca ben' ni ben' quie ben' na', como dan' nacarë' ben' estado Galilea.

60 Na'ra una Pedro rëbinë' ben' una cana':

—Binezda' quie ben' rnao', binubë'da' ben' na'.

Lëcana', caora nernë Pedro cana', na' uredyi biu.

61 Na' beyëcho Jesús una'në' lao Pedro. Caora na' beza'la'adyi' Pedro con ca una Jesús gudyinë' lëbë': "Bala tu binecuedyi biu, huanao' tzona lasa binubë'lo' në'ëdi'."

62 Na'ra ubiga' Pedro tzala'la zionë' ga uredyinë' zi'laza gula.

*Ga ru'en di'idza' cabë' bëyaquë' ptituyaquë' Jesús**(Mt. 26.67-68; Mr. 14.65)*

63 Na' yaca ben' napa Jesús, ptituyaquë' lëbë', udyibiyaquë' lëbë' begorro.

64 Lëscan' pquiyoaquë' la'ari' laohuë', udyibiyaquë' laohuë', unayaquë' rëbiyaquë' lëbë':

—Unacara nu udyibi luë'.

65 Lëscan' lega di'idza' zi' unëyaquë' gudyiyaquë' lëbë'.

*Psedyinyaquë' Jesús lao na'a yaca ben' rna'bë'**(Mt. 26.59-66; Mr. 14.55-64; Jn. 18.19-24)*

66 Biži bë' uyani' dza tula, bedupa yaca ben' napa dyin, len yaca xan' pxuzi, len yaca ben' rusëdi ley quie Moisés, uquië'yaquë' Jesús ziolëyaquë' lëbë' gan' re' yaca ben' napa dyin. Na' unabayaquë' rëbiyaquë' lëbë':

67 —Unacara nëto' çnaco' ben' na Diuzi ise'elë'?

Na'ra bequëbi Jesús rëbinë' leyaquë':

—Chan' inia' le'e naca' ben' na Diuzi ise'elë', nica galele quia'.

68 Lëzi chi inaba' le'e tu di'idza', nica yequëbile quia', nica usanle në'ëdi'.

69 Pero baza' dza huatzeri'a në'ëdi', bichi yugulu benë', zaquë' yebë cuëta Diuzi, ben' dera yela' rna'bë' quie.

70 Biži lao yuguluteyaquë' unayaquë' rëbiyaquë' lëbë':

—Çnaco' zi'i Diuzi?

Na' bequëbi Jesús rëbinë' leyaquë':

—Sí, naca' zi'i Diuzi con can' nale.

71 Na'ra unayaquë' rëbiyaquë' laguediyaquë':



—¿Ca nura testigo re'ennan guida? Cuiucaziro babero cabè' baona ben' niga.

## 23

### *Pseyinyaquè' Jesús lao Pilato*

(Mt. 27.1-2, 11-14; Mr. 15.1-5; Jn. 18.28-38)

<sup>1</sup> Na'ra yugulu yaca ben' re' gan', uzulyaquè' uquiè'yaquè' Jesús tza-hua'ayaquè' lèbè' lao Pilato, ben' naca gobernador.

<sup>2</sup> Lègan' na' udaoyaquè' lèbè' xquia, unayaquè' rèbiyaquè' Pilato:

—Ben' niga rudze'yelanè' yaca ben' yedyi quiendo' rèbinè' leyaquè' bireya'ala' quízero impuesto quie gobierno romano. Lèzi nanè' naquè' ben' use'ela' Diuzi, na' nanè' naquè' rey quiendo'.

<sup>3</sup> Na'ra unaba Pilato Jesús rèbinè' lèbè':

—¿Tabala naco' rey quie ben' Israel?

Na' bequèbi Jesús rèbinè' Pilato:

—Naca' cabè' unao'.

<sup>4</sup> Na'ra una Pilato rèbinè' yaca xan' pxuzi, len yaca los demás ben' nita' na':

—Gabi dula' de quie ben' niga.

<sup>5</sup> Na' bizi leyaquè' unèrayaquè' zidzo gula rèbiyaquè' Pilato:

—Con ga baodenè' rudze'yelanè' yaca benè'. Pues barudze'yelanè' yaca ben' quie yaca yedyi quie estado Judea len yaca ben' quie yaca yedyi quie estado Galilea. Na' babla'nè' niga ta udze'yelanè' yaca ben' lao ciudad niga.

### *Pseyinyaquè' Jesús lao Herodes*

<sup>6</sup> Bè' be Pilato can' unayaquè' quie Jesús, na' unabanè' leyaquè' chi tali naca Jesús ben' quie estado Galilea.

<sup>7</sup> Na' caora bequèbiyaquè' tali naquè' ben' quie estado Galilea, na' use'ela'nè' Jesús lao Herodes, dan' naca Herodes gobernador quie estado Galilea, lèscan' dan' bazurè Herodes ciudad Jerusalén.

<sup>8</sup> Bizi bè' blè'è Herodes bdyin Jesús gan' zunè', lega redaohuenè' como dan' azio zè dza re'ennè' ilè'ènè' lèbè'. Babenè' can' na yaca benè' can' ruenè'. Lena' re'ennè' ilè'ènè' lèbè' chi bihuenè' tu milagro.

<sup>9</sup> Na' uzulaonè' rnananè' Jesús zè pregunta, pero bibequèbi Jesús quienè'.

<sup>10</sup> Lègan' na' bdyinrè yaca xan' pxuzi, len yaca ben' rusèdi ley quie Moisés, udaoyaquè' lèbè' xquia. Di'idza' zèra bèyaquè' condre Jesús.

<sup>11</sup> Bi'zi Herodes len yaca soldado quienè' uzulaoyaquè' ruelyaquè' lèbè' bizituaquezi. Bgacoyaquè' lèbè' tu la'ari' tzao' ca quie la'ari' raco rey ta utituyaquè' lèbè'. Ude na' bese'ela'yaquè' lèbè' tatula lao Pilato.

<sup>12</sup> Du dza na'la, Herodes len Pilato, biyu'uyaquè' dya'a bigucayaquè' amigo, pero caora na' beyacayaquè' amigo.

### *Ga uchugubè'yaquè' gati Jesús*

(Mt. 27.15-26; Mr. 15.6-15; Jn. 18.39-19.16)

<sup>13</sup> Na' bè Pilato mandado bedupa yaca xan' pxuzi, len yaca ben' napa dyin, len yaca ben' lao yedyi.

<sup>14</sup> Na'ra una Pilato rèbinè' leyaquè':

—Le'e badehua'ale ben' niga ni, nale rudze'yelanè' yaca benè', pero bapquèpa' lèbè' zaquè' lao le'e, na' le'e bablè'èle bibi dula' de quienè' con ca inale raole lèbè' xquia.

<sup>15</sup> Lèscan' Herodes pquèpinè' lèbè' bibi falta de quienè' bese'ela'nè' lèbè' niga. Bablè'èle bibi dula' de quienè' cuenda hua' mandado guti yaca soldado lèbè'.

16 Quie lena' hua' mandado qui yaca soldado lëbë' guidi, na'tera usana'në'. —Cana' una Pilato rëbinë' leyaquë'.

17 Na' biži bë' ga'ala' lani, de yebio Pilato tu ben' naca preso lu'u dyiguiba con ca gue'en yaca benë'. Cana' naca costumbre quieyaquë' yebioyaquë' tu ben' naca preso dza lani pascua. Biži Pilato gu'unnë' usannë' Jesús.

18 Pero yaca ben' nita' na' uzulaoyaquë' urediyiya'yaquë' unëyaquë' zidzo: —¡Biusanlo' ben' na'! ¡Yebiolo' Barrabás!

19 Biži ben' lao Barrabás yu'unë' lu'u dyiguiba, dan' udilalënë' yaca ben' r nabë' quie lao yedyi, lëzi bëtinë' benë'.

20 Na' como gu'un Pilato usannë' Jesús, bë'lënë' yaca ben' nita' na' mazara di'idza'.

21 Pero urediyiya'yaquë' zidzo unayaquë':

—¡Uda'lo'në' lë'ë yaga cruzo! ¡Uda'lo'në' lë'ë yaga cruzo!

22 Na'ra tabeyuna lasa una Pilato rëbinë' leyaquë':

—¿Biži tamala babënë'? Bibi dula' de quienë' cuenda hua' mandado guti yaca soldado lëbë'. Quie lena' hua' mandado qui yaca soldado lëbë' guidi, na'tera usana'në'.

23 Pero na' unëra yaca benë' zidzora urediyiya'yaquë' rëbiyaquë' Pilato ta huenë' mandado uda'yaquë' Jesús lë'ë yaga cruzo. Tanto urediyiya' yaca ben' nita' na' len yaca xan' pxuzi, bëyaquë' gan gucan cabë' gu'unyaquë'.

24 Cana' guca bë Pilato mandado cabë' unabayaquë' huenë'.

25 Cana' guca ulio Pilato con ben' gu'unyaquë' yero lu'u dyiguiba, ben' guca dilalë ben' napa dyin, ben' bëti benë'. Cana' guca psedyin Pilato Jesús lao na'a yaca ben' huë bizinaquezi conlë lëbë'.

### *Bda'yaquë' Jesús lë'ë yaga cruzo*

*(Mt. 27.32-44; Mr. 15.21-32; Jn. 19.17-27)*

26 Caora bë' nequië'yaquë' Jesús ta uda'yaquë' lëbë' lë'ë yaga cruzo, na' bëxoyaquë' tu ben' lao Simón, ben' yedyi Cirene, ben' zeza' layela. Na' bëyaquë' mandado bi'anë' yaga cruzo zionë' nu'anë'n zioquë' zenaohuë' Jesús.

27 Na' yaca ben' zë gula zioyaquë' zenaoyaquë' leyaquë'. Lëscan' zenaonigula zë zioyaquë' rbediyiya'yaquë' raqueyaquë' beyëchi', dan' rusacayaquë' Jesús bizinaquezi.

28 Na' biži Jesús beyëchi'në' unë' rëbinë' leyaquë':

—Le'e nigula ciudad Jerusalén, bicuedyile por në'ëdi'. Yela'cala cuedyile por le'e len ži'ile.

29 Porque baza' dza gaca bayëchi' gula quiele. Na' tanto gaca bayëchi' quiele, bisule gusto chi zu ži'ile, bisule gusto chi nu'ale bdao', bisule gusto chi ruga'adyile xcuidi'.

30 Lëdza na' tanto idzebile bi gaca quiele, hueguilole ga ucachi'laole ga naca lë'ë ya'a.

31 Nia' le'e chi ruelëyaquë' yaga ya'a bizinaquezi, ¿bižira huelëyaquë' yaga bidyi?

32 Lëzi nequië'rëyaquë' chopa yaca ben' bë tamala ta gutiyaquë' leyaquë' tzaže len Jesús.

33 Na' cati bdyinyaquë' ga laona chita guicho ben' huati, lëgan' na' bda'yaquë' lëbë' lë'ë yaga cruzo. Lëzirë bda'rëyaquë' chopa yaca ben' bë tamala. Tunë' bda'yaquë' zaquë' yebë, na' itunë' bda'yaquë' zaquë' yega'.

34 Cati baruda'yaquë' Jesús lë'ë yaga cruzo unë' rëbinë' Diuzi:

—Xuza' Diuzi, beži'ze quieyaquë', dan' bineziyaquë' bi rueyaquë'.

Ude beyudyi na', bë yaca soldado tu sorteo entre leyaquë' ca nulayaquë' gaca quie zaba Jesús.

<sup>35</sup> Bizi yaca ben' nita' na', bega'nyaquë' rna'yaquë' lëbë'. Na' lente yaca ben' napa dyin rutituyaquë' lëbë' unayaquë' rëbiyaquë' laguedyiyaquë':

—Gualënë' ben' tula, gacalëgaranë' cuinnë' chi tali naquë' ben' Cristo, ben' use'ela' Diuzi.

<sup>36</sup> Lëscan' ptiturë yaca soldado lëbë'. Bebiga'yaquë' gan' dë'ë, rzi'yaquë' vino naca slä' ruyo'oyaquë' lëbë'.

<sup>37</sup> Unayaquë' rëbiyaquë' lëbë':

—Chi tali naco' rey quie ben' Israel, pte psela cuinlo'.

<sup>38</sup> Lë'ë yaga cruzo zaquë' ga zu guichoguë', bda'yaquë' tu yaga ta'a dyian letra griego, len letra latín, len letra hebreo. Lë'ë yaga ta'a rnan cani: “Ben' ni naquë' rey quie yaca ben' Israel.”

<sup>39</sup> Bizi tu ben' bë tamala, ben' da'rë cuëta lë'ënë' lë'ë yaga cruzo, ptiturënë' Jesús rëbinë' lëbë':

—Chi tali naco' ben' Cristo, pte psela cuinlo' len nëto'.

<sup>40</sup> Pero ben' itu laguedyinë' udilanë' lëbë' unë' rëbinë' lëbë':

—¿Nica rdzebo' Diuzi hora cati gatio'?

<sup>41</sup> Ca naca ra'lo de dula' xquia quiero, na'a redzagalaoro barguizoro ca naca tamala bëro. Ta reya'ala'cazi gata' castigo quiero, pero ben' niga redzagalaonë', den' bibi tamala de bënë'.

<sup>42</sup> Na'ra unë' gudyinë' Jesús:

—Jesús, cati bazulo' gan' inabë'lo', yeza'la'adyo' quia' në'ëdi'.

<sup>43</sup> Na' una Jesús rëbinë' lëbë':

—Tali rnia' luë', na'a dza bazulo' len në'ëdi' guibá gan' zu Diuzi.

### *Ca guca guti Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Biži cati baruen cadu gatzo dza, bechula lao duže ciudad na' hasta reda tzona quie sadze'.

<sup>45</sup> Bechula lao ubidza. Caora na' bre'eza la'ari' zë gatzo lao' idao' r nabë'ra gucan chopa la'a.

<sup>46</sup> Na'ra uredyiya' Jesús unë' rëbinë' Diuzi:

—Xuzä' Diuzi, ruca'na' bichi be quia' lao na'alo'.

Ude beyudyi unë' cana', gutinë'.

<sup>47</sup> Biži ben' naca capitán quie yaca soldado romano, cati bablë'ënë' can' guca quie Jesús, bënë' Diuzi ben' ze unë':

—Tali ben' niga naquë' ben' huen, bibi tamala bënë'.

<sup>48</sup> Na' biži yaca ben' bida blë'ë yaca can' guca quie Jesús, zeyoyaquë' zan yu'u r bibiyaquë' ru'achu'uyaquë', dan' raqueyaquë' beyëchi' cabë' bëyaquë' quie Jesús.

<sup>49</sup> Pero yaca ben' unao Jesús, lenrë yaca nigula unao lëbë' desde dza uza'në' estado Galilea, bega'nyaquë' nita'yaquë' zitu'la rna'yaquë' can' guca quienë'.

### *Pcachi'yaquë' Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Lëgan' na' uzurë tu ben' dya'a, ben' rue quie xti'idza' Diuzi laonë' José. Naquë' ben' yedyi lao Arimatea quie estado Judea. Napë' dyin, naquë' ben' r nabë' quie yaca ben' Israel.

<sup>51</sup> Lëben' lao José rbezë' dza guida ben' ise'ela' Diuzi ta inabë'në' lao yedyi layu. Bibënë' tuzi cabë' bë yaca los demás ben' naparë dyin.

<sup>52</sup> Na'ra uyonë' yenabanë' lao Pilato chi bihue'në' lato ta yechisanë' cuerpo quie Jesús.

<sup>53</sup> Na' ude bechisanë' cuerpo quie Jesús lë'ë yaga cruzo, betubinë' lëbë' la'ari', bdze'në' lëbë' tu lu'u yero beló yo ta zapqui'inyaquë', nitu nunu ndze'yaquë' gan'.

<sup>54</sup> Lëdza na' nacan dza vierna cati rucuezayaquë' ta gaoyaquë' quie dza huezila'adyi'. Baodze' bagazi sulao dza huezila'adyi'.

<sup>55</sup> Na' yaca nigula unao Jesús desde dza uza'në' estado Galilea, uyoyaquë' yena'yaquë' gan' bdze'yaquë' cuerpo quienë'.

<sup>56</sup> Ude beyudyi na', beza'yaquë' zeyoyaquë' zan yu'u quieyaquë' bapcuezayaquë' aceite rla' zixi zeo len güento ta ilëpiyaquë' cuerpo quie Jesús. Ude beyudyi bëyaquë' can', bezila'adyi'yaquë' según ca rnan lë'ë guichi la'ia quie Diuzi.

## 24

### *Ga ru'en di'idza' cabë' guca cati beban Jesús (Mt. 28.1-10; Mr. 16.1-8; Jn. 20.1-10)*

<sup>1</sup> Na' bala baza' reni' dza domingo, zio yaca nigula gan' de yero beló yo gan' pcachi'yaquë' Jesús. Nu'ayaquë' aceite rla' zixi zeo ta pcuezayaquë'.

<sup>2</sup> Bizi bë' bdyinyaquë' gan', rna'yaquë' baneyalo ru'a yero beló yo. Bira da' yo laga' ru'a yero gan' bda'yaquë'n.

<sup>3</sup> Na'ra uyu'uyaquë' yero beló yo rna'yaquë' bira de cuerpo quie Señor Jesús gan'.

<sup>4</sup> Lega bega'nyaquë' bdzebiyaquë'. Bira biubinyaquë' bi hueyaquë'. Caora na' blë'ëyaquë' bazë' chopo be'mbyu zaquë' laoyaquë' nacoyaquë' la'ari' bezëri di ta raca titi'.

<sup>5</sup> Na' bizi bezëta' laoyaquë' layu, lega bdzebiyaquë'. Na' una yaca be'mbyu rëbiyaquë' leyaquë':

—¿Bixquien' rdale regulole tu ben' naban gan' rucachi'yaquë' ben' huati?

<sup>6</sup> Bira denë' niga. Babebannë' zunë' tatula. Uleza'la'adyi' can' unë' le'e cati nezulënë' le'e estado Galilea.

<sup>7</sup> Lëdza na' unë' gudyinë' le'e decazide usedyin yaca benë' lëbë' lao na'a yaca ben' rnabë', na' uda'yaquë' lëbë' lë'ë yaga cruzo, pero bë' gaca lao tzona dza, huebannë' tatula lëbë', ben' bichi yugulu benë'.

<sup>8</sup> Lëcana' beza'la'adyi'yaquë' ca una Jesús gudyinë' leyaquë'.

<sup>9</sup> Ude beyudyi na', beroyaquë' lu'u yero beló yo beza'yaquë' zioyaquë' uidxogue'yaquë' lao chiptu yaca ben' quie Jesús, len yaca los demás ben' nao xneza Jesús can' guca quieyaquë'.

<sup>10</sup> Na' lëyaca nigula, ben' uyo yetixogue' yaca ben' quie Jesús, tuë' laohuë' María Magdalena, ituë' laohuë' Juana, ituë' laohuë' María, naquë' zna' Santiago. Lëscan' uyorë yaca nigula naca laguedyiyaquë'.

<sup>11</sup> Na' bizi yaca ben' quie Jesús guqueyaquë' calëla can' gudyi yaca nigula leyaquë'. Biguleyaquë' quieyaquë'.

<sup>12</sup> Den' uyocazi Pedro uyu'unë' be zionë' taria gan' de yero beló yo. Na' bë' una'në' lu'u yero beló yo, blë'enë' la'ari' ta ptubiyaquë' cuerpo quie Jesús, bega'nnan re'nann cuinzin. Na'ra tu bebanzinë' can' blë'enë' beza'në' zeyoguë' zan yu'u quienë'.

### *Neza zio Emaús ptilalao Jesús chopo ben' unao lëbë' (Mr. 16.12-13)*

13 Lédza na'atezi, beza' chopa yaca ben' unao xneza Jesús ciudad Jerusalén, zeyoyaquë' yedyi quieyaquë' laona Emaús. Na' ciudad Jerusalén para yedyi quieyaquë' nacan tzona lëgua.

14 Zioyaquë' ru'eyaquë' di'idza' ca bē yaca ben' ciudad Jerusalén psacayaquë' Jesús.

15 Biži tu rza'yaquë' zioyaquë' ru'eyaquë' di'idza', cati ubiga' cuin Jesús cuëta leyaquë' baziolënë' leyaquë' tzaže.

16 Pero ba'ala'cazi blë'ëyaquë' lëbë', bibezaqueyaquë' chi lëbë'.

17 Na'ra una Jesús rëbinë' leyaquë':

—¿Biži guca rnële yu'ule neza? ¿Bixquien' raqueyëchi'le?

18 Na' tu ben' ziolë laguedyi laonë' Cleofas unënë' rëbinë' Jesús:

—Banezi yugulu benë' can' guca ciudad Jerusalén nionasigazi. ¿Cala zurao' luë' ciudad Jerusalén, na' biunezo' bin' guca?

19 Na'ra unaba Jesús leyaquë':

—¿Cabizi guca gan'?

Na' unayaquë' rëbiyaquë' lëbë':

—Guca tu tamala gula quie tu ben' lao Jesús, ben' yedyi Nazaret. Guquë' ben' udixogue' xti'idza' Diuzi. Bënë' yela' huaca, psëdinë' yaca benë' di'idza' dya'a. Yaxe Diuzi len yaca benë' can' bënë'.

20 Pero yaca xan' pxuzi, len yaca los demás ben' napa dyin quiero, psedyinoquë' lëbë' lao na'a ben' bda' lëbë' lë'ë yaga cruzo bëtiyaquë' lëbë'.

21 Pero nëto' guquendo' naquë' ben' use'ela' Diuzi ta ute uselanë' ra'o ben' Israel cuenda bira inabë' yaca ben' naca gobierno romano ra'o. Na' biži azio lao tzona dza bëtiyaquë' lëbë'.

22 Pero na'a zila, bala yaca nigula nacalëndo' tuzi unaondo' lëbë', uyoyaquë' lu'u beló yo gan' pcachi'yaquë' lëbë'. Na' bega'nndo' rebanendo' ca gudyiyaquë' nëto' blë'ëyaquë' gan'.

23 Bela'yaquë' udixogue'yaquë' nëto' bide cuerpo quienë' lu'u yero beló yo gan' pcachi'yaquë' lëbë'. Unayaquë' blë'ëyaquë' chopa ben' naca ángel, ben' una babeban Jesús zunë' tatula.

24 Lëzirë ibala be'mbyu laguedyindo', ben' unao lëbë', uyoyaquë' uyu'uyaquë' lu'u yero beló yo, na' blë'ëyaquë' nacan tali can' una yaca nigula, pero na' biblë'ëyaquë' Jesús.

25 Na'ra una Jesús rëbinë' leyaquë':

—Taže nerdzioguele tzioñë'elë cabë' na xti'idza' Diuzi. Lega ruen zëdi quiele galele yugulu cabë' una yaca ben' udixogue' xti'idza' Diuzi dza na'la.

26 ¿Biži binezile rnan lë'ë guichi la'iya quie Diuzi yedzagalao ben' ise'ela' Diuzi gatinë', te na' yebannë' tatula hue Diuzi lëbë' ben' zera? —Cana' una Jesús rëbinë' leyaquë'.

27 Na'ra uzulaonë' ruxi'idze'në' leyaquë' ca na di'idza' la'iya quie Diuzi gan' rguixogue'n quie ben' ise'ela' Diuzi. Conlë di'idza' bzu Moisés lë'ë guichi uzulaonë' ruxi'idze'në' leyaquë', bzalaorë' unarë' mazara hasta gan' bzu yaca profeta di'idza' lë'ë guichi.

28 Bë' bdyinyaquë' yedyi gan' zioyaquë', labëtenë' badyinzi ta së'ë tzu'unë' neza tatula.

29 Pero leyaquë' bdyiabë'yaquë' quienë' ta yega'nnë' len leyaquë'. Lena' unayaquë' rëbiyaquë' lëbë':

—Bega'nlë nëto' niga. Baza' rchula bahuen rtze'.

Na'ra bega'nnë' len leyaquë' gan'.

30 Caora baore'lënë' leyaquë' lao mesa ta gaoyaquë' rtze', na' uzi'në' tu yëta xtila unë' rëbinë' Diuzi diuxcalelo'. Beyudyi na', bzožoguë'n bë'në'n leyaquë'.

<sup>31</sup> Lëcana' beyeni' laoyaquë' bezaqueyaquë' lëbë'. Na' bizi lëbë' tu beyulaz-inë', bira blë'ëyaquë' lëbë'.

<sup>32</sup> Na'ra unayaquë' bë'yaquë' di'idza' lao rupayaquë' unëyaquë':

—¿Cala tali na' bedaohue guicho laxta'oro caora za'lënë' ra'ou tu neza ruxi'idze'në' ra'ou quie di'idza' tu lë'ë guichi la'iya quie Diuzi?

<sup>33</sup> Na'ra labeyu'uteyaquë' neza tatula, zioyaquë' ciudad Jerusalén gan' yetilayaquë' nita' yaca chiptu ben' quie Jesús, len yaca los demás ben' unao lëbë'.

<sup>34</sup> Na' una yaca ben' bgu'udi' gan', rëbiyaquë' ben' zabdyin:

—Nacan tali babeban Señor quiero. Bablë'ë Simón lëbë'.

<sup>35</sup> Na' unayaquë' rëbiyaquë' leyaquë' can' guca quieyaquë' tu neza bë'lëyaquë' Jesús di'idza', pero bibezaqueyaquë' chi lëbë' hasta bžozonë' yëta xtila bë'në'n leyaquë'.

*Ptilalao Jesús yaca ben' quienë'*

*(Mt. 28.16-20; Mr. 16.14-18; Jn. 20.19-23)*

<sup>36</sup> Bizi nenita'teyaquë' neru'eyaquë' di'idza' cati bdyin Jesús yësazi bazënë' ladoyaquë' blidzanë' leyaquë'unë':

—Cue' chizi laxta'ole.

<sup>37</sup> Pero lega bdzebiyaquë' guqueyaquë' blë'ëyaquë' ludza' ben' huati.

<sup>38</sup> Lena' una Jesús rëbinë' leyaquë':

—¿Bixquien' rdzebile? ¿Bixquien' raquele cala në'ëdi'?

<sup>39</sup> Ulena'cara na'a len ni'a, në'ëdi'cazi. Neya'a në'ëdi' naca' benë', binaca' ludza' ben' huati. Tu ludza' ben' huati binacan bë'ëla', biyu'un chita can' rlë'ële naca'.

<sup>40</sup> Tu ru'elënë' leyaquë' di'idza', blu'enë' leyaquë' në'ë len ni'anë'.

<sup>41</sup> Pero como dan' binegaleyaquë' chi lëbë', bega'nyaquë' rebaneyaquë' redaohueyaquë', unë' rëbinë' leyaquë':

—¿Bide lë'ëti' quiele gunle lë'ëti' gaohua'?

<sup>42</sup> Na'ra bë'yaquë' lëbë' tu naga bela banegüechi len tu yëta quie bezo yudzu bdyin'dao'.

<sup>43</sup> Na'ra uzi'në'n udaonë'n zaquë'lao leyaquë'.

<sup>44</sup> Na' unë' rëbinë' leyaquë':

—Baguca quia' cabë' can' baonia' le'e gaca quia' dza na'la, dza cati nezulia' le'e. Agudya' le'e decazide uzun yugulu di'idza' can' rnan quia' në'ëdi' lë'ë guichi bë Moisés, len guichi bë yaca profeta, len guichi Salmos.

<sup>45</sup> Na'ra pxi'idze'në' leyaquë' can' na lë'ë guichi la'iya quie Diuzi.

<sup>46</sup> Lena' unë' rëbinë' leyaquë':

—Cani rnën lë'ë guichi la'iya quie Diuzi. Rnan decazide gati ben' ise'ela' Diuzi lao yedyi layu. Te beyudyi na', yebannë' tatula gaca lao tzona dza.

<sup>47</sup> Lëscan' rnan lë'ë guichi la'iya quie Diuzi ruen dyaibë' tziyo yaca ben' quienë' tzetixogue'yaquë' yaca ben' nita' lao duže yedyi layu de que reya'ala' yezt'yaquë' pensari quieyaquë' inoayaquë' në'ëdi' cuenda yezi'ze Diuzi dula' xquia quieyaquë'. Ciudad Jerusalén reya'ala' sulaoyaquë' quixogue'yaquë', na'tera tziyoa'quë' yedyi tula.

<sup>48</sup> Le'e nacale testigo quia' blë'ële baguca quia' can' rnan lë'ë guichi la'iya quie Diuzi.

<sup>49</sup> Na' ise'ela' Bichi Be quie Diuzi ta tzu'unë' lu'u guicho laxta'ole can' una Xuza' huenë' quiele. Quie lena' cuezale niga ciudad Jerusalén hasta que chezi Bichi Be quie Diuzi tzu'unë' lu'u guicho laxta'ole cuenda gata' yela' huaca quiele. —Cana' una Jesús gudyinë' leyaquë'.

*Beyëpi Jesús zeyonë' guibá**(Mr. 16.19-20)*

<sup>50</sup> Biži na' uquië' Jesús leyaquë' broyaquë' lao ciudad Jerusalén uza'yaquë' bdyinyaquë' yedyi Betania. Ude beyudyi na', uchisanë' në'ë bëla'iyänë' leyaquë'.

<sup>51</sup> Bë' beyudyi bëla'iyänë' leyaquë', na' beyëpinë' ladza yeyonë' guibá.

<sup>52</sup> Na' uyonla'adyi'yaquë' lëbë' gan'. Ude beyudyi na', beza'yaquë' zeyoy-aquë' ciudad Jerusalén tatula. Na' lega redaohueyaquë',

<sup>53</sup> riocaziyaquë' yugu dza lu'u idao' r nabë'ra rulidzayaquë' rueyaquë' Diuzi ben' ze. Amén.

## DI'IDZA' LA'IYA BZU SAN JUAN LÈ'È GUICHI

*Ben' naca xti'idza' Diuzi guquë' be'mbyu*

<sup>1</sup> Caora binecue' lao yedyi layu, bazucazi tu ben' naca xti'idza' Diuzi. Lëben' na' zulënë' Diuzi tuže, lëscan' naquë' Diuzi.

<sup>2</sup> Desde aodixu Diuzi yedyi layu, bazulanë' nacalënë' Diuzi tzaže.

<sup>3</sup> Conlë lëbë' bë Diuzi yugulu ta de lao yedyi layu. Ni tu ta bë Diuzi bibënnë'n sin lëbë'.

<sup>4</sup> Por lëbë' de yela' neban quiero. Naquë' ca quie tu gui' ta useni'n ulu'en nnezaro ga rdaro.

<sup>5</sup> Lëgui' na' rseni'n quie yaca ben' rda lao lato lao chula. Nitu nitu nunu saque' usula len.

<sup>6</sup> Uzu tu ben' lao Juan, ben' use'ela' Diuzi.

<sup>7</sup> Bidë' udixogue'në' benë' unë' huida tu ben' naca ca quie gui' rseni'n ga naca chula. Lëcana' guca Juan testigo de que huida ben' naca ca quie gui' rseni'n ga naca chula.

<sup>8</sup> Juan binaquë' ben' zaza', ben' naca ca gui' rseni'n ga naca chula. Nacazë' tu testigo ta use'ela' Diuzi ta quixogue'në' quie ben' zaza', ben' naca ca quie gui' rseni'n ga naca chula.

<sup>9</sup> Na'ra babidacazi ben' naca ca quie gui' rseni'n ga naca chula, ben' ru'e di'idza' li, ben' ruzioñe'e yaca ben' nita' lao yedyi layu.

<sup>10</sup> Bidanë' lao yedyi layu. Udixogue'në' benë' di'idza' la'iya quie Diuzi. Ba'ala'cazi conlë lëbë' bë Diuzi yugulu ta de lao yedyi layu, bibezaque yaca benë' chi lëbë'.

<sup>11</sup> Lëbë' uzunë' lao yedyi quienë', na' biži yaca ben' lao yedyi quienë', biuyezila'adyi'yaquë' lëbë'.

<sup>12</sup> Pero con bala ben' uyezila'adyi' lëbë', lëben' na' bë'në' derecho gacayaquë' ži'i Diuzi.

<sup>13</sup> Pero netza' quie yaca ben' gaca ži'i Diuzi, porque cala mandado quie benë' gacajë' ži'i Diuzi, cala dan' golojë' nita'jë' lao yedyi layu gacajë' ži'i Diuzi, dechan' Diuzicazi bë cana' gacajë' ži'i Diuzi.

<sup>14</sup> Ben' naca xti'idza' Diuzi guquë' tu be'mbyu. Uzunë' lado ra'o tu chi'. Blë'ëndo' yela' huaca quienë', blë'ëndo' tuzi lëbë' naquë' ži'i Diuzi, ben' nedyë'ë ra'o, ben' ru'e di'idza' li.

<sup>15</sup> Unë Juan udixogue'në' quie ben' na' unë':

—Quie ben' na' unia' caora nia' ben' zaza'ra zenao në'ëdi', nacarë' ben' ze ca në'ëdi' como bazulanë' caora uzua' në'ëdi'. —Cana' una Juan.

<sup>16</sup> Yela' ben' huen quienë' taže na' bënë' quiero bëla'iyane' ra'o yuguluro.

<sup>17</sup> Lao na'a Moisés pca'n Diuzi ley quienë'. Pero lao na'a Cristo neziro nedyë'ë Diuzi ra'o, nezuro ca naca tabala quie Diuzi.

<sup>18</sup> Nitu nitu nunu nuebë' Diuzi. Tuzi ži'inë', ben' dugalo nacalë Diuzi tuže, lënë' ruzioñe'lenë' ra'o ta huebë'ro Diuzi.

*Uzë Juan cule quie Jesucristo*

*(Mt. 3.11-12; Mr. 1.7-8; Lc. 3.15-17)*

<sup>19</sup> Yaca ben' Israel, yaca ben' nita' ciudad Jerusalën, use'ela'yaquë' yaca pxuzi len yaca ben' naca familia quie Leví ta yenabayaquë' Juan chi naquë' ben' Cristo.

<sup>20</sup> Biži dyë'ëdi unë':

—Cala në'ëdi' ben' Cristo.



21 Na'ra tatula unayaquë' rëbiyaquë' lëbë':

—¿Nuži naco' luë' chi'? ¿Naco' ben' profeta, o chi naco' ben' lao Elías?

Na' biži una Juan rëbinë' leyaquë':

—Cala Elías në'ëdi'.

Pero tatula unayaquë' rëbiyaquë' Juan:

—¿Naco' ben' profeta, ben' zaza'ra?

Na'ra bequëbinë' unanë':

—Cala në'ëdi'.

22 Biži tatula rëbiyaquë' lëbë':

—¿Nuži naco' luë' chi'? Deyeyu'ando' tu di'idza' quio' ta inezi yaca ben' use'ela' nëto'. ¿Cabiži inao'? ¿Nuži naco' luë'?

23 Na'ra una Juan rëbinë' leyaquë':

—Naca' tu ben' rnë zidzo lao lato ga bidyia yu'u. Nia' can' con ca baona profeta Isaías, ben' uzu dza na'te, nia': “Usalole tu neza li, dan' baza' xa'nro, ben' use'ela' Diuzi.”

24 Na' biži yaca ben' uyo yegue'lë Juan di'idza', nacayaquë' ben' use'ela' yaca ben' partido fariseo.

25 Na'ra unayaquë' rëbiyaquë' lëbë':

—Chi binaco' ben' Cristo, ni Elías, ni ben' profeta, ¿na'a bixquien' ru'elo' lao yaca benë'?

26 Na'ra una Juan rëbinë' leyaquë':

—Tali ru'a lao yaca benë' con nisa, pero entre ladole huida tu ben' binubë'le.

27 Zaza'rë' zenaohuë' në'ëdi'. Tanto naquë' ben' zera ca në'ëdi', ni lë'ëti' bibi zaca' ni siquiera biyeyazoga' cuioga' guidi yu'u ni'anë'. —Cana' una Juan.

28 Lëcana' uzacayaquë' lao lato yaona Betábara, ga rega'nnan ga'ala' ga de yao Jordán, con gan' bë' Juan lao yaca benë'.

### *Jesucristo, ben' naca ca beco' zi'ila', bia naca gun quie Diuzi*

29 Biži beteyu blë'ë Juan baza' Jesús ga'ala'. Na' unë' rëbinë' yaca ben' nita' na':

—Ulena', lëben' ni naquë' ca beco' zi'ila', bia naca gun quie Diuzi. Lë'lëbë' cubë' dula' xquia quie yaca benë' nita' lao yedyi layu.

30 Quie ben' niga unia' caora nia': “Ben' zaza'ra zenaon në'ëdi', nacarë' ben' ze ca në'ëdi', como dan' bazulanë' caora uzua' në'ëdi'.”

31 Biži në'ëdi' biunezda' nu naquë', pero za' ru'a lao yaca ben' Israel con nisa tacuenda ineziyaquë' nu naquë'.

32 Lëzi unarë Juan:

—Blë'ëda' uyezi Bichi Be quie Diuzi, za'në' guibá ca uyezi biu, yasënë' ga zë Jesús.

33 Biži në'ëdi' biunezda' nu naquë'. Pero ben' use'ela' në'ëdi' ta za' ru'a lao yaca benë' unë' rëbinë' në'ëdi': “Cati ilë'ëlo' Bichi Be quia' chezinë' tzasënë' ga zë tu be'mbyu, lëben' na' udze'në' Bichi Be quie Diuzi lu'lu' laxta'o yaca benë'.”

34 Blë'ëda' guca quie ben' ni con ca una Diuzi. Quie lena' naca' testigo lë'lëbë' naquë' zi'i Diuzi.

### *Udilo Jesús yaca ben' inao lëbë'*

35 Biži beteyu tula, zë Juan len chopa yaca ben' nao lëbë'.

36 Cati blë'ënë' ude Jesús gan' zënë' unë':

—Ulena', lëben' ni naquë' ca beco' zi'ila', bia naca gun quie Diuzi.

37 Lao rupate yaca ben' zio nao Juan, beyaquë' ca una Juan. Na'ra zioyaquë' unaoyaquë' Jesús.

38 Na'ra beyëcho Jesús una'në' xcu'udzunë' blë'ënë' zio yaca benë' zenao lëbë'. Na' unë' rëbinë' leyaquë':

—¿Cabizi rguilole?

Na'ra unëyaquë' rëbiyaquë' lëbë':

—Maestro, ¿gaži idyinlo'?

39 Na'ra una Jesús:

—Uleda, hualë'ële gan' idyina'. Na'ra uzi'yaquë' ziolëyaquë' lëbë' blë'ëyaquë' gan' bdyinnë'. Lëgan' na' bega'nlëyaquë' lëbë' dan' uyë'ënë' dza, baruen cadu reda tapa quie zadze'.

40 Biži lado chopa ben' be ca una Juan unaoyaquë' Jesús, zu tunë' laohuë' Andrés, bi' bichi Simón Pedro.

41 Cana' laoyote Andrés yedilonë' ga zu bichinë' Simón, na' gudyinë' lënë':

—Abedilando' ben' use'ela' Diuzi, ben' naca Cristo.

42 Na'ra uquië' Andrés bi' bichinë' Simón gan' zë Jesús. Biži caora blë'ë Jesús Andrés len Simón, unë' rëbinë' Simón:

—Luë' Simón, ži'i Jonás, ixuba' laolo' Cefas, ta inaro: Pedro.

### *Ulio Jesús Felipe len Natanael, gucajé' ben' nao lëbë'*

43 Lëzirë beteyu tula, Jesús uži'në' zionë' Galilea. Lëgan' na' bedilanë' Felipe, na' gudyinë' lëbë':

—Unao në'ëdi' gaco' ben' quia' —unë' rëbinë' lëbë'.

44 Na'ra ben' yedyi Betsaida naca Felipe. Lëlao yedyi na' zurë Andrés len Pedro.

45 Biži Felipe bedilanë' Natanael në' rëbinë' lëbë':

—Bedilando' tu ben' rnën quie lë'ë guichi bë Moisés, len yaca guichi bë yaca ben' profeta. Lëben' na' laohuë' Jesús, ži'i José, ben' yedyi Nazaret.

46 Na'ra una Natanael rëbinë' Felipe:

—¿Cabizi tu tahuen ero lao yedyi Nazaret?

Na'ra bequëbi Felipe:

—Uda, ilë'ëlo'.

47 Caora blë'ë Jesús baza' Natanael, na'ra unë Jesús cani:

—Baza' tu ben' naca dugalo ben' Israel, ben' birzi' yë'.

48 Biži Natanael unë' rëbinë' Jesús:

—¿Cómo nubë'lo' në'ëdi'?

Na'ra una Jesús rëbinë' lëbë':

—Bala blë'ëda' luë' ga re'lo' žan yaga higo tu binequixogue' Felipe luë'.

49 Na'ra una Natanael rëbinë' Jesús:

—Maestro, luë' naco' ži'i Diuzi, ben' za' inabë' yaca ben' Israel.

50 Biži una Jesús rëbinë' Natanael:

—¿Bagulelo' dan' nia' blë'ëda' luë' ga re'lo'?

51 Lëži unarë Jesús rëbinë' leyaquë':

—Tali rnia' le'e, naca' bichi yugulu benë', na' hualë'ële tzalo guibá chezi yeyëpi yaca ángel idyinjë' gan zua' lao yedyi layu.

## 2

### *Yedyi Caná ga nebaba Galilea bëyaquë' huetzagana'*

1 Guca lao tzona dza, na' guca huetzagana' yedyi Caná quie estado Galilea. Biži yedyi na' zurë žna' Jesús, blë'ënë' caora na'.

2 Biži gan' guca huetzagana', bërëjë' Jesús invitar len yaca ben' quienë'.

3 Biži na' guca bebidiyino nisa bedzuli' ta ri'oyaquë'. Na'ra una žna' Jesús rëbinë' lëbë':

—Babebidiyi vino, gabira yudzon.

<sup>4</sup> Na'ra una Jesús rëbinë' znë'ë:

—Zna'a, ¿bixquien' nao' në'ëdi' cana'? Binedyin hora ulu'ena' benë' yela' huaca quia'.

<sup>5</sup> Na' bizi unë' znë'ë rëbinë' yaca ben' ru'e laze:

—Ulehue yugulu con ta ruebi' le'e mandado huele —në' rëbinë'yaquë'.

<sup>6</sup> Bizi gan' nita'yaquë' na', nita'rë xopa yeso' yela de yo. Ca biu' benëbi quie yaca ben' Israel, lëyeso' na' nacan ta yudzon nisa ta rguibiyaquë' cuinyaquë' lente ta de quieyaquë'. Lao tu huiona yudzon cadu gatzo gayuhua litro o cadu tzona galo chí litro nisa.

<sup>7</sup> Na'ra una Jesús rëbinë' yaca ben' ru'e laze:

—Usedza'le yeso' na' nisa.

<sup>8</sup> Caora bedza' lao xopa yeso', na' una Jesús rëbinë' yaca ben' ru'e laze:

—Ulecuion, ulehue' ben' naca xan' lani.

Bizi laoda'teyaquë'n yehua'ayaquë'n bë'yaquë'n ben' xan' lani.

<sup>9</sup> Bizi ben' naca xan' lani, byubinë' nisa babeyacan vinola, pero binezinë' ga za'n. Tuzi yaca ben' ru'e laze baneziyaquë' ga za'n. Cana' guca guzi ben' naca xan' lani bi' utzagana'

<sup>10</sup> unë' rëbinë'bi':

—Yaca benë' rue nu lani ru'ecaziyaquë' tanëro vino naca dya'a. Caora ri'o yaca ben' rida lani ta zila, na' ru'eyaquë' vino sisa. Na' bizi luë', pca'nlo' vino dya'a hasta na'tera baoliolo'n barequisio'n —në' rëbinë' bi'byu.

<sup>11</sup> Cana' naca milagro nëro bë Jesús yedyi Caná quie estado Galilea, ga uzulaonë' blu'enë' yela' huaca quienë'. Dan' bënë' cana', lëcana' gule yaca ben' zio nao lëbë'.

<sup>12</sup> Ude beyudyi na', uzë'ë ziolënë' znë'ë, len bichinë', len yaca ben' quienë' yedyi lao Capernaum. Lëgan' na' bega'nyaquë' baba dza.

### *Blaos Jesús yaca ben' yu'u huëti' lu'u idao' rñabë'ra*

(Mt. 21.12-13; Mr. 11.15-18; Lc. 19.45-46)

<sup>13</sup> Dan' bazu bago ga'ala' lani pascua ta reza'la'adyi'yaquë' ca guca bro xuzixta'oyaquë' nación Egipto, lëcana' uza' Jesús bdyinnë' ciudad Jerusalén.

<sup>14</sup> Ca bdyinnë' lali'a quie idao' rñabë'ra ciudad Jerusalén, na' blë'ënë' nita' yaca ben' ruti' huaga, len ben' ruti' beco' zi'ila', len ben' ruti' biu. Lëscan' blë'ënë' yaca ben' rutza' dumi.

<sup>15</sup> Bizi cati blë'ë Jesús ca rue yaca ben' yu'u huëti' lali'a idao' rñabë'ra, na' uzi'guë' tu guidi udinë' blaonë' yaca ben' yu'u ruti' lente huaga lente beco' zi'ila' quieyaquë'. Na' quie ben' retza' dumi, uru'unnë' mesa quieyaquë' layu, gusi dumi layu.

<sup>16</sup> Na'ra gudyinë' yaca ben' ruti' biu rëbinë' leyaquë':

—¡Ulecuba yugulu ta de niga! ¡Bihuele yu'u quie ye'eya yu'u quie Xuza'!

<sup>17</sup> Cana' beza'la'adyi' yaca ben' quië' can' rñën lë'ë guichi la'iya quie Diuzi cani: “Tanto rdëbida' quie yu'u quío', raqueda' bayëchi' ca tamala rue yaca benë' quien.”

<sup>18</sup> Na'ra una yaca ben' Israel rëbiyaquë' Jesús:

—Blu'e nëto' tu seña ta inezindo' de yela' rñabë' quío' dan' blaolo' yaca ben' yu'u huëti' lali'a idao'.

<sup>19</sup> Na'ra una Jesús rëbinë' leyaquë':

—Chi le'e udyiaguil'le idao' rñabë'ra niga, në'ëdi' yechiza' tu tacubi gaca lao tzona dza.

<sup>20</sup> Bizi una yaca ben' Israel rëbiyaquë' lëbë':

—Yaca ben' bë idao' rnabë'ra niga, bëyaquë'n lao chopa galo xopa iza, ¿na' como luë' nao' gaca lao tzona dza yechizalo' tu tacubi? —Cana' unayaquë' rëbiyaquë' Jesús.

<sup>21</sup> Pero caora unë Jesús cana', cala quie idao' na' unënë', quie cuinzinë' unënë'.

<sup>22</sup> Bizi caora guti Jesús bebannë' tatula, caora na' lëlena' beza'la'adyi' yaca ben' unao lëbë' con ca unë'. Lëlena' guleyaquë' ca rnën lë'ë guichi la'iya quie Diuzi lente ca una Jesús gudyinë' leyaquë'.

### *Nezi Jesús bi pensari yu'u lu'u guicho laxta'o benë'*

<sup>23</sup> Caora uzu Jesús ciudad Jerusalén, caora na' guca lani pascua. Lëcana' yaca ben' zë guleyaquë' quienë' dan' blë'ëyaquë' yela' huaca quienë'.

<sup>24</sup> Bizi Jesús gucabë'në' biguleyaquë' dula'adyi'yaquë', dan' nezinë' bi pensari yu'u lu'u guicho laxta'o yaca benë'.

<sup>25</sup> Lëlena' birnaban nu yëbi Jesús bi pensari yu'u lu'u guicho laxta'o yaca benë'.

## 3

### *Nicodemo ru'elënë' Jesús di'idza'*

<sup>1</sup> Uzu tu ben' partido fariseo laonë' Nicodemo. Naquë' ben' rnabë' quie yaca ben' Israel.

<sup>2</sup> Bizi Nicodemo uyonë' rdze' ga zu Jesús rëbinë' lëbë':

—Maestro, banezindo' luë' naco' ben' use'ela' Diuzi ta uzioñe'elo' nëto', dan' nitu nitu nunu nehue yela' huaca ca ruelo' luë' chi Diuzi bizulënë' luë' tzaže.

<sup>3</sup> Na'ra una Jesús rëbinë' lëbë':

—Tali ca rnia' luë', chi nu ben' bigalo taorupe, bisaque' yedyinnë' guibá ga rnabë' Diuzi.

<sup>4</sup> Bizi Nicodemo unë' rëbinë' Jesús:

—¿Bizi hue tu ben' gula galonë' taorupe? ¿Huazaque' yeyu'unë' lu'u lë'ë znë'ë ta galonë' taorupe?

<sup>5</sup> Na'ra una Jesús rëbinë' lëbë':

—Chi nu ben' biralo conlë nisa, na'tera lëscan' conlë Bichi Be quie Diuzi, bisaque' yedyinnë' guibá ga rnabë' Diuzi.

<sup>6</sup> Nu ben' rzu de zi'i be'mbyu, nacacazë' be'mbyu. Pero nu ben' rzu de Bichi Be quie Diuzi, nacacazë' ben' yu'u Bichi Be quie Diuzi lu'u laxta'ohue.

<sup>7</sup> Biyebanelo' con can' rnia' luë': “Rnaban galo benë' taorupe.”

<sup>8</sup> Cabë' quie be, rdanan ni, rdanan na', rero xchi'nán, pero na' bineziro gala' za'n, gala' zion. Lëcana' nacarë quie yaca ben' ralo lao na'a Bichi Be quie Diuzi.

<sup>9</sup> Na'ra na Nicodemo rëbinë' Jesús:

—¿Cabizi gaca ca unao'?

<sup>10</sup> Bizi Jesús në' rëbinë' lëbë':

—Naco' tu maestro quie ben' Israel, ¿cómo binezo' con ca baonia' luë'?

<sup>11</sup> Tali ca rnia' luë', ca ta nezindo' baonando' nacando' testigo ca ta blë'ëndo', pero na' le'e biralele cabë' baonando'.

<sup>12</sup> Chi binezile ca naca baonia' le'e bi raca lao yedyi layu, ¿cabizi huele para inezile ta inia' le'e bi raca guibá?

<sup>13</sup> Nitu nunu uyo guibá yedyin quixogue' benë' bi raca guibá. Tuza' në'ëdi', bichi yugulu benë', idetixogue'na' benë' bi raca guibá.

14 Cabë' bē Moisés bëguë' tu bëla de bronce, bda'guë'ba' lë'ë yaga sibi, lëcana' gacarë quia' nē'ëdi', bichi yugulu benë', uda'rë benë' nē'ëdi' lë'ë yaga cruzo.

15 Cana' gaca quia' tacuenda gata' yela' neban tuzioli quie nu ben' gale quia'.

### *Ni nan ca nedyë'ë Diuzi ra'o*

16 Bi'zi tanto nedyë'ë Diuzi yaca benë' nita' lao yedyi layu, use'elë' tu litza' ži'inë' tacuenda nutezi ben' nao xnezë', bicuiagui'yaquë', den' gata' yela' neban quiejë' tuzioli.

17 Cala use'ela' Diuzi ži'inë' lao yedyi layu ta huenë' castigo quie yaca benë', den' use'ela' Diuzi lëbë' ta ute uselanë' leyaquë' hue'në' yela' neban quiejë' tuzioli.

18 Nu yaca ben' nao xneza ži'i Diuzi, bihue Diuzi castigo quieyaquë'. Pero nu yaca ben' binao xneza ži'inë', huata'cazi castigo quieyaquë', dan' biunaoyaquë' xneza ben' naca tu litza' ži'inë'.

19 Nu yaca ben' biunao xneza ži'inë', baochuguli Diuzi quieyaquë' huata' castigo quiejë', porque cati bdyin ži'inë' lao yedyi layu bzioñe'enë' quie Diuzi, caora na' yaxerayaquë' tayaquë' lao lato lao chula, biguleyaquë' quienë'.

20 Yugulute yaca ben' rue tamedian rudieyaquë' ben' ruzioñe'e quie Diuzi. Bire'enyacuë' naoyaquë' xnezë', porque dan' rdzebiyaquë' su be ca tamedian rueyaquë'.

21 Pero yaca ben' nao tali, raxeyaquë' naoyaquë' xneza ben' ruzioñe'e quie Diuzi, porque dan' cana' su be de que rueyaquë' tadya'a cabë' re'en Diuzi hueyaquë'.

### *Barenë Juan quie Jesús tatula*

22 Bë' beyudyi na', uza' Jesús žiolënë' yaca ben' quienë' estado Judea. Lëgan' na' bega'nyacuë' tu chi' ga bë'yaquë' lao yaca benë'.

23 Lëzirë zu Juan ru'enë' lao yaca benë' gan' lao Enón, gan' de nisa zila. Nacan ga'ala' para yedyi Salim. Lëgan' na' bedupa yaca benë', na' bë' Juan laoyaquë'.

24 Cana' guca caora binedze'yaquë' Juan lu'u dyiguiba.

25 Bi'zi bala yaca ben' quie Juan uyu'ulëyaquë' tu ben' Israel huenë' ru'eyaquë' di'idza' ca costumbre naoyaquë' quie idao ta gacan yëri lao Diuzi.

26 Na'ra uyoyaquë' rëbiyaquë' Juan:

—Maestro, ben' uzulë luë' itzala' yao Jordán, lëben' unao' nëto' dza na', ben' zë baru'enë' laohue, bazioyaquë' lënë'.

27 Bi'zi una Juan rëbinë' leyaquë':

—Ni tu nunu de yela' rnabë' quie, chi cala Diuzi bë'në'n lao në'ë.

28 Le'e banezile dyë'ëdi ca unia'. Binaca' ben' Cristo. Naca' ben' rguixogue' benë' de que huida ben' Cristo.

29 Cristo naquë' ca quie ben' utzagana'. Lëzirë yaca ben' nao xnezë', naca quieyaquë' ca quie nigula utzagana'. Në'ëdi' naca' ca quie amigo quie ben' utzagana'. Bi'zi ben' naca amigo quie ben' utzagana', redaohuenë' uzë'naguë' yenë' bi na ben' utzagana'. Quie lena' redaohueda' rzë'naga' yeda' bi na ben' Cristo.

30 Lëbë' ziorë' raquë' ben' zera ca në'ëdi', reya'ala' ta' puro zanle.

### *Ni rnën quie ben' za' guibá*

<sup>31</sup> Ben' za' guibá, arnabè'nè' lao yugulute benè'. Ben' ralo lao yedyi layu, nacacazè' ben' dugalo de lao yedyi layu. Raquè' pensari quie ta raca lao yedyi layu.

<sup>32</sup> Pero ben' za' guibá, ru'enè' di'idza' ca ta blè'ènè' len ca ta benè'. Biži na' yaca benè' biraleyaquè' quienè' cabè' nanè' na'.

<sup>33</sup> Chi nu ben' ralenè' ca di'idza' na ben' za' guibá, lena' ulu'en ralenè' bi na Diuzi.

<sup>34</sup> Ben' use'ela' Diuzi, rnèguè' di'idza' quie Diuzi. Dula'adyi'cazi yu'unè' Bichi Be quie Diuzi lu'u guicho laxta'onè'.

<sup>35</sup> Xuziro Diuzi nedyè'ècazinè' zi'inè'. Nu'eguè' yugulute ta de lao na'la zi'inè'.

<sup>36</sup> Nu yaca ben' nao xneza ben' Cristo zi'i Diuzi, baguta' yela' neban quieyaquè' tuzioli. Pero quie nu yaca benè' binao xneza zi'i Diuzi, bibi yela' neban tuzioli gata' quieyaquè', yela'cala hue Diuzi lèyaquè' tu castigo huala gula.

## 4

### *Jesús ru'elènè' tu nigula ben' Samaria di'idza'*

<sup>1</sup> Biži bdyin dza blè'è yaca ben' fariseo de que unao ben' zèra Jesús ca ben' unao Juan. Lèzi bè' Jesús lao ben' zèra ca Juan.

<sup>2</sup> Pero cala Jesús bè'nè' lao benè', dechan' yaca ben' quienè', lèlèyaquè' bè'yaquè' lao yaca benè'.

<sup>3</sup> Caora gucabè' Jesús ca rna yaca ben' fariseo, na' uzè'è estado Judea zioquè' bdyinnè' estado Galilea.

<sup>4</sup> Con gan' zionè' re'ennan tenè' estado Samaria.

<sup>5</sup> Cana' bdyinnè' yedyi Sicar quie estado Samaria. Nacan ga'ala' gan' de layu bè' Jacob zi'inè' José cana'te gula.

<sup>6</sup> Biži bdyinnè' gan' re' pozo nisa ta ulèchi xuzixta'onè' Jacob. Na' como dan' banexaquenè' yu'unè' neza, caora na' ure'nè' ru'la pozo aruen cadu gatzo dza.

<sup>7-8</sup> Biži yaca ben' quienè' zioyaquè' la'o yedyi ta ga'oyaquè' ta gaoyaquè'. Cana' guca bdyin tu nigula ben' Samaria ta cuioguè' nisa gan' re' pozo. Na'ra una Jesús rëbinè' nigula:

—Ben nisa yo'oga'.

<sup>9</sup> Na'ra una nigula na' rëbinè' Jesús:

—¿Cómo luè', ben' Israel, rnabo' nè'èdi', ben' Samaritana, nisa yo'olo'?

(Cana' una nigula gudyinè' Jesús dan' biyu'ulè ben' Samaria tuzi len ben' Israel.)

<sup>10</sup> Biži una Jesús rëbinè' nigula:

—Chan' inezilo' ca rue run Diuzi, lèzi chan' nubè'rao' nu ben' rnaba luè' nisa ta yo'oguè', na' huanabacazo' nè'èdi' nisa yo'olo', guncaza' nisa neban.

<sup>11</sup> Na'ra una nigula rëbinè' Jesús:

—Señor, bibi nu'acazo' ta cuiolo' nisa. Lèzi dan' re'n zitu', tana' lena' rnia' luè' ¿gazi' tzexiu' nisa nao' nisa neban na'?

<sup>12</sup> Ulèchi xuzixta'oro Jacob pozo niga ga hue'enè' cuinnè' len zi'inè' len yaca bia guixi' udapè'. Nia' luè', ¿biži rnabè'ro' luè' ca lèbè'?

<sup>13</sup> Na' biži Jesús nè' rëbinè' nigula:

—Lao yugulute yaca ben' yo'o nisa niga, bicuezan ta rbiliyaquè'n, hui'oyaquè'n tatula.

14 Pero nu yaca ben' yo'o nisa hua' nē'ēdi', bira ibiliyaquē'. Huaca quieyaquē' ca quie tu ga ralo nisa lu'u laxta'oyaquē' tacuenda gata' yela' neban quiejē' tuzioli.

15 Na'ra una nigula rēbinē' Jesús:

—Señor, ben nisa nao' guno' yo'oga', yela' na' bira guida' ru'a pozo ni idelioga' nisa.

16 Bizi unē Jesús rēbinē' nigula:

—Beyo yexi' xquiulo' guidalao'nē' gan' niga.

17 Na'ra una nigula rēbinē' lēbē':

—Nunu xquiuhua' zu.

Na' bizi una Jesús rēbinē' lēbē':

—Tali ca unao' nao' ganu xquiulo' zu.

18 Na' bizi nē' nia', baozulao' lao ga'yo' be'mbyu. Na' ben' zulao' na'a, cala xquiulo'. Lēlena' nacacazin tali ca unao'.

19 Bē' be nigula ca una Jesús, unē' rēbinē' lēbē':

—Señor, rlē'ēda' luē' naco' tu ben' quie Diuzi.

20 Nē'ēdi' nia' de que uyonla'adyi' yaca ben' xuzixta'ondo' Diuzi gan' zu ya'a niga. Na' bizi le'e, ben' Israel, nale ciudad Jerusalén, lēgana' reya'ala' tzionla'adyi' yaca benē' Diuzi.

21 Bizi una Jesús rēbinē' nigula:

—Nigula, gule can' nia' na', huadyin dza tzionla'adyi'le Diuzi, pero cala niga gan' zu ya'a guidale, lēscan' cala ciudad Jerusalén tzirole.

22 Le'e ben' Samaritano, binezile nu tzionla'adyi'le, pero nēto' banezcazindo' nu tzionla'adyi'ndo'. Conlē yaca ben' Israel pca'n Diuzi di'idza' quienē' tacuenda inezí yaca benē' bi re'en Diuzi huejē' ta yeyēri laxta'ojē' laohuē'.

23 Baruen bago idyin hora cati yaca ben' rionla'adyi' Diuzi tzionla'adyi'yaquē' lēbē' conlē Bichi Be quienē', lēscan' conlē di'idza' li cabē' re'en Diuzi. Lēyaca ben' rue cana', raxe Diuzi tzionla'adyi'yaquē' lēbē'.

24 Naca Diuzi ben' bichi be. Lēlena' yaca ben' rionla'adyi' lēbē', reya'ala' tzionla'adyi'yaquē' lēbē' conlē bichi be quieyaquē', lēscan' conlē di'idza' li cabē' re'en Diuzi.

25 Na'ra una nigula rēbinē' lēbē':

—Pues nē'ēdi' banezda' de que huida ben' naca Cristo. Lēscan' cati guidē', uzioñe'enē' ra'o lao yugulute.

26 Na'ra una Jesús rēbinē' lēbē':

—Nē'ēdi' naca' ben' Cristo, ben' ru'elē luē' di'idza'.

27 Na'ra cati bedyin yaca ben' quienē' gan' zēnē', tu bebanziyaquē' ru'elē Jesús di'idza' nigula Samaritana. Pero bibeyazocaziyaquē' bi yēbiyaquē' lēbē' bi di'idza' ru'elēnē' nigula.

28 Cana' guca pca'n nigula re'e quienē', bezē'ē zioquē' la'o yedyi quienē' yetixogue'nē' yaca ben' yedyi na' unē' rēbinē' leyaquē':

29 —Ya' tzioro ilē'ēro tu be'mbyu laga unē' nē'ēdi' ca naca ta babia'. ¿Cala lēbē' naquē' ben' Cristo?

30 Na'ra uza' yaca ben' lao yedyi yená'yaquē' gan' zē Jesús.

31 Tu zadyinra ben' lao yedyi, caora na' una yaca ben' quie Jesús rēbiyaquē' lēbē':

—Maestro, ¿biraolo' lē'ēti'?

32 Na'ra unē' rēbinē' leyaquē':

—Le'e binezile decazi ta gaohua'.

33 Na'ra uzulao yaca ben' quienē' rēbiyaquē' laguedyiyaquē':

—¿Cala biblē'ēro babida yaca ben' bedehua'a ta udaohuē'?

<sup>34</sup> Bizi una Jesús rëbinë' yaca ben' quië':

—Ruzua' di'idza' quie ben' use'ela' në'ëdi'. Lëlena' gaca quia' ca quie ben' baodao.

<sup>35</sup> Na' le'e nale: “Neru'en lato itapa biu' ta yezi'ro usecho.” Na' bizi në'ëdi' nia': “Ulena'cara ca naca quie layela como dan' bade yeza bidyi baguca yezi'ron.”

<sup>36</sup> Ca naca quie ben' bezi' usecho, cana' huazi'guë' xlažoguë'. Huazulëcazinë' Diuzi tuzioli. Tana' lena' redaohue lao rupateyaquë', ca ben' raza, ca ben' yezi' usecho.

<sup>37</sup> Nacan tali ca na benë': “Tuë' raza, na' ituë' yezi'në' usecho.”

<sup>38</sup> Bizi në'ëdi' ise'ela' le'e ta yezi'le usecho quie Diuzi ga biguzale. Nacan ta guza ben' tula, ben' ruerë dyin quie Diuzi. Na' bizi le'e redaohuele yezi'le usecho quie Diuzi. Re'en Diuzi inao yaca benë' xnezë'. —Cana' una Jesús rëbinë' leyaquë'.

<sup>39</sup> Na' bizi yaca ben' zë, ben' Samaria, ben' nita' yedyi Sicar, guleyaquë' quie Jesús dan' una nigula: “Unanë' në'ëdi' yugulu ca ta babia'.”

<sup>40</sup> Bizi cati bdyin yaca ben' Samaria gan' zë Jesús, caora na' unëyëchi'yaquë' para yega'nlë Jesús leyaquë'. Na'ra bega'n Jesús uzulënë' leyaquë' lao chopadza.

<sup>41</sup> Lëcana' guca gulera yaca ben' zë quie Jesús beyaquë' ca unanë'.

<sup>42</sup> Na'ra unayaquë' rëbiyaquë' nigula:

—Na'ra bagulendo' quienë'. Cala rquincara luë' inao' nëto' bidë'. Banezindo' ca naca di'idza' ru'enë'. Banezindo' talicazi lëbë' naquë' ben' Cristo, ben' ute usela yaca ben' nita' lao yedyi layu. —Cana' nayaquë' rëbiyaquë' nigula.

### *Jesús beyuenë' zi'i ben' naca empleado quie gobierno*

<sup>43</sup> Ude lao chopadza uzulënë' leyaquë' estado Samaria, na' uzë'ë zionë' estado Galilea.

<sup>44</sup> Cana' guca uza'në' bdyinnë' estado Galilea. Na'ra cuinnë' unë' cabë' raca quie yaca ben' rguixogue' di'idza' la'iya quie Diuzi. Birapala'n ben' lao yedyi quienë' lëbë'.

<sup>45</sup> Pues cati bdyinnë' estado Galilea, na' yaca ben' nita' gan' bdyinnë', bezi'yaquë' lëbë' dyë'ëdi como dan' baoyoyaquë' ciudad Jerusalén dza na' cati raca lani quie pascua, blë'ëyaquë' cabë' bënë' cati uyoguë' ciudad Jerusalén.

<sup>46</sup> Bizi na' bdyinnë' ciudad Caná quie estado Galilea. Lëgana' bexinoguë' nisa beyuenë'n vino. Na'ra ciudad Capernaum zu tu ben' rnabë' naquë' empleado quie gobierno rey. Na' zu tu ži'inë' raca žhue'bi'.

<sup>47</sup> Caora unezi ben' empleado uza' Jesús estado Judea bdyinnë' estado Galilea, na' uzë'ë žioguë' tzeguedyinë' Jesús ta ztionë' žan yu'u quienë' ta yeyuenë' ži'i ben' na', porque debi' raca žhue'bi' bagatibi'.

<sup>48</sup> Na'ra una Jesús rëbinë' ben' na':

—Le'e bigalele chi biilë'ële tu seña quie yela' huaca hua'.

<sup>49</sup> Bizi una ben' naca empleado:

—Señor, chi huu' cule, latziotero antes na'a binegati ži'ina'.

<sup>50</sup> Bizi Jesús unë' rëbinë' lëbë':

—Beyo žan yu'u quio'. Bigati ži'ilo'.

Bizi ben' empleado gulenë' ca gudyi Jesús lëbë'. Na' bezë'ë zeyoguë' žan yu'u quië'.

<sup>51</sup> Cati zeyoguë' gatzo neza, binedyinnë' žan yu'u quienë', caora na' bedzaganë' yaca ben' zulaohuë'. Na' bizi unayaquë' rëbiyaquë' ben' xa'nyaquë':



—Hueyaca zi'ilo', bigatibi'.

<sup>52</sup> Bi'zi ben' empleado unabé' yaca ben' zulaohué' uné':

—¿Ca bi'zi hora berobi' tala?

Na'ra una yaca ben' zulaoné' rēbiyaquē' lēbē':

—Niogue ca reda tu quie zadzē', cana' bezubi' dya'a berobi' tala.

<sup>53</sup> Bi'zi ben' empleado xuzi xcuidi' raca zhue', bezaquené' caora gudyi Jesús lēbē': "Hueyaca zi'ilo' bigatibi'", lēhora na' labeyacatebi'. Cana' guca gulenē' quie Jesús. Lēscan' gule yugulute yaca ben' nita' zan yu'u quienē'.

<sup>54</sup> Lēcana' guca laorupe lasa blu'eguē' seña quie yela' huaca quienē' caora cati uzē'ē estado Judea bdyinné' estado Galilea.

## 5

### *Beyue Jesús tu ben' zi, ben' ciudad Betesda*

<sup>1</sup> Ude beyudyi beyue Jesús yaca ben' raca zhue', na'tera guca dza raca lani quie ben' Israel. Tana' uza' Jesús zioné' ciudad Jerusalén.

<sup>2</sup> Ga bdyinné' ciudad Jerusalén, na' re' na' tu pozo nisa. Na' di'idza' hebreo lao pozo nisa na' pozo nisa Betesda. Nu'an ga'yo' ru'a yu'u ga ru'u bené'. Rega'nnan ga'ala' ga zu tu ru'a yu'u belao. Lēru'a yu'u na' nezi'laona ru'a yu'u quie beco' zi'ila'.

<sup>3</sup> Lēlugar na' nita' yaca ben' zē, ben' raca zhue', len ben' laochula, len ben' zi, len ben' neseco biraca sa'. Rbezayaquē' bē' chechu ta nisa.

<sup>4</sup> Rbezayaquē' gan' dan' bayu'u rdyin ángel ga re' pozo nisa ta utanē'n. Bi'zi ben' yubi tzu'u tanēro lu'u nisa caora sulao chechu tanan, lēben' na' laiycate con biti'tezi yela' hue' racanē'.

<sup>5</sup> Lēgan' na' de tu ben' raca zhue' azio lao galobechi xuna iza raca zhue'nē'.

<sup>6</sup> Bi'zi Jesús bdyinné' blē'ēnē' de ben' na' raca zhue'nē', gucabē'nē' azio zē iza raca zhue'nē'. Na'ra una Jesús rēbiné' ben' raca zhue':

—¿Re'enlo' yero yela' hue' yu'ulo' ta yeyaco'?

<sup>7</sup> Na'ra una ben' raca zhue' rēbiné' Jesús:

—Señor, nunu dyila' udze' nē'ēdi' lu'u pozo nisa cati sulao tanan. Bi'zi nē'ēdi', cati re'enda' tzu'a tanēro, laru'ute ben' tula. —nē' rēbiné' Jesús.

<sup>8</sup> Bi'zi una Jesús rēbiné' lēbē':

—Uyasa, uzi' da'a quio', beda.

<sup>9</sup> Bi'zi ca una Jesús cana', labeyasate ben' raca zhue', bezi'guē' da'a quiē' nu'ana'n rdalēnē'n. Pero dza rezila'adyi' bē Jesús cana'.

<sup>10</sup> Lēna' una yaca ben' Israel rēbiyaquē' ben' beyaca:

—Na'adza nacan dza huezila'adyi'. Biru'en lato talo' hua'alo' da'a quio'.

<sup>11</sup> Na'ra bequēbi ben' beyaca uné' rēbiné' leyaquē':

—Ben' beyue nē'ēdi' uné': "Uyasa, uzi' da'a quio' beda."

<sup>12</sup> Na'ra unayaquē' rēbiyaquē' lēbē':

—¿Nu'zi ben' una luē' cana'?

<sup>13</sup> Bi'zi ben' beyaca biuneziné' bi lao ben' beyue lēbē', dan' labeza'te Jesús udené' zioné' lado ben' zē.

<sup>14</sup> Bi'zi zio Jesús lu'u idao' r nabē'ra. Lēgana' bedilané' ben' beyunené', na' uné' rēbiné' lēbē':

—Canaca na'a babeyaco', bira huelo' bizinaquezi ta bira gaca quio' ta hualara can' baguca quio'.

<sup>15</sup> Cana' guca uyo ben' beyaca yeguēdyinē' yaca ben' Israel, uné' rēbiné' leyaquē':

—Jesús na', lēbē' beyunené' nē'ēdi'.

16 Bè' unezi yaca ben' Israel cabè' una ben' beyaca, caora na' rnaojè' Jesús re'enyacuè' gutijè' lèbè', dan' beyuenè' ben' zi dza huezila'adyi'.

17 Na' bizi Jesús unè' rèbinè' leyaquè':

—Dan' rue Xuza' Diuzi dyin yugu dza, lèlena' hueria' dyin yugu dza.

18 Ca be yaca ben' Israel ca una Jesús can', mazara bdza'yaquè' gu'unyaquè' gutiyaquè' lèbè', dan' bibènè' casa quie ley quie dza huezila'adyi'. Lèscan' bènè' cuinnè' ca Diuzi caora unè' quie Diuzi naca Diuzi Xuzinè'.

*Udixogue' Jesús quie yela' rnaobè' quienè', unè' naquè' zi'i Diuzi*

19 Na'ra una Jesús rèbinè' leyaquè':

—Tali ca rnia' le'e, nè'èdi' zi'i Diuzi, bibi de hua' chan' bizu Diuzi conlè nè'èdi'. Ca ta blè'èda' rue Xuza', lèlena' rueria' nè'èdi'. Can' rue Xuza', cana' rueria' nè'èdi' zi'inè'.

20 Pues Diuzi nedyè'ènè' nè'èdi' zi'inè', rlu'enè' nè'èdi' rua' yugulu ta ruenè'. Zaza'ra ulu'enè' nè'èdi' zi'inè' tu ta nacara ze, tu ta binelè'éle huebanle cati ilè'èlen.

21 Cabè' rue Xuza', resebannè' ben' baguti, lèscana' nè'èdi' zi'inè', hua'a benè' yela' neban tuzioli, ben' re'enda' gata' yela' neban quie.

22 Cala Xuza' ichugobè'nè' quie yaca benè'. Lao na'a nè'èdi' zi'inè' napca'nnè' yela' rnaobè' quienè' ta ichugobi'a quie yaca benè'.

23 Bè Xuza' cana' tacuenda lao yugulute yaca benè' gapala'nyaquè' nè'èdi' zi'i Diuzi cabè' rapala'nyaquè' Xuza'. Chi nu yaca benè' birapala'nyaquè' nè'èdi' zi'i Diuzi, lèlena' rulu'en birapala'nyaquè' Xuza', ben' use'ela' nè'èdi'.

24 Tali ca rnia', con nu ben' rzènaga can' baonia', lena' rulu'en raleyacuè' quie ben' use'ela' nè'èdi', na' de yela' neban quiè' tuzioli, bigata' castigo quienè'. Naca quienè' ca quie ben' baguti beban tatula, bira gatinè'.

25 Tali ca rnia', abdyin dza uzènaga yaca ben' birale quia' cabè' di'idza' rnia' nè'èdi' zi'i Diuzi. Naca quieyaquè' ca quie ben' nati, dan' biraleyacuè' quia' cabè' di'idza' rnia'. Nu yaca ben' uzènaga di'idza' gale quia' cabè' rnia', hue' Diuzi leyaquè' yela' neban tuzioli.

26 Napa Xuza' yela' rnaobè' ta hue'nè' lèjè' yela' neban tuzioli. Lèzi baben Xuza' Diuzi nè'èdi' zi'inè' yela' rnaobè' ta hua'a yaca benè' yela' neban tuzioli.

27 Lèzi benrè Xuza' Diuzi nè'èdi' yela' rnaobè' ta ichugobi'a quie yaca benè' dan' naca' bichi yugulu benè'.

28 Biyebanle can' baonia', huadyin dza ye yugulute yaca ben' huati rchi'a cati inia'.

29 Lèhora na' yero yaca ben' huati lu'u yèroba. Na' bizi yaca ben' bè dya'a hueyata' yela' neban quieyaquè' para tuzioli. Pero na' bizi yaca ben' bè dula' xquia, useban Diuzi leyaquè' ta huenè' leyaquè' castigo.

*Ni rnan ga za' yela' rnaobè' quie Jesús*

30 Bibi de hua' cuinza'. Rchugobi'a quie yaca benè' ca ta una Diuzi nè'èdi' hua'. Tana' rchugobi'a hua' tu ta yu'u ni'a xnezi. Cala ta racazi la'adya' hua' den' hua' ca re'en Xuza', ben' use'ela' nè'èdi'.

31 Chi rnia' cule quia' cuinza', lena' bibi sirve ta ulu'en nu naca'.

32 Pero zu itu ben' rnè cule nè'èdi' naquè' testigo quia'. Na' ca ta rnènè' cule quia' nè'èdi', lena' ulu'en nu naca'.

33 Bizi le'e use'ela'le yaca ben' uyo yenaba Juan. Na' ca ta bequèbi Juan nacan tali.

34 Biruguinte inè tu benè' cule nè'èdi'. Ca di'idza' rnia' le'e, nacan ta galele quia' gata' yela' neban quiele tuzioli.

35 Ca di'idza' una Juan nacan ca quie yèri ra'ala' rseni'n. Bizi le'e, yedao-huele bzènagale ca di'idza' unè' tu chi'zi.

<sup>36</sup> Decazira cule quia' nē'ēdi' ta nacaran belao ca di'idza' una Juan ta ulu'en nu naca'. Bia' yela' huaca quia' tuz ca una Xuza' nē'ēdi' hua'. Lēlena' ulu'en le'e tali use'ela' Xuza' nē'ēdi'.

<sup>37</sup> Lēzi Xuza', ben' use'ela' nē'ēdi', zēnē' cule conlē nē'ēdi' ta ulu'en le'e nu naca' la'acazi nitu lasa bibeles xchī'nē', biblēt'ē lao cuinle lēnē'.

<sup>38</sup> Cabē' le'e binetzu'u di'idza' quie Diuzi lu'u guicho laxta'ole. Biralele quia' nē'ēdi' naca' ben' use'ela' Diuzi.

<sup>39</sup> Le'e rusēdile dyē'ēdi ca rna lē'ē guichi la'iya quie Diuzi como dan' raquele chi rusēdilen dyē'ēdi, cana' gata' yela' neban quiele tuzioli. Na' bizi lē'ē guichi na' rnēcazin quia' nē'ēdi'.

<sup>40</sup> Pero le'e, bire'enle guidale naole nē'ēdi' ta gata' yela' neban quiele tuzioli.

<sup>41</sup> 'Tuzi nacalia' Diuzi la'acazi gapale nē'ēdi' bala'ana, la'acazi bigapale nē'ēdi' bala'ana.

<sup>42</sup> Lēscan'ra nubē'da' le'e. Nezda' binedyē'ēle Diuzi.

<sup>43</sup> Tanun quie Xuza' bida' lao yedyi layu, pero na' le'e biuyezila'adyi'le nē'ēdi'. Bizi chan' za' ben' tula ta racazi la'adyi'nē' ben' na'la gue'enle.

<sup>44</sup> Cabizi huele inoale xneza Diuzi, chi lao laza huele ta gue'en tuzi Diuzi le'e, na' ruele ta gue'en yaca benē' le'e.

<sup>45</sup> Biinale chi nē'ēdi' huaohua' le'e xquia lao Diuzi. Cuin Moisés, ben' nale sulēle dya'a lao Diuzi, lēbē' gaonē' le'e xquia lao Diuzi.

<sup>46</sup> Bizi chan' ralele quie Moisés cabē' unē', lēscana' reya'ala' galerēle quia', como dan' bzu Moisés di'idza' lē'ē guichi ta rguixogue'n quie nē'ēdi'.

<sup>47</sup> Bizi chan' le'e biralele cabē' di'idza' bzu Moisés lē'ē guichi, ¿cabizi huele galele cabē' di'idza' rnia' le'e?

## 6

*Bgao Jesús lao ga'yo' mila benē'*

*(Mt. 14.13-21; Mr. 6.30-44; Lc. 9.10-17)*

<sup>1</sup> Te beyudyi una Jesús cana', uzē'ē zioquē' itzala' lagun Galilea. Lēlagun na' nezi'laona lagun Tiberias.

<sup>2</sup> Bizi yaca ben' zē gula zioyaquē' naoyaquē' lēbē', dan' blē'ēyaquē' ca naca yela' huaca quienē' reyuenē' yaca ben' raca zhue'.

<sup>3</sup> Cana' guca urē Jesús zionē' ga zu ya'a. Lao ya'a na' ure'nē' lēnē' yaca ben' quienē'.

<sup>4</sup> Baruen bago quie lani pascua quie yaca ben' Israel.

<sup>5</sup> Cati una' Jesús ca yaca ben' zē nao lēbē', na'ra unē' rēbinē' Felipe:

—¿Ca gaži tzexi'ro ta gao yaca ben' zē gula niga?

<sup>6</sup> Jesús bēnē' pruebazi Felipe a ver bi ca inanē', dan' dyē'ēdi banezinē' cuinnē' ca huenē'.

<sup>7</sup> Na'ra unē' Felipe rēbinē' Jesús:

—Nica gaquezi lao chopa gayuhua dumi denarios ta ga'oro yēta xtila ta gao yaca ben' niga. Ni tu bicho huion bigaquen gaoyaquē'.

<sup>8</sup> Na'ra una Andrés, bi' bichi Simón Pedro, ben' nao Jesús, unē' rēbinē' lēbē':

<sup>9</sup> —Ni zu tu xcuidi' nu'abi' ga'yo' yēta xtila len chopa bela, pero nia' ¿ca bizi huero gaquen gao lao yugulute ben' nita' niga?

<sup>10</sup> Na'ra una Jesús rēbinē' leyaquē':

—Uleyēbi lao yuguluteyaquē' cue'yaquē'.

Bizi gan' ure'yaquē', na' de guiži ya'a. Na' ure' yaca lao ga'yo' mila be'mbyu.

<sup>11</sup> Ude na' uzi' Jesús yēta xtila na', bazēnē'n bē'lēnē' Diuzi di'idza' unē': "Diuxcaleo", na' bē'nē'n yaca ben' quienē'. Na' bizi yaca ben' quienē',

udisiyaquë'n bë'yaquë'n ca tu yaca ben' re' gan' nita'yaquë'. Lëzi cana' bërë' quie bela, udaoyaquë' ca tu rnan quieyaquë'.

12 Bë' beyudyi udaoyaquë' beloyaquë', na' una Jesús rëbinë' yaca ben' quienë':

—Uletupa, ulezi' ca tu ta bega'n ta bigaca ditoguen.

13 Cana' guca yezi'yaquë' tayožo gucan lao chipchopa ga' naga ca tu ta bega'n udaoyaquë' quie lao ga'yo' yëta xtila.

14 Na' biži yaca benë' blë'ëyaquë' ca naca yela' huaca bë Jesús, unayaquë' rëbiyaquë' laguedyiaquë':

—Tali ben' ni naquë' ben' use'ela' Diuzi lao yedyi layu ta quixogue'në' ra' o xti'idza' Diuzi.

15 Na' como gucabë' Jesús bare'enyacuë' iquië'yaquë' lëbë' tziönë' rey quieyaquë' a la fuerza, cana' uza' Jesús lënë' yaca ben' quië' zionë' urënë' tu ya'a.

### *Ni nan cabë' bë Jesús uza'në' lao nisa*

(Mt. 14.22-27; Mr. 6.45-52)

16 Caora aodze' bare'en ixin, uza'yaquë' zioyaquë' ru'a nisa lagun.

17 Biži yaca ben' quie Jesús, uyu'uyaquë' lu'u barco azioyaquë' lao nisa ta idyinyaquë' ciudad Capernaum. Na' baruen chula, nunu Jesús bdyin gan'.

18 Biži lu'u nisa gan' zioyaquë' na', uzulao raca tu be bedun' huala gula, bi'a be nisa rxitin ladza.

19 Caora aruen ga'yo' xopa kilómetro aoza'lëyaquë' barco, blë'ëyaquë' rza' Jesús lao nisa, azioguë' bago gan' re'yaquë' lu'u barco. Biži cana' guca bdzebitzegueyaquë'.

20 Na'ra una Jesús rëbinë' leyaquë':

—Në'ëdi' za' niga, bidzebile.

21 Biži redaohueyaquë' ta tzu'u Jesús lu'u barco gan' yu'uyaquë'. Ca uyu'u Jesús lu'u barco itu chi'zi bdyinyaquë' ru'a nisa gan' zioyaquë'.

### *Ca bë yaca benë' beguiloyaquë Jesús*

22 Beteyu tula, biži bega'n yaca benë' ru'a nisa lagun gan' uza' yaca ben' quie Jesús. Na' biži beza'la'adyi'yaquë' uyu'u yaca ben' quie Jesús tuzi barco de ru'a nisa. Lëzirë beza'la'adyi'rëyaquë' bizio Jesús lënë' yaca ben' quienë' lu'u barco.

23 Na' bdyin yaca barco tula gan', barco ta uza' ciudad Tiberias. Rega'nnan ga'ala' gan' udaoyaquë' yëta xtila len bela, gan' bëlë Jesús Diuzi di'idza' gudyinë' lëbë: "Xcalelo".

24 Biži caora blë'ëyaquë' nunu Jesús lënë' yaca ben' quienë' zu gan', na' uyu'uyaquë' yaca barco de gan' zioyaquë' ciudad Capernaum ta yeguiloy-aquë' Jesús.

### *Naca Jesús ca quie yëta xtila nu'an yela' neban tuzioli*

25 Cati bdyinyaquë' itzala' lagun, bedilayaquë' Jesús unayaquë' rëbiyaquë' lëbë':

—Maestro, ¿ca bata blao' niga?

26 Na'ra una Jesús rëbinë' leyaquë':

—Tali ca rnia' le'e, le'e rdale reguilole në'ëdi' dan' aodaole abelole. Cala reguilole në'ëdi' dan' agulele quie yela' huaca bia' blë'ële.

27 Biquilole tuzi yela' huao yedu yebidyi. pero ulequilorë yela' huao biyedu yebidyi, yela' huao nu'an yela' neban tuzioli. Lëyela' huao na' guna' le'e. Në'ëdi', bichi yugulu benë', bablu'e Xuza' Diuzi le'e cabë' ruzua' di'idza' quië'. —Cana' guca una Jesús rëbinë' leyaquë'.

28 Bizi rnabayaquë' lëbë' rnayaquë':

—¿Ca biži reya'ala' huendo' ta huendo' ca re'en Diuzi?

29 Na'ra una Jesús rëbinë' leyaquë':

—Ca ta re'en Diuzi huele, re'ennë' galele quia' në'ëdi', ben' use'elë'.

30 Bizi unayaquë' rëbiyaquë' lëbë':

—¿Cabizi yela' huaca huelo' ta ulu'elo' ilë'ëndo' galendo' quio'?

31 Lena' rnando' dan' yaca ben' xuzixta'oro udaoyaquë' yëta xtila lao maná lao lato ga bidyia yu'u con cabë' ca rnan lë'ë guichí la'iyá quie Diuzi: “Diuzi bë'në' ta udaoyaquë' yëta xtila za' guibá.” —Cana' gudyyaquë' Jesús.

32 Na'ra una Jesús rëbinë' leyaquë':

—Tali ca rnia' le'e. Cala Moisés bë'në' yëta xtila za' guibá, dechan' Xuza' Diuzi bë'në'n ta udaoyaquë'. Lëzi Xuza' Diuzi gunnë' le'e yëta xtila ta za' guibá.

33 Lëyëta xtila gun Diuzi za'ten de guibá nu'an yela' neban tuzioli para yaca ben' nita' lao yedyi layu.

34 Na'ra unayaquë' rëbiyaquë' lëbë':

—Señor, guncazo' yëta xtila nao guno'.

35 Bizi una Jesús rëbinë' leyaquë':

—Në'ëdi' naca' lëyëta xtila nu'an yela' neban tuzioli. Con nu yaca ben' guida nao në'ëdi', biyeyudyi yedu yela' neban quieyaquë'. Huaca quieyaquë' ca quie ben' bitue, ben' birbili.

36 Con can' baonëcaza' le'e, ba'ala'cazi bablë'ële në'ëdi', biralele quia'.

37 Nu yaca ben' gun Xuza' Diuzi guida nao në'ëdi', biyesebi'ayaquë'.

38 Në'ëdi' za' guibá ta uzua' di'idza' quie Xuza', ben' use'ela' në'ëdi'. Hua' cabë' unanë', bihua' ta racazi la'adya'. Hua' cabë' mandado bë Xuza'.

39 Ca re'en Xuza' Diuzi, ben' use'ela' në'ëdi', re'ennë' ni tu yaca benë' guida nao në'ëdi' bicuiagu'yaquë'. Re'ennë' usebancaza' leyaquë' dza gaca juicio.

40 Ca re'en Xuza' Diuzi, ben' use'ela' në'ëdi', re'ennë' gata'cazi yela' neban tuzioli quie yaca ben' gale quia' në'ëdi' zi'inë'. Huasebana'yaquë' dza gaca juicio. —Cana' una Jesús rëbinë' leyaquë'.

41 Con ca be yaca ben' Israel una Jesús unë' naquë' ca quie yëta xtila za' guibá, lena' udyiala'adyi'yaquë' Jesús.

42 Na' nayaquë':

—¿Cala ben' niga Jesús, zi'i José? ¿Cómo në' naquë' ben' za' guibá, dechan' nubë'ro xuzinë' len zna'në'?

43 Na'ra una Jesús rëbinë' leyaquë':

—Ulesan, biinële con ganzi quia'.

44 Nunu guida nao në'ëdi', chi biben Xuza', ben' use'ela' në'ëdi', leyaquë'. Na' lënë'ëdi' usebancaza' leyaquë' dza gaca juicio.

45 Lu'u libro ga yu'u di'idza' bzu yaca ben' udixogüe' xti'idza' Diuzi rnan cani: “Diuzi ruzioñe'enë' lao yugulu yaca benë'.” Tana' rnia', con nu yaca ben' rzënaga ca na di'idza' quie Xuza', uzioñe'e Xuza' leyaquë'. Lëyaca ben' na' guidayaquë' inaoyaquë' në'ëdi'.

46 Nitu nitu yaca benë' binelë'ëyaquë' Xuza'. Tuza' në'ëdi', ben' uza' ga zunë', bablë'ëda'në'.

47 Tali ca rnia' le'e, nu yaca ben' gale quia', badecazi yela' neban quieyaquë' tuzioli.

48 Naca' ca quie yëta xtila nu'an yela' neban tuzioli.

49 Yaca ben' xuzixta'oro udaoyaquë' yëta xtila lao maná lao lato ga bidyia yu'u, pero bë' bdyin dza gatiyaquë' gutiyaquë'.

50 Pero nē'ēdi' rnia' quie yēta xtila uza' guibá, con nu yaca ben' gao len, bigaticaziyaquē'.

51 Nē'ēdi' naca' ca quie yēta xtila uza' guibá nu'an yela' neban tuzioli. Con nu yaca ben' gao lēyēta xtila nebancaziyaquē' tuzioli. Cuina' gatia' tacuenda gata' yela' neban quie yaca benē'. Quie lena' bē'ēla' quia' nacan ca yēta xtila nu'an yela' neban tuzioli. —Cana' una Jesús rēbinē' leyaquē'.

52 Biži yaca ben' Israel bē'lēyaquē' laguedyiaquē' di'idza' unayaquē':  
—¿Cómo na ben' niga gunnē' bē'ēla' quienē' gaoro?

53 Na'ra una Jesús rēbinē' leyaquē':

—Tali ca rnia' le'e, nē'ēdi' bichi yugulu benē', chi le'e bigaole bē'ēla' quia', chi le'e biyo'orēle ren quia', bigata' yela' neban quiele.

54 Nu yaca ben' gao bē'ēla' quia' yo'o ren quia', de yela' neban quieyaquē' tuzioli. Nē'ēdi' huesebana'yaquē' dza gaca juicio.

55 Bē'ēla' quia' nacan dugalo yela' huao gaole. Lēzirē ren quia' nacarēn dugalo ta yo'ole.

56 Nu yaca ben' gao bē'ēla' quia', yo'o ren quia', zulēcaziyaquē' nē'ēdi' tzaže, lēzi nē'ēdi' zulia'yaquē' tzaže.

57 Xuza', ben' use'ela' nē'ēdi', nebancazinē'. Na' biži nē'ēdi', nebana' por nun quienē'. Lēzi cana' gacarē quie ben' gao bē'ēla' quia', nebanyaquē' por nun quia' nē'ēdi'.

58 Nē'ēdi' rnia' quie yēta xtila za' guibá. Con nu yaca ben' gao lēyēta xtila na', badecazi yela' neban quieyaquē' tuzioli. Pero quie yēta xtila lao maná ta udao yaca ben' xuzixta'oro, ba'ala'cazi udaoyaquē'n, cati bdyin dza gatiyaquē' gutiyaquē'.

59 Cana' una Jesús rēbinē' leyaquē', lu'u idao' sinagoga ciudad Capernaum.

### *Ga ru'en di'idza' quie yela' neban tuzioli*

60 Ca be yaca ben' can' unao Jesús, na' unayaquē' rēbiyaquē' laguedyiaquē':

—Zēdi gula naca ca di'idza' unē' ra'o. ¿Nuži nezi bidan' unēnē'?

61 Biži Jesús gucabē'nē' ca pensari racayaquē' ru'eyaquē' di'idza' de que tziójē' contra lēbē'. Na'ra unē' rēbinē' leyaquē':

—¿Quele resebi'le can' baonia'?

62 ¿Cabizi huele chi ilē'ēle nē'ēdi', bichi yugulu benē', yeyēpa' yeya'a guibá ga zua' dza na'?

63 Bichi Be quie Diuzi, lēbē' runnē' yela' neban quiele. Bibi de hue bē'ēla' zuba' quiele lao Diuzi. Ca di'idza' baonia' le'e, lēdi'idza' na' nacan tali, rnēn quie Bichi Be quie Diuzi, ben' run yela' neban.

64 Pero nenita' bala le'e biralele quia'.

Cana' una Jesús rēbinē' leyaquē', dan' nezinē' desde caora na'te nu ben' gale quienē', nu ben' bigale quienē'. Lēzi nezinē' nu ben' usedyin lēbē' lao na'a yaca ben' guti lēbē'.

65 Biži una Jesús rēbinē' leyaquē':

—Lena' unia' le'e can', ní tu yaca benē' bisaque' guidayaquē' naoyaquē' nē'ēdi', chi Xuza' bibēnnē' yaca ben' sa'lē nē'ēdi'. —Cana' una Jesús rēbinē' leyaquē'.

66 Cana' guca apsanla'adyi' yaca ben' zē Jesús, yaca ben' unao lēnē'. Bira uyoyaquē' inaoyaquē' lēbē' con ga zioquē'.

67 Cana' guca una Jesús rēbinē' lao chipchopa ben' quienē', ben' bega'n:

—Lēzi le'e, ¿re'enle ibiga'le tzala'la, bira inaole nē'ēdi'?

68 Na'ra una Simón Pedro rēbinē' lēbē':

—Señor, ¿ca nuzila ben' tziolëndo', como tuzo' luë' rnao' di'idza' rguixogue'n quie yela' neban tuzioli?

<sup>69</sup> Ca naca nëto', bagulendo' quio'. Nezindo' luë' naco' ben' Cristo zi'i Diuzi, ben' neban tuzioli.

<sup>70</sup> Na'ra una Jesús rëbinë' leyaquë':

—Banebioga' lao chipchopa le'e gacale ben' quia', pero bizi ladole ni, zu tule nuelë tuže len bichi be xi'ibi'.

<sup>71</sup> Ca una Jesús cana', unë' quie Judas Iscariote, zi'i ben' lao Simón. LëJudas na' naquë' tuže len ichtipu yaca ben' quie Jesús. Lëbë' usedyinnë' Jesús lao na'a yaca ben' guti lëbë'.

## 7

### *Yaca bi' bichi Jesús biguleyaquë' quienë'*

<sup>1</sup> Beyudyi guca can', uza' Jesús zioquë' estado Galilea. Bire'ennë' sunë' estado Judea, dan' lëgan' na' rda yaca ben' Israel re'enaquë' gutiyaquë' lëbë'.

<sup>2</sup> Dan' baruen bago quie lani quie yu'u guizi,

<sup>3</sup> na'ra una yaca bi' bichi Jesús rëbinë' lëbë':

—Biyega'nlo' niga, beyo estado Judea tacuenda yedilo' yaca ben' rnao luë' ta inezirëyaquë' cabë' ruelo'.

<sup>4</sup> Chi re'enlo' inezi yaca benë' cabë' ruelo', bihuelo' negachi'zi. Na' como baruelo' tu ta binelë'é yaca benë', bza'lao bënan zaca'lao ta ilë'é yaca benë'. —Cana' unayaquë' rëbiyaquë' lëbë'.

<sup>5</sup> Nica yaca bi' bichi Jesús biguleyaquë' quienë'.

<sup>6</sup> Bizi una Jesús rëbinë' leyaquë':

—Binedyin hora ulu'ena' yaca benë' ca ta hua' ilë'ëyaquë'. Pero ca naca le'e, huazaque' tzirole lani bitezi hora.

<sup>7</sup> Yaca ben' nita' lao yedyi layu biudze'la'adyi'yaquë' le'e. Pero ca naca në'ëdi', sí, udze'la'adyi'yaquë' në'ëdi', dan' rguixogui'a ca naca tamedian rueyaquë'.

<sup>8</sup> Uletzio le'e lani. Bisa' në'ëdi' na'a, dan' binedyin hora sa'a.

<sup>9</sup> Ude beyudyi una Jesús cana', bega'ncazinë' estado Galilea.

### *Uyo Jesús lani quie yu'u guizi*

<sup>10</sup> Ude uza' yaca bi' bichi Jesús zioyaquë' lani, na'tera uza'rënë' zionë' lani, pero biuyoguë' zaquë'lao, uyoguë' negachi'zi.

<sup>11</sup> Bizi yaca ben' Israel reguiloyaquë' lëbë' ga raca lani unayaquë' rëbiyaquë' laguediyaquë':

—¿Gaži zio Jesús?

<sup>12</sup> Bizi yaca ben' zë unëyaquë' quie Jesús. Balayaquë' unayaquë' naquë' ben' huen. Na' ibalayaquë' unayaquë' binaquë' ben' huen, unayaquë' rdanë' rzi'në' yë' yaca benë'.

<sup>13</sup> Bizi yaca benë' rnëyaquë' negachi'zi quie Jesús, dan' rdzebiyaquë' ye yaca ben' rnabë' quieyaquë'.

<sup>14</sup> Araca gatzo lani cati uyu'u Jesús lu'u idao' rnabë'ra zu na', na' uzulao-huë' rusëdiguë' yaca benë'.

<sup>15</sup> Na' du rebanyaquë' unayaquë' rëbiyaquë' laguediyaquë':

—¿Cómo ben' niga rueguë' zi rioñe'e? ¿Gaži uyonë' huesëdi'?

<sup>16</sup> Na'ra una Jesús rëbinë' leyaquë':

—Ca di'idza' rusëdia' le'e niga, binacan di'idza' quia' cuinza', nacan di'idza' quia' len ben' use'ela' në'ëdi'.

17 Chi nu yaca ben' re'en hue ca re'en Diuzi, lena' huaneziyaquë' cabë' naca di'idza' rniã', chi tuze rnëlia' Diuzi, o chi rniã' ta racazi la'adya'.

18 Nu ben' rnë ta racazi la'adyi'në' re'ennë' para gue'en ja benë' lëbë'. Pero nu ben' rnëli Diuzi tuze, ru'enë' di'idza' li, birzi'në' yë'.

19 ¿Quele Moisés bënë' le'e ley quie Diuzi? Na' bizi le'e birue quiele cabë' na ley na'. ¿Ca bixquien' re'enle gutile në'ëdi'?

20 Na' bizi una yaca benë' rëbiyaquë' lëbë':

—Yu'ulo' bichi be quie taxi'ibi'. ¿Ca nuzi re'en guti luë' dan' nao' can'?

21 Na' una Jesús rëbinë' leyaquë':

—Le'e rebanele cabë' bia' yela' milagro quia' tu dza huezila'adyi'.

22 Bizi Moisés bënë' mandado bzu xuzixta'oro tu xëdyidao' cuin xcuidi'dao' byu. Pero tanëro xuzixta'otelaro bë' can', cala Moisés. Lëscan' le'e ruzule tu xëdyidao' xcuidi'dao' byu quiele, ba'ala'cazi dza huezila'adyi'.

23 Le'e naole ruele ca una Moisés, ruzule tu xëdyidao' xcuidi'dao' byu quiele ba'ala'cazi dza huezila'adyi' tacuenda uzucazile di'idza' ca unë'. Na' bizi në'ëdi', dan' beyua' tu ben' zi dza huezila'adyi', lena' rdza'tzeguele në'ëdi'.

24 Biichugulile con ganzi. Cati ichugulile, ulechuguli tu ta yu'u ni'a xnezi quie. —Cana' una Jesús rëbinë' leyaquë'.

### *Unë Jesús quie ga zë'ë*

25 Bizi bala yaca ben' nita' ciudad Jerusalén unayaquë' rëbiyaquë' laguediyayaquë':

—¿Cala ben' niga reguilo yaca ben' rnabë' ta gutiyaquë' lëbë'?

26 Zaca'lao za' ja ben' zë na' zënë' rnënë'. Bibi reyažo yaca ben' rnabë' bihueyaquë' quienë'. ¿Cala baneziyaquë' tali naquë' Cristo?

27 Ra'o baneziro dyë'ëdi ga yedyi golonë'. Pero cati guida ben' Cristo, nica neziro ga yedyi galoguë'. —Cana' unayaquë' rëbiyaquë' laguediyayaquë'.

28 Cana' guca zë Jesús lu'u idao' rnabë'ra quie yaca ben' Israel rusëdinë' leyaquë', na' benë' ca rna yaca benë'. Na'ra unënë' zidzo rëbinë' leyaquë':

—Cabë' le'e banubë'le në'ëdi', banezile ga gologa'. Pero cala bida' ta racazi la'adya'. Bida' tanun quie ben' zu tuzioli, ben' binubë'le.

29 Pero në'ëdi', nubë'da'në'. Uza' ga zunë'. Lëlëbë' use'ela'në' në'ëdi'. —Cana' una Jesús rëbinë' leyaquë'.

30 Cana' guca gu'unyaquë' guxuyaquë' hueyaquë' lëbë' preso, pero bibeyažoyaquë' guxuyaquë' lëbë', dan' binedyin dza idyinnë' lao na'ayaquë'.

31 Pero yaca ben' zë, guleyaquë' quienë'. Na'ra unayaquë':

—Talicazi ben' ni naquë' ben' Cristo. Por nun quie yela' huaca quienë' bënë', lena' aoneziro naquë' ben' Cristo. ¿Ca nužira guida huera yela' huaca ca lëbë'?

### *Yaca ben' partido fariseo, ben' rnabë' yaca, use'ela'yaquë' policia ta tzeguëxoyaquë' Jesús*

32 Caora be yaca ben' partido fariseo ca di'idza' ru'e yaca benë', na' leyaquë' len xan' pxuzi, use'ela'yaquë' yaca policia lu'u idao' rnabë'ra ta tzeguëxoyaquë' Jesús.

33 Na'ra una Jesús rëbinë' yaca benë':

—Dza nababa dzazi zulia' le'e niga, te na' yeya'a gan' zu ben' use'ela' në'ëdi'.

34 Le'e huadale yeguulole në'ëdi', pero biyedzelele në'ëdi', dan' bisaque' guidale gan' yeya'a.

35 Na' bizi yaca ben' Israel rnabayaquë' rëbiyaquë' laguediyayaquë':



—¿Ca gaži yeyo ben' niga, na' ra'o biyedzelerero gan' yeyoguë'? ¿Huayoguë' gan' nita' yaca ben' quiero, ben' uza' yaca zio yaca yedyi griego? ¿Cala huayonë' usëdinë' yaca ben' griego?

36 ¿Ca biži re'en ina di'idza' unë' ra'o: "Le'e huadale yeguilole në'ëdi', pero biyedezelele në'ëdi', dan' bisaque' guidale gan' yeya'a."?

### *Rnë Jesús quie yao nu'an yela' neban*

37 Mero dza yeyudyi lani nacan dza belao. Lëdza na' uzuli Jesús unë' zidzo rëbinë' yaca benë':

—Con nu yaca ben' rbili, ruen zi inaoyaquë' në'ëdi' tacuenda gata' ta yo'oyaquë'.

38 Con nu ben' rale quia', gaca quienë' con ca rnë lë'ë guichi la'ya quie Diuzi: "Huaca laxta'oyaquë' ca quie ga de yao nu'an yela' neban."

39 Caora cati una Jesús cana', quie Bichi Be quie Diuzi unë'. Na' huadyin dza huayu'u Bichi Be quie Diuzi lu'u guicho laxta'o yaca ben' rue quie quie xti'idza' Jesús, pero binedyin dza gaca can' dan' bineyo Jesús guibá ta tzeque'në' cuëta lë'ë Diuzi.

### *Ga rbio yaca benë' zë cue' laguedyiaquë'*

40 Entre bala yaca benë' be ca una Jesús, na' biži unayaquë' rëbiyaquë' laguedyiaquë':

—Tali ben' niga naquë' ben' rguixogue' xti'idza' Diuzi, ben' una Diuzi ise'ela'në'.

41 Balayaquë' unayaquë':

—Lë'lëbë' naquë' ben' Cristo, ben' use'ela' Diuzi.

Na' ibalayaquë' unayaquë':

—¿Quele, cala estado Galilea za' ben' Cristo?

42 Lë'ë guichi la'ya quie Diuzi rnën quie ben' Cristo naquë' ben' zi'isuba rey David, ben' galo yedyi Belén, mero yedyi ga uzu rey David. —Cana' unayaquë' rëbiyaquë' laguedyiaquë'.

43 Cana' guca, dan' brojë' zë cue' unayaquë' di'idza' udeudela quie Jesús.

44 Lena' balayaquë' gu'unayaquë' guxuyaquë' Jesús ta udze'yaquë' lëbë' lu'u dyiguiba, pero bibeya'zo'yaquë'.

### *Yaca ben' rnabë' biguleyaquë' quie Jesús*

45 Yaca ben' naca policía, ben' napa dyin quie idao' uyoyaquë' regunni'ajë' Jesús bedyinyaquë' ga nita' yaca ben' partido fariseo len yaca xan' pxuzi. Biži na' una yaca ben' partido fariseo len yaca xan' pxuzi rëbiyaquë' policía:

—¿Bixquien' bibequië'le lëbë'?

46 Na'ra bequëbi yaca policía rëbiyaquë' leyaquë':

—Nitu nitu nunu rnë ca lëbë'.

47 Na'ra una yaca ben' partido fariseo rëbiyaquë' leyaquë':

—¿Lente le'e babë'le lato uži'në' le'e yë'?

48 ¿Biži binezile nitu yaca ben' rnabë', lëzi nitu ben' partido fariseo, biguleyaquë' quienë'?

49 Biži yaca ben' yedyi bineziyaquë' ca na lë'ë guichi la'ya quie Diuzi. Lëlena' dan' nacayaquë' ben' yu'u de'. —Cana' una yaca ben' rnabë' rëbiyaquë' yaca policía.

50 Biži Nicodemo naquerë' ben' partido fariseo, ben' uyo yegue'lë di'idza' Jesús rtze', unë' rëbinë' yaca ben' laguedyinë':

51 —Según ca naca ley quiero, biru'en lato ichugobë'ro quie yaca benë' chi bineyero bi rueyaquë'.

52 Biži unayaquë' rëbiyaquë' Nicodemo:

—¿Lëzi luë', za'rao' estado Galilea? Psëdin una' l'ë'ë guichi la'ya quie Diuzi, hualë'ëlo' biuza' ben' ise'ela' Diuzi estado Galilea.

<sup>53</sup> Na'ra beza'yaquë' zeyoyaquë' zan yu'u quie quieyaquë'.

## 8

*Ni nan quie nigula zu xquiuhue, rtilë' ben' tula*

<sup>1</sup> Biži Jesús uži'në' zioguë' ga zu ya' laona ya'a Olivos.

<sup>2</sup> Cati uyani' dza tula, zeyo Jesús lu'u idao' rnabë'ra. Na' begu'udi' yaca benë' gan' zënë'. Biži na' ure'në' rusëdinë' leyaquë'.

<sup>3</sup> Na'ra yaca ben' rusëdi ley quie Moisés len yaca ben' partido fariseo, uquië'yaquë' tu nigula, ben' rda'le be'mbyu binaca xquiuhue. Bablë'ë benë' bin' bë nigula na' len be'mbyu. Cana' guca dan' bëxoyaquë' nigula na' lado ben' zë gan' nita'yaquë'.

<sup>4</sup> Na'ra unayaquë' rëbiyaquë' Jesús:

—Maestro, bablë'ë yaca benë' bin' bë nigula ni, aptilë' be'mbyu binaca xquiuhue'.

<sup>5</sup> Rnën lë'ë guichi ley quie Moisés de quie reya'ala' gutiro con yo ben' rue cabë' bë nigula niga. ¿Cabizi nao' luë'? —una yaca ben' na' gudyijë' Jesús.

<sup>6</sup> Unayaquë' can' ta yeyaquë' cabizi yequëbi Jesús. Reguilola'adyi'yaquë' ta gaoyaquë' lëbë' xquia. Na' biži Jesús byëchonë' layula uzulaonë' bënë' letra layu conlë zbenë'.

<sup>7</sup> Como dan' rnabazi rnabayaquë' lëbë', cana' guca bezulinë' unë' rëbinë' leyaquë':

—Nutezi le'e bibi xquia nehua', tanëro le'e ulequi nigula ni yo.

<sup>8</sup> Na' biži beyëchonë' tatula layu. Bënë' letra tatula layu conlë zbenë'.

<sup>9</sup> Biži yaca ben' nita' ga zë Jesús, bë' beyaquë' bi una Jesús, gucabë'yaquë' pensari quieyaquë' raon leyaquë' xquia. Cana' guca beza' tu huiio tu huioyaquë'. Tanëro beza' yaca ben' gula, cana' guca beza' lao yuguluteyaquë'. Bega'n nigula ituzinë' gan' zë Jesús.

<sup>10</sup> Caora bezuli Jesús, blë'në' nuranu yaca benë' dyila'. Biži ituzi nigula bega'n gan' zë Jesús. Na'ra una Jesús rëbinë' nigula:

—Nigula, ¿ganaži yaca ben' rao luë' xquia? ¿Quele nitu nitu nunu ichugobë' quio'?

<sup>11</sup> Biži una nigula na' rëbinë' lëbë':

—Nunu ichugobë' quia', Señor.

Na'ra una Jesús rëbinë' lëbë':

—Nica në'ëdi' biichugobi'a quio'. Pues na' beyo, bira huu' bizinaquezi.

*Jesús naquë' ca quie tu gui' ta useni'n quie yugulu ben' rda lao lato lao chula*

<sup>12</sup> Unë Jesús tatula rëbinë' yaca benë':

—Naca' ca quie tu gui' ta useni'n quie yugulu ben' rda lao lato lao chula. Chi nu yaca benë' nao në'ëdi', bitayaquë' lao lato lao chula. Huadayaquë' ga rzeni' xni' gui', ga idzeleyaquë' yela' neban tuzioli.

<sup>13</sup> Na'ra una yaca ben' partido fariseo rëbiyaquë' Jesús:

—Luë' rnëlo' cule quio' cuinzo'. Ca di'idza' rnëlo' na' bibizaca'n.

<sup>14</sup> Biži una Jesús rëbinë' leyaquë':

—Ba'ala'cazi rnia' cule quia', pero zaca' di'idza' rnia', dan' banezda' gan' za'a, banezda' gan' yeya'a. Pero ca naca le'e, nica nezizile gan' za'a, nica nezizile gan' yeya'a.

<sup>15</sup> Le'e rchugobë'le cabë' raca lao yedyi layu. Pero ca naca në'ëdi', nitu nitu nunu rchugobi'a quie.

16 Pero chi ichugobi'a quie benë', hua' tu ta yu'u ni'a xnezi dan' cala cuinza' ichugobi'a, ichugobë'lëcaza' Xuza', ben' use'ela' në'ëdi'.

17 Lu'u libro ga yu'u ley quiele, rnën quie chopa ben' naca testigo. Chi tuzi ca rnayaquë', lena' nacan tali cabë' rnëyaquë'.

18 Bizi nia' le'e, në'ëdi' rnìa' cule quia', lëzi rnërë Xuza', ben' use'ela' në'ëdi', cule quia'.

19 Na'ra unayaquë' rëbiyaquë' lëbë':

—¿Gaži nao' zu xuzo'?

Bizi una Jesús rëbinë' leyaquë':

—Cabë' le'e, binubë'le në'ëdi'. Lëzi cana' binubë'le Xuza'. Chi le'e nubë'le në'ëdi', lëzi cana' huebë'rële Xuza', ben' use'ela' në'ëdi'. —Cana' una Jesús rëbinë' leyaquë'.

20 Una Jesús cana' tu nersëdinë' yaca benë' lu'u idao' rnabë'ra ga zuba tu caja ga rudze'yaquë' gun. Pero nituyaquë' bibeyažoyaquë' guxoyaquë' lëbë', dan' binedyin hora idyinnë' lao na'a yaca ben' rnabë'.

*Na Jesús: "Nitule bisaque' yeza'le gan' yeya'a"*

21 Una Jesús tatula rëbinë' leyaquë':

—Në'ëdi' hueya'a guibá ga uza'a. Le'e hueguilole në'ëdi', pero huatile du nao dula' xquia quiele le'e. Nitule bisaque' yeza'le gan' yeya'a.

22 Na'ra una yaca ben' Israel rëbiyaquë' laguedyayaquë':

—¿Cala gutinë' cuinnë'? ¿Cala lena' dan' unanë': "Bisaque' yeza'le gan' yeya'a"?

23 Na'ra una Jesús rëbinë' leyaquë':

—Le'e za'le lao yedyi layu niga, pero në'ëdi' naca' ben' za' guibá. Le'e nacale quie ben' lao yedyi layu niga, pero në'ëdi' binaca' quie ben' lao yedyi layu niga.

24 Tana' lena' rnìa' le'e, huatile du nao dula' xquia quiele le'e. Huatile conlë dula' xquia quiele chi biralele ca nia' nu naca'.

25 Na'ra unayaquë' rëbiyaquë' Jesús:

—¿Nuži naco' luë'?

Na' una Jesús:

—Desde dza na'te, baonia' le'e nu naca'.

26 Tazë de ta inia' le'e, lëzi tazë de ta ichugulia' quiele le'e. Xuza', ben' use'ela' në'ëdi', rnëguë' puro di'idza' naca li. Ca di'idza' baonia' le'e, lëdi'idza' na' beda' una Xuza' në'ëdi'. —Cana' una Jesús rëbinë' leyaquë'.

27 Pero na' yaca ben' biuyoñë'eyaquë' cati unë Jesús quie Xuzinë'.

28 Tana' lena' unë' rëbinë' leyaquë':

—Cati baolisale në'ëdi' sibi, në'ëdi' bichi yugulu benë', lëcana' inezile nuži naca'. Lëzi inezirële cala ta racazi la'adya' rua', den' rnëcaza' ca ta bzioñë'e Xuza' në'ëdi'.

29 Xuza', ben' use'ela' në'ëdi', zulëcazë' në'ëdi' tuže. Birsannë' në'ëdi' zua' tuzä', dan' ruzucaza' di'idza' cabë' rnanë'. —Cana' una Jesús rëbinë' leyaquë'.

30 Ca be yaca benë' ca una Jesús, caora na' gule yaca ben' zë quienë'.

*Ni rnën quie yaca ben' rale len yaca ben' birale*

31 Bizi una Jesús rëbinë' yaca ben' Israel con bala yaca ben' rale quienë':

—Chi le'e naole hue quiele can' rnìa' le'e, nacacazile ben' quia'.

32 Lena' huanezcazole nacan tali ta una Diuzi. Lena' dan' gacale libre. —Cana' una Jesús rëbinë' leyaquë'.

33 Na'ra unayaquë' rëbiyaquë' lëbë':

—Nëto' nacando' zi'isuba Abraham. Desde dza na'te banacando' libre. ¿Cómo luè' nao' gacando' libre?

<sup>34</sup> Na'ra una Jesús rëbinë' leyaquë':

—Tali ca rnia', nu ben' rue xquia, naca quieyaquë' ca quie ben' nada'o. Naca xquia quieyaquë' ca quie xa'nyaquë'.

<sup>35</sup> Nu ben' nada'o, binaquë' familia quie xa'nnë'. Pero nu zi'i xa'nnë', nacacazibi' familia quie xa'ne.

<sup>36</sup> Chi yezi zi'i Diuzi xquia quiele, talicazi nacale libre.

<sup>37</sup> Banezda' le'e nacale ben' zi'isuba Abraham, pero re'enle gutile në'ëdi', dan' rsebi'le di'idza' rnia' le'e.

<sup>38</sup> Në'ëdi' rnia' cabë' una Xuza' në'ëdi'. Pero na' le'e ruzule di'idza' cabë' mandado rue ben' naca xuzile le'e. —Cana' una Jesús rëbinë' leyaquë'.

<sup>39</sup> Na'ra unayaquë' rëbiyaquë' Jesús:

—Abraham naquë' xuzindo'.

Bizi una Jesús rëbinë' leyaquë':

—Chi nacale dugalo zi'i Abraham, huerële can' bënë'.

<sup>40</sup> Ba'ala'cazi aonia' le'e di'idza' li ca ta una Diuzi në'ëdi', na' le'e re'enle gutile në'ëdi'. Bibë Abraham cana'.

<sup>41</sup> Le'e ruele laga ca rue ben' naca xuzile.

Na'ra unayaquë' rëbiyaquë' Jesús:

—Binacando' zi'i ben' tula. Tuzi Diuzi naquë' xuzindo'.

<sup>42</sup> Bizi una Jesús rëbinë' leyaquë':

—Chi tali naca Diuzi xuzile, huadyë'ële në'ëdi' dan' uza' ga zu Diuzi. Cala bida' ta racazi la'adya', den' bida' tanun quie Diuzi.

<sup>43</sup> ¿Bixquien' bire'enle yele con ca rnia'? Pues nia' le'e, birele dan' bire'enle hue quiele con ca rnia'.

<sup>44</sup> Xan' taxi'ibi' naca xuzile. Lena' dan' re'enle huerële cabë' ruenan. Desde cana'te rutinan benë', biruenan tali. Ca pensari yu'u laxta'onan, cana' rzi'nan yë'. Nacanan ben' huizi' yë'. Nacarënan xuzi yugulu ben' huizi' yë'.

<sup>45</sup> Dan' rnia' le'e ta naca tali, ta yu'u ni'a xnezi, quie lena' bire'enle galele quia'.

<sup>46</sup> ¿Nuzi le'e ulenacara chi në'ëdi' de dula' quia'? Chi rnia' ta naca tali, ¿bixquien' biralele quia'?

<sup>47</sup> Nu ben' naca quie Diuzi, uzë'nagayaquë' xti'idza' Diuzi. Pero le'e, dan' binacale ben' quie Diuzi, lena' bire'enle uzë'nagale hue quiele xti'idza' Diuzi. —Cana' una Jesús rëbinë' leyaquë'.

### *Tu binegalo Abraham bazucazi Cristo*

<sup>48</sup> Na'ra una yaca ben' Israel rëbiyaquë' Jesús:

—¿Cala tali rando' naco' ben' samaritano bayu'ulo' bichi be xi'ibi'?

<sup>49</sup> Bizi una Jesús rëbinë' leyaquë':

—Biyu'a bichi be xi'ibi'. Ca ta rua', rua' Xuza' ben' ze. Na' bizi le'e, rutasi runirole në'ëdi'.

<sup>50</sup> Në'ëdi' bihua' cuina' ben' ze, pero zucazi ben' rue në'ëdi' ben' ze. Lëbë' ichugobë'në' quiele.

<sup>51</sup> Tali ca rnia' le'e, chi nu yaca ben' hue quie di'idza' rnia', bigaticazinë'.

<sup>52</sup> Na'ra una yaca ben' Israel rëbiyaquë' lëbë':

—Baguequélindo' yu'ucazo' bichi be xi'ibi'. Pues Abraham len yaca ben' uidxogue' xti'idza' Diuzi, gutiyaquë'. Na' bizi luè' nao': "Chi nu yaca benë' hue quie di'idza' rnia', bigaticazinë'."

<sup>53</sup> ¿Nacaro' luè' ben' ze ca xuzixta'ondo' Abraham? Lèbè' gutinè', lèzirè gutirè yaca los demás ben' udixogue' xti'idza' Diuzi, na'a ¿ca nuži nao' naco' luè'?

<sup>54</sup> Na'ra una Jesús rëbinè' leyaquè':

—Chi rua' cuina' ben' ze, bibi zaca'n ca nia'. Pero Xuza', ben' nale naca Diuzi quiele, lènè' ruenè' n'è'di' ben' ze.

<sup>55</sup> N'è'di' nia' le'e binubè'le lèbè', pero n'è'di' sí, nubè'da' lèbè'. Chi inaro de que nia' binubè'da' lèbè', lena' nacaria' ben' huizi' yè' ca le'e. Pero biinia' can', como dan' nacan tali nubè'da' lèbè', ruzua' di'idza' quienè'.

<sup>56</sup> Bedaohue xuzixta'ole Abraham dza blè'ënè' bdyina' yedyi layu.

<sup>57</sup> Na'ra una yaca ben' Israel rëbiyaquè' Jesús:

—Binedyinlo' gatzo gayuhua iza, ¿cómo luè' nao' blè'èlo' xuzixta'ondo' Abraham?

<sup>58</sup> Na'ra una Jesús rëbinè' leyaquè':

—Tali ca rnia' le'e, tu binegalo xuzixta'ole Abraham, bazucaza' n'è'di'. —Cana' una Jesús rëbinè' leyaquè'.

<sup>59</sup> Bizi na' uzi'yaquè' yo gu'unyaquè' quiyaquè'n Jesús. Na' ubiguè' tzala'la lu'u idao' rnabè'ra berogue' bedenè' zioquè' ladoyaquè'.

## 9

### *Byue Jesús tu ben' laochula*

<sup>1</sup> Gan' uzi' Jesús zionè' blè'ënè' tu ben' laochulacazi nacatè' gologuè' naquè' xcuidi'.

<sup>2</sup> Na'ra una yaca ben' quie Jesús rëbiyaquè' lèbè':

—Maestro, ¿bixquien' golo ben' niga nechula laohuè'? ¿Nu quie dula' xquia guca laohuè' can'? ¿Idula' xquia quie xuzè', o chi dula' xquia quie cuinzè'?

<sup>3</sup> Na'ra una Jesús rëbinè' yaca ben' quiè':

—Cala gucan quie dula' xquia quie cuinzè', ni quele dula' xquia quie xuzinè'. Gucan can' tacuenda inezi yaca benè' cabè' hue Diuzi yela' huaca quienè' gacalènè' lèbè'.

<sup>4</sup> Na' nia' le'e na'a te dza naca baguin racaten dyabè' hua' dyin quie Xuza', ben' use'ela' n'è'di'. Cati baodze', nuranu saque' hue dyin.

<sup>5</sup> Tu raca zua' lao yedyi layu, naca' ca quie gui' rseni'n ga naca chula ta il'è'è yaca benè'.

<sup>6</sup> Ude beyudyi una Jesús cana', uru'unè' zen' layu, bènè' ledao' gun' conlè zen' quienè'. Ude na' uzi'nè'n blèpinè'n lao ben' laochula.

<sup>7</sup> Na'ra una Jesús rëbinè' ben' laochula:

—Uyo yetibi laolo' lu'u pozo nisa lao Siloé, ta inaro xti'idza'ro: Pozo nisa quie ben' uyo lao laza ben' tula.

Bizi uyo ben' laochula yetibinè' laohuè', na' bizi bedyinnè' zan yu'u quienè' baoyalo laohuè' barlè'ënè'.

<sup>8</sup> Na'ra yaca ben' nita' ga'ala' ga zu ben' abeyalo laohue, len yacara los demás ben' tula, ben' bezaque chi lènè' reque'nè' rnabè' gun, caora na' unayaquè' rëbiyaquè' laguediyaquè':

—¿Cala ben' niga reque' rnaba gun yugu dza?

<sup>9</sup> Bala yaca benè' unayaquè':

—Lèlèbè'.

Ibalayaquè' unayaquè':

—Lèbè' raquero.

Pero bizi cuincazi ben' beyalo laohue unè':

—Lènè'èdi'.

<sup>10</sup> Na'ra unabayaquè' lèbè':

—¿Biži bao' ta belë'ëlo'?

11 Na'ra bequëbinë' rëbinë' leyaquë':

—Lëben' lao Jesús bënë' gun' blëpinë'n laohua'. Bë' beyudyi blëpinë' gun' laohua', na'ra unë' në'ëdi': "Uyo yetibi laolo' lu'u pozo nisa lao Siloé." Biži na' uya'a yetiba' laohua', cana' guca' barlë'ëda'.

12 Na'ra unabayaquë' lënë':

—¿Ganaži ben' nao' cana'?

Na'ra unë':

—Binezda' gala zionë'.

*Yaca ben' partido fariseo, pquëpiyaquë' ben' beyalo laohue bi guca quienë'*

13 Na'ra uquië'yaquë' ben' beyalo laohue psedyinyaquë' lëbë' gan' nita' yaca ben' partido fariseo.

14 Cana' bëyaquë', dan' beyue Jesús laohue ben' na' dza saodo, dza huezila'adyi'.

15 Na'ra pquëpiyaquë' ben' beyalo laohue ca guca dan' belë'ënë'. Cani unë' rëbinë' leyaquë':

—Blëpiguë' gun' laohua'. Ude na' uya'a yetiba'n. Cana' guca belë'ëda'.

16 Na'ra una bala yaca ben' partido fariseo:

—Ben' nao' bë can', binaquë' ben' quie Diuzi, dan' bibënë' bala dza huezila'adyi' quiero.

Na' biži ibalayaquë' unayaquë':

—Chi naquë' ben' napa dula' xquia, ¿cabiži guca bënë' yela' huaca ta belë'ë ben' niga?

Cana' guca unëyaquë' di'idza' udeudela.

17 Na'ra unayaquë' rëbiyaquë' ben' beyalo laohue:

—¿Cabiži nao' luë' quie ben' nao' beyue laolo'?

Na'ra unë' rëbinë' leyaquë':

—Në'ëdi' rnia' naquë' ben' use'ela' Diuzi. —Cana' unë' rëbinë' yaca ben' partido fariseo.

18 Pero bigulecaziyaquë' chi tali guquë' ben' laochula. Na' tacuenda yezacalao bi guca quienë', guziyaquë' xuzi zna' ben' beyalo laohue.

19 Na'ra unabayaquë' xuzi zna' ben' na' rëbiyaquë' leyaquë':

—¿Ži'ile ni unale nechula laonë' cati uzutenë'? Chi nale nechula laonë', ¿cómo barlë'ënë' na'a?

20 Na' biži unayaquë' rëbiyaquë' leyaquë':

—Nando' ži'indo'. Nezindo' desde bdao'tenë' nechula laonë'.

21 Binezcazindo' bi guca dan' barlë'ënë'. Nica nezizindo' nu ben' bë ta belë'ënë'. Banacanë' ben' huaca. Ulenabacaranë' lënë'. Huananë' cuinnë' bi guca quienë' dan' barelë'ënë'.

22 Cana' una xuzi zna' ben' beyalo laohue, dan' rdzebiyaquë' bi hue yaca ben' rñabë', como dan' banuži'a yaca ben' rñabë' bihue'yaquë' lato tzu'u ben' lu'u idao' sinagoga, ben' rale quie Jesús naquë' ben' Cristo.

23 Tana' lena' unayaquë' rëbiyaquë' yaca ben' rñabë': "Banaquë' ben' huaca. Ulenabacaranë' lënë'."

24 Biži yaca ben' rñabë' guziyaquë' tatula ben' beyalo laohue, unayaquë' rëbiyaquë' lëbë':

—Tali una nëto', dan' huecazi Diuzi ca inao'. Biži nëto' banezindo' ben' na' naquë' ben' de dula' xquia quie.

25 Na'ra una ben' beyalo laohue rëbinë' leyaquë':

—Binezicazida' chi naquë' ben' de dula' xquia quie, o chi bede dula' xquia quienë'. Zelao na' ta nezda', guca' ben' laochula, biži na'a barelë'ëda'.

26 Lena' unabayaquë' lëbë' tatula:

—¿Biži bënë' quio' dan' nao' beyuenë' luë'?

27 Na'ra unë' rëbinë' leyaquë':

—Baonia' le'e can' bënë', pero bibi bala ruele quia'. ¿Bixquien' rnabale në'ëdi' tatula? ¿Cala re'enle inaorële lëbë', gacale ben' quienë'?

28 Biži mazara bdza' yaca ben' rnabë' lëbë' rëbiyaquë' lëbë':

—Luë' naolo' ben' na'. Biži nëto' naondo' rzundo' di'idza' ca una Moisés.

29 Nëto' banezindo' dyë'ëdi ca bë Diuzi bë'lënë' Moisés di'idza'. Pero quie ben' na', nica nezindo' ga za'në'.

30 Na'ra unë ben' beyalo laohue rëbinë' leyaquë':

—Nacan ta yebanero ca nale, nale binezile ga za'në'. ¿Cómo binezile ga za' tu ben' guca beyuenë' në'ëdi' barlë'ëda' na'a?

31 Dyë'ëdi neziro bire Diuzi yaca ben' napa dula' xquia. Con tuzi yaca ben' rionla'adyi' lëbë', yaca ben' rue quie xti'idzë', lëjë' re Diuzi quiejë'.

32 Desde ure'te lao yedyi layu, nunu nehue cabë' bë ben' niga, bënë' ta yelë'ë tu ben' laochulacazi nacatë' gologuë'.

33 Chi ben' na' biuza'në' tzionë' lao Diuzi, bibi de huenë' cuinzinë'.

34 Na'ra una yaca ben' partido fariseo rëbiyaquë' lëbë':

—Yela' ben' mala quio' naco' can' gololo'. ¿Na' como luë' re'enlo' yexi'idze'lo' nëto' uzioñe'elo' nëto'?

Can' guca ulioyaquë' lëbë' lu'u idao' sinagoga.

### *Ben' birale quie Jesús naca quieyaquë' ca quie ben' laochula*

35 Biži Jesús unezinë' ulio yaca ben' partido fariseo ben' baoyalo laohue lu'u idao' sinagoga. Na' bedila Jesús lëbë' unë' rëbinë' lëbë':

—¿Ralelo' quie ben' naca ži'i Diuzi?

36 Na'ra una ben' baoyalo laohue rëbinë' Jesús:

—Señor, una nu ben' na' tacuenda galeda' quienë'.

37 Na'ra una Jesús rëbinë' lëbë':

—Në'ëdi', ben' ru'elë luë' di'idza', naca' ben' na'.

38 Caora na' uditzo žibinë' lao Jesús rëbinë' lëbë':

—Baraleda' quio', Señor.

39 Na' biži una Jesús rëbinë' lëbë':

—Në'ëdi' bida' lao yedyi layu ta hua' juicio. Lëzirë bida' tacuenda yelë'ë yaca ben' birlë'ë. Pero quie yaca ben' bire'en gale quia', bida' ta yechula laohueyaquë'.

40 Biži bala yaca ben' partido fariseo nita'yaquë' ga'ala' ga zë Jesús, bë' beyaquë' can' unanë', na'tera unayaquë' rëbiyaquë' lëbë':

—¿Biži ca nao'? ¿Nacarëndo' ben' laochula?

41 Na'ra una Jesús rëbinë' leyaquë':

—Chi tali binezile bi ruele, bide dula' xquia quiele. Pero como dyë'ëdi banezile bi ruele, lena' decazi dula' xquia quiele.

## 10

### *Una Jesús tu di'idza' quie beco' ži'ila' len quie ben' rapa lëba', ben' naca xa'mba'*

1 Tali ca rnia' le'e, nu ben' bitzu'u ru'a corrale ga yu'u beco' ži'ila', den' negachi' ru'unë' xcu'udzule, lëben' na' naquë' ben' uban, ben' re'en cuan beco' ži'ila'.

2 Ben' ru'u ru'a corrale, ga yu'u beco' ži'ila', lëben' na' naquë' dugalo ben' rapa beco' ži'ila', ben' naca xa'mba'.

<sup>3</sup> Ben' rapa ru'a corrale, rsaloguè' ru'a corrale ta tzu'u ben' rapa beco' zi'ila', ben' naca xa'mba'. Biži rezaque yaca beco' zi'ila' xchi' ben' rapa lèba', ben' naca xa'mba'. Rëžiguè' tu tuba' según cabè' laoba' quie quiejaba' ta cuioguè'ba' lu'u corrale.

<sup>4</sup> Rde reyudyi rbioguè' lao yuguluteba', na' rebialao ben' rapa lèba' laoyacaba'. Biži leyacaba' yenaoyacaba' ben' rapa lèba', ben' naca xa'mba' dan' rezaqueyacaba' xchi'nè'.

<sup>5</sup> Pero binaoyacaba' ben' binubè'yacaba'. Huažunoyacaba' lèbè', dan' binubè'yacaba' xchi'nè'. Rezaqueyacaba' cala ben' rapa lèba', ben' naca xa'mba'. —Cana' una Jesús rëbinè' yaca benè'.

<sup>6</sup> Lètu di'idza' ni gudyi Jesús yaca benè', pero biži biuyofne'ejè' bi na di'idza' una Jesús quie xa'n beco' zi'ila'.

*Jesús naquè' dugalo ben' rapa beco' zi'ila', ben' naca xa'mba'*

<sup>7</sup> Na'ra una Jesús tatula rëbinè' leyaquè':

—Tali ca rnia' le'e, nè'èdi' naca' ca quie ru'a corrale ga ru'u yaca beco' zi'ila'.

<sup>8</sup> Yaca ben' babida caora bineguida', gu'unyaquè' cuanyaquè' yaca beco' zi'ila'. Pero biži yaca beco' zi'ila' bibèyacaba' bala inaoyacaba' leyaquè'.

<sup>9</sup> Dan' naca' ca quie ru'a corrale, lena' con nu yaca ben' tzu'u ru'a corrale gan' zua', lèlèyaca ben' na' gata' yela' neban quiejè' tuzioli. Huaca quieyaquè' ca quie yaca beco' zi'ila' ru'u rero lu'u corrale ga de guiži ya'a ta gaoyacaba'.

<sup>10</sup> Rida yaca ben' uban ta cuanyaquè' gutiyaquè' udyiagu'yaquè' yaca benè'. Pero bida' nè'èdi' ta gata'cazi yela' neban quieyaquè' tuzioli.

<sup>11</sup> Nè'èdi' naca' dugalo ben' rapa beco' zi'ila', ben' naca xa'mba'. Zua' puesto gatia' tacuenda bicuiagui'yacaba'.

<sup>12</sup> Pero nu ben' rue dyin de lažo, cati ilè'ènè' za' lobo, caora na' izunoguè' uca'nnè' yaca beco' zi'ila', dan' binaquè' dugalo ben' rapa beco' zi'ila', ben' naca xa'mba'. Binacayacaba' bia quienè'. Cana' gaca guida lobo guxuba' utzatzaba' yaca beco' zi'ila'.

<sup>13</sup> Pero ben' binaca xa'mba' rueguè' dyin de lažo, lena' užunoguè' bibi cuenda huenè' quie yaca beco' zi'ila'.

<sup>14-15</sup> Nè'èdi' naca' dugalo ben' rapa beco' zi'ila', ben' naca xa'mba'. Cabè' Xuza' nubè'nè' nè'èdi', cana' nubè'da' Xuza'. Lèžirè cabè' nubè'da' yaca ben' naca ca quie beco' zi'ila' quia', cana' nubè'yaquè' nè'èdi'. Zua' puesto gatia' tacuenda bicuiagui'yaquè'.

<sup>16</sup> Lèžirè nita' yaca ben' tula nacarèyaquè' ca quie beco' zi'ila' quia'. Bizuyaquè' ni len nè'èdi'. Lena' huatzaži'ayaquè' guidayaquè' ta sulèyaquè' nè'èdi', dan' baraleyaquè' quia'. Nacarèyaquè' tuzi len yaca los demás ben' barale quia'. Cana' iyacayaquè' tu žezi, na' tuza' nè'èdi' gaca' xa'nyaquè'.

<sup>17</sup> Xuza' nedyè'ènè' nè'èdi' dan' zua' puesto gatia', te na' yezi'a yela' neban quia' tatula.

<sup>18</sup> Nunu rzaque' guti nè'èdi' chi bihua'yaquè' lato. Gusto quia' zua' puesto gatia', te na' yezi'a yela' neban quia' tatula. Cana' mandado bè Xuza' nè'èdi'.

<sup>19</sup> Ude beyudyi be yaca ben' Israel ca una Jesús, na'tera unèyaquè' udeudela.

<sup>20</sup> Yaca ben' zè unèyaquè' quienè' rëbiyaquè' laguedyiyaquè':

—¿Bixquien' ruele bala rzènegale quienè'? Yu'u bichi be xi'ibi' lu'u laxta'onè', naquè' ben' loco.

<sup>21</sup> Biži ibalayaquè' unayaquè':

—Nu ben' yu'u bichi be xi'ibi', birnènè' ca rnè ben' ni. ¿Quele, chi ben' yu'u bichi be xi'ibi', bisaque'nè' yeyuenè' ben' laochula ta yelè'ènè'?



*Yaca ben' Israel besebi'yaquë' Jesús*

<sup>22</sup> Bizi bdyin dza hue yaca ben' Israel lani ta yeza'la'adyi'yaquë' dza guca la'iya idao' r nabë'ra quieyaquë'. Biu' bëyaquë' lani, nacan biu' zaga.

<sup>23</sup> Uyu'u Jesús lu'u idao' r nabë'ra rdanë' bago ru'a idao' nezi'laonan ru'a idao' Salomón.

<sup>24</sup> Bizi yaca ben' r nabë' quie ben' Israel uyëchoyaquë' Jesús rnayaquë' rëbiyaquë' lëbë':

—¿Batazi iyudyi rutëbilo' nëto' ca di'idza' inao' nëto'? Chi luë' naco' ben' Cristo, una nëto' tu lasagazi.

<sup>25</sup> Na'ra una Jesús rëbinë' leyaquë':

—Baonia' le'e, pero biralele. Ca naca yela' huaca babia' conlë Xuza', lena' rulu'enan le'e nu naca'.

<sup>26</sup> Pero le'e biralele quia', dan' binacale ben' naca beco' zi'ila' quia' ca ta baonëcaza' le'e.

<sup>27</sup> Bizi yaca ben' naca beco' zi'ila' quia', rzënegayaquë' di'idza' rnia'. Në'ëdi' nubë'da' leyaquë', cana'ra guidayaquë' inoayaquë' në'ëdi'.

<sup>28</sup> Në'ëdi' hua'yaquë' yela' neban tuzioli ta bicuiagui'caziyaquë'. Nitu nitu nunu saque' cuba leyaquë' lao na'a como dan'

<sup>29</sup> Xuza' bënnë' leyaquë' në'ëdi'. Nacara Xuza' ben' zera ca yaca benë'. Nitu nitu nunu saque' cuba leyaquë' lao na'a Xuza'.

<sup>30</sup> Xuza' len në'ëdi' nacando' tuže. —Cana' una Jesús rëbinë' leyaquë'.

<sup>31</sup> Bizi yaca ben' r nabë' quie ben' Israel, tatula uzi'yaquë' yo, gu'unyaquë' quiyaquë' Jesús.

<sup>32</sup> Pero una Jesús rëbinë' leyaquë':

—Zë lasa bia' tadya'a delante lao le'e conlë yela' huaca quie Xuza'. Chi bia' tadya'a, ¿bixquien' re'enle quile në'ëdi' yo?

<sup>33</sup> Na'ra unayaquë' rëbiyaquë' Jesús:

—Cala re'enndo' quindo' luë' yo dan' babao' tadya'a, pero dan' rnaya'lo' Diuzi ca rnao'. Benë'cazi naco', na' ruelo' cuinlo' ca Diuzi.

<sup>34</sup> Na'ra una Jesús rëbinë' yaca ben' r nabë':

—Lë'ë guichi ga bzu Moisés di'idza' la'iya quie Diuzi, rguixogue'n ca una Diuzi rëbinë' yaca benë' cani: “Le'e nacale ca yaca diuzi.”

<sup>35</sup> Cana' una Diuzi quie yaca ben' uzënega quienë' unë' rëbinë' leyaquë': “Le'e nacale ca yaca diuzi.” Na' bizi baneziro di'idza' licazi zun lë'ë guichi la'iya quie Diuzi.

<sup>36</sup> Chi Diuzi uliogüë' në'ëdi' use'ela'në' në'ëdi' lao yedyi layu niga, ¿bixquien' le'e nale rnaya' Diuzi dan' nia' naca' zi'i Diuzi?

<sup>37</sup> Chi birzua' di'idza' cabë' rna Xuza' në'ëdi', bigalecazile quia'.

<sup>38</sup> Pero chi rzua' di'idza' cabë' rna Xuza' në'ëdi', ruen zi galele quia' por nun quie len tacuenda inezile tu lasagazi nacalia' Xuza' tuže, lëscan' nacalë Xuza' në'ëdi' tuže. —Cana' una Jesús rëbinë' leyaquë'.

<sup>39</sup> Bizi yaca ben' r nabë', tatula gu'unyaquë' guxuyaquë' Jesús ta hueyaquë' lëbë' preso, pero aode ulanë' lao na'a yaca ben' na'.

<sup>40</sup> Bizi beyo Jesús tatula itzala' yao Jordán. Na' bega'nnë' gan' bë' Juan lao yaca benë' dza na'te.

<sup>41</sup> Yaca ben' zë uyoyaquë' yena'yaquë' Jesús. Na'ra unayaquë' rëbiyaquë' laguediyaquë':

—Ba'ala'cazi bibë Juan yela' milagro, pero yugulu ca ta unë' quie ben' niga nacan tali.

<sup>42</sup> Na'ra yaca ben' zë uyo gan' zënë', guleyaquë' quienë'.

## 11

*Ni rnën cabë' guca cati guti Lázaro*

<sup>1</sup> Na' uzu tu ben' guca zhue', ben' lao Lázaro. Naquë' ben' yedyi Betania lënë' chopa zannë', María len Marta.

<sup>2</sup> LëMaría na' uyonë' dza na'te yelatonë' aceite rla' zixi zeo ni'a Jesús. Ude na' besebidyinë'n conlë' guitza' guichonë'.

<sup>3</sup> Cana' guca use'ela' rupa zan Lázaro tu ben' uyo gan' zu Jesús unë' rëbinë' lëbë':

—Señor, raca zhue' Lázaro, ben' naca amigo quio'.

<sup>4</sup> Bë' be Jesús ca una ben' na', na' unë' rëbinë' lëbë':

—Ca naca yela' hue' racanë', bisuen gutin lëbë'. Raca zhue'në' tacuenda ulu'en ca naca yela' huaca quie Diuzi, lente yela' huaca quia' në'ëdi' zi'i Diuzi.

—Cana' una Jesús rëbinë' lëbë'.

<sup>5</sup> Ba'ala'cazi nedyë'ëtzegue Jesús Lázaro len Marta len žilanë' María,

<sup>6</sup> bilaoyotenë' caora benë' raca zhue' Lázaro. Bega'nnë' uzurë' ichopa dza gan' zuë'.

<sup>7</sup> Guca lao chopa dza unë' rëbinë' yaca ben' quienë':

—Uletza' tzioro tatula estado Judea.

<sup>8</sup> Na'ra una yaca ben' quie Jesús rëbiyaquë' lëbë':

—Maestro, ta zaracagazi gu'un yaca ben' quiyaquë' luë' yo gan' nao' tzioro. Na' biži luë', ¿re'enlo' tzioro tatula?

<sup>9</sup> Biži una Jesús rëbinë' leyaquë':

—Nu'acazi chipchopa hora lao tu dza. Chi ra'o rdaro te dza, bicha'oro dan' rseni' xni' obidza.

<sup>10</sup> Pero chi ra'o rdaro lao chula, decazide huacha'oro, dan' birseni' xni' obidza ilë'ëro.

<sup>11</sup> Te beyudyi una Jesús cana', na'ra unë' rëbinë' yaca ben' quië':

—Ben' amigo quiero Lázaro, barasinë', pero huaya'a usebia'në'.

<sup>12</sup> Na'ra una yaca ben' quienë' rëbiyaquë' lëbë':

—Señor, chi lëbë' rasizinë', hueyacanë'.

<sup>13</sup> Pero unë' Jesús can' dan' baguti Lázaro, cala rasizinë'. Biži raque yaca ben' quienë' de que rasizi Lázaro.

<sup>14</sup> Na'ra una Jesús dyë'ëdi rëbinë' leyaquë':

—Baguticazi Lázaro.

<sup>15</sup> Redaohueda' dan' biuzua' na' ta ilë'ëda' cati guti Lázaro. Redaohueda' dan' cabë' guca quienë' nacan ta gacalën le'e ta galerale quia' në'ëdi'. Pues na' uletza' tzioro gan' denë'.

<sup>16</sup> Biži Tomás, ben' uxubayaquë' laohue ben' guidi', unë' gudyinë' laguedyinë', ben' quie Jesús:

—Uletza' tziolëronë' ta gatilëronë' tzaže.

*Naca Jesús ben' useban yaca ben' huati*

<sup>17</sup> Caora bdyin Jesús gan', bazio lao tapa dza babgachi'la Lázaro lu'u beló yo.

<sup>18</sup> Yedyi Betania rega'n ga'ala' ga re' ciudad Jerusalén. Nacan chopa legua yugatzo.

<sup>19</sup> Zë yaca ben' Israel uyoyaquë' gan' nita' Marta len María, reyuežeyaquë' leyaquë' dan' guti zanyaquë'.

<sup>20</sup> Bë' be Marta baza' Jesús, na' uyoguë' yelezanë' lëbë'. Pero María bega'nnë' zan yu'u quienë'.

<sup>21</sup> Na'ra una Marta rëbinë' Jesús:

—Señor, chan' zucalo' lao' nêto' niga, beyaca Lázaro zanndo', bigutinê'.

<sup>22</sup> Nezda' yugulu ta inabo' Diuzi, guncazinê'n luê'.

<sup>23</sup> Na'ra una Jesús rëbinê' lëbê':

—Bi' zanle huebannê' tatula.

<sup>24</sup> Na' bequëbi Marta rëbinê' Jesús:

—Banezda' hueban bi' zana' dza iyudyi lao yedyi layu, dza yeban yugulu yaca ben' baguti.

<sup>25</sup> Biži una Jesús rëbinê' lëbê':

—Nê'ëdi' naca' ben' useban yaca ben' huati, yeyu'ayaquê' yela' neban tatula. Con nu benê' gale quia', ba'ala'cazi gatiyaquê', huebanyaquê' tatula.

<sup>26</sup> Nia' luê' yaca ben' neban, yaca ben' rale quia', tuzioli bitziojê' lao gui' gabila. ¿Bagulelo' can' baonia'?

<sup>27</sup> Na'ra una Marta rëbinê' Jesús:

—Señor, raleda' quio' luê' naco' ben' Cristo, ži'i Diuzi. Luê' naco' ben' una Diuzi ise'ela'nê' lao yedyi layu. —Cana' unê' rëbinê' Jesús.

### *Uredyi Jesús gan' pcachi'yaquê' Lázaro*

<sup>28</sup> Ude beyudyi una Marta can', uzê'ë yeguëdyinê' ben' žilanê' María. Unê' di'idza' balanži rëbinê' lëbê':

—Baza' Maestro, guëžinê' luê'.

<sup>29</sup> Ca be María ca una Marta, laoza'tenê' zionê' gan' zê Jesús.

<sup>30</sup> Binetzu'u Jesús la'o yedyi. Tu neza nenita'lënê' yaca ben' quiê' ga bedilanê' Marta.

<sup>31</sup> Yaca ben' bdyin žan yu'u, caora blê'ëyaquê' uzuli María uza'nê' zionê' taria, lëscan' uži'rëyaquê' xnezayaquê' zioyaquê' naoyaquê' lëbê'. Guqueyaquê' chi zionê' cuedyinê' gan' pcachi'yaquê' Lázaro.

<sup>32</sup> Biži cati bdyin María gan' zê Jesús, uditzu žibinê' lao Jesús, unê' rëbinê' lëbê':

—Señor, chan' zucalo' lao' nêto' niga, beyaca Lázaro zanndo', bigutinê'.

<sup>33</sup> Biži cati blê'ë Jesús rbedyi María len yaca ben' zio nao lëbê', rdëbinê' guca beyëchi' lu'u laxta'onê'.

<sup>34</sup> Na'ra una Jesús rëbinê' leyaquê':

—¿Ga mero pcachi'lenê'?

Na' biži unayaquê':

—Señor, ya' ilê'ëlo'.

<sup>35</sup> Biži na' uredyi Jesús.

<sup>36</sup> Na'ra una yaca ben' ziorê nao:

—Ulena', lega nedyê'ënê' lëbê'.

<sup>37</sup> Biži bala yaca ben' ziolê leyaquê' unayaquê':

—Ben' niga bënê' ta belê'ë ben' birlê'ë, ¿cómo na' bibi bënê' ta iyaca Lázaro ta bigatinê'?

### *Ni rnên cabê' bë Jesús psebannê' Lázaro*

<sup>38</sup> Biži Jesús racatzeguenê' beyëchi' tatula. Na' ubiga'nê' bago ru'a beló yo gan' pcachi'yaquê' Lázaro. Na' da' tu yo že ru'a beló.

<sup>39</sup> Lena' una Jesús rëbinê' leyaquê':

—Ulecuba yo da' ru'a beló.

Biži Marta, žan ben' huati, unê' rëbinê' Jesús:

—Señor, bazio lao tapa dza gutinê', barla'nê' žigo.

<sup>40</sup> Na'ra una Jesús rëbinê' lëbê':

—¿Cala baonia' luê', chi ralelo' can' baonia', hualê'ëlo' hue Diuzi yela' huaca quienê'?

41 Caora na' udubayaquë' yo da' ru'a beló. Bizi na' una' Jesús sibi ladza, blidzanë' Diuzi:

—Xuza', diuxcalelo' dan' relo' cati nia' luë'.

42 Nezcazida' relo' cati rnia' luë'. Pero por nun quie yaca ben' nita' niga, lena' bë'lia' luë' di'idza' zaquë'lao laoyaquë' tacuenda uzë'nagayaquë' ineziyaquë' luë' use'elo' në'ëdi'.

43 Ude beyudyi unë Jesús can', na' unë' zidzo unë':

—Lázaro, bero gan' delo' na'.

44 Caora na' bero Lázaro gan' denë'. Nedubi la'ari' na'anë' len ni'anë'. Lëzi bdaco la'ari' laohuë'. Na'ra una Jesús rëbinë' leyaquë':

—Ulexëdyi la'ari' dubi na'anë' len ni'anë'. Ulesannë' yeyoguë'.

*Bapsaqueyaquë' ca hueyaquë' guxuyaquë' Jesús*

(Mt. 26.1-5; Mr. 14.1-2; Lc. 22.1-2)

45 Yaca ben' ziolë María gan', blë'ëyaquë' cabë' bë Jesús besebannë' Lázaro. Lëcana' yaca ben' zë guleyaquë' quienë'.

46 Bizi balayaquë' uyoyaquë' yetixogue'yaquë' yaca ben' partido fariseo cabë' bë Jesús.

47 Na'ra yaca ben' partido fariseo len yaca xan' pxuzi bedupayaquë' bëyaquë' junta len yaca los demás ben' rnabë'. Na'ra unayaquë' rëbiyaquë' laguedyiaquë':

—¿Ca bizi huero quie ben' na'? Lega ruenë' yela' huaca ta binelë'ëro.

48 Chi hue'roguë' lato tanë' huenë' can', na' huanao yaca ben' zë lënë'. Bizi huadza' yaca ben' rnabë' quie ben' romano, huase'ela'yaquë' soldado udyi-agui'yaquë' idao' rnabë'ra quiero lente ciudad quiero. —Cana' unayaquë' rëbiyaquë' laguedyiaquë'.

49 Bizi ben' naca xan' pxuzi lëiza na', ben' lao Caifás, unë' gudyinë' leyaquë':

—Le'e netondole ca di'idza' rnale.

50 Nica nenezile nacaran dya'a quiero gati tuzi benë' lao laza yaca ben' yedyi, cala ca ta gati yuguluro. —Cana' una Caifás.

51 Dan' lëiza na' nacanë' xan' pxuzi unë' can'. Pero cala cuenta quienë' unë' can'. Biunezinë' unë' cuenta quie Diuzi cati unë' gati Jesús lao laza yaca ben' Israel.

52 Pero cala tuzi lao laza ben' Israel gati Jesús, lëscan' gati Jesús lao laza yugulu yaca ben' gale quienë', yaca ben' nedzatza nita' yaca yedyi tula.

53 Lëdza na' psaque yaca ben' rnabë' quie ben' Israel ca hueyaquë' gutiyaquë' Jesús.

54 Cana' guca bira uda Jesús zaquë'lao len yaca ben' Israel. Tana' uzë'ë estado Judea zioquë' yedyi lao Efraín ga nacan ga'ala' lao lato ga bidyia yu'u. Lëgan' na' bega'nlënë' yaca ben' quië'.

55 Baruen bago ta hueyaquë' lani ta reza'la'adyi'yaquë' quie xuzixta'oyaquë' caora broyaquë' nación Egipto. Tana' lena' yaca ben' zë, yaca ben' yedyi, uza'yaquë' zioyaquë' ciudad Jerusalén ta yeyëriyaquë' cuinyaquë' lao Diuzi según costumbre quieyaquë'.

56 Na'ra yaca ben' na' rdayaquë' reguiloyaquë' Jesús. Caora rioyaquë' lu'ua idao' rnabë'ra, na' unayaquë' rëbiyaquë' laguedyiaquë':

—¿Bizi raquele? ¿Huida Jesús lani, o chi biguidanë'?

57 Cana' guca bë yaca ben' partido fariseo len yaca xan' pxuzi mandado gudyiaquë' benë' con nu yaca ben' ilë'ë Jesús laquixogue'teyaquë' leyaquë' tacuenda guxuyaquë' lëbë' hueyaquë' lëbë' preso.

## 12

*Tu nigula blēpinē' aceite rla' zixi zeo ni'a Jesús  
(Mt. 26.6-13; Mr. 14.3-9)*

<sup>1</sup> Zaidyinla lao xopa dza ga'ala' lani cati reza'la'adyi'yaquē' quie xuz-ixta'oyaquē'. Caora na' uza' Jesús uyoguē' yedyi Betania gan' zu Lázaro, ben' baguti, pero beseban Jesús lēbē'.

<sup>2</sup> Lēgan' na' psiña'ayaquē' yela' huao ta gapayaquē' Jesús bala'ana. Caora na' bē Marta laze ta udaoyaquē', na' udaorē Lázaro tuže len leyaquē'.

<sup>3</sup> Na'ra uzi' María gatzo litro aceite rla' zixi zeo ta rbioyaquē' yo lao nardo. Lēaceite na' bibi nequixin, zaca'n za'ala' gula. Bizi na' blēpinē'n ni'a Jesús, na' uzi'nē' guitza' guichonē' bla'onē'n aceite la'o ni'a Jesús. Cana' bedu lu'u yu'u ure' be zeo gula.

<sup>4</sup> Na'ra una tu ben' quie Jesús laonē' Judas Iscariote. Lēbē' naquē' zi'i tu ben' lao Simón. Na' ba'ala'cazi naquē' ben' quie Jesús, lēlēbē' usedyinnē' Jesús lao na'a yaca ben' guti lēbē'. Na' una Judas rēbinē' leyaquē':

<sup>5</sup> —¿Bixquien' bibēti'guē' aceite rla' zixi zeo, dan' zaca'n tzona gayuhua dumi denario tacuenda si'nē' dumi quien hue'nē'n yaca ben' yēchi'?

<sup>6</sup> Cana' una Judas, pero bireyēchi'la'adyi'nē' quie yaca ben' yēchi'. Rdēbinē' quie dumi, dan' naquē' ben' uban. Rapanē' bolsa yu'u dumi tacuenda saque' cuannē' dumi yu'u lu'u bolsa na'.

<sup>7</sup> Na'ra una Jesús rēbinē' Judas:

—Psan quienē'. Pues baodyialaonē' bēnē' quie dza gatia' igacha'.

<sup>8</sup> Nita'cazi ben' yēchi' lao yedyi layu yugu dza, pero nē'ēdi', itu chopa dzazi zulia' le'e.

*Ga rsaqueyaquē' ta gutirēyaquē' Lázaro*

<sup>9</sup> Yaca ben' zē, yaca ben' Israel, caora uneziyaquē' bazu Jesús yedyi Betania, uza'yaquē' uyoyaquē' gan' zunē'. Uyoyaquē' yena'yaquē' lēbē' len Lázaro, ben' baguti, pero beseban Jesús lēbē'.

<sup>10</sup> Na'ra yaca ben' xan' pxuzi bapsaqueyaquē' bi hueyaquē' ta gutirēyaquē' Lázaro.

<sup>11</sup> Cana' psaqueyaquē', dan' barale zē yaca ben' Israel quie Jesús por nun quie dan' psebannē' Lázaro. Cana' bira bē yaca ben' yedyi na' tzaže len yaca ben' r nabē' quieyaquē', pero guleyaquē' quie Jesús.

*Beyo Jesús tatula la'o ciudad Jerusalén  
(Mt. 21.1-11; Mr. 11.1-11; Lc. 19.28-40)*

<sup>12</sup> Yaca ben' zē gula uyoyaquē' ciudad Jerusalén ga raza lani ta reza'la'adyi'yaquē' quie xuzixta'oyaquē'. Bizi bezu dza tula uneziyaquē' huadyin Jesús lani ciudad Jerusalén.

<sup>13</sup> Caora na' uchugoyaquē' la'aga' palma ta bi'ayaquē' yelezayaquē' Jesús tu neza. Caora bedilayaquē' lēbē' unēyaquē' zidzo:

—Ben' ze gula naca Diuzi. Naca la'iya ben' uza' lao xa'nro Diuzi. Naca la'iya rey quiero, ben' Israel.

<sup>14</sup> Na'ra zē tu burra gan' zioquē'. Na' udyia Jesús lēba' con ca rguixogue'n lē'ē guichi la'iya quie Diuzi cani:

<sup>15</sup> Le'e ben' yedyi Sión, biidzebile.

Ulena' baza' Rey quiele, bdyianē' tu burro.

<sup>16</sup> Dza na'la biuyoñe' yaca ben' quie Jesús con ca rnēn lē'ē guichi la'iya quie Diuzi. Pero ude beyudyi gutinē' bebannē' zeyonē' guibá, cana'ra beza'la'adyi'yaquē' con ca rna lē'ē guichi. Bezaqueyaquē' guca quie Jesús tali con ca rnēn lē'ē guichi na'.

17 Yaca benë' nita' gan' zë Jesús caora guzinë' Lázaro yeronë' lu'u beló yo besebannë' lëbë', lëyaca ben' na', uidxogue'yaquë' ca naca blë'ëyaquë' bi bë Jesús.

18 Tana' lena' uza' yaca benë' yedzagayaquë' Jesús tu neza, dan' babeyaquë' ca naca quie yela' huaca babënë'.

19 Bizi yaca ben' partido fariseo unayaquë' rëbियाquë' laguedyiyaquë':

—Bablë'ëro bira bide huero. Ulena'cara lao yugulute benë' zioyaquë' banaoyaquë' lëbë'.

### *Bala ben' griego beguiloayaquë' Jesús*

20 Lado yaca ben' nita' lao lani ciudad Jerusalén, nita'rë bala ben' griego.

21 Leyaquë' ubiga'yaquë' bago ga zë Felipe, ben' yedyi Betsaida quie estado Galilea, na' unayaquë' rëbियाquë' lëbë':

—Señor, re'enndo' tzeyubindo' Jesús.

22 Na'ra uyo Felipe gan' zë Andrés gudyinë' lëbë' cabë' una yaca ben' griego. Bizi na' zio rupayaquë' yetixogue'yaquë' Jesús.

23 Na'ra una Jesús rëbinë' leyaquë':

—Bagazi idyin hora quia' në'ëdi', bichi yugulu benë', huatia' yebana', yeya'a guibá tatula ga uza'a.

24 Tali ca rnia' le'e na'a quie bini trigo. Nacacazi tuzin chi bitzu'un lu'u yu gu'udzon. Pero chi bini razaro yeyu'udzon lu'u yu, hualë laxta'ona ta yeyunan bini zë gula.

25 Cana' nacarë quie yaca benë'. Chi nu ben' bire'en inao në'ëdi' dan' ruen zudyi initi yela' neban quienë', bibi yela' neban gata' quienë' tuzioli. Pero chi nu ben' inao në'ëdi' ba'ala'cazi ruen zudyi initi yela' neban quienë', lëben' na' decazi yela' neban quienë' tuzioli.

26 Chi nu ben' re'en guida gaca ben' quia', reya'ala' guidayaquë' inaoyaquë' në'ëdi'. Con gatezi tzezua', lëzi gan' na' huazurëlëyaquë' në'ëdi'. Nu yaca ben' gaca ben' quia', huapala'n Xuza' leyaquë'.

### *Rna Jesús baruen bago gatinë'*

27 'Baraca yëchi' lu'u laxta'ohua'. ¿Cabizi inia' yëpa' Xuza'? ¿Inia' yëpa'në': "Ute uselao' në'ëdi' can' gaca quia' gatia'"? Bigacacazi yëpa' Xuza' can', porque nun quie lena' use'ela'në' në'ëdi' lao yedyi layu.

28 Xuza', ulu'elo' yaca benë' ca naca yela' huaca quio'. —Cana' una Jesús rëbinë' Xuzinë'.

Bizi beyaquë' de guibáte za' xchi' Diuzi unë':

—Bablu'ecaza' yaca benë' yela' huaca quia'. Tatula hua' yela' huaca quia' ta ilë'ëyaquë'.

29 Bizi yaca ben' rzënaga nita'yaquë' gan' zë Jesús, caora beyaquë' xchi' Diuzi unayaquë':

—Unë tu huiziu'.

Ibalayaquë' unayaquë':

—Tu ángel bë'lënë lëbë' di'idza'.

30 Na'ra una Jesús rëbinë' leyaquë':

—Tahuen na' bë Diuzi quiele unë' bele xchi'në'.

31 Babdyincazi hora na'a ulu'e Diuzi ca tamala rue yaca benë'. Bizi lëcana' udyiagui' Diuzi dyin quie xan' taxi'ibi'. Lëläna r nabë'na yaca benë' nita' lao yedyi layu niga.

32 Te yeyudyi uda' yaca benë' në'ëdi' lë'ë yaga cruzo gatia', caora na' hueyëza' lao yugulute yaca benë' ta gacayaquë' ben' yenaó në'ëdi'.

33 Una Jesús can' tacuenda inezi yaca benë' cabë' gaca gatinë'.

34 Na' bizi una yaca benë' rëbinë' lëbë':

—Babendo' ca rna yaca ben' rulaba guichi yu'u ley de que ben' Cristo nebancazinë' tuzioli. Na'ra ¿cómo luë' rnao' ben' naca bichi yugulu benë' gatinë' lë'ë yaga cruzo? ¿Ca nužila ben' naca bichi yugulu benë'?

35 Na'ra una Jesús rëbinë' leyaquë':

—Në'ëdi' naca' ca quie tu gui' rseni'n ga naca chula. Nezulia' le'e itu chopa dzazi. Reya'ala' huele bala ca rnia' le'e na'a nezua' ni len le'e cuenda biquixile. Nu ben' rda lao lato lao chula, binezinë' ga tzioguë' huaquixinë' xnezë'!

36 Reya'ala' galele quia' naca' ca quie tu gui' rseni'n ga naca chula na'a nezua' ni len le'e tacuenda gacale ben' quia', ben' rda lao lato lao xni'.

Ude beyudyi una Jesús can', zioquë' pcachi'laonë', bira blë'ëjë' gala zionë'.

### *Bigule yaca ben' Israel quie Jesús*

37 Ba'ala'cazi bë Jesús zë yela' huaca zaquë'lao yaca benë' Israel, bigulecaziyaquë' quienë'.

38 Guca can' dan' decazide uzun di'idza' ca bzu Isaías lë'ë guichi dza na'la. Lë'ë guichi na' rnën cani:

Señor, ¿nuži gale ca naca di'idza' la'ya quio' rguixogui'a benë'.

¿Nuži blu'elo' ca naca yela' huaca quio'?

Cana' una Isaías dza na'.

39 Cana' bigu'unyaquë' galeyauquë' quie Jesús. Lëscan' bzu Isaías di'idza' lë'ë guichi rnën cani:

40 Yela' yeladyi' quieyaquë' bë Diuzi leyaquë' ca quie ben' laochula, bënë' zidi lu'u laxta'oyaquë',

cuenda ba'ala'cazi rlë'ëyaquë', gaca quieyaquë' ca ben' birlë'ë, lëscan' cuenda ba'ala'cazi tzu'u di'idza' lu'u guichoyaquë', gaca quieyaquë' ca ben' birioñe'e.

Cana' biinaoyaquë' xneza Diuzi ta yeyëri laxta'oyaquë'.

41 Cana' una Isaías dza na' dan' unezinë' naca Jesús ben' rue yela' huaca quie Diuzi. Quie lena' unënë' quienë'.

42 Pero gulecazi zë yaca ben' Israel, lente yaca ben' r nabë' quiejë' guleyaquë' quie Jesús. Pero biblu'eyaquë'n zaquë'lao chi raleyauquë', dan' rdzebiyaquë' yaca ben' partido fariseo chi yebioyaquë' leyaquë' lu'u yaca idao' sinagoga.

43 Lena' rlu'en raxerayaquë' ca bala'ana hue yaca benë' len leyaquë', quele ca bala'ana hue Diuzi len leyaquë'.

### *Una Jesús cabë' gaca quie yaca benë' dza gaca juicio*

44 Bizi unë Jesús zidzo rëbinë' leyaquë':

—Con nu yaca ben' rue quie di'idza' quia', lëscan' ruerë quieyaquë' di'idza' quie Xuza', ben' use'ela' në'ëdi'.

45 Con nu yaca ben' nuebë' në'ëdi', lëscan' nuebë'rëyaquë' ben' use'ela' në'ëdi'.

46 Në'ëdi' naca' ca quie tu gui' rseni'n ga naca chula. Nu yaca ben' gale quia', bitayaquë' lao lato lao chula. Tana' lena' bida' lao yedyi layu.

47 Pero chi nu yaca benë' babe di'idza' can' baonia', na' birue quieyaquen, cala në'ëdi' ichugobi'a quieyaquë'. Bida' lao yedyi layu ta ute usela' yaca benë', cala ta ichugobi'a quieyaquë'.

48 Nu ben' yesebi' në'ëdi', ben' birue quie ca naca di'idza' baonia', decazide zu ben' ichugobë' gaca juicio quieyaquë'. Ta bibëyaquë' bala ca naca di'idza' baonia', lëlena' ichugobë'n quieyaquë' dza yeyudyi lao yedyi layu.

<sup>49</sup> Cabè' nē'ēdi', quele ta racazi la'adya' rnia'. Rnia' ca una Xuza', ben' use'ela' nē'ēdi'. Lēlēbè' unanē' nē'ēdi' ca bi di'idza' inia' usēdia' yaca benē'.

<sup>50</sup> Banezda' bē Xuza' mandado ta gata' yela' neban tuzioli quie yaca ben' gale quia'. Pues con can' rnia', rnia' ca una Xuza' nē'ēdi'.

## 13

### *Udibi Jesús ni'a yaca ben' quienē'*

<sup>1</sup> Raca falta dza ga'ala' lani pascua ta reza'la'adyi'yaquē' ca guca quie xuzixta'oyaquē'. Caora na' gucabē' Jesús abdyin hora gatinē' yeyoguē' guibá ga zu Xuzē'. Pues nedyē'ēcazi Jesús yaca ben' rale quienē', ben' nita' lao yedyi layu. Biyeyudyi yedu nedyē'ēnē' leyaquē'.

<sup>2-4</sup> Bizi Judas Iscariote, zī'i Simón, uyu'unē' pensari quie xan' taxi'ibi' ta regulola'adyi'nē' ca huenē' usedyinnē' Jesús lao na'a yaca ben' guti lēbē'. Bizi Jesús dyē'ēdi nezinē' uza'nē' guibá ga zu Diuzi hueyoguē' ga zu Xuzinē' tatula. Nezirēnē' pca'n Xuzinē' duze yela' r nabē' quienē' lao na'anē'.

Na' bizi caora uyu'uyaquē' huao rtze', uzulinē' ru'a mesa ga re'nē', udubē' zabē' de laohue, uzi'nē' tu toalla pquionē'n lē'ē si'nē'.

<sup>5</sup> Na'ra uzi'nē' tu palangan udza'nē'n nisa. Na' uzulaonē' rguibinē' ni'a yaca ben' quienē', bēsebidyinē'n conlē toalla pquionē' lē'ē si'nē'.

<sup>6</sup> Cati zionē' quibinē' ni'a Simón Pedro, na' una Pedro rēbinē' Jesús:

— Señor, ¿huaguibo' ni'a?

<sup>7</sup> Bizi una Jesús rēbinē' lēbē':

— Cabē' na'a binetziōñ'elo' cabē' hua' quio', pero terala, huayoñe'elo'.

<sup>8</sup> Na'ra una Pedro rēbinē' lēbē':

— Bigacacazi quibo' ni'a nē'ēdi'.

Bizi Jesús unē' rēbinē' lēbē':

— Chi bigaca quiba' ni'alo', bira naco' tuze len nē'ēdi'.

<sup>9</sup> Bizi Simón Pedro unē' rēbinē' Jesús:

— Señor, cala tuzi ni'a quibo', lēscan' quibo' na'a lente guichoga'.

<sup>10</sup> Na'ra una Jesús rēbinē' Pedro:

— Nu ben' zagozo yao, birnaban tzequēzunē' yao luegozi. Ni'azinē' rquin tzerina, dan' banaquē' ben' yēri. Le'e banacale ben' yēri pero cala lao yugulule.

<sup>11</sup> Na' una Jesús: “Cala lao yugulule”, dan' nezinē' nu ben' usedyin lēbē' lao na'a yaca ben' guti lēbē'.

<sup>12</sup> Ude beyudyi udibinē' ni'a yaca ben' quienē', beyaconē' zabē' de laohue, bebe'nē' tatula ru'a mesa unē' rēbinē' leyaquē':

— ¿Banezile cabē' babia' quiele?

<sup>13</sup> Le'e nale nē'ēdi': “Maestro”, lēscan' nale nē'ēdi': “Señor.” Nacan tali quiele ca nale nē'ēdi', dan' tali naca' maestro, nacatia' Señor quiele.

<sup>14</sup> Como nē'ēdi', ben' naca maestro, ben' naca Señor quiele, baodiba' ni'ale le'e, na'ra le'e, reya'ala' quibirēle ni'a tu itu laguedyle.

<sup>15</sup> Bablu'ena' le'e cabē' reya'ala' huele quie laguedyle con can' babia' quiele.

<sup>16</sup> Tali rnia' le'e, ni tu ben' naca mozo birnabē'nē' como ca xa'nnē'. Lēzi ni tu ben' rio mandado quie ben' tula, birnabē'nē' como ca ben' use'ela' lēbē'.

<sup>17</sup> Chi baoyoñe'ele cabē' baonia' le'e, chi hue quielen, yedaohuele, na' sule gusto.

<sup>18</sup> “Cala rnia' quie lao yugulutele. Nē'ēdi' anezda' nu le'e aolioga' nacale ben' quia'. Pero decazide uzun di'idza' ca rnan lē'ē guichi la'iya quie Diuzi: “Con tu ben' gaolē nē'ēdi', lēben' na' huenē' condre nē'ēdi'.”



<sup>19</sup> Desde na'a rnia' le'e ca ta za' gaca quia' cuenda galele quia' nia' le'e nu naca' cati idyin dza gaca quia' can' baonia' le'e.

<sup>20</sup> Tali rnia' le'e, con nu yaca ben' chezila'adyi' quie ben' ise'ela', læscan' rezila'adyi'rëyaquë' në'ëdi'. Na' con nu yaca ben' chezila'adyi' në'ëdi', rezila'adyi'rëyaquë' ben' use'ela' në'ëdi'.

*Udixogue' Jesús usedyin Judas læbë' lao na'a yaca ben' guti læbë' (Mt. 26.20-25; Mr. 14.17-21; Lc. 22.21-23)*

<sup>21</sup> Ude beyudyi una Jesús can', guca yëchi'në', lega ptëbin lu'u laxta'onë'. Na' claro gula unë' rëbinë' yaca ben' quienë':

—Tali rnia' le'e, zu tu ben' zu ladole ni, ben' usedyin në'ëdi' lao na'a yaca ben' guti në'ëdi'.

<sup>22</sup> Na'ra uzulaoyaquë' rna'yaquë' lao laguedyiaquë'. Bineziaquë' nula'yaquë' rnë Jesús quie can'.

<sup>23</sup> Ūzu tu ben' quienë' ure'në' cuëta lë'ë Jesús ga udaoyaquë' rtze'. Lega nedyë'ë Jesús læbë'.

<sup>24</sup> Bizì Simón Pedro bënë' seña lao ben' ure' cuëta lë'ë Jesús ta inabë' nuzila quieyaquë' rnë Jesús.

<sup>25</sup> Cana' una ben' ure' cuëta lë'ë Jesús rëbinë' læbë':

—¿Señor, nuzila nëto' rnao' can'?

<sup>26</sup> Na'ra una Jesús rëbinë' leyaquë':

—Con nu ben' hua'a yëta xtila bdyia' lu'u plato niga, lëlëben' na' usedyinnë' në'ëdi' lao na'a yaca ben' guti në'ëdi'.

Caora na' uzi'në' tu bicho yëta xtila ta bdyianë' lu'u plato bënë'n Judas Iscariote, zi'i Simón.

<sup>27</sup> Ca uzi' Judas yëta xtila, cana' layu'ute bichi be quie xan' taxi'ibi' lu'u laxta'onë'. Caora na' una Jesús rëbinë' Judas:

—Ca ta raco' pensari huelo', bëtegan.

<sup>28</sup> Pero nitu yaca ben' raolënë' lao mesa biuyoñe'eyaquë' bixquien' gudyinë' Judas can'.

<sup>29</sup> Como Judas naca ladyina'anë' bolsa ga yu'u dumi, quie lena' guqueyaquë' re'en Jesús tzio Judas ta ga'onë' ta gaoyaquë' quie lani o chi ta ga'onë' ta hue'në' yaca ben' yëchi'.

<sup>30</sup> Ca beyudyi udao Judas yëta xtila ta bënë' Jesús lënë', caora na' beza'në' baruen lao rtze'.

*Ga rguixogue'n quie mandamiento cubi*

<sup>31</sup> Ude uza' Judas zioguë', na' una Jesús rëbinë' yaca ben' quienë':

—Abdyin hora ulu'ena' le'e yela' huaca quia', në'ëdi' bichi yugulu benë'. Lëzi ulu'ena' le'e yela' huaca quie Xuza'.

<sup>32</sup> Cabë' në'ëdi' bichi yugulu benë', ulu'ena' le'e yela' huaca quie Xuza', læscan' ulu'erë Xuza' le'e yela' huaca quia' në'ëdi' zi'inë'. Baruen baba dzazi gaca cana'.

<sup>33</sup> Bicha', calara zidza zulia' le'e niga. Le'e huadale yeguilole në'ëdi'. Na'ra inia' le'e con can' bagudya' yaca los demás ben' Israel dza na': Con gan' yeya'a, bisaque' yeza'rële len në'ëdi'.

<sup>34</sup> Rnia' le'e tu mandamiento cubi: Idyë'ële tu itu laguedyile. Na'ra cabë' rua' në'ëdi', nedyë'ëda' le'e, læcana' huerële, idyë'ële tu itu laguedyile.

<sup>35</sup> Chi idyë'ële tu itu laguedyile, læcana' huanezi yugulu benë' nacale ben' quia'.

*Ga rguixogue' Jesús cabë' hue Pedro si'në' yë' (Mt. 26.31-35; Mr. 14.27-31; Lc. 22.31-34)*

<sup>36</sup> Bizi Simón Pedro unanë' rëbinë' Jesús:

—Señor, ¿gaži yeyolo'?

Na'ra una Jesús rëbinë' lëbë':

—Gan' yeya'a bisaque' yeza'lo' na'a. Pero terala yeguidale gan' yeya'a.

<sup>37</sup> Na'ra una Pedro rëbinë' lëbë':

—Señor, ¿bixquien' bisaque' yeza'lia' luë' na'a? Zua' puesto gatia' lao lazo'.

<sup>38</sup> Bizi Jesús unë' rëbinë' lëbë':

—¿Nacan tali zulo' puesto nao' gatio' lao laza'? Tali ca rnìa' luë', zahuen bala binecuedyi biu, huanao' tzona lasa binubë'lo' në'ëdi'.

## 14

### *Una Jesús quie neza ta yeyoro guibá*

<sup>1</sup> Nernë Jesús rëbinë' leyaquë':

—Bigapale cuidado. Rzudyi'ilële Diuzi, lëzirë reya'ala' sudyi'ilële në'ëdi'.

<sup>2</sup> Lu'u guibá ga zu Xuza', detzegue lato ga tzezule. Chi bide lato, inia' le'e bide lato. Lena' yeya'a guibá tzeguia' dya'a ga tzezule.

<sup>3</sup> Ude yeyudyi yeya'a guibá tzeguia' dya'a ga tzezule, caora na' yeguida' tatula dezia' le'e cuenda sulële në'ëdi' lu'u guibá tuže.

<sup>4</sup> Le'e banezile ga zio neza gan' yedyina'.

<sup>5</sup> Na'ra una Tomás rëbinë' Jesús:

—Señor, binezindo' gan' yedyinlo', ¿cómo luë' nao' banezindo' gan' zio neza?

<sup>6</sup> Na'ra una Jesús rëbinë' lëbë':

—Në'ëdi' naca' neza guibá, ben' rnë tali, ben' run yela' neban tuzioli. Tuza' në'ëdi' naca' ben' ulu'e yaca benë' yedyinyaquë' ga zu Diuzi.

<sup>7</sup> Chi tali banubë'le në'ëdi', lëzi nubë'rële Xuza'. Desde na'a banubë'le Xuza', barlë'ëlenë'.

<sup>8</sup> Na'ra una Felipe rëbinë' Jesús:

—Señor, ben lato ilë'ëndo' Xuziro Diuzi. Tana'zi inabando' luë'.

<sup>9</sup> Quie lena' una Jesús rëbinë' lëbë':

—Felipe, zidza baoca zulia' le'e, ¿quele binubë'lo' në'ëdi'? Nu ben' bablë'ë në'ëdi', lëben' na' bablë'ërënë' Xuza'. ¿Na' bixquien' nao' në'ëdi': "Ben lato ilë'ëndo' Xuziro Diuzi"?

<sup>10</sup> ¿Binezile në'ëdi' zulëcaza' Xuza', lëzi zulëcazinë' në'ëdi'? Ca naca di'idza' baonia' le'e nacan di'idza' ta una Xuza' në'ëdi', cala di'idza' quia' cuinza'. Cala ta racazi la'adya' unia'. Naca Xuza' ben' zulëcazi në'ëdi' tzaže. Ruecazinë' ca re'ennë' gaca.

<sup>11</sup> Galele zulëcaza' Xuza', lëzi Xuza' zulëcazinë' në'ëdi'. Chi biralele con can' baonia' le'e, galele quia' por nun quie ta bia' blë'ële.

<sup>12</sup> Tali ca rnìa' le'e, con nu ben' rale quia', huerëyaquë' ca ta babia'. Lëzi huerëyaquë' mazara ca ta babia', dan' yedyina' gan' zu Xuza'.

<sup>13</sup> Yugulu ta inabale lao Xuza', uzëtole laohua' inabalen, na' në'ëdi' zi'inë', guna'n tacuenda ulu'ena' yela' huaca quie Xuza'.

<sup>14</sup> Con bitezi inabale uzëtole laohua', naguna'n.

### *Una Jesús ise'ela'në' Bichi Be quie Diuzi*

<sup>15</sup> Chi le'e nedyë'ële në'ëdi', ulehue quiele ca naca mandamiento baonia' le'e.

<sup>16</sup> Në'ëdi' yëpa' Xuza' ta ise'ela'në' itu ben' gacalë le'e. Lëbë' yeyuežela'adyi'në' le'e, huazulëcazinë' le'e tuzioli. Naquë' Bichi Be quie Diuzi, ben' uzioñe'e le'e ta naca tali.

17 Pero nu yaca ben' nita' lao yedyi layu, bichezila'adyi'yaquë' lëbë', nica nelë'ëyaquë' lëbë', nica huebë'yaquë' lëbë'. Pero le'e nubë'le lëbë', dan' zulëcazinë' le'e yu'unë' lu'u laxta'ole tuzioli.

18 Biuca'na' le'e cuinzile. Hueguidacaza' tatula sulia' le'e.

19 Ibaba dza ilë'ë yaca benë' nita' lao yedyi layu në'ëdi'. Pero le'e, hualë'ëcazile në'ëdi'. Huata' yela' neban quiele tuzioli, dan' nacale ben' quia' në'ëdi', ben' neban tuzioli.

20 Dza gaca can' hualë'ële zulëcaza' Xuza' tuze, lëscan' le'e lëlënë'ëdi', lëscan' në'ëdi' len le'e.

21 Nu ben' hue quie ca naca mandamiento baonia' le'e, lena' rlu'en quienë' tali nedyë'ënë' në'ëdi'. Na'ra idyë'erë Xuza' nu ben' nedyë'ë në'ëdi'. Lëzi në'ëdi' nedyë'ëda' con nu ben' nedyë'ë në'ëdi', ulu'ena'yaquë' yela' huaca quia'.

22 Na'ra unë Judas, pero Judas tula, cala Judas Iscariote, rëbinë' Jesús:

—Señor, ¿bixquien' ulu'elo' nëto' yela' huaca quio', na' biulu'elo'n yaca ben' nita' lao yedyi layu?

23 Biži una Jesús rëbinë' lëbë':

—Nu yaca ben' nedyë'ë në'ëdi', rue quieyaquë' xti'idza', nadyë'ë Xuza' leyaquë'. Në'ëdilia' Xuza' huazulëcazindo' leyaquë' tuze.

24 Pero nu yaca ben' binedyë'ë në'ëdi', birue quieyaquë' xti'idza'. Ca naca di'idza' baonia' le'e, cala ta racazi la'adya' unia' le'e, di'idza' quia' nacan di'idza' una Xuza', ben' use'ela' në'ëdi'.

25 'Tu neraca nezulia' le'e itu chi', rguixogue'na' le'e ca di'idza' baonia'.

26 Cati bira zua' ni len le'e, huase'ela' Xuza' Bichi Be quienë' lao laza' ta gacalënë' le'e huazela'adyi'në' le'e. Lëzi uzioñe'enë' le'e usa'la'adyi'në' le'e yugulute ca ta baonia' le'e.

27 'Baruen bago dza yeya'a pero huabëcha' chizi lu'u laxta'ole con ca re' chizi lu'u laxta'ohua'. Cana' dugalo cue'n chizi lu'u laxta'ole, quele ca rue yaca ben' nita' lao yedyi layu, quele dugalo cuëchijë' chizi lu'u laxta'ole. Lëlena' bidëbile, bidzëbile.

28 Babelë unia' le'e de que hueya'a guibá hueguida' tatula sulia' le'e. Chi tali nedyë'ële në'ëdi', huedaohuele yele di'idza' yedyina' ga zu Xuza'. Nacara Xuza' ben' ze ca në'ëdi'.

29 Desde na'a rnia' le'e ta za' gaca quia' cuenda yeza'la'adyi'le cabë' unia' le'e galele quia' cati idyin dza gaca quia' can' baonia'.

30 'Birabi zë di'idza' hue'lia' le'e, dan' baza' xan' taxi'ibi'. Lëna rnabë'na yaca benë' nita' lao yedyi layu. Pero birnabë'na në'ëdi'.

31 Ruzucaza' di'idza' ca ta una Xuza' në'ëdi' tacuenda inezi yaca benë' nita' lao yedyi layu de que nedyë'ëda' Xuza'. Ulechasa gan' ni. Uletza' ga tula.

## 15

### *Una Jesús tu di'idza' quie luba bedzuli'*

1 Biži neru'elë Jesús leyaquë' di'idza' unë':

—Në'ëdi' naca' ca quie luba bedzuli'. Naca Xuza' ca quie ben' rapa luba bedzuli'.

2 Huachugüë' yaca taca' luba ta bidyia tazixi tzechu'unnë'n. Na' luba dyia bedzuli', uluba ucha'anë'n tacuenda cuiaran tazixi.

3 Le'e nacale ben' yëri lao Diuzi dan' rue quiele ca ta bapsëdia' le'e.

4 Ta reya'ala' huele biusanle në'ëdi' nacalëcazile në'ëdi' tuze cabë' nacalëcaza' le'e tuze. Tu taca' luba bedzuli' bizun lë'ë luba quien, bisaque' cuian tazixi. Lëzi le'e, chi binacalëcazile në'ëdi' tuze, naca quiele ca quie luba bidyia tazixi.

5 'Në'ëdi' naca' ca quie luba. Na' bizi le'e nacale ca quie taca' luba. Chi nacalëcazile në'ëdi' tuže cabë' nacalëcaza' le'e tuže, naca quiele ca quie luba bezduli' dyaia tazixi. Chi binacalëcazile në'ëdi' tuže, bibi de huele.

6 Nu yaca ben' binacalë në'ëdi' tuže, gaca quienë' ca quie taca' luba bidyia tazixi. Nacan ta chu'un yaca benë' tzala'la ta utupayaquë'n ibidyin uzeiyaquë'n.

7 'Chi nacalëcazile në'ëdi' tzaže, chi bigala'adyi'le ca ta bapsëdia' le'e, na' con bitezi inabale në'ëdi', guncaza'n le'e.

8 Cati rue quiele di'idza' quie Xuza', cana' bala'ana nacale ca quie luba bezduli' dyian tazixi. Lëcana' ulu'en talicazi nacale ben' quia'.

9 Në'ëdi' nedyë'ëda' le'e ca nedyë'ë Xuza' në'ëdi'. Ulenao në'ëdi' con can' nedyë'ëda' le'e.

10 Chi hue quiele cabë' baonia' le'e, cana' idyë'ëda' le'e cabë' nedyë'ë Xuza' në'ëdi', rua' cabë' unanë' në'ëdi'.

11 'Cabë' di'idza' baonia' le'e, nacan ta yedaohuele lële në'ëdi' su gusto lu'u laxta'ole.

12 Ni rnia' le'e tu di'idza' belao: Re'enda' idyë'ële tu itu laguedyile con can' rua' nedyë'ëda' le'e.

13 Chi baguti tu benë' lao laza amigo quienë' ta uselanë' lëbë', lëlena' ulu'en lega nedyë'ë ben' na' amigo quienë'. Ganura zu nedyë'ëra ben' amigo quienë' ca ben' na', ben' guti.

14 Le'e nacacazile amigo quia' chi hue quiele di'idza' con can' baonia' le'e.

15 Bira inia' le'e nacale ca quie mozo quia', porque binezi yaca mozo bi rue xa'nyaquë'. Inia' le'e nacale amigo quia', porque aonia' le'e ca ta una Xuza' në'ëdi', banezcazile bi ruenë'.

16 Cala le'e uliole në'ëdi', den' në'ëdi' ulioga' le'e ta tzirole huele dyin quie Diuzi si'le usecho ta de tuzioli. Cana', guncazi Xuza' yugulu ta inabale uzëtole laohua'.

17 Na'ra tatula inia' le'e: Re'enda' idyë'ële tu itu laguedyile.

*Yaca ben' nita' lao yedyi layu rudieyaquë' Jesús len yaca ben' quienë'*

18 'Chi rudie yaca ben' nita' lao yedyi layu le'e, bigala'adyi'le tanëro bdieyaquë' në'ëdi'.

19 Chi le'e nacale tuzi len ben' nita' lao yedyi layu, gue'enyaquë' le'e con ca gue'enyaquë' yaca ben' quieyaquë'. Pero në'ëdi' ulioga' le'e ladoyaquë', quie lena' rudieyaquë' le'e, dan' bira nacale tuzi len leyaquë'.

20 Bigala'adyi'le con can' baonia' le'e: Ben' rue dyin lao xa'ne, binaquë' ben' ze ca xa'nnë'. Chi rudie yaca benë' në'ëdi', lëzi udieyaquë' le'e. Chi bë quieyaquë' con can' baonia' bagudya'yaquë', lëzirë hue quieyaquë' con can' inale yëbilyaquë'.

21 Na' usacayaquë' le'e bizinaquezi, porque dan' nacale ben' quia', binubë'yaquë' ben' use'ela' në'ëdi'.

22 'Bibi dula' napayaquë' chi në'ëdi' bibida' bibë'lia'yaquë' di'idza'. Pero dan' bida', bë'lia'yaquë' di'idza', lëlena' birson gata' quieyaquë', naocazi dula' xquia quieyaquë' leyaquë'.

23 Nu yaca ben' rudie në'ëdi', lëscan' rudierëyaquë' Xuza'.

24 Bibi dula' napayaquë' chi në'ëdi' bibia' yela' huaca quia' ladoyaquë'. Pero bablë'ëcaziyaquë' ca ta bia'. Na' bizi ba'ala'cazi bablë'ëyaquë' can' babia', rudiecaziyaquë' në'ëdi', lëscan' rudierëyaquë' Xuza'.

25 Pero racan can' ta uzun di'idza' con can' zu lë'ë guichi ley ga rnën: "Rudiecaziyaquë' në'ëdi', ba'ala'cazi bibi dula' quia' de."

26 'Caora guida ben' ise'ela' tanun quie Xuza', na' lëben' na' gacalënë' le'e huezela'adyi'në' le'e. Naca lëben' na' Bichi Be quie Xuza', ben' rnë puro di'idza' li. Huanënë' cule quia' në'ëdi'.

27 Lëzi le'e huanërële cule në'ëdi' dan' zulële në'ëdi' tzaže desde dza uzu-laoro rdaro tuzi.

## 16

1 'Cabë' di'idza' rnia' le'e, biyeyatile dan' lëdi'idza' na' gacalën le'e ta inaole në'ëdi'. Yaca benë' rudie në'ëdi'

2 huebioyaquë' le'e lu'u yaca idao' sinagoga. Huadyin dza gaqueyaquë' chi mandado quie Diuzi gutiyaquë' le'e.

3 Cana' hueyaquë' como dan' binubë'yaquë' Xuza', lëzi binubë'yaquë' në'ëdi'.

4 Ca di'idza' ni rnia' le'e, nacan ta yeza'la'adyi'le con can' baonia' le'e caora baza' gaca quiele can' baonia'.

### *Ni rguixogue'n quie Bichi Be quie Diuzi*

'Biunia' le'e dza' na' ca ta rnia' le'e na'a, como dan' nezulia' le'e dza na'.

5 Pero baidyin hora yeya'a tzezulia' ben' use'ela' në'ëdi'. Na' ni tule biunabale në'ëdi' gan' yeya'a.

6 Pero dan' rnia' le'e ni, lena' baraqueyëchi' lu'u laxta'ole.

7 Pero rnia' le'e ta naca tali. Huaca huen quiele chi yeya'a, porque chi biyeya'a, biguida Bichi Be quie Diuzi ta sulënë' le'e gacalënë' le'e huezela'adyi'në' le'e. Chi yeya'a ga zu Xuza', huase'ela' Bichi Be quienë' ga zule.

8 Cati guida lëbë' uzioñe'enë' yaca benë' nita' lao yedyi layu ta ineziyaquë' decazi dula' xquia quieyaquë', lëzi ta ineziyaquë' re'en Diuzi tzëri laxta'oyaquë', lëzirë ta ineziyaquë' huachugobë' Diuzi quieyaquë' con can' bëyaquë'.

9 Dan' biraleyaquë' quia', lena' decazi dula' xquia quieyaquë'.

10 Nun quie dan' yeya'a ga zu Xuza', lena' huanezi yaca ben' nita' lao yedyi layu re'en Diuzi tzëri laxta'oyaquë'. Na' bizi le'e, itu chi'zi zulia' le'e.

11 Na'ra huanezi yaca benë' nita' lao yedyi layu hue Diuzi juicio quieyaquë' con cabë' huachugobë' Diuzi quie xan' taxi'ibi', ben' rnabë' lao ben' nita' lao yedyi layu.

12 Tazë nede ta inia' le'e, pero le'e bitzioñe'elen na'a.

13 Cati guida Bichi Be quie Diuzi, ben' rnë tali, lëbë' uzioñe'enë' le'e ta naca tabala quie Diuzi. Quele huananë' ta racazi la'adyi'në', den' tanun quie Diuzi inanë. Uzioñe'enë' le'e ca ta za' gaca dza zaza'ra.

14 Huenë' në'ëdi' ben' zë'. Nezinë' cabë' di'idza' rnia', uzioñe'enë' le'e cabë' nacan.

15 Yugute ca rna Xuza' nacan ta inëria' le'e. Lena' rnia' nezi Bichi Be quie Diuzi cabë' di'idza' rnia', uzioñe'enë' le'e cabë' nacan.

### *Ni rnën ca gaqueyëchi' yaca ben' quie Jesús tu chi'zi, te na' huedaohueyaquë'*

16 'Bizi gaca tu chi'zi birlë'ële në'ëdi', te na' itu chi'zi yelë'ële në'ëdi' tatula.

17 Na'ra unë yaca ben' quie Jesús rëbijaquë' laguediyaquë':

—¿Ca bizi naca di'idza' unë' ra'o? Unë' gaca tu chi'zi birlë'ëroguë', te na' në' itu chi'zi hualë'ëroguë' tatula. Lëzi narë' gaca quienë' cana' dan' yeyonë' gan' zu Xuzinë'.

18 ¿Ca bizi naca di'idza' unë' caora unë': "Gaca tu chi'zi"? Birioñe'ero cabë' di'idza' unë' ra'o.

19 Bizi gucabë' Jesús biuyoñe'eyaquë' ca di'idza' gudyinë' leyaquë'. Tana' unë' rëbinë' leyaquë':

—Baonëcaza' le'e gaca tu chi'zi birlë'ële në'ëdi', te na' itu chi'zi yelë'ële në'ëdi' tatula. ¿Lëdi'idza' na' biuyoñe'ele rnabale laguedyile?

<sup>20</sup> Tali ca rnia' le'e, huaqueyëchi'le huabedyile baidyin hora guti yaca benë' në'ëdi'. Na' bi'zi yaca benë' nita' lao yedyi layu, huedaohueyaquë' dan' gatia'. Pero ba'ala'cazi huaqueyëchi'le tu chi'zi, te na' huedaohuele bë' yelë'ële në'ëdi' tatula.

<sup>21</sup> Tu nigula nu'a zi'ine, bë' idyin hora su bdao' quienë', redzagalaonë' ta su bdao' quienë'. Bi'zi caora baozu bdao' quienë', huala'adyi'në' ca ta babedzagalaonë', dan' lega redaohuetzeguenë' baozu zi'inë' byu.

<sup>22</sup> Lëscana' nacarë quie le'e. Redzagalaole na'a, pero cati yeguida' dena'a le'e, lëcana' lega yedaohuele. Nitu nitu nunura uzu le'e bayëchi' tatula.

<sup>23</sup> Lëdza na' birabi inabale në'ëdi'. Tali ca rnia' le'e, guncazi Xuza' yugulu ca ta inabale lënë' uzëtole laohua'.

<sup>24</sup> Desde dza na' binuzëtole laohua' bi ta rnabale Xuza'. Ulenaba con can' baonia' le'e. Cana' guncazi Xuza' le'e ca ta inabalenë' tacuenda gaca huen quiele sule dya'a.

*Cristo, babënë' gan lao xan' taxi'ibi', ben' rnabë'na lao yedyi layu*

<sup>25</sup> Di'idza' baonia' le'e nacan di'idza' canezi tzioñe'elen. Pero huadyin dza bira inia' le'e di'idza' canezi tzioñe'elen, huania' le'e di'idza' ta tzioñe'ele labezi inezile quie Xuza'.

<sup>26-27</sup> Lëdza na' uzëtole laohua' inabale Xuza' bi ta re'enle inabalenë'. Caora na' bira inaban inaba' Xuza' gunnë' bi ta re'enle. Nedyë'ëcazi Xuza' le'e. Nedyë'ënë' le'e porque dan' nedyë'ële në'ëdi', ralele dan' nia' uza' ga zu Xuza'.

<sup>28</sup> Tali na' uza' ga zu Xuza' bida' lao yedyi layu. Pero na' abdyin hora hueza' lao yedyi layu, yeya'a ga zu Xuza' tatula.

<sup>29</sup> Caora na' una yaca ben' quienë' rëbiyaquë' lëbë':

—Na'ra rnëlo' di'idza' ta tzioñe'endo' labezi, quele di'idza' canezi tzioñe'endo'.

<sup>30</sup> Na'ra banezindo' luë' nezo' quie lao yugulute. Nica inabando' luë' banezo' bi ta inabando' luë'. Quie lena' banezindo' de que luë' naco' ben' uza' ga zu Diuzi.

<sup>31</sup> Bi'zi una Jesús rëbinë' leyaquë':

—¿Na'ra banezile'?

<sup>32</sup> Bagazi idyin hora yedzatzale tziole quie quiele uca'nle në'ëdi' tuza'. Pero bizucaza' tuza' dan' zucazi Xuza' len në'ëdi'.

<sup>33</sup> Ca di'idza' baonia' le'e nacan ta cuëchin chizi lu'u guicho laxta'ole, lëscan' ta sudyi'ilëcazile në'ëdi'. Yedzagalaole lao yedyi layu niga, pero bidzebile como dan' babia' gan lao xan' taxi'ibi', ben' rnabë'na lao yedyi layu.

## 17

*Jesús bë'lënë' Xuzinë' di'idza' por yaca ben' quienë'*

<sup>1</sup> Ude beyudyi una Jesús cana', pchisa laohuë' una'në' zan guibá unë':

—Xuza', abdyin hora quia'. Huelo' në'ëdi' zi'ilo' ben' ze con ca rua' luë' ben' ze.

<sup>2</sup> Në'ëdi', zi'ilo', bapca'nlo' lao na'a yela' rnabë' quio' ta inabi'a lao yugulu benë'. Cana' hua'a yaca ben' pca'nlo' lao na'a yela' neban tuzioli.

<sup>3</sup> Decazi yela' neban quieyaquë' tuzioli tanun quie dan' nubë'yaquë' luë' tuzo' naco' Diuzi. Lëzirë nubë'rëyaquë' në'ëdi', Jesucristo, ben' use'elo'.

<sup>4</sup> Babia' luë' ben' ze lao yedyi layu niga. Babzua' di'idza' quio', babia' ca ta use'elo' në'ëdi' hua'.

<sup>5</sup> Xuza', huelo' në'ëdi' ben' ze caora yeguida' tatula gan' zulo' cabë' bao' dza na', bao' në'ëdi' ben' ze tu binecue' yedyi layu.

6 'Ca yaca ben' uliolo' lado yaca ben' nita' lao yedyi layu, babzioñe'ena'yaquë' ca naco'. Nacayaquë' ben' quio'. Lëleyaquë' pca'nlo' lao na'a, baraleyaquë' di'idza' quio'.

7 Baneziyaquë' lao na'alo' za' yugulute ta pca'nlo' lao na'a.

8 Ca naca di'idza' pca'nlo' lao na'a, barue quieyaquë'n. Baneziyaquë' tali uza' ga zulo', baraleyaquë' de que luë' use'elo' në'ëdi'.

9 'Rnaba' cule laolo' por yaca ben' pca'nlo' lao na'a, dan' nacayaquë' ben' quio'. Cala rnaba' por yaca ben' nita' lao yedyi layu.

10 Yugulu yaca ben' quia', nacarëyaquë' ben' quio'. Lëzirë yugulu yaca ben' quio', nacarëyaquë' ben' quia'. Lëleyaquë' rueyaquë' në'ëdi' ben' ze.

11 'Ca naca në'ëdi', bira sua' lao yedyi layu niga. Pero leyaquë' nezuyaquë' lao yedyi layu ni. Biži në'ëdi' hueguida' gan' zulo'. Xuza', ben' la'iya naco', conlë yela' huaca quio' gacalao' yaca ben' pca'nlo' lao na'a tacuenda gacayaquë' tuzi pensari cabë' nacalia' luë' tuzi pensari.

12 Udapacha'a yaca ben' pca'nlo' lao na'a dza uzulia' leyaquë' lao yedyi layu niga. Conlë yela' huaca quio' pcuasa pcui'oga'yaquë', nituyaquë' biuniti. Tuzi ben' uniti unitinë' tacuenda uzun di'idza' ca rnan lë'ë guichi la'iya quio'.

13 'Na'ra hueguida' gan' zulo'. Pero tu raca nezua' lao yedyi layu niga, rnia' luë' di'idza' tacuenda yedaohueyaquë' ca redaohueda'.

14 Bapca'na' di'idza' quio' lao na'ayaquë'. Rudie yaca ben' nita' lao yedyi layu leyaquë', dan' bizulëyaquë' leyaquë' tuzi. Nacayaquë' ca në'ëdi', bizulia' yaca ben' nita' lao yedyi layu tuzi.

15 Cala rnaba' ta cuiolo'yaquë' lao yedyi layu, rnaba' ta ucuasa ucu'olo'yaquë' ca ta re'en xan' taxi'ibi' huenan quieyaquë'.

16 Ca naca në'ëdi', bizulia' yaca ben' nita' lao yedyi layu tuzi, lëzi cana' nacarë quieyaquë', bizulërëyaquë' yaca ben' nita' lao yedyi layu tuzi.

17 Udze'lo'yaquë' lao na'alo'. Uzioñe'elo'yaquë' ca naca tabala quio'. Naca di'idza' quio' di'idza' li.

18 Como luë' baose'elo' në'ëdi' bida' lado yaca ben' nita' lao yedyi layu, lëzirë cana' në'ëdi' ise'ela'yaquë' lado yaca ben' nita' lao yedyi layu.

19 Por nun quieyaquë' babdyia' cuina' lao na'alo' cuenda udze'lo'yaquë' lao na'alo' ineziyaquë' ca naca tabala quio'.

20 'Cala por tuzi leyaquë' rnaba' cule, lëscan' rnaba' cule por yaca ben' zagalera quia' ga tzioyaquë' tzetixogue'yaquë' di'idza' quio'.

21 Rnaba' cule laolo' gacalao'yaquë' ta inita'yaquë' tuzi tzu'ulëyaquë' ra'o tzaže ca nacalao' në'ëdi', ca nacalia' luë'. Cana' re'enda' Xuza', re'enda' inita'yaquë' tuzi tacuenda inezi yaca ben' nita' lao yedyi layu de que luë' use'elo' në'ëdi'.

22 Baoyu'ulia' leyaquë' tuzi ca naca luë' zulao' në'ëdi' tuzi tacuenda tzu'uyaquë' tuzi pensari cabë' rue ra'o, yu'uro tuzi pensari.

23 Tuzi nacalia' leyaquë', lëscan' tuzi naco' len në'ëdi'. Lëcana' gacarëyaquë' tuzi, inezi yaca ben' nita' lao yedyi layu de que luë' use'elo' në'ëdi', nedyë'ëlo'yaquë' cabë' nedyë'ëlo' në'ëdi'.

24 'Xuza', ca yaca ben' pca'nlo' lao na'a, re'enda' sulëyaquë' në'ëdi' gan' tze-sua' tacuenda ilë'ëyaquë' yela' huaca quia' benlo' në'ëdi' nun quie nedyë'ëlo' në'ëdi' desde binecu'te lao yedyi layu.

25 Xuza', ben' la'iya naco'. Ca naca yaca ben' nita' lao yedyi layu, binubë'yaquë' luë', pero në'ëdi' sí, nubë'da' luë'. Ca naca yaca ben' quia', ben' nita'lë në'ëdi' niga, baneziyaquë' luë' use'elo' në'ëdi'.

<sup>26</sup> Babzioñe'ena' leyaquë' ca naco'. Neruzioñe'era'yaquë' mazara ca naco' tacuenda idyë'ëyaquë' tu ituyaquë' ca nedyë'ëlo' në'ëdi', gacalëyaquë' në'ëdi' tuže.

## 18

*Bdyin yaca benë' ta guxuyaquë' Jesús*  
(Mt. 26.47-56; Mr. 14.43-50; Lc. 22.47-53)

<sup>1</sup> Ude beyudyi unë Jesús cana', uza'në' ziolënë' yaca ben' quienë' tzala' yao Cedrón. Lëgan' na' dyiatzegue yaga gan' bega'nlënë' yaca ben' quienë'.

<sup>2</sup> Lëzi Judas, ben' usedyin lëbë' lao na'a yaca ben' guti lëbë', nubë'rënë' gan', dan' riozi rio Jesús lënë' yaca ben' quienë' gan'.

<sup>3</sup> Cana' guca uyo Judas yexi'në' yaca soldado len yaca ben' naca xaga idao', yaca ben' use'ela' yaca xan' pxuzi, len yaca ben' partido fariseo. Nu'ayaquë' espada, nu'ayaquë' lámpara, nu'ayaquë' yëri yaga, bdyinyaquë' gan' zë Jesús.

<sup>4</sup> Como Jesús nezine' bin' gaca quienë', na'ra bronë' gan' nita'lënë' yaca ben' quienë', unë' rëbinë' yaca ben' bdyin guxu lëbë':

—¿Nuži ben' reguilole?

<sup>5</sup> Na'ra unayaquë' rëbiyaquë' lëbë':

—Reguilondo' Jesús, ben' yedyi Nazaret.

Biži Jesús unë' rëbinë' leyaquë':

—Në'ëdi' ben' reguilole.

Lëzi zërë Judas lënë' yaca ben' bdyin guxu Jesús.

<sup>6</sup> Na' una Jesús rëbinë' leyaquë': "Në'ëdi' ben' reguilole", na'tera guca bebiga'yaquë' guzu xcu'udzula, bgu'unyaquë' layu.

<sup>7</sup> Biži unë Jesús tatula rëbinë' leyaquë':

—¿Nuži ben' reguilole?

Na'ra unayaquë' rëbiyaquë' lëbë':

—Reguilondo' Jesús, ben' yedyi Nazaret.

<sup>8</sup> Biži una Jesús rëbinë' leyaquë':

—Baonëcaza' le'e në'ëdi' ben' reguilole. Chi reguilole tuza' në'ëdi', ulesan yaca ben' niga yeyoyaquë'.

<sup>9</sup> Una Jesús can' ta uzun di'idza' ca unë' rëbinë' Xuzinë' dza na': "Yaca ben' pca'nlo' lao na'a, nituyaquë' biuniti."

<sup>10</sup> Cana' guca ulio Simón Pedro espada nu'anë' udinë'n uchuguë' naga yebë ben' lao Malco, ben' zulao xan' pxuzi.

<sup>11</sup> Biži una Jesús rëbinë' Pedro:

—Bedze' espada quio' lu'u lidyin. ¿Cala binenezo' decazide yedzagalaohua' ca ta banugun Xuza' quia'?

*Besedyinyaquë' Jesús lao pxuzi rnabë'ra*  
(Mt. 26.57-58; Mr. 14.53-54; Lc. 22.54)

<sup>12</sup> Na' biži yaca soldado, len comandante quieyaquë', len yaca xaga idao', bëxuyaquë' Jesús pquioyaquë' lëbë' bëyaquë' lëbë' preso.

<sup>13</sup> Na'ra uquië'yaquë' lëbë' zan yu'u quie Anás, ben' naca ben' gula quie Caifás. Lëiza na' naca Caifás pxuzi rnabë'ra.

<sup>14</sup> Lëcaifás naquë' ben' una dza na'la: "Nacalan huenla gati tuzi benë' lao laza yaca ben' yedyi, cala ca ta gati yuguluro." Cana' unë' dza na'la.

*Una Pedro binaquë' ben' quie Jesús*  
(Mt. 26.69-70; Mr. 14.66-68; Lc. 22.55-57)



15 Na' Simón Pedro len itu ben' quie Jesús, unaoyaquë' yaca ben' nequië' Jesús. Biži lëben' quie Jesús nubë'në' ben' naca xan' pxuzi rnabë'ra, lena' uyu'ulënë' Jesús lali'a quie yu'u quie xan' pxuzi.

16 Biži Pedro bega'nnë' ru'a yu'u quie lali'a. Na'ra lëben' quie Jesús, ben' nubë' pxuzi rnabë'ra, broguë' ru'a yu'u, bëlënë' nigula di'idza', nigula rapa ru'a yu'u, ta bdze'në' Pedro lu'u lali'a.

17 Na'ra una nigula na' rëbinë' Pedro:

—¿Cala nacarao' ben' quienë'?

Na'ra una Pedro rëbinë' nigula:

—Binaca' ben' quienë'.

18 Biži yaca ben' zulao xan' pxuzi len yaca xaga idao', ulëchiyaquë' gui' lali'a como dan' ruen zaga. Unita'yaquë' ru'a gui' ta yedze'eyaquë'. Lëzirë Pedro uzërënë' len leyaquë' tzaže ru'a gui'.

*Ben' naca pxuzi rnabë'ra pquëpinë' Jesús*

(Mt. 26.59-66; Mr. 14.55-64; Lc. 22.66-71)

19 Biži ben' naca pxuzi rnabë'ra, unabë' Jesús nu ben' naca yaca ben' quienë', lëzi unabë' bidan' rsëdinë' yaca benë'.

20 Na'ra una Jesús rëbinë' lëbë':

—Biži në'ëdi' zaquë'lao yaca benë' unia' rusëdia'yaquë'. Lu'u idao' sinagoga, lëzi lu'u idao' rnabë'ra gan' regu'udi' yugulu ben' Israel, lëgan' na' rsëdia'yaquë'. Bipsëdia'yaquë' balarazi.

21 ¿Bixquien' rnabo' në'ëdi' bidan' rsëdia'? Unabacara yaca ben' babe cabë' baonia'. Leyaquë' huanayaquë' ca di'idza' unia'. Baneziyaquë' ca di'idza' gudya'yaquë'.

22 Ude beyudyi una Jesús can', biži udapa tu ben' xaga idao' ru'a Jesús, unë' rëbinë' lëbë':

—¿Bixquien' rëbo' pxuzi rnabë'ra cana'?

23 Biži una Jesús rëbinë' lëbë':

—Chi birnia' di'idza' li, unacara bi di'idza' binacan di'idza' li. Pero chi rnia' di'idza' li, ¿bixquien' udapo' ru'a?

24 Na'ra bël Anás mandado uquië'yaquë' Jesús anerioguë' lao Caifás, ben' nacarë pxuzi rnabë'ra.

*Tatula una Pedro binaquë' ben' quie Jesús*

(Mt. 26.71-75; Mr. 14.66-72; Lc. 22.58-62)

25 Tu neraca quie Jesús can', biži Pedro nezënë' ru'a gui' ta yedze'enë'. Na'ra unaba yaca ben' nita' gan' zënë':

—¿Cala nacarao' luë' ben' quie Jesús?

Na' biži Pedro unë' rëbinë' leyaquë':

—Binaca' ben' quienë'.

26 Na'ra unë tu ben' zulao xan' pxuzi, ben' naca familia quie ben' uchugu Pedro nague, rëbinë' Pedro:

—¿Cala blë'ëda' luë' zëla' Jesús gan' dyia yaga?

27 Na'ra una Pedro rëbinë' leyaquë':

—Cala në'ëdi'.

Ca beyudyi unë' cana', laoredyite biu tu.

*Psediyinaquë' Jesús lao na'a Pilato*

(Mt. 27.1-2, 11-14; Mr. 15.1-5; Lc. 23.1-5)

28 Na'ra uquië'yaquë' Jesús lidyi Caifás zioyaquë' ga zu palacio ga re' gobierno quieyaquë', na' baza' reni'. Biži yaca ben' Israel, biuyu'uyaquë' lu'u palacio, dan' binaca ben' naca gobernador ben' Israel. Según naca costumbre quieyaquë', raqueyaquë' bineyëriyaquë' lao Diuzi chi tzu'uyaquë'

lu'u lidyi ben' binaca ben' Israel. Nica gacazi gaoyaquë' quie lani pascua len ben' binaca ben' Israel.

<sup>29</sup> Tana' lena' bro Pilato lu'u palacio, zionë' ga nita' yaca benë', unë' rëbinë' leyaquë':

—¿Cabiži bē ben' niga, na' raolenë' xquia?

<sup>30</sup> Na'ra unayaquë' rëbiyaquë' lëbë':

—Chan' binaquë' ben' rue xquia, bidehua'ando'në' niga.

<sup>31</sup> Na'ra una Pilato rëbinë' leyaquë':

—Ulequië' ben' niga, ichugobë'le ca rna ley quiele le'e.

Na' biži una yaca ben' Israel rëbiyaquë' Pilato:

—Binapando' derecho gutindo' yaca benë'.

<sup>32</sup> Cana' bzun di'idza' ca unë Jesús gaca quienë' gatinë'.

<sup>33</sup> Na'ra Pilato beyu'unë' lu'u palacio gužinë' Jesús unë' rëbinë' lëbë':

—¿Naco' rey quie ben' Israel?

<sup>34</sup> Biži una Jesús rëbinë' lëbë':

—¿Ta racazi quio' rnao' në'ëdi', o chi ta relo' ca rna yaca benë'?

<sup>35</sup> Na'ra una Pilato rëbinë' lëbë':

—¿Bixquien' raquelo' nacaria' ben' Israel? Yaca ben' yedyi quio', len yaca xan' pxuzi, leyaquë' psedyinyaquë' luë' gan' ni. ¿Cabiži bao'?

<sup>36</sup> Biži una Jesús rëbinë' lëbë':

—Naca' ben' rnao', pero cala quie lao yedyi layu niga. Chan' naca' ben' rnao' quie lao yedyi layu niga, huadila yaca ben' nao në'ëdi' len yaca ben' rudie në'ëdi' ta biusedyinyaquë' në'ëdi' lao na'a yaca ben' re'en guti në'ëdi'. Quie lena' rnia' binaca' ben' rnao' quie lao yedyi layu niga.

<sup>37</sup> Na'ra una Pilato rëbinë' Jesús:

—¿Bi ca nao'? ¿Nacacazo' rey?

Biži Jesús unë' rëbinë' lëbë':

—Nacacaza' rey con can' baonao'. Para lena' bida' gologa' lao yedyi layu ta quixogui'a yaca benë' ta naca tabala. Nu yaca ben' nao tabala rzënacaziyaquë' ca rnia'.

<sup>38</sup> Na'ra una Pilato rëbinë' lëbë':

—¿Ca bidan' naca tabala?

*Apsaqueyaquë' ca gutiyaquë' Jesús*

(Mt. 27.15-31; Mr. 15.6-20; Lc. 23.13-25)

Ude beyudyi pquëpi Pilato Jesús, bero Pilato tatula lu'u palacio zionë' ga nita' yaca ben' Israel unë' rëbinë' leyaquë':

—Në'ëdi' rnia' le'e, nitu xquia binehue ben' niga.

<sup>39</sup> Cabë' le'e, de tu costumbre quiele yebioga' tu ben' de lu'u dyiguiba ca ra'ala' lani pascua. ¿Biži ca nale? ¿Re'enle yebioga' ben' naca rey quiele?

<sup>40</sup> Na'ra uredyiya'yaquë' unëyaquë' zidzo rëbiyaquë' Pilato:

—Biyebiolo' ben' na'. Bebio Barrabás.

Cana' unayaquë' rëbiyaquë' Pilato.

Na' biži Barrabás naquë' tu ben' uban.

## 19

<sup>1</sup> Caora na' bē Pilato mandado udi yaca soldado Jesús guidi.

<sup>2</sup> Lëscan' bzu yaca soldado tu coron dyia yëchi' guicho Jesús, bgacoyaquë' lëbë' tu la'ari' Zna chula,

<sup>3</sup> uzëyaquë' zaquë'lao Jesús unayaquë' rëbiyaquë' lëbë':

—¡Viva rey quie yaca ben' Israel!

Caora na' udiyaquë' begoro xtalaonë'.

<sup>4</sup> Na'ra bro Pilato tatula lu'u palacio unë' rëbinë' yaca ben' Israel:

—Ulena'cara, bequi'a ben' ni sënë' laole ta inezile bibi nitu xquia binehuenë'.

<sup>5</sup> Bizi ulioyaquë' Jesús lu'u palacio, nezu coron yëchi' guichonë', nena-corënë' la'ari' zna chula. Na'ra una Pilato rëbinë' leyaquë':

—Ulena'cara bazë ben' ni.

<sup>6</sup> Ca blë'ë yaca xan' pxuzi len yaca ben' xaga idao' Jesús, na'tera urediya'yaquë' unëyaquë' zidzo:

—¡Uleda' ben' na' lë'ë yaga cruzo! ¡Uleda' ben' na' lë'ë yaga cruzo!

Bizi unë Pilato rëbinë' leyaquë':

—Ulequië'në' le'le, uleda'në' le'le lë'ë yaga cruzo. Në'ëdi' nia' nitu xquia bibi nehuenë'.

<sup>7</sup> Na'ra una yaca ben' Israel rëbiyaquë' Pilato:

—Nëto' de tu ley quiendo'. Segün ca rna ley quiendo', reya'ala' gati ben' niga, dan' në' naquë' zi'i Diuzi.

<sup>8</sup> Ca be Pilato can' unayaquë', caora na' bdzebinë' mazara.

<sup>9</sup> Beyu'u Pilato lu'u palacio tatula pquëpinë' Jesús:

—¿Gazi zao' luë'?

Pero Jesús uzënë' chizi, bibequëbinë'.

<sup>10</sup> Na'ra una Pilato rëbinë' lëbë':

—¿Bixquien' birudyi'ilo' di'idza'? ¿Binezo' në'ëdi' de yela' r nabë' quia' hua' mandado uda'yaquë' luë' lë'ë yaga cruzo, o chi usana' luë', hua' luë' libre?

<sup>11</sup> Bizi una Jesús rëbinë' lëbë':

—Bibi yela' r nabë' quio' luë' de ta ichugubao' quia' chan' Diuzi chi bibënë'n luë'. Tana' lena' nacara xquia quie ben' psedyin në'ëdi' laolo', cala ca luë'.

<sup>12</sup> Lëhora na' beguilola'adyi' Pilato ta usannë' Jesús, huenë' lëbë' libre. Pero bizi yaca ben' Israel urediya'yaquë' unayaquë' zidzo:

—Chi usanlo'në' huu'në' libre, binaco' amigo quie rey César, ben' r nabë'ra ra'o. Nu ben' ina naquë' rey, lëben' na' naquë' enemigo quie rey César.

<sup>13</sup> Bizi cati be Pilato bi una yaca benë', na' bënë' mandado bro Jesús lu'u palacio. Ude na' bebe' Pilato xlatonë' ga rchugobë'në' quie yaca benë'. Lëlugar na' nezi'laona di'idza' hebreo Gabata, ta inaro xti'idza'ro: Layu ga yu'u yo laga'.

<sup>14</sup> Mero la'odza, dza iteyu ga'ala' lani pascua, una Pilato rëbinë' yaca ben' Israel:

—¡Ni bazë rey quiele!

<sup>15</sup> Bizi na' urediya'yaquë' unëyaquë' zidzo:

—¡Gatigaranë', gatigaranë'! ¡Uleda' ben' na' lë'ë yaga cruzo!

Na'ra una Pilato rëbinë' leyaquë':

—¿Bixquien' re'enle uda'ndo' rey quiele lë'ë yaga cruzo?

Pero bizi yaca xan' pxuzi, unayaquë' rëbiyaquë' Pilato:

—Tuzi César naquë' rey quiero. Nunura ben' tula zu naca rey quiero.

<sup>16</sup> Ude na' psedyin Pilato Jesús lao na'ayaquë' ta uda'yaquë' lëbë' lë'ë yaga cruzo, na' uquië'yaquë' lëbë'.

*Ni ru'en di'idza' ca guca bda'yaquë' Jesús lë'ë yaga cruzo*

*(Mt. 27.32-44; Mr. 15.21-32; Lc. 23.26-43)*

<sup>17</sup> Lëcana' guca ziolëyaquë' Jesús banu'anë' tuzë' yaga cruzo, bdyinyaquë' gan' nezi'laona di'idza' hebreo Gólgota, ta inaro xti'idza'ro: Chita guicho ben' huati.

<sup>18</sup> Lëgan' na' bda'yaquë' Jesús lë'ë yaga cruzo. Bda'yaquë' ichopa benë' tzala' huio cuëta lë'ë Jesús.

19 Bë Pilato mandado bdyiayaquë' letra guicho cruzo rnën cani: “Jesús, ben' yedyi Nazaret, ben' naca rey quie yaca ben' Israel.”

20 Na'ra yaca ben' zë, yaca ben' Israel blabayaquë' letra, dan' nacan ga'ala' ga re' ciudad Jerusalén. Lao tzona cue' di'idza' bdyiayaquë' letra. Bdyiayaquë' letra hebreo, len letra griego, len letra latín.

21 Tana' lena' una yaca ben' xan' pxuzi rëbiyaquë' Pilato:

—Biudyiale letra rnën “Ben' naca rey quie yaca ben' Israel.” Mejorla udyiale letra inën “Ben' una naca' rey quie yaca ben' Israel.”

22 Na'ra una Pilato rëbinë' leyaquë':

—Ca letra babdyia', yega'nnan cana'.

23 Ude beyuyi uda' yaca soldado Jesús lë'ë yaga cruzo, uzi'yaquë' zabanë' bë'yaquë' laze lao tapayaquë'. Uzi'rëyaquë' capa quienë'. Nacan de tu dibazi, binacan de chopa yo'o.

24 Dan' nacan de tu dibazi, lena' una yaca soldado:

—Bichezaron. Mejorla huero tu suerte ta ineziro nularo gaca quie len.

Cana' guca bzun di'idza' ca rnën lë'ë guichi quie Diuzi ga rnan: “Bë'yaquë' laze zaba', uzi'yaquë'n. Bëyaquë'n suerte quien.” Cana' bë yaca soldado.

25 Bago ga zu cruzo ga da' Jesús, lëgan' na' zë znë'ë, len žila znë'ë, len María žgula Cleofas, lërë María Magdalena.

26 Na'ra blë'ë Jesús zë znë'ë bago len tu ben' quienë', ben' nedyë'ënë'. Na' nacan' unë' rëbinë' znë'ë:

—Zna'a, na' zë ži'ilo'.

27 Lëzirë unërënë' ben' quienë':

—Na' zë zna'lo'.

Cana' guca bequië' ben' quienë' znë'ë žan yu'u quië'.

### *Ca guca cati guti Jesús*

(Mt. 27.45-56; Mr. 15.33-41; Lc. 23.44-49)

28 Biži banezi Jesús babzunë' yugulute di'idza' ca gu'un Xuzinë' Diuzi. Na'ra tacuenda zuran di'idza' ca rnën lë'ë guichi quie Diuzi, lena' unë':

—Barbilida'.

29 Lëgan' na' zu tu yeso' yudzo vino banacan ži. Uzi'yaquë' tu ta naca yun' rzupi' vino, bzuyaquë'n lao yaga, bla'oyaquë'n vino banacan ži. Ude na' bzuyaquë'n ru'a Jesús.

30 Biži caora bzuyaquë'n ru'a Jesús uzupinë'n, caora na' unë':

—Babeyudyite bzun di'idza'.

Ca beyudyi unë' cana', bzëta' guichonë' gutinë'.

### *Tu soldado udyibë' lanza ru'achu'u Jesús*

31 Biži dza na' nacan dza iteyu ga'ala' lani pascua. Lena' bigu'un yaca ben' Israel yega'n benë' lë'ë yaga cruzo, dan' dza iteyu ga'ala' lani, nacan dza že quie lani. Tana' lena' unabayaquë' tu cule lao Pilato chi bihuenë' mandado ta quitzu yaca soldado chita ni'a yaca ben' da' lë'ë yaga cruzo, na' yegubayaquë' leyaquë' gan' da'yaquë'.

32 Cana' uyo yaca soldado uditzuyaquë' chita ni'a yaca ben' uda' lë'ë yaga cruzo cuëta lë'ë Jesús.

33 Ca bdyiayaquë' cuëta lë'ë Jesús, blë'ëyaquë' bagutinë'. Tana' lena' bira uditzuyaquë' chita ni'anë'.

34 Pero tu soldado udyibinë' lanza ru'achu'u Jesús. Caora na' blato ren len nisa gan' udyibi soldado lanza.

35 Në'ëdi', Juan, blë'ëda' can' bëyaquë' quienë'. Naca' testigo cabë' blë'ëda'. Nacan tabala cabë' rnia' quienë' tacuenda galele quienë' inaole xnezë'.

<sup>36</sup> Tana' lena' guca quienë' ta bzun di'idza' con ca rnan lë'ë guichi quie Diuzi gan' rnan: "Biquitzuyaquë' ni tu chita quienë'."

<sup>37</sup> Lëzi zurë itu di'idza' lë'ë guichi la'iya quie Diuzi ga rnan: "Hualë'ë yaca ben' bdyibi lanza ru'achu'uhue lëbë'."

### *Ca guca cati pcachi'yaquë' Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Ude beyudyi guca can', unaba tu ben' lao José, ben' yedyi Arimatea, chi bihue' Pilato lato ta yeyu'anë' cuerpo quie Jesús. Naca José ben' unao Jesús, pero negachi'zi, dan' rdzebinë' quie yaca ben' r nabë'. Na' biži Pilato bë'në' lato uyo José ta beyu'anë' cuerpo quie Jesús.

<sup>39</sup> Lëzirë bdyin Nicodemo, ben' uyo rtze' yegue'lë Jesús di'idza' dza na'la. Bdyinnë' nu'ë galobechi kilo aceite mirra nequixin itu ta lao áloes ta rla'n žixi žeo.

<sup>40</sup> Caora na' bezi'yaquë' cuerpo quie Jesús, ptubiyaquë' lëbë' la'ari' ta la'o aceite rla' žixi žeo, según ca naca costumbre quie yaca ben' Israel rcachi'yaquë' ben' huati.

<sup>41</sup> Biži ga'ala' gan' bda'yaquë' Jesús lë'ë yaga cruzo, lëgan' na' de tu lao lato ga dyia yaca yaga. Biži lao lato na', zu tu yo beló cubi ga nitu yaca ben' huati binecachi'yaquë' gan'.

<sup>42</sup> Biži lu'u beló cubi na', pcachi'yaquë' Jesús dan' zun ga'ala' baruen bago dza huežila'adyi'.

## 20

### *Ca guca cati beban Jesús*

(Mt. 28.1-10; Mr. 16.1-8; Lc. 24.1-12)

<sup>1</sup> Biži bala dza domingo nerna' chula, uži' María Magdalena zionë' gan' zu beló yo gan' pcachi'yaquë' Jesús. Na'ra blë'ënë' bira da' yo laga' ta bda'yaquë' ru'a beló yo gan' pcachi'yaquë' Jesús.

<sup>2</sup> Caora na' taria za' María ga zua' në'ëdi', ben' Jesús nedyë'ë, zëlia' Simón Pedro, ta unë' nëto' unë':

—Babi'ayaquë' cuerpo quie Señor quiero. Bineziro ga yehua'ayaquë' lëbë'.

<sup>3</sup> Na'ra uza'lia' Pedro ziondo' yena'ndo' gan' pcachi'yaquë' lëbë'.

<sup>4</sup> Brondo' rupando' ziondo' tzaže. Biži në'ëdi' udyialaora' bdyinneza' gan' ca Pedro.

<sup>5</sup> Biži byëchoga' blë'ëda' gan' re' la'ari' ptubiyaquë' lëbë', pero biyuu'a lu'u beló.

<sup>6</sup> Biži ca bla' Simón Pedro, uyu'unë' lu'u beló yo, blë'erënë' re' la'ari' ptubiyaquë' lëbë' gan'.

<sup>7</sup> Lëzirë blë'erënë' re' squiela la'ari' bdze'yaquë' guichonë'. Blë'ënë' nedu-bin, bire'n tuzi len la'ari' ptubiyaquë' lëbë'.

<sup>8</sup> Na'ra uyu'uria' në'ëdi' lu'u beló, blë'ëda' can' naca re' yaca la'ari', guleda' tabala beban Jesús.

<sup>9</sup> Biži binegalendö' ca rnan lë'ë guichi la'iya quie Diuzi gan' rnan de que ba'ala'cazi gati Jesús, huebancažinë'.

<sup>10</sup> Na'ra beži'ndo' zeyondo' žan yu'u quiendo'.

### *Ca guca ptilalao Jesús María Magdalena*

(Mr. 16.9-11)

<sup>11</sup> Biži bega'n María rbeyinë' zënë' ru'a beló yo. Du rbeyinë' bzëta' guichonë' rnë'ë lu'u beló.

12 Na'ra blë'ënë' chopa ángel nacoyaquë' la'ari' bezëri. Re'yaquë' gan' udix-  
uyaquë' cuerpo quie Jesús, tunë' zaquë' xquichonë', ituë' zaquë' znì'anë'.

13 Na'ra una yaca ángel rëbiyaquë' María:

—Nígula, ¿bixquien' rbedyo'?

Na'ra bequëbinë' rëbinë' leyaquë':

—Dan' babi'ayaquë' Señor quiendo'. Binezindo' gan' yehua'ayaquë' lëbë'.

14 Tu beyudyizi unë' can', cati beyëchoguë' rnë'ë Jesús na' zë gan'. Pero  
bibezaquenë' chi Jesús na'.

15 Caora na' una Jesús rëbinë' lëbë':

—Nígula, ¿bixquien' rbedyo'? ¿Nuži reguilolo'?

Bizi María raquenë' chi ben' rapa gan' dyia yaca yaga. Na'ra unë' rëbinë'  
lëbë':

—Señor, chi luë' bi'alo' cuerpo, una në'ëdi' gan' yehua'alo'në' ta cuenda tza'  
tzeži'anë' yeyu'anë'.

16 Na'ra una Jesús rëbinë' lëbë':

—¡María!

Na' bizi lëbë', beyalë' unë' rëbinë' Jesús di'idza' hebreo:

—¡Raboni! —ta inaro xti'idza'ro: Maestro.

17 Na' una Jesús rëbinë' lëbë':

—Biuda'lo' nao' në'ëdi', dan' bineya'a guibá gan' zu Xuza'. Ta re'enda' inia'  
luë', beyo gan' nita' yaca ben' bicha', ben' rnao në'ëdi', yëbo'yaquë' në'ëdi'  
hueya'a guibá ga zu Xuziro, ben' naca Diuzi quiero.

18 Bizi María Magdalena uyonë' yetixogue'në' yaca ben' quie Jesús de que  
bablë'ënë' Señor quiero. Unë' udixogue'në' leyaquë' ca di'idza' gudyi Jesús  
lëbë'.

### *Ca guca cati ptilalao Jesús yaca ben' quienë'*

*(Mt. 28.16-20; Mr. 16.14-18; Lc. 24.36-49)*

19 Lëdza na', dza domingo rtze', begu'udi' yaca ben' quie Jesús tu lu'u  
yu'u neyeyo, dan' rdzebiyaquë' quie yaca ben' rnabë'. Bizi uyu'u Jesús  
yatilalaohuë' leyaquë' unë' rëbinë' leyaquë':

—Cue' chizi lu'u laxta'ole.

20 Ude beyudyi unë' can', blu'enë' yaca ben' na' na'anë' len ru'achu'unnë'.  
Lega redaohueyaquë' blë'ëyaquë' lëbë'.

21 Na'ra una Jesús tatula rëbinë' leyaquë':

—Cue' chizi lu'u laxta'ole. Cabë' baose'ela' Xuza' në'ëdi' babzua' di'idza'  
quienë', lëcana' në'ëdi' ise'ela' le'e ta uzule di'idza' quia'.

22 Na'ra blubë' laoyaquë', unë' rëbinë' leyaquë':

—Tzu'u lu'u laxta'ole Bichi Be quie Diuzi.

23 Nu yaca ben' bë xquia yezi'zele quie, bira nao xquia quieyaquë' leyaquë'  
babežinan. Lëzirë nu yaca ben' biyezi'zele quie, naocazi xquia quieyaquë'  
leyaquë' bibežinan.

### *Ca guca cati blë'ë Tomás beban Jesús*

24 Na' Tomás, nacarënë' ben' quie Jesús lao chipchopayaquë', naquë' ben'  
uxubayaquë' laohue ben' guidi', na' biuzunë' caora uyo Jesús tanëro yena'në'  
yaca ben' quienë'.

25 Lëlena' yaca ben' laguedyinë', yaca ben' quie Jesús, unayaquë' rëbiyaquë'  
lëbë':

—Bablë'ëndo' Señor quiero.

Na'ra una Tomás rëbinë' leyaquë':

—Bigaleda' babebannë' chi biilë'ëda' na'anë' gan' guca hue', na' uquia' zbia' gan' udiyaquë' bddido, lëscan' uquia' taca' ru'achu'unnë' gan' udy-ibiyaquë' lanza.

<sup>26</sup> Guca lao xuna dza, cati begu'udi' yaca ben' quie Jesús tu lu'u yu'u tatula. Na' zurë Tomás len leyaquë'. Ba'ala'cazi neyeyo ru'a yu'u, uyu'u Jesús lu'u yu'u yasënë' gatzo la'o gan' nita'yaquë'. Unë' rëbinë' leyaquë' tatula:

—Cue' chizi lu'u laxta'ole.

<sup>27</sup> Na'ra unë' rëbinë' Tomás:

—Una' lu'u taca', na' pqui zbelo' ni. Lëscan' bli na'alo', pqui taco' lu'u ru'achu'a. Bira gaco' ben' birale, pero gule babebana'.

<sup>28</sup> Na'ra una Tomás rëbinë' lëbë':

—Naco' Señor quia', naco' Diuzi quia'.

<sup>29</sup> Biži una Jesús rëbinë' lëbë':

—Tomás, dan' bablë'ëlo' në'ëdi', quie lena' bagulelo'. Yedaohuecazi yaca ben' rale quia', ba'ala'cazi binelë'ëyaquë' në'ëdi'.

### *Unë Juan bixquien' bzunë' di'idza' ni lë'ë guichi*

<sup>30</sup> Bëra Jesús yela' huaca tula lao yaca ben' quienë', pero birguixogue'n lë'ë guichi ni yugulu yela' huaca bënë'.

<sup>31</sup> Babzua' di'idza' ni lë'ë guichi ta rguixogue'n ca bë Jesús tacuenda galele quienë' naquë' Cristo, ži'i Diuzi, na' gata' yela' neban tuzioli quiele.

## 21

### *Ca guca cati ptilalao Jesús lao gadyi yaca ben' quienë' tatula*

<sup>1</sup> Ude beyudyi bë Jesús can', ptilalao huë' tatula yaca ben' quienë' ru'a lagun Tiberias. Ni ru'en di'idza' ca bë Jesús ptilalaonë' yaca ben' quienë'.

<sup>2</sup> Lëdza na' uzë Simón Pedro tzaže len Tomás, ben' nexubayaquë' laohue ben' guidi', len Natanael, ben' yedyi Caná quie estado Galilea, len yaca ži'i Zebedeo, len ichopa yaca ben' quie Jesús.

<sup>3</sup> Biži una Simón Pedro rëbinë' leyaquë':

—Huaya'a tzexia' bela.

Biži unayaquë' rëbiyaquë' lëbë':

—Lëzi nëto' huaza'rëndo' len luë'.

Na'ra uyu'uyaquë' lu'u barco zioyaquë' lao nisa. Bedu yela rdayaquë' lao nisa, pero nitu bela nunu užeyaquë'.

<sup>4</sup> Baza' tzeni' bdyin Jesús zënë' ru'a lagun. Pero biži yaca ben' quienë', re'yaquë' lu'u barco, bibezaqueyaquë' chi lëbë'.

<sup>5</sup> Na'ra una Jesús rëbinë' leyaquë':

—Bicha', žbabële gan bela gaoro?

Biži unayaquë' rëbiyaquë' lëbë':

—Ni tuba' binehuendo' gan.

<sup>6</sup> Na'ra una Jesús rëbinë' leyaquë':

—Uledze' du yëxo quiele zaquë' yebë gan' nita'le lu'u barco ta tzu'u bela.

Na'ra bëyaquë' cabë' una Jesús bdze'yaquë' du yëxo lu'u nisa. Caora na' bedza'ten uyu'un bela zë gula, bira uzueyaquë' yebioyaquë' du yëxo.

<sup>7</sup> Biži una tu ben' quie Jesús, ben' Jesús nedyë'ë, rëbinë' Pedro:

—Señor quiero ben' na'.

Na'ra como dan' nelëcho zaba Pedro re'në' lu'u barco, ca benë' ca unia', labayacatenë' žabë' laohue, uda'në' lu'u nisa ta yedyinnë' gan' zë Jesús.

<sup>8</sup> Na'ra yaca los demás ben' bega'n lu'u barco, psa'yaquë' barco ta yedyinyaquë' layu bidyi. Tzegubayaquë' du yëxo nedza'ten bela como dan' nerdziogue itu gayuhua metrozi ta yedyinyaquë' layu bidyi.

<sup>9</sup> Caora bedyinyaquè' layu bidyi, broyaquè' barco blè'ëyaquè' re' bao' gui' zuban tu bela. Lèzi derè yèta xtila gan'.

<sup>10</sup> Na'ra una Jesús rëbinè' leyaquè':

—Uletzexi' tu chopa bela baozele bachi.

<sup>11</sup> Biži beyu'u Simón Pedro lu'u barco, tzegubanè' du yëxo gan' yu'u yaca bela. Nedza'ten tu gayuhua yugatzo tzona bela yela. Ba'ala'cazi bedza'ten bela, biurugon.

<sup>12</sup> Biži una Jesús rëbinè' leyaquè':

—Uleda gaole rzila.

Na'ra leyaquè' nituyaquè' bibeyažoyaquè' inabayaquè' nu naquè' dan' babezaqueyaquè' lèbè' naquè' Señor quiero.

<sup>13</sup> Na'ra ubiga' Jesús gan' nita'yaquè', uži'nè' yèta xtila len bela bè'nèn' leyaquè'.

<sup>14</sup> Cana' guca lao tzona lasa ptilalao Jesús yaca ben' quienè' ude beyudyi gutinè' bebannè'.

*Jesús bè'lènè' Simón Pedro di'idza'*

<sup>15</sup> Ude beyudyi udaoyaquè' rzila, una Jesús rëbinè' Simón Pedro:

—Simón, ži'i Jonás, žnedyè'ëro' nè'ëdi' ca nedyè'ëlo' nutezi ben' tula?

Na'ra una Pedro rëbinè' lèbè':

—Señor, luè' nezo' nedyè'ëda' luè'.

Biži una Jesús rëbinè' Pedro:

—Re'enda' uzioñe'elo' yaca ben' barale quia'. Nacayaquè' ca quie beco' ži'ila' quia'.

<sup>16</sup> Na' taorupe una Jesús rëbinè' Pedro:

—Simón, ži'i Jonás, žnedyè'ëlo' nè'ëdi'?

Na'ra una Pedro rëbinè' lèbè':

—Señor, luè' nezo' nedyè'ëcaza' luè'.

Biži una Jesús tatula rëbinè' Pedro:

—Re'enda' uzioñe'elo' yaca ben' barale quia'. Nacayaquè' ca quie beco' ži'ila' quia'.

<sup>17</sup> Na' taoyune unaba Jesús Pedro rëbinè' lèbè':

—Simón, ži'i Jonás, žnedyè'ëcazo' nè'ëdi'?

Biži Pedro bega'nnè' gucayèchi'nè', dan' unaba Jesús lèbè' lao yuna lasa chi nedyè'ënè' lèbè'. Na'ra unè' rëbinè' Jesús:

—Señor, luè' banezo' yugulute, banezo' nedyè'ëcazida' luè'.

Na'ra una Jesús tatula rëbinè' Pedro:

—Re'enda' uzioñe'elo' yaca ben' barale quia'. Nacayaquè' ca quie beco' ži'ila' quia'.

<sup>18</sup> Tali ca rnia' luè', cati guco' bi' ru'abe, cuinzo' gucolo' žabo' uyolo' con ga re'lenlo', pero cati gaco' ben' gula, hualio' na'alo' tacuenda ugaco ben' tula luè' žabo' ta tzhua'ayaquè' luè' con ga bire'enlo' tziolo'.

<sup>19</sup> Una Jesús can' tacuenda ineziro ca hue Pedro huenè' Diuzi ben' že hora gatinè'. Ude beyudyi unè' Jesús can', na' unè' rëbinè' Pedro:

—Unao nè'ëdi'.

*Ni rnan quie Juan, nedyè'ëtzegue Jesús lèbè'*

<sup>20</sup> Ca beyècho Pedro, blè'ënè' nè'ëdi' za' naohua' leyaquè'. Nedyè'ëtzegue Jesús nè'ëdi'. Na' uri'a cueta lè'ë Jesús caora udaondo' rtze' dza na'. Caora na' unaba' rëpa'nè': “Señor, žca nuži usedyin luè' lao yaca ben' re'en guti luè'?”

<sup>21</sup> Caora blè'ë Pedro nè'ëdi', unè' rëbinè' Jesús:

—Señor, žcabiži gaca quie ben' niga?



<sup>22</sup> Na'ra una Jesús rëbinë' Pedro:

—Chi re'enda' sura ben' niga zidza hasta que bë' yeguida' tatula, ¿bižcuenda quio' luë' rnabo' në'ëdi'? Pero luë', unao në'ëdi'.

<sup>23</sup> Cana' guca bro di'idza' lado yaca ben' barale quie Jesús cabë' gaca quia' bigatia'. Pero cala cana' una Jesús, sino que unë': “Chi re'enda' sura ben' niga zidza, hasta que bë' yeguida' tatula, ¿bižcuenda quio' luë' rnabo' në'ëdi'?” Cana' una Jesús rëbinë' Pedro.

<sup>24</sup> Në'ëdi', ben' quie Jesús, bzua' di'idza' ni lë'ë guichi. Blë'ëda' naca' testigo cabë' guca quie Jesús. Banezile nacan tali can' baonia'.

<sup>25</sup> Lëzi dera ta bë Jesús. Chan' uzuro lë'ë guichi yugulute ta bë Jesús, bigaque lao yedyi layu gata' libro ga ru'en di'idza' ta bë Jesús. Amén.

## CA YELA' HUACA BĒ YACA APÓSTOL

*Una Jesús huayu'u Bichi Be quie Diuzi lu'u laxta'o ja apóstol quienë'*

<sup>1</sup> Estimado Teófilo, lè'è guichi bia' tanëro, rguixogue'n quie Jesús yugulu cabë' bënë' len yugulu cabë' psëdinë' yaca benë' desde dza uzulaonë' rusëdinë' benë'

<sup>2</sup> hasta dza beyëpinë' ladza. Pero zayeyëpinë' ladza, ulionë' lao chipchopa ben' quienë'. Caora na' lao na'a Bichi Be quie Diuzi unë' gudyinë' leyaquë' bi hueyaquë'.

<sup>3</sup> Ude beyudyi agutinë' bebannë', caora na' zionë' ptilë' ja ben' quienë', uzulënë' leyaquë' lao chopa galo dza ta ineziyaquë' tabala bebannë'. Lëscan' unë' rëbinë' leyaquë' ca rna Diuzi rnabë'në'.

<sup>4</sup> Tu bineza'në' guibá unë' gudyinë' leyaquë' ta biyeza'yaquë' ciudad Jerusalén. Na'ra unë' rëbinë' leyaquë':

—Nizi cuezale gaca quiele ca una Xuza' n huenë' quiele

<sup>5</sup> según cabë' agudya' le'e. Na' tali na' bë' Juan laole conlë nisa, pero netza'la ca hue Diuzi quiele, ise'elë' Bichi Be quienë' ta tzu'unë' laxta'ole ichopa tzona dza.

*Cabë' guca beyëpi Jesús ladza zeyonë' guibá*

<sup>6</sup> Na'ra cati bdyin dza, bedupa ben' quie Jesús tatula bël'jë' lëbë' di'idza':  
—¿Señor, rnabando' luë' chi babdyin hora huu' mandado yenabë'ro lao yedyi quiero tatula como unabë' xuzixta'oro dza na'te?

<sup>7</sup> Na'ra bequëbi Jesús në' rëbinë' leyaquë':

—Binacan quiele inezile bi hora, bi tiempo, hue Xuziro Diuzi bi re'ennë' huenë', porque tuzi Diuzi de yela' rnabë' quienë' bi re'ennë' huenë'.

<sup>8</sup> Pero le'e, caora baoyu'u Bichi Be quie Diuzi lu'u guicho laxta'ole, cana' gata' quiele yela' huaca quie Diuzi. Te na' tzirole tzetixogue'le yaca benë' len cabë' bia' cabë' unia'. Tanëro tzirole ciudad Jerusalén. Na' tziorele estado Judea len estado Samaria. Na'tera hasta duze yedyi layu tzirole.

<sup>9</sup> Ude beyudyi unë' cana', tu nerna'yaquë' lëbë', beyëpi Jesús ladza, bdubi beo lëbë', bira blë'ëyaquë' lëbë'.

<sup>10</sup> Nerna'yaquë' ladza ga zio Jesús, caora labdyinte chopa ángel nacoyaquë' la'ari' bezëri.

<sup>11</sup> Na'ra unayaquë' rëbiyaquë' ben' quie Jesús:

—¡Ben' Galilea! ¿Bixquien' rebanle rna'le ladza gan' zeyo Jesús guibá? Rnando' le'e cabë' blë'ële beyëpinë' ladza zeyonë' guibá, cana' yeguidanë' lao yedyi layu tatula.

*Uliojë' Matías bënë' apóstol lao laza Judas*

<sup>12</sup> Na'ra uza'yaquë' ya'a Olivos bdyinyaquë' ciudad Jerusalén. Bizi ya'a ga uza'yaquë' nacan ga'ala' para idyinjë' ciudad Jerusalén. Bigucan gatzo legua.

<sup>13</sup> Na' cati bdyinyaquë' ciudad Jerusalén, bdyinyaquë' ga re' tu yu'u chopa xcuia, urëyaquë' ga nacan lao chopa xcuia na'. Entre leyaquë' laojë' Pedro, len Juan, len Santiago, len Andrés, len Felipe, len Tomás, len Bartolomé, len Mateo, len Santiago zi'i Alfeo, len Simón ben' partido cananista, len Judas zi'i Santiago.

<sup>14</sup> Yugu dza bedupalëjë' María, zna' Jesús, len yaca ben' bichi Jesús, len yaca itu chopa nígula tacuenda hue'lëjë' Diuzi di'idza'.

<sup>15</sup> Bizi bdyin dza begu'udi' du tu gayuhua galo ben' rale quie Jesús. Na' gatzó lao' re' Pedro uzuliné' rëbiné' leyaquë':

<sup>16</sup> —Bicha', zana', bisaque' te cana'zi di'idza' quie Diuzi. Re'en ca re'ena gaca quie Judas laga con' ca una rey David lao na'a Bichi Be quie Diuzi, porque bë Judas tuze len yaca ben' bëxo Jesús, ben' bë lëbë' preso.

<sup>17</sup> Lëscan' bë Judas ra'o tuze udixogue'lëronë' yaca benë' xti'idza' Diuzi.

<sup>18</sup> Beya'onë' tu cue' layu conlë dumi ta udižuyaquë' lëbë' quie tamala bënë'. Pero bdyin dza bgudyinë' yu utin guidi lë'ënë', na' brote xlonë' yaque'n layula.

<sup>19</sup> Por lena' uxuba ben' Jerusalén lao layu quienë' Acéldama, ta inaro xti'idza'ro: Layu ga ulato ren.

<sup>20</sup> Porque rnën lu'u libro Salmos cani:

Huadachi yu'u quienë', yega'nnan cana'zi.

Ganura dyila' su lu'u lidyinë'.

Lëzi cani rnën:

Huazi' ben' tula dyin quienë'.

<sup>21</sup> Na'ra nerna Pedro rëbinë' leyaquë':

—Ladoro niga zu yaca ben' uza'lë ra'o tuze caora uzulaoro udalëro Jesús

<sup>22</sup> desde cati bë' Juan lao benë' hasta dza beyëpi Jesús ladza. Re'ennan cuioro ben' tula tacuenda gacarënë' testigo conlë ra'o de que nacan tabala babeban Jesús.

<sup>23</sup> Na'ra ulioyaquë' chopa be'mbyu. Tunë' laonë' Matías, itunë' laonë' José, ben' laorë Barsabás, lëscan' laorënë' Justo.

<sup>24</sup> Na' bizi bë'lë yaca apóstol Diuzi di'idza' rëbiyaquë' lëbë':

—Xuzindo' Diuzi, luë' nezo' cabë' naca pensari quie quiendo'. Una nëto' nu ben' re'enlo' cuiondo' lao rupa yaca ben' nita'ja ni

<sup>25</sup> tacuenda sa'lënë' nëto' yega'nnë' lao laza Judas. Cabë' bë Judas, gucanë' ben' mala, zeyonë' ga reya'ala' zagacanë' castigo.

<sup>26</sup> Na'ra bëyaquë' sorteo lao rupayaquë'. Na' bizi Matías bënë' gan sorteo bënë' tuze lao ichiptu ja apóstol.

## 2

### *Cabë' bë Bichi Be quie Diuzi uyu'unë' lu'u laxta'o yaca ben' quie Jesús*

<sup>1</sup> Na'ra guca dza lani quie usecho quie trigo laona lani quie pentecostés. Por lani na', bdupa yaca ben' quie Jesús tu lu'u yu'u.

<sup>2</sup> Bizi desde guibá ga zu Diuzi za' chi' ca tu be bedun' fuerte. Cati bdyinnan, uyu'un lu'u yu'u gan re'yaquë'.

<sup>3</sup> Lëzi, tu ta ra'ala' ca gui' ptilalaonan leyaquë'. Nacan forma ca ludyi benë'. Na'ra bdyinnan bdzatzana ziona tu huioyaquë' ga re'yaquë'.

<sup>4</sup> Caora na' uyu'u Bichi Be quie Diuzi lu'u laxta'oyaquë' yugulujë'. Lena' uzulaoyaquë' rnëyaquë' di'idza' quie ben' tula. Yela' huaca quie Bichi Be quie Diuzi lagucateyaquë' di'idza' quie ben' yedyi tula.

<sup>5</sup> Na'ra ciudad Jerusalén unita' zë ben' Israel, ben' reza'la'adyi' Diuzi. Zë yedyi bdzatzajë' bdyinyaquë' ciudad Jerusalén.

<sup>6</sup> Bizi caora beyaquë' rnë ben' quie Jesús xti'idza' tu tujë', bega'nyaquë' rebanyaquë'.

<sup>7</sup> Bizi yela' uban guca quieyaquë' unayaquë':

—Ben' rnë di'idza' niga, ¿quele ben' estado Galilea? ¿Cómo arnëyaquë' di'idza' quie tu turo?

<sup>8</sup> ¿Cómo rero xti'idza'ro ga goloro?

<sup>9</sup> Niga nita' ben' Partia, len ben' Media, len ben' Elam, len ben' Mesopotamia, len ben' Judea, len ben' Capadocia, len ben' Ponto, len ben' Asia,

<sup>10</sup> len ben' Frigia, len ben' Panfilia, len ben' Egipto, len ben' Africa ga nebaba yedyi Cirene,

<sup>11</sup> len ben' Creta len ben' Arabia. Ben' Israel nacayaquë'. Uza'yaquë' yedyi quiejë' bdyinyaquë' ciudad Jerusalén. Lëzi niga rda yaca ben' Roma, ben' bida tu hueltazi. Balayaquë' nacayaquë' ben' Israel, ibalayaquë' ba'ala'cazi binacayaquë' ben' Israel, rnaoyaquë' costumbre quie ja ben' Israel. ¿Cómo, pues, rnë ben' estado Galilea di'idza' quie tu turo, rguixogue'yaquë' ra'o cabë' naca yela' huaca quie Diuzi?

<sup>12</sup> Biži lega reban ja ben' za'ja yedyi tula, porque binezijë' bi raza quiejë'. Lena' nayaquë' rëbijë' laguedyiaquë':

—¿Biži raza niga?

<sup>13</sup> Na'ra ibalayaquë' ptitojë' yaca ben' quie Jesús rëbijaquë' laguedyijë':

—Azudyiaquë'.

*Con cabë' una Pedro gudyinë' ja ben' nita'ja na'*

<sup>14</sup> Na'ra uzuli Pedro len ichiptu ja apóstol. Uzulaonë' rnë' zidzo rëbinë' yaca benë' nita' na':

—Uzëcara nagale, le'e ben' estado Judea len le'e ben' ciudad Jerusalén. Re'enda' inia' le'e tu chopa di'idza' nacan belao yele.

<sup>15</sup> Bigacale pensari aozudyindo', porque nenacara baguin.

<sup>16</sup> Cala aozudyindo', dechan' ruen quiendo' ca una profeta Joel dza na'te cati unë':

<sup>17</sup> Dza baruen bago yedu yedyi layu, udze' Diuzi Bichi Be quienë' lu'u laxta'o benë'.

Por lena' quixogue' zi'iro cabë' naca di'idza' la'iya quie Diuzi.

Por lena' ulu'e Diuzi bi' ru'abe quiero tu ta binelu'enë' ra'o.

Por lena' hue Diuzi mandado ixusa ben' gula quiero, pero tu ta binexusayaquë'.

<sup>18</sup> Lëzi zaidyinra dza, udze' Diuzi Bichi Be quienë' lu'u laxta'o nu ben' naca ben' quienë', chi be'mbyu, chi nigula.

Por lena' quixogue'jë' benë' xti'idza'në'.

<sup>19</sup> Lëzi žan guibá ulu'e Diuzi tu ta yebanro ilë'ëron.

Pues huenë' seña quienë' lao yedyi layu como hualato ren, huayala gui' duže, huabe' dzen ca beola.

<sup>20</sup> Lëzi huechula obidza, ina' biu' znazi como ca ren.

Cana' gaca tu dza antes zaidyin dza hue Diuzi juicio.

Naca lëdza na' dza belao, gaca tu ta binelë'ëro.

<sup>21</sup> Biži yugulu ben' ulidza Diuzi, ben' rzëto laohuë', ute usela Diuzi leyaquë'.

<sup>22</sup> Na'ra nernë Pedro rëbinë' leyaquë':

—Uzëcara nagale cabë' inia' le'e ben' Israel. Jesús, ben' yedyi Nazaret, bablu'e Diuzi lao le'e lega yaxenë' ca bënë' como dan' lao na'anë' bë Diuzi yela' huaca quienë' zaca'lao le'e. Dyë'ëdi nezile cabë' guca quie Jesús.

<sup>23</sup> Pues según ca pensari bë Diuzi huenë' dza na'te, napsedyinnë' Jesús lao na'ale. Na'ra le'e bële lëbë' preso, bda'lenë' lë'ë yaga cruzo bëtilenë', bële tuže conlë yaca ben' mala.

<sup>24</sup> Pero pseban Diuzi lëbë'. Tuzioli bira gatinë', porque bira saque' yela' guti huanan gan Jesús.

<sup>25</sup> Na'ra nernë Pedro rëbinë' leyaquë' con cabë' una rey David quie Jesús dza na'la:

Bablë'ëda' zu Diuzi rna' ruhuianë' në'ëdi' yugu dza.

Zuë' cuëta' zaquë' yebë rapanë' në'ëdi'.

Quie lena' birdzeba' bi tamala gaca quia'.

<sup>26</sup> Quie lena' zu gusto lu'u guichi laxta'ohua', redaohueda' ru'elia' Diuzi di'idza'.

<sup>27</sup> Quie lena' birdzeba' rbeza' dza useban Diuzi cuerpo quia', porque biusan Diuzi alma quia' yeyon gabila ga de yaca ben' huati.

Lëscan' bihue'në' lato itabo cuerpo quia' në'ëdi', ben' la'iya quienë'.

<sup>28</sup> Abzioñe'le Diuzi në'ëdi' cabë' naca xnezë'.

Nu ben' inao xnezë', huata' yela' neban quieyaquë' tuzioli.

Legazi redaohueda' dan' zulía' Diuzi tuže.

Na'ra nernë Pedro rëbinë' leyaquë':

<sup>29</sup> —Bicha', nacan tali aguti xuzixta'oro rey David dza na'la. Pues apachi'yaquë' lëbë', nereza'la'adyi'ro ga de ba quienë'.

<sup>30</sup> Na'ra como guca rey David ben' profeta, ben' rguixogue' di'idza' quie Diuzi, quie lena' unezinë' bega'nle Diuzi lëbë' di'idza' de que gaca tu ži'i subanë' ben' naca Cristo, huatzeque'në' xlatonë' inabë'në'. Băbgunte Diuzi cuinnë' gacan ca unë' gacan.

<sup>31</sup> Lëscan' ca ben' bablë'ë una rey David useban Diuzi Cristo. Quie Cristo unë' caora unë' biusan Diuzi yeyo alma quienë' gui' gabila ga de ben' huati. Bihue'në' lato itabo cuerpo quienë'.

<sup>32</sup> Nëto' yugulundo' nacando' testigo pseban Diuzi Jesús.

<sup>33</sup> Cana' ure'në' zaquë' yebë cuëta Diuzi ga naca xlato ben' bala'ana. Lëscan' use'ela' Diuzi Bichi Be quienë' según di'idza' bega'nle Diuzi Jesús dza na'. Por lëbë' bablë'ële babele yela' huaca quie Diuzi.

<sup>34</sup> Na'ra quele rey David beyëpinë' ladza, sino que lëbë' unë' quie Jesús cati unë' cani:

Una Diuzi rëbinë' ben' naca Señor quia': "Ure' cuëta' zaquë' yebë niga,

<sup>35</sup> hasta idyin dza cuëcha' xni'alo' ja ben' rudie luë'."

Na'ra nernë Pedro rëbinë' leyaquë':

<sup>36</sup> —Reya'ala' inezi yugulu ben' Israel du la'adyi'yaquë' de que lëben' bda'yaquë' lë'ë yaga cruzo naquë' ben' bë Diuzi nombrar Señor quiero lëscan' Cristo quiero.

<sup>37</sup> Ude beyudyi bzënağayaquë' ca una Pedro, caora na' ben bayëchi' pensari quiejë' unabayaquë' rëbiyaquë' Pedro len los demás apóstoles:

—Bicha', ¿bizi ca huendo'?

<sup>38</sup> Na'ra una Pedro rëbinë' leyaquë':

—Uletza' pensari quiele, ulehue lato hue'ndo' laole quie quiele rzëtondo' lao Jesucristo tacuenda yezi'že Diuzi dula' xquia quiele. Cana' udze'në' Bichi Be quienë' lu'u guicho laxta'ole con cabë' una Diuzi huenë' quiele dza na'te.

<sup>39</sup> Pero quele para le'ezi una Diuzi cana' dza na'te, lëscan' quie ja ži'ile zaza', lëscan' quie ja ben' binaca ben' Israel, para nutezi ben' cuió Diuzi gaca ben' gale quienë'.

<sup>40</sup> Cana' una Pedro bë'në' leyaquë' consejo rëbinë' leyaquë':

—Ulebiga' tzala'la bihuele tuže yaca ben' birezëna quie Diuzi, ben' nebi-agui'.

<sup>41</sup> Pues na'ra zëyaquë' uyezila'adyi'jë' gulejë' ca una Pedro. Dza na', tu dzazi, gule ja tzona mila benë', bëjë' tuže len yaca apóstol. Na'ra bë' ja apóstol laoyaquë'.

<sup>42</sup> Bipsanjë' inaojë' ca gudyi yaca apóstol leyaquë'. Bega'nleyaquë' laguedyiaquë' tuzi, bë'lëyaquë' Diuzi di'idza', bedupajë' bzuzuyaquë' yëta xtila.

*Cabè' bë yaca ben' unao xneza Jesús taprimero*

<sup>43</sup> Na'ra tu rebanzi ben' birale cabè' bë ja apóstol yela' milagro quie Diuzi.

<sup>44</sup> Biži bega'n ben' quie Jesús de acuerdo entre leyaquè', bë'yaquè' laze entre lèjë' yugulu ta de quieyaquè'. Lèzi chi nita' ben' bide dumi quie,

<sup>45</sup> na'ra bëti'yaquè' ta de quieyaquè' bë'yaquè' ben' bide dumi quie.

<sup>46</sup> Tu dza, tu dza, begu'udi'yaquè' lu'u idao' r nabè'ra, lëscan' lu'u yu'u quie tu tuyaquè' uyoyaquè' yetaoyaquè'. Legazi redaohueyaquè' udaoyaquè' tuže, bžuzuyaquè' yëta xtila beza'la'adyi'jë' Jesús,

<sup>47</sup> udapala'nyaquè' Diuzi. Blè'ë yaca ben' yedyi quieyaquè' leyaquè' ben huen. Na'ra tu dza, tu dza, psere Diuzi nura ben' gale quie', gaquè' tuže len yaca los demás ben' barue quie Diuzi.

### 3

*Beyue Pedro tu ben' zi*

<sup>1</sup> Na'ra bdyin dza zio Pedro len Juan lu'u idao' r nabè'ra tacuenda hue'lëyaquè' Diuzi di'idza'. Según ca costumbre quie ja ben' Israel na', rioyaquè' zadzè' du reda tzona. Biži na' ru'a idao' na' re' tu ben' zi, pero cati golotè' nazinè'.

<sup>2</sup> Yugu dza ralëchiyaquè' lëbè' ru'a idao' r nabè'ra laonan ru'a badan tacuenda inabè' caridad con nu ben' zioja lu'u idao' r nabè'ra na'. Unabayëchi'nè' ben' bedè zio lu'u idao' r nabè'ra ta caridad.

<sup>3</sup> Caora blè'ë ben' zi Pedro len Juan, unëyëchi'nè' hue'yaquè' tu caridad quienè'.

<sup>4</sup> Na'ra blidzayaquè' lëbè' rëbjjë' lëbè':

—¡Una'cara nëto'!

<sup>5</sup> Biži una' ben' zi leyaquè' guquè' pensari hue'yaquè' tu caridad quienè'.

<sup>6</sup> Pero na'ra una Pedro rëbinè' ben' zi:

—Bibi oro, bibi plata, zia' guna' luè', pero tu ta nezda' gacalia' luè', rnia': ¡Uzuli! ¡Uza! porque yela' huaca quie Jesús, ben' yedyi Nazaret, hueyuenè' luè'.

<sup>7-8</sup> Na'ra bëxu Pedro në'ë yebè. Caora cati uchisanè' në'ë, labezute ni'anè' yu, laoxititenè' uzulaonè' rza'nè'. Na'ra ziolè ben' zi leyaquè' lu'u idao' r nabè'ra, zionè' rxitinè' ruenè' Diuzi ben' ze.

<sup>9</sup> Caora blè'ë ja benè' ca rue ben' zi, barza'nè' ruenè' Diuzi ben' ze,

<sup>10</sup> biži tu bega'nziyaquè' rebanyaquè' ca guca quienè'. Bezaqueyaquè' lëbè' ure'nè' yugu dza ru'a idao' r nabè'ra unabayëchi'nè' benè' tu caridad quienè'.

*Pedro bdze'nè' di'idza' ga zu tu lachila laonan lachila quie Salomón*

<sup>11</sup> Na'ra bdyin Pedro, len Juan, len ben' beyuejë' ga zu tu lachila quie idao' laona lachila quie Salomón. Biži bire'en ben' beyuejë' usannè' leyaquè'. Pues ben' zè beguitejë' gan zè Pedro len Juan, tu bebanzijè' cabè' guca quie ben' beyuejë'.

<sup>12</sup> Caora blè'ë Pedro banita' ja ben' zè, na'ra unè' rëbinè' lejè':

—Bicha', nacale ben' Israel ca në'ëdi'. Biyebanle ina'le nëto' como si fuera yela' huaca quiendo' beyuendo' ben' ni. Bigacale pensari yela' rionla'adyi' quiendo' bareza' ben' zi.

<sup>13</sup> Cala lena' beyacanè', dechan' yela' huaca quie Diuzi quie xuzixta'oro Abraham, len Isaac, len Jacob bezi' ni'anè' fuerza. Pues tuzi Diuzi na' pca'nnè' lao na'a ži'inè' Jesús naquè' ben' r nabè' lao yugulute. Pero le'e bële

yela' mala quiele psedyinle Jesús lao na'a ja ben' r nabë'. Caora cati gu'un Pilato yebionë' Jesús dyiguiba, le'e bigu'unle.

14 Calëla unabale gu'unle yebio Pilato tu ben' ruti benë'. Bigu'unle yebio Pilato tu ben' naca la'ya, ben' dya'a.

15 Le'e gu'unle gati ben' run yela' neban quiero, pero Diuzi psebanë' lëbë'. Nacando' testigo pseban Diuzi lëbë'.

16 Re'enda' inia' le'e de que cuin Jesús beyuenë' ben' zi, ben' beyaca bezaquele. Beyue Jesús lëbë' caora bzëtondo' laonë' ralendo' quienë'. Cana' labeyacatë' zë' laole rlë'ëtelenë'.

17 Na'ra nernë Pedro rëbinë' leyaquë':

—Bicha', banezda' de que caora bëtile Jesús, binezile bi bële, lëzi ben' r nabë' quiele, binezirëjë' bi bëjë'.

18 Pero guca quie Jesús de acuerdo con ca una Diuzi dza na'te caora bzu ben' profeta xti'idza' Diuzi lë'ë guichi. Na'ra rnën de que huadyin dza yedzagalao ben' naca Cristo.

19 Por lena' reya'ala' utza'le pensari quiele, inaole xneza Diuzi tacuenda yezi'zenë' dula' xquia quiele, na' cuëchinë' chizi lu'u guicho laxta'ole,

20 huenë' mandado yeguida Jesús tatula como naca Jesús ben' ulio Diuzi desde cana'te ta gacalënë' le'e.

21 Pero huadzënë' guibá hasta que idyin dza hue Diuzi mandado uzunë' xti'idza'në' con cabë' rnën lë'ë guichi la'ya bë ben' profeta, ben' unita' dza na'la, ben' naca la'ya quienë'.

22 Quie lena' una Moisés dza na'te gudyinë' xuzixta'oro cani: “De entre laguedyizi ro ise'ela' Diuzi itu ben' quixogue' xti'idzë' laga con ca use'ela'në' në'ëdi'. Re'ennan huele bala yugulu con ca inë' le'e.

23 Porque nu ben' bihue bala con ca inë', udyiagui' Diuzi lëjë'. Bihue' Diuzi lato inita'lëjë' yaca ben' quienë'.” Cana' una Moisés.

24 Lëscan' yugulu yaca los demás ben' udixogue' xti'idza' Diuzi dza na', desde Samuel lente yaca ben' zeza'ra, unëjë' quie dza rda Jesús lao yedyi layu.

25 Ca di'idza' bega'nle Diuzi leyaquë', lëscan' nega'nnan para le'e caora una Diuzi rëbinë' xuzixta'oro Abraham cani: “Por tu zi'isubo' huaca huen gula quie yugulu ben' nita' lao yedyi layu.”

26 Na'ra quie lena' ulio Diuzi zi'inë' Jesús, use'ela'në' lëbë' laole tanëro tacuenda gaca tahuen gula quiele, usanle bira huele tamala.

## 4

### *Psedyinyaquë' Pedro len Juan lao na'a ben' r nabë'*

1 Na'ra neru'elë Pedro lënë' Juan yaca benë' di'idza' caora bdyin yaca pxuzi, len yaca xan' policia quie idao' r nabë'ra, len tu cue' ben' Israel nacajë' quie partido saduceo.

2 Rdza'yaquë' Pedro len Juan porque rdayaquë' ru'elëyaquë' yaca benë' di'idza' rnyaquë' de que cabë' guca quie Jesús bebannë' nacan prueba huadyin dza yëbanrë yaca ben' huati.

3 Na'ra bëyaquë' leyaquë' preso, bdze'yaquë' leyaquë' lu'u dyiguiba ga bega'nyaquë' tu yela porque aodze'. Lena' bibë'n nan lato tzesëyaquë' lao ben' r nabë'.

4 Na'ra ben' zë, ben' bzënaga quiejë', guleyaquë' di'idza' quie Diuzi, ptza'yaquë' pensari quieyaquë'. Por lena' uye ben' barale quie Jesús cadu ga'yo' mila be'mbyu, apartela nigula.

<sup>5</sup> Na' biži beteyu dza tula, bedupa ben' r nabë' quie ciudad Jerusalén tacuenda hueyaquë' junta. Bdyinrë yaca ben' gula, len ben' r nabë' quie idao' r nabë'ra, len ben' escribas, ben' rusëdi di'idza' bzu Moisés lë'ë guichi.

<sup>6</sup> Bdyinrë xan' pxuzi laonë' Anás, len Caifás, len Juan, len Alejandro, lente yugulu diadza quie xan' pxuzi.

<sup>7</sup> Na'ra bëyaquë' mandado tzexi'jë' Pedro len Juan ta tzesëjë' laojë'. Caora bazëyaquë' na', na'ra una ben' r nabë' rëbinë' leyaquë':

—¿Bi yela' r nabë' de quiele rdale niga ruele cabë' re'enle? ¿Nuži use'ela' le'e?

<sup>8</sup> Na'ra du yu'u Pedro Bichi Be quie Diuzi, unë' rëbinë' leyaquë':

<sup>9</sup> —Le'e ben' r nabë' quie ciudad Jerusalén, len le'e ben' gula, chi re'enle inezile bi yela' r nabë' de quiendo' bëndo' tu huen beyuendo' ben' neseco ni'e,

<sup>10</sup> chi re'enle inando' le'e len lo demás ben' Israel, nainando' de que por yela' huaca quie Jesucristo, ben' yedyi Nazaret, babeyaca ben' niga. Lëcazi ben' bda'le lë'ë yaga cruzo, ben' pseban Diuzi, lëbë' beyuenë' ben' niga.

<sup>11</sup> Le'e bële ca ben' rue huecua', ben' uru'un tzala'la yo laga'. Na' Jesús naquë' ca quie yo laga' uru'unle tzala'la, pero uži' Diuzi yo laga' uru'unle, bzunë'n ga rzulao besu.

<sup>12</sup> Pues ni tu ben' tula biuse'ela' Diuzi ta ute uselanë' ra'o. Tuzi Jesús na' use'ela' Diuzi lao yedyi layu ta ute uselanë' ra'o yeyoro guibá. —Cana' una Pedro, rëbinë' ben' r nabë'.

<sup>13</sup> Na'ra caora be yaca ben' r nabë' ca una Pedro len Juan, blë'ëyaquë' birdzebijë', na'ra tu rebanzijë' porque unezijë' naca Pedro len Juan ben' birlë'ética guichi. Pero bezaquejë' naca Pedro len Juan ben' quie Jesús.

<sup>14</sup> Pero como na' zëlëjë' ben' beyueyaquë', bira ubin ben' r nabë' bi inayaquë' contra leyaquë'.

<sup>15</sup> Na'ra bebiojë' Pedro len Juan lu'u yu'u gan nitajë' tacuenda hue'yaquë' di'idza' entre lëzijë' bi hueyaquë' quieyaquë'.

<sup>16</sup> Na'ra ru'eyaquë' di'idza' rëbiyaquë' laguediyyaquë':

—¿Bi huero? Nacan tali bëyaquë' tu yela' milagro. Nun quie banezi yugulu ben' yedyi cabë' bëyaquë', bisaque' yëbiro ben' yedyi bibi yela' milagro nehueyaquë'.

<sup>17</sup> Na'ra ta iyudyi quie asunto ta bira huen zëdi lao ben' yedyi, mejorla uzëgadyiro quiejë' de que bireya'ala' inëyaquë' quie Jesús.

<sup>18</sup> Na'ra beyëzi yaca ben' r nabë' Pedro len Juan tatula, bzëgadyiyyaquë' quiejë' de que bireya'ala' inëyaquë' quie Jesús.

<sup>19</sup> Caora na' una Pedro len Juan, rëbiyaquë' leyaquë':

—Reya'ala' huele pensari chi nacaran huen huendo' cabë' re'enle, na' bihuendo' cabë' re'en Diuzi.

<sup>20</sup> Nëto' bisaque' usanndo' yëbindo' benë' ca ta blë'ëndo' ca ta bendo'.

<sup>21</sup> Na' bzëgadyi yaca ben' r nabë' quieyaquë' tatula. Pero psanyaquë' leyaquë' cana'zi, beroyaquë' zeyoyaquë'. Biubinjë' bi huejë' quiejë', porque dan' yugu ben' yedyi rueyaquë' Diuzi ben' ze, dan' blë'ëyaquë' beyaca ben' zi.

<sup>22</sup> Lëben' na', ben' beyaca ni'e por yela' milagro quie Diuzi, mazla chopa galo iza napanë'.

*Yaca ben' quie Jesús blidzajë' Diuzi unabajë' hue'në' leyaquë' fuerza valor*

<sup>23</sup> Na'ra psan yaca ben' r nabë' lejë', uzi'yaquë' zioyaquë' bdyinyaquë' ga nita' los demazara ben' quie Jesús, bë'leyaquë' leyaquë' di'idza' bicara dan' gudyi yaca xan' pxuzi len yaca ben' gula.



24 Ude beyudyi beyaquë' ca una Pedro len Juan, caora na' yuguluyaquë' blidzayaquë' Diuzi rêbiyaquë' lëbë':

—Xuzindo' Diuzi, luë' bëlo' guibá, bao' dyila yu, bao' nisadao' lente yugulu ta de lu'una.

25 Luë' conlë Bichi Be quio', bao' mandado bzu rey David di'idza' quio' lë'ë guichi la'iya ga rnën caniga:

¿Bixquien' raca dila lao yedyi layu?

¿Bixquien' racajë' pensari bizinaquezi?

26 Abedupa ja ben' rnabë' quieyaquë' tacuenda huejë' contra Diuzi len zi'inë', ben' naca Cristo.

27 Cana' una rey David dza na':

—Na'ra bablë'ëndo' nacan tabala yedyi ni bë rey Herodes, len Poncio Pilato, len ben' Israel, len ben' yedyi tula tuze contra zi'ilo' Jesús, ben' la'iya quio'.

28 Pero bëyaquë' cabë' mandado bao' dza na'te gaca quieyaquë'.

29 Na'ra, Xuzindo' Diuzi, una' como re'enyaquë' utzebiyaquë' nëto'. Gucalë nëto' como nacando' ben' quio' cuenda bidzebindo' yeyondo' tzetixogue'ndo' benë' di'idza' quio'.

30 Uquicho' na'alo' yeyuelo' yaca ben' raca Zhue'. Uquicho' na'alo' ta gaca yela' huaca quio' lao na'a zi'ilo' Jesús, ben' la'iya quio'. —Cana' unayaquë' rêbiyaquë' Diuzi.

31 Caora beyudyi bë'lëyaquë' Diuzi di'idza', na'ra bzin gan' begu'udi'yaquë'. Du yu'uyaquë' Bichi Be quie Diuzi, birdzebijë' quixogue'jë' benë' xti'idza' Diuzi.

### *Con bitezi ta de quie ben' quie Jesús, guquen quie entre yugujë'*

32 Na'ra yaca ben' zë, ben' nao xneza Jesús, guca pensari quiejë' yugutejë' tuzi. Entre leyaquë', yugulu ta de quieyaquë', gucan para quie yugutejë'.

33 Na'ra yaca apóstol bipsanyaquë' quixogue'yaquë' benë' cabë' guca quie xa'nro Jesús caora gutinë' bebannë'. Pero xti'idza'jë' bi'an fuerza valor, porque Diuzi gucalënë' leyaquë'.

34 Lëscan' entre leyaquë', ni tu gabi bdziogueyaquë', como dan' yugo ben' de quie, chi yu'u, chi layu, bëti'yaquë'n la hora rdzioguejë' dumi,

35 na' uzi'jë'n bë'jë'n apóstol. Na'ra bë apóstol mandado ta udisiyaquë' dumi quie tu tuyaquë' con nu ben' bide quie.

36 Na' ladoyaquë' uzu tu ben' naca familia quie xuzixta'oro Leví laonë' José. Lao isla Chipre gologuë'. Uxuba ja apóstol laonë' Bernabé, ta inaro xti'idza'ro: Ben' huen, ben' zela'adyi'.

37 Lëben' na' bëti'në' layu quienë' bë'në' apóstol dumi quien.

## 5

### *Cabë' guca bë Ananías len Safira xquia quiejë'*

1 Pero uzu tu ben' laonë' Ananías lënë' žgulanë' Safira. Pues na' bëti'yaquë' tu layu quieyaquë'.

2 Pero binahue dumi quien bë'në' apóstol, nechan' baoži'në' lë'ëti' quienë' tu partenë' bë'në'n apóstol como si fuera nahue dumi quien.

—Pues dyë'ëdi banezi žgulë' cabë' bënë'.

3 Na'ra una Pedro rëbinë' Ananías:

—Ananías, ¿biquien' uyu'ulo' pensari xi'ibi', uzio' Bichi Be quie Diuzi yë', binao' uzi'lo' lë'ëti' dumi tu parte quio'?

4 Nunu bē mandado guti'o'n, cuinzo' bēti'o'n. Nunu una luē' yeyunlo' dumi quien, cuinzo' beyunlo'n. ¿Biquien' uyu'ulo' pensari median, bao' cana'? Diuzi uzi'lo' yē', quele benē'.

5 Na'ra ude beyudyi be Ananías xti'idza' Pedro, tu bgu'unzē' layu gutinē'.

6 Caora na' bdyin chopa tzona bi'byu ptubiyacabi' lēbē' con la'ari' laozi'tejabi' lēbē' nu'ajabi' yecachi'yacabi'lēbē'. Por lena' yugo ja benē' unezi cabē' uzaca Ananías, legazi bdzēbijē' can' guca.

7 Na'ra aodela cadu tzona hora, caora bdyin žgula Ananías ga zē Pedro. Pero binenezinē' bi baguca quie xquiuhuē'.

8 Caora na' unaba Pedro rēbinē' lēbē':

—¡Una chi nahue dumi ca tu ta bēti'le layu quiele!

Pues bequēbi nigula rēbinē' Pedro:

—Aja', nahuena.

9 Na'ra una Pedro rēbinē' nigula:

—¿Bixquien' bega'nlēlo' xquiulo' de acuerdo bēle prueba Bichi Be quie Diuzi? Na' baza' ja ben' yecachi' xquiulo', lēzi huetzēcachi'rējabi' luē'.

10 Caora na' tu bgu'unzē' lao Pedro gutinē'. Cati uyu'u ja bi'byu ga denē', blē'ēyacabi' bagutirēnē'. Lēzi uliojabi' lēbē' uzi'yacabi' yecachi'yacabi' lēbē' cuēta lē'ē ga pcachi'yacabi' xquiunē'.

11 Quie lena' ptebitzegue ben' quie Jesús len los demás ben' unezi cabē' guca quieyaquē'.

### *Lega bē ja apóstol yela' huaca quie Diuzi*

12 Na'ra zē lasa bē yaca apóstol yela' milagro lao ben' yedyi. Caora na' bedupa yaca ben' quie Jesús ga laonan Lachila quie Salomón.

13 Blē'ē ja ben' yedyi leyaquē' ben' huen, pero bdzēbiyaquē' yedu-palēyaquē' leyaquē'.

14 Pero unaocazi ben' zē xneza Jesús, be'mbyu len ja nigula.

15 Hasta que ulioyaquē' ben' raca žhue' udixojē' leyaquē' du tu neza lao belaga o chi lao da'a. Rbezayaquē' te pxin quie Pedro ga deyaquē' ta yeyacayaquē'.

16 Lēzi bdyin zē benē' quie yedyi re' ga'ala', nu'arēyaquē' ben' raca žhue' len ben' yu'u taxi'ibi'. Na' yugulutejē' beyacayaquē'.

### *Bdze'yaquē' Pedro len Juan lu'u dyiguiba*

17 Na'ra yela' zē' quie xan' pxuzi len ben' partido saduceo,

18 bēxoyaquē' apóstol bdze'yaquē' leyaquē' lu'u dyiguiba.

19 Pero ca' du bala bdyin tu ángel quie Diuzi ga de ja apóstol lu'u dyiguiba, psalonē' ru'a yu'u dyiguiba, ulionē' yaca apóstol unē' rēbinē' leyaquē':

20 —Tziole lu'u idao' rñabē'ra rñabē'ra quixogue'le benē' xti'idza' Diuzi yēbilejē' quie yela' neban tuzioli ru'e Diuzi ben' nao xnezē'.

21 Ude beyudyi beyaquē' ca una ángel, caora uyeni' na', uza'yaquē' zioy-aquē' lu'u idao' rñabē'ra bezulaoyaquē' rguixogue'yaquē' benē' xti'idza' Diuzi.

Hora na' balara uyasa xan' pxuzi lēnē' yaca ben' quie', uza'yaquē' zioy-aquē' ga hueyaquē' junta bēnē' mandado guida yugulu ben' rñabē' quie ben' Israel. Caora abgu'udi'yaquē' yuguluyaquē', hora na' bē xan' pxuzi mandado tzio policía tzexi'jē' apóstol lu'u yu'u dyiguiba.

22 Na'ra uyo policía tzexi'yaquē' apóstol, pero ganu ja apóstol bedze-leyaquē' lu'u dyiguiba. Por lena' beza'yaquē' zeyoyaquē' gan' rueyaquē' junta,

23 unayaquē' rēbiyaquē' yaca ben' rñabē':

—Bè' bdyindo' neyeyo dyiguiba con candado, blè'èndo' zu policia rapajè' ru'a dyiguiba. Pero caora usalondo' ru'a yu'u dyiguiba, nunu dyila' lu'u dyiguiba.

<sup>24</sup> Na'ra yaca xan' pxuzi len xan' policia quie idao', caora beyaquè' ca una policia, rdzebitzegueyaquè' ga yeyudyi yedu asunto na'.

<sup>25</sup> Bizi cati bla' tu ben' bla', udixogue'nè' leyaquè' unè':

—Lu'u idao' rnabè'ra bazè ja ben' bdze'le lu'u dyiguiba, baru'elèyaquè' yaca ben' yedyi di'idza' tatula.

<sup>26</sup> Na'ra laziote xan' policia len ben' quiè' yexi'yaquè' leyaquè'. Pero bibè'yaquè' quieyaquè', porque rdzebiyaquè' uda' yaca ben' yedyi leyaquè' yo.

<sup>27</sup> Na'ra zequiè'yaquè' apóstol ga rueyaquè' junta yesanyaquè' leyaquè' lao ben' rnabè' tatula. Na'ra una xan' pxuzi rëbinè' leyaquè':

<sup>28</sup> —Barzègadyindo' quiele bira inale quie Jesús. ¿Na' bizi bèle? Ner-guixogue'le yugulu ben' ciudad Jerusalén rëbileyaquè' ca naca pensari quiele, re'enle gale ben' yedyi de que dula' quiendo' guti Jesús.

<sup>29</sup> Na'ra una Pedro lènè' yaca los demás apóstol:

—Decazide huendo' cabè' re'en Diuzi, bihuendo' cabè' re'enle le'e.

<sup>30</sup> Le'e bétile Jesús bda'le lèbè' lè'è yaga cruzo, pero Diuzi na' psebannè' lèbè'.

<sup>31</sup> Bè Diuzi nombrar lèbè' gaquè' ben' re' zaquè' yebè cuètanè' ga naca xlato ben' bala'ana. Ulionè' lèbè' gaquè' xa'nro, ben' ute usela ra'o tacuenda utza'ro pensari median quiero yezi'ze Diuzi dula' xquia quiero.

<sup>32</sup> Nacando' testigo tali na'. Lèscan' Bichi Be quie Diuzi, ben' yu'u guicho laxta'o ben' nao xneza Diuzi, naquè' testigo tali na'.

<sup>33</sup> Caora beyudyi beyaquè' di'idza' una Pedro, na'ra lega bdza'tzegue ben' rnabè', gu'unyaquè' gutiyaquè' leyaquè'.

<sup>34</sup> Pero entre leyaquè' uzu tu ben' quie partido fariseo laonè' Gamaliel. Naquè' ben' huen, ben' psèdi ley quie Moisés. Na'ra bènè' mandado yero ja apóstol lao junta ga re' ben' rnabè' cuezayaquè' tu chi'.

<sup>35</sup> Caora bero yaca apóstol, na'ra una Gamaliel rëbinè' laguedyinè':

—Ben' Israel, gapale cuidado bi re'enle huele quieyaquè'.

<sup>36</sup> Bigala'adyi'le cabè' guca quie tu ben' lao Teudas. Azio iza uzunè' unè' naquè' ben' belao. Unao ca du tapa gayuhua benè' lèbè'. Pero bdyin dza bèti soldado lèbè', bdzatza bezuno yaca ben' unao lèbè'.

<sup>37</sup> Beyudyi bedu quie Teudas, uzu itu ben' Galilea lao Judas dza bè gobierno censo blabanè' benè'. Gu'unrènè' tilalènè' soldado quie gobierno. Unaorè ja ben' zè lèbè', pero bétirè soldado lèbè'. Lèzi bdzatarè bzunorè ben' unao lèbè'.

<sup>38</sup> Lena' rnia' le'e, mejorla usanro quieyaquè', bira huerojè' zèdi. Porque chi ta racazi la'adyi'jè' ruejè', huabezan.

<sup>39</sup> Pero chi tu ta rueyaquè' nacan quie Diuzi, ba'ala'cazi re'enle cuezan, bicuezan. Na'ra gapale cuidado ta bihuele contra Diuzi. —Cana' una Gamaliel gudyinè' leyaquè'.

<sup>40</sup> Pues na'ra aozì'yaquè' xti'idza' Gamaliel. Caora na' beyèziyaquè' apóstol tatula. Caora bazèyaquè' na', bè ben' rnabè' mandado udi policia leyaquè' con guidi. Lèscan' bzègadyiyaquè' quiejè' tatula ta bira inèyaquè' quie Jesús. Ude beyudyi na', bè ben' rnabè' permiso yero ja apóstol na'.

<sup>41</sup> Caora na' beroyaquè' ga re' ben' rnabè' lao junta zeyoyaquè' redao-hueyaquè' dan' bedzagalaoyaquè' por nun quie Jesús. Yugu dza uza'yaquè' ziojè' lu'u idao' rnabè'ra o chi lu'u yu'u quie tu tu benè'.

42 Bipsanyaquë' inëyaquë' quie Jesucristo.

## 6

*Ulioyaquë' gadyi yaca ben' quisi yela' huao quiejë'*

1 Na'ra dza na'te, tu dza huio, uyera mazera ben' quie Jesús. Pero bala ben' quie Jesús, ben' rnë di'idza' griego, uyu'uyaquë' huenë conlë ben' quie Jesús, ben' rnëja di'idza' hebreo. Na'ra una ben' rnë di'idza' griego rëbiyaquë' yaca apóstol:

—Ben' rnë di'idza' hebreo, biru'eyaquë' laze parejo. Caora udisiyaquë' ta gao nigula bizu xquiuhue, ledao'zi ru'eyaquë' nigula bizu xquiuhue quiendo'.

2 Na'ra bedupa lao chipchopa apóstol len yaca los demás ben' quie Jesús, unayaquë' rëbiyaquë' leyaquë':

—Bireya'ala' usanndo' rguixogue'ndo' benë' xti'idza' Diuzi ta hue'ndo' laze yela' huao na'.

3 Mejorla cuiole gadyi ben' huen, ben' de pensari, ben' rale quie Bichi Be quie Diuzi du guicho du la'adyi'yaquë', na' huele mandado quisiyaquë' yela' huao parejo.

4 Na'ra nëto', biusanndo' rulidzando' Diuzi rguixogue'ndo' benë' xti'idzë'.

5 Na'ra yaxe yugulu ben' quie Jesús cabë' una yaca apóstol. Caora na' ulioy-aquë' Esteban, ben' rale quie Bichi Be quie Diuzi du guicho du la'adyi'në'. Lëzi ulioy-aquë' Felipe, len Prócoro, len Nicanor, len Timón, len Parmenas, len Nicolás ben' yedyi tula. Naca Nicolás ben' yedyi Antioquía, ben' unao religión quie ben' Israel dza na'.

6 Na'ra bzuyaquë' leyaquë' lao yaca apóstol, pquichi yaca apóstol na'ayaquë' guichojë', bëlëyaquë' Diuzi di'idza' por leyaquë'.

7 Na'ra yugu dza uidxogue' ja apóstol mazera benë' xti'idza' Diuzi. Por lena' taže uye ben' rnao xneza Jesús ciudad Jerusalén. Lente zë yaca pxuzi, unaorëyaquë' xneza Jesús.

*Cabë' guca bëyaquë' Esteban preso*

8 Na'ra taže gualë Diuzi Esteban bënë' yela' huaca quie Diuzi lao ja ben' yedyi nita' na'.

9 Pero bala ja ben' uza' yedyi Cirene, len ben' uza' yedyi Alejandría, len ben' uza' yedyi Cilicia, len ben' uza' yaca yedyi nebaba Asia, len ben' rio lu'u idao' sinagoga quie ben' bira naca ben' nada'o, uyu'uyaquë' huenë conlë Esteban.

10 Pero biubinyaquë' bi nayaquë' porque gualë Bichi Be quie Diuzi lëbë' bdze'në' lu'u guichonë' bi di'idza' unëlënë' leyaquë'.

11 Quie lena' udižoyaquë' benë' ta inayaquë' di'idza' contra Esteban. Cani' una ben' uzi' dumi rëbiyaquë' laguedyiyaquë':

—Nëto' bendo' unë Esteban di'idza' xi'ibi' contra Moisés len Diuzi.

12 Cana' bëjë' gan bdza' ja ben' yedyi, len ja ben' gula, len ja ben' rusëdi ley quie Moisés lëbë'. Na'ra uquië'yaquë' lëbë', psedyinyaquë' lëbë' ga re' ben' rna'bë' lao junta.

13 Udiloyaquë' ben' unë di'idza' falso contra lëbë'. Na' lëyaca ben' na', unayaquë' rëbiyaquë' ben' rna'bë':

—Birsan ben' niga rnë' di'idza' contra idao' rna'bë'ra quiero. Lëzi ruenë' contra ley pca'n xuzixta'oro Moisés.

14 Nëto' bendo' unë' udyiagu' Jesús idao' rna'bë'ra quiero. Lëscan' unë' utza' Jesús costumbre quiero ta pca'n xuzixta'oro Moisés.

15 Ude beyudyi unajë' cana', na'ra una' ben' rue junta lao Esteban, pero blë'ëyaquë' beyaca laonë' ca quie lao ángel.

## 7

### *Cabë' unë Esteban gualënë' cuinnë' lao ben' r nabë'*

1 Na'ra unaba xan' pxuzi rëbinë' Esteban:

—¿Nacan tali cabë' unayaquë'?

2 Na'ra bequëbi Esteban rëbinë' leyaquë':

—Bicha', xuzaxa', ulezëcara nagale cabë' inia' le'e. Azio zë iza, blu'e Diuzi xuzixta'oro Abraham yela' huaca quienë' caora cati binetzesu Abraham yedyi Harán, nezunë' yu nebaba Mesopotamia.

3 Lëdza na' una Diuzi rëbinë' Abraham: “Psan diadza quio', psan yedyi quio', beyo yedyi tula ga ulu'ena' luë'.” Cana' una Diuzi gudyinë' Abraham.

4 Por lena' uza' Abraham yu nebaba ben' Caldea, zionë' yesunë' yedyi Harán. Biži cati aguti xuzi Abraham, bë Diuzi mandado beza' Abraham yedyi Harán, bela'në' yedyi niga ga nita'ro na'a.

5 Pero bibë' Diuzi lëbë' ga gaque quienë' sunë', ni siquiera tu pedazozi. Pero bega'n'lë Diuzi lëbë' di'idza' de que idyin dza gaque quienë' ga sunë', na' bë' bagutinë' gaque quie ži'inë'. Na'ra la'acazi ga nu ži'inë' nenita' caora, bega'n'lë Diuzi lëbë' di'idza' cana'.

6 Lëzi una Diuzi de que inita' ži'isuba Abraham yedyi quie ben' tula ga hueyaquë' dyin sin lažu, na' hue yaca benë' ži' quieyaquë' lao tapa gayuhua iza.

7 Lëscan' una Diuzi rëbinë' Abraham dza na': “Huachugobi'a quie ben' bë' ži' quieyaquë'. Te iyudyi na' yeza' ži'isuba' yedyi na' yela'jë' niga ga tzionla'adyi'yaquë' në'ëdi'.” Cana' una Diuzi.

Na'ra nernë Esteban rëbinë' yaca ben' r nabë':

8 —Lëzi bë Diuzi mandado uzu Abraham tu xëdyidao' ži'inë' byu ta gaca seña ulu'en ca di'idza' bega'n'lë Diuzi lëbë'. Por lena', caora aoca tu xun' golo ži'inë' Isaac, na'ra bzunë' tu xëdyidao' lëbi'. Con ca bë Abraham lënë' ži'inë' Isaac, cana' bërë Isaac lënë' ži'inë' Jacob. Lëzi con ca bë Isaac lënë' ži'inë' Jacob, cana' bërë Jacob lënë' chipchopa ži'inë' byu.

9 Yela' žë' quie yaca ži'i Jacob, bëti'yaquë' tu bichiyaquë' laonë' José, uži' ben' zio Egipto lëbë'.

10 Pero gualë Diuzi lëbë' pcuasa pcui'onë' tamala za' gaca quienë'. Cana' guca José ben' yu'u pensari, yexe rey Faraón lëbë'. Tantozi yexe Faraón José, ulionë' lëbë' ta tzionë' gaquë' xan' ben' r nabë' lao nación Egipto. Lëscan' ulionë' lëbë' gaquë' xan' ben' rue dyin lu'u lidyinë'.

11 Na'ra dza na'te guca tu obin huala gula nación Egipto len nación Canaán. Fuerte badzagalao xuzixta'oro, bibdzeleyaquë' bi gaoyaquë'.

12 Caora yenei Jacob de que rdzela trigo nación Egipto, na'ra use'ela'në' ži'inë' gan', pero bibezaqueyaquë' chi bi' bichiyaquë' José.

13 Na'ra taorupe zioyaquë' bdyinyaquë' nación Egipto, caora na' una José rëbinë' leyaquë': “Në'ëdi' naca' bichile, José.” Cana'ra bezaqueyaquë' lëbë'. Cana' bdyin hora unezi rey Faraón de que naca José ren quie ben' Israel.

14 Na'ra guži José xuzinë' Jacob lente yugulu familia quienë', uza'yaquë' zioyaquë' bdyinyaquë' nación Egipto. Na'ra entre yaca ben' bdyin nacajë' tzona galo či'inu'.

15 Cana' guca unita' Jacob nación Egipto. Na'ra caora bdyin dza quienë', gutinë'. Lëzi caora bdyinrë dza quie ži'inë', gutirëyaquë'.

16 Caora azio iza, bebio zi'i subayaquë' chita quieyaquë' yecachi'yaquë'n yedyi Siquem. Na' bdze'yaquë' chita quieyaquë' lu'u belö ta hue' Abraham desde cana'te. Con dumi plata quienë' hue'në'n lao ja zi'i Hamor, ben' yedyi Siquem.

17 'Caora cati ilë'ëti'zi idyin hora uzu Diuzi di'idza' cabë' di'idza' bega'nlenë' Abraham dza na'te, caora na' baoye ben' Israel gucajë' ben' zë.

18 Pero uzulao rnabë' tu rey cubi quie ben' Egipto.

19 Pues rey na', binubë'në' José. Udilalënë' xuzixta'oro, bënë' leyaquë' zi', uzi'në' leyaquë' yë', bënë' mandado uca'n xuzixta'oro bdao' zagolo quieyaquë' lu'u guixi' ta gatiyacabi'.

20 Na'ra bdyin hora golo Moisés, pero badanla zubi'. Pero como rnabë' rey gati bdao' quie ja ben' Israel, quie lena' pcachi' zna'bi' lëbi' lu'u yu'u. Pero cati aode tzona biu', bira uzaque'në' ucachi'në'bi' lu'u yu'u.

21 Quie lena' psanyaquë' lëbi' lu'u guixi', pero bezí' zi'i rey nigula lëbi', uzi'në'bi' psegulanë'bi' ca quie xcuidi' quienë'.

22 Cana' guca psëdi Moisés yugulu ta nezi ben' nación Egipto. Guquë' ben' yu'u pensari, udapala'n benë' lëbë', porque dyin dya'a bënë', di'idza' li unënë'.

23 'Chopa galo iza zunë' caora cati gu'unne' gacalënë' laguedyinë' ben' Israel.

24 Cana' zionë' yeyubinë' leyaquë' ga rueyaquë' dyin. Pero blë'ënë' tu ben' Egipto rdilalënë' tu ben' Israel. Bizi na' gualë Moisés laguedyinë', bëtinë' ben' Egipto.

25 Pero guque Moisés de que nezi ben' Israel re'en Diuzi gacalë Moisés leyaquë' yeza'yaquë' nación Egipto. Pero biuneziyaquë' cana'.

26 Bizi bete yu na', zezio Moisés tatula ga tu laguedyinë' bedilanë' chopa ben' Israel rdilayaquë'. Na'ra como re'en Moisés bitilayaquë', unë' rëbinë' leyaquë': "¡Bicha! ¿Bixquien' re'enle hue'le laguedyile zi'?"

27 Pero bizi ben' rdilayaca bdyiganë' Moisés tzala'la, unë' rëbinë' lëbë': "¿Nu ulio luë' rnabë'lo' nëto' ca juez quiendo'?"

28 ¿Quele re'enlo' gutio' në'ëdi' ca bëtio' ben' Egipto niogue?"

29 Cati be Moisés ca unë', na'ra zeyonë' huežuno yesunë' yu nebaba Madián. Cana' uzunë' yedyi tula, yedyi binacan quienë', ptzagana'në' uzu chopa ži'inë' byu.

30 'Caora baguca ichopa galo iza tu lu'u guixi', na' zu tu lato dachi ruen ga'ala' ga zu tu ya'a laona Sinaí ga bdyin tu ángel ptlalaonë' Moisés. Na' uzë ángel na' lu'u tu yaga yëchi' ra'ala'n yu'un guil'.

31 Caora blë'ë Moisés ángel na', tu bega'nzinë' rebannë'. Cati ubiga'në' ga'ala' tacuenda ilë'ënë' dyë'ëdi, caora na' una Diuzi rëbinë' lëbë':

32 "Në'ëdi' naca' Diuzi quie xuzixta'olo' Abraham, len xuzixta'olo' Isaac, len xuzixta'olo' Jacob." Caora be Moisés ca una Diuzi, ržizinë' rdzebinë' ina'në' mazera.

33 Na'ra unëra Diuzi rëbinë' Moisés: "Ulëcho huarache quio' porque naca la'ya ga zëlo'.

34 Pues abeda' rulidza ja ben' quia' nita' Egipto në'ëdi'. Ablë'ëda' ca redzagalojë'. Baoyëza' ta ute usela' leyaquë'. Udacara, ise'ela' luë' nación Egipto." Cana' una Diuzi rëbinë' Moisés.

35 Na'ra nernë Esteban rëbinë' leyaquë':

—Ba'ala'cazi biuyezila'adyi' yaca ben' Israel Moisés, ba'ala'cazi unayaquë' rëbiyaquë' Moisés: "¿Nu ulio luë' ta inabë'lo' nëto' ca juez quiendo'?", na'

use'ela' Diuzi Moisés ta inabè'nè' ute uselanè' leyaquè'. Conlè ángel, ben' ptilalao lèbè' lu'u yaga yèchi', use'ela' Diuzi Moisés.

<sup>36</sup> Na'ra lèMoisés ulionè' xuzixta'oro hora beza'yaquè' beroyaquè' nación Egipto, bènè' yela' huaca quie Diuzi ga re' tu nisadao' laona Nisadao' Zna. Lèscan' bènè' yela' huaca quie Diuzi hora uda yaca ben' Israel gabi yu'u dyia chopa galo iza.

<sup>37</sup> Lèzi lèMoisés unè' rëbinè' ben' Israel: “De entre le'e huabio Diuzi itu ben' ina le'e xti'idza' Diuzi laga con ca ulionè' nè'èdi'. Ulehue bala ca inè' le'e.”

<sup>38</sup> Lèscan' lèMoisés na' ziolènè' ben' Israel cati uza'yaquè' udayaquè' tu paraje gabi yu'u dyia lao chopa galo iza. Conlè Moisés na' bè'lè ángel di'idza' lè'è ya'a Sinaí. Lèbè' udixoguenè' xuzixta'oro di'idza' bè'lè ángel lèbè'. Lèdi'idza' na', di'idza' neban, pca'n Moisés para ra'o.

<sup>39</sup> 'Pero bigule xuzixta'oro di'idza' pca'n Moisés. Gu'unyaquè' uza'la'adyi'jè'n yeza'jè' yeyoyaquè' nación Egipto tatula.

<sup>40</sup> Cati nezio Moisés lè'è ya'a, caora na' unayaquè' rëbiyaquè' Aarón, ben' xan' pxuzi: “Re'enndo' huelo' chopa tzona diuzi ta hua'aro tu neza ta ucuaa ucu'on ra'o bi tamala za' gaca quiero, porque binezindo' bi guca quie Moisés, ben' ulio ra'o nación Egipto.”

<sup>41</sup> Na'ra bzaloyaquè' tu bedyihuaga dao' de oro. Bëtirëyaquè' tu beco' zi'ila' bdyiayaquè'ba' lao bedyihuaga de oro ca gun quieba'. Lega yexeyaquè' diuzi bëyaquè' na'aziyaquè'.

<sup>42</sup> Cana' psanla'adyi' Diuzi leyaquè' ta tzionla'adyi'yaquè' yaca tadyia guibá. Quie lena' guca quieyaquè' con ca rna lè'è guichi bë yaca profeta ga guixogue'n ca una Diuzi:

Le'e ben' Israel, ¿para nè'èdi' bëtile bia bdyialeba' ru'aba dza rdale lao lato dachi chopa galo iza?

<sup>43</sup> Quele para nè'èdi', pero bèle con na'azile diuzi uyonla'adyi'le.

Nu'ale tu rumita dao' de la'ari' quie Moloc.

Nu'arèle tu ta naca forma quie bélo, laona Renfán.

Lena' unale naca Diuzi quiele.

Quie lena' hua' castigo quiele, huabioga' hualaohua' le'e yedyi quiele tziote zitu', tzesule yedyi quie ben' tula yedyi laona Babilonia.

Cana' una Diuzi gudyinè' xuzixta'oro dza na'te.

<sup>44</sup> Na'ra nernè Esteban rëbinè' leyaquè':

—Dza rda xuzixta'oro lao lato gabi yu'u dyia, nu'ayaquè' tu yu'u de la'ari', lena' gucan idao' quieyaquè'. Lu'en na' bzuyaquè' yaca yo ta'a ga bzu Diuzi ley quienè'. Lëyu'u de la'ari' na', bëyaquè'n con ca una Diuzi hueyaquè'n, porque Diuzi blu'enè' Moisés ca re'ennè' hue ben' Israel yu'u de la'ari'.

<sup>45</sup> Na'ra bdyin dza aguti Moisés. Caora na' ulio Diuzi tu ben' lao Josué gaquè' ben' r nabè' quie xuzixta'oro lao laza Moisés. Bi'zi lao na'a Josué bdyin xuzixta'oro layu ga bega'nlè Diuzi leyaquè' di'idza' gaca layu quieyaquè'. Caora na' gucalè Diuzi leyaquè' blaonè' ben' nita' layu na' zioyaquè' huežuno. Lao na'a Diuzi bëyaquè' gan, bzuyaquè' yu'u de la'ari' layu quieyaquè' bè' bdyinjè' na'. Cana'zi bega'nnan hasta bdyin dza rda rey David.

<sup>46</sup> Pero rey David, lega nedyè'è Diuzi lèbè'. Caora na' gu'un rey David huenè' tu idao' žegula ga inita' Diuzi.

<sup>47</sup> Pero quele rey David bènè'n nechan' zi'inè' Salomónla bènè'n.

<sup>48</sup> Pero sibila zu Diuzi, binita'nè' lu'u idao' ta bë benè'zi. Lena' nacan de acuerdo con ca una Diuzi caora unè':

<sup>49</sup> Naca ladza ca quie xlatoga' ga ri'a.

Naca yedyi layu ca quie lato ga rezila'adyi' ni'a.

¿Ca bi cue' yu'u huele para nē'ēdi'?

¿Gaži naca lato ga yezila'adya'?

<sup>50</sup> ¿Biži binezile conlè na'a bia' yugulu ta de?

Cana' una Diuzi gudyinè' xuzixta'oro dza na'te.

<sup>51</sup> Na'ra nernè Esteban rëbinè' leyaquè':

—Yela' zidi quiele birioñe'ele ruele ca ben' binübè' Diuzi. Siempre biralele quie Bichi Be quienè'. Ruele tamala laga con ca bè xuzixta'oro.

<sup>52</sup> ¿Nu ben' profeta biudilalè xuzixta'oro? Leyaquè' bëtiyaquè' ben' udixogue' de que guida Cristo. Biži cati bidè' detè'è lao yedyi layu, le'e udaole lèbè' xquia, unèle di'idza' contra lèbè', bëtilenè'.

<sup>53</sup> Pca'n Diuzi ley quienè' lao na'a Moisés para le'e, pero le'e, biralele quien.

### *Cabè' guca bëtiyaquè' Esteban*

<sup>54</sup> Na'ra ude beyudyi be yaca ben' rnabè' ca una Esteban, mazera bdza'tzegueyaquè' lèbè'.

<sup>55</sup> Pero Esteban, du yu'unè' Bichi Be quie Diuzi, una'nè' guibá blè'ënè' xni' gui' ga zu Diuzi. Blè'ërènè' zè Jesús zaquè' yebè quie Diuzi.

<sup>56</sup> Na'ra una Esteban rëbinè' yaca ben' rnabè':

—¡Ulena'cara! Rlè'èda' uyalo guibá ga zu Diuzi. Rlè'èda' ben' naca bichi yugulu benè'. Zènè' zaquè' yebè quie Diuzi.

<sup>57</sup> Pero lapsiote yaca ben' rnabè' nagayaquè', urediyi'yaquè' zidzo,

<sup>58</sup> labëxoteyaquè' uquiè'yaquè' lèbè' ru'a yedyila. Caora na' ulèchoyaquè' gaban quieyaquè' pca'nyaquè'n lao na'a tu ben' cuidi' laonè' Saulo. Na'ra uzulaoyaquè' rguiyaquè' lèbè' yo ta gatiè'.

<sup>59</sup> Pero tu rguiyaquè' Esteban yo, blidzè' Jesús rëbinè' lèbè':

—Señor Jesús, bezí' nē'ēdi' yeguida' ga zulo'.

<sup>60</sup> Na'ra uditzu Esteban žibinè', unè' zidzo rëbinè' Jesús:

—Señor, uži'ze quieyaquè' rueyaquè' xquia rutiyaquè' nē'ēdi'.

Ude beyudyi unè' cana', gutinè'.

## 8

### *Saulo bënë' contra ben' quie Jesús*

<sup>1</sup> Na'ra redaohue Saulo dan' bëtiyaquè' Esteban.

<sup>2</sup> Biži caora bagutinè', uyo chopa tzona ben' rue quie xti'idza' Diuzi bi'ayaquè' cuerpo quienè' ta yecachi'yaquè'. Legazi rbediyi'yaquè' raqueyaquè' bayèchi'. Caora na' uzulao yaca benè' usacayaquè' bizinaquezi ben' quie Jesús, ben' nita' ciudad Jerusalén.

<sup>3</sup> Cana' guca zèdi quie ben' quie Jesús, porque bipsan Saulo bënë' contra leyaquè'. Uyu'unè' lu'u yu'u quie quieyaquè', ulionè' leyaquè' lu'u yu'u quieje' udze'nè' leyaquè' lu'u dyiguiba, la'achi nigula, la'achi be'mbyu.

### *Caora yetixogue' ja ben' quie Jesús xti'idza' Diuzi estado Samaria*

<sup>4</sup> Quie lena' bdzatza yaca ben' quie Jesús zioyaquè' yedyi tula, zioyaquè' yedyi re' estado Judea len yedyi re' estado Samaria. Pero biuza' yaca apóstol, bega'nyaquè' ciudad Jerusalén. Na' yaca ben' bedzatza ja uza' ciudad Jerusalén, zioyaquè' rguixogue'yaquè' benè' xti'idza' Diuzi tu tu yedyi ga bdyinyaquè'.

<sup>5</sup> Uza'rè tu ben' quie Jesús laonè' Felipe. Uzè'è zionè' tu yedyi quie estado Samaria. Caora bdyinnè' gudyinè' yaca ben' yedyi na' de que naca Jesús ben' Cristo, ben' use'ela' Diuzi.



<sup>6</sup> Na'ra labedupate ben' yedyi na', labzēnagateyaquē' xti'idza' Felipe, porque blē'ēyaquē' ruenē' yela' huaca quie Diuzi.

<sup>7</sup> Caora na' beyue Felipe yaca ben' yu'u taxi'ibi'. Bero yaca taxi'ibi' ga yu'uyacan urediya'yacan. Lēscan' beyuenē' ben' zi, beyacayaquē'.

<sup>8</sup> Quie lena' lega bedaohue yaca ben' yedyi na'.

<sup>9</sup> Pero yedyi na' ga uyo Felipe, uzu tu ben' rue brujo laonē' Simón. Yela' brujo quienē', uzi'nē' ben' quie Samaria yē' unē' naquē' ben' belao, ben' bala'ana.

<sup>10</sup> Por lena' bzēnagayaquē' ca gudyinē' leyaquē' la'achi xcuidi', la'achi ben' huaca. Yugulujē' bēyaquē' lēbē' caso, unayaquē' rēbiyaquē' laguediyaquē':  
—Ben' ni ruenē' yela' huaca quie Diuzi.

<sup>11</sup> Na'ra azio zē iza uzi'nē' leyaquē' yē'.

<sup>12</sup> Pero caora bdyin Felipe, gudyinē' leyaquē' quie yela' rnabē' quie Diuzi, gudyirēnē' leyaquē' con cabē' una Jesús, caora na' guleyaquē' quienē'. Por lena' bē' Felipe laoyaquē', tanto nigula como ca be'mbyu.

<sup>13</sup> Hasta cuin Simón gulerēnē' di'idza' quie Jesús, bē'rē Felipe laonē'. Caora na' udalēnē' Felipe tuze, pero tu bebanzinē' ca yela' huaca quie Diuzi bē Felipe.

<sup>14</sup> Caora unezi ja apóstol nita' ciudad Jerusalén de que uyezila'adyi' ben' Samaria xti'idza' Diuzi, na'ra use'ela'yaquē' Pedro len Juan zioyaquē' na'.

<sup>15</sup> Caora bdyinyaquē' na', blidzayaquē' Diuzi unabayaquē' Diuzi uchizē' Bichi Be quienē' tzu'unē' lu'u guicho laxta'o ben' Samaria barale quie Jesús,

<sup>16</sup> porque binetzu'u Bichi Be quie Diuzi lu'u guicho laxta'oyaquē'. Caora cati bē' Felipe laoyaquē' dza na'te, tu bzētozinē' lao Jesús, quele uyu'uyaquē' Bichi Be quie Diuzi.

<sup>17</sup> Quie lena' bda' Pedro len Juan na'ayaquē' guichoyaquē', laoyu'uteyaquē' Bichi Be quie Diuzi.

<sup>18</sup> Caora blē'ē Simón cabē' bēyaquē' uyu'u Bichi Be quie Diuzi lu'u guicho laxta'o benē' cati bda'yaquē' na'ayaquē' guicho benē',

<sup>19</sup> na' unē' rēbinē' ben' apóstol:

—Gacatezi dumi inabo' naguna'n, chi ulu'ele nē'ēdi' bi hua' tacuenda tzu'u Bichi Be quie Diuzi lu'u guicho laxta'o benē' cati uda'a na'a guichoyaquē'.

<sup>20</sup> Na'ra bequēbi Pedro rēbinē' Simón:

—Udyiagui' Diuzi luē' lente dumi plata quio', porque raco' pensari huazi' Diuzi dumi plata tacuenda uchizanē' Bichi Be quienē' tzu'unē' lu'u guicho laxta'o benē'.

<sup>21</sup> Bide lato ni derecho quio' huelao' nēto' tuze, porque bineyēri laxta'olo' lao Diuzi,

<sup>22</sup> psan tamala quio'. Unaba lao Diuzi chi yezi'zenē' pensari median quio'.

<sup>23</sup> Ca quie nisa sla' ratza ja benē' naco'. Yela' mala quio' naco' ca quie ben' de lu'u dyiguiba.

<sup>24</sup> Na'ra una Simón rēbinē' apóstol:

—Huele cule inabale lao Diuzi yezi'zenē' quia', bigaca quia' con ca baonale nē'ēdi'.

<sup>25</sup> Caora ude beyudyi udixogue' apóstol yaca ben' nita' na' xti'idza' Diuzi, na'ra beza'yaquē' zeyoyaquē' ciudad Jerusalén, rguixogue'rēyaquē' ben' Samaria nita' tu tu yedyi ga bedeyaquē' xti'idza' Diuzi.

*Bedila Felipe tu ben' Etiopía tu neza ga zionē'*

<sup>26</sup> Ude beyudyi na', bdyin tu ángel quie Diuzi ga zē Felipe rēbinē' lēbē':

—Uzi', uyo tu lao lato ga bidyia yu'u, ga rde neza za' ciudad Jerusalén para yedyi Gaza.

<sup>27</sup> Na'ra uzi'nè' zionè'. Du tu neza na', zeza' ben' bedilanè', ben' nación Etiopía. Ben' na' naquè' eunuco, ben' rapa dumi quie tu nigula lao Candace. Naca Candace reina quie nación Etiopía. Pues ben' na' uyonè' ciudad Jerusalén ga uyonla'adyi'ne' Diuzi.

<sup>28</sup> Caora na' re'nè' lu'u tu carro dao' ra'ala' chopa bia zeyonè' yedyinnè' yedyi quienè'. Na'ra du re'nè' lu'u tu carro dao', rna'nè' guichi quie ben' profeta Isaías.

<sup>29</sup> Caora na' una Bichi Be quie Diuzi rëbinè' Felipe:

—Uyo tzenao' ben' re' lu'u tu carro dao'.

<sup>30</sup> Cana' zio Felipe ga re'nè', pero benè' rnënë' di'idza' quie ben' profeta Isaías. Caora na' una Felipe rëbinè' lëbè':

—¿Rioñe'elo' bi na di'idza' rnëlo'?

<sup>31</sup> Na'ra unè' rëbinè' Felipe:

—¿Bi'zi hua' tzioñe'eda' con ca rna lë'ë guichi, chi ganu dyila' uzioñe'e në'ëdi'?

Ude beyudyi unè' cana', gudyinè' Felipe cuënë' lu'u tu carro ta cue'nè' cuëtè'.

<sup>32</sup> Na'ra parte gan blabanè' xti'idza' Diuzi rnën cani:

Naca quienè' ca quie beco' zi'ila' guti benè'.

Lëzi naca quienè' ca quie tu beco' zi'ila' rchugu benè' guitza' quieba', pero bibi unè'.

<sup>33</sup> Ptitoyaquè' lëbè'.

Bibëyaquè' justicia quienè'.

¿Bi'zi huero inaro quie ben' yedyi quienè'?

Porque mero leyaquè' bëtiyaquè' lëbè'.

<sup>34</sup> Ude beyudyi unè' lë'ë guichi, na'ra unè' gudyinè' Felipe:

—Una në'ëdi' chi una ben' profeta quiè' cuinnè' o chi unè' quie ben' tula.

<sup>35</sup> Caora na' uzulao Felipe rzioñe'enè' lëbè' con ca rna lë'ë guichi gudyinè' lëbè' con ca guca quie Jesús.

<sup>36</sup> Bi'zi cati bdyinyaquè' ga zu nisa, una ben' Etiopía rëbinè' Felipe:

—Abdyinro ga zu nisa. ¿A ver bi ca nao' luè', chi bisaque' hue'lo' laohua' në'ëdi' niga?

<sup>37</sup> Na'ra una Felipe rëbinè' lëbè':

—Chi ralelo' quie Jesús du guicho du la'adyo', huazaque' hua' laolo' luè' niga.

Na'ra bequëbi ben' na' unè':

—Du guicho du la'adya' raleda' naca Jesucristo zi'i Diuzi.

<sup>38</sup> Cana' bë ben' na' mandado cueza carro dao' quienè' ziolënè' Felipe ru'a nisate, uyu'uyaquè' lu'u nisa bë' Felipe laonè' lëbè'.

<sup>39</sup> Cati beroyaquè' lu'u nisa, laoquiè'te Bichi Be quie Diuzi Felipe. Bira blë'ë ben' na' lëbè'. Pero ben' na', lega redaohuenè' beza'nè' zeyonè' xquiedyinè'.

<sup>40</sup> Na'ra labedyinte Felipe tu yedyi laona Azoto. Hora na' bedenè' yedyi tu yedyi rëbinè' benè' xti'idza' Jesús con ca guca quienè' hasta bdyinnè' ciudad Cesarea.

## 9

### *Cabè' uzaca Saulo tu neza Damasco*

(Hch. 22.6-16; 26.12-18)

<sup>1</sup> Na'ra bipsancazi Saulo yela' rdza' quienè' re'ennè' gutinè' ben' quie Jesús.

<sup>2</sup> Por lena' uyonè' yanabè' guichi lao xan' pxuzi tacuenda tzionè' tzedilanè' huenè' preso nu ben' rnao xneza Jesús ciudad Damasco. Gu'unnè' tzu'unè'

idao' sinagoga quieyaquë' guxonë' ise'ela'në' leyaquë' ciudad Jerusalén, chi be'mbyu, chi nigula.

<sup>3</sup> Pero ilë'ëti'zi binedyinnë' yedyi, cati uyëzi tu xni' gui' za'n sibi guibá yatalan lëbë' ga zionë'.

<sup>4</sup> Caora na' bdinë' yu, benë' unë Jesús rëbinë' lëbë':

—Saulo, ¿bixquien' ru' contra në'ëdi'?

<sup>5</sup> Na'ra unaba Saulo:

—¿Nuži luë', Señor?

Hora na' unë Jesús tatula, rëbinë' lëbë':

—Në'ëdi' laohua' Jesús. Naca' ben' ruelo' contra. Pero cala në'ëdi' ru' contra, nechan' contra cuinzo' ruelo' ca quie tu bëdyi huaga rulibiba' nu lë'ë yaga duchi' nu'a xa'mba' ta rulaohuë'ba'.

<sup>6</sup> Pero du rdzebi, du rzizi Saulo, unë rëbinë' Jesús:

—¿Bizi ca re'enlo' hua', Señor?

Na'ra una Jesús, rëbinë' lëbë':

—Beyasa, uyo ciudad Damasco. Bë' bazulo' ciudad na', naise'ela' ben' ina luë' bi huelo'.

<sup>7</sup> Na'ra uyasa Saulo gan denë' layu. Caora bexa' laonë', biblë'ënë'. Pero yaca ben' ziolënë', lega bdzebiyaquë', porque biblë'ëyaquë' nu ben' blidza Saulo.

<sup>8</sup> Caora na' bëxoyaquë' në'ë uquië'yaquë' lëbë' ciudad Damasco,

<sup>9</sup> pero lao tzona dza bibi blë'ënë', bibi udaonë', bibi hue'enë'.

<sup>10</sup> Na' ciudad Damasco zu tu ben' quie Jesús laonë' Ananías. Caora na' ptilalao Jesús lëbë' ga zë' rulidzë' lëbë':

—Ananías.

Pero ca quie ben' uxusa guca quienë' benë' unë Jesús. Na'ra una Ananías:

—Ni zua', Señor.

<sup>11</sup> Na'ra una Jesús rëbinë' lëbë':

—Uzi', uyo ga rde tu lecan laona lecan li. Tziolo' lidyi Judas, na' yedzelelo' tu ben' yedyi Tarso laonë' Saulo. Huelao'në' di'idza', porque rulidzanë' në'ëdi'.

<sup>12</sup> Gaca quië' ca tu ben' rxusazi ilë'ënë' luë'. Na' uda'lo' nao' guichonë' tacuenda yelë'ënë'.

<sup>13</sup> Caora be Ananías ca una Jesús, na'ra unë' rëbinë' lëbë':

—Señor, zë lasa babeda' cabë' rue Saulo. Legazi bënë' median contra yaca ben' quio' nita' ciudad Jerusalén.

<sup>14</sup> Na' baza'në' ni, nu'anë' guichi quie yaca xan' pxuzi. Conlë guichi na' de yela' rnabë' quië' ta guxonë' huenë' preso nu ben' rulidza luë'.

<sup>15</sup> Pero una Jesús, rëbinë' lëbë':

—Uzi', uyo ga bdyinnë', porque ulioga' lëbë' tzeguedyiné' ben' quie nación tula, len yaca rey quieyaquë', len ben' Israel di'idza' la'iya quia'.

<sup>16</sup> Na' hue'lia'në' di'idza' cabë' yedzagalaonë' yëbinë' benë' di'idza' la'iya quia'. —Cana' una Jesús gudyiné' Ananías.

<sup>17</sup> Na'ra uza' Ananías zionë' bdyinnë' yu'u ga bdyin Saulo, bda'në' në'ë guicho Saulo, unë' rëbinë' lëbë':

—Bicha' Saulo, Señor Jesús, ben' ptilalao luë' tu neza ga za'lo', lëbë' use'ela'në' në'ëdi' baza' niga tacuenda yelë'ëlo' tzu'ulo' Bichi Be quie Diuzi. —Cana' una Ananías gudyiné' Saulo.

<sup>18</sup> Hora na' bro tu ta naca ca žeza' bela lu'u lao Saulo belë'ënë' tatula. Na'ra uyasë' bë' Ananías lëbë' laohuë'.

<sup>19</sup> Ude beyudyi na' beyaonë' bezi'në' fuerza, bega'nnë' ciudad Damasco chopá tzona dza yeyubinë' ben' quie Jesús zuyaca na'.

*Saulo na' udixogue'në' benë' xti'idza' Diuzi ciudad Damasco*

20 Na'ra uzulao Saulo rguixogue'në' ben' Israel, ben' nita' Damasco de que naca Jesús zi'i Diuzi. Rionë' lu'u sinagoga quieyaquë' rëbinë' leyaquë' xti'idza' Diuzi.

21 Cana' tu rebanzi yaca ben' be ca una Saulo, unayaquë' rëbiyaquë' laguedyijë':

—¿Cala lëbë' bënë' contra ben' quie Jesús, ben' nita' ciudad Jerusalén? ¿Cala lëbë' bla'në' ni ta huenë' ben' quie Jesús preso, usedyinnë' leyaquë' lao na'a yaca xan' pxuzi? —Cana' unayaquë' quie Saulo.

22 Pero birdzebi Saulo rguixogue'në' leyaquë' de que naca Jesús ben' use'ela' Diuzi. Blu'enë' leyaquë' lë'ë guichi la'iya quie Diuzi ga rnën naca Jesús ben' Cristo. Bënë' gan biubin yaca ben' Israel, ben' nita' ciudad Damasco, bi inayaquë' quienë'.

*Ula Saulo bibëti yaca ben' Israel lëbë'*

23 Pero bazio zë dza zunë' na', na'ra guca yaca ben' Israel de acuerdo ta gutiyaquë' Saulo.

24 Lena' yugu dza, yugu yela, ure'yaquë' neza ru'a yedyi tacuenda gux-oyaquë' gutiyaquë' lëbë'. Pero unezi Saulo cabë' gu'unyaquë' hueyaquë' quienë'.

25 Hora na' du rtze', uquië' ben' quie Jesús lëbë', urëyaquë' ga zu tu ventan ze lë'ë besu zio ru'a yedyi, uyu'unë' lu'u tu chicuiti ze ta uchizayaquë' lëbë' layu tacuenda ulanë' zionë' ciudad Jerusalén.

*Ca guca quie Saulo bedyinnë' ciudad Jerusalén*

26 Caora bedyinnë' ciudad Jerusalén gu'unnë' huelënë' ben' quie Jesús tuze. Pero rdzebiyaquë' lëbë', porque bineneziaquë' chi tali banaquë' ben' quie Jesús.

27 Por lena' uquië' Bernabë lëbë' ga nita' ja apóstol yaguëdyinë' leyaquë' cabë' guca quie Saulo blë'enë' Jesús tu neza Damasco, bë'lë Jesús lëbë' di'idza', birdzebinë' udixogue'në' ben' Damasco xti'idza' Diuzi.

28 Hora na' uyezila'adyi'yaquë' lëbë' bega'nlënë' leyaquë' ciudad Jerusalén.

29 Na'ra birdzebinë' uzulaonë' rguixogue'në' benë' xti'idza' Diuzi. Uyu'unë' huenë lënë' tu cue' ben' Israel, ben' raca di'idza' griego, pero ure' unaoyaquë' bi hueyaquë' ta gutiyaquë' Saulo.

30 Caora unezi los demás ben' quie Jesús de que re'enaquë' gutiyaquë' lëbë', uquië'yaquë' lëbë' ciudad Cesarea, na'tera use'ela'yaquë' lëbë' yedyi Tarso.

31 Na'ra ja ben' quie Jesús nita' yedyi quie estado Judea, len ben' nita' estado Galilea, len ben' nita' estado Samaria, uzujë' contento. Du guicho du la'adyi'jë' naojë' xneza Jesús. Yugu dza rapala'nyaquë' Diuzi gualë Bichi Be quie Diuzi leyaquë'. Cana' mazera uye ben' bëlë leyaquë' tuze.

*Beyaca tu ben' zi, ben' lao Eneas*

32 Caora na' rio Pedro rayubinë' ben' quie Jesús con bi yedyi nita'yaquë'. Cana' uyonë' yeyubinë' yaca ben' quie Jesús, ben' nita' yedyi Lida.

33 Lëyedyi na' yatilanë' tu ben' zi laonë' Eneas. Azio xuna iza denë' lao belaga nažinë'.

34 Na' una Pedro rëbinë' lëbë':

—¡Eneas, hueyue Jesucristo luë'! ¡Uyasa, beyue laze belaga quio'!

Na'ra caora uyasë', labeyacatenë'.

<sup>35</sup> Biži na' caora blë'ë yugo ben' yedyi Lida len yugo ben' yedyi Sarón cabë' guca quienë' beyacanë', cana'ra psanyaquë' costumbre gula quieyaquë' unaoyaquë' xneza Jesús.

*Cabë' guca beban tu nigula baguti lao Dorcas*

<sup>36</sup> Na'ra dza na'te uzu tu nigula yedyi Jope laonë' Tabita. Na' di'idza' griego laorënë' Dorcas. Naquë' ben' nao xneza Jesús. Yugu dza gucalënë' ben' yëchi', bënë' leyaquë' ta de quienë'.

<sup>37</sup> Biži na' bdyin dza guca zhue'në' gutinë'. Caora na' bgazujë' lëbë' yao uxubayaquë' lëbë' sibi tu lu'u cuarto chopa xcuia.

<sup>38</sup> Na'ra como uneziyaquë' yedyi Lida zu Pedro, lëscan' como re'n ga'ala'zi, use'ela'jë' chopa be'mbyu tzenabayaquë' Pedro, chi bisaque' së'ë luegozi.

<sup>39</sup> Na'ra uza' Pedro ziolënë' leyaquë'. Caora bedyinyaquë' uquië'yaquë' lëbë' lu'u cuarto chopa xcuia ga de nigula. Lu'u cuarto na' nita' ja nigula guti xquiuhue rbedyiaquë', blu'eyaquë' Pedro vestido quieyaquë' ta bë Dorcas cati nezunë'.

<sup>40</sup> Na'ra bë Pedro mandado yero ja nigula lu'u cuarto. Caora beroyaquë', udituz žibinë' blidzë' Diuzi. Ude beyudyi na', byëchunë' una'në' ben' huati, unë' rëbinë' lënë':

—Tabita, uyasa.

Cati una Pedro cana', labeza'te lao nigula, una'në' Pedro uyananë'.

<sup>41</sup> Bëxu Pedro na'anë' gucalënë' lëbë' uzulinë'. Na'ra beyëži Pedro yaca nigula guti xquiuhue lente los demás ben' quie Jesús. Blu'enë' leyaquë' de que neban Dorcas.

<sup>42</sup> Na'ra yugulu ben' yedyi Jope uneziyaquë' cabë' guca quie nigula na'. Caora na' uzulao zëyaquë' naoyaquë' xneza Jesús.

<sup>43</sup> Na'ra zë dza bega'n Pedro yedyi Jope. Uzunë' lidyi tu ben' lao Simón, ben' ruti' zaba bëdyihuaga.

## 10

*Pedro na' ptilanë' tu ben' lao Cornelio*

<sup>1</sup> Na'ra ciudad Cesarea uzu tu ben' laonë' Cornelio. Naquë' xan' tu gayuhua soldado. Na' naca soldado quienë' tu cue' ben' italiano.

<sup>2</sup> Lëbë' lente yugulu familia quienë' udapala'nyaquë' Diuzi. Gucalënë' ben' Israel, bë'në' caridad quiejë', rulidzë' Diuzi yugu dza.

<sup>3</sup> Biži bdyin dza blë'ë Cornelio tu ángel quie Diuzi. Uzë ángel na' bdyinnë' ga zë Cornelio. Zadze' cadu las tres guca quienë' cana'. Pero ca quie ben' uxusa guca quië' blë'ënë' lëbë'. Na'ra una ángel na' rëbinë' lëbë':

—Cornelio.

<sup>4</sup> Du rdzebi Cornelio una'në' ángel rëbinë' lëbë':

—¿Bi nao, Señor?

Na'ra una ángel rëbinë' Cornelio:

—Raxe Diuzi ca di'idza' ru'elo'në', lëscan' raxenë' ca ruelo' ru'elo' ben' yëchi' caridad.

<sup>5</sup> Hora na' ise'elo' chopa tzona ben' tzio yedyi Jope tzexi'yaquë' tu ben' lao Simón Pedro.

<sup>6</sup> Zunë' zan yu'u quie tu ben' laorë Simón, ben' ruti' guidi. Zu yu'u quienë' ga'ala' ru'a nisadao'.

<sup>7</sup> Ude beyudyi una ángel cana', zeyonë'. Caora na' beyëži Cornelio chopa bi' criado quienë' len tu soldado quienë', ben' rapala'n Diuzi, ben' de confianza,

<sup>8</sup> gudyinë' leyaquë' con cabë' guca quienë', na' use'ela'në' leyaquë' yedyi Jope.

9 Na' beteyu, tu nezioyaquë' tu neza ga'ala' ga zu yedyi Jope, caora na' cadu la'odza urë Pedro lun yu'u, como naca lun yu'u quiejë' ba'a. Na'ra zënë' guicho yu'u na' uzulaonë' ru'elënë' Diuzi di'idza'.

10 Hora na' rduenë' unabë' hue ben' ga zunë' ta gaonë'. Pero tu neru'eyaquë' laze ta gaonë', cati guca quienë' ca quie ben' rxusa.

11 Caora na' blë'ënë' uyalo guibá, uyëzi tu ta naca ca quie tu la'ari' yua' nerio idapa isquinan.

12 Laona na' dyila' zë cue' bia guixi', bia dyia tapa ni'e, len zë cue' bëla len bguini.

13 Caora na' be Pedro una tu ben' rëbinë' lëbë':

—Pedro, uyasa. Bëtiba', udaoba'.

14 Na'ra una Pedro:

—Bigaohua'ba', Señor, porque ni tu lasa binegaohua' tu ta biru'en lato gaohua'.

15 Na' be Pedro una ben' na' tatula rëbinë' lëbë':

—Tu ta aona Diuzi gaolo', binao' biru'en lato gaolo'n.

16 Beyunate lasa guca quie Pedro cana', na'ra beyëpi la'ari' yua' zeyon guibá tatula.

17 Neraque Pedro bi re'en inë di'idza' unë ben' na' cati bdyin ben' use'ela' Cornelio ru'a yu'u. Rdayaquë' reguiloyaquë' lidyi Simón.

18 Caora na' bdyinyaquë' unayaquë' zidzo chi zu Simón, ben' laorë Pedro, zan yu'u.

19 Neraca Pedro pensari cabë' naca ta blë'ënë', caora cati unë Bichi Be quie Diuzi rëbinë' lëbë':

—Abdyin tzona ben' reguilo luë'.

20 Beyëzi, beyolëyaquë'. Bidëbo' bibi gaca quio', porque në'ëdi' bia' mandado dexi'yaquë' luë'.

21 Na'ra beyëzi Pedro yetilanë' leyaquë' unë' rëbinë' leyaquë':

—Në'ëdi' regulole. ¿Nuzi use'ela' le'e za'le niga?

22 Na'ra unayaquë' rëbiyaquë' Pedro:

—Nëto' za'ndo' mandado quie capitán Cornelio. Naca Cornelio tu ben' bala'ana, ben' rionla'adyi' Diuzi. Rapala'n yugulu ben' Israel lëbë'. Na'ra bla'ndo' ni, porque niogue bdyin tu ángel quie Diuzi lidyi Cornelio gudyinë' lëbë' ta guidando' dexi'ndo' luë' tacuenda uzënaga Cornelio bi di'idza' yëbo'në'.

23 Na'ra uzi' Pedro leyaquë' lu'u yu'u bega'nyaquë' tu yela. Caora cati beteyu, uyasayaquë' ziolë Pedro leyaquë'. Lëzi uquië'rë Pedro chopa tzona ben' nao xneza Jesús, ben' nita' yedyi Jope.

24 Na'ra cadu zila dza urupe bedyinyaquë' ru'a ciudad Cesarea. Caora na' guzi Cornelio diadza quië' len nu amigo zudyi'ilënë' tacuenda cuesayaquë' idyin Pedro.

25 Cati bdyin Pedro ru'a yu'u, hora na' zio Cornelio yetilë' lëbë', uditzu zibinë' lao Pedro, uyonla'adyi'në' lëbë'.

26 Pero belisa Pedro lëbë' unë':

—Uzuli, lëzi benë'zi ca luë' naca'.

27 Du ru'eyaquë' di'idza', uyu'uyaquë' lu'u yu'u quie Cornelio, blë'ë Pedro babeledupa ben' zë lu'u lidyinë'.

28 Na'ra una Pedro rëbinë' leyaquë':

—Dyë'ëdi banezile con ca naca costumbre quiendo' ben' Israel. Nacan zudyi huelëndo' ben' binaca ben' Israel tuze. Ni siquiera ta tzu'undo' lu'u

yu'u quieyaquë' biru'en lato. Pero na'a sí, abzioñe'e Diuzi në'ëdi' de que bireya'ala' inia' biru'en lato huelia' ben' binaca ben' Israel tuže.

<sup>29</sup> Por lena' bibi zëdi bia' za'lia' yaca ben' use'elo' dexi' në'ëdi'. Na' bizi, ¿ca re'enlo' hua'?

<sup>30</sup> Na'ra una Cornelio rëbinë' Pedro:

—Azio tapa dza na', cadu hora na'a, zua' zan yu'u niga rua' ubasi rulidza' Diuzi. Caora na' detilalao tu ben' naco la'ari' bezëri di në'ëdi'.

<sup>31</sup> Na' una ben' na' rëbinë' në'ëdi': "Cornelio, re Diuzi hora rulidzo' lëbë'. Lëzi rlë'ënë' hora ru'elo' ben' yëchi' caridad.

<sup>32</sup> Na' pse'ela' ben' quio' yedyi Jope tzexi'yaquë' tu ben' lao Simón Pedro. Zuë' zan lidyi itu ben' lao Simón, ben' huëti' guidi. Huedzelejë' lidyinë' zunë' ga'ala' ru'a nisadao'. Caora babla'në' quio' na', hue'lënë' luë' di'idza'."

<sup>33</sup> Pues beyudyi unë' cana', laose'ela'tia' mozo quia' dexi'yaquë' luë'. Babao' tu huen blao' niga. Hora na' rlë'ë Diuzi nita'ro niga facuenda uzëngando' di'idza' re'en Diuzi inao' nëto'.

### *Caora bdze' Pedro di'idza' lidyi Cornelio*

<sup>34-35</sup> Na'ra una Pedro rëbinë' leyaquë':

—Hora sí, aoyoñe'eda' de que tuzi ca rue Diuzi yeyëchi'la'adyi'në' nu ben' huen, ben' rapala'n lëbë', chi ben' Israel, chi ben' quie nación tula.

<sup>36</sup> Una Diuzi dza na' gudyinë' nëto' ben' Israel de que lao na'a Jesucristo, ben' naca Señor quie yugulu benë', huata' tadya'a yega'nnan huen quie yaca benë' lao Diuzi.

<sup>37</sup> Dyë'ëdi nezile cabë' guca lao yaca yedyi quie ben' Israel. Uzulao Jesús udixogue'në' xti'idza' Diuzi estado Galilea dza na' cati beyudyi udixogue' Juan bautista xti'idza' Diuzi bë' lao yaca benë'.

<sup>38</sup> Lëzi dyë'ëdi nezile use'ela' Diuzi Bichi Be quienë' bëlënë' Jesús yela' huaca quienë', udanë' bënë' puro tadya'a, beyuenë' yaca ben' yu'u taxi'ibi' nun quie nuelë Diuzi lëbë' tuže.

<sup>39</sup> Nëto' blë'ëndo' yugulu ta bë Jesús caora zuë' udë' estado Judea len ciudad Jerusalén. Ude beyudyi na' bda'yaquë' lëbë' lë'ë yaga cruzo bëtiyaquë' lëbë'.

<sup>40</sup> Pero bë' baode tzona dza pseban Diuzi lëbë' bidë' detilalaonë' nëto'.

<sup>41</sup> Pero nëto'zi ptilalaonë', quele yugulu benë'. Ulio Diuzi nëto' dza na'te ta gacando' testigo cabë' guca quienë' gutinë' bebannë'. Nëto' udaondo' hue'endo' len lëbë' cati bebannë'.

<sup>42</sup> Na'ra use'ela' Diuzi nëto' tzetixogue'ndo' benë' di'idza' quienë' rëbindo'yaquë' de que ulio Diuzi Jesús ben' hue juicio quie yugulu benë', la'achi ben' neban, la'achi ben' baguti.

<sup>43</sup> Lëscan' desde dza na'te una yaca ben' udixogue' xti'idza' Diuzi rëbiyaquë' quie Jesús, unayaquë' gata' yela' huezi'ze quie yugulu ben' nao xnezë'.

### *Caora uyu'u Bichi Be quie Diuzi lu'u guicho laxta'o ben' binacaja ben' Israel*

<sup>44</sup> Bineyudyi hue'lë Pedro lejë' di'idza' caora uyu'u Bichi Be quie Diuzi lu'u guicho laxta'o ben' bzënaga di'idza' quië'.

<sup>45-46</sup> Na'ra uzulaoyaquë' rnëyaquë' di'idza' tula, di'idza' binaca quieyaquë', rulidzayaquë' Diuzi. Na'ra yaca ben' Israel, ben' uza'lë Pedro, tu bega'nzije' rebanziyaquë' porque hasta ben' tulara, ben' binaca ben' Israel, uyu'urëyaquë' Bichi Be quie Diuzi.

<sup>47</sup> Na'ra una Pedro rëbinë' laguedyinë':

—¿Quele baoyu'uyaquë' Bichi Be quie Diuzi laga ca uyu'unë' ra'o? Quie lena' nunu udzon hue'ro laoyaquë'.

<sup>48</sup> Caora na' bē Pedro mandado hue'yaquē' laoyaquē' uzētōyaquē' lao Jesucristo. Ude beyudiyi na' unabayaquē' yega'nlē Pedro leyaquē' chopatzona dza.

## 11

### *Bedyin Pedro ciudad Jerusalén udixogue'nē' cabē' guca quienē'*

<sup>1</sup> Na'ra unezi yaca apóstol len los demás ben' quie Jesús nita' estado Judea de que banaorē ben' tulala, ben' binaca ben' Israel, xti'idza' Diuzi.

<sup>2</sup> Cati bedyin Pedro ciudad Jerusalén, na'ra yaca ben' Israel, ben' nao xneza Jesús, udilayaquē' Pedro unayaquē'

<sup>3</sup> rēbiyaquē' lēbē':

—¿Biquien' uyu'ulo' lu'u yu'u quie ben' tulala, yaca ben' binaca ben' Israel, udaolao' tuze len leyaquē'?

<sup>4</sup> Na'ra una Pedro rēbinē' leyaquē' yugulu con cabē' guca quienē' unē':

<sup>5</sup> —Uya'a yedyi Jope. Na' caora blidza' Diuzi, guca quia' ca quie tu ben' rxusa, blē'ēda' uyēzi tu ta naca ca quie tu la'ari' yua' nerio idapa isquinan guibá.

<sup>6</sup> Caora una' dyē'ēdi, blē'ēda' dyila' zē cue' bia guixi', bia dyia tapa ni'e, len zē cue' bēla, len bguini.

<sup>7</sup> Hora na' beda' unē tu ben' una nē'ēdi': “Pedro, uyasa. Bētiba', udaoba'.”

<sup>8</sup> Pero agudya' ben' na': “Bígaohua'ba', Señor, porque ni tu lasa binegao-hua' tu biru'en lato gaohua'.”

<sup>9</sup> Na'ra una ben' na' rēbinē' nē'ēdi' tatula: “Tu ta aona Diuzi gaolo', binao' biru'en lato gaolo'n.”

<sup>10</sup> Beyunate lasa unē' nē'ēdi' cana', na'ra beyēpin zeyonan ladza.

<sup>11</sup> Caora na' bdyin tzona yaca ben' reguilo nē'ēdi', ben' uza'yaca yedyi Cesarea dexi'yaquē' nē'ēdi'.

<sup>12</sup> Hora na' una Bichi Be quie Diuzi rēbinē' nē'ēdi': “Uzi', uyolēyaquē'. Bibi cuidado gapo'.” Por lena' uza'a uquiē'a xopa ben' nao xneza Jesús ziondo' ga zu ben' use'ela' yaca ben' dexi' nē'ēdi'.

<sup>13</sup> Caora bdyindo' lidyi ben' na', udixogue'nē' nēto' con cabē' blē'ēnē' nē' bdyin tu ángel lidyinē' rēbinē' lēbē': “Use'ela' ben' quio' tzioyaquē' yedyi Jope tzexi'yaquē' tu ben' lao Simón Pedro.

<sup>14</sup> Lēbē' inē' luē' cabē' huelo' ta ute usela Diuzi luē' lente yugo diadza quio'.” Cana' una ángel rēbinē' lēbē'.

<sup>15</sup> Na'ra uzulaohua' ru'elia'yaquē' di'idza', caora na' uyu'u Bichi Be quie Diuzi lu'u guicho laxta'oyaquē' laga ca uyu'unē' lu'u guicho laxta'oro dza na'te.

<sup>16</sup> Hora na' beza'la'adya' di'idza' una Jesús caora unē': “Tali bē' Juan laole conlē nisa, pero netza'la ca hue Diuzi quiele, ise'elē' Bichi Be quienē' ta tzu'unē' lu'u laxta'ole.”

<sup>17</sup> Pues como bē' Diuzi lato tzu'u Bichi Be quienē' lu'u laxta'oyaquē' laga con cabē' bēnē' quiero, ben' nao xneza Señor quiero Jesucristo, ¿nuzi naca nē'ēdi' bihua' ca re'en Diuzi hua'?

<sup>18</sup> Na'ra yaca ben' quie Jesús, ben' nita' ciudad Jerusalén, caora beyaquē' cabē' di'idza' ru'e Pedro, bira pquēpiyaquē' lēbē', unayaquē' rēbiyaquē' laguedyiaquē':

—Diuzi naquē' ben' ze. Como hasta ben' tulala, ben' binaca ben' Israel, re'en Diuzi utza'yaquē' pensari quieyaquē' tacuenda gata' yela' neban quieyaquē' tuzioli.

*Cabē' guca unita' ja ben' nao xneza Jesús ciudad Antioquía*



19 Na'ra cati bëtiyaquë' Esteban dza na'te, lëscan' uzulaoyaquë' rueyaquë' contra yaca los demás ben' nao xneza Jesús, ben' nita'ja na'. Por lena' bdzatzajë' uza'yaquë' ziojë' yedyi tula. Ziojë' ciudad Antioquía, ziojë' yedyi nebaba Fenicia, ziojë' yedyi nebaba Chipre. Na'ra yaca ben' uza'ja ciudad Jerusalén, biudixogue'yaquë' yugulu benë' xti'idza' Diuzi, dechan' entre yaca ben' Israelzi udixogue'jë' xti'idza' Diuzi.

20 Pero ibala ben' nao xneza Jesús, ben' uza'ja yedyi nebaba Chipre, len ben' uza'ja yedyi nebaba Cirene, zioyaquë' bdyinyaquë' ciudad Antioquía uzulaoyaquë' rguixogue'yaquë' ben' tulala, ben' binacaja ben' Israel, xti'idza' Jesús.

21 Na'ra bë Diuzi yela' huaca quië' lao na'ayaquë'. Por lena' zëyaquë' psanyaquë' costumbre gula quieyaquë', unaoyaquë' xneza Jesús.

22 Na'ra ben' nao xneza Jesús, ben' nita' ciudad Jerusalén, caora uneziyaquë' cabë' guca ciudad Antioquía, use'ela'yaquë' Bernabé ciudad na'.

23 Caora bdyinnë' na', blë'ënë' bë Diuzi yela' huaca quienë', bëla'iyannë' leyaquë'. Na'ra redaohuetzegue Bernabé unëyuenë' leyaquë' ta ino-  
rayaquë' xneza Jesús du guicho du la'adyi'yaquë'.

24 Cana' bë Bernabé como dan' naquë' ben' dya'a, ben' yu'u Bichi Be quie Diuzi, ben' nao xneza Jesús du guicho du la'adyi'. Cana' bënë' gan gule ben' zë, ben' nao xneza Jesús.

25 Ude beyudyi na', uza' Bernabé zionë' yedyi Tarso tzedilanë' Saulo. Caora bedzelenë' lëbë', uquië'në' lëbë' ciudad Antioquía.

26 Na'ra lao tu iza naya' bega'nyaquë' len ben' nao xneza Jesús psëdiyaquë' ben' zë xti'idza' Diuzi. Na' yaca ben' nita' ciudad Antioquía, leyaquë' uxubayaquë' tanëro lao ben' nao xneza Jesús ben' cristiano.

27 Caora na' ciudad Antioquía bdyin chopa tzona ben' rguixogue' xti'idza' Diuzi, ben' uza'yaca ciudad Jerusalén.

28 Na'ra uzulü tu ben' za' leyaquë' laonë' Agabo ga bedupa yaca ben' nao xneza Jesús. Du yu'unë' Bichi Be quie Diuzi, unë' rëbinë' leyaquë':

—Una Diuzi në'ëdi' gaca tu obin huala duze yedyi layu. —Cana' unë' gudyinë' leyaquë'.

29 Pues gucan con ca unë'. Guca tu obin huala tiempo uzu tu ben' lao Claudio, ben' naca rey quie ben' romano. Na'ra yaca ben' nao xneza Jesús nita' ciudad Antioquía, udilojë' modo gacalëyaquë' laguedyiaquë' ben' nao xneza Jesús, ben' nita' estado Judea.

30 Cana' ptupayaquë' lë'ëti' huio dumi ise'ela'yaquë'n lao na'a Bernabé len Saulo ta tzhua'ayaquë'n tzesanyaquë'n lao na'a yaca ben' nao xneza Jesús, ben' nita' ciudad Jerusalén.

## 12

### *Cabë' guca bëtjje' Santiago bdze'yaquë' Pedro lu'u dyiguiba*

1 Na'ra dza na' uzulao rey Herodes ruenë' contra yaca ben' quie Jesús.

2 Bënë' mandado guti soldado quienë' Santiago, ben' bichi Juan. Bëtiyaquë' lëbë' conlë' espada quieyaquë'.

3 Caora blë'ë rey Herodes de que raxe ben' Israel ruenë' contra ben' quie Jesús, na'ra bëxorënë' Pedro bënë' lëbë' preso. Bdze'në' lëbë' lu'u dyiguiba dza rueyaquë' lani cati reza'la'adyi' ben' Israel dza beza' yaca xuzixta'oyaquë' nación Egipto.

<sup>4</sup> Na'ra ude beyudyi bdze'nè' lèbè' lu'u dyiguiba, bë rey Herodes mandado zio chi'inu'betu soldado ta gapayaquè' lèbè'. Tapazi soldado udapayaquè' lèbè' tu chi' huiò. Na'ra psaque' rey Herodes caionè' Pedro lu'u dyiguiba cati ude dza lani tacuenda guti ja soldado lèbè' zaquè'lao lao ben' yedyi.

<sup>5</sup> Tu nede Pedro lu'u dyiguiba, caora na' rulidza yaca ben' quie Jesús Diuzi du guicho du la'adyi'yaquè' por nun quie Pedro.

### *Bebio Diuzi Pedro lu'u dyiguiba*

<sup>6</sup> Pues binedyin hora tzeni' ta cuio rey Herodes Pedro lu'u dyiguiba. Nede Pedro narionè' chopa caden rasinè' entre chopa soldado. Lèzi zè ja mazera soldado rapayaquè' ru'a yu'u dyiguiba.

<sup>7</sup> Caora na' ure' xni' gui' lu'u dyiguiba labdyinte tu ángel quie Diuzi. Na'ra ptanè' Pedro ta psebenè' lèbè' rëbinè' lèbè':

—Labe uyasa.

Bè' uyasa Pedro, cuinzi cadena bguinojan dan' narionè'.

<sup>8</sup> Na 'una ángel tatula rëbinè' lèbè':

—Pquoio cincho quio' bde huarache quio'.

Ude beyudyi bë Pedro con ca una ángel gudyinè' lèbè', na'ra una ángel rëbinè' lèbè' tatula:

—Bdubi gabán quio' unao nè'èdi'.

<sup>9</sup> Caora na' zio Pedro zenaonè' ángel, pero biraquenè' chi tali cabè' raza quienè' len ángel, dechan' raquenè' rxusanè'.

<sup>10</sup> Na'ra chopa cue' udeyaquè' ga zè soldado rapa dyiguiba, bdyinyaquè' ga zu puerta de guiba ga beyudyite yeroyaquè' la'o yedyi. Na' tu cuinzina uyalo puerta na' bedeyaquè' beroyaquè' lu'u dyiguiba. Ledao'zi beza'yaquè' na' lazeyote ángel, bega'n Pedro tuzinè'.

<sup>11</sup> Cana'ra gucabè' Pedro nacan li cabè' guca quienè', unè':

—Pues nacan li de que use'ela' Diuzi tu ángel quienè' ta pselanè' nè'èdi' con ca re'en rey Herodes len ja ben' Israel huejè' quia'.

<sup>12</sup> Na'ra zionè' racanè' pensari cabè' guca quienè' bdyinnè' lidyí María, Zna' Juan, ben' laorè Marcos. Pero lu'u yu'u na' babedupa ben' zè, ben' nao xneza Jesús, rulidzayaquè' Diuzi por nun quie Pedro.

<sup>13</sup> Na'ra bdyinnè' lali'a zènè' ru'a yu'u ruxidyiguè' lè'è puerta. Caora na' zio tu nigula dao' laobi' Rode tzena'bi' nu ruxidyí puerta,

<sup>14</sup> caora na' bezaquebi' chi' Pedro, pero biusalobi' puerta nun quie redao-huebi' bebi'bi' zeyobi' lu'u yu'u gan nita' ja ben' rulidza Diuzi yeguèdyibi' leyaquè' babdyin Pedro zènè' ru'a yu'u.

<sup>15</sup> Na'ra una ja ben' nita' lu'u yu'u rëbiyaquè' lèbi':

—¿Que raza tondulo?

Pero lèbi' nabi' talicazi bdyin Pedro ru'a puerta. Na'ra unayaquè' rëbiyaquè' lèbi':

—Cala lèbè', dechan' ángel quienè'.

<sup>16</sup> Pero zëcazi Pedro ruxidyiguè' lè'è puerta. Na' cati usaloyaquè' puerta blè'èyaquè' lèbè', lega bdzebiyaquè'.

<sup>17</sup> Na'ra bènè' seña conlè nè'è ta yega'nyaquè' chizi. Caora na' gudyinè' leyaquè' cabè' guca ulio Diuzi lèbè' lu'u dyiguiba. Quie lena' unè' rëbinè' leyaquè':

—Uletzegüdyi Santiago lente yaca los demás bichiro cabè' ta užaca' beroga' lu'u dyiguiba.

Ude beyudyi na', uži'nè' zeyoguè' ga tula.

<sup>18</sup> Bizi cati uyenina' ziladao', legazi uyu'u soldado ru'be, porque bineziyaquë' bi guca quie Pedro.

<sup>19</sup> Cana' bẽ rey Herodes mandado tzio soldado tula tzediloyaquë' Pedro, pero ganu Pedro bedzeleyaquë'. Hora na' beyëzinë' pquëpinë' ja soldado rapa dyiguiba, pero biubinyaquë' bi inayaquë'. Na'ra bẽ rey Herodes mandado gati yaca soldado. Ude beyudyi na', uza'në' estado Judea zionë' yesunë' ciudad Cesarea.

### *Cabë' guca guti rey Herodes*

<sup>20</sup> Na'ra puro yedyi ga rnanë' rey Herodes na' ra'o yaca ben' yedyi Tiro len ben' yedyi Sidón ta raoyaquë'. Pero rey Herodes na' rdza'në' leyaquë'. Quie lena' gucayaquë' de acuerdo ta tzena'yaquë' lëbë' ta hue'lëyaquë' lëbë' di'idza'. Por lena' yeyubiyaquë' tu ben' lao Blasto, ben' naca empleado quie rey Herodes, cuenda na' chí huenë' tu cule hue'lënë' rey Herodes di'idza' ta yega'ntza'olë rey Herodes leyaquë'.

<sup>21</sup> Cati bdyin dza ru'elë rey Herodes leyaquë' di'idza', guconë' žabanë' ta racocazi rey, yequë'në' xlatonë' ga rbezë' benë', uzulaonë' ru'elënë' yaca benë' di'idza'.

<sup>22</sup> Na'ra yaca ben' bzënaga quienë', unëyaquë' zidzo nayaquë':

—¡Quele benë' rnë, nechan' tu diuzi rnë!

<sup>23</sup> Bineyudyi di'idza' caora labdyinte tu ángel quie Diuzi bënë' ta gaca žhue' rey Herodes, porque bigudyinë' yaca ben' bzënaga quienë' de que bireya'ala' tzionla'adyi'ljë' lëbë', tuzi Diuzi reya'ala' tzionla'adyi'ljë'. Na'ra udao bëla dao' bizu yu'u lu'u lë'ënë' lëbë' gutinë'.

<sup>24</sup> Tu dza, tu dza, ziorarë xti'idza' Diuzi cabë' udixogue'ljë' duže yedyi re' na'.

<sup>25</sup> Na'ra Bernabé len Saulo, caora beyudyi dyin quieyaquë', beza'yaquë' ciudad Jerusalén zeyoyaquë' ciudad Antioquía uquië'yaquë' Juan, ben' laorë Marcos.

## 13

### *Bernabé len Saulo uzulaojë' rdajë' rguixogue'ljë' benë' xti'idza' Diuzi tu tu yedyi*

<sup>1</sup> Na'ra entre ja ben' nao xneza Jesús nita' ciudad Antioquía, uzu yaca ben' psëdi udixogue' xti'idza' Diuzi. Uzu tu ben' lao Simón Gaso. Lëscan' uzurë tu ben' yedyi Cirene laonë' Lucio. Lëscan' uzurë itunë' laonë' Manaén, ben' abgualë Herodes. Naca Herodes gobernador que estado Galilea. Lëzi ciudad Antioquía nita'lë Saulo len Bernabé len los demáasyaquë'.

<sup>2</sup> Bizi cati guca tu dza rionla'adyi'yaquë' Diuzi rueyaquë' ubasi, hora na' unë Bichi Be quie Diuzi gudyinë' lejë':

—Uleuda' Bernabé len Saulo ta tzioyaquë' hueyaquë' ca tu dyin re'enda' hueyaquë'.

<sup>3</sup> Quie lena' bipsanjë' bëyaquë' ubasi. Caora na' du rulidzayaquë' Diuzi, na' bda'yaquë' na'ajë' guicho Bernabé len Saulo unabayaquë' gacalë Diuzi leyaquë'.

### *Yaca apóstol na' udixogue'ljë' benë' xti'idza' Diuzi isla Chipre*

<sup>4</sup> Na'ra use'ela' Bichi Be quie Diuzi leyaquë' uza'yaquë' zioyaquë' ciudad Seleucia. Caora na' udejë' yedyi na' uyu'uyaquë' lu'u barco ta idyinyaquë' isla Chipre. Naquië'ljë' Juan Marcos ta gacalënë' leyaquë'.

<sup>5</sup> Na'ra cati bdyinyaquë' yedyi Salamina. Caora na' rioyaquë' lu'u sinagoga quie ja ben' nacaja ben' Israel, uzulaoyaquë' rguixogue'ljë' leyaquë' xti'idza' Diuzi.

<sup>6</sup> Pues udayaquë' duzete isla Chipre bdyinyaquë' yedyi Pafos. Na' yati-layaquë' tu ben' Israel laonë' Barjesús. Naquë' ben' brujo, nanë' rnë' puro xti'idza' Diuzi, dechan' ben' huezi' yë'.

<sup>7</sup> Pues ben' brujo na' zuë' lao ben' naca gobernador laonë' Sergio Paulo. Pues gobernador na' naquë' ben' de pensari. Bënë' mandado tzexi'yaquë' Bernabé len Saulo, porque re'ennë' yenë' con cabë' naca xti'idza' Diuzi.

<sup>8</sup> Pero ben' brujo na' laorënë' Elimas, bënë' contra Bernabé len Saulo. Bigu'unnë' gale gobernador xti'idza' Diuzi.

<sup>9</sup> Na'ra Saulo na' laorënë' Pablo, du yu'unë' Bichi Be quie Diuzi, una'në' ben' brujo dyë'ëdi, unë' gudyinë' lëbë'.

<sup>10</sup> —Ben' huezi' yë', ben' mala naco'. Naco' zi'i taxi'ibi'. Puro tamedian rguilolo' ruelo'. ¿Bixquien' hirsanlo' rziu' benë' yë' bire'enlo' galeyaquë' xti'idza' Diuzi?

<sup>11</sup> Pues na'ra abdyn hora hue Diuzi luë' castigo. Gaco' ben' laochula. Zëdza ni siquiera xni' obidza bira ilë'ëlo'.

Caora na' laochulate lao ben' brujo, bira blë'ënë'. Na' unabayëchi'në' gudyinë' nu ben' bëxo në'ë, ben' bequie' lëbë'.

<sup>12</sup> Caora blë'ë gobernador cabë' guca quie ben' brujo, na'ra gulenë' xti'idza' Diuzi. Tu bega'nzinë' bebanzinë' con cabë' naca yela' huaca quie xti'idza' Señor quiero Jesucristo.

### *Bdyin Pablo len Bernabé ciudad Antioquia ga nebaba Pisidia*

<sup>13</sup> Na'ra Pablo lënë' yaca ben' za'lënë', uza'yaquë' yedyi Pafos con lu'u barco zioyaquë' bdyinyaquë' yedyi Perge ga nebaba Panfilia. Pero Juan Marcos na' psanla'adyi'në' leyaquë' beza'në' na', bedyinnë' ciudad Jerusalén.

<sup>14</sup> Caora na' udeyaquë' yedyi Perge bdyinyaquë' ciudad Antioquia ga nebaba Pisidia. Caora guca dza huezila'adyi', uza'yaquë' zioyaquë' lu'u sinagoga ure'yaquë'.

<sup>15</sup> Ude beyudyi unë yaca ben' re' na' di'idza' bzu Moisés len yaca los demás ben' profeta lë'ë guichi, na'ra use'ela' yaca xan' sinagoga tu ben' unë gudyinë' leyaquë'.

—Bicha', chi re'enle yëbile ja benë' bi di'idza', huazaque' yëbilejë'n na'a.

<sup>16</sup> Pues na'ra uzuli Pablo ga re'në', bënë' seña conlë na'anë' tacuenda na' inita'jé' chizi uzëmagayaquë' quienë'. Na'ra unë' rëbinë' leyaquë'.

—Ulezëcara nagale le'e ben' Israel len yugulu le'e ben' rionla'adyi'rë Diuzi.

<sup>17</sup> Psere Diuzi xuzixta'oro bënë' uyeyaquë' gucayaquë' ben' zë dza nenita'jé' yu binaca quieyaquë', yu nebaba nación Egipto. Conlë yela' huaca quienë' gualënë' xuzixta'oro beza'yaquë' na'.

<sup>18</sup> Pero con paciencia uzi'ze Diuzi quieyaquë' dza udayaquë' chopa galo iza tu paraje ga bidyia yu'u.

<sup>19</sup> Caora na' bdyiagu' Diuzi gadyi yedyi ta nebaba Canaán, bënë' xuzixta'oro layu quie ben' na' gucan quieyaquë'.

<sup>20</sup> Na'ra cadu tapa gayuhua iza yu gatzo ulio Diuzi yaca ben' gaca juez quieyaquë' ta inabë'në' leyaquë'. Cana'zi bega'nnan hasta dza rda tu ben' profeta laonë' Samuel.

<sup>21</sup> Hora na' unaba xuzixta'oro usere Diuzi tu rey, ben' inabë' leyaquë'. Na'ra ulio Diuzi tu ben' laonë' Saúl, zi'i Cis. Naquë' diadza quie xuzixta'oro Benjamín, ben' unita' dza na'te. Na'ra guquë' rey quieyaquë' cadu chopa galo iza.

<sup>22</sup> Pero uderala cati bezi' Diuzi yela' rnabë' quie Saúl, bënë' mandado gaca David rey quieyaquë' lao laza Saúl. Na'ra quie rey David unë Diuzi caora

unë' rëbinë' xuzixta'oro: "Na'a sí, baolioga' David zi'i Isai ta gaquë' rey quiele, porque rexeda'në' ruenë' du guicho du la'adyi'në' con ta re'enda' huenë'."

<sup>23</sup> Na'ra nernë Pablo rëbinë' leyaquë':

—Según ca compromiso bë Diuzi dza na'te, ulionë' de entre yaca zi'isuba rey David nu ben' ute usela ra'o yeyoro ga zu Diuzi. Naca Jesús lëben' ulionë' ta ute uselanë' ra'o.

<sup>24</sup> Pues tu zaquixogue' Jesús xti'idza' Diuzi, udixogue' Juan bautista ra'o de que yuguluro reya'ala' utza'ro pensari quiero cuenda hue' Juan laoro.

<sup>25</sup> Na'ra cati baruen bago dza gati Juan unë': "Raquiele naca' Cristo, pero binaca' Cristo. Zaza'rala ben' naca Cristo. Tantozi nacaré' ben' belao ca në'ëdi', ni lë'ëti' bibizaca' ni siquiera biyeyažoga' cuioga' guidi yu'u ni'anë'."

<sup>26</sup> Na'ra nernë Pablo rëbinë' lejë':

—Le'e ben' zi'isuba xuzixta'ohua' Abraham, len le'e ben' tula, ben' rionla'adyi'rë Diuzi, nacan para le'e di'idza' rnia' niga. Rguixogue'n quie ben' ute usela ra'o yeyoro ga zu Diuzi.

<sup>27</sup> Pues ja ben' nita' ciudad Jerusalén lente ben' rnabë' quieyaquë', binezijë' chi zi'i Diuzi naca Jesús. Lëzi raqueyaquë' rioñe'eyaquë' bi re'en ina di'idza' bzu ben' profeta lë'ë guichi caora cati rulabajë' lu'u sinagoga dza sábado. Pero birioñe'eyaquë'n, dechan' bëyaquë' yela' mala con ca una ben' profeta hueyaquë' udaoyaquë' Jesús xquia gu'unyaquë' gutiyaquë' lëbë'.

<sup>28</sup> Bizì biubinyaquë' bi hueyaquë' ta guti ben' rnabë' Jesús, porque bibi dula' xquia de quienë'. Cana' gu'unjë' guti Pilato Jesús ta gatinë' ca quie ben' de dula' xquia quie.

<sup>29</sup> Na'ra caora baguca quie Jesús con ca rna lë'ë guichi la'iya quie Diuzi ca gaca quie Jesús, hechizayaquë' lëbë' ga gutië' lë'ë yaga cruzo yecachi'yaquë' lëbë'.

<sup>30</sup> Pero pseban Diuzi lëbë' zionë' ptilë' con yaca ben' quienë', ben' uza'lë lëbë' estado Galilea bdyinyaquë' ciudad Jerusalén.

<sup>31</sup> Pues zidza uzulënë' yaca ben' quië' na'. Leyaquë' rguixogue'jë' benë' con ca guca quie Jesús.

<sup>32</sup> Lëzi nëto' zëndo' niga rguixogue'ndo' le'e xti'idza' Diuzi, rguixogue'ndo' le'e de que según compromiso bëlë Diuzi xuzixta'oro dza na'te, bzuë' di'idza' quië' caora cati psebanë' Jesús.

<sup>33</sup> Lëzi para ra'o pseban Diuzi lëbë', como nacaro zi'isuba leyaquë'. Pseban Diuzi lëbë' con cabë' rguixogue'n lë'ë guichi salmo chopa cabë' rnën caniga: "Luë' naco' zi'ina'. Abyein dza ulu'ena' yaca ben' nita' lao yedyi layu zi'ina' luë'."

<sup>34</sup> Lëzi una Diuzi dza na'te de que usebannë' Jesús tacuenda yebannë' tuzioli bira gaticazinë'. Quie lena' unë' caora në': "Huecaza' huen quiele según ca compromiso bëlia' xuzixta'ole rey David."

<sup>35</sup> Lëzi rnën lë'ë guichi tula cabë' hue Diuzi quie zi'inë'. Lena' rnën cani: "Bihue'në' lato itabo cuiagui' cuerpo quie zi'inë', ben' naca la'iya quienë'."

<sup>36</sup> Na'ra nernë Pablo rëbinë' leyaquë':

—Pues xuzixta'oro rey David, bënë' cumplir con ca gudyi Diuzi lëbë' dza nezunë' yedyi layu. Pero bdyin dza quienë' gutinë' yecachi'yaquë' lëbë' ga racachi'yaquë' xuzixta'oro. Na'ra utabo cuerpo quienë',

<sup>37</sup> pero biutabo cuerpo quie Jesús, porque pseban Diuzi lëbë'.

<sup>38</sup> Bicha', reya'ala' inezile de que lao na'a Jesús yezi'ze Diuzi dula' xquia quiele.

<sup>39</sup> Lëscan' lao na'a Jesús hualë'ë Diuzi yugu ben' nao xneza Jesús ben' laxta'o yëri. Pero quie ley pca'n Diuzi lao na'a Moisés, bide fuerza valor quie ley na' ta ilë'ë Diuzi ben' nao ley na' ben' laxta'o yëri.

<sup>40</sup> Pues quie lena' gapale cuidado ta bigaca quiele con ca bzu ja ben' profeta lë'ë guichí cati una Diuzi cani:

<sup>41</sup> Hua' tu yela' milagro quia' dza rdale yedyi layu, pero yela' yaladyi' quiele, bigalele quie yela' milagro quia' hua'.

Ba'ala'cazi nu ben' yexi'idze'në' le'e, bigalecazile.

Tu yebanzile ilë'ële con ca hua' entre le'e, pero como dan' biralele, lena' udyiaguí'a le'e.

Cana' una Pablo udixogue'në' leyaquë' con cabë' una Diuzi dza na'.

<sup>42</sup> Na'ra cati bero Pablo len yaca laguedyinë' lu'u sinagoga, ben' zë, ben' bzënaga quie, unabajë' lëbë' chi biyeguidë' ixun' ta yexi'idze'në' leyaquë' mazerá.

<sup>43</sup> Na'ra bedzatzayaquë' lu'u sinagoga, pero zë ben' Israel len ben' tula, ben' naotzegue religiön quie ben' Israel, unaoyaquë' ziolëyaquë' Pablo len Bernabë tu neza. Caora na' bë' Pablo len Bernabë leyaquë' consejo gudyiyaquë' leyaquë' biyuhuëdiyaquë' inaoyaquë' xneza Diuzi nun quie ulio Diuzi nedyë'ë Diuzi leyaquë'.

<sup>44</sup> Na'ra beya' xun' bedupa casi yugu ben' yedyi lu'u sinagoga ta uzënegayaquë' con cabë' rna xti'idza' Diuzi.

<sup>45</sup> Na'ra cati blë'ë yaca los demás ben' Israel cabë' abedupa ben' zë uzënegayaquë' ca una Pablo, caora na' gucazë'yaquë' uzulaoyaquë' rnëlëyaquë' Pablo hasta ptasi bnioyaquë' lëbë'.

<sup>46</sup> Pues hora na' bibdzebi Pablo len Bernabë unayaquë' rëbiyaquë' leyaquë' cani:

—Pues tanëro reya'ala' za'ndo' quixogue'ndo' le'e xti'idza' Diuzi porque nacale ben' Israel. Pero na' le'e bire'enle uzënegale. Bire'enle gun Diuzi le'e yela' neban tuzioli. Quie lena' yeza'ndo' niga tzetixogue'ndo' yaca ben' binaca ben' Israel con cabë' rna xti'idza' Diuzi.

<sup>47</sup> Porque cana' use'ela' Diuzi nëto' unë' gudyinë' cani:

Bzua' le'e ca quie tu gui' ze tacuenda ilë'ë yaca ben' tula, ben' binaca ben' Israel.

Ise'ela' le'e ta tzetixogue'le xti'idza' yaca ben' nita' yedyi zitu' gula.

<sup>48</sup> Na'ra bë' be yaca ben' binaca ben' Israel ca unë Pablo, legazi redao-hueyaquë' nayaquë' naca dya'a xti'idza' Diuzi. Pues gule yaca ben' ulio Diuzi, yaca ben' re'en Diuzi gata' yela' neban quie tuzioli.

<sup>49</sup> Na'ra bipsan ben' quie Jesús quixogue'yaquë' ben' nita' yugulu yedyi re' na' xti'idza' Diuzi.

<sup>50</sup> Pero bala ben' Israel bë'lëyaquë' ben' belao quie yedyi, lente bala nigula bala'ana di'idza'. Unabayaquë' chi bigacalëyaquë' leyaquë' ta yebioyaquë' Pablo len Bernabë ciudad na'.

<sup>51</sup> Caora na' pchibi Pablo len Bernabë yu bëxte dyia huarache quieyaquë', porque según costumbre quieyaquë', lena' nacan seña de que psaca ben' ciudad na' leyaquë' bizinaquezi. Caora na' beza'jë' ziojë' ciudad Iconio.

<sup>52</sup> Pero con ca tu yaca ben' bagule xti'idza' Jesús, uyu'uyaquë' Bichi Be quie Diuzi redaohuetzegueyaquë'.

## 14

### *Pablo len Bernabë bdyinyaquë' ciudad Iconio*

<sup>1</sup> Na'ra bë' bdyin Pablo len Bernabë ciudad Iconio, zioyaquë' uyu'uyaquë' lu'u sinagoga quie ben' Israel. Na' bë'lëyaquë' ben' bedupa lu'u sinagoga na'

di'idza'. Caora na' ben' zë guleyaquë' ca gudyi Pablo len Bernabé leyaquë', tanto ben' Israel como ca ben' binaca ben' Israel.

<sup>2</sup> Pero yaca ben' Israel, ben' birale cabë' di'idza' ru'e Pablo len Bernabé, unëyaquë' contra leyaquë'. Na'ra ja ben' binaca ben' Israel, guleyaquë' ca di'idza' unë ben' Israel contra lejë', blë'ëyaquë' ben' mala ben' nao xneza Jesús.

<sup>3</sup> Quie lena' bega'n Pablo len Bernabé zidza na'. Birdzebijë' udixogue'yaquë' con cabë' rna xti'idza' Jesús. Pues bë' Diuzi leyaquë' lato huayaquë' yela' milagro quienë' tacuenda inezi yaca ben' yedyi na' de que huacalë Diuzi nutezi ben' gale xti'idzë'.

<sup>4</sup> Quie lena' guca yaca ben' ciudad Iconio chopa cue'. Tu cue'yaquë' bëlëyaquë' ben' Israel, ben' binao xneza Jesús tuže. Pero itu cue'jë' bda'yaquë' yaca apóstol.

<sup>5</sup> Quie lena' guca yaca ben' binao xneza Jesús de acuerdo len ben' r nabë' quieyaquë' ta hueyaquë' leyaquë' bizinaquezi quieyaquë' leyaquë' yo.

<sup>6</sup> Bizi caora unezi Pablo len Bernabé ca re'enyacuë' hueyaquë' quieyaquë', uza'yaquë' zioyaquë' yu nebaba Licaonia, udeyaquë' ciudad Listra len ciudad Derbe, uderëyaquë' yaca ciudad tula, ciudad re' ga'ala'.

<sup>7</sup> Con ga udeyaquë', udixogue'jë' benë' con cabë' rna xti'idza' Diuzi.

### *Ciudad Listra udijë' Pablo yo*

<sup>8</sup> Na'ra ciudad Listra uzu tu be'mbyu, ben' biraca sa'. Ni tu lasagazi binesa'në'. Puro re'tezinë' como nažinë' desde cati galotenë'.

<sup>9</sup> Na'ra re'në' rzënaquë' con cabë' di'idza' ru'e Pablo. Na'ra una' Pablo lëbë' dyë'ëdi, gucabë'në' rzudyi'ilë ben' ži Diuzi rbezë' yeyue Diuzi lëbë'.

<sup>10</sup> Na'ra unë Pablo zidzo gudyinë' lëbë':

—Uzuli, bezu ni'alo' derecho.

Caora na' uxitinë' labezutenë' ni'anë' yu, laozulaotenë' rza'në'.

<sup>11</sup> Biži cati blë'ë ja benë' cabë' bë Pablo quie ben' ži, unëyaquë' zidzo rëbiyaquë' laguediyaquë':

—jBaoyëzi chopa diuzi quiero! jNacajë' forma quie benë' detilalaoyaquë' ra'o niga!

<sup>12</sup> Na' unëyaquë' xti'idza'yaquë', di'idza' quie ben' Licaonia. Unayaquë' naca Bernabé tu diuzi laonë' Júpiter. Lëzi unayaquë' naca Pablo itu diuzi laonë' Mercurio. Na'ra unayaquë' naca Pablo diuzi Mercurio, porque nayaquë' naca Mercurio ben' ru'ëtzegue di'idza' cabë' ru'e Pablo.

<sup>13</sup> Na'ra ru'a ciudad na' zu tu idao' quie diuzi Júpiter. Pues na' bro tu pxuzi quie idao' na', bdyinnë' ga zë Pablo len Bernabé. Naquië'në' bëdyihuaga, bia nuetza'onë' con yo. Na'ra pxuzi lënë' yaca ben' nita' na', re'enyacuë' tzionla'adyi'yaquë' Pablo len Bernabé nayaquë' yaca diuzi leyaquë'. Re'enyacuë' gutiyaquë' bëdyihuaga ca quie gun quieyaquë'.

<sup>14</sup> Na'ra cati gucabë' Pablo len Bernabé cabë' re'enyacuë' huejë', caora na' uzulaoyaquë' rchezayaquë' zabayaquë', yu'uyaquë' lado yaca benë' na' unëyaquë' zidzo rëbiyaquë' leyaquë':

<sup>15</sup> —jBenë! jBixquien' ruele tamedian quiele ruele cana'? Lëzi benë'zi ca le'e nacarëndo' za'ndo' quixogue'ndo' le'e ta usanle ta bibi sirve rionla'adyi'le benë'. Reya'ala' tzionla'adyi'le tuzi Diuzi zu guibá, Diuzi neban tuzioli. Como lëbë' bënë' guibá, lëbë' bzaloguë' dyila yu, lëbë' udixuguë' nisadao'. Hasta con lao yugulute bënë'.

<sup>16</sup> Na'ra dza na'te ba'ala'cazi bë yaca ben' binaca ben' Israel ta rnazin quieyaquë', bibë Diuzi castigo quieyaquë'.

17 Birsannè' rulu'enè' yela' huaca quienè'. Rulu'enè' ben' huen naquè' dan' tadya'a babènnè' quiero. Por lèbè' ruen nisayo, rero usecho dya'a, runnè' yugulu ta raoro yugu dza tzu'uro gusto lao yedyi layu.

18 Pero ba'ala'cazi una Pablo len Bernabé cana', canezi bëyaquè' gan bibèti yaca ben' yedyi bëdyihuaga ca quie gun quiejè' ta tzionla'adyi'jè' leyaquè'.

19 Na'ra cati bdyin yaca ben' Israel, ben' uza'ja ciudad Antioquía len ben' uza'rèja ciudad Iconio, bè'lèyaquè' ben' ciudad di'idza' ta huejè' contra Pablo len Bernabé. Quie lena' uzulao ja ben' ciudad na' rguijè' Pablo yo ta gutiyaquè' lèbè'. Caora guqueyaquè' baguti Pablo, hora na' udubayaquè' lèbè' yatixojè' ru'a ciudadtela.

20 Na'ra bedupa yaca ben' quie Jesús nayèchoyaquè' gan' de Pablo. Caora na' beyasa Pablo zeyonè' lao ciudad tatula. Pues beteyu dza tula, uza'lè Pablo Bernabé zioyaquè' ciudad Derbe.

21 Na'ra udxogue'rèjè' ben' ciudad Derbe con cabè' rna xti'idza' Diuzi. Na' bëyaquè' gan gule ben' zè, gucayaquè' ben' nao xneza Jesús. Ude beyudyi na', bedeyaquè' ciudad Listra, bedeyaquè' ciudad Iconio, bedeyaquè' ciudad Antioquía.

22 Na'ra ja ciudad ga bedeyaquè', bë'yaquè' di'idza' zela'adyi' yaca ben' nao xneza Jesús, unèyueyaquè' leyaquè' con cabè' reya'ala' hueyaquè' inaoyaquè' du guicho du la'adyi'jè' xneza Jesús. Lèzi unayaquè' rèbiyaquè' leyaquè':

—Huetzague benè' bizinaquezi quiele, porque cana' ruejè' quie nu ben' nao xneza Diuzi.

23 Lèzi ulioyaquè' ben' napa dyin, ben' racalè ben' nao xneza Jesús quie quie ciudad ga nita' ben' nao xneza Jesús. Pues beyudyi na', bëyaquè' ubasi bè'lèyaquè' Diuzi di'idza' blidzayaquè' lèbè' chi biucuasa ucu'onè' bi tamala gaca quie ben' ulioyaquè' como dan' barue quieyaquè' xti'idza'nè'.

### *Bedyin Pablo len Bernabé ciudad Antioquía ga nebaba Siria tatula*

24 Ude beyudyi na', uza'yaquè' zioyaquè' udeyaquè' yu nebaba Pisidia, na' bdyinyaquè' yu nebaba Panfilia.

25 Lèzi udejè' ciudad Perge ga udxogue'rèjè' ben' ciudad na' con cabè' rna xti'idza' Diuzi. Beyudyi na' uza'yaquè' zioyaquè' ciudad Atalia.

26 Na'ra ciudad na' beza'yaquè' con lu'u barco zezayaquè' bdyinyaquè' ciudad Antioquía tatula ga nita' yaca ben' nao xneza Jesús, ben' use'ela' leyaquè' yetixogue'yaquè' benè' xti'idza' Diuzi. Lèyaca ben' na' bè'lèyaquè' Diuzi di'idza' por nun quieyaquè' dza zioyaquè' na'. Na' beyudyi tu ca dyin quie Diuzi bëyaquè'.

27 Na'ra caora bdyinyaquè', bdupa yaca ben' nao xneza Jesús nita' ciudad Antioquía. Uzulao Pablo ru'enè' di'idza' con cabè' gualè Diuzi leyaquè'. Lèzi gudyinè' leyaquè' con cabè' ulio Diuzi ben' binaca ben' Israel rnaorèyaquè' xneza Jesús.

28 Na'ra Pablo len Bernabé bega'nyaquè' zidza ciudad na' len yaca los demás ben' nao xneza Jesús.

## 15

### *Caora bedupa ja ben' quie Jesús bëjè' junta ciudad Jerusalén*

1 Pero tiempo na' bdyin chopa tzona benè' ciudad Antioquía, ben' uza'ja estado Judea. Na'ra unayaquè' rèbiyaquè' ben' nao xneza Jesús:

—Yugu ben' binaca ben' Israel, ben' banoa xneza Jesús, rnanan hueyaquè' lato su tu xèdyidao' cuinyaquè' cabè' rna lè'è guichi ley pca'n Moisés dza



na'te. Porque chi binaoayaquë' con cabë' rna lë'ë guichi ley na', biyezi' Diuzi leyaquë' yeyoayaquë' guibá dza gatiyaquë'. —Cana' unayaquë' gudyijë' lejë'.

<sup>2</sup> Quie lena' legazi uyu'u Pablo len Bernabé huenë len leyaquë'. Pues como bibega'njè' de acuerdo, na'ra entre yaca ben' nao xneza Jesús nita' na', bëyaquë' nombrar Pablo len Bernabé len ichopa tzona ben' tzio ciudad Jerusalén tacuenda hue'jè' di'idza' conlë ja apóstol len yaca ben' belao quie yaca ben' nao xneza Jesús nita' na'.

<sup>3</sup> Na'ra yaca ben' nao xneza Jesús nita' ciudad Antioquía use'ela'yaquë' lejë' uza'yaquë' udeyaquë' ja ciudad nebaba Fenicia len ja ciudad nebaba Samaria. Nà'ra tu tu ciudad ga udeyaquë' udixogue'yaquë' leyaquë' cabë' rue yaca ben' binaca ben' Israel barsanla'adyi'yaquë' costumbre quie xuz-irta'oyaquë', barnaoyaquë' xneza Jesús. Na'ra quie lena', legazi redaohue yaca ben' nao xneza Jesús nita' ja ciudad ga udeyaquë'.

<sup>4</sup> Caora bedyinyaquë' ciudad Jerusalén, pues yaca apóstol, len yaca los demás ben' nao xneza Jesús, len yaca ben' napa dyin quieyaquë', bgapajë' leyaquë' diuzi. Na'ra bdze' Pablo len Bernabé di'idza' yugulu con cabë' bë Diuzi gualënë' leyaquë' ga udixogue'jè' benë' con cabë' rna xti'idzë'.

<sup>5</sup> Pero na' uzuli bala ben' nao xneza Jesús, ben' nacaré quie partido fariseo. Na'ra nu ben' naca partido fariseo, legazi rnaoyaquë' guichi ley pca'n Diuzi lao na'a Moisés. Quie lena' unayaquë' rëbियाquë' yaca los demás ben' nao xneza Jesús cani:

—Yugu ben' binaca ben' Israel, yaca ben' nao xneza Jesús, reya'ala' uzu tu xëdyidao' cuinyaquë'. Lëzi reya'ala' huero mandado huejè' cumplir con ca rna lë'ë guichi ley pca'n Diuzi lao na'a Moisés.

<sup>6</sup> Na'ra bedupa yaca apóstol len yaca ben' napa dyin quie ben' nao xneza Jesús tacuenda hueyaquë' pensari con cabë' una yaca ben' na'.

<sup>7</sup> Caora na' legazi uyu'uyaquë' huenë. Cati beyudyi na', na'ra uzuli Pedro rëbinë' leyaquë':

—Bicha', dyë'ëdi nezile de que dza na'te ulio Diuzi në'ëdi' de entre ra'o ta quixogui'a ben' binaca ben' Israel xti'idza' Diuzi, porque lëscan' re'en Diuzi inaoyaquë' xnezë'.

<sup>8</sup> Nezi Diuzi bitezi pensari raca yugo benë'. Quie lena' bzioñe'enë' leyaquë' de que zuë' dispuesto yezi'në' leyaquë'. Na' bi'zi ba'ala'cazi binacajë' ben' Israel, bdze'në' Bichi Be quienë' lu'u guicho laxta'oyaquë' laga ca bdze'në' Bichi Be quienë' lu'u guicho laxta'oro.

<sup>9</sup> Como tuzi rue Diuzi len leyaquë' len ra'o, aodibi Diuzi laxta'oyaquë' nun quie barue quieyaquë' xti'idzë'.

<sup>10</sup> Na'a ¿bixquien' racale pensari binezi Diuzi bi bënë'? Pues ni ra'o ni xuzixta'oro bibëro gan inaoro duze guichi ley pca'n Diuzi lao na'a Moisés. Na'ra ¿bixquien', pues, re'enle inao yaca ben' binaca ben' Israel ley quiero? Lena' nacan ca quie chi ugua'aroyaquë' yua' zi'i, tu ta bisujë' hua'ayaquë'.

<sup>11</sup> Bi'zi dyë'ëdi neziro de que laga cabë' ute usela Señor Jesús quiero por yela' ben' huen quienë', lëscan' ute usela Jesús yaca ben' binaca ben' Israel, yaca ben' rue quie xti'idzë'. —Cana' una Pedro gudyinë' leyaquë'.

<sup>12</sup> Na'ra uzulao Bernabé len Pablo ru'eyaquë' di'idza' con cabë' gualë Diuzi leyaquë' bëyaquë' nu yela' milagro lao ben' binacaja ben' Israel. Quie lena' unita' yaca ben' na' chizi yugutejë' rzënegayaquë' con cabë' una Bernabé len Pablo.

<sup>13</sup> Pues beyudyi bë'yaquë' di'idza' na', na'ra una Santiago rëbinë' leyaquë': —Bicha', uzëcara nagale quia'. Pues agudyi

14 Simón Pedro ra'o de que babdyin hora cuio Diuzi entre ja ben' binaca ben' Israel nu ben' re'en gaca ben' quienë' galeyacuë' xti'idzë'.

15 Lena' nacan de acuerdo con cabë' una ja ben' gula, ben' udixogue' xti'idza' Diuzi dza na'. Lena' rnën lë'ë guichi quie Diuzi cani:

16 Cabë' rue yaca benë', reyueyaquë' recubiyaquë' yedyi quieyaquë', cana' hueria' conlë yaca ben' Israel.

Huadyin dza gacalia' yaca ben' Israel ta yenaoyaquë' xneza' tatula cabë' unao xuzixta'oyaquë' xneza' dza uda rey David lao yedyi layu.

17 Cana' hua' tacuenda inaorë yaca los demás ben' binaca ben' Israel xneza', lente yugu ben' naca ben' la'iya quia', ben' rzëto laohua'.

18 Cana' una Diuzi bzioñe'enë' ra'o.

Desde dza na'te unë' udixogue'në' xti'idzë'.

19 Na'ra nernë Santiago rëbinë' leyaquë':

—Quie lena' nia' bireya'ala' huero zëdi ben' binacaja ben' Israel, ben' psanja pensari gula quiejë' barnaojë' xneza Diuzi.

20 Tuzi ca reya'ala' huero ise'ela'ro tu guichi ta quixogue'royaquë' bireya'ala' gaoyaquë' bë'ëla' bdyia benë' lao ru'aba ta bë'yaquë' ídolo quieyaquë'. Lëzi bireya'ala' gaoyaquë' bë'ëla' quie nu bia bibro ren hora gutiba'. Lëscan', con nutezi bia guixi', bireya'ala' gaoyaquë' ren quieba'. Lëzi bireya'ala' gatalëyaquë' nigula binaca zgulayaquë'.

21 Cana' re'ennan hueja ben' binacaja ben' Israel, ben' barnaoja xneza Diuzi tacuenda biudze'la'adyi' ja ben' Israel, porque desde tiempote uzucazi ja ben' nao ley pca'n Moisés. Quie quie yedyi quiero nita' yaca ben' Israel rulabajë' guichi ley na' lu'u sinagoga yugu dza saodo. —Cana' una Jacobo gudyinë' leyaquë'.

22 Na'ra ja apóstol, len yaca ben' napa dyin quie ben' nao xneza Jesús, len los demásyaquë', psaque'yaquë' cabë' huejë' ta cuioyaquë' entre leyaquë' ben' tziolë Pablo len Bernabé ciudad Antioquía. Quie lena' ulioyaquë' tu ben' lao Judas Barsabás, len itunë' laonë' Silas. Nacayaquë' ben' bala'ana entre ja ben' nao xneza Jesús.

23 Na'ra lëscan' bëyaquë' tu guichi ta nu'ayaquë'. Lë'ë guichi na' rnën cani:

“Nëto', yaca apóstol len yaca los demás ben' napa dyin entre yaca ben' nao xneza Jesús, rgapando' diuzi le'e como ben' bichindo', ben' barnao xneza Jesús. Baose'ela'ndo' guichi ni lao le'e ben' binaca ben' Israel, ben' nita' ciudad Antioquía, len le'e ben' nita' yedyi nebaba Siria, len le'e ben' nita' yedyi nebaba Cilicia.

24 Banezindo' babida chopa tzona ben' uza' yedyi ni badeyubiyaquë' le'e ta hue'lëyaquë' le'e di'idza', pero ca bëyaquë' pquixiyaquë' pensari quiele bëyaquë' le'e zëdi. Pero cala nëto' use'ela'ndo'yaquë', dechan' ta racazi la'adyi'jë' bëjë' cana'.

25 Quie lena' gucando' de acuerdo, uliondo' de entre nëto' chopa ben' guidalë bichiro Pablo len bichiro Bernabé ideyubiyaquë' le'e inayaquë' le'e ca naca pensari quiendo'.

26 Naca Pablo len Bernabé ben' uyocazi ja ciudad tula tanun quie Señor quiero Jesucristo ga ruenan zudyi guti ja benë' lejë'.

27 Lëscana' use'ela'ndo' Judas len Silas ta uxi'idze'yaquë' le'e yugulu cabë' naca pensari quiendo' niga.

28 Na'ra según pensari quie Bichi Be quie Diuzi len pensari quiendo', nacan huen bihuendo' mandado inaole duze ley quie Moisés. Ca rnando' le'e niga, cana'zi nacan zi quiele huele.

29 Pues bireya'ala' gaole bē'ēla' bdyia benē' ru'aba ta bē'yaquē' ídolo quieyaquē'. Lēzi bigaole bē'ēla' quie nu bia bibro ren hora gutiba'. Lēscan' con nutezi bia guixi', bireya'ala' gaole ren quieba'. Lēzi bireya'ala' gatalēle nigula binaca žgulale. Chi hue quiele uzule di'idza' ca nando' le'e niga, cana' huele ta yu'u ni'a xnezi. Na' yugu dza rulidzando' Diuzi gacalēnē' le'e." Cana' unēn lē'ē guichi na' ta use'ela'yaquē'.

30 Pues cana' guca uza'yaquē' zioyaquē' ciudad Antioquía ptupayaquē' yaca ben' nao xneza Jesús, bē'yaquē' leyaquē' guichi nu'ayaquē'.

31 Na'ra cati bablabayaquē' guichi na', legazi bedaohueyaquē' con cabē' di'idza' zela'adyi' rnēn lē'ē guichi na'.

32 Na'ra como Judas len Silas nacarēyaquē' ben' rguixogue' xti'idza' Diuzi, hora na' bē'lēyaquē' leyaquē' di'idza' zela'adyi' mazera. Na'ra nun quie di'idza' unayaquē' gualēyaquē' leyaquē' ta inaorayaquē' dula'adyi'jē' xneza Jesús.

33 Bizi na' caora baguca zidza zuyaquē' ciudad na', bē yaca ben' quie Jesús tu despedida ta yeza'yaquē' yedyinyaquē' ciudad ga nita' ja ben' use'ela' leyaquē'.

34 Pero Silas psaque'nē' yega'nnē' ciudad Antioquía.

35 Lēzi bega'nrē Pablo len Bernabé ciudad na'. Na'ra leyaquē' len yaca los demás ben' quie Jesús, udixogue'yaquē' benē' con cabē' rna xti'idza' Diuzi.

*Bezulao Pablo ta chopa rdanē' rguixogue'nē' benē' con cabē' rna xti'idza' Diuzi*

36 Pues caora baode tu tiempo, una Pablo rēbinē' Bernabé:

—Ya' tziro tatula tzeyubiro ja bichiro nita' yugu ciudad con ga udero udixogue'ro yaca benē' con cabē' rna xti'idza' Diuzi dza na'. Tziro tzena'ro bi raza quiejē'.

37 Pues na'ra gu'un Bernabé iquiē'yaquē' Juan Marcos,

38 pero Pablo na' bigu'unnē', porque dan' psanla'adyi' Juan leyaquē' dza uyoyaquē' yaca yedyi nebaba Panfilia. Biuyolēnē' leyaquē' ta tzetixogue'yaquē' benē' con cabē' rna xti'idza' Diuzi.

39 Tantozi uyu'uyaquē' huenē' na', uza'yaquē' quie quieyaquē'. Na'ra uquiē' Bernabé Marcos uza'yaquē' zioyaquē' isla Chipre.

40 Pero Pablo, por tu partela, ulionē' Silas ben' tziolē' lēbē'. Na'ra bē' beyudyi blidza ben' nao xneza Jesús Diuzi ta gacalēnē' Pablo len Silas con ga tzioyaquē',

41 caora na' uza'yaquē' zioyaquē' yedyi ga nebaba Siria len yedyi ga nebaba Cilicia. Con ga udeyaquē' mazera bē'yaquē' ben' nao xneza Jesús di'idza' zela'adyi'.

## 16

*Uquiē' Pablo len Silas Timoteo*

1 Na'ra bedyin Pablo len Silas ga re' ciudad Derbe len ciudad Listra. Na' yexacayaquē' tu ben' lao Timoteo naquē' ben' quie Jesús. Naca zna'nē' ben' Israel, lēzi nacarēnē' ben' nao xneza Jesús. Naca xuzinē' ben' griego.

2 Rna ja ben' nao xneza Jesús nita' ciudad Listra, len ben' nao xneza Jesús nita' ciudad Iconio, de que naca Timoteo ben' dya'a gula.

3 Caora na' gu'un Pablo uquiē'nē' Timoteo, pero como nita' zē ben' Israel gan' tzioyaquē', lēscan' como nezi yaca ben' Israel binaca xuzi Timoteo ben' Israel, quie lena' bzu Pablo tu xēdyidao' Timoteo tacuenda biudze'la'adyi' ja ben' Israel nita' ja ciudad ga tzioyaquē'.

4 Na'ra uza'yaquë' zioyaquë'. Pero tu tu ciudad ga udeyaquë' udxogüe'yaquë' ben' nao xneza Jesús nita'ja na' con cabë' una yaca apóstol len ben' napa dyin caora bëjë' junta ciudad Jerusalén. Lëscan' gudiyijë' lejë' ta uzujë' di'idza' ca di'idza' una yaca ben' bë junta.

5 Pues cana' guca quie ben' quie Jesús nita' ga udejë', uzela'adyi'yaquë' naoyaquë' xneza Jesús du guicho du la'adyi'jë'. Quie lena' uyera mazerá ben' nao xneza Jesús tu dza tu dza.

*Cabë' guca uxusa Pablo blë'ënë' tu be'mbyu, ben' uza' yaca ciudad nebaba Macedonia*

6 Pues como bibë' Bichi Be quie Diuzi lato quixogüe'yaquë' ben' nita' yaca ciudad nebaba Asia con cabë' rna xti'idza' Diuzi, uza'yaquë' udeyaquë' yaca ciudad nebaba Frigia len yaca ciudad nebaba Galacia

7 hasta bdyinyaquë' ga beyudyi yu nebaba Misia. Hora na' gu'unyaquë' tzioryaquë' mazerá ta idyinyaquë' yaca ciudad nebaba Bitinia, pero lëzi bibë' Bichi Be quie Diuzi lato.

8 Quie lena' beza'yaquë' bedeyaquë' yu nebaba Misia bedyinyaquë' ciudad Troas.

9 Caora na' ca du rëla, uxusa Pablo blë'ënë' tu ben' Macedonia zënë' rnabayëchi'në' rëbinë' lëbë': "Naguido' Macedonia ga zundo' tacuenda gacalao' nëto'."

10 Hora na' ude beyudyi blë'ë Pablo con cabë' uxusanë', na'ra labëteyaquë' puesto quieyaquë' ta tzioryaquë' Macedonia. Lëzi në'ëdi', Lucas, uyalia' leyaquë'. Naca' ben' bzu di'idza' lë'ë guichi ni. Na'ra con cabë' uxusa Pablo, lena' unezindo' de que re'en Diuzi tziondo' tzetixogüe'ndo' ben' Macedonia con cabë' rna xti'idzë'.

*Pablo len Silas bdyinyaquë' ciudad Filipos*

11 Na'ra uza'ndo' ciudad Troas con lu'u barco ziondo' tu li ta idyinndo' isla Samotracia. Caora beteyu dza tula bdyinndo' ciudad Neápolis.

12 Na'ra uza'ndo' ziondo' ciudad Filipos. Pues ciudad Filipos nacan yedyi belaora quie ja ciudad nebaba Macedonia. Pues nita' casi puro ben' romano ciudad na'. Na'ra bega'nndo' na' chopa tzona dza.

13 Bizi guca tu dza saodo na' uza'ndo' ziondo' tu ru'a yao ze de ru'a yedyi na'. Lëlugar na' nacan ga rio ja ben' Israel ru'elëyaquë' Diuzi di'idza'. Na'ra ure'ndo' na' uzulaondo' rguixogüe'ndo' con cabë' rna xti'idza' Diuzi lao ja nigula bdupayaca na'.

14 Na'ra entre ja nigula na' ure' tunë' laonë' Lidia. Naquë' ben' ciudad Tiatira. Naquë' ben' ruti' la'ari' tza'o, la'ari' culuri morado. Lëzi naquë' ben' rionla'adyi' Diuzi. Na'ra bdze' Diuzi lëbë' pensari ta hue quienë' con cabë' rna di'idza' ru'e Pablo rëbinë' leyaquë'. Cana' uzulaonë' inaonë' xneza Jesús.

15 Caora na' bë'yaquë' laonë' lente yaca familia quienë'. Pues beyudyi na', unë' nëto' du la'adyi'në':

—Chi psaque'le de que tali banaca' ben' rnao xneza Jesús, guidale sule zan yu'u quia' chopa tzona dza.

Na'ra cana' guca quiendo', bega'nndo' lidyinë'.

16 Pues bdyin hora tatula ziondo' ga naca lugar ruendo' orar. Pero du tu neza yetilando' tu niguladao' yu'ubi' taxi'ibi'. Na'ra conlë taxi'ibi' ruebi' divinar. Lëzi nacabi' bi' nada'o, bi' rue dyin sin lazu. Pues como ruebi' divinar quie benë', legazi ruebi' gan dumi ze para quie ja x'ambi'.

17 Na'ra uzulao nigula naobi' nëto' ga ziondo' rnëbi' zidzo rëbibi' ben' nita' ciudad na':

—Yaca ben' ni rueyaquë' mandado quie tuzi Diuzi zu sibi. Rguixogue'yaquë' benë' con cabë' rna xti'idza' Diuzi ta hue quieyaquë'n ta yeyoyaquë' guibá dza gatiyaquë'.

18 Na'ra cana' guca bazio zëdza nao niguladao' nëto' ga riondo' hasta que bdyin dza bdza' Pablo lëbi'. Caora na' beyëchonë' unë' rëbinë' taxi'ibi' yu'ubi': —Rzëtoga' lao Jesucristo, yerolo' gan' yu'ulo'.

Pues caora na'tezi laberote taxi'ibi' yu'u niguladao' na'.

19 Pero cati blë'ë yaca xan' nigula de que bira saque' hueyaquë' gan dumi por lëbi', caora na' bëxoyaquë' Pablo len Silas, uquië'yaquë' lejë' yulao' ga re' yaca ben' rnabë'.

20 Na'ra psedyinyaquë' lejë' lao yaca juez unayaquë' rëbiyaquë' ja juez:

—Yaca ben' ni nacayaquë' ben' Israel. Rdayaquë' rguiloayaquë' huedila lao yedyi quiero niga.

21 Re'enyacuë' si'ro inaoro cabë' naca pensari quiejë', pero biru'en lato inaoro xneza quieyaquë', porque dan' nacaro ben' romano.

22 Na'ra yaca ben' yedyi na', bdza'tzegueyaquë' Pablo len Silas. Hora na' bë ja juez mandado ilëcho policia zabajë' tacuenda quiaquë' lejë' con bara.

23 Beyudyi uditzagueyaquë' lejë' con bara, bdze'yaquë' lejë' lu'u dyiguiba, gudiyiyaquë' ben' rapa dyiguiba ta gapë' lejë' dyë'ëdi.

24 Quie lena' uquië' ben' rapa dyiguiba lejë' guichote ga beyudyite dyiguiba, bdze'në' ni'ajë' lu'u yëro dyia chopa yaga ta'a ta resio tejë' con candado.

25 Na' cadu gatzo yëla re' Pablo len Silas rueyaquë' orar rulayaquë' alabanza quie Diuzi, pero yaca los demás preso deyaquë' rzënegayaquë' cabë' rula Pablo len Silas.

26 Pues caora na' tu sasazi, ben tu užu' huala gula bztzin dyiguiba. Dyin quie užu' na', uyalo yugu puerta quie dyiguiba. Lëzi yugu caden na' nario ja preso beyedyijan bguinojan layu.

27 Cati udëlebë ben' rapa dyiguiba, blë'ënë' nayalo ja puerta quie dyiguiba. Caora na' ulëchonë' espada quienë' ta yeyutinë' cuinnë', porque guquenë' baola yaca preso de ja na'.

28 Hora na' unë Pablo zidzo gudyinë' lëbë':

—Bibi tamala huelo' quio', porque nicazi nita'ndo' yugundo'.

29 Na'ra unaba ben' rapa dyiguiba gui' zionë' tariara uyu'unë' lu'u dyiguiba. Tantozi rdzebinë' zionë' uditzu žibinë' laojë',

30 ulionë' Pablo len Silas ga dejë' unë' rëbinë' lejë':

—Señores, žbizi ca reya'ala' hua' ta yeyëri laxta'ohua' lao Diuzi?

31 Na'ra bequëbijë' rëbijë' lëbë':

—Reya'ala' hue quio' xti'idza' Señor Jesús. Cana' yeyëri laxta'olo' lao Diuzi, cana' yeyëri laxta'o familia quio' lao Diuzi.

32 Pues udixogue'jë' lëbë' lente yugu yaca familia quienë' nita'ja na' con cabë' rna xti'idza' Señor Jesús.

33 Lëzi yëla na'tezi hora na', udibi ben' rapa dyiguiba ga naca Pablo len Silas hue'. Na'ra bë'yaquë' lao ben' rapa dyiguiba lente yugo familia quienë'.

34 Beyudyi na' uquië'në' Pablo len Silas lidyinë' ga bgaonë' leyaquë'. Hora na' lëbë' lente yugo familia quienë', legazi redaohueyaquë', porque dan' barnaojë' xneza Diuzi.

35 Pero caora uyen' zila na', use'ela' yaca juez policia gan zë ben' rapa dyiguiba gudiyiyaquë' lëbë' ta yebionë' Pablo len Silas lu'u dyiguiba.

36 Caora na' unë ben' rapa dyiguiba rëbinë' Pablo:

—Abla' di'idza' quie ja juez na' re'enyacuë' yebioga' le'e. Pues na' yerole dyë'ëdi, yeyole huen.

37 Pero una Pablo gudyinè' lejè':

—Nèto' banacando' cuenda quie ciudad Roma. Según ley quie ben' romano, biru'en lato quiyaquè' nèto' udze'yaquè' nèto' dyiguiba sin nica negacazi justicia quiendo'. ¿Cómo pues bare'enyacuè' yebioyaquè' nèto' nagachi'zi? ¡Pues bisaque! usacayaquè' nèto' cana! Ni cuezando' hasta que guidayaquè' cuinyaquè' yebioyaquè' nèto'.

38 Na'ra hora na' uyo ja policia yeguèdyiyaquè' yaca juez con ca una Pablo. Pues cati unezi yaca juez de que naca Pablo len Silas cuenda quie ciudad Roma, lena' legazi bdzebigaziyaquè'.

39 Caora na' uyo yaca juez gan' de Pablo len Silas yeguèdyijè' lejè' ta yezi'ze Pablo len Silas quieyaquè'. Cana' guca bebioyaquè' lejè' lu'u dyiguiba. Na' unabayèchi'jè' lejè' ta yeza'jè' yerojè' ciudad na'.

40 Pues bè' beroyaquè' dyiguiba na', zioyaquè' yeyubiyaquè' Lidia, ben' ruti' la'ari'. Lèscan' yeyubiyaquè' yaca los demás ben' quie Jesús nita' na'. Ude beyudyi bè'yaquè' lejè' di'idza' zela'adyi', beza'yaquè' zioyaquè' ciudad tula.

## 17

### *Guca tu zèdi gula conlè Pablo len Silas ciudad Tesalónica*

1 Pues udeyaquè' ciudad Anfípolis len ciudad Apolonia labdyintejè' ciudad Tesalónica ga zu tu idao' sinagoga quie ja ben' Israel.

2 Na'ra con ca naca costumbre quie Pablo, rionè' lu'u sinagoga. Pues lao tzona xman, tu dza huio tu xman dza saodo na', bè'lènè' ben' rioja lu'u sinagoga na' di'idza' con cabè' rna xti'idza' Diuzi bzu ja ben' unita' dza na' lè'è' guichi.

3 Pxi'idze'nè' leyaquè' de que con cabè' rna lè'è' guichi guti yaca benè' ben' use'ela' Diuzi, pero useban Diuzi lèbè'. Quie lena' unè' rëbinè' lejè' cani:

—Naca Jesús ben' use'ela' Diuzi. Quie lèbè' rguixogui'a le'e. —Cana' una Pablo gudyinè' lejè'.

4 Na'ra uzulao inao bala yaca ben' Israel xneza Jesús. Hora na' gucajè' tuze len Pablo len Silas. Lèzi zè yaca ben' griego, ben' rionla'adyi' yaca diuzi, unaorèyaquè' xneza Jesús. Lèzi unaorè ja zè nigula bala'ana quie yedyi na'.

5 Pero bala ja ben' Israel, ben' biunao xneza Jesús, gucazè'èyaquè' como dan' bagule ben' zè ca una Pablo. Caora na' ptupajè' bala ben' rdazija du tu neza, yaca ben' malaja, gudyiyaquè' leyaquè' ta inèyaquè' di'idza' contra Pablo len Silas tacuenda na' idza' yaca ben' yedyi leyaquè'. Hora na' de por mala yetzu'uyaquè' lu'u yu'u quie tu ben' lao Jasón como rdayaquè' reguiloyaquè' Pablo len Silas ta yequiè'yaquè' lejè' ga bedupa ja ben' yedyi.

6 Pero como bibedzeleyaquè' lejè' zan yu'u na', uquiè'yaquè' Jasón udubayaquè' lèbè' layu lente itu chopa ben' quie Jesús. Hora na' zioyaquè' ga re' ben' rnabè' quiejè' unayaquè' zidzo rëbiyaquè' leyaquè':

—Ben' ni laonè' Jasón. Bè'nè' lato bdyin ben' rue zèdi duze yedyi layu zan yu'u quienè'.

7 Rueyaquè' contra ley quie rey César, porque nayaquè' quele César naquè' rey, nechan' tu ben' lao Jesús na' naca rey.

8 Na'ra bè' be ja ben' rnabè' len yaca los demás ben' yedyi ca una yaca ben' na', legazi bdza'yaquè'.

9 Pero bebiocaziyaquè' Jasón de fianza lente ben' compañero quienè'.

### *Bzènaga yaca ben' ciudad Berea di'idza' una Pablo len Silas*

<sup>10</sup> Quie lena' ja ben' quie Jesús nita' na' luegozi use'ela'yaquë' Pablo len Silas du rëla ciudad tula, ciudad laona Berea. Cati bdyinyaquë' ciudad na', rioyaquë' lu'u idao' sinagoga quie ja ben' Israel.

<sup>11</sup> Pero yaca ben' nita' na', nacarajë' ben' huen, quele ca yaca ben' nita' ciudad Tesalónica, porque dan' yexetzegueyaquë' bzëmagayaquë' di'idza' ru'e Pablo. Pues tu dza, tu dza, reguiloyaquë' rna'yaquë' lë'ë guichi la'ya quie Diuzi chi ru'e Pablo di'idza' li con cabë' rnën lë'ë guichi na'.

<sup>12</sup> Na'ra zëyaquë' uzulaoyaquë' inaoyaquë' xneza Jesús. Lëzi unaorë zë ja ben' griego, tanto yaca nigula bala'ana lente yaca be'mbyu, xneza Jesús.

<sup>13</sup> Pero yaca ben' Israel nita' ciudad Tesalónica, caora uneziyaquë' arda Pablo ciudad Berea rguixogue'në' yaca benë' con cabë' rna xti'idza' Diuzi, caora na' uza'yaquë' zioyaquë' ciudad Berea unëyaquë' di'idza' contra Pablo len Silas tacuenda idza' ben' ciudad Berea lejë'.

<sup>14</sup> Quie lena' ja ben' nao xneza Jesús nita' ciudad Berea, luegozi laose'ela'teyaquë' Pablo ga uzulao ru'a nisadao'. Pero bega'n Silas len Timoteo ciudad Berea.

<sup>15</sup> Na'ra yaca ben' ziolë Pablo, uquië'yaquë' lëbë' hasta ciudad Atenas. Caora na' beza'yaquë' zeyoyaquë' ciudad Berea. Lëscan' caora na' bese'ela' Pablo di'idza' lao Silas lenë' Timoteo ta idežeyaquë' lëbë' luegozi.

### *Cabë' guca bdze' Pablo di'idza' lao ben' ciudad Atenas*

<sup>16</sup> Tu nerbeza Pablo idyin Silas len Timoteo ciudad Atenas na', cati blë'ënë' de ídolo zë gula quie ja ben' ciudad na'. Nun quie blë'ënë' napayaquë' ídolo zëgula, cana' lena' guqueyëchi' Pablo.

<sup>17</sup> Quie lena' rionë' lu'u sinagoga ru'elënë' yaca ben' Israel di'idza' len yaca los demás ben' rionla'adyi' Diuzi. Lëzi rdarënë' lao ye'eya yugo dza ru'elënë' di'idza' con nu ben' redilanë' na'.

<sup>18</sup> Na'ra bdyin dza bedila Pablo yaca ben' rusëdi di'idza' quie tu ben' lao Epicuro, len yaca ben' rusëdi di'idza' quie itu ben' lao Zenón. Caora na' uzu-laoyaquë' ru'elëyaquë' lëbë' di'idza'. Unayaquë' rëbiyaquë' lagueydiyaquë':

—¿A ver bizi ca ina ben' huezi' yë' niga?

Pero na' ibalayaquë' unayaquë':

—Raqueda' naquë' ben' rda rguixogue' di'idza' quie yaca diuzi tula.

Cana' unayaquë' como dan' rda Pablo rguixogue'në' yaca benë' con cabë' guca quie Jesús bebannë'.

<sup>19</sup> Caora na' uquië'yaquë' lëbë' tu paraje laona Areópago ga redupayaquë' según costumbre quiejë' ru'eyaquë' lagueydiyë' consejo. Na'ra unayaquë' rëbiyaquë' lëbë':

—Re'enndo' inezindo' con cabë' rnao',

<sup>20</sup> porque bineyendo' cabë' naca pensari quio'. Re'enndo' uxi'idze'lo' nëto'.

<sup>21</sup> Cana' nayaquë' como dan' lega rexeyaquë' yeyaquë' tu ta bineyeyaquë'. Casi yugu dza puro re'yaquë' ru'eyaquë' di'idza' tacuenda idzeleyaquë' nu pensari natza'la, pensari cubitecala. Cana' bë ja ben' Atenas len ja ben' uza' yedyi tula nita' na'.

<sup>22</sup> Na'ra uzuli Pablo gatzo la'o gan re'jë' paraje quiejë' laona Areópago unë' rëbinë' leyaquë':

—Benë' quie ciudad Atenas, rlë'ëda' rionla'adyi'le diuzi zë gula.

<sup>23</sup> Cati uya'a yena'a ga rionla'adyi'le diuzi quiele, blë'ëda' tu ru'aba lë'ëna na' dyia letra rnan cani: "Ru'aba quie diuzi nitu nunu nubë'." Cana' rnën. Pues como baonale binubë'le Diuzi, quie lena' re'enda' inia' le'e quie tuzi Diuzi zu guibã.

<sup>24</sup> 'Pues lëbë' bzalönë' yedyi layu len yugulu ta de laona. Naquë' xan' lao yugulute, chi lu'u guibá, chi lao yedyi layu. Pero bizunë' lu'u idao' ta bë ja benë'.

<sup>25</sup> Bibi rdziogue Diuzi bi cosa. Pues lao na'anë' za' yela' neban quiero, za' be rzi'ro, za' yugulu ta de quiero.

<sup>26</sup> 'De tuzi be'mbyu bë Diuzi beya cue' benëchi' ta inita'yaquë' duže yedyi layu. Lëzi udixunë' bi tiempo reya'ala' zuyaquë' lao yedyi layu, udixurënë' lato quieyaquë' ga reya'ala' nita'yaquë'.

<sup>27</sup> Bënë' cana' tacuenda huero pensari inaoro xnezë', porque binacan zëdi yedzeleru xnezë' chi re'enro inaoron.

<sup>28</sup> Pues rnaban yele ca una tu ben' laguedyile, ben' uzu dza na'te, ben' rsëdi guichi. Pues lëbë' unë' cani: "Lao na'a Diuzi nebanro, rdaro, rzi'ro be." Lëzi una itu ben' laguedyile rëbinë' le'e cani: "Nacaro familia quie Diuzi, porque lëbë' runnë' yela' neban quiero."

<sup>29</sup> Neru'e Pablo di'idza' rëbinë' leyaquë':

—Chi nezile Diuzi runnë' yela' neban quiero, bireya'ala' gacale pensari de que naca Diuzi ca quie tu imagen de oro ò de plata, o de yo. De pensarizi quie yaca benë' rueyaquë' imagen quieyaquë'.

<sup>30</sup> Ba'ala'cazi bë ja ben' unita' dza na'te contra Diuzi, bibënë' castigo quieyaquë', porque biuneziyaquë' bi bëyaquë'. Pero hora na' re'en Diuzi utza' yugo ben' nita' duže yedyi layu pensari quieyaquë' inaoyaquë' xnezë'.

<sup>31</sup> Cana' re'en Diuzi porque tali na' idyin dza cati huenë' juicio duže yedyi layu. Por lena' bë Diuzi nombrar Jesús gaquë' ben' hue juicio ta yu'u ni'a xnezi. Pseban Diuzi Jesús ta inezi yugu ja benë' naca Jesús ben' hue juicio lao yugulute ben' nita' lao yedyi layu. —Cana' una Pablo gudyinë' lejë'.

<sup>32</sup> Na'ra cati be yaca ben' nita' na' ca una Pablo unë' pseban Diuzi Jesús, caora na' balayaquë' ptitojë' lëbë'. Pero ibalayaquë' unayaquë' rëbiyaquë' lëbë':

—Tu dza zeza'ra uzënegando' quio' mazera cabë' rnao'.

<sup>33</sup> Caora na' bero Pablo beza'në' ga re'yaquë',

<sup>34</sup> pero bala yaca benë' na' guleyaquë' con cabë' di'idza' unë Pablo. Entre leyaquë' zu tu ben' lao Dionisio, naquë' juez conlë yaca los demás ben' re' lu'u Areópago. Lëzi gulerë tu nigula laonë' Dámaris lente ibala ja ben' tula.

## 18

### *Cabë' guca quie Pablo dza udanë' ciudad Corinto*

<sup>1</sup> Ude beyudyi na', beza' Pablo ciudad Atenas zionë' ciudad Corinto.

<sup>2</sup> Lëciudad na' yatilanë' tu ben' Israel. Ben' na' laonë' Aquilo, naquë' ben' uza' yu nebaba Ponto. Na' ciudad Roma zu tu ben' lao Claudio, naquë' rey quie ben' romano. Na' bënë' mandado yeza' yugu ja ben' Israel ciudad Roma. Quie lena' beza' Aquilo lenë' žgulë' Priscila ciudad na', bedyinyaquë' ciudad Corintola.

<sup>3</sup> Cana' uyo Pablo yeyubinë' leyaquë' como lëzi ca dyin na' rue Aquilo lenë' žgulë', cana' ruerë Pablo. Pues bega'nlënë' leyaquë' bëlënë' leyaquë' dyin tuže reguibiyaquë' la'ari' reo ta hueyaquë' nu yu'u de la'ari' ta ta'ona.

<sup>4</sup> Na'ra yugo dza saodo rio Pablo lu'u sinagoga quie ja ben' Israel udixogue'në' leyaquë' len ben' binaca ben' Israel con cabë' rna xti'idza' Diuzi, porque gu'unne' inaojë' xneza Diuzi.

<sup>5</sup> Caora na' uza' Silas len Timoteo yu nebaba Macedonia bdyinyaquë' ciudad Corinto ga rguixogue' Pablo ja ben' Israel con cabë' rna xti'idza' Diuzi du guicho du la'adyi'në' rëbinë' leyaquë' naca Jesús ben' use'ela' Diuzi.



6 Pero yaca ben' Israel, uzulaoyaquë' rnëyaquë' di'idza' contra Pablo ptasi bnioyaquë' lëbë'. Quie lena' psisi Pablo gabán quienë' tacuenda yedyibi bëxte dyian. Cana' bënë', porque según ca naca costumbre quieyaquë', lena' nacan seña bibë yaca ben' yedyi na' cuenda ca di'idza' bënë' lëyaquë'. Quie lena' unë' rëbinë' lejë':

—Cuinzile napale dula' xquia quiele. Bibi dula' quia' nacan chi hue Diuzi castigo quiele, porque udixogui'a le'e con cabë' rnä xti'idza' Diuzi, pero le'e bigulele quia'. Na'ra usanla'adya' le'e tza' tzetixogui'a yaca ben' binaca ben' Israel con cabë' rna xti'idza' Diuzi. —Cana' una Pablo gudyinë' lejë'.

7 Caora na' beronë' lu'u sinagoga na', zionë' lidyi tu ben' lao Ticio Justo. Naca Ticio Justo ben' rionla'adyi' Diuzi, zuë' cuëta sinagoga.

8 Pero na'ra uzulao tu ben' lao Crispo, ben' xan' sinagoga na', inaonë' xneza Jesús lente familia quienë'. Lëscan' zë yaca ben' ciudad Corinto, uzulaoyaquë' inaoyaquë' xneza Jesús. Caora na' bënë' Pablo laoyaquë' yuguluyaquë'.

9 Na'ra guca tu yëla uxusa Pablo benë' unë' Jesús gudyinë' lëbë':

—Bigapo' cuidado. Biusano' rguixogue'lo' yaca benë' con cabë' rna xti'idza' Diuzi. Bicue'lo' chizi.

10 Como në'ëdi' rapa' luë', ni tu nunu saque huelë luë' chan' bi tamala re'enyacuë' hueyaquë' quio', porque yedyi niga nita' zë yaca ben' inao xneza'. —Cana' uxusa Pablo benë' una Jesús gudyinë' lëbë'.

11 Cana' guca bega'n Pablo ciudad Corinto tu iza yu gatzo na' psëdinë' yaca ben' ciudad na' con cabë' rna xti'idza' Diuzi.

12 Na'ra tiempo na' uzu tu ben' lao Galión. Naquë' gobernador quie yu nebaba Acaya. Pues yaca ben' Israel ptupayaquë' laguedyijë' bëyaquë' contra Pablo uquië'yaquë' lëbë' ga re' gobernador,

13 unayaquë' rëbiyaquë' gobernador na':

—Ben' ni rdanë' rusëdinë' benë' netza'la ca reya'ala' tzionla'adyi'yaquë' Diuzi. Ca rusëdinë' benë' binacan tuzi con cabë' rna ley quiero.

14 Caora na' binesulao Pablo inënë' caora unë' Galión rëbinë' yaca ben' Israel:

—Chi naquë' ben' de dula' xquia huala quie, o chi bënë' tu tamala gula, pues bibi zëdi de hua' reglo quiele.

15 Pero como racale huedila quie di'idza', quie lao benë', quie lao ley quiele, pues ulehue reglo de entre le'ezi, porque bire'enda' gaca' juez quie ley quiele.

16 Caora na' bebionë' leyaquë' gan' re'në' na'.

17 Na'ra bëxyaquië' tu ben' lao Sóstenes, porque naquë' xan' sinagoga na', bë'yaquë' lëbë' zi' lao ga re' gobernador na'. Pero gobernador na', gabi cuenda bënë' dan' bëyaquë' cana'.

### *Bedyin Pablo ciudad Antioquia tatula*

18 Pero Pablo na' bega'nnë' na' zë dza. Uderala bënë' tu despedida yaca ben' quie Jesús nita' ciudad Corinto, beza'në' zeyonë' uquië'në' Aquilo len Priscila bdyinyaquë' Cencrea na' ga pchibi Pablo guichonë' garë'te ta gaca seña de que abzunë' di'idza' ca bega'n lënë' Diuzi dza na'te. Caora na' uyu'ulënë' Aquilo len Priscila lu'u barco zioyaquë' tu ciudad nebaba Siria laona Efeso.

19 Cati bdyinyaquë' ciudad na', psan Pablo leyaquë' na' uyonë' lu'u sinagoga ga bë'lenë' yaca ben' Israel di'idza', yaca ben' bedupa na'.

20 Caora na' unabayaquë' yega'n Pablo len leyaquë' zidza, pero bigu'unnë' yega'nnë' na'.

21 Cana' bē'nē' leyaquē' tu despedida ta yeza'nē', na' unē' gudyinē' leyaquē':

—Reya'ala' tza'a ciudad Jerusalén, porque baza' tu lani. Pero chi Diuzi gunnē' lato decazide huida' ideyuba' le'e. —Cana' una Pablo caora beza'nē'. Na' uyu'u Pablo lu'u barco beza'nē' ciudad Efeso zionē' ciudad Cesarea.

22 Tu bedezinē' ciudad Cesarea uyonē' ciudad Jerusalén yeyubinē' yaca ben' nao xneza Jesús nita' na' yegapanē' lejē' diuzi. Caora na' beza'nē' zeyonē' ciudad Antioquia.

23 Pues na' uzunē' chopa tzona dza. Ude na', uza'nē' udanē' tu tu yedyi nebaba Galicia len tu tu yedyi nebaba Frigia, bē'nē' di'idza' zela'adyi' yaca ben' nao xneza Jesús nita' tu tu yedyi con ga udenē'.

### *Bdyin Apolos ciudad Efeso udixogue'nē' benē' con cabē' rna xti'idza' Diuzi*

24 Na'ra tiempo na' uzu tu ben' Israel, ben' lao Apolos. Naquē' ben' ciudad Alejandria. Na' bdyinnē' ciudad Efeso rguixogue'nē' benē' con cabē' rna xti'idza' Diuzi, porque dyē'ēdi' nezinē' cabē' rnēn lē'ē guichi la'iya quie Diuzi.

25 Lēzi nezinē' xneza Jesús. Dyē'ēdi gula udixogue'nē' psēdinē' benē' ca naca quie Jesús, ba'ala'cazi tuzi ca bē' Juan lao benē' nubē'nē' psēdinē' benē'.

26 Na'ra birdzebinē' rguixogue'nē' con cabē' rna xti'idza' Diuzi lu'u sinagoga na' zu yedyi na'. Però cati be Aquilo len Priscila di'idza' ru'enē', caora na' uquiē'yaquē' lēbē' lidyiaquē' ga pxidze'yaquē' lēbē' mazera bala ta binenezinē' quie xneza Diuzi.

27 Caora cati bdyin dza gu'un Apolos tzionē' yu nebaba Acaya, gualē yaca ben' nao xneza Jesús lēbē', bē'yaquē' lēbē' tu guichi ta hua'nē' lao yaca ben' nao xneza Jesús nita' yedyi nebaba Acaya tacuenda na' yezi'yaquē' lēbē' dyē'ēdi zan yu'u quieyaquē'. Cana' uza'nē' zionē' bdyinnē' ja yedyi nebaba Acaya. Dyē'ēdi gula gualēnē' ja ben' nita' na', ben' nao xneza Jesús, porque bē Diuzi tu tahuen quiejē' bdze'nē' leyaquē' pensari inaojē' xnezē'.

28 Pues lao catu yaca ben' nita' na' bdze'nē' di'idza' claro gula de que uquixi ja ben' Israel bire'enjē' inaojē' xneza Jesús. Tantozi udixogue'nē' leyaquē' dyē'ēdi gula con cabē' rna xti'idza' Diuzi, biubinyaquē' bi nayaquē' ta yequēbiyaquē' inayaquē' lēbē'. Con cabē' rnēn lē'ē guichi la'iya quie Diuzi, pxi'idze'nē' leyaquē' de que naca Jesús ben' ute usela yaca ben' Israel.

## 19

### *Con cabē' bē Pablo cati udanē' ciudad Efeso*

1 Na'ra tu nerda Apolos ciudad Corinto zio Pablo tu bedezinē' ga nacan puro ya'a bdyinnē' ciudad Efeso. Lēciudad na' yatilanē' chopa tzona ben' nao xneza Juan bautista. Pero bineneziaquē' chi zu Bichi Be quie Diuzi.

2 Quie lena' una Pablo rēbinē' leyaquē':

—¿Yyu'ule Bichi Be quie Diuzi caora ptza'le pensari quiele uzulaole rnaole xneza Diuzi?

Pues na' bequēbiyaquē' nayaquē':

—Ni siquiera binezindo' chi zu Bichi Be quie Diuzi.

3 Na' unaba Pablo leyaquē' tatula:

—¿Nuzi bē' laole dza na', chi'?

Na' bequēbiyaquē' rēbijē' lēbē':

—Bē' Juan bautista laondo' con cabē' unanē' nēto'.

4 Na'ra una Pablo rēbinē' leyaquē':

—Bè' Juan bautista lao nu ben' ptza' pensari quie, ben' re'en inao xneza Diuzi. Pero lèzi gudyinè' yaca ben' bè'nè' laohue de que reya'ala' inaojè' neza quie tu ben' zaza'ra, tu ben' lao Jesús. —Cana' una Pablo gudyinè' lejè'.

<sup>5</sup> Pues cati beyaquè' cabè' di'idza' ru'e Pablo, na' bè' Pablo laoyaquè' bzètonè' lao Señor quiero Jesús.

<sup>6</sup> Bizi cati pquichi Pablo na'anè' guichoyaquè', caora na' uyu'u Bichi Be quie Diuzi leyaquè'. Quie lena' uzulaoyaquè' ru'eyaquè' di'idza' quie ben' tula, bè'yaquè' di'idza' binaca di'idza' quieyaquè', unayaquè' con cabè' pensari bdze' Diuzi lu'u guicho laxta'oyaquè'.

<sup>7</sup> Pues ca tu yaca ben' bè' Pablo laohue, naca chipchopayaquè'.

<sup>8</sup> Na'ra lao tzona biu' uzu Pablo ciudad na' rionè' lu'u sinagoga quie ja ben' na'. Birdzebinè' rudze'nè' di'idza' laoyaquè' gudyinè' leyaquè' reya'ala' inaoyaquè' xneza Diuzi.

<sup>9</sup> Pero bala ben' zu na' gucajè' yaladyi'. Bigu'unjè' galejè' con cabè' rna xti'idza' Diuzi, dechan' uzulaoyaquè' rnèyaquè' di'idza' contra xneza Jesús lao yaca ben' ciudad na'. Quie lena' psanla'adyi' Pablo leyaquè' ga nita'jè' na'. Uquiè'nè' yaca ben' nao xneza Jesús zioyaquè' ga zu tu yu'u escuela quie tu ben' lao Tiranno. Pues yugu dza bè'lèné' benè' di'idza' lu'u yu'u escuela na'.

<sup>10</sup> Cana' guca bega'n Pablo yedyi na' psèdinè' leyaquè' lao chopa iza cuenda na' be yaca ben' nita' ja ciudad nebaba Asia xti'idza' Señor quiero, chi ben' Israel, chi ben' tula.

<sup>11</sup> Na'ra gualè Diuzi Pablo, bè'nè' yela' milagro quienè'

<sup>12</sup> hasta que yehua'a benè' nu bayo o chi nu žaba Pablo ga de ben' raza žhue'. Pues con lèzin beyacajè', bero ja taxi'ibi' yu'uyaquè'.

<sup>13</sup> Na'ra guca dza na' rda chopa tzona yaca ben' Israel tu tu yedyi, ben' rebio yaca taxi'ibi' yu'u yaca benè'. Pues gu'unyaquè' hueyaquè' uzètoyaquè' lao Señor quiero Jesús ta yero taxi'ibi' yu'u ja benè'. Quie lena' unayaquè' rèbियाquè' taxi'ibi' yu'u yaca ben' na':

—Rzètondo' lao Jesús, ben' rguixogue' Pablo di'idza' quie, ta yerolo' gan' yu'ulo'.

<sup>14</sup> Cana' bè yaca lao gadyi ži'i tu ben' lao Esceva. Naca Esceva ben' Israel. Lèscan' naquè' xan' pxuzi.

<sup>15</sup> Caora cati gudyiyaquè' taxi'ibi' cana', bequèbi taxi'ibi' na' gudyin leyaquè':

—Nubè'caza' Jesús, lèzi nubè'caza' Pablo, pero le'e, žnuži nacale? —Cana' una taxi'ibi' gudyin leyaquè'.

<sup>16</sup> Na'ra ben' yu'u taxi'ibi' na', labèxotenè' leyaquè' bè'nè' quieyaquè'. Tanzozi bè'nè' leyaquè' ži', bežunoyaquè' du ga'ala' guidiyaquè'. Du nacayaquè' hue' bedyinjè' žan yu'ute quieyaquè' ži'.

<sup>17</sup> Na' cati be yaca ben' nita' ciudad Efeso cabè' guca quie ži'i Esceva, legazi bdzebियाquè'. Cana' gucayaquè' pensari naca Señor quiero Jesús ben' že, ben' de yela' huaca quie.

<sup>18</sup> Lèzi žè yaca ben' nao xneza Jesús na', bicala ta median babèyaquè' dza na'la, uxubalèpiyaquè'.

<sup>19</sup> Cana' bèrè žè yaca ben' nao rusèdi yela' brujo. Nu'ayaquè' libro yela' ben' brujo quieyaquè' bzeiyaquè'n lao yaca ben' yedyi nita' na'. Pues bira unaojè' quie yela' brujo quiejè'. Caora cati bebiojè' cuenda ca tu zaca' ja libro na', zaca'n cadu gatzo gayuhua mila dumi plata.

<sup>20</sup> Cana' guca bžera ben' nao xneza Jesús. Du guicho du la'adyi'yaquè' unaoyaquè' xnezè'.

21 Pues bē' beyudyi guca cana', na'ra psaque' Pablo tzionē' tzeyubinē' yaca ben' quie Jesús nita' ja ciudad nebaba Macedonia len ja ben' nao xneza Jesús nita' ciudad nebaba Acaya. Lēzi gu'unnē' tziorēnē' ciudad Jerusalén. Na' unē' gudyinē' lejē':

—Huayoro ciudad Jerusalén, te na' tziorēro ciudad Roma.

22 Caora na' use'ela' Pablo chopa ben' racalē lēbē', use'elē' Timoteo len itu ben' lao Erasto. Bēnē' mandado tzioyaquē' yu nebaba Macedonia. Pero Pablo na' bega'nnē' ichopa tzona dza yu nebaba Asia na'.

*Cabē' guca, guca zēdi quie ben' quie Jesús, ben' nita' ciudad Efeso*

23 Na'ra tiempo na' uzulao ja ben' ciudad Efeso rueyaquē' contra ben' nao xneza Jesús.

24 Pues dyin quie tu ben' lao Demetrio uzulaojē' ruejē' contra lejē'. Nacan negocio quie Demetrio ruenē' idao' bižu quie diuzi quieyaquē' lao Diana. De puro plata ruzaloyaquē'n ta ta'onan. Quie lena' dumi zē ruenē' gan lente ja ben' ruelē lēbē' negocio na'.

25 Caora na' bedupalēnē' yaca ben' ruelēnē' negocio, unē' rēbinē' leyaquē': —Señores, dyē'ēdi nezile con ca dyin na' naoro dan' ruero gan dumi zē quiero.

26 Lēzi dyē'ēdi nezile con cabē' rue ben' lao Pablo. Pues rdanē' nē' de que yaca diuzi rue ja benē', binacayaquē' diuzi. Pues como rdanē' rēbinē' ja benē' cana', abēnē' gan apsan ben' zē costumbre quiero, barnaoyaquē' con cabē' rna Pablo. Na' cala tuzi ciudad quiero rdanē' ruenē' cana', lēscan' casi duže yedyi nebaba Asia rdanē'.

27 Quie lena' zudyi gula nacan huabiagui' negocio quiero. Lēscan' nacarēn zudyi idyin dza bira gapala'n benē' idao' quie Diana quiero, bira tzionla'adyi'yaquē' lēbē'. Bireya'ala' usanro gacan cana', porque duže yedyi nebaba Asia lente yaca los demás yedyi layu rionla'adyi'yaquē' Diana quiero.

28 Na'ra bē' beyudyi beyaquē' con cabē' una Demetrio, legazi bdza'yaquē'. Hora na' unēyaquē' zidzo unayaquē':

—¡Viva Diana. Naquē' diuzi quie ra'o ben' Efeso!

29 Pues dan' gucan cana', legazi uyu'u yaca ben' yedyi ru'be. Caora na' bēxoyaquē' chopa ben' uza' yu nebaba Macedonia, yaca ben' dzaga Pablo, tu ben' lao Gayo, len itu ben' lao Aristarco. Pues udubajē' leyaquē' layu psedyinjē' leyaquē' ga rdupa ben' yedyi na' ta rueyaquē' junta.

30 Na'ra gu'un Pablo tzionē' ga babedupa ja ben' yedyi ta hue'lēnē' leyaquē' di'idza', pero bipsan yaca ben' nao xneza Jesús lēbē' tzionē' na'.

31 Lēzi bala yaca ben' rnabē' quie yu nebaba Asia, nacayaquē' amigo quienē', unēyueyaquē' lēbē' de que bireya'ala' tzu'unē' ga babedupa yaca ben' yedyi.

32 Pues entre yaca ben' nita' na', balajē' unēyaquē' zidzo di'idza' udeudela. Ibalajē' unējē' natza'la, porque yaca benē' na' legazi uyu'ujē' ru'be, nica bineziyaquē' bixquien' dan' bedupajē' na'.

33 Caora na' balayaquē' entre yaca benē' nita' na' pxi'idze'yaquē' tu ben' lao Alejandro bixquien' bdza' ja ben' ciudad Efeso. Na' gudyiyaquē' lēbē' de que tal como bdza' ben' ciudad Efeso conlē ben' nao xneza Jesús, lēscan' bdza'rēyaquē' conlē ben' Israel nita' ciudad Efeso. Quie lena' bdyiga yaca ben' Israel Alejandro tacuenda zēnē' zaquē'lao lao yaca ben' bedupa na' tacuenda huenē' cule huenē' defender ben' Israel. Na'ra bē Alejandro seña con na'anē' tacuenda inita'yaquē' chizi yeyaquē' di'idza' re'ennē' inē'.

<sup>34</sup> Pero cati gucabè'yaquè' nacarè Alejandro ben' Israel, hora na' cadu lao chopa hora unèyaquè' zidzo unayaquè':

—¡Viva Diana! ¡Naquè' diuzi quie ra'o, ben' Efeso!

<sup>35</sup> Na'ra ben' naca secretario quie ciudad na', caora bènè' gan ulezarè yaca ben' nita' na', hora na' unè' rëbinè' leyaquè':

—Benè' ciudad Efeso, rnìa' le'e de que yugu ben' nita' ja yedyi layu, dyè'èdi neziyaquè' de que ra'o, ben' ciudad Efeso, nacan quiero ta gaparo idao' quie diuzi Diana len imagen quienè' ta bguino guibá dza na'te.

<sup>36</sup> Na'ra como nitu, nitu, nunu inè' binacan cana', pues ulehue pensari dyè'èdi cabè' re'enle huele. Mejorla bira huele zèdi.

<sup>37</sup> Pues yaca ben' dehua'ale niga, cala ulanyaquè' quie idao' quiero, cala unayaquè' di'idza' xi'ibi' contra diuzi quiero.

<sup>38</sup> Na'ra chi Demetrio lènè' nu ben' ruelènè' dyin, chi de nu causa quieyaquè' contra nutezi benè', reya'ala' tzioyaquè' ga re' ja ben' r nabè' tacuenda gaonè' leyaquè' xquia lao juez. Pues lao ben' r nabè' reya'ala' gaoro benè' xquia, quele niga.

<sup>39</sup> Pues chi re'en Demetrio gaonè' leyaquè' xquia niga ga reduparo, reya'ala' cuezè' hasta idyin dza gaca junta con cabè' rna ley quiero.

<sup>40</sup> Pues rue zudyi gao ben' quie gobierno ra'o xquia con cabè' guca na'adza. Rue zudyi inayaquè' re'enro tilalero gobierno. Pues, chan' inaba ben' quie gobierno le'e bixquien' bedupale bèle zèdi na'adza, ¿bizi yèbilyaquè'?

<sup>41</sup> Pues cana' una ben' secretario gudyinè' ben' Efeso. Na'ra ude beyudyi na', bènè' mandado bedzatzayaquè' yeyoyaquè' zan yu'u quie quieyaquè'.

## 20

*Cabè' guca caora uza' Pablo zionè'yaca ciudad nebaba Macedonia len yaca ciudad nebaba Grecia*

<sup>1</sup> Na'ra bè' beyudyi tazèdi guca quiejè' na', beyèzi Pablo yaca ben' nao xneza Jesús tacuenda inèyuenè' leyaquè'. Ude beyudyi na', udèdyinè' leyaquè' bè'nè' tu despedida. Hora na' uza'nè' zionè' yaca ciudad ga nebaba Macedonia.

<sup>2</sup> Pues uyonè' yeyubinè' yaca ben' nao xneza Jesús, ben' nita' ja ciudad na', bè'nè' leyaquè' di'idza' žela'adyi' ta inaoyaquè' mazera xneza Jesús. Beyudyi na' beza'nè' zioquè' bdyinnè' yaca ciudad ga nebaba Grecia.

<sup>3</sup> Na' ga bega'nnè' tzona biu'. Gu'unnè' tzu'unè' lu'u barco ta tzionè' yaca yedyi nebaba Siria, pero como nezinè' bare'en yaca ben' Israel gutiyaquè' lèbè', bebi'zinè' zeyoguè' bedenè' yaca yedyi ga nebaba Macedonia tatula.

<sup>4</sup> Uquiè'nè' tu ben' lao Sópater, ben' ciudad Berea, len Aristarco, len Segundo, ben' ciudad Tesalónica, len Gayo, ben' ciudad Derbe, len Timoteo, len chopa ben' nebaba Asia, tunè' laonè' Tíquico, itunè' laonè' Trófimo.

<sup>5</sup> Na'ra yaca ben' na', caora bedyinyaquè' ciudad Filipos, tu bedeziyaquè' udyialaoyaquè' zioyaquè' ciudad Troas. Na' ulezayaquè' tu raca bdyin Pablo, porque ciudad Filipos bega'nnè' bedilanè' nè'èdi', Lucas, ben' bdyia di'idza' lè'è guichi ni.

<sup>6</sup> Cana' bega'nnò' ciudad Filipos hasta dza ude lani cati reza'la'adyi' ben' Israel cabè' guca desde cana'te beza' yaca xuzixta'ojè' nación Egipto. Ude beyudyi na', uza'ndo' con lu'u barco ziondo' ciudad Troas. Pues lao ga'yo' dza bdyinndo' ciudad Troas na', bedilando' yaca ben' udyialao nètò'. Na' bega'nnò' cadu gadyi dza.

*Cabè' guca yeyubi Pablo yaca ben' nao xneza Jesús, ben' nita' ciudad Troas*

<sup>7</sup> Caora na' dza domingo na', bedupalëndo' yaca los demás ben' nao xneza Jesús tacuenda užuzundo' yëta xtila gaondo'n yeza'la'adyi'ndo' Jesús. Lëzi uzulao Pablo na' rusëdinë' nëto' mazera, pero como hueza'në' yeteyu na', hasta bdyin gatzo yëla ru'elëzinë' nëto' di'idza'.

<sup>8</sup> Caora na' nita'ndo' tu lu'u cuarto de tzona xcuija ga ra'ala' zë yëri yaga.

<sup>9</sup> Lëscan' na' re' tu bi'byu, bi' ru'abe laobi' Eutico. Re'bi' tu ru'a bentan zu ga nita'ndo' na'. Na'ra como Pablo na' neru'enë' di'idza' mazera, na' unan gasi bi' ru'abe na'. Pues du rasibi', cati bguinobi' ru'a bentan lao tzona xcuija ga re'bi' na'te. Caora na' bechisayaquë'bi', pero natibi'.

<sup>10</sup> Quie lena' uyëzi Pablo zionë' ga udixojë'bi' na' byëchonë' udëdyinë'bi' unë' gudyinë' yaca ben' nao xneza Jesús nita'ja na':

—Bidzebile, nenebambi'.

<sup>11</sup> Caora na', bebë Pablo tatula lu'u cuarto de tzona xcuija. Lëgan' na' udaondo' yugutendo' tuze, bzuzundo' yëta xtila beza'la'adyi'ndo' Jesús, bë'zi Pablo di'idza' tatula hasta que uyeni' na'. Ude beyudyinë' beza'në' zeyonë'.

<sup>12</sup> Pero yaca ben' nita' na', blë'ëyaquë' nabamcazi bi' bguino na' bequi'yaquë'. Quie lena' yugutejë' legazi redaohueyaquë' cabë' guca na'.

### *Ca guca uza' Pablo len compañero quienë' ciudad Troas bdyinyaquë' ciudad Mileto*

<sup>13</sup> Na'ra nëto' udyialaondo' uyondo' con lu'u barco ta idyinndo' ciudad Asón ta cuezando' guida Pablo, porque gu'unnë' tzionë' puro tu neza. Bigu'unnë' tzionë' lu'u barco. Quie lena' bega'nlëndo' lëbë' di'idza' yedilando' lëbë' ciudad Asón.

<sup>14</sup> Bizi na' caora bedilando' Pablo ciudad na', uyu'ulëndo' Pablo lu'u barco uyondo' yugulundo' ciudad Mitleto.

<sup>15</sup> Na'ra tu bedezindo' ciudad na', beteyu tula, udendo' yu nebaba Quío. Na' beteyu tatula, bdyinndo' ga nacan ga'ala' para tu ciudad laona Samos. Na'ra como biuzaque' idyinndo' mero ciudad Samos, bega'nndo' tu yëla ciudad Trogilio. Na' beteyu tatula, bdyinndo' ciudad Mileto.

<sup>16</sup> Biuyondo' ciudad Efeso, porque bigu'un Pablo sunë' zidza yu nebaba Asia. Pero chi saque'në', re'ennë' yedyinbachinë' ciudad Jerusalén tacuenda sunë' na' cati idyin dza ga'ala' lani quie usecho quie trigo laonan lani Pentecostés.

### *Ca di'idza' bdze' Pablo gudyinë' yaca ben' napa dyin, yaca ben' nao xneza Jesús nita' ciudad Efeso*

<sup>17</sup> Na'ra cati bdyinndo' ciudad Mileto, guzi Pablo yaca ben' napa dyin, yaca ben' nao xneza Jesús nita' ciudad Efeso.

<sup>18</sup> Caora banita'jë' lao Pablo na' unë' rëbinë' leyaquë' cani:

—Dyë'ëdi nezile con cabë' bia' laole desde primero cati bdyina' yaca ciudad nebaba Asia.

<sup>19</sup> Pues con catu dza uzulia' le'e, bia' dyin quie Diuzi. Guca' gaxo conlë le'e hasta uredya' bedzagalaohua' nun quie dan' gu'un ja ben' Israel gutiyaquë' në'ëdi'.

<sup>20</sup> Udixogui'a le'e yugute ta huen huen quiele. Uya' lu'u yu'u quie quiele apsëdia' le'e con cabë' rna xti'idza' Jesús.

<sup>21</sup> Udixogui'a ben' Israel len ben' binaca ben' Israel de que reya'ala' hue quiejë' xti'idza' Diuzi, reya'ala' inaojë' xneza Jesús, ben' naca Señor quiero.

<sup>22</sup> Na'ra abдын hora yeya'a ciudad Jerusalén. Ni siquiera nezda' chan' bi tamala gaca quia' ga tza'a. Pero mandado quie Bichi Be quie Diuzi uzua' di'idza' tza'a.

<sup>23</sup> Nacan seguro udze' benë' në'ëdi' dyiguiba. Nacan seguro yedzagalao-hua', porque cana' baona Bichi Be quie Diuzi në'ëdi' tu tu yedyi ga rda'a.

<sup>24</sup> Pero birdëbida' bi gaca quia'. Zua' dispuesto gatia'. Decazide re'enda' useyudya' con gusto ca comisión pca'n Señor quiero lao na'a ta quixogui'a benë' con cabë' rna xti'idza' Diuzi ta ineziyaquë' nedyë'ë Diuzi leyaquë'.

<sup>25</sup> 'Nezda' dyë'ëdi nitu, nitule, bira yedilale në'ëdi'.

<sup>26</sup> Udixogui'a le'e con cabë' rna xti'idza' Diuzi. Quie lena' re'enda' inia' le'e de que cala dula' quia' chan' bihue quiele xti'idza' Diuzi,

<sup>27</sup> porque udixogue'caza' le'e dužete con cabë' rna xti'idza' Diuzi, nitu di'idza' bipcacha' ca tu ta rnën lë'ë guichi la'ia ya quienë'.

<sup>28</sup> Gapale cuidado ta inaole dyë'ëdi xneza Jesús. Rapale yaca los demás ben' nao xneza Jesús, porque ulio Bichi Be quie Diuzi le'e ta gapaleyaquë' ca rapa xan' beco' zi'ila' yaca beco' zi'ila' quienë', como por leyaquë' aguti Jesús lë'ë yaga cruzo.

<sup>29</sup> Dyë'ëdi banezda' de que caora azeya'a, huida yaca ben' hue ca rue lobo, utzatzayaquë' hueyaquë' zëdi yaca ben' nao xneza Jesús.

<sup>30</sup> Lëscan' rnia' le'e de que entre le'ezi huario ben' huazi' ben' nao xneza Jesús yë' tacuenda inaojë' neza tula.

<sup>31</sup> Gapale cuidado. Bigala'adyi'le como lao tzona iza bipsanla'adya' le'e unëyuecaza' le'e du dza, du yëla, hasta uredya' por le'e.

<sup>32</sup> 'Hora na', bicha', rnia' le'e huele cuenda quie Diuzi, lëscan' hue quiele xti'idza'në', porque nedyë'ë Diuzi le'e. Napa xti'idza' Diuzi poder ta gacalën le'e inaorale xnezë'. Lëscan' napan poder ta gacalën le'e gata' quiele yugulu ta re'en Diuzi gunnë' le'e, len yugulu los demás ben' naca ben' la'ia quienë'.

<sup>33</sup> Na'ra biunaba' gunle ni žabale, ni dumi.

<sup>34</sup> Dyë'ëdi nezile bia' dyin ta gata' dumi hua' gasto quia' lente gasto quie yaca ben' dzaga në'ëdi'.

<sup>35</sup> Bia' cana' ta gaca tu ejemplo cabë' reya'ala' huele dyin tacuenda gacalële ben' bibi de quie. Bigala'adyi'le ca una Señor quiero caora unë': "Nacara dya'a quiero gacalëro benë', quele ca ta si'ro quie benë'."

<sup>36</sup> Pues ude beyudyi una Pablo cana', uditzonë' žibinë' bë'lënë' Diuzi di'idza' conlë yaca ben' napa dyin, yaca ben' nao xneza Jesús nita' ciudad Efeso.

<sup>37</sup> Caora na' uredyiaquë' udedyiaquë' Pablo udaoyaquë' xaguë' situ.

<sup>38</sup> Legazi raqueyaquë' bayëchi', dan' gudyinë' lejë': "Nitu, nitule, bira yedilale në'ëdi'." Na'ra uyolëyaquë' Pablo yesanjë' lëbë' hasta ga iyu'unë' lu'u barcote.

## 21

### *Ca guca zio Pablo ciudad Jerusalén*

<sup>1</sup> Na'ra bë'ndo' ja ben' nao xneza Jesús, ben' nita' ciudad Efeso, tu despedida. Ude beyudyi na', ziondo' tu lu'u barco bdyinndo' ciudad Cos. Caora beteyuna', uza'ndo' bdyinndo' ciudad Rodas. Tu bedezindo' ciudad Rodas, bdyinndo' ciudad Pátara.

<sup>2</sup> Na' ciudad Pátara bedilando' tu barco ta zio yu nebaba Fenicia. Caora na' yu'undo' barco na' ziondo'.

<sup>3</sup> Neziondo' lu'u barco cati blë'ëndo' isla Chipre re'n zaquë' yega', pero tu bedezindo' isla Chipre bdyinndo' yu nebaba Siria. Pero como barco na' nu'an yua' ta uca'nnan ciudad Tiro, berondo' lu'u barco na'.

<sup>4</sup> Caora na' uyondo' yena'ndo' yaca ben' nao xneza Jesús, yaca ben' nita' ciudad na'. Biži bega'nndo' len leyaquë' lao gadyi dza. Na' unayaquë'

gudiyiaquë' Pablo de que bireya'ala' tzionë' ciudad Jerusalén como baona Bichi Be quie Diuzi leyaquë' bi gaca quie Pablo dza zaza'ra.

5 Na'ra baoca gadyi dza zundo' na', beza'ndo', pero yugu ben' nao xneza Jesús, ben' nita' na', len yaca žgulayaquë', len yaca xcuidi' quiejë', za'lëyaquë' nëto' hasta ru'a yedyite. Caora na' lao yožo ru'a nisadao' na', uditzondo' žibindo' blidzando' Diuzi.

6 Na'ra bë'ndo' lejë' tu despedida udedyindo' leyaquë'. Na' beza'ndo' uyu'undo' lu'u barco tatula. Caora na' bedzatzajë' zeyojë' žan yu'u quie quiejë'.

7 Pero nëto' uza'ndo' ciudad Tiro ziondo' bdyinndo' ciudad Tolemada ga berondo' lu'u barco. Pues ciudad Tolemada na' bgapando' diuzi yaca bichiro ben' nao xneza Jesús, ben' nita' na'. Na' bega'nlëndo' lejë' tu yëla.

8 Na'ra beteyu na', uza'lëndo' Pablo ni'ando' len yaca los demás ben' dzaga nëto' bdyinndo' ciudad Cesarea. Caora na' uyondo' žan yu'u quie tu ben' lao Felipe. Naquë' ben' rio yedyi tula ratixogue'në' benë' con cabë' rna xti'idza' Diuzi. Lëzi naquë' ben' ru'e laze ta gao ja nigula bizu xquihue de entre ja ben' nao xneza Jesús. Entre ja ben' ru'e laze naca gadyijë'. Na' bega'nlëndo' lëbë'.

9 Pues lidyí Felipe na' nita'rë tapa ži'inë' nigula, puro bi' ru'abe yaca. Lëzi rguixogue'rëjabi' benë' di'idza' con ca rna Diuzi. Ruejabi' cabë' bë ja ben' profeta, ben' ulio Diuzi unita' tiempote.

10 Na'ra aoca chopa tzona dza zundo' yedyi na', cati bla' tu ben' profeta laonë' Agabo. Uza'në' estado Judea

11 bla'në' deyubinë' nëto'. Hora na' uži'në' cincho quie Pablo pquionë'n cuinnë' unë' rëbinë' nëto':

—Yaca ben' Israel, ben' nita' ciudad Jerusalén, uquiojë' xan' cincho ni cabë' pquioğa' cuina', usedyinyaquë' lëbë' lao na'a ja ben' romano. Cana' baona Bichi Be quie Diuzi në'ëdi'.

12 Caora bendo' di'idza' una Agabo, caora na' nëto' len yaca los demás ben' nao xneza Jesús, ben' nita' ciudad Cesarea na', unëyëchi'ndo' rëbindo' Pablo: —Mejorla bira tzio' ciudad Jerusalén.

13 Pero bequëbi Pablo rëbinë' nëto':

—Bicuedyile uzuyëchi'le në'ëdi'. Zucaza' dispuesto bitezi ta gaca quia' ciudad Jerusalén por nun quie Señor Jesús, chi uquiojë' në'ëdi', chi gutiyaquë' në'ëdi'.

14 Pues como bibëndo' gan udzundo'në', quie lena' gudyindo'në':

—Gaca quio' ca re'en Diuzi.

15 Beyudyi bëndo' puesto quiendo', ziondo' ciudad Jerusalén.

16 Lëzi za'lë bala ben' nao xneza Jesús, ben' nita' ciudad Cesarea, nëto'. Na'ra ciudad Jerusalén bdyinndo' lidyí tu ben' lao Mnasón, ben' uza' Isla Chipre. Bazio žë iza naquë' ben' nao xneza Jesús.

### *Cabë' guca uyo Pablo yeyubinë' Santiago*

17 Na'ra yaca bichiro, ben' nao xneza Jesús, ben' nita' ciudad Jerusalén na', bë' bdyinndo' na', dyë'ëdi gula bgapayaquë' nëto' diuzi.

18 Caora beteyu na' dza tula, uyo'lëndo' Pablo yeyubindo' tu ben' lao Santiago zu na'. Lëzi na' beduparë yaca ben' napa dyin quie ja ben' nao xneza Jesús, ben' nita' ciudad Jerusalén.

19 Caora na' bgapa Pablo leyaquë' diuzi bë'lënë' leyaquë' di'idza' rëbinë' lejë' yugu con cabë' bë Diuzi gualënë' lëbë' uduxogue'në' ben' binaca ben' Israel con cabë' rna xti'idza' Diuzi.



20 Biži cati beyaquë' di'idza' na' cabë' una Pablo, bējë' Diuzi ben' že. Beyudyi na', unayaquë' rëbiyaquë' Pablo:

—Bicha', tahuen gula babëlo'. Banezo' de que entre yaca ben' Israel nita'cazi zë mila yaca ben' barnao xneza Jesús, pero re'entzegueyaquë' inao yugulu benë' ca rna lao ley pca'n Diuzi lao na'a Moisés dza na'te.

21 Baneziyaquë' de que luë' rsëdio' yaca ben' Israel nita' yedyi quie ben' tula de que bira nacan zi naojë' ca rna lao ley pca'n Diuzi lao na'a Moisés. Lëscan' baneziyaquë' rnao' de que bira nacan zi uzuyaquë' tu xëdyidao' ži'iyaquë', ni siquiera ta inaoyaquë' ca naca costumbre gula quiero.

22 Na'ra žbizi huero? Pues huaneziyaquë' bazao'.

23 Mejorla huelo' ca inando' luë'. Entre nëto' ni nita' tapa ja be'mbyu, ben' binehue cumplir tu di'idza' bë'lëyaquë' Diuzi dza na'te.

24 Pues na' uquië'jë' uyolëjë' lu'u idao' rna bë'ra, huu' gasto quiejë' tacuenda ichugojë' guitza' guichojë' tzhua'ajë' lu'u idao' rna bë'ra gun quie Diuzi. Lëscan' luë' tzhua'alo' gun quie Diuzi lu'u idao' rna bë'ra. Cana' huelo' tacuenda na' ilë'ë yaca benë' de que rnaocazo' costumbre quiero.

25 Babëcazindo' tu guichi use'ela'ndo' lao yaca ben' binaca ben' Israel, ben' barnao xneza Jesús, gudyindo'jë' ca naca pensari quiero de que bireya'ala' gaojë' bë'ëla' bdyia benë' ru'aba ta bë'yaquë' ídolo quiejë'. Lëzi bireya'ala' gaorëyaquë' bë'ëla' quie nu bia bibro ren quie hora gutiba', ni siquiera ren quieba'. Lëscana' bireya'ala' gatalëjë' nigula binaca žgulajë'. —Pues cana' unayaquë' gudyijë' Pablo.

### *Bëxo yaca benë' Pablo lu'u idao' rna bë'ra bējë' lëbë' preso*

26 Caora beteyu dza tula, bë Pablo gasto quie tapa ben' zu na' tacuenda tzahua'ayaquë' gun quie Diuzi lu'u idao' rna bë'ra. Ude beyudyi na', uquië' Pablo leyaquë' zioyaquë' lu'u idao' rna bë'ra tacuenda tetixogue'në' yaca pxuzi bi dza tzhua'ajë' gun quie Diuzi lu'u idao' rna bë'ra.

27 Pues cana' bzujë' di'idza' huejë' lao gadyi dza, pero binedila lao gadyi dza caora blë'ë yaca ben' uza' ja ciudad nebaba Asia rda Pablo lu'u idao' rna bë'ra. Caora na' bdza'jë' betupajë' laguedyijë' bëxoyaquë' Pablo.

28 Caora na' unëyaquë' židzo unayaquë':

—žUlegalë nëto', le'e ben' Israel! Abëxondo' ben' ni, porque lëbë' rdanë' duže yedyi layu rnënë' contra ra'o, rnënë' contra ley pca'n Diuzi lao na'a xuzixta'oro Moisés, rnënë' contra idao' rna bë'ra quiero. Pues ptitonë' idao' rna bë'ra quiero como uquië'në' ben' griego, ben' binaca ben' Israel, lu'e ni.

29 Cana' unayaquë', porque blë'ëyaquë' ciudad na' rdalë Pablo tu ben' griego lao Tróximo. Naquë' ben' ciudad Efeso. Quie lena' racajë' pensari de que uquië' Pablo lëbë' lu'u idao' rna bë'ra na'.

30 Na'ra como bdza' zë ben' ciudad na', labedupatejë' uyu'ujë' bebiojë' Pablo lu'u idao' rna bë'ra lapsiojë' puerta idao' rna bë'ra na'.

31 Na' barutiyaquë' Pablo caora bdyin di'idza' ga nita' comandante quie soldado de que legazi raca huedila entre yaca ben' ciudad Jerusalén.

32 Cana' labedupate comandante, len yaca capitán, len yaca soldado quienë', zioyaquë' tariara bdyinyaquë' ga yu'u ja benë' rdila. Caora blë'ëyaquë' abdyin comandante lënë' soldado quienë', na' psanjë' ru'eyaquë' quie Pablo.

33 Caora na' zio comandante ubiga'në' ga zë Pablo, bënë' mandado bëxo yaca soldado lëbë' pquiyoaquë' lëbë' chopacaden. Beyudyi na', pquëpinë' yaca ben' nita' na' rëbinë' leyaquë':

—žNu ben' niga? žBiži bënë'?

<sup>34</sup> Pero yaca ben' na' uzulaoyaquë' rnëyaquë' zidzo udeudela. Tantozi rueyaquë' ru'be, biuyoñe'e comandante bi nayaquë'. Que lena' bënë' mandado tzehua'a yaca soldado Pablo lu'u cuarto ga nita'jè'.

<sup>35</sup> Bizi na' cati abdyinyaquë' ga cuëyaquë' nëpi' quie cuarto na', bi'ayaquë' Pablo ta urëyaquë' nëpi' na', porque lega rudzun yaca benë' ga zio soldado.

<sup>36</sup> Na'ra yaca ben' ciudad na' ziojè' zenaoyaquë' lejè' rnëyaquë' zidzo najè': —¡Gutilenè'!

*Con cabè' una Pablo gucalënë' cuinnè' lao ja ben' ciudad Jerusalén*

<sup>37</sup> Bizi tu binedze' ja soldado Pablo lu'u cuarto ga nita'jè', na' una Pablo di'idza' griego unè' gudyinë' comandante:

—¿Bigunlo' lato hue'lia' luè' tu chopa di'idza'?

Na'ra una comandante na' gudyinë' Pablo:

—¿Cómo raco' di'idza' griego?

<sup>38</sup> ¿Quele luè' naco' ben' Egipto, ben' bebio lao tapa mila benë' ta udi-lalëyaquë' gobierno dza na'? ¿Quele luè' ptupo' leyaquë' lao paraje ga bidyia yu'u? ¿Quele nacarao' xan' ja ben' ruti benë'?

<sup>39</sup> Na'ra bequëbi Pablo rëbinè' lëbè':

—Quele në'èdi', porque naca' ben' Israel. Uza' ciudad Tarso. Pues ciudad quia' nacan tu ciudad belao entre yaca ciudad nebaba Cilicia. Pero na'a chi huu' tu cule, gunlo' permiso inia' tu chopa di'idza' lao yaca ben' nita' ni.

<sup>40</sup> Pues como be' comandante lëbè' permiso ta inënë' lao yaca ben' nita' na', caora na' yesu Pablo lao nëpi' na', bënë' seña conlè na'anè' ta inita'yaquë' chizi. Caora unita'yaquë' chizi yugutejè', hora na' uzulaonè' rnënë' di'idza' hebreo gudyinë' ja ben' nita' na':

## 22

1—Bicha' ben' Israel, ni hua' defender cuina'. Ulezëcara nagale quia'.

2 Caora beyaquë' rnè Pablo di'idza' hebreo, mazera bega'njè' chizi. Na'ra unè' rëbinè' leyaquë':

3—Nacaria' ben' Israel ca le'e. Gologa' tu ciudad nebaba Cilicia laona Tarso. Pero ciudad Jerusalén niga bgula'. Lëzi zè iza uya'a escuela ni ga psëdi maestro Gamaliel në'èdi' yugulu con cabè' rna ley pca'n Diuzi lao na'a xuzixta'oro Moisés dza na'te. Du guicho du la'adya' bia' mandado cabè' pensari guca' una Diuzi në'èdi', laga ca ruele le'e na'a.

4 Lëscan' bëria' contra yaca ben' nao xneza Jesús. Begunni'a leyaquë' hasta bia' balajè' preso bdzi'ayaquë' lu'u dyigui'ba ta gatijè', len be'mbyu, len nigula.

5 Pues naca xan' pxuzi len yaca los demás ben' r nabè' testigo de que benyaquë' në'èdi' guichi nu'a za'a lao ja bichiro ben' Israel, ben' nita' ciudad Damasco. Dyë'èdi' neziyaquë' uya'a yediloga' yaca ben' nao xneza Jesús ta hua'ayaquë' preso yequi'ayaquë' ciudad Jerusalén ni ta gacajè' castigo.

*Pablo na' bënë' di'idza' yugulu con ca uzacanè' dan' bënë' contra yaca ben' quie Jesús*

*(Hch. 9.1-19; 26.12-18)*

<sup>6</sup> Na' za' tu neza dza na', bagazi idyina' ciudad Damasco, caora na' cadu la'odza tu sasazi uyëzi tu xni' gui' za'n guibá uyëchon në'èdi' ga za' tu neza na'.

<sup>7</sup> Caora na' bdia' yu beda' unè tu ben' una në'èdi': “Saulo, ¿bixquien' ru' contra në'èdi'?”

<sup>8</sup> Na'ra unaba' rēba'nē': "¿Nuži luē', Señor?" Hora na' unē' rēbinē' nē'ēdi': "Nē'ēdi' Jesús, ben' yedyi Nazaret. Naca' ben' ruelo' contra." Cana' unē' nē'ēdi'.

<sup>9</sup> Pues yaca ben' za'lia', legazi bdzebiyaquē', porque blē'ēyaquē' xni' gui', pero biuyoñe'eyaquē' xti'idza' ben' unē' nē'ēdi'.

<sup>10</sup> Na' agudya'nē': "¿Bizi ca re'enlo' hua', Señor?" Na'ra unē' rēbinē' nē'ēdi': "Beyasa, uyo ciudad Damasco. Bē' bazulo' ciudad na', naise'ela' nu ben' ina luē' bi huelo'." Cana' unē' nē'ēdi'.

<sup>11</sup> Pero como dyin quie xni' gui' na', pchulan laohua', bira blē'ēda'. Quie lena' bēxo yaca ben' za'lia' na'a bdyinndo' ciudad Damasco na'.

<sup>12</sup> 'Pues ciudad na' zu tu ben' lao Ananías. Naquē' ben' nao ley pca'n Diuzi lao na'a xuzixta'oro Moisés. Yugu yaca ben' Israel nita' ciudad Damasco nayaquē' quienē' de que naquē' ben' huen gula.

<sup>13</sup> Caora na' bida Ananías denē'ē nē'ēdi'. Cati bla'nē' na', unē' nē'ēdi': "Bicha' Saulo, abdyin hora yelē'ēlo' tatula." Caora unē' cana' labeyacate laohua'. Belē'ēda' dyē'ēdi'.

<sup>14</sup> Na'ra unē' rēbinē' nē'ēdi': "Ulio Diuzi luē' desde dza na'te ta inezilo' ca re'en Diuzi gaca, lēzi ta ilē'ēlo' zi'inē', ben' naca la'iya quienē', lēscan' ta yelo' xchi'nē'.

<sup>15</sup> Na'ra re'en Diuzi gaco' testigo lao yaca ben' nita' duze yedyi layu, ta yēbo'yaquē' cabē' babelo', cabē' bablē'ēlo'.

<sup>16</sup> Na'ra, bitzē'lo'. Uzuli, bē' lato hue' benē' laolo'. Ulidzo' Jesús na' uzētolo' laohuē' tacuenda yeyula dula' xquia quio'." Cana' una Ananías cati bidē' denē'ē nē'ēdi'.

*Pablo na' bē'nē' di'idza' cabē' guca use'ela' Diuzi lēbē' yetixogue'nē' ben' binaca ben' Israel con cabē' rna xti'idza' Diuzi*

<sup>17</sup> Na'ra cati bedyina' ciudad Jerusalén, uya'a lu'u idao' r nabē'ra na', bia' orar.

<sup>18</sup> Pues guca quia' ca tu ben' uxusa, blē'ēda' Jesús. Hora na' unē' nē'ēdi': "Labegazi yeza'lo' ciudad Jerusalén niga, porque bihuejē' cuenda ca di'idza' quia' yēbo'jē'."

<sup>19</sup> Na'ra gudya'nē': "Pero señor, dyē'ēdi nezijē' con cabē' bia' dza na', uyu'a lu'u yaca sinagoga radiloga' yaca ben' nao xneza Jesús ta yequi'ayaquē' udzi'ajē' dyiguiba ru'ayaquē' zi'.

<sup>20</sup> Lēzi cati bētiyaquē' Esteban, ben' udixogue' xti'idzo', guca' de acuerdo dan' bētiyaquē' lēbē'. Udapa' gaban quie yaca ben' bēti lēbē'." Cana' gudya' Jesús.

<sup>21</sup> Na'ra una Jesús nē'ēdi' tatula: "Labe uyo, porque rse'ela' luē' zitu' ga nita' ja ben' binaca ben' Israel ta tzetixogue'lo' leyaquē' con cabē' rna xti'idza'." Pues cana' guca quia' cati uzulaohua' rnaohua' xneza Jesús.

### *Gu'un comandante quinē' Pablo*

<sup>22</sup> Hora na' bira bzēnagajē' ca di'idza' una Pablo, na' unēyaquē' zidzo nayaquē':

—¡Bira reya'ala' suē' dyilayu! ¡Gutilenē'!

<sup>23</sup> Na'ra bipsan ja ben' nita' na' rnēyaquē' zidzo. Yela' rdza' quiejē' bzeyaquē' gaban quiejē' ladza. Lēzi bzerēyaquē' bēxte ladza.

<sup>24</sup> Quie lena' bē comandante mandado ta udze'yaquē' Pablo lu'u cuarto quiejē' na'. Pero lēzi bēnē' mandado qui yaca soldado lēbē' con guidi tacuenda na' a la fuerza yēbinē' leyaquē' ca bi falta quienē' de, dan' rnē yaca ben' na' zidzo contra lēbē'.

25 Pues banuquiyoaquë' Pablo ta quiyaquë' lëbë' caora unënë' gudyinë' capitán na':

—Binacan de acuerdo con lao ley quile në'ëdi', porque naca' cuenda quie ciudad Roma. Pues sin nica nehuelo' justicia quia' lao juez, bide derecho quio' huu' në'ëdi' castigo chi binezo' de falta quia'. —Cana' una Pablo gudyinë' capitán.

26 Na'ra caora be capitán na' ca una Pablo, uyonë' yetixogue'në' comandante gudyinë' lëbë':

—Gapo' cuidado bi huelo' quie ben' ni, porque aonë' në'ëdi' de que naquë' cuenda quie ciudad Roma. —Cana' unë' gudyinë' comandante.

27 Cana' zio comandante ga zë Pablo unabë' gudyinë' lëbë':

—¿Balo' naco' cuenda quie ciudad Roma?

Na' bequëbi Pablo gudyinë' comandante:

—Aja', naca' cuenda quie ciudad Roma.

28 Na' gudyi comandante lëbë':

—Pues cati guca' në'ëdi' cuenda quie ciudad Roma, lega dumi ze gula udižuga'.

Na'ra una Pablo:

—Pero në'ëdi' banaca' cuenda quie ciudad Roma desde cati golotia'.

29 Pues cati be yaca ben' banita'ja quija lëbë' de que naca Pablo cuenda quie ciudad Roma, bebiga'jë' ga zënë'. Hasta cuin comandante na' bdzebinë' dan' ilë'ëti'zi ca bënë' Pablo castigo sin binegaca justicia quienë' lao juez.

### *Cabë' guca psedyinjë' Pablo lao ja ben' rnabë' quie ben' Israel*

30 Na'ra beteyu dza tula na', gu'un comandante inezinë' dyë'ëdi bixquien' rao yaca ben' Israel Pablo xquia. Quie lena' bexëdyijë' caden na' nerionë', bë comandante na' mandado ta yedupa yaca pxuzi lente yugu yaca los demás ben' rnabë' quie ben' Israel, ben' nita' ciudad Jerusalén. Caora babedupayaquë' na', na'ra ulio comandante na' Pablo lu'u cuarto ga denë' psedyinnë' lëbë' lao yaca ben' babedupa na'.

## 23

1 Caora bazë Pablo lao ja ben' rnabë' quie idao' rnabë'ra na', na'ra una'në' dyë'ëdi leyaquë' gudyinë' lejë':

—Bicha', hasta na' zucaza' rda'a re' chizi laxta'ohua' lao Diuzi.

2 Na' xan' pxuzi laonë' Ananías, bënë' mandado yaca ben' zë ga'ala' ga zë Pablo ta capayaquë' xaguë' dan' unë' cana'.

3 Caora na' una Pablo gudyinë' lëbë':

—¿Diuzi huenë' luë' castigo dan' biruelo' tuzi con cabë' rna lë'ë ley. Re'lo' na' ta huelo' justicia quia' con cabë' rna lë'ë ley, ¿bixquien', pues, ruelo' contra ley na', ru' mandado capa benë' xaga'?

4 Na' yaca ben' nita' bago na' unajë' gudyijë' lëbë':

—¿Cana' biruelo' bala'ana xan' pxuzi, ben' quie Diuzi?

5 Na' bequëbi Pablo gudyinë' lejë':

—Bicha', binezda' chi naquë' xan' pxuzi. Pues chan' nezda' naquë' xan' pxuzi, biunia' cana', porque rnën lë'ë ley quiero de que: “Reya'ala' huero bala'ana nu ben' rnabë' quiero.”

6-8 Caora na' gucabë' Pablo de que bala ja ben' rnabë' nita' na' nacajë' ben' partido saduceo, na' ibalajë' nacajë' ben' partido fariseo. Pero yaca ben' partido saduceo nayaquë' de que yaca ben' gati biyebanjë'. Lëzi nayaquë' ganu ángel zu, ni bichi be. Pero bizi yaca ben' partido fariseo na', binacayaquë' tuzi con cabë' rna ja ben' partido saduceo na'. Quie lena' unë' Pablo zidzo rëbinë' leyaquë':

—Bicha', naca' ben' quie partido fariseo. Lèzi xuza' naquè' ben' partido fariseo. Pero dan' rnia' huadyin dza yeban ben' huati, quie lena' rao yaca benè' nē'ēdi' xquia.

Cana' una Pablo rēbinè' lejè'. Na'ra dan' unè' cana', uzulao ja ben' partido fariseo ruelēyaquè' ben' partido saduceo huenè. Bibega'nyaquè' de acuerdo entre lao chopa cue'yaquè'.

<sup>9</sup> Pues yugutejè' uzulaojè' rnèjè' zidzo hasta uzuli chopa tzona ben' naca quie partido fariseo, unayaquè' rēbiyaquè' yaca los demás ben' r nabè':

—Ben' ni, bibi tamedian bènè'. Mejorla bihueronè' castigo, porque chica abida nu ángel o chi nu bichi be bē'lè lēbè' di'idza'. Pues gaparo cuidado bihuero contra Diuzi. —Pues cana' unayaquè'.

<sup>10</sup> Na' como legazi racagazi huenè na', bdzebi comandante hueyaquè' zi' quie Pablo. Cana' bènè' mandado tzio yaca soldado ta yebioyaquè' Pablo lado ja ben' nita' na' ta yequiè'yaquè' lēbè' tatula lu'u cuarto quiejè'.

<sup>11</sup> Na'ra bezu rdze' tula, ptilalao Jesús Pablo rēbinè' lēbè':

—Bidzebo', Pablo, porque con cabè' babèlo' baodixogue'lo' ben' ciudad Jerusalén con cabè' unia', lēscan' ise'ela' luè' ciudad Roma ta tzetixogue'lo' ben' ciudad na' con cabè' unia'. —Cana' una Jesús gudyinè' Pablo.

### *Bapsaque' ja ben' Israel cabè' huejè' gutijè' Pablo*

<sup>12</sup> Bizi beteyu na', bala ja ben' Israel gucayaquè' de acuerdo ta gutiyaquè' Pablo. Pues hasta bguntejè' lao Diuzi unajè' hue Diuzi leyaquè' castigo chi bigutiyaquè' Pablo. Lēscan' nayaquè' de que bibi gaoyaquè', bibi yo'oyaquè' tu binegutijè' Pablo na'.

<sup>13</sup> Mazla chopa galo be'mbyu naca bējè' compromiso huejè' cana'.

<sup>14</sup> Hora na' uyoyaquè' yena'yaquè' yaca xan' pxuzi len yaca los demás ben' rnabè' quie ben' Israel gudyijè' lejè':

—Pues nēto' babguntendo' lao Diuzi gutindo' Pablo. Baonabando' Diuzi huenè' nēto' castigo chi bigutindo' Pablo. Babguntendo' laonè' bibi gaondo', bibi yo'ondo' tu binegutindo' lēbè'.

<sup>15</sup> Na'ra huele tuhuen gacalēle nēto'. Yēbile comandante ta yeguidè' ni uxe tatula, idehua'anè' Pablo na' laole. Pues yēbilenè' de que re'enle uquēpilenè' mazeru como si fuera ta inezile dyè'ēdi quie asunto quienè'. Na'ra nēto' ucachi'laondo' tu neza gutindo'nè' bē' yedenè'. —Cana' unajè' gudyijè' lejè'.

<sup>16</sup> Pero bizi na', be zi'i zan Pablo cabè' unajè' quie Pablo. Quie lena' uyobi' yena'bi' Pablo ga zunè' lu'u cuarto quie ja soldado yetixogue'bi' lēbè' con cabè' unayaquè' quienè'.

<sup>17</sup> Caora na' guzi Pablo capitán gudyinè' lēbè':

—Uquiè'cara bi' niga yehua'abi' lao comandante, porque naca tu di'idza' belao hue'lēbi' lēbè'.

<sup>18</sup> Cana' uquiè' capitán lēbi' ga re' comandante gudyinè' lēbè':

—Za' dehua'a bi' niga laolo' ni, porque cana' una preso, ben' lao Pablo. Lēbè' unè' naca tu di'idza' belao hue'lēbi' luè'.

<sup>19</sup> Bizi bē' beyudyi una capitán cana', bēxo comandante na'a zi'i zan Pablo uquiè'nè'bi' tzala'la rēbinè'bi':

—¿Bizi ca re'enlo' inao' nē'ēdi'?

<sup>20</sup> Na' nabi' rēbibi' lēbè':

—Rnia' luè' de que yaca ben' Israel, agucayaquè' de acuerdo ta idenabajè' laolo' iquiè'lo' tío quia' Pablo, tzehua'alo'nè' lao xan' pxuzi len lao yaca los demás ben' rnabè' uxe. Pues inayaquè' de que re'enaquè' uquēpiyaquè' lēbè' mazeru ta inezirajè' dyè'ēdi asunto quienè'.

21 Pero bigalelo' quieyaquè', porque mazla chopa galo yaca be'mbyu apcachi'laojè' rbè'nidyiaquè' ta gutiyaquè' tío quia'. Pues tantozi re'enyacuè' gutiyaquè' tío quia' Pablo, aonabayaquè' hue Diuzi leyaquè' castigo chi bigutiyaquè' tío quia'. Lèzi unayaquè' bibi gaojè', bibi yo'ojè' tu binegutiyaquè' tío quia'. Pues banita'jè' listo guida tío quia'. Rbezazijè' luè' chi ise'elo' tío quia'. —Cana' una Zi'i zan Pablo gudyibi' comandante.

22 Na'ra gudyi comandante lèbi' de que nitu nunu yèbibi' con cabè' unabi' bagudyibi' lèbé'. Na' ude beyudyi na', bebionè' lèbi'.

*Cabè' guca use'ela'yaquè' Pablo lao Félix, ben' naca gobernador*

23 Caora na' beyèzi comandante chopa ben' naca capitán gudyinè' lejè':

—Re'enda' ise'ela' Pablo ciudad Cesarea. Pues utupale yaca soldado tzhua'ayaquè' lèbé' ciudad na'. Na'ra utupale chopa gayuhua soldado tzio ni'azi, len itzona galo chi ben' cuia bia, len ichopa gayuhua yaca ben' hua' lanza. Re'enda' za'le na'a yèla du las nueve. —Cana' una comandante gudyinè' yaca capitán.

24 Pero lèzi gudyinè' lejè' ucuezayaquè' tu bia ta cuia Pablo tziolèyaquè' lèbé' ciudad Cesarea como re'ennè' usedyinyaquè' lèbé' dyè'èdi lao ben' naca gobernador, ben' lao Félix.

25 Caora na' hè comandante tu guichi ta hua'ajè' ta hue'jè' gobernador. Na' lè'è guichi rnèn cani:

26 “Estimado gobernador Félix, rgapa' luè' diuzi.

27 Uzi'ze quia' rguixogui'a luè' cabè' naca tu asunto entre ja ben' Israel nita' ni, len tu ben' bèxojè' lao Pablo. Azio chopa tzona dza bagu'unyaquè' gutijè' lèbé'. Pero como unezda' naquè' cuenda quie ciudad Roma, betupa' ja soldado quia' uya'lia' leyaquè' ga nita'jè' gutijè' lèbé'. Pues psela' lèbé' bibètijè' lèbé'.

28 Na'ra como gu'unda' inezida' bixquien' dan' raoyaquè' lèbé' xquia, uqui'anè' lao xan' pxuzi len lao yaca los demás ben' rnabè' quiejè'.

29 Pues ga beyudyi unayaquè' de que por ley quieziyaquè' raojè' lèbé' xquia. Pero según ley quiero, ley quie ben' romano, bibi razón de chi gutiyaquè' lèbé', ni squiera tzu'ugalanè' lu'u dyiguiba.

30 Pero bizi na' aoderala cati beda' di'idza' banacayaquè' de acuerdo ta gutijè' lèbé'. Quie lena' beguiloga' modo use'ela'nè' laolo' na'. Lèzi bia' mandado tziorè yaca ben' rao lèbé' xquia tacuenda yetilajè' di'idza' laolo'. Lèzin na' rguixogui'a luè'.” Pues cana' unèn lè'è guichi use'ela' Claudio Lisias lao gobernador Félix.

31 Na' según ca mandado bè comandante, uquiè'yaquè' Pablo du rèla hasta bdyinyaquè' yedyi Antípatris.

32 Caora beteyu na', bebi' yaca soldado zio ni'azi bedyinyaquè' ga zu cuarto uza'yaquè'. Pero yaca soldado dyia bia na', ziolèziyaquè' Pablo hasta idyinjè' ciudad Cesarea.

33 Cati bdyinyaquè' ciudad na', psedyinyaquè' Pablo len guichi nu'ajè' lao ben' gobernador.

34 Na' unè ben' naca gobernador lè'è guichi na'. Beyudyi unè'n na', unabè' Pablo ga'zi uza'nè'. Caora bequèbi Pablo de que naquè' ben' quie ciudad nebaba Cilicia,

35 caora na' una gobernador rëbinè' Pablo:

—Hua' justicia quio' cati guida ja ben' rao luè' xquia.

Na' bènè' mandado ta gapa yaca soldado quienè' lèbé' lu'u lidyi rey Herodes. Cana' guca psedyinyaquè' Pablo lao gobernador Félix.

## 24

*Cabè' guca bè' Pablo defender cuinnè' lao Félix*

<sup>1</sup> Na'ra cati aode ga'yo' dza na', bdyinrè Ananías ciudad Cesarea na', len ibala yaca ben' rnabè' quie ja ben' Israel, len itu ben' laonè' Tértulo, ben' sèlè leyaquè' lao gobernador na'. Bdyinyaquè' lao gobernador na' ta gaoyaquè' Pablo xquia.

<sup>2</sup> Cati yexi' soldado Pablo psedyinjè' lèbè' lao gobernador, caora na' uzulao Tértulo raonè' Pablo xquia nè' rëbinè' Félix na':

—Zucazindo' contento rnabè'lo' nètò', Señor Gobernador, porque por pensari dya'a quio', banaca ja ben' quie quie yedyi de acuerdo con cabè' bao', porque taze bagucalao' nètò'.

<sup>3</sup> Pues yugulundo' rando' luè' xcalelo', Señor Gobernador, porque raxecazindo' yugu con cabè' ruelèlo' nètò'.

<sup>4</sup> Na'ra ta biutzèndo' luè', rnaba' tu cule laolo', chi huu' tu huen, uzènego' con cabè' inando' luè' tzadica'.

<sup>5</sup> Pues cani nacan quie ben' ni naquè' ben' zèdi gula. Rdanè' duze yedyi layu rbionè' yaca benè' chopacue' de entre yaca ben' Israel. Lèzi naquè' xan' ja ben' nao xneza Jesús, ben' yedyi Nazaret.

<sup>6</sup> Pues re'ennè' utitunè' idao' rnabè'ra quiendo'. Re'ennè' iquiè'nè' ben' binaca ben' Israel lu'e na'. Pero lena' nacan zudyi gula según ca naca ley quiendo'. Quie lena' bèxondo'nè' ta re'ennendo' huendo' justicia de acuerdo con cabè' rna lè'è guichi ley quiendo'.

<sup>7</sup> Pero bìzi na' cati bla' comandante Lisias, a la fuerza begubanè' bequiè'nè' lèbè'.

<sup>8</sup> Na' unè' de que yaca ben' rao lèbè' xquia reya'ala' guidajè' laolo' ni. Quie lena' babla'ndo' laole. Pues mejorla cuincazo' uquèpilo'nè' ta yetila di'idza' bixquien' raondo'nè' xquia. —Cana' una Tértulo gudyinè' gobernador.

<sup>9</sup> Na'ra yaca ben' Israel nita'rè na', lèzi unayaquè' de que tabala na' ca una Tértulo.

<sup>10</sup> Caora na' bè ben' naca gobernador seña conlè nè'è lao Pablo ta inezi Pablo ta sulaonè' inènè' huenè' defender cuinnè'.

Na' una Pablo rëbinè' ben' naca gobernador:

—Legazi redaohueda' hua' defender cuina' inia' laolo' ni, porque nezda' azio zè iza naco' juez lao ja ben' Israel.

<sup>11</sup> Na' binegaca chipchopa dza bedyina' ciudad Jerusalén ta tzionla'adya' Diuzi.

<sup>12</sup> Nitu ganu rnèlia', ni tazèdi biudiloga' lu'u idao' rnabè'ra na', ni lu'u yaca sinagoga, ni lao ciudad na', nitugazi. Pues nita' ja testigo quia'. Huanèyaquè' chi nacan tali, chi binacan tali, con cabè' rnìa' luè'.

<sup>13</sup> Yaca ben' ni, bibi prueba decazi quiejè' dan' raoyaquè' nè'èdi' xquia.

<sup>14</sup> Pero claro gula re'enda' inia' luè' de que rionla'adya' Diuzi quie xuzixta'ondo', pero de modo tula, modo cubila. Ben' ni biraxeyaquè' modo quia' nayaquè' binacan dya'a. Pero rnaohua' yugulo con cabè' rnèn lè'è guichi ley pca'n Diuzi lao na'a xuzixta'ondo' Moisés len con cabè' rnèn lè'è guichi bè yaca los demás ben' uidxogue' con cabè' rna xti'idza' Diuzi dza na'te.

<sup>15</sup> Rbeza' idyin dza useban Diuzi yugu ben' huati, chi ben' bè tadya'a, chi ben' bè tamedian. Quie lena' yugu dza, yugu yèla, rapa' cuidado tacuenda ta'a tu neza dya'a, gaca yèri laxta'ohua' lao Diuzi, len lao yaca benè'.

<sup>16</sup> Cala tuza' nè'èdi' rbeza' idyin dza useban Diuzi yaca ben' huati, dechan' len zè ja ben' yedyi quia', ben' Israel, rbezarèyaquè' dza useban Diuzi yaca ben' huati.

17 Na'ra como baguca zè iza rda'a du yedyi quie ja ben' binaca ben' Israel, na' bedyina' yedyi quia' ta hua'a yaca ben' yèchi' nita' yedyi na' caridad, lèzi ta udzi'a gun quie idao' r nabè'ra na'.

18 Na'ra ude beyudyi bzua' di'idza' según ley quiendo' tacuenda gaca' ben' laxta'o yèri lao Diuzi, bibi zèdi udiloga', biyetupa' nu yaca benè'. Zua' rudzi'a gun quie idao' r nabè'ra na' cati dexaca tu chopa ja ben' Israel nè'èdi', ben' uza' yu nebaba Asia.

19 Na' yaca ben' dexaca nè'èdi' lu'u idao' r nabè'ra na', reya'ala' guidajè' niga tacuenda na' chi gaoyaquè' nè'èdi' xquia. Pues a ver bi inayaquè' chi de bi de quiejè' conlè nè'èdi'.

20 Na' chi bisaque' guidajè', reya'ala' ina ben' nita' niga chi bedzelejè' nu causa quia' cati zua' lao xan' pxuzi len lao yaca los demás ben' r nabè' quie ben' Israel.

21 Pues chica raqueyaquè' bia' tamedian hora zua' laoyaquè' na' unia' zidzo rèba'yaquè': "Dan' rnia' huadyin dza yeban ben' huati tatula, quie lena' rao yaca benè' nè'èdi' xquia ni." —Cana' una Pablo rèbinè' gobernador na'.

22 Na'ra ba'ala'cazi dyè'èdi' banezi Félix naca ja ben' nao xneza Jesús ben' huen, bipsannè' Pablo libre. Na' pca'nnè' asunto quienè' cana'zi, porque gu'unnè' uquèpinè' comandante Lisias mazara. Quie lena' unè' gudyinè' lejè':

—Ruen zi cuezaro guida comandante Lisias tacuenda iyudyi asunto quiele ni.

23 Caora na' bè Félix mandado gudyinè' capitán ta gapanè' Pablo, pero bibènè' quienè' bizinaquezi, porque naca Pablo ben' bala'ana. Lèzi bè Félix lato guida ja ben' amigo quie Pablo tzeyubijè' lèbè'.

24 Na'ra zio Félix yedyi tula, pero guca chopa tzona dza bedyinnè' ciudad Cesarea tatula lènè' zgulè'. Na' zgulè' laonè' Drusila, naquè' ben' Israel. Caora na' be' Félix mandado ta tzexi' soldado Pablo ta hue'lènè' lèbè' di'idza' yenè' hue' Pablo di'idza' quie xneza Jesús.

25 Conforme na', bè'lè Pablo Félix len zgulè' di'idza'. Na' una Pablo rèbinè' leyaquè' de que bireya'ala' hueyaquè' ca tu ta rnazin quieyaquè', dechan' reya'ala' hueyaquè' ca re'en Diuzi ta gaca huen quieyaquè' cati idyin dza hue Diuzi juicio lao duze yedyi layu. Pues caora be Félix di'idza' una Pablo, legazi bdzebinè', porque dyè'èdi' nezinè' binaonè' neza dya'a. Quie lena' unè' rèbinè' Pablo:

—Tu cana'gazi, mejorla beyo. Pues cati gunan lato hueyèza' luè' tatula.

26 Cana' gudyi Félix Pablo. Pero como rbezè' ta hue' Pablo lèbè' dumi tacuenda na' yebionè' lèbè' lu'u dyiguiba, quie lena' rèzi Félix na' lèbè' tzadi tzadi ta ru'elènè' lèbè' di'idza'.

27 Cana' guca quie Pablo lao chopa izara. Na'ra bdyin hora bero Félix na' de gobernador. Caora na' uyèzi itu ben' tula lao lazè', ben' lao Porcio Festo. Na'ra como re'en Félix gaquè' yaca ben' Israel amigo, pca'nzinè' Pablo lu'u dyiguiba.

## 25

### *Cabè' guca bè' Pablo defender cuinnè' lao gobernador Festo*

1 Na' baddyin Festo ciudad Cesarea tacuenda huenè' de gobernador. Biži na' aoca tzona dza bdyinnè' na', uza'nè' zionè' ciudad Jerusalén.

2 Na'ra cati bdyinnè' ciudad Jerusalén, zio yaca xan' pxuzi len ibalara ben' r nabè' quie ben' Israel tzeyubiyaquè' lèbè' ta gaoyaquè' Pablo xquia.



<sup>3</sup> Unabayaquë' chi huenë' tu cule huenë' mandado tzexi' yaca soldado Pablo ta yedyinnë' ciudad Jerusalén tatula. Pero bapsaque'yaquë' bi hueyaquë' guti'yaquë' Pablo du tu neza.

<sup>4-5</sup> Caora na' bequëbi Festo gudyinë' lejë':

—Pues lazeya'atia' Festo ciudad Cesarea. Como na' zu Pablo naquë' preso, quie lena' rnia' le'e de que reya'ala' sa'lë nu ben' r nabë' quiele len në'ëdi'. Chi nezile bënë' tamedian, huazaque' gaolenë' xquia laohua' ciudad na'.

<sup>6</sup> Na' Festo uzunë' ciudad Jerusalén cadu xu'una chi dza. Caora na' beza'në' zeyonë' bedyinnë' ciudad Cesarea. Beteyu dza tula, yaque'në' xlatonë' ga rueyaquë' junta. Bënë' mandado ta tzio nu soldado tzexi'yaquë' Pablo.

<sup>7</sup> Na'ra cati uyu'u Pablo ga re' Festo na', hora na' laobiga'te yaca ben' za' ciudad Jerusalén gan' bazënë', uzulaojë' raoyaquë' lëbë' xquia huala gula lao Festo. Pero ni tu prueba quieyaquë' bide.

<sup>8</sup> Biži caora na' be' Pablo defender cuinnë' unë' cani:

—Rnia' le'e nitu tamedian nehua'. Nica bëza' contra ley quie ja ben' Israel, ni contra idao' r nabë'ra zu Jerusalén, ni contra rey César quie ben' romano. —Cana' una Pablo gudyinë' Festo.

<sup>9</sup> Na'ra como Festo gu'unnë' gaquë' amigo len ja ben' Israel, unë' gudyinë' Pablo:

—A ver bi ca nao'. ¿Zulo' dispuesto tzio' ciudad Jerusalén tacuenda na' hua' justicia quio' na'la?

<sup>10</sup> Pero bequëbi Pablo gudyinë' lëbë':

—Ni zucaza' laolo' ga reya'ala' gaca justicia quia', porque ni re' juzgado ga re' juez quie rey César. Bireya'ala' tza'a lao ben' Israel. Pues luë' nezo' dyë'ëdi nitu lasa bibia' contra ley quie ben' Israel.

<sup>11</sup> Pues rnia' luë' de que chi tali na' bia' tu tamala ta nu'an castigo para gatia', zua' dispuesto huelo' mandado guti ja soldado në'ëdi'. Pero chi binacan li ca naca dan' raojë' në'ëdi' xquia na', na'ra nitu nunu de derecho quie usedyinyaquë' në'ëdi' lao na'a yaca ben' Israel. Re'enda' tza'a lao rey César ta huenë' justicia quia'. —Cana' una Pablo gudyinë' lëbë'.

<sup>12</sup> Na'ra Festo na', bë' beyudyi bë'lënë' di'idza' yaca ben' ru'e lëbë' consejo quie asunto quie Pablo, unë' gudyinë' lëbë':

—Pues como baonao' de que re'leno' tzio' lao rey César ta gaca justicia quio', pues na'la tziotzazo' gaca justicia quio'. —Cana' una Festo gudyinë' Pablo.

### *Cabë' guca pseyinjë' Pablo lao rey Agripa*

<sup>13</sup> Na'ra aoca chopa tzona dza na', cati bdyin tu rey tula laonë' Agripa lenë' bi' zannë' Berenice. Bdyinyaquë' ciudad Cesarea ta bgapayaquë' Festo diuži.

<sup>14</sup> Biži na' como bega'një' na' zë dza, lena' uzulao Festo ru'elënë' rey na' di'idza' quie asunto quie Pablo. Quie lena' unë' rëbinë' rey na':

—Niga zu tu ben' zu niga, ben' pca'n Félix preso cati uyonë' de gobernador.

<sup>15</sup> Biži cati uya'a ciudad Jerusalén na', bla' yaca xan' pxuzi len yaca los demás ben' r nabë' quie ben' Israel udaoyaquë' lëbë' xquia. Na' unabajë' në'ëdi' ta hua' mandado guti soldado lëbë'.

<sup>16</sup> Pero bequëba' rëba'yaquë' de que binacan de acuerdo con lao ley quie ben' romano hue nu ben' r nabë' mandado guti soldado nu benë' chan' binegaca justicia quienë' bide prueba chi tamala bënë'. Pues ruen zi hue'në' declaración ta huenë' defender cuinnë' lao nu ben' rao lëbë' xquia.

<sup>17</sup> Quie lena' cati bla'yaquë' niga, biudzëda'. Beteyu na'tezi laore'tia' xlatoga' bëtia' mandado ta tzexi'yaquë' lëbë'.

18 Na'ra guqueda' de que huaoyaquë' lëbë' xquia huala gula, pero biu-binyaquë' birla inayaquë' contra lëbë'.

19 Quie ley quiezijë' uyu'uyaquë' huedila len lëbë'. Lëzi unayaquë' quie tu ben' aguti dza na'la laonë' Jesús. Pues quie ben' na' lao Jesús, rna Pablo agutinë' bebannë' zuë'. Quie lëzin udaoyaquë' lëbë' xquia.

20 Na' como birbinda' nacala hua' gaca reglo quiejë', unaba' Pablo chi zunë' dispuesto tzionë' ciudad Jerusalén ta gaca reglo asunto quienë' dan' raojë' lëbë' xquia.

21 Pero como unë' re'ennë' tzionë' lao rey César ta gaca reglo quienë', bia' mandado ta gapazi ja soldado lëbë', porque reya'ala' ise'ela'në' lao rey César na'.

22 Caora na' una rey Agripa gudyinë' Festo:

—Lëzi re'enda' hue'lia' lëbë' di'idza'.

Na' bequëbi Festo rëbinë' lëbë':

—Uxetezi hue'lao'në' di'idza'.

23 Beteyu na' uzutza'o rey Agripa len Berenice uyu'uyaquë' lu'u tu cuarto ga re' Festo. Lëscan' uyu'urë ja xan' soldado len yaca ben' rnabë' lao ciudad na'. Bë' bdyinjë' na', hora na' bë Festo mandado yaxi'jë' Pablo.

24 Na'ra una Festo rëbinë' yaca ben' nita' na':

—Pues ni rnia' luë' na', rey Agripa, len yugulu yaca ben' nita'lëro niga cabë' naca quie ben' bazë laoro niga. Pues zë yaca ben' Israel legazi rnëyaquë' contra lëbë'. Tanto ca ciudad Jerusalén, como ciudad Cesarea niga, birsanjë' rnabayaquë' në'ëdi' ta hua' mandado guti soldado lëbë'.

25 Pues bide razón guti soldado lëbë', porque bide prueba chi bi tamala bënë'. Pero como cuinnë' unë' de que re'ennë' tzionë' ciudad Roma ta gaca reglo quienë' lao rey César, pues quie lena' psaque'da' ise'ela'në' ciudad Roma.

26 Pero bisaque' ise'ela' tu guichi lao rey César, porque binenezda' chi nacan tabala bënë' tamala. Quie lena' rapa' gusto zëlo' niga, oh rey Agripa, tacuenda uquëpilo'në' mazera chi bënë' tamedian cuenda na' inezida' bi di'idza' udyia' lë'ë guichi ise'ela' lao rey César. Por lena' yaxi'jë' ben' ni laole tacuenda na' uquëpilo'në' dyë'ëdi.

27 Porque binacan huen ise'ela' nu preso lao rey César, chan' binezda' bixquien' dan' raojë' lëbë' xquia.

## 26

### *Ca guca bë' Pablo defender cuinnë' lao rey Agripa*

1 Na'ra una rey Agripa rëbinë' Pablo:

—Inëlo' huu' defender cuinlo' na'a.

Hora na' ulisa Pablo në'ë bënë' seña inënë' unë' rëbinë' rey Agripa con cabë' guca quienë':

2 —Pues rey Agripa, re'enda' inia' de que rapa' gusto zua' laolo' hua' defender cuina', porque binacan li con cabë' na yaca ben' Israel contra në'ëdi'.

3 Nezda' nubë'lo' dyë'ëdi ca costumbre de quie ben' Israel. Lëscan' nezda' nubë'lo' dyë'ëdi cabë' natza'la pensari quie tu cue' huio entre ra'o ben' Israel. Lena' rnaba' tu cule uzënago' cabë' inia' luë' con paciencia.

### *Una Pablo cabë' bënë' cati binenaonë' xneza Jesús*

4 'Pues yugu ja ben' Israel nezijë' cabë' bia' desde cati nacia' xcuidi' zua' yedyi quia', lente ciudad Jerusalén.

<sup>5</sup> Lëzi nezijë' dyë'ëdi de que desde cati nacatia' bi' ru'abe, naca' ben' partido fariseo. Reya'ala' gacajë' testigo quia' de que nacan tali ca nia'. Dyë'ëdi nezo' cabë' rue ben' partido fariseo rnaorayaquë' du guicho du la'adyi'jë' ley pca'n Moisés para ra'o.

<sup>6</sup> Na'ra nia' huadyin dza useban Diuzi yugulu ben' huati con cabë' una Diuzi gudyinë' xuzixta'oro. Pues quie lëzin na' rao ben' Israel në'ëdi' xquia.

<sup>7</sup> Hasta yugulu lao chipchopa cue' laguedyiro ben' Israel rbezayaquë' su di'idza' gaca con cabë' una Diuzi. Quie lena' rionla'adyi'yaquë' lëbë' rueyaquë' bala quienë' du dza, du yëla. Pues Señor Rey, como lëscan' na yaca ben' Israel rbezayaquë' dza useban Diuzi yaca ben' huati, ¿cómo, pues, arayaquë' në'ëdi' xquia dan' rbezaria' dza useban Diuzi yaca ben' huati laga ca leyaquë'?

<sup>8</sup> Chi nayaquë' useban Diuzi ben' huati, ¿bixquien' nayaquë' pensari tondo quia' nia' pseban Diuzi Jesús?

*Bdze' Pablo di'idza' cabë' bënë' contra ben' nao xneza Jesús dza na'la*

<sup>9</sup> Pues dza na'te bëcaza' pensari hua' contra yaca ben' nao xneza Jesús, ben' yedyi Nazaret.

<sup>10</sup> Cana' bëcaza' contra lejë' ciudad Jerusalén. Na' bdzi'a yaca ben' zë lu'u dyiguiba con nu ja ben' nao xneza Jesús. Pues quie tu guichi ben ja xan' pxuzi në'ëdi', lena' bi'an fuerza bia' cana'. Lëzi gualia' ja xan' pxuzi de acuerdo hora bëyaquë' mandado gati yaca ben' quie Jesús.

<sup>11</sup> Lëzi cana' guca zë lasa bia'yaquë' castigo tacuenda na' usanjë' bira inaoyaquë' xneza Jesús. Cana' bia' yugu ciudad con ga zu idao' sinagoga. Hasta du ciudad re' zitu' uya'a yadiloga'yaquë' como legazi bdzë'ëda' leyaquë'.

*Bë' Pablo di'idza' tatula con cabë' uzacanë' tu neza Damasco (Hch. 9.1-19; 22.6-16)*

<sup>12</sup> Quie lena', uya'a ciudad Damasco dza na', como ulio ja xan' pxuzi në'ëdi' ta tza'a ciudad na'. Na' benjë' tu guichi bia' tacuenda udzi'a ben' nao xneza Jesús lu'u dyiguiba.

<sup>13</sup> Pero, señor rey, re'enda' inia' tu ta guca quia' tu neza. Pues caora za'a tu neza Damasco cadu la'odza, blë'ëda' tu xni' gui' za'n guibá. Na' ure' xni' ga ziondo' tu neza na'. Lëxni' gui' na' nacaran fuerte cabë' xni' obidza.

<sup>14</sup> Quie lena' bdingo' yu yugutendo'. Hora na' beda' unë tu ben' rëbinë' në'ëdi': "Saulo, ¿bixquien' ruelo' contra në'ëdi'? Pues cuinzo' ruelo' contra ca quie tu bëdyihuaga rulibiba' nu lë'ë yaga duchi' nu'a xa'mba' ta rulaohué'ba', cana' cuinziba' racaba' zi'."

<sup>15</sup> Na'ra caora na' unia' gudya'në': "¿Nuzi luë', Señor?" Na'ra una Señor Jesús rëbinë' në'ëdi': "Në'ëdi' Jesús. Naca' ben' ruelo' contra.

<sup>16</sup> Pero na' beyasa, porque bedetila' luë' tacuenda inaolo' xneza' yëbo' benë' con cabë' guca quio' blë'ëlo' në'ëdi' ni. Lëscan' yëbo'yaquë' con cabë' ulu'ena' luë' du dza zeza'ra.

<sup>17</sup> Re'enda' tzio' tzetixogüe'lo' benë' con cabë' unia', chi ben' Israel, chi ben' tula, con nutezi. Na'ra në'ëdi' gacalia' luë' chan' bi tamala hueyaquë' quio'.

<sup>18</sup> Na' ise'ela' luë' tacuenda na' uzioñe'elo' benë' con cabë' naca xneza', porque rdayaquë' lao lato lao chula rnaojë' neza xi'ibi' quie Satanás. Abdyin hora ta tayaquë' lao lato lao xni' inaojë' xneza Diuzi tu guibá. Cana' re'ennan tacuenda si'ze Diuzi dula' xquia quiejë' gacajë' tuze len yaca los demás ben' nao xneza', ben' aodibi Diuzi laxta'o." Cana' una Jesús gudyinë' në'ëdi' tu neza dza na'.

*Una Pablo cabè' guca bzunè' di'idza' con cabè' gudyi Jesús lèbè'*

19 'Quie lena', señor rey Agripa, bzua' di'idza' con cabè' una Jesús gudyinè' nē'ēdi' desde guibá ga zunè'.

20 Tanèro uya'a yetixogui'a ben' ciudad Damasco con cabè' rna xti'idza' Diuzi. Ude beyudyi na', uya'ria' ciudad Jerusalén yetixogui'a ben' nita' na'. Hasta yugu yedyi nebaba estado Judea uya'. Lēscan' uya'a yetixogui'a nutezi ben' binaca ben' Israel. Cana' bia' uya'a gatezi yedyi, porque re'en Diuzi utza'jè' pensari quiejè' inaojè' xnezè'. Lēscan' gudyayaquè' reya'ala' tajè' neza dya'a tacuenda inezi ja benè' tabala na' aptza'jè' pensari quiejè'.

21 Quie lēzin bēxo ja ben' Israel nē'ēdi' cati uyu'a lu'u idao' rna bē'ra zu ciudad Jerusalén. Pues hora na' gu'unyaquè' gutiayaquè' nē'ēdi'.

22 Pero como bagucalè Diuzi nē'ēdi', hasta hora na' rda'a ni rguixogui'a benè' con cabè' rna xti'idza' Diuzi, la'achi ben' uña'a, la'achi ben' yēchi', con nutezi benè'. Rguixogui'a benè' con cabè' una Moisés len yaca los demás ben' profeta bi ta zaza'ra. Quele ta racazi la'adya' rguixogui'a yaca benè', dechan' ca una Diuzi.

23 Nia' con cabè' unao xuzixta'oro de que según ca mandado bē Diuzi, yedzagalao ben' Cristo gatinè' huebannè' tatula gaquè' ben' nēro entre yaca ben' useban' Diuzi. Caora na' quixogue'nè' ja benè', chi ben' Israel, chi ben' tula, de que tabala na' naquè' ben' ute usela con nutezi ben' nao xnezè'.

*Bè' Pablo di'idza' cuenda gale rey Agripa inaohuè' xneza Jesús*

24 Cana' una Pablo ru'enè' di'idza' ta gacalenè' cuinnè'. Caora na' unè Festo na' zidzo rēbinè' Pablo:

—¡Pablo, aracatondolo! Tantozi rsèdio' guichi, baodyiagui' pensari quio'.

25 Na'ra bequēbi Pablo rēbinè' lèbè':

—Quele racatondoga', señor Festo, dechan' puro di'idza' li nia'.

26 Dy'ēdi' nezi rey Agripa con cabè' nia'. Quie lena' birdzeba' inia' laonè' como nacan seguro babenè' cabè' bē Jesús, porque cala nagachi'zi uda Jesús psēdinè' benè'.

27 Na'ra una Pablo rēbinè' rey Agripa:

—A ver bi ca nao'. ¿Ralelo' con cabè' una yaca ben' udixogue' xti'idza' Diuzi dza na'la? Seguro na' ralelo' quiejè'.

28 Na'ra una rey Agripa rēbinè' Pablo:

—Iledao'zi bihuelo' gan gaca' ben' nao xneza Jesús.

29 Na'ra una Pablo rēbinè' rey na':

—Chi ledao'zi o chi tazera hua' gan, re'en Diuzi utza'lo' pensari quio' inao'lo' xneza Jesús como ca nē'ēdi', luè' len yugulu ben' nita' niga rzēnaga ca nia', pero sin narioyaquè' caden con ca naca quia'.

30 Na'ra bē' beyudyi una Pablo, bezuli rey Agripa lēnè' Berenice lēnè' gobernador Festo lēnè' yaca los demás ben' re' na'.

31 Yugulujè' ziojè' tzala'la ta hue'jè' di'idza' nacala ca huejè' quie Pablo. Na'ra unajè' de entre lejè':

—Pues ben' niga, bisaque' huero mandado gatinè', ni siquiera udze'ronè' lu'u dyiguiba, porque bibi tamala bēnè'. —Cana' unajè' entre lejè'.

32 Na'ra una rey Agripa rēbinè' Festo:

—Huazaque' usanronè' chan' cuinnè' biunabè' tzionè' gaca justicia quienè' lao rey César. Quie lena' bisaque' usanronè'. —Cana' una rey Agripa rēbinè' Festo na'.

<sup>1</sup> Na'ra psaque'yaquë' ise'ela'yaquë' Pablo ciudad Roma. Lëzi në'ëdi', Lucas, uza'lia'në' ciudad na'. Na'ra psedyinjë' Pablo len yaca los demás ben' preso lao na'a tu capitán, ben' lao Julio. Naquë' xan' tu cue' soldado, ben' rue mandado quie rey César.

<sup>2</sup> Uyu'undo' tu barco quie ciudad Adrimitio. Cati banacate barco na' puesto yeza'n tziona yaca yedyi ga nebaba Asia, caora na' uyu'urë itu ben' lao Aristarco len nëto' lu'u barco na'. Naquë' ben' ciudad Tesalónica ga nebaba Macedonia.

<sup>3</sup> Na'ra beteyu dza tula bdyinndo' ciudad Sidón. Bizí Julio na' bënë' huen quie Pablo, bë'në' lëbë' lato tzionë' tzeyubinë' ga zu yaca amigo quienë'.

<sup>4</sup> Na' guca chopa tzona dza uza'ndo' ciudad Sidón yu'undo' lu'u barco na' ziondo' tzala' isla Chipre. Caora na' rda tu be bedun' fuerte bza'agan barco de modo que bisaque' sa'n lao nisa na'. Quie lena' udendo' zaquë' yega'la cuëta isla na' ga biruen be bedun'.

<sup>5</sup> Cana' bedendo' ga nebaba Cilicia len ga nebaba Panfilia bdyinndo' ciudad Mira ga nebaba Licia.

<sup>6</sup> Pues ciudad Mira na' yexaca capitán na' tu barco uza'n ciudad Alejandría. Lëbarco na' banacaten puesto ta tziona ga nebaba Italia. Caora na' bë capitán na' mandado tzu'undo' lu'u barco tacuenda na' tziozindo' mazera.

<sup>7</sup> Na'ra du chopa tzona dza biuzaque' sa' barco taria dan' bza'aga be bedun' barco. Quie lena' canezi bdyinndo' ciudad Gnido. Lëscan' como nerda be bedun' gan' ziondo' ruza'agan barco, canezi uza' barco bdyinndo' itzala' isla Creta ga re' ciudad Salmón. Pero tu udezindo' na', uyëchondo' ga re' isla na', ga birda be uza'agan barco.

<sup>8</sup> Pero lëscan' canezi uzaque' bdyinndo' ga laona Buenos Puertos. Na' nacan ga'ala' para ciudad Lasea.

<sup>9</sup> Pues como taže udzëndo', baruen žudyi dan' rdando' lao nisa, porque babezi' tiempo quie be bedun' fuerte gula.

<sup>10</sup> Quie lena' una Pablo rëbinë' yaca ben' nita' na':

—Señores, žudyi gula nacan chi tziolëziro barco lao nisa ni, porque huaca cuiaguí' barco lente yua' quien lao nisa ni. Lëzi ruen žudyi udyiaguí'ro cuinro. —Cana' una Pablo gudyinë' lejë'.

<sup>11</sup> Pero capitán na', bibënë' casa quie Pablo den' gulënë' di'idza' unë xan' barco len di'idza' unë yaca ben' rusa' len.

<sup>12</sup> Pero como Buenos Puertos binacan dya'a para cuezando' te tiempo quie be bedun', yugulujë' gu'unjë' yeza'ndo' gan' na', porque gu'unjë' idyinndo' ciudad Fenice. Naca Fenice ciudad ga nebaba isla Chipre birdacazi be bedun' fuerte.

### *Cabë' guca ziojë' lao nisa, ben nisayo be bedun'*

<sup>13</sup> Na'ra uzulao rda be, pero cala be bedun', be ba'azi na' za' be zaca' surla. Pues quie lena' guqueyaquë' huazaque' tzioyaquë' mazera. Caora na' uza'ndo' ziondo', pero bedendo' ga'ala' ru'a isla Creta.

<sup>14</sup> Pero zabeza'ndo' caora uzulao rda tu be bedun' fuerte gula ta za' zaca' noreste ga re' isla Creta. Bza'agan barco de modo que biuzaque' sa' barco lao nisa.

<sup>15</sup> Quie lena' re'en ca re'ennan, bebi'lëndo' barco gan' ziondo' na', porque be bedun' na' psebi'ina len.

<sup>16</sup> Na'ra bedendo' xcu'udzu tu isla dao' laona Claudia ga birda be bedun'. Pero zëdi gula gudan bapcuëndo' tu barco dao' ta za' lao nisa rala' barco že len.

17 Lëscan' bapquiondo' riata duže barco že na' tacuenda gacalen len biyeton lu'u nisa. Pero como rdzebiyaquë' idyin barco ga naca puro yožo, ga laona yožo sirte, na' rdzebiyaquë' hueto barco lu'u yožo na', quie lena' pquinuyaquë' la'ari' že ta rusa' barco. Bëjë' cana' tacuenda na' biidyin barco ga re' yožo na', den' bdyiga be len zion ga tula.

18 Na'ra beteyu dza tula nerda be bedun' fuerte gula. Quie lena' uzulaoyaquë' ru'unyaquë' yua' nu'a barco lu'u nisa.

19 Pues biži na', dza uyune nerdacazi be bedun' na', birbezan. Quie lena' uru'undo' bicala ta nu'a barco lu'u nisa tacuenda gaca barco dza' biyeton lu'u nisa.

20 Zidza guca biblë'ëndo' ni tu bélo dyian guibá. Pues ni obidza biblë'ëndo' tantozi ure' beo ben yusiu'. Quie lena' guquendo' de que huaticazindo' lu'u nisa.

21 Como azio zidza binegaondo', caora na' uzuli Pablo unë' gudyinë' nëto': —Señores, como bigulele cabë' unia' dza na', bigu'unle yega'nro isla Creta, quie lena' raca tamala quiero niga aoniti yua' nu'a barco.

22 Pero na'a bidëbile, porque ba'ala'cazi huabiagui' barco, ra'o na' bigatiro.

23 Pues naca' ben' quie Diuzi. Yugu dza rionla'adya' lëbë'. Na'ra nidze' use'ela' Diuzi tu ángel quienë' detilalaonë' në'ëdi'.

24 Na' unë' gudyinë' në'ëdi': “Bidzebo', Pablo, porque tanun quie Diuzi na' tzesëlo' lao rey César. Quie lena' bigati ni tu ben' za'lë luë' lu'u barco.” Pues cana' una ángel rëbinë' në'ëdi'.

25 Na' nia' le'e bidzebile, porque nacan seguro uzu Diuzi di'idza' quienë' con cabë' unanë' në'ëdi'.

26 Pero decazide idyinro tu isla ga ilaro. —Pues cana' una Pablo rëbinë' lejë'.

27 Pero cana'zi guca quie barco. Bdyiga be len hasta guca chida' dza bdyinndo' ga re' tu nisadao' laona Adria. Pues du gatzo yëla gucabë' ben' rapa barco de que baredyinndo' ru'a yu bidyi.

28 Na'ra caora brixiyaquë' yela' zitu' quie nisa, gucan treinta y seis metro. Pues itu chi' brixiyaquë' tatula, gucan veintisiete metro.

29 Na'ra como bdzebiyaquë' idyinjë' ga re' yaca yo yela cuiagui' barco, quie lena' ziojë' zham barco pchizayaquë' tapa guiba zi'i pquiojë' riata zion lu'u nisa tacuenda cue' barco tuzi lugar. Na'ra du rdëbitzeguejë' ulezajë' tzeni'.

30 Pero yaca ben' rapa barco gu'unyaquë' tzioyaquë' huežuno. Quie lena' uzulaoyaquë' rchizayaquë' barco dao' lao nisa, dechan' uzi'jë' yë' unajë':

—Nëto' ichizando' yaca guiba zi'i tacuenda cue' barco dyë'ëdi birudyiga be len.

31 Biži udixogue' Pablo capitán na' lente yaca los demás soldados con cabë' rue ben' rapa barco unë' rëbinë' lejë':

—Chi abžuno yaca ben' niga lu'u barco, bira saque' ilale. Huatile lu'u nisa ni.

32 Quie lena' uchugu yaca soldado riata ta nerio barco dao' bguinun lu'u nisa.

33 Na'ra du bala unëyue Pablo lejë' gaojë' ledao' unë' rëbinë' leyaquë':

—Azio tu chida' binegaoro, canezi gusiro.

34 Pues na' rnaban gaoro ledao' tacuenda yezi'ro fuerza tatula. Bidzebile, porque ganu le'e gati, ni tule bigacale zi'.

35 Ude beyu diya una Pablo cana', bëxonë' tu yëta xtila bë'lënë' Diuzi di'idza' gudyinë' Diuzi diuxcalelo'. Na'ra bžuzunë'n uzulaohuë' raonë'n.

36 Caora na' uzulao yugojë' raorëyaquë' užela'adyi'jë' aodaoyaquë' abelojë' dyë'ëdi.

37 Entre tu nêto' yu'u lu'u barco, nacando' doscientos setenta y seis ben' udao yêta xtila.

38 Ude beyudyi udaojê' abelojê', na' uru'unjê' mazera trigo lu'u nisa ta yedza' barco.

### *Barco ga yu'ulêjê' Pablo udyiagu'n lu'u nisa*

39 Caora uyenî' na', blê'ê ben' rapa barco de que ru'a yu bidyi bedyinndo', den' gabi bezaquejê' ga parte. Pero caora blê'êyaquê' re' tu ca lagun ga naca puro yožo, gu'unjê' udyigajê' barco na'.

40 Caora na' uchugoyaquê' riata nario guîba zi'i tacuenda na' sa' barco tatula. Na'ra bega'n guîba zi'i lu'u nisa. Lêscan' uxêdyijê' du nario yaca yaga ta'a ta rusa'yaquê' barco. Lêscan' pquiyoaqué' tu la'ari' ze sibi guicho barco na' tacuenda udyiga be len idyinndo' ru'a yu bidyi ga naca puro yožo.

41 Pero bizi na' ude barco ga regu'udi' chopa benono na'. Lêgan' na' bêto barco lu'u yožo re' lu'u nisa. Na' bega'n barco lagazi bêton lu'u yožo na'. Bira uzaque' yerona. Como legazi bdyiga benono len, uzulao byožo žbam barco.

42 Caora na' gu'un yaca soldado gutijê' ben' preso tacuenda na' bisaque' užunoyaquê' xubayaquê' lao nisa.

43 Pero bibê' capitán na' lato gutijê' ben' preso, porque bire'ennê' gutijê' Pablo. Pues quie lèna' bènê' mandado con yaca ben' raca ržuba yao ta yerojê' lu'u barco idyinjê' ru'a yu bidyi.

44 Lêscan' gu'unnê' yero nu ben' biraca žuba yao, pero re'ennê' xubajê' nu lao pedazo yaga quie barco tacuenda idyinrêjê' ru'a yu bidyi. Cana' užacando' bènđo' gan berondo' lu'u barco ulando' bedyinndo' ru'a yu bidyi.

## 28

### *Cabê' guca bdyin Pablo ga re' tu isla lao Malta*

1 Na'ra bê' ulando' bedyindo' ru'a isla, bedzelendo' yaca ben' nita' isla. Bizi na' unayaquê' nêto' de que isla na' laona Malta.

2 Caora na' beyêchi'la'adyi'jê' nêto', ulêchijê' tu gui' ze bêjê' invitar cue'ndo' ru'a gui' tacuenda yedze'endo', porque binecueza nisa yo na' beyagando'.

3 Na'ra yexi' Pablo ledao' huaga bidyi ta udyianê'n lao gui'. Caora zênê' rudyianê' huaga na', bero tu bêla snia lu'u huaga. Bžunoba' dan' rdzebiba' gatiba' lu'u gui'. Caora na' udi'idyiba' na'a Pablo udi'inraba'n bigu'umba' usamba' nê'ê.

4 Caora blê'ê ja ben' nita' na' cabê' guca quie Pablo, na'ra unayaquê' rêbiyaquê' laguedyiyaquê':

—Seguro na', ben' ni bêtîê' benê', porque ba'ala'cazi bigutinê' lu'u nisa ulanê', re'encazi Diuzi gatinê'.

5 Pero psisi Pablo lèba' bguinoba' lu'u gui'. Gabi guca quienê'.

6 Pues yaca ben' nita' na' bega'nyaquê' rbezajê' tzu'u nê'ê gui igu'unnê' layu gatinê'. Pero cati ude tiempo blê'êyaquê' gabi guca quienê', na'ra ptzal'jê' pensari quiejê' najê' naca Pablo tu diuzi.

7 Na'ra ga bdyinndo' nacan ga'ala' ga de layu quie tu ben' lao Publio. Naquê' ben' rnabê' quie ben' nita' isla Malta. Bènê' invitar nêto' sulêndo' lèbê' lidyinê'. Lao tzona dza uzundo' lidyinê' con ta bdzioguendo' bènê'n.

8 Na' guca dza na' de xuzi Publio lao belaga dan' raca žhue'nê'. Uyu'unê' tala, guquê' pquieco'. Bizi uyo Pablo yeyubinê' lèbê' bda'nê' nê'ê lè'ênê' beyacanê'.

9 Bizi yaca ben' nita' isla na', ben' raca žhue', caora unezijê' cabê' guca quie xuzi Publio, na'ra bla'jê' gan' nita'ndo' beyue Pablo leyaquê'.

<sup>10</sup> Quie lena' legazi bedaohuejè' uzulèndo' lejè'. Lèzi caora bdyin hora ta yeza'ndo', bidayaquè' dehua'ayaquè' con ta rdzioguendo'.

*Ca guca bdyin Pablo ciudad Roma*

<sup>11</sup> Bè' baode tzona biu', bedzelendo' tu barco ta uza' ciudad Alejandría. Bazio tzona biu' bega'nnan isla Malta tu ude biu' zaga. Guicho barco na' da' chopa ídolo. Tuna laona Cástor, na' ituna laona Pólux. Caora na' uyu'undo' lu'u barco na' beza'ndo' isla Malta

<sup>12</sup> bdyinndo' ciudad Siracusa ga bega'nndo' tzona dza.

<sup>13</sup> Na' uyu'undo' lu'u barco tatula uza'ndo' na' bedendo' ru'a yu bidyi hasta bdyinndo' ciudad Regio. Beteyu dza tula, uzulao rda tu be bedun' ta za' zaca' sur. Quie lena' uza'ndo' ziondo', pero chopa dzazi guca bdyinndo' ciudad Puteoli. Na'ra ciudad Puteoli berondo' lu'u barco.

<sup>14</sup> Lèyedyi na' bedilando' chopa tzona ben' nao xneza Jesús. Bèjè' invitar nètò' ta yega'n'lèndo' leyaquè' tu xman. Ude beyudyi na', uza'ndo' ni'ando' ziondo' ciudad Roma.

<sup>15</sup> Na'ra ciudad Roma nita' ja bichiro ben' nao xneza Jesús. Caora beyaquè' baziondo' quiejè', bidayaquè' delezayaquè' nètò' tu neza. Balajè' bidajè' hasta ga laona Foro de Apio, ibalajè' bidajè' hasta ga laona Tres Tabernas. Cati blè'è Pablo bazèjè' rbezajè' idyinnè', lega bedaohuenè' gudyinè' Diuzi diuxcalelo'.

<sup>16</sup> Na'ra caora bdyinndo' ciudad Roma, psedyin capitán yaca ben' preso lao xan' ben' rapa preso, pero bè'nè' Pablo lato ga sunè' aparte conlè tu soldado, ben' gapa lèbè'.

*Pablo na' bdze'nè' di'izda' lao ben' Israel, ben' nita' ciudad Roma*

<sup>17</sup> Baguca tzona dza, guzi Pablo yaca ben' r nabè' quie ben' Israel nita' ciudad Roma. Na'ra cati babedupajè' unè' gudyinè' lejè':

—Bicha', re'enda' inia' le'e bibi tamala bia' contra laguedyiro ben' Israel. Lèscan' cala psanla'adya' costumbre quie xuzixta'oro. Ba'ala'cazi bibi tamala bia', bëyaquè' nè'èdi' preso ciudad Jerusalén psedyinyaquè' nè'èdi' lao ben' r nabè' quie ben' romano.

<sup>18</sup> Na'ra ude beyudyi pquèpi yaca ben' r nabè' nè'èdi', gu'unyaquè' yeroga' libre, porque gabi dula' xquia quia' de hueyaquè' mandado gatiá'.

<sup>19</sup> Pero como yaca ben' Israel bigu'unjè' yeroga' libre, unaba' gaca justicia quia' lao rey César. Pues cala re'enda' gaohua' yaca ben' yedyi quia' xquia, pero tuz ca re'enda', re'enda' gaca justicia.

<sup>20</sup> Caora na' baguza' le'e, porque re'enda' deyubile nè'èdi' ta hue'lia' le'e di'izda'. Pues nun quie rbeza' idyin dza useban Diuzi yugu ben' huati, laga ca rbezale le'e len yaca los demás ben' Israel, lena' pquioyaquè' nè'èdi' con caden. —Cana' una Pablo gudyinè' lejè'.

<sup>21</sup> Na'ra unayaquè' rëbiyaquè' Pablo:

—Binela' guichi quie ben' nita' ciudad Jerusalén. Binenayaquè' nètò' quie asunto quio'. Lèscan' nu bichiro ben' Israel, ben' uza' na' bla' niga, cala nayaquè' naco' ben' mala.

<sup>22</sup> Na'ra re'enndo' cuinzo' yèbo' nètò' con cabè' naca pensari quio', porque duze parte rnayaquè' contra pensari netza' quio'. —Cana' unayaquè' gudyinjè' Pablo.

<sup>23</sup> Cana' guca bzujè' tu dza na' bdyin ja ben' zè žan yu'u gan' zu Pablo na'. Caora bdyin ja benè' na', uzulaonè' rguixogue'nè' leyaquè' con cabè' naca Diuzi ben' r nabè'ra lao yugulute. Cana' zila hasta zadzè' udixogue'nè' lejè' con cabè' rna di'izda' bzu Moisés len yaca los demás ben' profeta lè'è guichi tacuenda inaojè' xneza Jesús.



<sup>24</sup> Bizi na' ca di'idza' gudyi Pablo leyaquë', balajë' bzënegajë' gulejë', pero ibalajë' bigulecazijë' con cabë' unë' gudyinë' lëjë'.

<sup>25</sup> Na'ra como binaga'nyaquë' de acuerdo entre lejë', uzulaojë' redzatza-yaquë'. Na'ra una Pablo gudyinë' leyaquë':

—Bizi bigala'adyi'le di'idza' li unë Bichi Be quie Diuzi dza na'te caora use'elë' xuzixta'oro Isaías rëbinë' lëbë' cani:

<sup>26</sup> Uyo yeguëdyi ben' Israel con cabë' una Diuzi porque unë' de que:

Ba'ala'cazi ise'ela' nu ben' quixogue' leyaquë' con cabë' rna xti'idza', bihue quieyaquë'n.

Ba'ala'cazi ilë'ëyaquë' dyë'ëdi cabë' naca xneza', bitzu'uyaquë' pensari inaoy-aquë'n.

<sup>27</sup> Ben' zidi gula nacajë'.

Bire'enjë' yeyaquë' con cabë' rna xti'idza'.

Bire'enjë' inezijë' cabë' naca xneza'.

Bire'enjë' utza'jë' pensari quiejë' tzu'ujë' pensari quia' ta bira inao dula' xquia quieyaquë' leyaquë'.

Cana' una Bichi Be quie Diuzi dza na'te.

<sup>28</sup> Na'ra nernë Pablo rëbinë' lëjë':

—Ulezëcara nagale dyë'ëdi, porque ni rnia' le'e de que abdyin dza ise'ela' Diuzi ben' quixogue' con cabë' rna xti'idzë' de entre ben' binaca ben' Israel tacuenda ute uselanë' leyaquë' idyinyaquë' guibá ga zu Diuzi. Lejë' sí, re'encazijë' yeyaquë' con cabë' rna xti'idza' Diuzi. —Cana' una Pablo gudyinë' lejë'.

<sup>29</sup> Na'ra dan' unanë' cana', legazi uzulaoyaquë' ruejë' huenë de entre leyaquë' bedzatzajë' zeyojë'.

<sup>30</sup> Bizi Pablo na' uzunë' ichopa iza ciudad Roma rguizonë' quie yu'u ga zunë' lao xa'nnan. Redaohuenë' nutezi ben' rio rayubi lëbë'.

<sup>31</sup> Bë'yaquë' lato rguixogue'në' benë' naca Diuzi ben' rnabë' lao yugolute. Lëscan' bë'yaquë' lato rguixogue'në' benë' con cabë' rna xti'idza' Señor quiero Jesucristo. Nunu bë' lëbë' zëdi.

Pues cana' užaca Pablo dza na'te. Amén.

## DI'IDZA' BZU SAN PABLO APÓSTOL LĒ'Ē GUICHI, USE'ELA'NĒ'N LAO CIUDAD ROMA

*Baose'ela' Pablo guichi ni lao ben' nao xneza Jesús, ben' nita' ciudad Roma*

<sup>1</sup> Nē'ēdi', Pablo, naca' ben' zulao xa'nro Jesucristo. Ulio Diuzi bdē'nē' nē'ēdi' apóstol quienē' ta tzetixogui'a yaca benē' di'idza' la'iya quienē'.

<sup>2</sup> Azio zē iza bē Diuzi ca unanē' huenē' con cabē' rna di'idza' la'iya quienē'. Quie lena' bēnē' mandado bzu yaca ben' naca profeta quienē' xti'idzē' lē'ē guichi.

<sup>3</sup> Lēdi'idza' na' rguixogue'n quie xa'nro Jesucristo, zi'i Diuzi. Na'ra con cabē' gologuē' guquē' be'mbyu, cana' naquē' zi'i suba rey David.

<sup>4</sup> Pero con cabē' gutiē' bebannē' tatula, lena' bzioñe'e Bichi Be quie Diuzi ra'o de que naca Jesucristo zi'i Diuzi, ben' de yela' r nabē' quie.

<sup>5</sup> Nun quie Jesucristo bē Diuzi tu cule ze quando', use'elē' nēto' tzetixogue'ndo' xti'idzē' cuenda gata' ben' nao xneza Jesús duze yedyi layu huejē' Jesucristo ben' ze.

<sup>6</sup> Lēscan' le'e, ulio Diuzi le'e gacale ben' nao xneza Jesús.

<sup>7</sup> Lena' use'ela' guichi ni lao le'e ben' nita' ciudad Roma nun quie nedyē'ē Diuzi le'e, ulionē' le'e gacale ben' la'iya quienē'. Rulidza' Xuzi'ro Diuzi len xa'nro Jesucristo ta huela'iyajē' le'e, cuēchijē' chizi lu'u guichi laxta'ole.

*Gu'un Pablo tziogue' ciudad Roma*

<sup>8</sup> Tanēro re'enda' inia' le'e de que lao Jesucristo rulidza' Diuzi yēpa'nē' diuxcalelo' por lao le'e, como dan' yugulu ben' nita' lao yedyi layu arnēyaguē' ca tadya'a ruele, rue quiele quie Diuzi.

<sup>9</sup> Du guicho du la'adya' rua' ca mandado rue Diuzi nē'ēdi', rguixogui'a yaca benē' cabē' naca quie zi'inē'. Naca Diuzi testigo de que yugu dza reza'la'adya' le'e rulidza' Diuzi ta gacalēnē' le'e.

<sup>10</sup> Yugu dzacazi rulidza' Diuzi chi rapē' gusto ta guida' ideyuba' le'e.

<sup>11</sup> Cana' re'enda' idena'a le'e ta idesēdira' le'e ta tzioñe'ele mazara ca naca pensari quie Diuzi cuenda huera quiele xti'idza' Diuzi.

<sup>12</sup> Cana' re'enda' cuenda uxela'adya' le'e, hue quiele xti'idza' Diuzi, lēscan' cuenda uxela'adyi'le nē'ēdi', hue quia' xti'idza' Diuzi ca naca quiero rzudyi'ilēro Diuzi.

<sup>13</sup> Bicha', re'enda' inezile lega raca' pensari guida' ideyuba' le'e pero birzaque'da'. Re'enda' guida' ta gacalia' le'e inaorale mazara xneza Diuzi cabē' bia' gacalia' yaca ben' tula, ben' nita' yedyi tula.

<sup>14</sup> Lega de compromiso quia' quixogui'a yugulu benē' xti'idza' Diuzi, la'acazi ben' nita' lao ciudad ze, la'acazi ben' nita' lao yedyi dao', la'acazi ben' rioñe'e, la'acazi ben' birioñe'e.

<sup>15</sup> Por tu parte quia', zucaza' dispuesto guida' laole ciudad Roma idetixogui'a le'e di'idza' la'iya quie Diuzi.

*Napan fuerza valor xti'idza' Diuzi*

<sup>16</sup> Biredue'da' quixogui'a ja benē' di'idza' la'iya quie Diuzi, como dan' napan fuerza valor quienē' ta ute uselanē' nutezi ben' hue quie xti'idzē' gata' yela' neban quienē' tuzioli. Tabelaora na' te ila yaca ben' Israel, pero lēscan' nacan belao te ila yaca ben' tula, ben' binaca ben' Israel.

17 Rguixogue' di'idza' la'iya quie Diuzi ra'o cabè' re'ennè' sudyi'ilèro lèbè' ta ilè'ènè' ra'o ben' laxta'o yèri. Tuzi ta huero sudyi'ilèro lèbè', cana' ilè'ènè' ra'o ben' laxta'o yèri. Lena' rguixogue'n lè'è guichi la'iya quie Diuzi cani: "Nu ben' ilè'è Diuzi ben' laxta'o yèri, hue' Diuzi lèbè' yela' neban tuzioli nun quie dan' rzudyi'ilènè' lèbè'."

### *Napa yugulu benè' dula' xquia*

18 Na' zu Diuzi guibá huenè' castigo quie yugulu ben' mala, ben' rue ta biraxenè'. Yela' ben' mala quiejè' biruejè' lato tzu'ujè' pensari quie Diuzi ta inezijè' ta naca tali quie Diuzi.

19 Dyè'èdi nezijè' zu Diuzi guibá, como dan' cuin Diuzi blu'enè' leyaquè' zunè' guibá rlè'èyaquè' ta bzalonè' ulèchinè' lao yedyi layu.

20 Rulu'ecazin zu Diuzi guibá la'acazi bisaque' ilè'èroguè', porque huazaque' ilè'èro ta ulèchinè' lao yedyi layu. Desde dza bzalo Diuzi yedyi layu, bablu'en zucazi Diuzi guibá, de yela' r nabè' quienè' tuzioli. Quie lena' bisaque' ina yaca benè' binezijè' chi zu Diuzi guibá.

21 Ba'ala'cazi nezijè' zu Diuzi guibá, birapala'njè' lèbè', nica rëbijè' lèbè' dixcalelo', pero yu'uyaquè' pensari mala, pensari bibizaca'n. Naca laxta'ojè' laxta'o yaladyi', rdayaquè' lao lato lao chula.

22 Ba'ala'cazi najè' nacajè' ben' rioñe'e, dechan' birioñe'ejè'.

23 Lao laza rionla'adyi'jè' Diuzi, ben' zu tuzioli, rionla'adyi'jè' yaga ta pcha'a yaca benè', bëjè' forma quie benè' ta bizu tuzioli. Hasta rionla'adyi'jè' yaga pcha'a yaca benè', bëjè' forma quie nu bguini, nu bëla, nu bia zu tapa ni'e.

24 Quie lena' apsanla'adyi' Diuzi lejè' ta ruejè' tamala ca raxejè'. Quie lena' rueljè' laguedyi'jè' ta naca stu' sla'na.

25 Cana' raca quiejè', como dan' birue quieyaquè' xti'idza' Diuzi. Quie lena' apsanla'adyi' Diuzi lejè' ta hue quieyaquè' ta binaca tali. Cala Diuzi rionla'adyi'jè'. Lao laza Diuzi, rionla'adyi'jè' ta bzalo Diuzi ulèchinè' lao yedyi layu. Birionla'adyi'jè' tuzi Diuzi, ben' reya'ala' tzionla'adyi'jè' tuzioli. Amén.

26 Quie lena' apsanla'adyi' Diuzi leyaquè' ta rueyaquè' ta naca stu' sla'na quiejè'. Hasta nigula quiejè' bira re'enjè' gasilèjè' be'mbyu quiejè'. Bare'enjè' gasilèjè' laguedyi nigulajè' ta hueljèjè' laguedyi nigulajè' ta naca stu' sla'na.

27 Lëscan' ca raca quie yaca nigula quiejè', cana' racarè quie yaca be'mbyu. Bira re'enjè' gasilèjè' nigula quiejè'. Barza'la'adyi'jè' gasilèjè' laguedyi byujè' ta hueljèjè' laguedyi byujè' ta naca stu' sla'na. Tanun quie ruejè' cana', racajè' castigo rbiagui'neza cuerpo quiejè'.

28 Como bire'enyaquè' huebè'yaquè' Diuzi, lena' apsanla'adyi' Diuzi leyaquè' ta yu'uyaquè' pensari bayatza rueyaquè' ta naca stu' sla'na.

29 Lega raxejè' huejè' tabayatza. Rutila rudzagajè' con nutezi nigula, rguilojè' ga huejè' tamala, rzala'adyi'jè' dumi, re'enjè' gaca tamala quie laguedyijè', racazè'jè', rutijè' benè', rguilojè' dila, rzi'jè' yè', rlè'èjè' laguedyijè' ben' mala, ru'eyaquè' di'idza' bizu.

30 Rnèjè' contra nutezi benè', barnaya'jè' Diuzi, birapajè' respeto yaca benè', ruejè' cuinjè' ben' ze, rguilojè' ruejè' tamala, biralejè' quie xuzi zna'jè'.

31 Birioñe'ejè' biruzujè' di'idza', binedyè'èjè' familia quiejè', birzi'zejè' quie benè', bireyèchi'la'adyi'jè' benè'.

<sup>32</sup> Ba'ala'cazi nezijè' cabè' nachuguli Diuzi quiejè' huejè' castigo quiejè' tziojè' lao gui' gabila, nenaøjè' neruejè' pensari mala quiejè', redaohuejè' re'enjè' hue yaca ben' tula cabè' ruejè'.

## 2

### *Puro ta naca tali ina Diuzi*

<sup>1</sup> Quie lena' bide bihuele ta huele defender cuinle lao Diuzi, nuti'tezi nacale, chi rnale rue laguedyile tamala, na' le'e tu lèbizi ziole ruele cabè' tamala rnale rue laguedyile. Conlè di'idza' rero lu'u ru'ale rulu'en lèscan' le'e nacale ben' mala.

<sup>2</sup> Neziro ta naca tali rchuguli Diuzi huenè' castigo nu ben' rue tamala.

<sup>3</sup> Le'e rnale rue laguedyile tamala, na' lèbizi ziole ruele tamala, ¿raquele bihue Diuzi le'e castigo?

<sup>4</sup> ¿Quele aoquixile binezile ga huen dyin yela' ben' huen quie Diuzi? ¿Quele binezile rue Diuzi tahuen quiele rbezè' yetza'le pensari quiele inaole xnezè'?

<sup>5</sup> Pero ben' yaladyi' nacale, bire'enle yetza'le pensari quiele. Quie lena' huata' castigo huala quiele dza hue Diuzi juicio. Huachuginè' ta tzu'u ni'a xnezi quiele.

<sup>6</sup> Huaguizunè' quie quiero según ca bëro.

<sup>7</sup> Hue'nè' yela' neban tuzioli yaca ben' biyeyati hue tahuen yugu dza, yaca ben' re'en gata' yela' bala'ana quiejè' lao Diuzi, yaca ben' rbeza gata' quieyaquè' ta biyeyudyi yedu.

<sup>8</sup> Pero huadza' Diuzi huenè' castigo yaca ben' bire'en uzu di'idza' quienè', yaca ben' bire'en inao neza li quienè', yaca ben' re'en inao neza mala.

<sup>9</sup> Yugulu ben' rue tamala yedzagalaoyaquè', huata' tazèdi gula quieyaquè'. Chi ben' Israel yedzagalaorayaquè', pero chi ben' tula, lèscan' yedzagalaoyaquè'.

<sup>10</sup> Pero yugulu ben' rue tahuen, hue Diuzi leyaquè' ben' ze, cuèchinè' chizi laxta'oyaquè'. Chi ben' Israel hueranè' leyaquè' ben' zera, pero chi ben' tula, lèscan' huenè' leyaquè' ben' ze.

<sup>11</sup> Cana' hue Diuzi, porque birue Diuzi natza'la quie yaca benè', tuzcazi ca ruenè'.

<sup>12</sup> Pues yugulu ben' rue xquia, pero binezijè' con cabè' rna lè'è guichi ley na' pca'n Diuzi lao na'a Moisés, huachuguli Diuzi lèjè', pero bihue Diuzi cuenda con cabè' rna lè'è guichi ley na'. Lèscan' yaca ben' rue xquia nezijè' con cabè' rna lè'è guichi ley na', huachuguli Diuzi lèjè' huenè' cuenda con cabè' rna lè'è guichi ley na'.

<sup>13</sup> Birlè'è Diuzi ben' laxta'o yèri ben' ruzènagazi con cabè' rna lè'è guichi ley na', na' biruzunè' di'idza' con cabè' rnan. Rlè'è Diuzi ben' laxta'o yèri ben' ruzènaga con cabè' rna lè'è guichi ley na', na' ruzunè' di'idza' con cabè' rnan.

<sup>14</sup> Na'ra quie ja ben' binaca ben' Israel, cati ruzujè' di'idza' con cabè' rnan lao guichi ley na', la'acazi binezijè' chi de guichi ley pca'n Diuzi lao na'a Moisés, lena' rulu'en naca pensari quiejè' conforme con cabè' rnan lè'è guichi ley na'.

<sup>15</sup> Pues nun quie naojè' neza dya'a, lena' rulu'en yu'ujè' pensari con cabè' rnan lè'è guichi ley quie Diuzi. Ca naca pensari yu'ujè', lena' rulu'en quiejè' nezcazijè' ca re'en Diuzi huejè'. Cuingazi pensari quiejè' yu'ujè' rchugulina quiejè' chi ruejè' tahuen, chi ruejè' tamala.

<sup>16</sup> Dza hue Diuzi juicio huachuginè' con cabè' bë yaca ben' raque n-gachi'zi bèjè' bin' bèjè'. Lao na'a Diuzi huachuguli Jesucristo yaca benè' conforme con cabè' rna di'idza' la'iya quienè'. Lèdi'idza' na' rguixogui'a yaca benè'.

*Ni rnan quie ben' Israel len guichi ley pca'n Diuzi lao na'a Moisés*

17 Pero le'e rnale nacale ben' Israel. Raquele huezi' Diuzi le'e nun quie naole guichi ley pca'n Diuzi lao na'a Moisés. Ruele dzalo inale nacale ben' quie Diuzi.

18 Nezile ca re'en Diuzi hue yaca benë'. Lëscan' rsëdile con cabë' rna lë'ë guichi ley quie Diuzi ta inezile bi huele huele tadya'a.

19 Raquele rioñe'ele, bidzebile uzioñe'ele ben' birioñe'e. Raquele dyin quiele uzioñe'ele ben' rda lao lato lao chula.

20 Raquele inezile usëdile yaca ben' birioñe'e. Raquele inezile ulu'ele yaca ben' binenezi con cabë' rna lë'ë guichi ley pca'n Diuzi lao na'a Moisés ga rguixogue'n quie yela' rioñe'e len yela' li quie Diuzi.

21 Chi le'e rusëdile ben' tula, ¿bixquien' birusëdile cuinle? Chi le'e yëbile benë' bireya'ala' cuanle quie benë', ¿bixquien' rbanle quie benë'?

22 Chi le'e yëbile benë' bireya'ala' utilale nigula tula, ¿bixquien' rutilale nigula tula? Chi le'e ratzale ilë'ële yaca ídolo, ¿bixquien' ru'ule lu'u idao' ga rdyia yaca ídolo rbanle ta zaca' ta yu'u dumi quieyacan?

23 Ruele dzalo inale tadya'a naca guichi ley pca'n Diuzi lao na'a Moisés, pero rutitule Diuzi biruzule di'idza' cabë' di'idza' rnën lë'ë guichi ley na'.

24 Quie lena' rna lë'ë guichi ley na' cani: "Yaca ben' binaca ben' Israel, rnëbižoyaquë' quie Diuzi, pero dula' quiele rnajë' cana'."

25 Talicazi de ga huen dyin uzule tu xëdyidao' cuinle ca mandado bë Diuzi dza na', pero solamente chi hue quiele quie guichi ley pca'n Diuzi lao na'a Moisés. Porque chi bihue quiele quie guichi ley na', na' naca quiele ca quie ben' bizu xëdyidao' cuine.

26 Na' chi ruzu ben' bizu xëdyidao' cuine di'idza' quie guichi ley pca'n Diuzi lao na'a Moisés, na' hualë'ë Diuzi lëjë' ca quie ben' zu xëdyidao' cuine.

27 Pues yaca ben' bizu xëdyidao' cuine, pero ruzuyaquë' di'idza' con cabë' rna lë'ë guichi ley pca'n Diuzi lao na'a Moisés, lëjë' huachugulijë' quiele le'e, ben' biruzu di'idza' con cabë' rnan, la'acazi napale le'e guichi quie ley, la'acazi zu xëdyidao' cuinle.

28 Binaca dugalo ben' Israel yaca ben' bë'ruezi con cabë' rna Diuzi. Lëscan' binaca dugalo ben' Israel yaca ben' zu xëdyidao' cuine, pero birue quienë' xti'idza' Diuzi.

29 Na' naca dugalo ben' Israel ben' rue quie du guicho du la'adyi' ca na Diuzi. Lëscan' cati hue quiero du guicho du la'adyi'ro con cabë' rna Diuzi, lena' rulu'en dugalo nacaro ben' zu xëdyidao' cuinro. Nu ben' rue quie con cabë' rna Diuzi, rlë'ë Diuzi lëbë' ben' laxta'o yëri.

### 3

1 ¿Ca bizi nacara tahuen quie ben' Israel ca ben' binaca ben' Israel? ¿Gaži huen dyin chi zu ben' Israel tu xëdyidao' cuinjë'?

2 Tazë nacara huen quiejë', tazë rson de nacara tahuen quiejë'. Pues pca'n Diuzi di'idza' quienë' lao na'ayaquë'.

3 Tali na' bigule bala ja ben' Israel con cabë' gu'un Diuzi huejë' dza na', pero quie lena', ¿bi pensari huero? ¿Huero pensari lëscan' bihue Diuzi cabë' unanë' huenë'?

4 ¡Bireya'ala' huero pensari cana'! Seguro na' hue Diuzi cabë' unanë' huenë' conforme cabë' naca tali, la'acazi chi ben' huizi' yë' yugulu ben' nita' lao yedyi layu. Lena' rguixogue'n lë'ë guichi la'iya quie Diuzi cani: Tanun quie di'idza' rero lu'u ru'a Diuzi, banezi ja benë' naca Diuzi ben' rue tali.

Cati ilè'ëyaquè' ca rue Diuzi, na' inajè': "Diuzi naquè' ben' laxta'o yèri."

<sup>5</sup> Pero chi nacan tali de que por nun quie yela' ben' mala quiero, lena' rulu'en naca Diuzi ben' huen, ¿ca bi pensari reya'ala' huero? ¿Huero pensari naca Diuzi ben' mala chi huenè' castigo nu ben' mala? (Pensari quie benè' rnia', cala pensari quie Diuzi.)

<sup>6</sup> Bireya'ala' huero pensari naca Diuzi ben' mala. Chi naca Diuzi ben' mala, bide derecho quienè' ichugulinè' ben' nita' lao yedyi layu, inanè' nu ben' bè tahuen, nu ben' bè tamala.

<sup>7</sup> Lèscan' chi nacan tali de que por nun quie yela' huizi' yè' quiero, lena' rulu'en naca xti'idza' Diuzi di'idza' li, ¿bixquien' hue Diuzi castigo nu ben' huizi' yè'?

<sup>8</sup> Chi tali nacan cana', ¿cala tahuen na' huero tamala tacuenda gata' tadya'a? Cana' na bala ja benè', rnajè' cana' inando' rguixogue'ndo' benè'. Pero pensari mala yu'ujè', como dan' cala cana' inando' rguixogue'ndo' benè'. Dula' quiezijè' hue Diuzi lèjè' castigo.

### *Napa yugulu benè' dula' xquia*

<sup>9</sup> ¿Ca bi pensari reya'ala' huero? ¿Huero pensari naca ben' Israel ben' dya'ara ca ben' tula, ben' binaca ben' Israel? ¡Bisague! Bireya'ala' huero pensari cana', como dan' napa yugulu benè' dula' xquia, la'acazi ben' Israel, la'acazi ben' binaca ben' Israel. Yugulujè' rnao dula' xquia quiejè' lèjè'.

<sup>10</sup> Cana' rguixogue'n lè'è guichi la'iya quie Diuzi cani: Ganu ben' laxta'o yèri zu, ni tuyaquè'.

<sup>11</sup> Bizu ben' rioñe'e.

Bizu ben' nuebè' Diuzi.

<sup>12</sup> Yuguluyaquè' rdayaquè' lao lato lao chula.

Rnaoyaquè' neza mala ga cuiagui'yaquè'.

Bizu ben' rue tahuen, ni tuyaquè'.

<sup>13</sup> Ca tu yerobá neyalon ga rla' zigo, cana' naca di'idza' rero lu'u ru'ayaquè'. Ta rzi'jè' yè' ru'elèjè' benè' di'idza'.

Ca veneno quie bèla naca di'idza' rero lu'u ru'ayaquè'.

<sup>14</sup> Rudze'de'yaquè' laguediyaquè', rnèjè' di'idza' zi'.

<sup>15</sup> Tariara rdayaquè' rbe'ndiyaquè' benè' ta gutiyaquè' leyaquè'.

<sup>16</sup> Con ga zioyaquè' rudiyagui'yaquè' benè', ruca'nyèchi'yaquè' laguediyaquè'.

<sup>17</sup> Bineziaquè' tzu'ulèyaquè' laguediyaquè' dyè'èdi.

<sup>18</sup> Ni siquiera ruejè' pensari chi hue Diuzi lèjè' castigo.

<sup>19</sup> Cana' rnèn lè'è guichi la'iya quie Diuzi. Na'ra ra'o neziro con cabè' rna lè'è guichi ley pca'n Diuzi lao na'a Moisés dza na'te. Neziro rnabè'n lao ja ben' nao len cuenda biibin yaca benè' bi yequèbiyaquè' lao Diuzi dza gaca juicio, dza rue yugulu benè' cuenda lao Diuzi.

<sup>20</sup> Pero quele por nun quie dan' rue quiero con cabè' rna lè'è guichi ley pca'n Diuzi lao Moisés ilè'è Diuzi ra'o ben' laxta'o yèri. Conforme con cabè' rna lè'è guichi ley na' neziro de dula' xquia quiero.

### *Ilè'è Diuzi ra'o ben' laxta'o yèri tanun quie dan' rzudyi'ilèro Cristo*

<sup>21</sup> Pero na'a barioñe'ero cabè' nacan ilè'è Diuzi ra'o ben' laxta'o yèri. Cala por nun quie chi hue quiero con cabè' rna lè'è guichi ley pca'nnè' lao na'a Moisés ilè'ènè' ra'o ben' laxta'o yèri. Lena' rguixogue'n lè'è guichi ley na' lente ja guichi bè ja ben' udixogue' di'idza' quie Diuzi dza na'te.

<sup>22</sup> Tanun quie dan' rzudyi'ilèro Jesucristo, cana' ilè'è Diuzi ra'o ben' laxta'o yèri. Ilè'è Diuzi ben' laxta'o yèri yugulu ben' rzudyi'ilè lèbè'. Tuz ca ilè'ènè'

ben' rzudyi'ilë Jesucristo, ilë'ënë' ra'o ben' laxta'o yëri, la'acazi ben' Israel, la'acazi ben' binaca ben' Israel.

<sup>23</sup> Yuguluro de dula' xquia quiero. Yuguluro biuzuero huero yugulu ca re'en Diuzi huero.

<sup>24</sup> Pero naca Diuzi ben' huen ilë'ënë' ra'o ben' laxta'o yëri. Bibiquizuroguë' ilë'ënë' ra'o ben' laxta'o yëri como dan' Cristo Jesús gutinë' udižugue' quie dula' xquia quiero, cana' ru'en lato ilë'ë Diuzi ra'o ben' laxta'o yëri.

<sup>25</sup> Use'ela' Diuzi Cristo lao yedyi layu ta gutië' lë'ë yaga cruzo ta gata' yela' huenitlao quiero lao Diuzi. Tanun quie lena' huez'i'ze Diuzi quie dula' xquia quie nu ben' sudyi'ilë Cristo. Cana' bë Diuzi lao na'a Cristo ta tzioñe'ero naca Diuzi ben' rue ta yu'u ni'a xnezi. Pues talicazi cabë' bë Diuzi, ulezë' bibënë' castigo quie yaca ben' bë xquia tu bineguida Cristo.

<sup>26</sup> Lëscan' bë Diuzi cana' ta tzioñe'ero biusan Diuzi huenë' ta yu'u ni'a xnezi dza quiero, dza rdaro lao yedyi layu. Pues ta yu'u ni'a xnezi neruenë', rlë'ënë' yaca ben' rzudyi'ilë Jesús ben' laxta'o yëri.

<sup>27</sup> Bireya'ala' huero cuinro ben' ze tanun quie dan' rlë'ë Diuzi ra'o ben' laxta'o yëri. ¿Bixquien' bireya'ala' huero cuinro ben' ze? Bireya'ala' como dan' cule quie Diuzi na' rlë'ënë' ra'o ben' laxta'o yëri, quele yela' ben' huen quiero. Rlë'ë Diuzi ra'o ben' laxta'o yëri por nun quie rzudyi'ilëro Cristo, cala por nun quie chi ruero ca mandado rue lao ley quienë' pca'nnë' lao na'a Moisés.

<sup>28</sup> Quie lena' rioñe'ero rlë'ë Diuzi ra'o ben' laxta'o yëri chi rzudyi'ilëro Cristo, cala por nun quie chi bëro, chi bibëro ca mandado rue lao ley quienë'.

<sup>29</sup> ¿Biži ca inale? ¿Inale tu cue'zi yaca ben' Israel r nabë' Diuzi? ¿Binezile r nabë'rë Diuzi lao yaca ben' binaca ben' Israel? Claro na' r nabë'cazi Diuzi lao yugulu benë'.

<sup>30</sup> Cala zë diuzi zu, tuzi Diuzi zu. Tanun quie chi rzudyi'ilëro Cristo ilë'ë Diuzi ra'o ben' laxta'o yëri, la'acazi nacaro ben' Israel, la'acazi binacaro ben' Israel.

<sup>31</sup> Na'ra ¿ca bi pensari huero? ¿Huero pensari bibi zaca' ley na', como dan' rzudyi'ilëro Cristo na'a? Bireya'ala' huero pensari cana', dechan' reya'ala' huero pensari decazi ga huen dyin ley na' ta pca'n Diuzi lao na'a Moisés.

## 4

### *Ni nan cabë' di'idza' bega'nle Diuzi Abraham*

<sup>1</sup> ¿Ca bi pensari reya'ala' huero quie xuzixta'oro Abraham?

<sup>2</sup> Chi tanun quie yela' ben' huen quienë', blë'ë Diuzi lëbë' ben' laxta'o yëri, na'ra napa Abraham derecho huenë' cuinnë' ben' ze lao Diuzi.

<sup>3</sup> ¿Ca biži rnan lë'ë guichi la'iya quie Diuzi? Pues rnan cani: "Bzudyi'ilë Abraham Diuzi. Con lëzin blë'ë Diuzi lëbë' ben' laxta'o yëri."

<sup>4</sup> Chi huero tu dyin, binacan cule quie xa'nro quižugue' ra'o. Pues ta reya'ala' quižugue' ra'o.

<sup>5</sup> Pero chi rzudyi'ilëro Cristo, chi por lëzin hualë'ë Diuzi ra'o ben' laxta'o yëri, lena' nacan cule bë Diuzi quiero, cala ta reya'ala' huenë' quiero.

<sup>6</sup> Cana' una rey David dza na'te. Unë' cabë' redaohue benë' rlë'ë Diuzi lëbë' ben' laxta'o yëri tanun quie rzudyi'ilënë' Diuzi. Redaohue ben' babeguba Diuzi dula' xquia quie, ben' bihue Diuzi cuenda cabë' tamala bënë'.

<sup>7</sup> Lena' rguixogue'n lë'ë guichi la'iya quie Diuzi cani:

Redaohue yaca benë' bezi'ze Diuzi dula' xquia quie.

Redaohuejé' chi bihue Diuzi lëjé' castigo quie tamala queiejé'.

<sup>8</sup> Redaohue nu ben' bihue Diuzi cuenda quie dula' xquia quie, ben' rzudyi'ilë Diuzi.

Cana' rnèn lè'è guichi la'iya quie Diuzi.

<sup>9</sup> Na'ra naba' le'e: ¿Ca bi pensari ruele? ¿Ruele pensari huezi'ze Diuzi dula' xquia quie tu cue'zi yaca ben' Israel, ben' zu xèdyidao' cuine? ¿Binezile huezi'zerè Diuzi dula' xquia quie yaca ben' tula, yaca ben' bizu xèdyidao' cuine: Neziro dyè'di blè'è Diuzi Abraham ben' laxta'o yèri tanun quie dan' bzudyi'ilènè' Diuzi.

<sup>10</sup> ¿Bata blè'è Diuzi Abraham ben' laxta'o yèri? ¿Blè'ènè' lèbè' ben' laxta'o yèri tu binesu xèdyidao' cuine, o cati babzu xèdyidao' cuine? Pues tu binesu xèdyidao' cuine blè'è Diuzi lèbè' ben' laxta'o yèri.

<sup>11</sup> Pero tanèro bzudyi'ilè Abraham Diuzi, na'tera blè'è Diuzi lèbè' ben' laxta'o yèri. Beyudyi blè'è Diuzi lèbè' ben' laxta'o yèri, na'ra bzujè' tu xèdyidao' cuinnè' como seña de que rlè'è Diuzi lèbè' ben' laxta'o yèri tanun quie dan' rzudyi'ilènè' Diuzi. Quie lena' naca Abraham xuzixta'o yugulu ben' laxta'o yèri, ben' rzudyi'ilè Diuzi, ben' bizu xèdyidao' cuine.

<sup>12</sup> Lèscan' quie lena' nacarè Abraham xuzixta'o yaca ben' zu xèdyidao' cuine, ben' rzudyi'ilè Diuzi cabè' bzudyi'ilè Abraham Diuzi dza na'te caora binesu xèdyidao' cuinnè'.

*Tanun quie rzudyi'ilèro Diuzi, cana' uzunè' di'idza' ca unè' huenè' quiero gacalènè' ra'o*

<sup>13</sup> Bega'nlè Diuzi Abraham len zi'isubanè' di'idza' ta yega'n quiejè' duze yedyi layu dza zaza'ra. Pero bega'nlè Diuzi Abraham di'idza' tanun quie bzudyi'ilènè' Diuzi. Lena' blè'è Diuzi Abraham ben' laxta'o yèri, cala tanun quie guichi ley pca'n Diuzi lao na'a Moisés.

<sup>14</sup> Chi nacan tali yega'n duze yedyi layu para tu cue'zi ben' rue quie ca mandado rue lao guichi ley pca'n Diuzi lao na'a Moisés, na'ra bisaque' inaro zaca' sudyi'ilèro Diuzi, bisaque' inaro zaca' di'idza' cabè' di'idza' began'nlè Diuzi Abraham.

<sup>15</sup> Pero binacan tali cana', como dan' nusa' ley na' castigo quie yaca ben' birue quieyaquè' con cabè' rnan. Pero bigata' falta quie nu ben' binezi con cabè' rnan, na'ra birue quieyaquè'n.

<sup>16</sup> Tanun quie bzudyi'ilè Abraham Diuzi, cana' udapa Diuzi compromiso uca'nnè' duze yedyi layu lao na'a Abraham. Cala ta quižu Abraham Diuzi uca'n Diuzi duze yedyi layu lao na'anè'. Pero bè Diuzi cana' tacuenda xela'adyi' yugulu zi'isuba Abraham de que gacacazi con cabè' una Diuzi huenè'. Cani nacan. Cala tuzi ben' nao ca mandado rue lao guichi ley udapa Diuzi compromiso, pero lèscan' udapa Diuzi compromiso con nu ben' rzudyi'ilè Diuzi cabè' bzudyi'ilè Abraham Diuzi. Cana' pca'n Diuzi naca Abraham xuzi yugulu ben' rzudyi'ilè Diuzi.

<sup>17</sup> Bagulecazi Abraham con cabè' rguixogue'n lè'è guichi la'iya quie Diuzi ga una Diuzi cani: “Bapca'na' luè' xuzi yugulu ben' za' yedyi zitu', yugulu ben' rzudyi'ilè nè'èdi'.” Cana' rnan lè'è guichi. Naca Diuzi ben' useban ben' huati. Naca Diuzi ben' bzalo yugulu ta bide dza na'te.

<sup>18</sup> La'acazi guque Abraham bigaca quienè' cabè' una Diuzi huenè' quienè', bipsannè' uzudyi'ilènè' Diuzi, ulezè' hue Diuzi quienè' cabè' unè' huenè' quienè'. Cana' guca quie Abraham naquè' “xuzi yugulu ben' za' yedyi zitu', yugulu ben' rzudyi'ilè Diuzi”, conforme con ca gudyi Diuzi lèbè' dza na'te: “Gaca tazè 2'isubo'.”

<sup>19</sup> La'acazi napa Abraham cadu tu gayuhua iza, bipsannè' rbezè' gaca quiè' cabè' compromiso udapalè Diuzi lèbè'. Bipsannè' rbezè' la'acazi banaquè' ben' gula, la'acazi banacarè zgulè' ben' gula. Baode tiempo quie nigula quienè' bibi'anè' xcuidi'. Baidyin hora gatiyaquè'.



<sup>20</sup> Bibënë' pensari mala, bipsannë' rbezë' gaca quienë' cabë' compromiso udapalë Diuzi lëbë'. Cana' bënë' uzudyi'ilënë' Diuzi udapë' lëbë' bala'ana.

<sup>21</sup> Dyë'edi unezi Abraham napa Diuzi fuerza valor ta uzuë' di'idza' cabë' compromiso rapalënë' benë'.

<sup>22</sup> Quie lena' blë'ë Diuzi Abraham ben' laxta'o yëri.

<sup>23</sup> Na'ra dza na'te bë Diuzi mandado bzu yaca benë' di'idza' quienë' lë'ë guichi ta rguixogue'n cabë' guca quie Abraham, bzudyi'ilënë' Diuzi blë'ë Diuzi lëbë' ben' laxta'o yëri. Pero cala para tuzi lëbë' bë Diuzi mandado bzujë' di'idza' quienë' lë'ë guichi.

<sup>24</sup> Lëscan' bë Diuzi mandado bzujë' di'idza' quienë' lë'ë guichi ta ineziro ra'o hualë'ë Diuzi ra'o ben' laxta'o yëri, chi rzudyi'ilëro lëbë', ben' pseban Jesús, ben' naca za'nro.

<sup>25</sup> Tanun quie guti Jesús lë'ë yaga cruzo bebannë', ru'en lato yezi'ze Diuzi dula' xquia quiero. Lëscan' tanun quie bebannë' ru'en lato ilë'ë Diuzi ra'o ben' laxta'o yëri.

## 5

### *Tahuen naca quiero ilë'ë Diuzi ra'o ben' laxta'o yëri*

<sup>1</sup> Na'ra como dan' rlë'ë Diuzi ra'o ben' laxta'o yëri por nun quie rzudyi'ilëro xa'nro Jesucristo, quie lena' rbe' chizi laxta'oro lao Diuzi.

<sup>2</sup> Naca Cristo ben' sëlë' ra'o lao Diuzi por nun quie dan' rzudyi'ilëro lëbë'. Quie lena' huela'iya Diuzi ra'o inaoro xnezë' du guicho du la'adyi'ro. Quie lena' redaohuero rbezaro yeyoro ga zu Diuzi guibá.

<sup>3</sup> Lëscana' redaohuero cati raza zëdi quiero yedzagalaoro, porque neziro chi yedzagalaoro, cana' huacalë' Diuzi ra'o ta suero inaoro xnezë' dyë'ëdi.

<sup>4</sup> Lëscan' chi suero inaoro xnezë' dyë'ëdi, cana' yedaohue Diuzi ca ruero. Lëscan' chi yedaohue Diuzi ca ruero, cana' rbezaro dyë'ëdi yeyoro guibá ga zuë'.

<sup>5</sup> Zuro contento biyehuëdiro rbezaro yeyoro guibá ga zu Diuzi como dan' use'ela' Diuzi Bichi Be quienë', bagucalënë' ra'o ta idyë'ëro Diuzi, bayu'uro yela' nedyë'ë quie Diuzi lu'u guicho laxta'oro.

<sup>6</sup> Caora cati bibi de huero ta ute uselaro cuinro lao Diuzi, na'ra bida Cristo gutinë' lë'ë yaga cruzo. Ca bdyin hora gu'un Diuzi gaca, caora na' guti Cristo ta gažo dula' xquia quie ja ben' binuebë' Diuzi.

<sup>7</sup> Nunu re'en gati lao laza ben' tula. Derepente ga zu benë' gue'ennë' gatië' lao laza ben' tula, ben' huen gula.

<sup>8</sup> Pero bablë'ëro cabë' bë Diuzi nedyë'ënë' ra'o use'elë' z'i'inë' gutië' lë'ë yaga cruzo cuenda gažo dula' xquia quiero caora cati nenacaro ben' de dula' xquia quie.

<sup>9</sup> Na'ra barlë'ë Diuzi ra'o ben' laxta'o yëri tanun quie dan' guti Cristo lë'ë yaga cruzo. Lëscan' por nun quie lëbë' bihue Diuzi ra'o castigo dza gaca juicio lao yedyi layu.

<sup>10</sup> Caora cati nenacaro enemigo quie Diuzi, na'ra ulëchitza'o cuin Diuzi ra'o len lëbë' cuenda tzu'ulëronë' tuže. Cana' bë Diuzi tanun quie dan' guti z'i'inë' lë'ë yaga cruzo. Quie lena' seguro nacan yezi' Diuzi ra'o por nun quie dan' guti beban z'i'inë', banacalëronë' tuže.

<sup>11</sup> Cala tuzi ulëchitza'o Diuzi ra'o, pero lëscan' rna' ruhuanë' ra'o por nun quie z'i'inë' Jesucristo. Pues lao na'a Jesucristo nacalëro Diuzi tuže rbe' chizi laxta'oro.

*Ni rguixogue'n cabë'bë Adán len cabë' bë Cristo*

<sup>12</sup> Tanun quie tuzi be'mbyu guta' dula' xquia lao yedyi layu. Na'ra como dan' guta' dula' xquia lao yedyi layu, cana' guta're' yela' guti quie yugulu benë', como dan' yugulu benë' napajë' dula' xquia.

<sup>13</sup> Desde dza na'te, dza bineca'n Diuzi ley quienë' lao na'a Moisés, baquezi napa yaca ben' nita' lao yedyi layu dula' xquia. Pero uleza Diuzi bibë Diuzi leyaquë' castigo dza na'te como dan' binuca'nnë' ley quienë'.

<sup>14</sup> Guticazi yaca ben' unita' dza uda Adán lao yedyi layu hasta ben' unita' dza uda Moisés lao yedyi layu. Caora bdyin dza quieyaquë' gutiyaquë' como dan' napajë' dula' xquia. Guticaziyaquë' la' acazi netza' tamala bëyaquë' cala ca tamala bë Adán. Bibzu Adán di'idza' ca mandado bë Diuzi lëbë'.

<sup>15</sup> Netza' ca naca ta udilo' Adán. Netza' ca naca tadya'a rue Diuzi quiero ra'o. Tanun quie ta udilo' tuzi be'mbyu Adán guta' yela' guti quie ja ben' nita' lao yedyi layu. Pero netza' cabë' bë Diuzi, bënë' quiero tu cule ze. Bënë' tahuen gula quie yaca ben' nita' lao yedyi layu. Gun Diuzi ra'o yela' neban tuzioli por nun quie yela' bzu di'idza' quie tuzi be'mbyu Jesucristo. Biuquizunë' ra'o quie yela' naban gunnë' ra'o tuzioli.

<sup>16</sup> Netza' ta udilo' Adán, binacan cabë' tadya'a rue Diuzi quiero gunnë' ra'o yela' neban tuzioli. Tanun quie ta udilo' Adán, biuzaque' ilë'ë Diuzi ra'o ben' laxta'o yëri. Pero por nun quie tadya'a bë Diuzi quiero ra'o, rlë'ënë' ra'o ben' laxta'o yëri, bezi'zenë' taže quiero ca naca dula' xquia quiero.

<sup>17</sup> Guta' yela' guti quie yaca benë' tanun quie ta udilo' tuzi be'mbyu. Pero yaca ben' rue quie xti'idza' Diuzi, hualë'ë Diuzi leyaquë' ben' laxta'o yëri, huela'iya Diuzi leyaquë', huata' yela' neban cubi quieyaquë' por nun quie yela' bzu di'idza' quie tuzi be'mbyu Jesucristo.

<sup>18</sup> Tanun quie ta udilo' Adán guta' tu castigo lao yuguluro. Pero tanun quie yela' bzu di'idza' quie Jesucristo, hualë'ë Diuzi yugulu ben' rue quie xti'idzë' ben' laxta'o yëri, bigata' castigo quieyaquë'.

<sup>19</sup> Cani nacan. Tanun quie ta udilo' tuzi be'mbyu, blë'ë Diuzi yuguluro ben' napa dula' xquia. Pero tanun quie yela' bzu di'idza' quie tuzi be'mbyu, rlë'ë Diuzi ra'o ben' binapa dula' xquia.

<sup>20</sup> Udixu Diuzi ley quienë' lao yedyi layu ta ulu'en lega napajë' xquia. Pero tu yu'yuaquë' rueyaquë' xquia ze, lëscan' beyëchi'la'adyi' Diuzi leyaquë' taže.

<sup>21</sup> Cani nacan. Tanun quie dula' xquia napa yaca benë', quie lena' guta' yela' guti quiejë'. Pero lëscan' tanun quie yela' ben' huen quie Diuzi, quie lena' guta' ilë'ënë' ra'o ben' laxta'o yëri, hue'në' ra'o yela' neban tuzioli por nun quie Señor quiero Jesucristo.

## 6

*Bira gacaro pensari huero tamala, reya'ala' gacaro pensari gaparo Cristo bala'ana*

<sup>1</sup> ¿Ca bi pensari reya'ala' huero?

<sup>2</sup> ¿Huero pensari huero tamala cuenda ulu'e Diuzi ra'o ca naca yela' ben' huen quienë' ina'në' ra'o nacala gaca quiero? ¡Bireya'ala' huero pensari cana'! Naca quiero ca quie ben' baguti, bira rnabë' dula' xquia quiero ra'o. ¿Cómo pues huero seguir huero xquia?

<sup>3</sup> ¿Binezile ca guca quiero dza gacaro bautismo? ¿Binezile gucaro bautismo ta ulu'en banacalëro Cristo Jesús tuže, lëscan' ta ulu'en banaca quiero ca quie ben' guti lë'ë yaga cruzo?

<sup>4</sup> Tanun quie gucaro bautismo naca quiero ca quie ben' baguti, ben' bade lu'u yerobá conlë Cristo. Pero lëscan' naca quiero ca quie ben' babeban, ben' bade yela' neban cubi quie. Naca quiero ca quie ben' beban cabë' beban Cristo, bebannë' lao na'a Diuzi, ben' de yela' huaca quie.

5 Porque chi tanun quie yela' guti quie Cristo naca quiero ca quie ben' huati, na' nacalëro lëbë' tuze, lëscan' tanun quie yela' beban quie Cristo naca quiero ca quie ben' beban, na' lëscan' quie lena' nacalëronë' tuze.

6 Caora guti Cristo lë'ë yaga cruzo, caora na' guca quiero ca quie gutirë pensari mala quiero cuenda bira huero ta rnazin quiero, bira inabë' pensari mala ra'o, bira ru'en lato huero mandado ca mandado rue pensari mala quiero ra'o.

7 Porque bira saque' inao benë' pensari mala quieyaquë' cati bagutiyaquë'.

8 Chi tali apsanro tamala quiero, lena' rulu'en anaca quiero ca quie ben' bagutilë Cristo. Cana' xela'adyi'ro huazulëro lëbë' tuzioli.

9 Porque neziro caora beyudyi guti beban Cristo, na'ra tuzioli bira gatinë'. Bira saque' hue yela' guti lëbë' gan tatula.

10 Caora guti Cristo lë'ë yaga cruzo, para tuzioli udižuguë' quie dula' xquia quiero. Na'ra nabannë' zuë' guibá naquë' ben' bala'ana ze lao Diuzi.

11 Na'ra quie le'e, bira gacale pensari huele tamala, reya'ala' gacale pensari gapale Diuzi bala'ana como dan' nacalële Cristo Jesús, ben' naca Señor quiero, tuze.

12 Quie lena' bihue'le lato inabë' pensari mala quiele le'e huele ca tamala rnan guicho laxta'ole huele.

13 Bihue'le lato huelële cuerpo quiele tamala. Ta reya'ala' huele, huelële Diuzi tuze como dan' banaca quiele ca quie ben' baguti, ben' beban lao na'anë'. Ta reya'ala' huele, hue'le lato huelële cuerpo quiele tadya'a.

14 Porque bira saque' inabë' pensari mala quiele le'e. Bira nadele cuenda lao na'a ley pca'n Diuzi lao na'a Moisés, banadele cuenda lao na'a yela' reyëchi'la'adyi' quie Diuzi.

### *Ni rguixogue'n tu di'idza' cabë' naca quie ben' zu lao xa'ne*

15 ¿Na'ra bizi huero? ¿Huero xquia como dan' bira nadero cuenda lao na'a ley pca'n Diuzi lao na'a Moisés, dechan' nadero cuenda lao na'a yela' reyëchi'la'adyi' quie Diuzi? ¡Bisaque' huero can'!

16 Pero dyë'ëdi nezile cabë' naca quie nu ben' zu lao xa'ne. Re'en ca re'enna uzuje' di'idza' ca mandado rue xa'ne. Cana' naca quiero. Chi uzuro di'idza' cabë' mandado rue pensari mala quiero, lena' udyiagui'n ra'o, biyezi' Diuzi ra'o gunnë' yela' naban quiero tuzioli. Chi uzuro di'idza' ca mandado rue Diuzi, lena' gacalën ra'o yezi' Diuzi ra'o gunnë' yela' naban quiero tuzioli.

17 Pero xcale Diuzi, bira rzule di'idza' ca mandado rue pensari mala quiele, cabë' bële dza na'te. Pero na'a baruzule di'idza' du guicho du la'adyi'le ca mandado rue xti'idza' Diuzi ta pca'nnë' laohuele.

18 Banacale ben' libre ta huele tadya'a inaole xneza Diuzi.

19 (Tanun quie dan' binetziõe'e'le dyë'ëdi cabë' rnial' le'e, lena' rnial' le'e itu chopal'ana ta gacalën le'e.) Cani nacan. Cabë' bële dza na' ulisa ni'a na'ale bële tamala, bële ta bireya'ala' huele, cana' hualisa ni'a na'ale huele tadya'a, huele ta reya'ala' huele, tacuenda talicazi nacale ben' quie Diuzi.

20 Caora neyu'ule pensari mala dza na', unabën' le'e ca xa'nle, quie lena' bibzule pensari huele tahuen ca tahuen re'en Diuzi huele.

21 ¿Pero bizi bële gan unaole neza mala? Na'ra lena' ruen yela' stu' quiele. Zë'lao ituzi yela' guti ulezale yeyole lao gui' gabila.

22 Pero na'a bira yu'ule pensari mala inabë'n le'e ca xa'nle. Baoyu'ule pensari quie Diuzi ta huele tahuen ca re'en Diuzi huele. Cana' sí huele gan. Cana' talicazi nacale ben' quie Diuzi. Ze'lao cana' gun Diuzi yela' neban ta biyeyudyi yedu quie.

<sup>23</sup> Ga yeyudyi gažo dula' xquia quiero yeyoro lao gui' gabila. Pero netza' quie Diuzi gunnè' yela' neban quiero tuzioli tanun quie nacalëro Cristo Jesús, ben' naca Señor quiero, tuže.

## 7

### *Ni rguixogue'n tu di'idza' cabè' naca quie tu nigula bazulè be'mbyu*

<sup>1</sup> Bicha', le'e nuebè'le nezile bi nan lè'è guichi ley pca'n Diuzi lao na'a Moisés. Nezile r nabè' guichi ley na' ra'o solamente dza nebanro rdaro lao yedyi layu.

<sup>2</sup> Rnia' le'e tu di'idza'. Cani nacan quie tu nigula bazulè be'mbyu. Biru'e guichi ley na' lato usan nigula be'mbyu quiè' tu nenebannè' nerda be'mbyu quiè' lao yedyi layu. Pero chi baguti be'mbyu quiè', anaquè' libre yezi'nè' ben' tula. Bira naca quiè' be'mbyu na' lao guichi ley.

<sup>3</sup> Quie lena' chi baptilè' be'mbyu tula tu neneban be'mbyu quiè', na'ra xquia ruenè' quienè'. Pero chi baguti be'mbyu quiè', anaquè' libre yezi'nè' ben' tula, bira naca quiè' be'mbyu na' lao guichi ley. Bibi dula' xquia de quienè'.

<sup>4</sup> Lëscan' cana' nacan quiele, bicha'. Le'e banacalèle Cristo tuže. Banaca quiele ca quie nigula baguti xquiuhue. Bira nacale cuenda lao guichi ley pca'n Diuzi lao na'a Moisés. Banacale cuenda quie Cristo, ben' baguti beban. Cana' naca quiero nacaro ladyina'a Diuzi.

<sup>5</sup> Na'ra cabè' guca quiero dza na'te, bëro ta rnazin quiero. Unan quiero huero ta biru'en lato huero lè'è guichi ley pca'n Diuzi lao na'a Moisés. Tanun quie biru'en lato huero bi cosa lè'è guichi ley na', lena' unan quiero uchisa ni'a na'aro huero tamala.

<sup>6</sup> Pero bira inabè' guichi ley pca'n Diuzi lao na'a Moisés ra'o. Nacaro libre huero ca re'en Diuzi huero, bayu'uro pensari quienè' ta yecubinè' pensari quiero. Bira naca quie guichi ley na' para inabè'n ra'o.

### *Ni rguixogue'n quie pensari mala yu'u lu'u guicho laxta'oro*

<sup>7</sup> Na'ra, ¿ca biži inaro? ¿Inaro naca guichi ley na' tamala? ¡Bireya'ala' inaro cana' como dan' binaca guichi ley na' tamala! Pero rguixogue'cazin ra'o cabè' naca tamala. Ni siquera binezida' tamala na' rza'la'adyi'ro ta de quie laguedyiro, chi birguixogue'n lè'è guichi ley na' de que: “Bireya'ala' sa'la'adyi'ro ta de quie laguedyiro.”

<sup>8</sup> Pero tanun quie rguixogue' guichi ley na' cabè' bireya'ala' huero, quie lena' uzulao pensari mala quia' huen nè'èdi' mandado hua' ta rnazin quia'. Porque según cabè' rguixogue' lè'è guichi ley na', cana' ineziro bi huero huero tamala, bi huero huero tahuen.

<sup>9</sup> Guca tu ta guca tiempo biunezda' cabè' rguixogue'n lè'è guichi ley na'. Quie lena' biunezda' de dula' xquia quia'. Pero caora bdyin hora unezda' cabè' rguixogue'n lè'è guichi ley na', caora na' za' pensari mala quia', bèlèn nè'èdi' ta hua' ta biru'en lato hua'. Caora na' unezda' de dula' xquia quia', huaca hue Diuzi nè'èdi' castigo.

<sup>10</sup> Ulèchi Diuzi guichi ley quienè' ta gacalènè' yaca ben' nita' lao yedyi layu cuenda suyaquè' contento. Pero por tu parte quia' nè'èdi', lao na'a Diuzi unezda' de dula' xquia quia', huen zudyi huenè' nè'èdi' castigo. Cana' guca quia'.

<sup>11</sup> Tanun quie guichi ley na', aozi' pensari mala quia' nè'èdi' yè'. Cana' guta' dula' xquia quia', bèn zudyi hue Diuzi nè'èdi' castigo.

<sup>12</sup> Pero naca la'iya guichi ley pca'n Diuzi lao na'a Moisés. Naca la'iyán, nacan li, nacan huen ca mandado rue lao guichi ley na'.

<sup>13</sup> Na' inaba' le'e tu pregunta, ¿naca dula' quie guichi ley na' guta' dula' xquia quia', huen žudyi hue Diuzi nē'ēdi' castigo? ¡Binacan cana'! Binaca dula' quie guichi ley na', nechan' dula' quie dula' xquia quia'. Conlē ta naca tadya'a uzi' dula' xquia quia' nē'ēdi' yē'. Cana' naca dyin quie guichi ley quie Diuzi. Nacan ta ulu'en ra'o ca tamala gula naca dula' xquia quiero.

<sup>14</sup> Neziro nusa'a guichi ley na' pensari quie Diuzi, pero nē'ēdi' biyu'a pensari quie Diuzi, yu'a pensari mala ca pensari yu'u yaca ben' nita' lao yedyi layu.

<sup>15</sup> Binezda' bi ruen quia'. Tu ta bireya'ala' hua', lēlena' rua', la'acazi nezda' tamala na'.

<sup>16</sup> Pero chi rua' tu ta bireya'ala' hua', lena' rulu'en nezda' naca dya'a guichi ley quie Diuzi.

<sup>17</sup> Pensari mala quia' yu'u lu'u guicho laxta'ohua', lena' r nabē'n nē'ēdi' hua' tamala. Raca quia' ca quie ben' tula, ben' mala, r nabē'nē' nē'ēdi'.

<sup>18</sup> Nezda' ca naca pensari yu'a nē'ēdi'. Biyu'a pensari dya'a ca pensari quie Diuzi. Yu'a pensari mala ca pensari yu'u yaca ben' nita' lao yedyi layu. Rnēn lu'u guicho laxta'ohua' hua' tahuen, pero bigaca' hua'n.

<sup>19</sup> Birua' tadya'a cabē' re'enda' hua', nechan' tamalala rua', ta bire'enda' hua'.

<sup>20</sup> Na'ra chi birua' tadya'a cabē' re'enda' hua', lena' ulu'en r nabē'n pensari mala quia' nē'ēdi'. Raca quia' ca quie ben' tula, ben' mala r nabē'nē' nē'ēdi'.

<sup>21</sup> Cana'naca ta raca quia'. Cati ruzua' pensari hua' tahuen, cana' reyudyi quia' tamalala rua'.

<sup>22</sup> Nezicazida' naca huen guichi ley quie Diuzi.

<sup>23</sup> Pero lēscan' nezda' ca naca pensari yu'u lu'u guicho laxta'ohua', yu'un pensari mala ca pensari yu'u yaca ben' nita' lao yedyi layu. Na'ra bire'en pensari mala quia' hua' tahuen cabē' re'enda' hua'. Cana' r nabē'n pensari mala quia' nē'ēdi'. Raca quia' ca quie ben' yu'u lu'u dyiguiba, ben' binaca libre.

<sup>24</sup> ¡Bayēchi' gula raca quia'! ¿Nuži gacalē nē'ēdi' usana' pensari mala yu'u lu'u guicho laxta'ohua', pensari re'en udyiaguin nē'ēdi'?

<sup>25</sup> Tuzi Diuzi gacalēnē' nē'ēdi' lao na'a ži'inē' Jesucristo, ben' naca Señor quiero. ¡Xcale Diuzi taže bagucalēnē' nē'ēdi' como cabē' guca quia', gu'unda' hua' mandado ca mandado rue lao guichi ley quie Diuzi, pero biguca' como dan' unabē'n pensari mala quia' nē'ēdi'. Unabē'n nē'ēdi' cabē' r nabē' ben' naca xa'n tamala.

## 8

### *Racalē pensari quie Diuzi yu'u lu'u guicho laxta'oro ra'o*

<sup>1</sup> Na'ra bigata' castigo quie ben' nacalē Cristo Jesús tuže. Bira inabē' pensari mala ra'o ca pensari mala yu'u lu'u guicho laxta'o yaca ben' nita' lao yedyi layu, nechan' inabē'cazi pensari quie Diuzi yu'u lu'u guicho laxta'oro ra'o.

<sup>2</sup> Dyin quie pensari quie Bichi Be quie Diuzi yu'u lu'u guicho laxta'oro, lena' uselan ra'o gacarō libre. Birabi dula' xquia quiero gata' lao Diuzi huenē' ra'o castigo. Lēscan' dyin quie pensari quie Diuzi gata' yela' neban quiero tuzioli tanun quie dan' nacalēro Cristo Jesús tuže.

<sup>3</sup> Porque bē Diuzi gan bēnē' ta biuzaque' hue guichi ley pca'nnē' lao na'a Moisés. Tanun quie pensari mala yu'u lu'u guicho laxta'oro, biuzaque' yeguba guichi ley na' dula' xquia quiero. Quie lena', use'ela' Diuzi ži'inē' ta yegubē' dula' xquia quiero. Guquē' be'mbyu ca ra'o, ben' de dula' xquia quie, pero lēbē' bibi dula' xquia quie' de. Cana' bē Diuzi use'ela'nē' ži'inē'

gutinē' lao lazaro guquē' ca gun hue'ro Diuzi ta yezi dula' xquia quiero. Na' bizi lao na'a zi'inē' guquē' be'mbyu bidē' lao yedyi layu, bēnē' gan begubē' dula' xquia quiero ta bira inabē'n ra'o.

<sup>4</sup> Cana' bē Diuzi gualēnē' ra'o tacuenda huero tadya'a con cabē' rnan lē'ē guichi ley quienē'. Bira inaoro huero ca naca pensari mala yu'u lu'u guicho laxta'oro ra'o, ben' de dula' xquia quie. Pero inaoro huero ca naca pensari quie Bichi Be quie Diuzi yu'u lu'u guicho laxta'oro.

<sup>5</sup> Yaca ben' nao ca naca pensari mala yu'u lu'u guicho laxta'ojē', lega raxeyaquē' huejē' ta rnazin quiejē'. Pero yaca ben' nao ca naca pensari quie Bichi Be quie Diuzi yu'u lu'u guicho laxta'ojē', lega raxejē' uzujē' di'idza' ca mandado rue Diuzi.

<sup>6</sup> Chi inaoro huero ca naca pensari mala yu'u lu'u guicho laxta'oro, lena' udyiaguin' ra'o lao Diuzi. Pero chi inaoro huero ca naca pensari quie Bichi Be quie Diuzi yu'u lu'u guicho laxta'oro, lena' gata' yela' neban quiero biyeyudyi yedu quie, huabe' chizi laxta'oro.

<sup>7</sup> Naca enemigo quie Diuzi yaca ben' nao rue pensari mala ca pensari mala yu'u lu'u guicho laxta'ojē'. Nica re'enjē', nica nezijē' bi huejē' ta huejē' mandado ca mandado rue lao guichi ley quie Diuzi.

<sup>8</sup> Yaca ben' raxe hue pensari mala ca pensari mala yu'u lu'u guicho laxta'ojē', biilē'ē Diuzi lējē' gusto cabē' rueyaquē'.

<sup>9</sup> Pero le'e binacale ben' nao rue pensari mala ca pensari mala yu'u lu'u guicho laxta'o yaca ben' nita' lao yedyi layu. Nacalē ben' nao rue pensari quie Bichi Be quie Diuzi, como dan' yu'u pensari quiē' lu'u guicho laxta'ole. Nu ben' biyu'u pensari quie Cristo lu'u guicho laxta'ohue, binaquē' ben' quie Cristo.

<sup>10</sup> Chi nacalēro Cristo tuže, la'acazi gati cuerpo quiero tanun quie dula' xquia quiero, pero ca naca quie bichi be quiero, bigatin nabannan como dan' nacalēro Cristo tuže rlē'ē Diuzi ra'o ben' bira de dula' xquia quie.

<sup>11</sup> Quie lena' chi tali yu'uro pensari quie Bichi Be quie Diuzi lu'u guicho laxta'oro, la'acazi gatiro, useban Diuzi ra'o gunnē' yela' neban cubi ta biyeyudyi yedu quie. Na' Diuzi, ben' pseban Cristo Jesús, lēlēbē' usebannē' ra'o lao na'a Bichi Be quienē', ben' yu'u lu'u guicho laxta'oro.

<sup>12</sup> Cani nacan bicha', nacaro obligado, pero binacaro obligado huero inaoro con cabē' rna pensari mala yu'u lu'u guicho laxta'oro.

<sup>13</sup> Porque chi huero inaoro ca rue pensari mala yu'u lu'u guicho laxta'oro, na'ra bē' gatiro, bigata' yela' neban tuzioli quiero. Pero chi hue quiero con cabē' rna Bichi Be quie Diuzi, chi bihuero cuenda con cabē' rna pensari mala yu'u lu'u guicho laxta'oro, na'ra bē' gatiro, huata' yela' neban quiero tuzioli.

<sup>14</sup> Naca zi'i Diuzi yugulu ben' nao ruzu di'idza' con cabē' rna Bichi Be quienē'.

<sup>15</sup> Ca naca pensari bdze' Diuzi lu'u guicho laxta'oro, binacan pensari ta idzebiro ca idzebi ben' zu lao xa'n tamala. Pero tanun quie pensari quiē' yu'un lu'u guicho laxta'oro, nacaro zi'inē', na' yēbironē': "Xzu'a' Diuzi."

<sup>16</sup> Racadē pensari quie Bichi Be quie Diuzi pensari quiero ta xela'adyi'ro nacaro zi'i Diuzi.

<sup>17</sup> Dan' nacaro zi'i Diuzi, cana' gunnē' ra'o ca ta unē' gunnē' ra'o dza na'te. Conlē Cristo gata' yela' neban quiero tzesulēronē' tuzioli. Na' chi raca zēdi quiero dza rdaro lao yedyi layu tanun quie naoro xneza Cristo, lēscan' huadyin dza yedyinro guibá tzahuero tuže len Cristo.

<sup>18</sup> Taze tazēdi de quiero dza rdaro lao yedyi layu tanun quie dan' naoro xneza Cristo, pero cati abedyinro guibá inaro tadao' bicu' tazēdi guca quiero. Inaro nacara tahuen gula gaca quiero cati bedyinro guibá.

19 Yugulu ta udxixu Diuzi lao yedyi layu rbezana dza yedupa yedzaga yugulu ben' naca zi'i Diuzi guibá.

20 Yugulu ta udxixu Diuzi lao yedyi layu naca bayèchi' quien, pero cala dula' quien naca bayèchi' quien. Dyin bē Diuzi naca bayèchi' quien, pero bzucazi Diuzi dza, dza yecubinè' yeyuenè' yugulu ta de lao yedyi' layu.

21 Huadyin dza yezi yeyèri yugulu ta udxixu Diuzi lao yedyi layu. Bira gaca bayèchi' quien, bira yedzagalaona. Huega'n tzao'na dza zuro guibá nacaro libre ra'o, ben' naca zi'i Diuzi. Lēdza na' yega'n dya'a gula quiero.

22 Neziro redzagalao yugulu ta udxixu Diuzi lao yedyi layu ca quie redzalao nu nigula re'en galo xcuidi' quie.

23 Cala tuzi ta udxixu Diuzi lao yedyi layu redzagalaona, pero lēscan' ra'o, ben' nao xnezè', redzagalaoro la'acazi yu'u pensari quie Bichi Be quie Diuzi lu'u guicho laxta'oro. Bablè'èro tadya'a na' yu'uro pensari quie Bichi Be quie Diuzi. Neziro huadyin dza inabè' puro pensari quie Bichi Be quie Diuzi ra'o, bira inabè' pensari quiero ra'o. Lega rbezaro dza yezi' Diuzi ra'o nacaro zi'inè' sulèronè' naquè' Xuziro. Na' dza na' yecubi Diuzi cuerpo quiero ta iyacan cuerpo dya'atzegue, cuerpo bicuiaguin'.

24 Lēdza na' rbezaro gaca quiero con cabè' una Diuzi gaca quiero tanun quie bapte pselanè' ra'o. Chan' baguca quiero tu ta ulezaro gaca quiero, na'ra bira zu cuezaro gaca quiero.

25 Pero chi binegaca quiero tu ta cuezaro gaca quiero, na'ra ruen zi cuezaro dyè'èdi idyin dza gaca quiero cabè' rbezaro gaca.

26 Lēscan' racalè pensari quie Bichi Be quie Diuzi ra'o ga racaro falta. Nica neziro hue'lèro Diuzi di'idza' ca reya'ala' huero. Pero ca pensari quie Bichi Be quie Diuzi yu'u lu'u guicho laxta'oro, con len racalèn ra'o ulidzaro Diuzi cabè' reya'ala' ulidzaronè' nun quie dan' biredzelerò bi di'idza' yèbironè'.

27 Rezi' Diuzi cuenda ca naca pensari yu'u lu'u guicho laxta'oro. Nezi Diuzi bi na Bichi Be quienè', porque rulidza Bichi Be quienè' lèbè' conforme ca re'en Diuzi gaca quie yaca ben' quienè', yaca ben' nao xnezè'.

### *Con bitezi tazèdi gaca quiero huero gan*

28 Neziro con bitezi gaca quiero, huacalè Diuzi ra'o yega'nro huen, ra'o, ben' dyè'è Diuzi, ra'o, ben' ulionè' según ca unanè' huenè' quiero dza na'te.

29 Desde dza na'te nezi Diuzi huadyin dza sudyi'ilèronè'. Cana' psere Diuzi ra'o dza na'te ta yedyinro iyacaro ta gacaro cabè' naca zi'inè' Cristo. Cana' yedyin Cristo naquè' ben' belaora lao yaca ben'rzudyi'ilè Diuzi.

30 Na'ra como psere Diuzi ra'o dza na'te ta gacaro ben' quienè', lēscan' uliorènè' ra'o ta huero mandado quienè'. Na'ra como ulionè' ra'o huero mandado quienè', lēscan' pca'nrenè' ra'o ben' laxta'o yèri. Na'ra como pca'nnè' ra'o ben' laxta'o yèri, lēscan' bèrènè' ra'o ben' bala'ana, ben' inita'lè lèbè' guibá.

31 Quie lena', ¿ca bi pensari reya'ala' huero? Pues como zu Diuzi racalènè' ra'o, nunu gaca udyiaguì' ra'o.

32 Na'ra como bibeguè' Diuzi guida zi'inè', pero use'ela'cazine' lèbè' lao yedyi layu ta gutiè' lè'è yaga cruzo lao lazaro, lēscan' biyeguè' Diuzi gunnè' ra'o yugulu tahuen ta rdzioguero nuzuè' zi'inè' Jesucristo ta gacalènè' ra'o.

33 ¿Nuzi napa derecho gao ra'o xquia, ra'o, ben' ulio Diuzi? Naca cuin Diuzi ben' pca'n ra'o ben' laxta'o yèri.

34 ¿Nuzi napa derecho ichuguli quiero gacaro castigo? Naca cuin Cristo ben' guti lè'è yaga cruzo pseban Diuzi lèbè', zuè' cuèta lè'ènè' zaquè' yebè, rulidzè' lèbè' por ra'o.

<sup>35</sup> Con bitezi gaca quiero biyeyudyi yedu nadyë'ë Cristo ra'ò. La'acazi redzagalaoro, la'acazi raca zëdi quiero, la'acazi rueljê' ra'ò bizinaquezi, la'acazi bide ta gaoro, la'acazi bide žaba quiero, la'acazi naca žudyi quiero, la'acazi ruzegadyijê' gutijê' ra'ò, biyeyudyi yedu nadyë'ë Cristo ra'ò.

<sup>36</sup> Rguixogue'n lë'ë guichi la'iya quie Diuzi ca tazëdi gaca quiero cani: Tanun quie rdza' yaca benë' dan' naoro xneza Diuzi, cana' re'enjë' gutijê' ra'ò.

Ca ruti ja benë' beco' ži'ila' yugu dza, cana' re'enjë' gutijê' ra'ò.

Cana' rnën lë'ë guichi la'iya.

<sup>37</sup> Na'rnia' le'e, con bitezi tazëdi za' gaca quiero, huero gan como dan' zu Cristo napë' ra'ò cuidado nadyë'ënë' ra'ò.

<sup>38</sup> Nezda' dyë'ëdi con bitezi za' gaca quiero, biyeyudyi yedu nadyë'ë Diuzi ra'ò. La'acazi guti benë' ra'ò, la'acazi gaca zëdi quiero dza rdaro lao yedyi layu, la'acazi rue yaca ángel condre ra'ò, la'acazi ruelë yaca taxi'ibi' ra'ò bizinaquezi, la'acazi bi raca quiero na'a, la'acazi bi raca quiero uxe huidzo,

<sup>39</sup> la'acazi bi raca quiero guibá, la'acazi bi raca quiero lao yedyi layu, la'acazi nuti'tezi za' huelë ra'ò bizinaquezi, biusanla'adyi' Diuzi ra'ò, biyeyudyi yedu nadyë'ënë' ra'ò como dan' nacalëro Cristo Jesús, ben' naca Señor quiero, tuže.

## 9

### *Ulio Diuzi ben' Israel dza na'te*

<sup>1</sup> Tali rnia' le'e, como naca' ben' quie Cristo, quele yë' rzi'a. Cabë' rnia' le'e nacan tali, como dan' yu'u pensari quie Bichi Be quie Diuzi lu'u guicho laxta'ohua'.

<sup>2</sup> Lega rdëbida' quie ben' yedyi quia'. Lega raca bayëchi' lu'u guicho laxta'ohua' por lëjê'.

<sup>3</sup> Zua' dispuesto udze'de' Diuzi në'ëdi', zua' dispuesto usanla'adyi' Cristo në'ëdi', zua' dispuesto bi ta gaca quia', chan' gaca tahuen quie yaca ben' yedyi quia'.

<sup>4</sup> Nacajê' ben' Israel, ben' naca ži'isuba xuzixta'ohua' Jacob. Rlë'ë Diuzi leyaquë' ca quie ži'inë'. Uzulë Diuzi leyaquë' dza na'te, blu'enë' leyaquë' yela' huaca quië'. Udixogue'në' leyaquë' ca unanë' huenë' quiejê'. Pca'nnë' guichi ley quienë' lao na'a lagueidyijê' Moisés. Gudyinë' lëjê' ca reya'ala' huejê' ta tziönla'adyi'jê' lëbë'. Yega'nlnë' leyaquë' di'idza' ca huenë' gacalënë' leyaquë'.

<sup>5</sup> Nacajê' ži'isuba yaca xuzixta'ohua', ben' unita' dza na'. Caora bida Cristo, ben' use'ela' Diuzi, guquë' be'mbyu naquë' ži'isuba yaca ben' Israel. Lëbë' naquë' Diuzi, ben' rnabë' lao yugulute. Naquë' ben' la'iya tuzioli. Amén.

<sup>6</sup> Pero quele inia' biuzi Diuzi di'idza' ca di'idza' bega'nlnë' ben' Israel. Cala yugulu ben' Israel nacajê' dugalo ben' quie Diuzi.

<sup>7</sup> Lëscan' cala yugulu ben' Israel nacayaquë' dugalo ži'isuba xuzixta'ohua' Abraham según ca naca di'idza' bega'nle' Diuzi Abraham, porque una Diuzi rëbinë' Abraham: "Lao na'a ži'ilo' Isaac huanita' dugalo ži'isubo'."

<sup>8</sup> Quie lena' reya'ala' tziöñe'ero cala yugulu ben' Israel nacayaquë' dugalo ben' quie Diuzi. Balazi ben' Israel, ben' rue quie xti'idza' Diuzi, leyaquë' nacayaquë' dugalo ben' quie Diuzi, dugalo ben' ži'isuba Abraham.

<sup>9</sup> Porque cani naca di'idza' bega'nle' Diuzi Abraham: "Caora babedyyin hora, huedena'a luë' huela'iya' žgulo' Sara cuenda hua'anë' xcuidi' quio'." Cana' tziöñe'ero quie ben' rue quie xti'idza' Diuzi dugalo ben' quie Diuzi como dan' naca quieyaquë' ca quie Isaac, ben' golo de acuerdo con cabë' di'idza' bega'nle' Diuzi Abraham.



10-13 Dera mazara di'idza' re'enda' inia' le'e. Caora babgula Isaac, na' bi'a nigula quiè' Rebeca xcuidi' guidi'. Na'ra una Diuzi rèbinè' nigula quiè' Isaac: "Huanabè' bidao' galo taorupe lao bidao' golo tanëro." Lena' naca de acuerdo con ca una Diuzi cani: "Huela'iya' Jacob, pero bihuela'iya' Esaú." Cana' una Diuzi la'acazi binegalo yaca xcuidi' guidi', binehuejabi' tahuen, binehuejabi' tamala. Lena' ineziro napa Diuzi derecho huela'yanè' nu ben' re'ennè' huela'yanè', biruenè' cuenda la'acazi bèjè' tahuen, la'acazi bèjè' tamala.

14 ¿Bizi inaro chi'? ¿Inaro birue Diuzi tadya'a? ¿Bireya'ala' inaro birue Diuzi tadya'a!

15 Porque cani una Diuzi rèbinè' Moisés dza na'te: "Hueyèchi'la'adya' nu ben're'enda' yeyèchi'la'adya'. Idyè'èda' nu ben' re'enda' idyè'èda'."

16 Quie lena' inia' le'e, cala ra'o huero mandado yeyèchi'la'adyi' Diuzi ra'o, nechán' según ca mandado hue cuinnè' yeyèchi'la'adyi'nè' ra'o.

17 Lè'è guichi la'iya quie Diuzi rguixogue'n ra'o cabè' una Diuzi gudyinè' ben' naca rey quie nación Egipto dza na'. Cani una Diuzi rèbinè' lèbè': "Baolioga' luè' gaco' rey ta ilè'è yugulu benè' ca naca yela' huaca quia', lèscan' ta huebè'jè' nè'èdi' duže yedyi layu."

18 Quie lena' inia' le'e, cani naca quie Diuzi: Reyèchi'la'adyi'nè' nu ben' re'ennè' yeyèchi'la'adyi'nè'. Lèscan' usanla'adyi'nè' nu ben' re'ennè' usanla'adyi'nè'.

19 Pero le'e inale: "Chi yugulu ta ruero nacan mandado quie Diuzi, na'ra ¿bixquien' rugapa Diuzi ra'o dula' xquia por nun quie ta ruero rdaro lao yedyi layu? ¿Tu ta re'en Diuzi gaca, bizi huero ta bigacan?"

20 Pero rnaba' le'e, ¿nuzi nacaro tzu'uro huedila huenè' lëro Diuzi? Rnia' le'e, binapa tu yeso' derecho inèn yèbin ben' rue len: "¿Biquien' bzalolo' nè'èdi' cani?"

21 Pues napa ben' rue yeso' derecho si'nè' gun', huenè' bitezi yeso' rapanè' gusto huenè'. Con tuzi gun' senè' napè' derecho huenè' yeso' tza'o, o huenè' yeso' corriente.

22 Napa Diuzi derecho idza'nè' huenè' castigo nu ben' reya'ala' gata' castigo quie como dyè'èdi' rbeza Diuzi yetza'jè' pensari quiejè'.

23 Cana' bè Diuzi, dyè'èdi' ulezanè' quie yaca ben' unita' dza na'. Cana' blu'enè' ra'o naquè' ben' zela'adyi', ben' reyèchi'la'adyi' ra'o. Desde dza na'te zuè' rbezè' ta udze'nè' xnezi quiero tacuenda idyin dza tzasulèronè' guibá.

24 Ulio Diuzi ra'o lao rupa cue'ro len ben' Israel len ben' za' yedyi tula.

25 Lècana' rguixogue'n lè'è guichi la'iya quie Diuzi ta bè ben' lao Oseas: Huabio Diuzi yaca ben' za' yedyi tula ta gacajè' ben' quienè'. Huadyè'è Diuzi yaca ben' binaca ben' Israel, ben' nunu nadyè'è.

26 Lèscan' lèyaca yedyi ga nita' ben' binuebè' Diuzi, ga una Diuzi: "Binacale ben' quia'."

Lèben' na' iyacajè' zi'i Diuzi, ben' neban tuzioli.

27 Pero quie ben' Israel una Isaías caora unè' cani: "La'acazi naca ben' Israel tazègula ca naca yožo de ru'a nisadao', quele yugoje' inaojè' xneza Diuzi, tu chopazijè' inaojè' xneza Diuzi ute usela Diuzi lèjè'.

28 Tu sasazi uzu Diuzi di'idza' quienè' huenè' castigo lao duže yedyi layu."

29 Lèscan' dza na'te unè' Isaías cani:

Chi bipca'n Diuzi zi'isubaro lao yedyi layu dza na', babega'nnan bayèchi' gula quiero cabè' bayèchi' gula bega'nnan quie ben' yedyi Sodoma len ben' yedyi Gomorra.

*Cabè' naca quie yaca ben' Israel*

<sup>30</sup> ¿Ca bi pensari reya'ala' huero? Pues reya'ala' huero pensari de que yaca ben' binaca ben' Israel, ben' birnao guichi ley pca'n Diuzi lao na'a Moisés, pues baguca quiejè' rl'è Diuzi lèjè' ben' laxta'o yèri nun quie na' rzudyi'ilèjè' Jesús.

<sup>31</sup> Pero netza'n quie ben' Israel. Nernaojè' guichi ley pca'n Diuzi lao na'a Moisés tacuenda il'è Diuzi leyaquè' ben' laxta'o yèri. Chan' dula'adyi'yaquè' ruzujè' di'idza' huejè' yugulu ca mandado rue lao guichi ley na', na'ra il'è Diuzi leyaquè' ben' laxta'o yèri. Pero bibèyaquè' gan, bibzujè' di'idza' huejè' yugulu con cabè' rna lè'è quichi ley na'. Quie lena' bibèjè' gan il'è Diuzi lèjè' ben' laxta'o yèri.

<sup>32</sup> ¿Bixquien' bibèjè' gan? Pues bibèjè' gan como dan' re'enjè' huejè' cuinzijè' ben' laxta'o yèri. Binezijè' il'è Diuzi ra'o ben' laxta'o yèri por nun quie chi rzudyi'ilèro Cristo. Quie lena' naca quiejè' ca quie ben' uch'a'o yo, bgudyinè' yu tu neza, bibènè' gan idyinnè' ga zionè'.

<sup>33</sup> Lena' rguixogue'n quieyaquè' lè'è guichi la'ia quie Diuzi cani: Baose'ela' Diuzi zi'inè' lao yedyi quie ben' Israel, pero psebi'jè' lèbè'. Quie lena' raca quieyaquè' ca quie ben' ru'u yo ni'e, bgudyinè' yu tu neza. Pero nu ben' rzudyi'ilè zi'inè', bigaca bayèchi' quienè', huega'nnè' huen.

## 10

<sup>1</sup> Bicha', du guicho du la'adya' rulidza' Diuzi re'enda' yetza' yaca ben' Israel pensari quieyaquè' gata' yela' neban quiejè' tuzioli.

<sup>2</sup> Nia' le'e tali na' re'enjè' tzionla'adyi'jè' Diuzi, pero binezijè' bi huejè'.

<sup>3</sup> Binezijè' bi huejè' ta il'è Diuzi lèjè' ben' laxta'o yèri. Na' re'enjè' huejè' cuinzijè' ben' laxta'o yèri. Racajè' pensari chi uzujè' di'idza' ca mandado rue lao guichi ley pca'n Diuzi lao na'a Moisés, cana' il'è Diuzi lèjè' ben' laxta'o yèri.

<sup>4</sup> Pero biruejè' ca re'en Diuzi huejè', porque tanun quie dan' inaoro xneza Cristo, cana' il'è Diuzi ra'o ben' laxta'o yèri, cala porque dan' uzuro di'idza' ca mandado rue lao guichi ley quienè'.

<sup>5</sup> Na'ra bzu Moisés di'idza' lè'è guichi ta rguixogue'nè' ra'o de quie chi tali uzuro di'idza'ca mandado rue lao guichi ley pca'n Diuzi lao na'anè', chi ni tu lasa bigaparo falta lao dza rdaro lao yedyi layu, na'ra por lena' gun Diuzi ra'o yela' neban tuzioli. Pero nunu yezue hue gan huejè' cana'.

<sup>6</sup> Pero ta gun Diuzi ra'o, gunnè' yela' neban quiero tuzioli tanun quie dan' rzudyi'ilèro Cristo. Biruen zi tziuro guibà tzexi'ro Cristo yeyèzinè' gacalènè' ra'o.

<sup>7</sup> Lèscan' biruen zi yeyèziro ga nita' ben' huati tzexi'ro Cristo yeguidè' gacalènè' ra'o.

<sup>8</sup> Pero ¿ca bizi rnan lè'è guichi la'ia? Cani rnan: “Con di'idza' yero lu'u ru'aro, con pensari yu'u lu'u guicho laxta'oro, con lèzin gun Diuzi ra'o yela' neban quiero tuzioli.” Lena' rguixogue'ro benè'.

<sup>9</sup> Porque chi inaro naca Cristo xuzi xa'nro zaquè'lao lao benè', chi yu'uro pensari tali na' pseban Diuzi lèbè', na'ra gun Diuzi ra'o yela' neban tuzioli.

<sup>10</sup> Cani nacan: Tanun quie dan' yu'u pensari lu'u guicho laxta'oro pseban Diuzi Cristo, quie lena' il'è Diuzi ra'o ben' laxta'o yèri. Lèscan' tanun quie di'idza' rero lu'u ru'aro inaro naca Jesucristo xuzi xa'nro zaquè'lao lao benè', quie lena' gun Diuzi ra'o yela' neban tuzioli.

<sup>11</sup> Lè'è guichi la'ia rguixogue'n rnan caniga: “Nu ben' rzudyi'ilè lèbè', bigaca bayèchi' quienè' huega'nnè' huen.”

<sup>12</sup> Pues tuzi ca zaca'ro lao Cristo, la' acazi ben' Israel, la'acazi ben' za' yedyi tula, como dan' naca Cristo xuzi xa'n yuguluro, taže huela'iyane' nu ben' rulidza lëbë'.

<sup>13</sup> Porque tali nacan ca nan lë'ë guichi la'iya cani: “Yugulu ben' uzëto laohuë', ben' ina naca Cristo xuzi xa'nnë', hue'në' leyaquë' yela' neban tuzioli.”

<sup>14</sup> Pero bisaque' uzëtoyaquë' laohuë' inayaquë' naca Cristo xuzi xa'nnë' chi birzudyi'lëjë' lëbë'. Lëscan' bisaque' sudyi'lëjë' lëbë' chi binezijië' cabë' bënë'. Lëscan' bisaque' inezijë' cabë' bënë' chi nunu yëbi leyaquë'.

<sup>15</sup> Lëscan' bisaque' yëbi benë' leyaquë' chi bizu ben' use'ela' lëjë'. Lëcana' nan lë'ë guichi la'iya quie Diuzi cani: “Tadya'a gula rue yaca ben' rguixogue' xti'idza' Diuzi.”

<sup>16</sup> Pero cala yugulu benë' rue quieyaquë' con cabë rna Diuzi cuenda hue' Diuzi lëjë' yela' neban tuzioli. Nacan ca una Isaías dza na'te rëbinë' Diuzi: “Tu chopazi benë' rue quieyaquë' di'idza' la'iya quio' ta yëbindo'jë'.” Cana' unë' rëbinë' Diuzi.

<sup>17</sup> Na'ra nia' le'e, chi yero uzënagaro di'idza' la'iya quie Diuzi, lena' ruen mandado quiero sudyi'lëro Cristo.

<sup>18</sup> Pero rnaba' le'e tu di'idza': ¿Biži raca quie ben' Israel? ¿Raca quiejë' binezijië' con cabë' rna di'idza' la'iya quie Diuzi? Cala raca quiejë' cana'. Claro nezijë' con cabë' rna di'idza' la'iya quie Diuzi, porque rnan lë'ë guichi la'iya quie Diuzi cani:

Duže yedyi ga rda ben' Israel nu'ayaquë' guichi ga yu'u di'idza' la'iya quie Diuzi.

<sup>19</sup> Tatula rnaba' le'e: ¿Bi ca nale? ¿Nale binezi ben' Israel de que ulio Diuzi ben' za' yedyi tula ta gacayaquë' ben' quienë'? Pues nezijë', porque dza na'te, dza uda Moisés lao yedyi layu, bzunë' di'idza' lë'ë guichi con cabë' una Diuzi rëbinë' ben' Israel cani:

Tanun quie cuioga' ben' za' yedyi tula, ben' binaca ben' Israel ta huela'iya' leyaquë', cana' gacazë'le leyaquë'.

Tanun quie gacalia' ben' tula, ben' nale ben' tondo, cana' idza'le leyaquë'.

<sup>20</sup> Lëscan' dza uda Isaías lao yedyi layu, bibdzebinë' bzunë' lë'ë guichi con cabë' una Diuzi cani:

Yaca ben' binaca ben' Israel, barnaoyaquë' xneza'.

Yaca ben' binaca ben' Israel, baruela'iya' leyaquë'.

<sup>21</sup> Lëscan' dza na' una Isaías cabë' bë ja ben' Israel unë' rëbinë' leyaquë': “Yugu dza rëbi Diuzi lëjë', pero yela' yeladyi' quiejë' biruzënjagjë'.”

## 11

### *Baolio Diuzi bala ben' Israel*

<sup>1</sup> Na'ra inaba' le'e: ¿Apsanla'adyi' Diuzi yaca ben' Israel? Pues bip-sanla'adyi' Diuzi leyaquë'. Hasta në'ëdi' ulio Diuzi naca' ben' Israel. Naca' zico' zi' isuba Abraham. Naca' familia quie Benjamín, ben' uzu tiempote.

<sup>2</sup> Desde dza na'te beyuebë' Diuzi ben' Israel ulionë' lëjë' gacajë' ben' quienë'. Biusanla'adyi' Diuzi leyaquë'. ¿Binezile con cabë' rnan lë'ë guichi la'iya quie Diuzi ga rguixogue'n quie profeta Elías? Bigala'adyi'le cabë' bë profeta Elías, zuë' rulidzë' Diuzi udaohuë' yaca ben' Israel xquia.

<sup>3</sup> Unë' rëbinë' Diuzi: “Xuzu' Diuzi, abëti ben' Israel yugulu ben' rguixogue' di'idza' quio'. Apquinuyaquë' labecugo ta nueyaquë' guixi'dao' ga ri-onla'adyi'yaquë' luë'. Tuzu' në'ëdi' babega'na'. Lëzi bare'enjë' gutijë' në'ëdi'.”

<sup>4</sup> Pero na' una Diuzi gudyyinè' lèbè': "Cala tuzo' luè' bega'nlo'. Nenita' igadyi mila ben' naca ben' quia', ben' birionla'adyi' ta pcha'a benè' najè' Diuzi quiejè'."

<sup>5</sup> Cabè' guca dza na'te, cana' racan na'a. Nenita' tu chopa ben' Israel, ben' du guichi du dula'adyi' rue quie xti'idza' Diuzi. Gusto quie Diuzi baolionè' leyaquè' gacajè'ben' quienè'.

<sup>6</sup> Porque cala ulio Diuzi lèjè' tanun quie dan' bi cosa bèyaquè'. Chi tali rbio Diuzi ra'o tanun quie bi cosa ruero, lena' huero obligado Diuzi cuionè' ra'o gacaro ben' quiè'. Pero bisaque' huero obligado Diuzi, gusto quienè' rbionè' nu ben' re'en cuionè' gaca ben' quienè'.

<sup>7</sup> ¿Ca bizi inaro quie ben' Israel? Bibèjè' gan yugulujè' gata' yela' neban quiejè' tuzioli. Yaca ben' ulio Diuzi, lèjè' sí, bèjè' gan. Psanla'adyi' Diuzi yaca los demás ben' Israel, ben' yaladyi'.

<sup>8</sup> Cana' rguixogue'n lè'è guichi la'ya quie Diuzi cani: "Yela' yeladyi' quiejè' apchula Diuzi pensari quiejè' ta bitzioñe'ejè' con cabè' rna di'idza' la'ya quienè'. La'acazi rlè'èjè' dyè'èdi, ruejè' ca ben' birlè'è. La'acazi reyaquè' dyè'èdi, ruejè' ca ben' bire. Cana' raca quiejè' hasta na'adza."

<sup>9</sup> Lèscan' quie ben' Israel una rey David dza na' con cabè' rnèn cani: Ruen zudyi' quie ta de quiejè'.

Con ta raxejè' gaojè' yo'ojè', con ta raxejè' huejè', lèlena' udyiaguin' leyaquè'. Lèlena' uca'nnan leyaquè' mala lao Diuzi, huenè' lèjè' castigo.

<sup>10</sup> Huechula laoyaquè' ta biilè'èyaquè' tuzioli.

Lèscan' gacajè' bego tuzioli.

Cana' una rey David dza na'te.

<sup>11</sup> Na'ra inaba' le'e: ¿Yela' yeladyi' quie ben' Israel apsanla'adyi' Diuzi leyaquè' tuzioli? Cala tuzioli apsanla'adyi' Diuzi leyaquè'. Pero racalè Diuzi ben' binaca ben' Israel ta hue quieyaquè' xti'idzè', na' gata' yela' neban quiejè' tuzioli cuenda ilè'è ben' Israel cabè' tahuen na' raca quie ben' binaca ben' Israel. Cana' huenan quie ben' Israel inaøjè' xneza Cristo gata'rè yela' neban quiejè' tuzioli.

<sup>12</sup> Tahuen guca quie ben' binaca ben' Israel caora uquixi ben' Israel bibè quiejè' xti'idza' Diuzi. Pero huacara huen gula quie ben' binaca ben' Israel caora idyin dza inao yaca ben' Israel xneza Cristo, na' gata' yela' neban quiejè' tuzioli.

<sup>13</sup> Pero re'enda' inia' le'e itu di'idza', le'e ben' binaca ben' Israel. Pues tanun quie dan' use'ela' Diuzi nè'èdi' ta quixogui'a le'e xti'idza' Diuzi, lena' nacan belao ca dyin quie Diuzi rua'.

<sup>14</sup> Cana' rèpa' ben' Israel, ben' yedyi quia', cuenda huenan quieyaquè' inaoyaquè' xneza Cristo cabè' rnaole le'e, na' gata'rè yela' neban quiejè' tuzioli.

<sup>15</sup> Caora blè'è Diuzi bire'en ben' Israel inaoyaquè' xneza Cristo, na'ra udiloguè' yaca ben' za' yedyi tula, yaca ben' re'en inao xneza Cristo. Pero cala bire'en Diuzi inao ben' Israel xneza Cristo. Lega re'en Diuzi inaøjè' xneza quienè'. Lega yedaohue Diuzi caora idyin dza inao yaca ben' Israel xneza Cristo. Lèdza na' gaca quiejè' ca quie ben' baguti beban tatula.

<sup>16</sup> Chi banuela'ya Diuzi yèzo yèta xtila ta gaca pan, lèscan' naca la'ya pan ta bro lu'u horno. Lèscan' cana' nacan quie nu yaga. Chi banuela'ya Diuzi lue yaga, lèscan' naca la'ya taca' yaga. Lèscan' nacaré' quie ben' Israel. Chi bè xuzixta'ojè' quie Diuzi, lèscan' idyin dza hue zico' z'i'subajè' quie Cristo.

<sup>17</sup> Naca yaca ben' Israel ca quie tu yaga olivo. Naca bala ben' Israel ca quie taca' yaga olivo. Yela' yeladyi' quiejè' baochugu apsanla'adyi' Diuzi lèjè', pero baozi' Diuzi le'e, ben'za' yedyi tula. Banaca quiele ca quie taca' yaga

guixi' nadilaten yaga olivo. Cana' gaca huen quiele, na' huaca yezi'le fuerza quie Diuzi cabë' rezi' taca' yaga fuerza quie luenä.

18 Pero bihuele cuinle ben' ze dan' baochugu Diuzi taca' yaga olivo, bë Diuzi quiele ca quie yaga nadilaten yaga olivo. Bigala'adyi'le cala por nun quie le'e nezi' lue yaga fuerza, dechan' por nun quie lue yaga nezi'le le'e fuerza.

19 Durpende yëbile në'ëdi': "Hue'encazi, pero baochugu Diuzi taca' yaga olivo tacuenda gaca nëto' ben' quienë' lao laza ben' Israel."

20 Pero rëpa'le'e: "Baochugu Diuzi taca' yaga olivo, inaro ben' Israel, como dan' psebi'jë' Cristo. Pero le'e, ben' binaca ben' Israel, por nun quie dan' barnaole xneza Cristo nacalële Diuzi tuze. Quie lena' gapale cuidado bihuele cuinle ben' ze.

21 Cana' nacan porque bibezi'ze Diuzi nu ben' Israel, dan' psebi'jë' Cristo. Na'ra lëcana'zi huaca bisi'ze Diuzi nu ben' za' yedyi tula chi biinaojë' xneza Cristo.

22 Na' ulehuecara pensari ca naca yela' ben' huen quie Diuzi. Pero lëscan' naca Diuzi ben' de pensari. Dyë'ëdi rna'në' huenë' castigo nu ben' bire'en hue quie di'idza' quië'. Pero le'e, taže bagucalë Diuzi le'e. Pero ruen zi inaole xneza Diuzi gapalenë' bala'ana, porque chi bihue quiele di'idza' quië', lëscan' le'e, hue Diuzi le'e castigo.

23 Porque chi ye utza' ben' Israel pensari quiejë' inaojë' xneza Cristo, na'ra yezi' Diuzi lëjë' utlanë' lëjë' yaga olivo tatula. Decazi yela' huaca quie Diuzi huenë' cabë' re'ennë' huenë'.

24 Pues ulio Diuzi le'e gacale ben' quienë', la'acazi nacale ca quie tu yaga guixi', la'acazi binacale ben' Israel, pero mazara gue'en Diuzi ben' Israel gacajë' ben' quienë' utlanë' lëjë' yaga olivo tatula.

### *Huadyin dza inao yaca ben' Israel xneza Cristo*

25 Re'enda' inia' le'e tu di'idza' con cabë' baodixogue' Diuzi në'ëdi' cuenda inezile cabë' gaca, na' bihuele cuinle ben' ze. Tali na' apsanla'adyi' Diuzi bala ben' Israel tanun quie yela' yeladyi' quiejë'. Pero caora abeya ben' re'en inao xneza Cristo, ben' za' yedyi tula, na'tera yezulao Diuzi yeyuenë' ben' Israel tuze tatula.

26 Lëdza na' sulao inao yugulu ben' Israel xneza Cristo. Cana' rguixogue'n lë'ë guichi la'iya quie Diuzi cani:

Lado ben' Israel huario tu ben' yedyi quiejë', ben' uzioñe'e lëjë'.

Lëben' na' yegubë' tamala quie ben' Israel.

27 Cana' uzu Diuzi di'idza' con cabë' di'idza' bega'nlnë' xuzixta'o ben' Israel unë' yezi'zenë' dula' quieyaquë'. Cana' rnën lë'ë guichi la'iya quie Diuzi.

28 Pero na'a barue ben' Israel condre Diuzi. Biralejë' guti Cristo lë'ë yaga cruzo cuenda gata' yela' neban quiejë' tuzioli. Pero como biralejë', lena' rguilo Diuzi le'e, ben' za' yedyi tula, nu le'e re'en inao xneza Cristo. Pero nadyë'ëcazi Diuzi ben' Israel. Lena' ulionë' xuzixta'ojë' gacajë' ben' quienë'.

29 Uzu Diuzi di'idza' quienë' cabë' unanë' huenë'. Como ulio Diuzi ben' Israel gacajë' ben' quienë', lena' biusanla'adyi'në' leyaquë' tuzioli.

30 Lële'e, ben' binaca ben' Israel, bibë quiele quie Diuzi dza na'te, pero caora uru'un ben' Israel Cristo tzala'la, na'ra bezulao Diuzi yeyuenë' le'e tuze beyëchi'la'adyi'në' le'e.

31 Na'ra cala le'e, nechan' yaca ben' Israel, lëleyaquë' birue quiejë' quie Diuzi. Pero huadyin dza yeyëchi'la'adyi' Diuzi ben' Israel tatula cabë' beyëchi'la'adyi'në' le'e.

<sup>32</sup> Porque tuzi ca bē Diuzi, baochugulinē' de dula' xquia quie yuguluro. Na'ra quie lena' tuzi ca huenē', yeyēchi'la'adyi'nē' yuguluro.

<sup>33</sup> Biyeyudyi yedu yela' rioñe'e, yela' nezi quie Diuzi. Bisaque' huebē'ro duzete ca naca pensari quienē', ca naca xnezē'.

<sup>34</sup> ¿Nuži saque' tzioñe'e duzete pensari quie Diuzi? ¿Nuži saque' usēdi lēbē'?

<sup>35</sup> Nunu saque' yēbi Diuzi: "Tu cani reya'alo' quia'."

<sup>36</sup> Porque bzalo Diuzi yugulu ta de, yela' na' yugulu ta de nacan quienē'. Ben' ze, ben' bala'ana naca Diuzi tuzioli. Amén.

## 12

### *Ni rguixogue'n cabē' reya'ala' hue ben' quie Diuzi, ben' naca la'iya*

<sup>1</sup> Na'ra, bicha', babeyēchi'la'adyi' Diuzi le'e. Quie lena' du guicho du la'adya' inia' le'e reya'ala' tzesanle cuinle lao Diuzi, huele cuinle ca gun quie Diuzi ta biyeyula yelen. Gacale ben' naca la'iya, cana' yeyula'adyi' Diuzi le'e. Cana' reya'ala' huele tzionla'adyi'le Diuzi.

<sup>2</sup> Bireya'ala' yenaole pensari mala quie ja ben' nita' lao yedyi layu. Reya'ala' yetza'le pensari quiele, yenaole xneza Diuzi cuenda yetza'nan quiele yugulu ca ruele. Cana' inezile ca re'en Diuzi huele, porque ca re'en Diuzi huero nacan ta gacalēn ra'o, nacan ta yeyula'adyi'nē' ra'o, nacan tadya'a gula.

<sup>3</sup> Yela' ben' huen quie Diuzi ulionē' nē'ēdi' ta uzioñe'eda' le'e. Lena' inia' le'e bireya'ala' huelē cuinle ben' ze. Du guicho du la'adyi'le reya'ala' huele pensari dya'a según cabē' nue Diuzi quie quiele barue quiele xti'idza'nē'.

<sup>4</sup> Porque cani nacan: Tuzi cuerpo quiero naca, pero taže netza' tu tu parte quien, taže netza' dyin quie quien.

<sup>5</sup> Lēscan' cana' naca quie ra'o ben' nao xneza Jesús. La'acazi nacaro ben' zē, nacaro tu cue' ben' ncalē Cristo tuže. La'acazi netza' dyin quie Diuzi huero quie quiero, naca yuguluro tuže.

<sup>6</sup> Netza' ta banegun Diuzi quiero tu turo. Reya'ala' huero dyin dya'a según ta banegun Diuzi quiero tu turo. Chi banegun Diuzi quiero uzioñe'ero benē' con cabē' rna di'idza' la'iya quienē', na'ra lena' reya'ala' huero según cabē' nue Diuzi quie quiero barue quiero xti'idza'nē'.

<sup>7</sup> Chi banegun Diuzi quiero gacalēro benē', na'ra reya'ala' gacalērojē' dyē'ēdi. Chi neziro uzioñe'ero benē' con cabē' rna xti'idza'Diuzi, cana' reya'ala' huero.

<sup>8</sup> Chi neziro hue'ro benē' di'idza' zela'adyi', cana' reya'ala' huero. Chi de dumi quiero, reya'ala' gacalēro benē', bihuero cuenda chi yeyuejē' laohue. Chi neziro udze'ro xnezi bi dyin hue ja benē', cana' reya'ala' huero du guicho du la'adyi'ro. Chi neziro yeyēchi'la'adyi'ro ben' yēchi', cana' reya'ala' huero du guicho du la'adyi'ro, bihuerojē' stu'.

### *Ni rguixogue'n cabē' reya'ala' hue ben' nao xneza Cristo*

<sup>9-10</sup> Bireya'ala' idyē'ēro laguedyiro de ladzazi, pero du guicho du la' adyi'ro reya'ala' idyē'ēro ben' bichiro, ben' ncalēro Cristo tuže. Puro tadya'a reya'ala' huero, bihuero tamala. Reya'ala' gaparo laguedyiro bala'ana yuguluro.

<sup>11</sup> Bireya'ala' huero yela' huēdi, den' dula'adyi'ro reya'ala' huero dyin. Lēscan' dula'adyi'ro reya'ala' huero cabē' mandado re'en Diuzi huero.

<sup>12</sup> Reya'ala' suro contento cuezaro dyē'ēdi dza yezi' Diuzi ra'o. Reya'ala' si'zero biidza'ro cati raca zēdi quiero. Bireya'ala' usanro ulidzaro Diuzi.

<sup>13</sup> Reya'ala' gacalēro laguedyiro ben' nao xneza Cristo, ben' bide quie. Reya'ala' gapachi'ro nu ben' za' žan yu'u quiero.

14 *Reya'ala'* yëbiro *Diuzi* huela'iyané' nu ben' za' rdila rnë len ra'o. *Bireya'ala'* udze'de'ro benë'.

15 *Reya'ala'* yedaohuelëro *laguedyiro* cati *raca* tadya'a quieyaquë'. *Reya'ala'* yeyëchi'la'adyi'lëro *laguedyiro* cati *raca* tazëdi quieyaquë'.

16 *Reya'ala'* huero tuze *yuguluro*. *Bireya'ala'* yezë'ro *laguedyiro*. *Bireya'ala'* huero *yaladyi'* ben' yëchi'. *Bireya'ala'* huero *cuinro* ben' ze.

17 *Bireya'ala'* gacalëro *lëbi* ben' mala. *Reya'ala'* huero *bala* tzu'ulëro *laguedyiro* dyë'ëdi.

18 Por tu parte quiero, huero bi huero *tacuada* nita'lëro *yugulu* benë' dyë'ëdi, ta *bibi* zëdi *gata'*.

19 Na'ra *bicha'*, *nedyë'ëda'* le'e, *inia'* le'e *bireya'ala'* yeyuero *laohue* quie ben' mala. *Naoyubi* *Diuzi* bi *huenë'* quie ben' mala. *Cana'* *rguixogue'n* lë'ë *guichi* la'iya quie *Diuzi* de que *nacan* *cuenda* quie *Diuzi* *huenë'* benë' *castigo*, *cala* ra'o. *Cana'* una *Diuzi*.

20 *Lëscan'* una *Diuzi* de que *chi* *rdue* ben' *rudie* ra'o, *reya'ala'* *hue'rojë'* ta *gaojë'*. *Chi* *rbilijë'*, *reya'ala'* *hue'rojë'* ta *yo'ojë'*, porque *chi* huero *cana'*, *huacabë'jë'* *nacaro* ben' *huen* *yedue'jë'*. *Cana'* una *Diuzi*.

21 *Bihue'ro* *lato* *hue* *tamala* ra'o *gan*, *reya'ala'* huero *gan* *lao* *tamala*, huero *puro* *tahuen*.

## 13

1 *Yuguluro* *reya'ala'* *uzuro* di'idza' *cabë'* *mandado* *rue* nu ben' quie *gobierno*, porque *Diuzi* *ulëchinë'* ben' quie *gobierno*. *Bizu* ben' quie *gobierno* *chan'* *biulëchi* *Diuzi* *lëbë'*.

2 Nu ben' *biruzu* di'idza' *cabë'* *mandado* *rue* ben' quie *gobierno*, na' *ruetenë'* *contra* *Diuzi*, de *dula'* *xquia* *quienë'*, *hue* *Diuzi* *lëbë'* *castigo*.

3 *Birdzebi* ben' *rue* *tadya'a* ben' quie *gobierno*. Pero sí, *rdzebi* ben' *rue* *tamala* ben' quie *gobierno* *dan'* *gata'* *castigo* *quiejë'*. *Chi* *re'entro* *suro* *contento*, *chi* *re'entro* *birdzebiro* ben' quie *gobierno*, na'ra *reya'ala'* *taru* *dula'adyi'ro* huero *tahuen*. *Cana'* *gacabë'* ben' quie *gobierno* *nacaro* ben' *huen*.

4 *Cana'* *reya'ala'* huero como *dan'* *ulëchi* *Diuzi* *gobierno* ta *gaca* *huen* *quiero*. *Chi* *birdaro* *dula'adyi'ro* *bihuero* *tahuen*, *reya'ala'* *yeyuero* *pensari* *quiero* como *dan'* *naca* *cuenda* quie *gobierno* *huejë'* ra'o *castigo*. *Mandado* quie *Diuzi* na' *rue* *gobierno* *mandado* *gaca* *castigo* ben' *rue* *tamala*.

5 Quie *lena'* *reya'ala'* *uzuro* di'idza' *cabë'* *mandado* *rue* nu ben' quie *gobierno*, no *solamente* ta *bigata'* *castigo* *quiero*, pero *lëscan'* como *dan'* *nacan* *tahuen*, *nacan* ta *reya'ala'* huero.

6 Quie *lena'* *reya'ala'* *quizuro* *impuesto* como *dan'* *rue* ben' quie *gobierno* *mandado* quie *Diuzi* *cabë'* *dyin* *ruejë'*.

7 *Reya'ala'* *quizuro* *chi* *zu* ta *reya'ala'* *quizuro*. *Reya'ala'* *quizuro* *dumi* ta *rtupa* ben' *yedyi*. *Reya'ala'* *quizuro* *impuesto* quie *gobierno*. *Reya'ala'* *gapalá'nro* *yugulu* ben' *rnabë'*.

8 *Chi* *zu* ta *reya'ala'* *quizuro* quie *benë'*, *reya'ala'* *useyudyiro* *quizuron*. Pero *bireya'ala'* *usanro* *idyë'ëro* *laguedyiro*. *Chi* *nedyë'ëro* *laguedyiro*, con *lëzin* *babzuro* di'idza' *cabë'* *mandado* *rue* *lao* *guichi* *ley* quie *Diuzi* *yuguluten*.

9 *Lë'ë* *guichi* *ley* quie *Diuzi* *rguixogue'n* ra'o de que *bireya'ala'* *gasilëro* *nigula* quie ben' *tula*. *Lëscan'* quie *nigula*, *bireya'ala'* *gasilënë'* *be'mbyu* *tula*. *Bireya'ala'* *gutiro* *benë'*, *bireya'ala'* *cuanro* quie *benë'*, *bireya'ala'* *si'ro* *benë'* *yë'*, *bireya'ala'* *sa'la'adyi'ro* ta de quie *benë'*. *Cana'* *rnan* *lë'ë* *guichi* *ley* quie *Diuzi*. Pero *lëscan'* *rguixogue'n* ra'o de que *reya'ala'* *idyë'ëro* *benë'* *cabë'* *nadyë'ëro* *cuinro*. *Chi* huero *cana'*, *banaca* *quiero* *babzuro* *yugulu* di' *idza'* *cabë'* *mandado* *rue* *Diuzi* *lë'ë* *guichi* *ley* *quienë'*.

<sup>10</sup> Chi nadyë'ëro benë', bihuerojë' mala. Cana' huero uzuro di'idza' dyë'ëdi ca mandado rue Diuzi lë'ë guichi ley quienë'.

<sup>11</sup> Como cana' nacan, reya'ala' huero pensari ca tu dza rdaro lao yedyi layu. Reya'ala' huebë'ro abdyin hora yeyu'uro pensari dyë'ëdi, como dan' barueran bago dza yezi' Diuzi ra'o, cala ca dza na'te, dza uzulaoro inaoro xneza Cristo.

<sup>12</sup> Ilë'ëti'zi rdziogue iyudyi dza rdaro lao yedyi layu idyin dza yezi' Diuzi ra'o. Quie lena' bireya'ala' huero tamala ca ben' rda lao lato lao chula. Reya'ala' biidzebiro suro listo sëraro ca zë soldado, ben' napa fuerza, ben' rda te dza.

<sup>13</sup> Reya'ala' taro dyë'ëdi ca ben' rda te dza. Bireya'ala' taro huero hue'e. Bireya'ala' taro ga ruejë' lani, ga ruejë' ru'be, ga ruejë' huedila. Bireya'ala' talëro nigula con ganzi. Bireya'ala' taro quiloros zëdi quiloros dila.

<sup>14</sup> Reya'ala' taro yenaoro tuze Jesucristo dyë'ëdi. Bitaro huero ta rnazin quiero.

## 14

### *Bireya'ala' inëbizo ro laguedyiro ben' nao xneza Jesús*

<sup>1</sup> Reya'ala' hue'lële ben' zaozulao inao xneza Jesús di'idza' zela'adyi'. Bitzu'ule huedila huenë tu ta binaca.

<sup>2</sup> Por ejemplo, bala ben' nao xneza Jesús, ben' zaozulao inao xnezanë', rnajë' bireya'ala' gaoro bë'ëla'. Quie lena' puro yëza cuan gaøjë'.

<sup>3</sup> Na' yaca ben' rao biti'tezi ta de, bireya'ala' ilë'ëyaquë' mala ben' rao puro yëza cuan. Bireya'ala' inëbizo yaquë' laguedyijë' como dan' rupa cue'jë' nacajë' ben' nao xneza Jesús.

<sup>4</sup> ¿Nuži bë le'e mandado inëbizo le laguedyile, ben' naorë xneza Diuzi? Nacan cuenda quie xa'një' chi ruejë' tahuen, chi ruejë' tamala, cala cuenda quiele. Pero huacacazi huen quiejë', como dan' de yela' huaca quie Diuzi ta uca'nnë' lëjë' huen.

<sup>5</sup> Re'enda' inia' le'e itu ejemplo: Yu'u bala ben' nao xneza Jesús rnayaquë' tuzi dza naca la'ia tziönla'adyi'ro Diuzi, cala biti'tezi dza nacan dza huen. Na' yu'u ibala ben' nao xneza Jesús rnajë' biti'tezi dza nacan dza huen tziönla'adyi'ro Diuzi. Quie quiele reya'ala' huele pensari inezile dyë'ëdi ta huele cabë' reya'ala' huele.

<sup>6</sup> Na'ra quie ben' rna tuzi dza naca la'ia tziönla'adyi'ro Diuzi, cala yugu dza nacan huen, ruejë' cana' ta gapala'një' Cristo. Lëscan' yaca ben' rna biti'tezi dza nacan dza huen tziönla'adyi'ro Diuzi, ruejë' cana' ta gapala'nrjë' Cristo. Na'ra quie ben' rna ru'en lato gaoro biti'tezi ta de, na' ruejë' cana' ta gapala'një' Cristo. Lëscan' ben' rao puro yëza cuen, na' ruejë' cana' ta gapala'nrjë' Cristo, na' yëbijë' Diuzi diuxcalelo'.

<sup>7</sup> Ni tu ra'o binita'ro tuzi cabë' nita'ro lao yedyi layu. Ni tu ra'o bigatiro tuzi cabë' gatiro lao yedyi layu. Zu Cristo rna' ruhuianë' ra'o.

<sup>8</sup> Chi zuro nabanro lao yedyi layu, na' zuro nabanro ta gapala'nro Cristo. Lëscan' chi gatiro yeyoro guibá, na' gatiro yeyoro guibá ta gapala'nro Cristo. La'acazi nabanro, la'acazi gatiro, pero nacaro ben' quie Cristo.

<sup>9</sup> Cana' nacan como aguti Cristo bebannë' naquë' xuzi xa'n yugulu benë', la'acazi ben' neban, la'acazi ben' huati.

<sup>10</sup> Pero le'e, ¿bixquien' rnëbizo le ben' bichile ben' nao xneza Jesús? ¿Bixquien' rezë'le laguedyile? Pues yuguloro naca quiero yedyinro lao Cristo huero cuenda cabë' bëro, chi bëro tahuen, chi bëro tamala.

<sup>11</sup> Lena' rguixogue'n lë'ë guichi la'ia quie Diuzi cabë' unanë' cani:



Como nacan tali nabana', lëscan' nacan tali idyin dza quitzu žibi yugulu benë' laohua', hueyaquë' në'ëdi' ben' ze.

Cana' una Diuzi dza na'te.

<sup>12</sup> Cana' nacan huadyin dza quie quiero huero cuenda lao Diuzi cabë' bëro dza udaro lao yedyi layu.

### *Reya'ala' inaoro neza dya'a*

<sup>13</sup> Quie lena' bireya'ala' inëbižoro laguedyiro. Mejorla huero pensari inaoro neza dya'a cuenda biiquixi laguedyiro huejë' tamala por dula' quiero.

<sup>14</sup> Na'ra quie bë'ëla', cala cuinnan nacan žudyi nu gao len. Lena' banezda' dyë'ëdi como naca' ben' nao xneza xa'nro Jesús. Pero chi rue bala benë'pensari naca žudyi gaojë' bë'ëla', na'ra para lëjë' sí, binacan huen gaojë'n, como dan' raquejë' žudyi nacan gaojë'n.

<sup>15</sup> Chi por nun quie dan' re'enro gaoro bi cosa utëbïro pensari quie yaca bi' bichiro, ben' nao xneza Jesús, na'ra lena' rulu'en rdziogue idyë'ëro yaca ben' bichiro. Bihuero ta yega'n yaca ben' bichiro mala lao Diuzi por nun quie dan' re'enro gaoro bi cosa.

<sup>16</sup> Bïutëbïro pensari quie bichi laguedyiro, ben' nao xneza Jesús. Bihuero bi cosa re'enro huero, la'acazi naparo derecho hueron, la'acazi nezïro cala tamala chi hueron.

<sup>17</sup> Binacan belao bi ta gaoro, bi ta yo'oro. Pero tabelao na' inaro tuzi pensari dya'a. Tabelao na' cue' chizi laxta'oro, suro contento tanun quie dan' yu'u lu'u guicho laxta'oro pensari quie Bichi Be quie Diuzi.

<sup>18</sup> Redaohue Diuzi nu ben' rue cana', ben' nao xneza Cristo dyë'ëdi. Lëscan' hualë'ë yaca benë' lëbë' ben' huen.

<sup>19</sup> Cana' huero seguir inaoro huero tadya'a cuenda na' cue' chizi laxta'oro, gacalëro laguedyiro ta tziõe'ejë' mazara con cabë' rna xti'idza' Diuzi.

<sup>20</sup> Binaca huen te cana'zi dyin quie Diuzi por nun quie bi ta re'enro gaoro. Banezcaziro baben Diuzi lato gaoro yugulu ta de ta gaoro. Pero tamala na' gaoro bi cosa chi por lena' utëbïro pensari quie laguedyiro yela' na' huejë' ta bireya'ala' huejë'.

<sup>21</sup> Mejorla biyo'oro bigaoro bi cosa, bihuero bi cosa chi por lena' utëbïro pensari quie ben' bichiro, ben' naorë xneza Jesús, yela' na' huenë' tu ta bireya'alä' huenë'.

<sup>22</sup> Reya'ala' gaparo cuidado cabë' ruero cuinro lao Diuzi. Bihuero cuinro ben' ze nun que nacaro ben' quie Diuzi. Tahuen na' naca quiero chi bigao pensari quiero ra'o xquia cabë' ta ruero.

<sup>23</sup> Chi inezïro nacan xquia tu ta inan quiero huero, na' bireya'ala' hueron. Nacan xquia quiero chi hueron. Lëscan' reya'ala' inezïro dyë'ëdi chi nacan huen, na' hueron. Chi nezïro dyë'ëdi binacan huen, mejorla bihueron como dan' nacan xquia quiero chi hueron.

## 15

### *Huero tahuen quie laguedyiro cala para ra'ozi*

<sup>1</sup> Ra'o, ben' bazïo tiempo nao xneza Cristo, reya'ala' gacalëro laguedyiro, ben' zaozulao inao xneza Cristo. Naca cuenda quiero gacalërojë' huero tahuen quiejë', cala para ra'ozi.

<sup>2</sup> Yuguluro reya'ala' huero tahuen quie laguedyiro, reya'ala' gacalërojë' tziõe'eyaquë' mazara, na' huebë'jë' Diuzi hue quiejë' xti'idza'në'.

<sup>3</sup> Cana' reya'ala' huero como dan' Cristo bibënë' huen para cuinzinë', pero lëscan' bënë' huen para yugulu benë'. Guca quienë' cabë' rguixogue'n lë'ë

guichi la'iyá quie Diuzi de que nu ben' rutasi runio Diuzi, lëscan' rutasi runiorënë' Cristo. Cana' rnën lë'ë guichi.

<sup>4</sup> Na' rnia' le'e, yugulu ca di'idza' bzuyaquë' lë'ë guichi la'iyá quie Diuzi dza na'te, nacan ta gacalën ra'o ta tzioñe'ero mazara Diuzi. Lëscan' nacan ta uxela'adyi'n ra'o ta cuezaro dyë'ëdi dza yezi' Diuzi ra'o biyeyatiro.

<sup>5</sup> Rulidza' Diuzi gacalënë' le'e tzu'ulële lagueyile dyë'ëdi ca reya'ala'huele le'e, ben' nao xneza Cristo. Naca Diuzi ben' racalë ra'o cuezaro dyë'ëdi. Naca Diuzi ben' ru'elë ra'o di'idza' žela'adyi'.

<sup>6</sup> Cana' naca quiero cuenda yuguluro huerdo tuže gaparo Diuzi bala'ana. Naca Diuzi xuzi xan' Señor quiero Jesucristo.

*Lëscan' bida Cristo lao yedyi layu cuenda inao yaca ben' binaca ben' Israel xnezanë', na' gapajë' Diuzi bala'ana*

<sup>7</sup> Reya'ala' huelëro lagueyiro tuže cabë' bëlë Cristo ra'o tuže. Cana' gapala'nro Diuzi bala'ana.

<sup>8</sup> Pero rnia' le'e, bida Cristo lao yedyi layu ta gacalënë' ben' Israel, na' uzunë' di'idza' cabë' di'idza' bega'nlë Diuzi xuzixta'ohua' dza na'te. Bidë' ta ilë'ë ben' Israel naca Diuzi ben' ruzu di'idza'.

<sup>9</sup> Lëscan' bida Cristo lao yedyi layu cuenda inao yaca ben' binaca ben' Israel xnezë', na' gapajë' Diuzi bala'ana tanun quie dan' beyëchi'la'adyi' Diuzi leyaquë'. Lena' rguixogue'n lë'ë guichi la'iyá quie Diuzi cani:

Quie lena' gapa yaca ben' za' yedyi tula Diuzi bala'ana.

Quie lena' gulayaquë' himno ta gapala'një' lëbë'.

<sup>10</sup> Lëzi zu itu cue' lë'ë guichi la'iyá ga rguixogue'nan cani:

Reya'ala' yedaohuele le'e, ben' za' yedyi tula, len le'e, ben' Israel, ben' quie Diuzi.

<sup>11</sup> Lëzi zu itu cue' lë'ë guichi la'iyá ga rguixogue'nan cani:

Ulegapa Diuzi bala'ana yugulu le'e, ben' za' yedyi tula.

Ulequixogue' yaca benë' ca ben' ze naca Diuzi yugulu le'e, ben' binaca ben' Israel.

<sup>12</sup> Lëscan' Isaías, ben' uzu dza na'te, bzunë' di'idza' lë'ë guichi de que:

Hualo tu ži'i suba Isai.

Lëbë' gaquë' rey inabë'në' lao yaca ben' binaca ben' Israel.

Sudyi'ilëyaquë' lëbë' ta uca'nnë'yaquë' huen lao Diuzi.

Cana' rnan lë'ë guichi na'.

<sup>13</sup> Na'ra në'ëdi' rulidza' Diuzi, ben' nuxela'adyi' ra'o, ta tzu'ule gusto cue' chizi laxta'ole como dan' barue quiele xti'idza'në'. Lëscan' rulidza'në' ta gaca žela'adyi' dyë'ëdi guicho laxta'ole tanun quie dan' baoyu'ule pensari quie Diuzi.

<sup>14</sup> Na'ra bicha', banezda' dyë'ëdi nacale ben' huen, ben' rioñe'e. Nezile uzioñe'ele usëdile lagueyile, ben' nao xneza Cristo.

<sup>15</sup> Cabë' di'idza' bzua' lë'ë guichi ni, biberugueda' inia' le'e cabë' reya'ala' tzioñe'ele cuenda bigalala'adyi'le cabë' unia' le'e. Cana' bia' por nun quie mandado pca'n Diuzi lao na'a, use'lë' në'ëdi'

<sup>16</sup> tzaya' dyin quie Cristo entre yaca ben' binaca ben' Israel. Nacan mandado hua' tzetixogui'ajë' xti'idza' Diuzi cuenda hue quieyaquë' xti'idzë', yela' na' gata' yela' neban quiejë' tuzioli, na' yedyinyaquë' dyë'ëdi lao Diuzi. Cana' yezi' Diuzi lëjë', na' nacajë' ben' la'iyá, ben' yu'u pensari quienë' lu'u guicho laxta'ohue.

<sup>17</sup> Como naca' ben' quie Cristo Jesús, redaohueda' bia' ca mandado bë Diuzi në'ëdi'.

<sup>18</sup> Re'enda' inia' le'e cabë' bëlë'iyá Cristo në'ëdi' bia' cabë' mandado bënë' në'ëdi'. Lëzin inia' le'e cala bila di'idza' inia' le'e. Gucalë Cristo në'ëdi'

udixogui'a ben' binaca ben' Israel xti'idza' Diuzi, na'tera barue quieyaquë' xti'idza'në'.

<sup>19</sup> Cana' bia' udixogui'ajë' xti'idza' Diuzi, bia' yela' huaca quienë', gucalë Bichi Be quienë' në'ëdi'. Cana' bia' apseyudya' bia' mandado udixogui'a benë' xti'idza' Diuzi. Cana' bia' udixogui'a yaca ben' ciudad Jerusalén xti'idza' Diuzi. Lagazi cana' babia', baoya'a hasta ga rzulao yu nebaba Ilírico.

<sup>20</sup> Cana' bia', bia' bala, uya'a yedyi ga binenezijë' chi zu Cristo udixogui'ajë' xti'idza' Diuzi. Cana' bia' cuenda tza'a yedyi tula ga nunu netzio tzetixogue' xti'idza' Diuzi.

<sup>21</sup> Pero mejorla hua' seguir con cabë' rnan lë'ë guichi la'iya quie Diuzi cani: Huanezi yaca ben' binenezi quienë'.

Huayoñe'e yaca ben' binetziñe'e quienë'.

### *Bë Pablo pensari tzioguë' ciudad Roma*

<sup>22</sup> Quie lena' biuzaque'da' guida' idena'a le'e como dan' bibënan lato la'acazi gu'unda' guida'.

<sup>23</sup> Pero como abeyudyi compromiso napa' conlë yaca yedyi ga baodia', lëscan' como bazio zë iza raca' pensari guida' ideyuba' le'e,

<sup>24</sup> quie lena', caora tza'a nación España, cana' re'enda' tia' ciudad quiele. Na' rapa' gusto yega'na' sulia' le'e ga'aca tu ta gunnan lato. Yeyudyi na', chi huele cule, gacalële në'ëdi' tzu'a neza tatula tza'a España.

<sup>25</sup> Pero na'a raoyen yeya'a ciudad Jerusalén tzehua'a lë'ëti' dumi ta gacalën yaca ben' bichiro, ben' nao xneza Jesús nita' na'.

<sup>26</sup> Cana' re'ennan hua', como dan' yaca ben' nao xneza Jesús nita' yu nebaba Macedonia, len yaca ben' nao xneza Jesús nita' yedyi Acaya, bap-tupajë' dumi ta ise'ela'yaquë'n quie ben' yëchi', ben' nao xneza Jesús nita' ciudad Jerusalén.

<sup>27</sup> Redaohue ben' ptupa dumi como neziaquë' nacan tahuen gacalëjë' laguedyijë', ben' nao xneza Jesús. Na'ra yu'un xnezi ta ruejë', porque rueyaquë' ta reya'ala' hueyaquë' quie ben' nita' ciudad Jerusalén. Cana' nacan, como dan' lao na'a ben' nita' ciudad Jerusalén barue quieyaquë' xti'idza' Diuzi barnaoyaquë' xneza Cristo. Na'ra lëjë' sí, reya'ala' gacalëjë' ben' nita' ciudad Jerusalén con ta de quieyaquë'.

<sup>28</sup> Caora abeyudyi yehua'a dumi lao yaca ben' nao xneza Cristo nita' ciudad Jerusalén, na'ra tza'a España tia' ideyuba' le'e.

<sup>29</sup> Nacan tali tuze huela'iya Cristo ra'o caora idyina' yedyi quiele.

<sup>30</sup> Bicha', re'enda' gacalële në'ëdi'. Re' enda' huero tuze huero ca re'en Diuzi huero du guicho du la'adyi'ro. Chi huele cule, ulidzale Diuzi por në'ëdi'. Laohue xa'nro Jesucristo rnaba' le'e ulidzale Diuzi por në'ëdi'. Lëscan' como dan' nadyë'ële në'ëdi' cabë' bzioñe'e Bichi Be quie Diuzi le'e, rnaba' le'e ulidzale Diuzi por në'ëdi'.

<sup>31</sup> Ulidzale Diuzi ta ucuasa ucu'i'onë' në'ëdi' quie tamala re'en hue yaca ben' nita' estado Judea quia', ben' binao xneza Cristo. Lëscan' ulidzale Diuzi para yaca ben' nita' ciudad Jerusalén, ben' nao xneza Cristo, ta si'yaquë' në'ëdi' dyë'ëdi gacalia'yaquë'.

<sup>32</sup> Cana' rnaba' le'e ulidzale Diuzi por në'ëdi' cuenda idyina' dyë'ëdi idena'a le'e sua' contento yezila'adya' tu chi'.

<sup>33</sup> Rulidza' Diuzi, ben' cuëchi chizi laxta'oro, ta ina' ihuanë' yugulule. Amén.

## 16

*Rugapa Pablo diuzi yaca ben' nao xneza Jesús*

<sup>1</sup> Redaohueda' idyin ben' zanro Febe yedyi quiele. Taze racalënë' ben' nao xneza Cristo nita' yedyi Cencrea.

<sup>2</sup> Si'le lëbë' dyë'ëdi ca rue ben' nao xneza Cristo. Gacalëlenë' tu ta rdzioguenë', porque ben' zë bagucalënë'. Lëscan' bagucalënë' në'ëdi'.

<sup>3</sup> Ugapale diuzi Priscila len Aquilo. Nacayaquë' ben' compañero quia'. Aracalëyaquë' në'ëdi' ruendo' dyin quie Cristo Jesús.

<sup>4</sup> Bibdzebियाquë' gatiyaquë' gucalëjë' në'ëdi' caora aruen žudyi guti yaca benë' në'ëdi'. Quie lena' inia' diuxcaleyaquë' gucalëjë' në'ëdi'. Pero cala tuza' në'ëdi' inia' diuxcaleyaquë', lëscan' yugulu ben' nao xneza Cristo, ben' binaca ben' Israel, inajë' diuxcaleyaquë'.

<sup>5</sup> Ugapale diuzi yaca ben' bichiro, ben' regu'udi' žan yu'u quie Priscila len Aquilo. Lëscan' ugapale diuzi Epeneto, ben' naca amigo quia'. Lëbë' naquë' ben' nëro, ben' unao xneza Cristo entre yaca ben' nita' yu nebaba Acaya.

<sup>6</sup> Ugapale diuzi María, ben' ruelële dyin quie Diuzi tuže.

<sup>7</sup> Ugapale diuže ben' yedyi quia' Andrónico, len Junias, ben' uya'lia' dyigu-iba tuže. Anezi yaca apóstol nacayaquë' ben' huen gula. Tu binenaohua' xneza Cristo, barnaoyaquë' xneza Cristo.

<sup>8</sup> Ugapale diuzi Amplias, ben' naca amigo quia', ben' naorë xneza Cristo.

<sup>9</sup> Ugapale diuzi Urbano, ben' naca compañero quiendo'. Aracalënë' nëto' ruendo' dyin quie Cristo Jesús. Lëscan' ugapale diuzi Estaquis, ben' naca amigo quia'.

<sup>10</sup> Ugapale diuzi Apeles, ben' nao du guicho du la'adyi' xneza Cristo. Lëscan' ugapale diuzi yaca ben' naca familia quie Aristóbulo.

<sup>11</sup> Ugapale diuzi Herodión, ben' naca ben' yedyi quia'. Lëscan' ugapale diuzi yaca ben' naca familia quie Narciso, con nuyaquë' naoyaquë' xneza Cristo.

<sup>12</sup> Ugapale diuzi Trifena len Trifosa. Nacajë' ben' rue dyin quie Cristo. Lëscan' ugapale diuzi Pérsida, ben' naca ben' zanro tanun quie barnaorënë' xneza Cristo. Taze bazioguë' naohuë' ruenë' dyin quie Cristo.

<sup>13</sup> Ugapale diuzi Rufo, ben' rue quie xti'idza' Cristo dyë'ëdi. Lëscan' ugapale diuzi žna'në' como rlë'ënë' në'ëdi' ca ži'inë'.

<sup>14</sup> Ugapale diuzi Asíncrito, len Flegonte, len Hermes, len Patrobas, len Hermas, len yaca los demás ben' bichiro, ben' nao xneza Jesús, ben' regu'udi' len leyaquë' na'.

<sup>15</sup> Lëscan' ugapale diuzi Filólogo len Julia. Ugapale diuzi Nereo len bi-zannë'. Lëscan' ugapale diuzi Olimpás len yaca los demás ben' bichiro, ben' nao xneza Cristo, ben' regu'udi' len leyaquë' na'.

<sup>16</sup> Quëdyile lague dyë'ëdi. Gaole xagajë' tu psitu, na' yëbileyaquë' padiux. Yaca los demás ben' nao xneza Jesús, ben' nita' yedyi tula, rugapajë' le'e diuzi.

<sup>17</sup> Na'ra inia' le'e itu di'idza', bicha'. Gapale cuidado ina'le dyë'ëdi nu ben' hue le'e chopá tizona cue', ben' udze' le'e neza tula ta binaca quie Diuzi. Bihuelële leyaquë' tuže,

<sup>18</sup> como dan' cala mandado quie xa'nro Jesucristo ruejë', dechan' ta racazi la'adyi'jë' ruejë' cana'. Rdalëyaquë' di'idza' huizi' yë' quieyaquë' huejë' gan ben' binenezi cabë' nacayaquë'.

<sup>19</sup> Anezi yaca benë' cabë' naca le'e, barnaole xneza Cristo. Quie lena' zua' gusto, re'enda' huele seguir huele puro tadya'a, bihuele ni tu tamala.

<sup>20</sup> Ilë'ëti'zi idyin dza quižo Diuzi tu castigo huala gula quie xan' taxi'ibi' Satanás. Bira huelënan le'e. Naca Diuzi ben' cuëchi chizi guicho laxta'oro. Rulidza' xa'nro Jesucristo huela'iyane' le'e.

<sup>21</sup> Na' Timoteo, ben' ruelë në'ëdi' dyin quie Diuzi tuže, rugapanë' le'e diuzi. Lëscan' rugapa ben' yedyi quia' Lucio, lënë' Jasón, lënë' Sosipater le'e diuzi.

<sup>22</sup> Lëscan' në'ëdi', Tercio, ben' bzu di'idza' lë'ë guichi niga, rugapa' le'e diuzi laohue Cristo.

<sup>23</sup> Lëscan' Gayo, ben' zua' žan yu'u quie, ben' run posada yuguluro ben' nao xneza Cristo, len Erasto, ben' naca tesorero quie yedyi ni, rugapanë' le'e diuzi. Lëscan' rugapa ben' bichiro Cuarto le'e diuzi.

<sup>24</sup> Rulidza' xa'nro Jesucristo huela'iyane' yugulule. Amén.

*Ga iyudyi carta ni rapa Pablo bala'ana Diuzi*

<sup>25</sup> Lëscan' rulidza' Diuzi ta gacalënë' le'e ta biidzebile inaole xneza Cristo gata' quiele yela' neban tuzioli con cabë' rna xti'idza' Diuzi. Cana' baodixogui'a le'e de acuerdo con cabë' una cuin Cristo. Cana' bë Diuzi pensari huenë' dza na'te, dza binesi' laze cue' yedyi layu. Pero baquezi biuna Diuzi ca huenë' quiele.

<sup>26</sup> Ulezë' hasta hora, na'tera barnezan quie pensari bë Diuzi dza na'te. Barnezan por nun quie di'idza' la'iya bzu ben' unita' dza na' lë'ë guichi, ben' udixogue' xti'idza' Diuzi. Na'ra babë Diuzi mandado inezi yugulu ben' nita' lao yedyi layu con cabë' rna di'idza' la'iya quienë' cuenda na' hue quieyaquë' di'idza' quienë'. Tuzioli zu Diuzi.

<sup>27</sup> Tuzi Diuzi zu. Tuzi lëbë' naquë' ben' rioñe'e. Tuzioli reya'ala' gaparo Diuzi bala'ana laohue ži'inë' Jesucristo. Amén.

## GUICHI NĒRO BĒ SAN PABLO APÓSTOL USE'ELA'NĒ'N LAO CIUDAD CORINTO

*Guichi ni use'ela' Pablo lao yaca ben' quie Jesús, yaca ben' nita' ciudad Corinto*

<sup>1</sup> NĒ'ēdi', Pablo, naca' ben' bdē' Diuzi. Según ca re'ennē' bdē'nē' nē'ēdi' ta tza' tzetixogui'a benē' xti'idza' Jesucristo. NĒ'ēdi'lia' ben' bichiro Sóstenes

<sup>2</sup> bĕndo' guichi ni pse'ela'ndo'n lao le'e, ben' quie Diuzi, ben' nita' ciudad Corinto. Le'e nacale ben' banue Cristo Jesús tuže. Ulio Diuzi le'e ta gacale ben' la'iya quienē'. Bĕ Diuzi nombrar le'e ben' quienē' lente nuti'tezi ben' rulidza Señor quiero Jesucristo. Naca Jesucristo Señor quiero lente Señor quieyaquē'.

<sup>3</sup> Rulidza' Xuziro Diuzi lĕnē' Señor quiero Jesucristo ta huela'iyaquē' le'e, cuĕchiyaquē' chizi lu'u guicho laxta'ole.

*Ni rguixogue'n cabē' hue Cristo huela'iyane' ra'o*

<sup>4</sup> Rĕbicaza' Diuzi diuxcalelo' ca naca quiele babĕla'iyane' le'e tanun quie Cristo Jesús.

<sup>5</sup> Dan' banacale tzaže lĕle Cristo, lĕlena' bĕ Diuzi tahuen gula quiele, racialĕnē' le'e ta quixogue'le benē' xti'idza'nē' dyĕ'ēdi, lĕscan' racialĕnē' le'e ta tziōne'erale mazara quienē'.

<sup>6</sup> Cana' baguca quiele bega'n xti'idza' Cristo lu'u guicho laxta'ole, banezile naca xti'idzē' di'idza' li.

<sup>7</sup> Lĕlena' bibi idzioguele huela'iya Diuzi le'e tu raca rbezale dza yeguida Señor quiero Jesucristo.

<sup>8</sup> Huacalĕnē' le'e inaole tuzi xnezē' hasta yeyudyi yedu quie lao yedyi layu tacuenda ni tu nunu bisaque' gaojĕ' le'e xquia dza cati yeguida Señor quiero Jesucristo.

<sup>9</sup> Huazucazi Diuzi di'idza' quienē' cabē' unanē' huenē'. Lĕbĕ' ulioguē' le'e ta sĕlĕle tuže len ži'inē' Jesucristo, ben' naca Señor quiero.

*Ni nan cabē' guca bro chopa tzona cue' entre yaca ben' quie Jesús*

<sup>10</sup> Bicha', rzĕtoga' lao Señor quiero Jesucristo, rnĕyĕcha' laole ta tzu'ule de acuerdo, bigacale chopa tzona cue'. Bitilalĕle laguedyile. Huele tuzi pensari cabē' inĕle yugulule.

<sup>11</sup> Cana' rnia' le'e, bicha', como dan' por nun quie yaca ben' familia quie Cloé nezda' de tazĕdi quiele lĕle laguedyile.

<sup>12</sup> Quie lena' nezda' balale rnale: "Naca' ben' quie Pablo." Na' ibalale rnale: "Naca' ben' quie Apolos." Na' ibalale rnale: "Naca' ben' quie Pedro." Na' ibalale rnale: "Naca' ben' quie Cristo."

<sup>13</sup> Pero rnaba' le'e žguca Cristo zĕ cue'? žRaquiele nĕ'ēdi' gutia' lĕ'ĕ yaga cruza por le'e? Lĕzi rnabaria': žLaohua' nĕ'ēdi' bzĕtoyaquē' caora bĕ'yaquē' laole?

<sup>14</sup> Diuxcale Diuzi nitule bibi'a laole. Tuzi Crispo len Gayo, lĕziyaquē' bi'a laoyaquē'.

<sup>15</sup> Pues nitu nitule bireya'ala' inale bzĕtojĕ' laohua' caora bĕ'yaquē' laole.

<sup>16</sup> Ta rezala'adya' bi'a lao yaca ben' familia quie Estĕfanas. Bira rezala'adya' nurla bi'a laohue.

<sup>17</sup> Cala ta hua' lao yaca benē' use'ela' Cristo nĕ'ēdi', den' ta quixogui'ayaquē' xti'idza'nē' tacuenda gata' yela' neban quieyaquē' tuzioli.

Rguixogui'a benë' di'idza' yalo, di'idza' ta tziõe'eyaquë' tacuenda biten cana'zi quie Cristo dan' gutinë' lë'ë yaga cruzo.

*Naca Cristo ben' yu'u yela' rioñe'e quie Diuzi*

<sup>18</sup> Yaca ben' nao neza yeyo lao gui' gabila, raqueyaquë' di'idza' tondo, di'idza' rguixogue'ro cabë' guca quie Cristo gutinë' lë'ë yaga cruzo. Pero yaca ben' nao neza yeyo ga zu Diuzi guibá, nezijë' di'idza' na' rguixogue'n quie yela' huaca quie Diuzi.

<sup>19</sup> Cana' rnën lë'ë guichi la'ya quie Diuzi cani: Udyiagui' Diuzi yela' rioñe'e quie yaca ben' na rioñe'eyaquë', den' quie Diuzi na' birioñe'eyaquë'.

Uca'n Diuzi tzala'la yela' nezi quie yaca ben' na neziyaquë', den' bineziyaquë' chi zu Diuzi.

<sup>20</sup> Tana' rnia' le'e, ¿ga yeyudyi yedu quie yela' rioñe'e quie yaca ben' na rioñe'eyaquë', quie yaca ben' naca maestro, quie yaca ben' yu'u rnë? Lao na'a Diuzi abetza' yela' rioñe'e quie yaca ben' nita' lao yedyi layu, abeyacan di'idza' tondo.

<sup>21</sup> Diuzi, ben' nezi yugulute, bënë' de que bisaque' huebë' yaca ben' nita' lao yedyi layu lëbë' conlë pensari quieziyaquë'. Quie lena' redaohue Diuzi hue'në' yela' naban tuzioli yaca ben' rzudyi'ilë lëbë', yaca ben' rue quie xti'idza'në'. Pero yaca ben' birue quie xti'idza'në', rnayaquë' di'idza' tondo di'idza' quienë'.

<sup>22</sup> Yaca ben' Israel, re'enjë' ilë'ëjë' hue Diuzi yela' milagro quienë'. Yaca ben' griego, re'enjë' yejë' puro di'idza' quie yaca ben' na rioñe'e, yaca ben' nezi biraca lao yedyi layu.

<sup>23</sup> Pero ra'o rguixogue'ro quie Cristo, ben' guti lë'ë yaga cruzo. Tana' lena' rdza' yaca ben' Israel ra'o, lëscan' rna yaca ben' binaca ben' Israel di'idza' tondo rguixogue'ro.

<sup>24</sup> Pero para yaca ben' ulio Diuzi, la'achi ben' Israel, la'achi ben' binaca ben' Israel, naca Cristo ben' rue yela' huaca, ben' yu'u yela' rioñe'e quie Diuzi.

<sup>25</sup> Derla yela' rioñe'e quie Diuzi, cala ca ta rioñe'e quie yaca benë'. Lëscan' derla yela' huaca quienë', cala ca ta rue yaca benë'.

<sup>26</sup> Lëzi le'e bicha', reya'ala' tzu'ule pensari con cabë' bë Diuzi ulionë' le'e ba'ala'cazi tu chopazile nacale ben' rioñe'e con cabë' rioñe'e yaca ben' nita' lao yedyi layu, ba'ala'cazi tu chopazile nacale ben' rnabë', ben' familia belao.

<sup>27</sup> Cani bë Diuzi, lao laza ben' na rioñe'e bi raca lao yedyi layu, ulio Diuzi le'e ta gata' yela' stu' quieyaquë' como rnayaquë' binacale ben' rioñe'e. Lëscan' lao laza ben' belao lao yedyi layu, ulio Diuzi le'e ta gata' yela' stu' quieyaquë' como rnayaquë' binacale ben' belao.

<sup>28</sup> Cana' bë Diuzi uliogüë' yaca ben' binaca ben' belao, yaca ben' ca guicho ca lao, tacuenda inzi ben' rue belao lao yedyi layu de que birlë'ë Diuzi leyaquë' ben' belao.

<sup>29</sup> Quie lena' nitu nitu nunu saque' hue ze cuine lao Diuzi.

<sup>30</sup> Lao na'a cuin Diuzi nacalële Cristo tuze. Lëscan' lao na'a Diuzi naca Cristo yela' rioñe'e quiele. Lëscan' por nun quie Cristo babezi Diuzi dula' xquia quiele, banacale ben' la'ya quienë', bapte psela Diuzi le'e.

<sup>31</sup> Lë'ë guichi la'ya quie Diuzi rnën cani: Bihuero cuinro ben' ze, huero Cristo ben' ze.

## 2

*Udixogue' Pablo xti'idza' Cristo, ben' guti lë'ë yaga cruzo*

<sup>1</sup> Le'e, bicha', cati bida' bedenia' le'e di'idza' quie Diuzi, unia' le'e tu ta binetziõe'ele quie pensari quienë', pero biunia' le'e di'idza' zëdi.

<sup>2</sup> Caora cati uzulia' le'e dza na', unia' le'e quie Cristo, ben' guti lë'ë yaga cruzo. Lëzin unia' le'e, biunia' le'e birla tatula.

<sup>3</sup> Caora uzulia' le'e dza na', du rżiza' du rdzeba', unia' le'e xti'idza' Diuzi.

<sup>4</sup> Cati unia' le'e dza na', di'idza' quie Diuzi unia'. Biunia' le'e di'idza' con cabë' rnë ben' uyo escuela zë iza tacuenda cana'zi hua' gan galele quia', pero bia' gan gulele por nun quie gualë Bichi Be quie Diuzi në'ëdi', bë Diuzi yela' huaca quienë'.

<sup>5</sup> Cana' bia' quiele tacuenda galele por nun quie yela' huaca quie Diuzi, cala por nun quie pensari yu'u yaca ben' nita' lao yedyi layu.

### *Diuzi ruzioñe'enë' ra'o lao na'a Bichi Be quienë'*

<sup>6</sup> Pero yaca ben' banoa xti'idza' Diuzi dyë'ëdi, ra'o sí, conlë pensari quie Diuzi rguixogue'ro benë' xti'idza' Diuzi. Birguixogue'rojë' conlë pensari yu'u yaca ben' nita' lao yedyi layu, ni quele conlë pensari yu'u yaca ben' rnabë' quieyaquë'. Hueyudyi huedu pensari quiejë', bira bide hueyaquë'.

<sup>7</sup> Pero di'idza' rguixogue'rojë' nacan pensari quie Diuzi, nacan pensari cubi ta binuero ta zabzioñe'enë' ra'o cabë' psaque'në' huenë' tadya'a gula quiero caora na' tu binecue' lao yedyi layu.

<sup>8</sup> Pero yaca ben' rnabë', yaca ben' nita' lao yedyi layu, birioñe'eyaquë' ca naca pensari quie Diuzi. Chan' uyoñe'eyaquë' pensari quie Diuzi, bibda'yaquë' ben' naca Señor quiero lë'ë yaga cruzo.

<sup>9</sup> Pero, como rnan lë'ë guichi la'iya quie Diuzi cani: Bapcuezta Diuzi tadya'a gula quie ra'o, ben' nedyë'ë lëbë'. Ca ta pcuezanë' quie ra'o, quiero, nacan ta binelë'ëro, nacan ta bineyero, nacan ta binuero pensari. Cana' rnën lë'ë guichi la'iya quie Diuzi.

<sup>10</sup> Lena' abzioñe'e Diuzi ra'o lao na'a Bichi Be quienë'. Rioñe'e Bichi Be quie Diuzi yugulute, rioñe'enë' yugulu pensari quie Diuzi.

<sup>11</sup> ¿Nużi nezi ca naca pensari yu'u lu'u laxta'o benë'? Biżi bichi be yu'uyaquë', tuzi lena' nezin ca naca pensari racayaquë'. Lëscana' ca naca pensari raca Diuzi, tuzi Bichi Be quienë' anezirënë' can' gaca.

<sup>12</sup> Bira yu'uro pensari ca pensari yu'u yaca ben' nita' lao yedyi layu. Yu'ucazi Bichi Be quie Diuzi lu'u laxta'oro ta tzioñe'ero ca naca tadya'a gula pcuezë' quiero.

<sup>13</sup> Ra'o rnëro según ca naca pensari bdze' Bichi Be quie Diuzi lu'u guichoro laxta'oro, cala según ca naca pensarizi quiero. Cana' ruxi'idze'ro yaca ben' yu'u pensari quie Diuzi ca naca pensari quie Diuzi yu'ujë'.

<sup>14</sup> Yaca ben' biyu'u Bichi Be quie Diuzi, rseb'yaquë' con cabë' rna Bichi Be quie Diuzi. Nayaquë' di'idza' tondo na'. Birioñe'eyaquë'n dan' ruen zi tzu'uyaquë' Bichi Be quie Diuzi ta tzioñe'eyaquë'n.

<sup>15</sup> Nu ben' yu'u Bichi Be quie Diuzi, huayoñe'eyaquë' ca naca pensari quie Diuzi. Pero nu ben' biyu'u Bichi Be quie Diuzi, bitzioñe'eyaquë' ca naca pensari quie yaca ben' yu'u Bichi Be quie Diuzi.

<sup>16</sup> Con ca rna lë'ë guichi la'iya quie Diuzi cani: "¿Nużira te tzioñe'e yugu ca naca pensari quie Diuzi? Tanto naquë' ben' rioñe'e, nitu nitu nunu gaca uxi'idze' lëbë'." Cana' rnën lë'ë guichi la'iya quie Diuzi. Pero ra'o baoyu'uro pensari quie Cristo.

## 3

*Pablo len Apolos, tzaže rueyaquë' dyin quie Diuzi*



<sup>1</sup> Na'ra, bicha', bisaque' inia' le'e di'idza' ca ben' rue quie cabë' re'en Bichi Be quie Diuzi gaca, pero rnaban inia' le'e ca ben' nenaonerue ca pensari yu'u yaca ben' nita' lao yedyi layu. Nacale ca quie xcuidi' como dan' binerionë'ele dyë'ëdi quie Cristo.

<sup>2</sup> Psëdia' le'e di'idza' yalozi dza na'la. Bipsëdia' le'e di'idza' zëdi como dan' biyulaole tzioñë'ele di'idza' zëdi. Quie lena' naca quiele ca quie tu xcuidi' nera'adyi'. Puro nidyi' ra'adyi'bi' como dan' binegacabi' gaobi' yëta. Ca naca quie xcuidi' binegaca gao yëta, lëscan' nacarë quiele, binetzulaole tzioñë'ele pensari zëdi ca ta rnia' le'e. Bigucale tzioñë'ele dyë'ëdi dza na'la, lëscan' hasta na'a birionë'ele dyë'ëdi.

<sup>3</sup> Nenaole neruele ca pensari yu'u yaca ben' nita' lao yedyi layu, cana' racazë'le lagueidyile. Neruele choparu'a di'idza', cana' rbirole cuinle zë cue'. Lena' rnia' le'e como dan' neruele ca pensari yu'u yaca los demás ben' nita' lao yedyi layu.

<sup>4</sup> Rnia' le'e can', como dan' balale rnale: "Naca' ben' quie Pablo." Na' ibalale rnale: "Naca' ben' quie Apolos." Dan' ruele cana', lena' rnia' le'e nenaole neruele ca pensari yu'u yaca los demás ben' nita' lao yedyi layu.

<sup>5</sup> Rnaba' le'e: ¿Nuži Pablo? ¿Nuži Apolos? Nacando' ben' quie Diuzi ruendo' cabë' mandado ruenë'. Ta una Diuzi nëto' bëndo' udixogue'ndo' le'e di'idza' quienë' ta gulele. Quie quiendo' bzundo' di'idza' según cabë' bë' Diuzi laze huendo'.

<sup>6</sup> Në'ëdi' guza' bini. Na' Apolos bdze'bi'n nisa, pero Diuzi gucalënë'n ta uyežin.

<sup>7</sup> Tana' lena' rnia' le'e, binaca ben' guza bini len ben' bdze' nisa ben' ze. Tuzi Diuzi naquë' ben' ze ta gucalënë'n ta uyežin.

<sup>8</sup> Ca quie ben' guza bini, ca quie ben' bdze' nisa, tuzi naca dyin bëyaquë'. Huagužucazi Diuzi quie quieyaquë' ca naca dyin na' bëyaquë'.

<sup>9</sup> Në'ëdi'lia' Apolos nacando' tuže ruendo' cabë' mandado rue Diuzi.

Na'ra biži le'e nacale ca quie layela ga raza Diuzi. Lëscan' nacale ca quie tu yu'u ta ruenë'.

<sup>10</sup> Në'ëdi' naca' ca quie ben' rucua'. Bdë' Diuzi në'ëdi' ta ucua'a ga sulao besu. Biži ben' tula ucua'në' besu. Reya'ala' gapajë' cuidado cabë' huejë' ucua'jë'n.

<sup>11</sup> Tuzi Jesucristo naquë' ca quie ga rzulao rcua'ro. Ganura nunu zu naca quie ca quie ga rzulao rcua'ro.

<sup>12</sup> Huazaque' huero tu dyin dya'a ucua'ro con oro, o conlë plata, o conlë yo zaca'n za'ala'. Lëzi huazaque' huero tu dyin bibi zaca'n ucua'ro con yaga, o conlë la'aga' bidyi, o conlë guži cabë' re'enro gacan.

<sup>13</sup> Pero dza gaca juicio, caora na' de yezacalao ca naca dyin bëro tu turo. Lëdza na' udze' Diuzi lagui' ta ulu'en bi naque dyin bëro tu turo, chi uyeinan, chi biuyeinan.

<sup>14</sup> Nu ben' bë dyin biuyei, hue'cazi Diuzi quie dyin na' bëyaquë'.

<sup>15</sup> Pero nu ben' bë dyin uyei, bibi de hue' Diuzi quie dyin na' bëyaquë', huabiagui' dyin quieyaquë'. Cuinyaquë' bicuiagui'yaquë', pero canezi telayaquë' bitzeiyaquë'.

<sup>16</sup> ¿Biži binezile nacaro ra'o idao' quie Diuzi? ¿Binezile baoyu'u Bichi Be quie Diuzi lu'u guicho laxta'oro?

<sup>17</sup> Udyiagui' Diuzi nu yaca ben' udyiagui' idao' quienë', como dan' naca la'iya idao' quienë'. Na'ra ra'o nacaro idao' quie Diuzi.

<sup>18</sup> Bitzioguele yë'. Chi raquele nacale ben' rioñë'era, pero pensari quiezile raquele, cala pensari quie Diuzi, na' ulesan pensari quiele tacuenda uzioñë'ele Diuzi le'e, tzu'ule pensari quienë'.

19 Rlë'ë Diuzi pensari tondo ca pensari yu'u yaca ben' nita' lao yedyi layu. Lena' rnën lë'ë guichi la'iya quie Diuzi cani: "Conlë di'idza' rero lu'u ru'a ben' rioñe'e, hualu'e Diuzi di'idza' tondo nayaquë'."

20 Lëzirë rnën lë'ë guichi la'iya quie Diuzi cani: "Anezi Diuzi naca pensari quie ben' rioñe'e pensari tondo." Cana' rnën lë'ë guichi la'iya quie Diuzi.

21 Quie lena', bireya'ala' huele cuinle ben' ze por nun quie ruele taže tu cue' ben' quiele inaole leyaquë'. Rnia' le'e, yugulute banaca quiele,

22 la'achi në'ëdi', la'achi Apolos, la'achi Pedro, la'achi yedyi layu, la'achi yela' naban, la'achi yela' guti, la'achi na'a, la'achi uxe, yuguten banaca quiele.

23 Nacale cuenda quie Cristo, na' naca Cristo cuenda quie Diuzi.

## 4

### *Ni rguixogue'n con cabë' bë yaca apóstol*

1 Reya'ala' ilë'ële nëto' ca ben' rue mandado quie Cristo. Nudë'në' nëto' naca ladyina'ando' ta usëdindo' benë' di'idza' quie Diuzi, di'idza' ta bineyëjë'.

2 Na'ra nu ben' naca ladyinë'ë, reya'ala' ulu'eguë' naquë' ben' zudyi'ilë lagedyi.

3 Pero në'ëdi' birdëbida' la'achi ichugubë'le quia' cabë' rua', rua' mandado quie Diuzi. Lëscan' birdëbida' la'achi ichugubë' yaca ben' rnabë' në'ëdi'. Ni siquiera birchugubi'a cuina'.

4 Ca naca pensari quia', biraona në'ëdi' xquia. Pero chi napa' dula', huachugubë' Diuzi në'ëdi'.

5 Pero le'e, biichugubë'le quie benë' chi binedyin hora. Cuezale yeguida Diuzi yebioguë' yugulu ta negachi'. Caora na' ulu'e Diuzi bi naca pensari yu'u lu'u guicho laxta'o benë', na' huenë' leyaquë' ben' ze según chi bëjë' tahuen, o chi bëjë' tamala.

6 Bicha', ca ta rnia' le'e, nacan ta gacalën le'e. Lena' rnia' le'e tu di'idza' cabë' rue Apolos len në'ëdi'. Reya'ala' huele ca ruendo' nëto'. Reya'ala' inaole usëdile dyë'ëdi con cabë' rna lë'ë guichi la'iya quie Diuzi. Bihuele zë cue'. Biuxa'ale lagedyile rnales tuzi tu cue' ben' quiele nacale ben' huen.

7 ¿Nuzi bë le'e ben' huenra ca los demás? ¿Cala Diuzi bënnë' yugulu ta de quiele? Chi Diuzi babënnë' yugulu ta de quiele, ¿bixquien' racale pensari ta bëzile cuinzile de quiele?

8 Baruele le'e ca rue ben' uña'a. Raquele bade yugulute quiele, bira rdzioguele. Ruele cuinle ca yaca rey. Na' bëzi nëto' apanla'adyi'le nëto'. Bizi chan' tali nacale rey, huendo' le'e tuže, inabë'lëndo' le'e.

9 Parece bë Diuzi nëto' yenaondo' ca quie ben' de dula' xquia quie, ben' reya'ala' gati. Pues hasta reban yaca lagedyindo' nëto', reban yaca ángel nëto', reban yaca los demás benë' nëto'. Cana' raca quiendo'.

10 Rlë'ë yaca benë' nëto' ben' tondo, dan' redzagalaondo' rguixogue'ndo' di'idza' quie Cristo. Na' bëzi le'e rlë'ële cuinle ben' rioñe'era, ben' naora xneza Cristo. Pero rlë'ële nëto' ben' bibi zaca'. Na' bëzi le'e rlë'ële cuinle ben' zaca'. Rapala'n yaca benë' le'e, na' bëzi nëto' birapala'nyaquë' nëto'.

11 Lente na'a rsacazi'ndo' ta gaondo' len ta yo'ondo' lente zäbando' ta gaondo'. Na' bëzi yaca benë' rueyaquë' nëto' bizinaquezi. Bisu lidyindo'.

12 Rexaquendo' ruendo' dyin lëndo' na'ando'. Na' bëzi yaca benë' rutasi runioyaquë' nëto'. Pero bigacando'jë' lëbi, rulidzando'jë' di'idza' gaxo gula. Rzuendo' cati rueyaquë' nëto' bizinaquezi.

<sup>13</sup> Bizi rudiyala'adyi'yaquë' nêto', pero rnêlêcazindo'jë' di'idza' zela'adyi'. Ca rlê'êjë' tu bëbi ta de lao yedyi layu, cana' rlê'êjë' nêto'. Hasta na'a rlê'êjë' nêto' cana'.

<sup>14</sup> Bihua' guichi ni ta yedue'lêlen. Tu ta hua' gunna' le'e tu consejo como dan' nacale ca quie zi'ina', ben' nedyë'êda'.

<sup>15</sup> Ba'ala'cazi na'a nita' zë ben' usëdi le'e, ben' rnë quie Cristo, biguca zë ben' apsëdi le'e tanëro. Naca' tuza' nê'ëdi' ca quie xuzile nun quie naca ben' nêro udixogui'a le'e xti'idza' Diuzi, uyu'ule xneza Cristo gulele quienë', pte pselanë' le'e.

<sup>16</sup> Lena' rnia' le'e, huele con cabë' ruecaza' nê'ëdi'.

<sup>17</sup> Tana' lena' ise'ela' Timoteo laole. Naquë' ben' nedyë'ëtzegueda'. Raqueda'në' ca zi'ina', ben' rue quie xti'idza' Diuzi. Usala'adyi'në' le'e huele con cabë' rua' como ca naca' ben' quie Cristo. Lêlena' rusëdia' yaca benë' nao xneza Cristo con ga baoya'a.

<sup>18</sup> Pero ca naca bala le'e, aozulaole huele cuinle ben' ze dan' racale pensari biguida' idena'a le'e.

<sup>19</sup> Pero chi Diuzi gunnë' lato idena'a le'e, laguidategaza'. Lëcana' guida' idena'a yaca ben' na' ta ilê'ëda' chi tali uzuyaquë' di'idza' o chi bë rnaziyaquë'.

<sup>20</sup> Porque chi galero quie yela' r nabë' quie Diuzi, bireya'ala' galero de di'idza'zi, den' reya'ala' galero du guicho du la'adyi'ro hue quiero xti'idza'në'.

<sup>21</sup> ¿Cabizi re'enle ta hua' quiele bë' guida'? ¿Re'enle hua' le'e castigo, o re'enle huelia' le'e di'idza' yun', di'idza' zela'adyi'?

## 5

### *Ga yezacalao Pablo quie ben' rue tamedian*

<sup>1</sup> Banezile zu tu ben' ladole anuenë' lazna'zinë' zgulanë'. Lena' nacan median gula quienë', bënë' ca ta bireya'ala' huenë'. Ni yaca ben' binezi chi zu Diuzi, biruëyaquë' cabë' bë ben' na'.

<sup>2</sup> ¿Bixquien' raca quiele uxa'ale quie ben' bë cana'? ¡Reya'ala' gaquiele bayëchi' quie ben' bë can'! Reya'ala' yebiolenë' ladole, dan' baoquixinë' bënë' can'.

<sup>3</sup> Ba'ala'cazi bisaque' sulia' le'e, gaca quiele como ca zulia' le'e conlë pensari quia'. Quie lena' rzëtoga' lao Señor quiero Jesucristo baochugubi'a quie ben' bë cana'.

<sup>4</sup> Cati yegu'udi'le huazulêcaza' le'e la'acazi pensari quieza'. Lëscan' huazulë yela' huaca quie Señor quiero Jesús le'e.

<sup>5</sup> Reya'ala' yebirole ladole ben' bë cana'. Reya'ala' usanla'adyi'lenë' gaque quie xan' taxi'ibi' lënë' tacuenda yedzagalaonë' can' bënë'. Cana' huele quienë' tacuenda gaca yezi' Señor quiero Jesucristo bichi be quienë' dza cati yeguidë' tatula lao yedyi layu.

<sup>6</sup> Bireya'ala' uxa'ale quie ben' bë tamala. ¿Bizi binezile con ca naca di'idza' rnën lë'ë guichi: "Con lë'ëti'dao' levadura rëzin duzete yezo yëta xtla ta rëzin racan taže"?

<sup>7</sup> Ca rue levadura, cana' ruerë tamedian. Tana' reya'ala' yebirole ladole ben' bë tamedian ta biuxinunë' yaca ben' naca laguedyiro. Tana' lena' huaca quiele ca quie yezo yëta xtla bitzu'u levadura. Nacale ben' laxta'o yëri como dan' aodizu Cristo dula' xquia quiele. Ca bë ben' Israel dza na'la, bëtiyaquë' beco' zi'ila' ta rueyaquë' lani pascua, cana' nacarë quie Cristo, gutiguë' lë'ë yaga cruzo por ra'fo.

<sup>8</sup> Tana' lëlena' reya'ala' inaoro xnezë' du guicho du la'adyi'ro. Chi naoro xnezë' du guicho du la'adyi'ro, naca quiero ca quie yëta xtila biyu'u levadura. Chi biinaoro xnezë' du guicho du la'adyi'ro, naca quiero ca quie yëta xtila yu'u levadura.

<sup>9</sup> Lë'ë guichi tula ta bia' dza na'la, unia' le'e quie ben' rdalë nigula binaca žgulë'. Unia' le'e bireya'ala' huele lato sunë' ladole dan' ruenë' tamedian.

<sup>10</sup> Pero biunia' le'e ta bira huelële tuže yugulu ben' rda lao yedyi layu, la'achi ben' rdalë nigula binaca žgulë', la'achi ben' rza'la'adyi'tzegue dumi, la'achi ben' uban, la'achi ben' rionla'adyi' nu yo o nu yaga. Poes ta bira huelële tuže yugulu ben' rda lao yedyi layu, re'ennan ziyeza'le lao yedyi layu, pero bisaque'.

<sup>11</sup> Tuz cani rnia' le'e, bihuelële tuže ben' na naquë' bichiro ben' nao xneza Jesús chi ruenë' ta rnazin quienë'. Gapale cuidado quie nu ben' na naquë' ben' quie Cristo, pero rdalënë' nigula binaca žgulë', o chi rza'la'adyi'në' dumi, o chi rionla'adyi'në' nu yo o nu yaga, o chi rnënë' di'idza' lë'ë, o chi ri'oguë' rbannë' quie benë'. Lëben' rue cana', nica gaolënenë' tzaže.

<sup>12-13</sup> Ca naca në'ëdi', binacan ladyina'a ta ichugubi'a quie yaca ben' binao xneza Cristo. Nacan ladyina'a Diuzi ta ichugubë'në' quiejë'. Pero le'e, reya'ala' ichugubë'le quie yaca ben' na naonë' xneza Jesús, ben' rda ladole, pero biruenë' tadya'a. Reya'ala' cuiole yaca ben' rue tamedian ladole, bisulële lëjë'.

## 6

*Bireya'ala' gaoro laguedyiro ben' quie Jesús xquia lao juez, ben' binaca ben' quie Jesús laguedyile*

<sup>1</sup> Chi le'e re'enle gaole xquia laguedyile ben' quie Jesús, ¿bixquien' reyažole ziole tzataole xquia lao juez, ben' binaca ben' quie Jesús? ¿Binezile reya'ala' tziole lao yaca ben' naca ben' quie Jesús ta gaole xquia laguedyile ben' quie Jesús?

<sup>2</sup> ¿Binezile yugulu ra'o, ben' quie Jesús, huachuguliro yaca ben' binaca ben' quie Jesús dza gaca juicio? Chan' le'e huachugulile yaca ben' binaca ben' quie Jesús, ¿bixquien' raquele bigacale ichugulile laguedyile ben' quie Jesús ta cuëchitza'ole tazëdidao' raca quiele?

<sup>3</sup> ¿Lëzi binezile ra'o ichuguliro quie yaca ángel zu guibá? Na'ra chi gacale cuëchitza'ole tazëdi ta raca guibá, lëzi gacarële cuëchitza'ole tazëdidao' ta raca lao yedyi layu.

<sup>4</sup> Chi de tazëdidao' quiele dza rdale lao yedyi layu, ¿bixquien' ruele ladyina'a ben' binaca ben' quie Jesús ta cuëchitza'ohuë' tazëdidao' raca quiele?

<sup>5</sup> Ta nacan' inia' le'e can' ta yedue'le. ¿Bixquien' raquele bizu tu ben' rioñe'le ladole ta cuëchitza'onë' tazëdidao' quiele rata' lado yaca laguedyiro, ben' quie Jesús?

<sup>6</sup> Ni lë'ëti' birexada' ca ruele raole xquia laguedyiro, ben' quie Jesús, lao yaca juez, ben' binaca ben' quie Jesús.

<sup>7</sup> Tali rnia' le'e, nacan mala gula tilalële laguedyile, ben' quie Jesús. Nacalan dya'a usanle sule chizi chi nu bi rue quiele, chi baolanyaquë' quiele.

<sup>8</sup> Pero le'e, rsacale laguedyiro, ben' quie Jesús, bizinaquezi, na' rbanle quieyaquë'.

<sup>9-10</sup> ¿Binezile yaca ben' rue con ganzi tamedian binacayaquë' cuenda lao na'a Diuzi? Lena' bitzioguele yë'. Nu ben' ru'abe rasilë nigula, len nu ben' rionla'adyi' nu yo o nu yaga, len nu ben' bazulë nigula quienë', pero rasilënë' nigula tula, len nu ben' reyasilë laguedy byu, len nu ben' uban, len nu ben'

rza'la'adyi' dumi, len nu ben' hue'e, len nu ben' rguitulë di'idza' bizu, len nu ben' rue trampa len laguedyi, leyaca ben' na', binacayaquë' cuenda lao na'a Diuzi.

<sup>11</sup> Lëscan' rnëria' quiele, cana' bërële le'e dza na'. Pero na'a banacale ben' laxta'o yëri lao Diuzi, banacale ben' la'iya quienë'. Por nun quie Señor quiero Jesucristo len Bichi Be quie Diuzi uzi'Ze Diuzi dula' xquia quiele.

### *Naca la'iya cuerpo quiero*

<sup>12</sup> Cani rna bala benë': "Ru'en lato ta huero con bitezi re'enro huero." Tabalacazi, pero cala yugulu ta re'enro huero nacan huen quiero huero. Tabala ru'en lato huero con bitezi re'enro huero, pero bihuë'ro lato gacan xa'nro inabë'n ra'o.

<sup>13</sup> Lëscan' tali ca rna benë': "Udixu Diuzi yela' huao ta gaoro. Lëscan' bzalo Diuzi budungo quiero ta tzu'un ta raoro." Pero huadyin dza hue Diuzi bira inaban gaoro. Cana' hue Diuzi yeyudyi quie yela' huao len quie budungo quiero. Calä bë Diuzi cuerpo quiero ta huero bizinaquezi talëro nigula. Nacacazi quie Cristo cuerpo quiero. Naca Cristo xa'n cuerpo quiero.

<sup>14</sup> Con cabë' bë Diuzi besebannë' Señor quiero, lëscana' huerënë' yesebannë' ra'o lao na'a yela' r nabë' quie'.

<sup>15</sup> ¿Bizi binezile nacacazi quie Cristo cuerpo quiele? ¿Binezile bireya'ala' usedyinle cuerpo quiele lao na'a nigula ruti' gustó quie? Nitu nitu bireya'ala' huele can'.

<sup>16</sup> ¿Lëzi, binezile ca naca quie be'mbyu ptila nigula ruti' gusto quie? Cani rnën lë'ë guichi la'iya quie Diuzi: "Quie lao rupateyaquë' naca quieyaquë' ca quie tuzi benë'." Cana' rnën lë'ë guichi la'iya quie Diuzi.

<sup>17</sup> Na'ra yaca benë' nao xneza Cristo, banaca bichi be quiejë' tuzi len Cristo.

<sup>18</sup> Biutilale nigula binaca žgulale. Chi utilale nigula binaca žgulale, lena' udyiagui'le cuerpo quiele, cala ca tamedian tula huele.

<sup>19</sup> ¿Bizi binezile naca cuerpo quiele ca quie tu idao' quie Diuzi? ¿Binezile bayu'ule Bichi Be quie Diuzi? Binacaro xa'n cuerpo quiero. Diuzi sí, naquë' xa'n cuerpo quiero.

<sup>20</sup> Diuzi baodizuguë' quie dula' xquia quiero. Lena' reya'ala' tzionla'adyi'ronë', bireya'ala' huero tamedian conlë cuerpo quiero.

## 7

### *Ga rguixogue'n quie ben' rzi' laguedyi*

<sup>1</sup> Niga yequëba' quie guichi use'ela'le laohua' dza na'. Tali rnïa' le'e quie yaca bi' ru'abe, nacalan dya'a quiebi' zubi' cuinzibi' bisi'bi' nigula.

<sup>2</sup> Pero chi huen žudyi quiebi' talëbi' nigula, na'ra nacalan dya'a quiebi' si'bi' nigula gaca žgulabi', cala ca ta talëbi' nigula. Lëzi cana' quie yaca nigula, chi huen žudyi quiebi', nacalan dya'a quiebi' si'bi' be'mbyu bi' gaca xquiubi'.

<sup>3</sup> Chi le'e baoži'le nigula para žgulale, reya'ala' idyë'ële nigula quiele dyë'ëdi. Lëzi cana' nigula, reya'ala' idyë'ënë' ben' quienë' dyë'ëdi.

<sup>4</sup> Na' nigula bazulë laguedyi, bira nacanë' xa'n cuerpo quienë', banaca xquiunë' xa'n cuerpo quienë'. Lëzi be'mbyu bazulë laguedyi, bira nacanë' xa'n cuerpo quienë', banaca žgulanë' xa'n cuerpo quienë'.

<sup>5</sup> Tana' lena' rnïa' le'e be'mbyu, biusanle gasilële žgulale. Lëzi rnïa' le'e nigula, biusanle gasilële xquiule. Lëlena' chi rega'nlele laguedyile di'idza' ta usanle bigasilële laguedyile tu chopa dza ta hue'lële Diuzi di'idza', caora na' ru'en lato bigasilële laguedyile. Te beyudyi bë'lële Diuzi di'idza', na'tera reya'ala' sulële laguedyile tatula tacuenda bihue xa'n taxi'ibi' le'e gan huele tamedian, porque dan' bibële gan inabë'le cuinle.

6 Ca rnia' le'e niga binacan ta huelia' le'e zëdi. Cala rnia' le'e biru'en lato si'le nigula gaca žgulale. Rnia' le'e si'le nigula gaca žgulale chi re'enle, cala tamedian na' huele.

7 Në'ëdi' re'enda' chan' yugulule suele huerële ca rua', nunu sulële. Pero Diuzi banegunnë' quie tu turo, chi suero bisuero nunu sulëro, dan' netza' tu turo. Binaca tuzi cã nacaro.

8 Rnia' le'e quie yaca bi' ru'abe len yaca nigula banati xquiuhue, nacalan dya'a quieyaquë' nunu sulëyaquë' su cuinziyaquë' con ca zua' në'ëdi', nunu zulia'.

9 Pero chi bisueyaquë' suyaquë' cuinziyaquë', nacalan dya'a si'yaquë' laguedyiaquë', cala ca ta sa'la'adyi'yaquë' sulëjë' laguedyijë' inan quiejë' huejë' tamedian.

10 Ca rnia' quie yaca nigula bazulë laguedyi, dula'adya' rnia' biru'en lato usannë' xquiunë'. Ta rnia' niga nacan mandado quie Cristo, cala ta racazi la'adya'.

11 Chi nu nigula apsannë' xquiunë', reya'ala' sunë' cuinzinë'. Chi bire'ennë' sunë' cuinzinë', reya'ala' yega'ntza'olënë' xquiunë' tatula. Biru'en lato yezi'në' be'mbyu tula. Lëscan' biru'en lato usan be'mbyu žgulanë' na' yezi'në' nigula tula.

12 Na'ra quie yaca los demás, rnia' ca naca pensari quia', cala mandado quie Cristo. Chi zu ben' zu nigula quienë', na'ra binaca nigula quië' ben' nao xneza Jesús, pero racacazi nigula conforme sulënë' lënë', biru'en lato usannë' nigula quienë'.

13 Lëscan' chi zu nigula zu be'mbyu quie, na'ra binaca be'mbyu quië' ben' nao xneza Jesús, pero racacazi be'mbyu conforme sulënë' lënë', biru'en lato usannë' be'mbyu quienë'.

14 Huaca huen quie ben' binao xneza Jesús chi sulënë' nigula, ben' nao xneza Jesús. Lëzirë quie nigula binao xneza Jesús, huaca huen quienë' sulënë' be'mbyu, ben' nao xneza Jesús. Lëzirë quie nu ži'yaquë', huaca huen quieyacabi' chi nao xuziyacabi' žna'yacabi' xneza Jesús. Chi usan ben' nao xneza Jesús nigula quienë' o chi usan nigula nao xneza Jesús be'mbyu quienë', bihuen dya'a quie ži'yaquë'. Huen quieyacabi' ca quie ži'i ben' binao xneza Jesús.

15 Pero chi ben' binao xneza Jesús bira re'ennë' sulënë' laguedyinë', ben' nao xneza Jesús, na'ra hue'le lato usan ben' binao xneza Jesús laguedyinë'. Caora na' naca ben' nao xneza Jesús libre. Pues ulio Diuzi le'e ta cue' chizi laxta'ole bitilalële laguedyile.

16 Na'ra luë' nigula, žcómo nezo' biidyin dza inao ben' quio' xneza Jesús? Lëscan' luë' be'mbyu, žcómo nezo' biidyin dza inao nigula quio' xneza Jesús?

17 Reya'ala' inaoro huero cabë' banegun Diuzi quie tu turo cati ulionë' ra'o gacaro ben' quienë'. Cana' rnia' con gatezi ga tza', gan' nita' yaca ben' nao xneza Jesús.

18 Chi ra'o zuro tu xëdyidao' ca xëdyi ruzu yaca ben' Israel ži'yaquë' byu, cala bizëdi huena. Lëzi cati dza ulio Diuzi ra'o, chi bizuro xëdyidao', cala bizëdi huena.

19 Birueten baiguin chi su xëdyidao' cuinro, o chi bisu xëdyidao' cuinro. Chi naoro hue quiero xti'idza' Diuzi, lëlena' rueten baiguin hueron.

20 Ca banegun Diuzi quie tu turo dza ulio Diuzi ra'o gacaro ben' quienë', cana' reya'ala' inaoron.

21 Chi le'e gucale ben' zu lao xa'ne cati ulio Diuzi le'e, bidëbile biquilole rchinle ga tula. Pero chi idyin dza gata' tu tahuen quiele ta yeza'le ga zule lao xa'ne, reya'ala' yeza'le.

22 Chi zule lao xa'ne cati ulio Diuzi le'e, banacan quiele na'a ca quie ben' bizu lao xa'ne. Banacale ben' rue mandado quie Diuzi. Lëzi chi bizule lao xa'ne cati ulio Diuzi le'e, banacan quiele na'a ca quie ben' zu lao xa'ne, dan' banaca Cristo xa'ne.

23 Taže bagucalë Diuzi le'e baodižunë' dula' xquia quiele. Quie lena' bihue'le lato chi re'en yaca benë' huele tamedian.

24 Lëlena' rnia' le'e bicha', ca dyin bëro banegun Diuzi quie tu turo dza ulio Diuzi ra'o, cana' reya'ala' huero biusanron inaoron.

25 Ni inia' le'e quie ben' binesi' laguedyi. Ca naca pensari quia' inia' le'e quieyacabi', binacan mandado quie Cristo. Rnia' le'e pensari quia' como beyëchi'la'adyi' Diuzi në'ëdi', bdë'në' në'ëdi' ben' quie', ben' rnë tabala.

26 Ca naca pensari quia' inia' de que, nacalan dya'a bisi' be'mbyu nigula, dan' babdyin tiempo gaca zëdi gula lao yedyi layu.

27 Chi bazulële nigula, biusanlenë'. Lëzi chi binესulële nigula, biquilolenë'.

28 Pero chi re'enle si'le nigula sulële, binacan xquia. Lëzi bi' nigula, chi re'embi' si'bi' be'mbyu, binacan xquia. Pero quie yaca ben' si' laguedyi, huata' tazëdi quieyaquë' lao dza rdayaquë' lao yedyi layu. Na' re'enda' cuëchitza'ohua' cabë' tazëdi gata' quiele.

29 Bicha', ta re'enda' inia' le'e, baruen bago yeyudyi yedu yedyi layu. Quie lena' chi bazulële nigula, hue quiele xti'idza' Diuzi como ca quie bizulële nigula.

30 Lëzi le'e ben' raca yela' yëchi' quie, hue quiele xti'idza' Diuzi como ca ben' biraca yela' yëchi' quie. Lëzi le'e ben' ružidyi redaohue, hue quiele xti'idza' Diuzi como ca quie ben' biruzidyi biredaohue. Lëzi le'e ben' ra'o ta de lao yedyi layu, hue quiele xti'idza' Diuzi como ca quie ben' biga'o ta de lao yedyi layu.

31 Lëzi le'e ben' babë gan ta de lao yedyi layu, hue quiele xti'idza' Diuzi como ca quie ben' bibë gan ta de lao yedyi layu. Rguixogui'a cana' dan' baza' dza yeyudyi yedu yedyi layu.

32 Re'enda' sule huen bidëbile. Yaca ben' binesi' laguedyi, rueyacabi' pensari ta hue quieyacabi' xti'idza' Diuzi ta zuyacabi' huen lao Cristo.

33 Pero yaca ben' bazulë nigula, rueyaquë' pensari ga tzexi'yaquë' ta rdziogue nigula quienë'.

34 Netza' quie nigula bazulë be'mbyu, netza' quie nigula cuidi'. Na' nigula cuidi' ruebi' pensari ta hue quiebi' xti'idza' Diuzi ta gacabi' ben' laxta'o yëri lao Cristo. Pero nigula bazulë be'mbyu, ruenë' pensari rdëbinë' bi huenë' ta zunë' huen len xquiunë'.

35 Cana' rnia' le'e dan' re'enda' gata' tadya'a quiele, bire'enda' gata' tazëdi quiele. Re'enda' sule contento huele mandado quie Cristo du guicho du la'adyi'le.

36 Chi le'e rdëbile quie zi'ile nigula si'bi' be'mbyu, dan' bate yela' cuidi' quiebi', chi racale pensari huele quie zi'ile nigula can', abihuena hue'le lato ta si' be'mbyu lëbi'. Binacan xquia si' be'mbyu lëbi'.

37 Pero lëzi chi le'e bire'enle si' be'mbyu zi'ile nigula, chi du guicho du la'adyi'le racale pensari bisi' be'mbyu lëbi', abihuena bihue'le lato si'bi' lëbi'. Cala tamedian na', nacan dya'a.

38 Lëlena' rnia' nacan dya'a hue'le lato si' be'mbyu zi'ile nigula, pero nacateran dya'a chi bihue'le lato si'bi' lëbi'.

<sup>39</sup> Chi nu nigula bazulënë' xquiunë', biru'en lato usannë' lëbë' tu raca nebannë'. Chi xquiunë' bagutinë', cana'ra ru'en lato yezi'në' be'mbyu tula, pero con chi ben' nao xneza Jesús.

<sup>40</sup> Ca naca pensari quia' nia' de que nacalan dya'a quie nigula guti xquiuhue, chi nunu be'mbyu yezi'në'. Ca naca pensari quia' rnia', pero lëscan' nacan pensari quie Bichi Be quie Diuzi.

## 8

### *Ni rnan quie yela' huao bdyia yaca benë' lao ídolo*

<sup>1</sup> Ga ni rnia' quie yela' huao rudyia yaca benë' lao ídolo. Pues tali na' ca rna yaca benë': Yuguluro neziro bibi zaca' yaca ídolo. Pues nun quie baneziro cana', bireya'ala' huero cuinro ben' ze, den' reya'ala' edyë'ëro laguedyiro tacuenda huebë'raro xneza Diuzi mazera.

<sup>2</sup> Chi raquero nacaro ben' rioñe'etzegue, lena' rulu'en ni lë'ëti' birioñe'ero cabë' reya'ala' tzioñe'ero.

<sup>3</sup> Chi nedyë'ëro Diuzi, nubë'cazi Diuzi ra'o.

<sup>4</sup> Na'ra quie yela' huao rudyia yaca benë' lao ídolo quieyaquë', tali rnia' bibi zaca' yaca ídolo rionla'adyi' yaca ben' nita' lao yedyi layu. Tuzi Diuzi zu guibá zaca', ganura diuzi tula zu.

<sup>5</sup> Ba'ala'cazi chi rna yaca benë' naca zë diuzi zu guibá, ba'ala'cazi rnayaquë' naca zë diuzi nita' lao yedyi layu, ba'ala'cazi rnayaquë' nita' ben' zë, ben' naca Señor quiero,

<sup>6</sup> pero ra'o neziro tuzi Diuzi zu. Lëlëbë' naquë' Xuziro. Lëlëbë' bzaloguë' yugulu ta de guibá len lao yedyi layu. Bzalarënë' ra'o, ben' nita' lao yedyi layu. Lëscan' tuzi Jesucristo naquë' ben' Señor quiero. Yugulute ta de guibá len lao yedyi layu nacan quienë'.

<sup>7</sup> Pero cala nezi yugulu ben' nao xneza Jesús de que bibi zaca' ídolo. Dza na'la uyonla'adyi'yaquë' nu ídolo. Na' caora raoyaquë' na'a, reza'la'adyi'yaquë' quie yela' huao bdyia yaca benë' lao ídolo. Na'ra como binetziño'e'eyaquë' dyë'ëdi quie xti'idza' Diuzi, raqueyaquë' rueyaquë' tamedian chi raoyaquë' yela' huao ta bdyia benë' lao ídolo.

<sup>8</sup> Pero cala por nun quie yela' huao ta raoro ilë'ë Diuzi ra'o ben' huen. Biinaro nacaro ben' mala chi gaoro bi ta dyia nu lao ídolo. Lëzi binaro nacaro ben' huen chi bigaoro bi ta dyia lao ídolo.

<sup>9</sup> Dyë'ëdi baneziro para ra'o ru'en lato chi gaoro, chi bigaoro, ta rudyia yaca benë' lao ídolo. Pero yaca ben' binetziño'e' dyë'ëdi quie xti'idza' Diuzi, bineziyaquë' ru'en lato chi gaoro, chi bigaoro. Quie lena' reya'ala' gaparo cuidado ta bihuero ta quixi yaca ben' binetziño'e' dyë'ëdi quie xti'idza' Diuzi.

<sup>10</sup> Tu di'idza' rnia' le'e. Chi le'e cue'le gaole ga bdyiayaquë' yela' huao lao ídolo, chi guida tu ben' nao xneza Jesús, ben' binetziño'e' dyë'ëdi quie xti'idza' Diuzi, chi ilë'ënë' le'e gan' re'le raole, na' ruen žudyi gue'ennë' gaorënë' yela' huao bdyia yaca benë' lao ídolo.

<sup>11</sup> Na'ra chi gacan can', bibële huen. Por nun quie yela' rioñe'e quiele, bële ta uquixi tu ben' nao xneza Jesús, ben' binetziño'e' dyë'ëdi quie xti'idza' Diuzi. Lëscan' por lëbë' guti Cristo lë'ë yaga cruzo.

<sup>12</sup> Lao Crisco gata' dula' xquia quiele chi por le'e aoquixi ben' nao xneza Jesús, ben' binetziño'e' dyë'ëdi quie xti'idza' Diuzi.

<sup>13</sup> Quie lena' chi por nun quie udaohua' yela' huao bdyia yaca benë' lao ídolo, chi cana' dula' quia' na' uquixi itu ben' nao xneza Jesús, nacalan dya'a



bira gaohua' bē'ēla' bdyia yaca benē' lao ídolo tacuenda bihuen žudyi dula' quia' na' uquixi ben' bicha', ben' nao xneza Jesús.

## 9

### *Ni rnan quie yela' rnabē' quie yaca apóstol*

<sup>1</sup> ¿Binezile napa' derecho? ¿Binezile naca' apóstol? ¿Binezile blē'ēda' Jesús Señor quiero? 'Dyin quie Diuzi bia' dza na' uduxogu'la le'e xti'idza' Diuzi banacale ben' nao xneza Jesús.

<sup>2</sup> Nita' ben' birezaque nē'ēdi' chi naca' apóstol. Pero le'e, decazide reya'ala' yezaquele nē'ēdi' chi naca' apóstol, dan' dyin quia' na' nacale ben' nao xneza Jesús. Lena' nacan prueba tali na' naca' apóstol.

<sup>3</sup> Ni yequēba' quie yaca ben' rnē condre nē'ēdi':

<sup>4</sup> Napa' derecho inaba' ta gunle ta gaohua' len ta yo'oga'.

<sup>5</sup> Lēzirē napa' derecho si'a nigula nao xneza Jesús gaca žgula' con ca rue yaca los demás apóstoles, lenlē yaca ben' bichi Jesús, len Pedro.

<sup>6</sup> ¿Bixquien' racale pensari rupazi Bernabé len nē'ēdi', bibi derecho napanado' inabando' le'e gunle ta huendo' gasto quiendo' caora cati rdando' rguixogue'ndo' yaca benē' xti'idza' Diuzi?

<sup>7</sup> ¿Binezile ganu nunu soldado rguizuguē' cuinzē' ta gaconē' len ta gaonē'? ¿Lēzi binezile quie ben' raza bedzuli'? Napē' derecho gaohuē' ta razē'. ¿Lēzirē binezile quie ben' rapa beco' ži'ila'? Napē' derecho si'nē' nidyi' quieba' yo'oguē'.

<sup>8</sup> Bireya'ala' huele pensari ta racazi la'adya' rnia', porque lēscan' cana' rnēn lē'ē guichi ley quie Moisés.

<sup>9</sup> Lē'ē guichi na' rnēn cani: “Bireya'ala' udze'ro du ru'a bēdyihuaga caora rdaba' rutzutzu rulioba' bdyigo' quie trigo ta ero bini quien.”

Con ca rna lē'ē guichi, cala quie bēdyihuagazi rnēn.

<sup>10</sup> Lēzi rnērēn quie ra'o benē', porque uduxu Diuzi ley quienē' ta gacalēn ra'o. Pues lao tu ben' ruzolo yu, len itu ben' rhugo trigo, rupayaquē' rbezayaquē' yezi'yaquē' usecho quieyaquē'.

<sup>11</sup> Para le'e nacando' ca quie ben' guza bini trigo, dan' bēndo' dyin quie Diuzi uduxogue'ndo' le'e xti'idzē'. Lēlena' ¿bixquien' raquele pensari bireya'ala' si'ndo' usecho? ¿Bixquien' raquele pensari binapando' derecho inabando' gacalēle nēto' ta rdzioguendo' ta gaondo' len ta yo'ondo' tu nerdando' lao yedyi layu?

<sup>12</sup> Naparando' derecho inabando' le'e gacalēle nēto' cala ca yaca ben' tula.

Pero ni tu lasa binenabando' le'e gacalēle nēto'. Yugulute baozuendo' tacuenda bicuezan quixogue'ro yaca benē' cabē' una Cristo, cabē' bēnē' quiero.

<sup>13</sup> Banezile ca naca quie ben' napa dyin quie idao'. Por nun quie dyin hueyaquē' lu'u idao', cana' hueyaquē' gan ta gaoyaquē'. Lēscan' nezile nun quie rapayaquē' ru'aba ta zu lu'u idao', cana' napayaquē' derecho gaoyaquē' bē'ēla' dyia ru'aba nacan gun quie Diuzi.

<sup>14</sup> Lēzirē cana' re'en Cristo gaca quie nēto', ben' rguixogue' di'idza' la'iya quiē'. Tanun quie rdando' rguixogue'ndo' yaca benē' di'idza' la'iya quiē', cana' napando' derecho inabando' le'e gunle ta gaondo', len ta yo'ondo', len ta gacondo'.

<sup>15</sup> Pero ni tu lasa binehuena' le'e zēdi inaba' ca ta reya'ala' gunle nē'ēdi'. Lēzi cala rua' guichi ni ta inaba' gunle nē'ēdi' bi cosa. Zua' dispuesto gatia' lao laza inaba' le'e bi cosa, chi por lena' biyega'nro huen, na' bisua' contento.

16 Birua' ze cuina' nun quie nacan dyin quia' rguixogui'a benë' xti'idza' Diuzi. Nacan ladyina'a rguixogui'a'. Re'en ca re'lenna ruzua' di'idza' rguixogui'an, porque huaca bayëchi' quia' chi usana' biquixogui'a benë' xti'idza' Diuzi.

17 Chi quixogui'a benë' xti'idza' Diuzi de gustozi, huega'nnan huen quia'. Chi quixogui'ayaquë' xti'idza' Diuzi con ganzi, decazide nacan ladyina'a ta pca'n Diuzi lao na'a.

18 ¿Cabiži yega'nnan huen quia'? Cani yega'nnan huen quia': Huabe' chizi gula lu'u guicho laxta'ohua' nun quie bibi unaba' le'e caora udixogui'a le'e xti'idza' Diuzi. Ba'ala'cazi napa' derecho inaba' le'e, bibi unaba' le'e.

19 Ba'ala'cazi binaca' ben' zulao xa'ne, rua' ca quie ben' zulao xa'ne tacuenda hua' gan inao benë' zë xneza Cristo.

20 Cati zua' lado yaca ben' Israel, rua' ca rueyaquë'. Ca naoyaquë' ley pca'n Diuzi lao na'a Moisés dza na'la, cana' rnaoria' ley na'. Cana' rua' ba'ala'cazi binaca' cuenda len leyaquë' ta inaohua' ley na', pero naohua' ley na' tacuenda hua' gan inaoyaquë' xneza Cristo.

21 Lëzi cati zua' lado yaca ben' binao ley pca'n Diuzi lao na'a Moisés, binaohua' ley na' tacuenda hua'yaquë' gan inaoyaquë' xneza Cristo. Pero cala binaohua' ley, porque rnaocaza' ley quie Diuzi nun quie rnaohua' ley quie Cristo.

22 Lëzi cati zua' lado yaca ben' binetzioñe'e dyë'ëdi quie xti'idza' Diuzi, birua' cuinza' ben' rioñe'e tacuenda hua' gan' inaorayaquë' mazera xneza Jesús. Cana' rua' cati zua' lado yugulute benë' ga ra'a, rueria' lëbizi len leyaquë' tacuenda inaoyaquë' xneza Jesús gata' yela' neban quiejë' tuzioli.

23 Cana' rua' tacuenda ye yaca benë' xti'idza' Diuzi gata' yela' neban quieyaquë' tuzioli. Cana' rua' tacuenda hua' tu parte quia' nacan cuenda quia' quixogui'a xti'idza' Diuzi.

24 Banezile ca naca quie ben' ru'u carrera. Ba'ala'cazi tapa ga'yo'yaquë' tzu'uyaquë' be, pero tuzë' hue gan premio. Lëzi le'e, ulenao xneza Jesús du guicho du la'adyi'le tacuenda huele gan premio quien.

25 Yaca ben' rue deporte gapayaquë' cuinyaquë' dyë'ëdi tacuenda gacayaquë' ben' tzutzu huala. Cana' rueyaquë' cuenda hueyaquë' gan tu coron de la'aga'. Na'ra coron la'aga' hueyaquë' gan, huabidyin huabiagui'n, biden tuzioli. Pero ca naca premio gun Diuzi ra'o, biibidyin bicuiagui'n, den tuzioli.

26 Quie lena', por tu parte quia' në'ëdi', bita' ca rda ben' laochula, bihua' ca rue ben' rdilalë be ladza'.

27 Biru'a lato hua' ca ta rna cuerpo quia'. Bire'enda' huen žudyi quia' idza' Diuzi në'ëdi', dan' biunaohua' xti'idza' Diuzi dza caora psëdia' yaca benë' ta inaoyaquë' xti'idza' Diuzi.

## 10

### *Ga rnën condre yaca idolo*

1 Bicha', rnia' le'e ta yeza'la'adyi'le cabë' guca quie yaca xuzixta'oro. Yugu-luyaquë' unaoyaquë' tu plari nacan beo ta bzë Diuzi ladza dza broyaquë' nación Egipto. Lëzi yuguluyaquë' uderëyaquë' lu'u nisadao' laona Nisadao' Zna.

2 Gucayaquë' tuže len Moisés dza na'te caora unaoyaquë' plari nacan beo udeyaquë' lu'u Nisadao' Zna.

3 Bë Diuzi yela' huaca quienë' pchizë' yela' huao ta udao yugulute yaca xuzixta'oro, ben' ziolë Moisés tzaže.

4 Lëzirë bë Diuzi yela' huaca quienë' ulioguë' nisa lu'u yo ta hue'e yugulute yaca xuzixta'oro. Lëyo ga bro nisa rnën quie Cristo, ben' ziolë leyaquë'.

5 Pero ude gatzoyaquë' gutiyaquë' lao lato ga bidyia yu'u nun quie biyaxe Diuzi ca bëyaquë'.

6 Ca beyëchi' gula guca quieyaquë', reya'ala' huero pensari ta bihuero tamedian ca tamedian bë xuzixta'oro.

7 Lëscan' bireya'ala' tzionla'adyi'ro nu ídolo cabë' bë bala yaca xuzixta'oro. Lena' rnën lë'ë guichi la'ya quie Diuzi cani: "Bizi yaca benë' ure'yaquë' udaoyaquë' hue'eyaquë'. Bëyaquë' lani ta uyonla'adyi'yaquë' ídolo quieyaquë'." Cana' nan lë'ë guichi la'ya quie Diuzi.

8 Quie lena' bihuele bizinaquezi utilale nigula binaca žgulale con cabë' bë yaca xuzixta'oro. Por len guti galobetzona milayaquë' lao tu dzazi.

9 Lëzi bireya'ala' huero bizinaquezi cabë' bë yaca xuzixta'oro bdza' Diuzi leyaquë'. Caora beyudyi yela' žela'adyi' quie Diuzi, use'elë' bëla ta udi'imba' leyaquë' gutiteyaquë'.

10 Bireya'ala' inaro di'idza' bizu condre Diuzi cabë' una yaca xuzixta'oro dan' unajë' bigucalë Diuzi leyaquë'. Caora na' use'ela' Diuzi tu ángel quië' ta bëtinë' leyaquë'.

11 Ca ta uzaca yaca xuzixta'oro tiempote nacan ta huero pensari bihuero ca bëyaquë'. Por lena' bzu Moisés di'idza' lë'ë guichi la'ya quie Diuzi ta gacalën ra'o dza rdaro nebanro baruen bago yeyudyi yedyi layu.

12 Cani rnia', ra'o raquero zioro dyë'ëdi inaro xneza Diuzi, pero reya'ala' gaparo cuidado ta biiquixiro huero con ganzi.

13 Con bitezi prueba gaca quiero, huacalë Diuzi ra'o ta sueron. Sudyi'ilëro Diuzi bihuenë' lato gata' prueba quiero bisuero. Cati gata' prueba quiero, biusanla'adyi'në' ra'o, gacalënë' ra'o ta bihuero tamedian.

14 Lëlena' rnia' le'e ben' bicha', ben' nedyë'ëda'. Ibiga'le tzala'la, bitzionla'adyi'le yaca ídolo.

15 Rnia' le'e como ca ben' banezi con cabë' rna xti'idza' Diuzi. Huanezile cabë' naca di'idza' baonia' le'e, chi nacan huen, chi binacan huen.

16 Caora yo'oro vino nisa bedzuli' rëbiro Diuzi diuxcalelo', caora na' reza'la'adyi'ro nacalëronë' tuže nun quie ulato ren quienë' ta gaca huen quiero. Lëscan' caora gaoro yëta xtila rulidzaronë', caora na' reza'la'adyi'ro nacalëronë' tuže nun quie gutinë' lë'ë yaga cruzo ta gaca huen quiero.

17 Ba'ala'cazi nacaro ben' zë, tuzi yëta xtila gaoro yuguluro. Quie lena' nacalëro tuzi len Cristo.

18 Ina'le dyë'ëdi cabë' rue yaca ben' Israel. Caora raoyaquë' ta rudyi-ayaquë' ru'aba quie Diuzi, lena' rlu'en quieyaquë' rionla'adyi'yaquë' Diuzi.

19 Pero žbizi inaro quie ben' rudyia bë'ëla' lao ídolo? Inaro bibi zaca' ídolo rionla'adyi'yaquë'. Inaro quie bë'ëla' rudyiayaquë' lao ídolo binaca la'ya bë'ëla', bë'ëla'zi nacan.

20 Caora rudyiayaquë' bë'ëla' ru'aba quieyaquë', cala rionla'adyi'yaquë' Diuzi, taxi'ibi'la rionla'adyi'yaquë'. Bire'enda' huele tuže len yaca taxi'ibi'.

21 Bisaque' gacalëro Cristo tuže chi nacalëro yaca taxi'ibi' tuže. Bisaque' tzionla'adyi'ro Cristo chi rionla'adyi'ro yaca taxi'ibi'.

22 ¿Bixquien' re'enle idza' Diuzi le'e? ¿Bixquien' ruera le'e ze ca Diuzi?

*Ni nan ca reya'ala' gacalëro ben' bichiro, ben' binetziñe'e dyë'ëdi quie xti'idza' Diuzi*

23 Tali na' huaca huero yugulute ta re'enro huero, pero cala yugulu ta re'enro huero nacan dya'a quiero, cala yugulu ta re'enro huero huacalën ra'o ta tzioro inaro xneza Jesús.

24 Bireya'ala' huero yaladyi' lëro laguedyiro. Reya'ala' huero tahuen gacalëro laguedyiro.

25 Ta ruti'yaquë' lao ye'eya, huaca gaoro yuguluten. Nica inabaziro ga yexi'yaquë'n. Lena' binacan ta idëbïro bë' gaoron.

26 Binacan ta idëbïro, dan' yugulute ta de lao yedyi layu nacan ladyina'a Diuzi.

27 Chi re'en tu ben' binao xneza Jesús tziro ta gaolëronë' tzaže, chi re'entro tziro, huaca gaoro yugulute ta gunnë'. Nica inabazironë' ga yexi'në'n. Lena' binacan ta idëbïro bë' gaoron.

28 Pero bigaoron chi inanë' ra'o: "Yela' huao niga nacan ta bdyiando' lao yaca ídolo." Chi cana' unë', bigaocaziron ta inezi ben' na' bireya'ala' gaoron chi nezïro bë'ëla' ta bdyiayaquë' lao ídolo.

29 Anezda' de que nezile bireya'ala' gaoron, pero ben' na' binezinë' bireya'ala' gaoron.

Pero huanaba ben' re'en gao bë'ëla': "¿Bixquien' nao' bireya'ala' gaohua' bë'ëla' ta dyia lao ídolo, chan' anezda' binaca la'iya bë'ëla', bë'ëla'zi nacan? Lena' biuzagan në'ëdi' ta bigaohua'n.

30 Chi yëpa' Diuzi diuxcalelo' bë' gaohua'n, ¿bixquien' inë benë' condre në'ëdi' bë' gaohua'n?"

31 Pues cani yequëba' ben' una në'ëdi' cana': Chi gaoro bi cosa, chi bigaoro bi cosa, chi yo'oro bi cosa, chi biyo'oro bi cosa, con bitezi huero, hueron ta huero Diuzi ben' ze.

32 Reya'ala' gaparo cuidado ta bihuero con ganzi ta biiquixi yaca benë', la'achi ben' Israel, la'achi ben' binaca ben' Israel, la'achi ben' nao xneza Cristo.

33 Por tu parte quia' në'ëdi', quele beyudyi raca' ta gaca tahuen quia' cuinza', den' lëscan' para yugulute yaca benë', raca' ta gaca tahuen quieyaquë' gata' yela' neban quieyaquë' tuzioli.

## 11

1 Cabë' rua' rnaohua' xneza Cristo, lëscan' le'e reya'ala' inaorële huerële ca rua'.

2 Bicha', redaohueda' rlë'ëda' cabë' ruele reza'la'adyi'le në'ëdi', banaole dyë'ëdi con cabë' baonia' le'e.

3 Re'enda' tziõe'ele de que naca Cristo ben' rnabë' ra'o. Lëzi cabë' ra'o rnabë'ro nigula quiero, cana' Xuzïro Diuzi rnabë'në' Cristo.

4 Chi utacoro guichoro caora cati hue'lëro Diuzi di'idza', o chi caora cati quixogue'ro yaca benë' xti'idza' Diuzi gan' yegu'udi'ro huero culto, cana' biraparo bala'ana Cristo, ben' rnabë' ra'o.

5 Pero netza' quie yaca nigula, chi biutaconë' guichonë' caora cati hue'lënë' Diuzi di'idza', o chi caora cati quixogue'në' yaca benë' xti'idza' Diuzi gan' yegu'udi'ro huero culto, cana' birapanë' bala'ana xquiunë', ben' rnabë' lëbë'. Lena' nacan ca quie tu nigula baochibi guichogue.

6 Yaca nigula reya'ala' uchibinë' guichonë' chi bire'ennë' utaconë' guichonë' caora cati hue'lënë' Diuzi di'idza'. Pero chi redue'në' uchibinë' guichonë', reya'ala' utaconë' guichonë'.

7 Pero bireya'ala' utaco be'mbyu guichonë', dan' neya'anë' ca Diuzi, huenë' ze Diuzi. Pero nu nigula huenë' ze be'mbyu.

8 Diuzi, cati bzaloguë' bëguë' be'mbyu, cala nigula uzi'guë' bëguë' be'mbyu. Pero cati bzaloguë' bëguë' nigula, na'ra uzi'guë' be'mbyu bëguë' nigula.

9 Por nun quie be'mbyu bë Diuzi nigula. Cala por nun quie nigula bë Diuzi be'mbyu.

<sup>10</sup> Tana' lena' reya'ala' utaco nigula guichonè' ta ulu'en rapanè' bala'ana yaca be'mbyu, dan' naca be'mbyu ben' r nabè' quienè'. Lèscana' ruerè yaca àngel rapayaquè' bala'ana Diuzi.

<sup>11</sup> Pero re'en Diuzi huero dyin quienè'. Rnaban yuguluro hueron, chi be'mbyu, chi nigula.

<sup>12</sup> Nacan tabala uzi' Diuzi be'mbyu bzaloguè' bëguè' nigula. Lèzirè nacan tabala nigula baraloguè' quie be'mbyu. Pero dyin bë Diuzi bazu rupateyaquè'.

<sup>13</sup> Le'e ulehuecara pensari chi nacan huen, chi binacan huen, chi biutaco nigula guichonè' caora hue'lènè' Diuzi di'idza'.

<sup>14</sup> ¿Binezile nacacazin yela' stu' rabe' be'mbyu cuia guitza' guichonè' tona?

<sup>15</sup> Pero nacacazin bala'ana quie yaca nigula cuia guitza' guichonè' tona. Bè Diuzi guitza' guichonè' tona ta utacon guichonè'.

<sup>16</sup> Lèzirè rnia' le'e chi nita' ben' biraxe ca baonia', reya'ala' ineziyaquè' nacan tabala ca baonia'. Nèto' len yaca los demás ben' nao xneza Jesús, naca tuzi ca di'idza' rnèndo'.

*Ni nan cabè' bibèjè' huen caora udaoyaquè' rtze' quie Cristo*

<sup>17</sup> Ta rnia' le'e niga binacan ta yedaohueda' ca bële, dan' na yaca benè' de que lao laza huele tadya'a, ruele tamedianla gan' regu'udi'le ruele culto.

<sup>18</sup> Cana' rna yaca benè' de que gan' regu'udi'le ruele culto rela' laguedyile binacale tuzi. Lèlena' raquedà' nacan tabala con cabè' na yaca benè'.

<sup>19</sup> Cala ta reya'ala' huele ruele barbiole laguedyile chopa tzona cue'. Raquele chi huele cana', cana' inezile nu ben' nao xneza Jesús du guicho du la'adyi', pero pensarizi huele huele cana'.

<sup>20</sup> Le'e dan' ruele cana', bibi zaca'n regu'udi'le raole reza'la'adyi'le Cristo.

<sup>21</sup> Gan' regu'udi'le ta gaole binacan huen biraole tzaže. Balale larialaotele raole. Na' ibalale rega'nle sin gaole. Na' ibalale ri'ole zudyile.

<sup>22</sup> ¿Bixquien' raquele bizu yu'u quiele ga gaole, ga yo'ole? Dula' quiele ruzidyí yaca benè' di'idza' la'íya quie Diuzi. Lèzirè dula' quiele redue' ben' bi de ta gao. ¿Cabizi re'enle inia' le'e? ¿Re'enle inia' le'e ruele tahuen? Bisaque' inia' le'e ruele tahuen.

*Ni rguixogue'n ga ze'lao beyudyi udao Jesús rtze' quie lani Pascua*

(Mt. 26.26-29; Mr. 14.22-25; Lc. 22.14-20)

<sup>23</sup> Na'ra ta inia' le'e niga nacan ta una Cristo nè'èdi': Zadze' dza caora ilè'èti'zi guxuyaquè' lèbè', caora na' uzi'nè' tu yèta xtila

<sup>24</sup> gudyinè' Diuzi: "Diuxcalelo." Te na' bzužunè'n na' unè': "Ulegao yèta xtila ni. Lena' nacan ca quie cuerpo quia'. Huatia' cuenda gata'yela' huezi'ze quiele lao Diuzi. Cabè' bëlia' le'e niga, cana' huerèle ta yeza'la'adyi'le nè'èdi' cabè' bia' quiele."

<sup>25</sup> Lèzirè beyudyi udaohuè', uzi'nè' tu copa bazènè'n. Na'ra unè': "Vino nisa bedzuli' yudzu copa ni nacan ca quie ren quia'. Lena' ilatoga' gatia' cuenda yega'ntza'olè Diuzi le'e tacubila. Con bë' yo'ole vino nisa bedzuli' gan' yegu'udi'le, cana' huele ta yeza'la'adyi'le cabè' bia' quiele." Cana' una Cristo.

<sup>26</sup> Na' nia' le'e de que con cabè' gaoro yèta xtila yo'oro nisa bedzuli' gan' yegu'udi'ro, lena' yeza'la'adyi'ro cabè' guca quie Cristo gutiè' lè'è yaga cruzo. Cana' yeza'la'adyi'roguè' hasta dza cati yeguidè' lao yedyi layu tatula.

*Ni rnan gaparo cuidado bë' gaoro rtze' quie Cristo*

<sup>27</sup> Chi gaoro yo'oro con ganzi bë' yeza'la'adyi'ro cabè' bë Cristo quiéro, lena' saquero quienè' ca quie ben' bibi zaca'n cuerpo quie, ben' bibi zaca'n ren quie.

<sup>28</sup> Reya'ala' yeyuero pensari chi ruero tamala, na'tera ixubalëpiro lao Diuzi ta yezi'zenë' quiero bë' gaoro yeza'la'adyi'ro Cristo.

<sup>29</sup> Porque nacacazin dula' xquia quiero lao Diuzi chi raoro ri'oro yeza'la'adyi'ro Cristo con ganzi, bihuero pensari chi quie Cristo hueron bë' gaoro yo'oro.

<sup>30</sup> Quie lena' bala le'e baraca zhue'le, ibala le'e binapale fuerza, ibala le'e ratile.

<sup>31</sup> Chi yeyuero pensari chi ruero tamala, na'tera ixubalëpiro tacuenda yezi'ze Diuzi quiero, chi huero cana', bigata' dula' xquia quiero lao Diuzi.

<sup>32</sup> Pero cati rdilanë' ra'o, nacan ta bihuero tamedian ta bigata' castigo quiero ca castigo gata' quie yaca ben' binao xneza Jesús dza hue Diuzi juicio lao yedyi layu.

<sup>33</sup> Lëlena' ben' bicha', bë' yegu'udi'le gan' gaole bë' yeza'la'adyi'le quie Cristo, reya'ala' cuezale guida laguedyile ta gaole tzaze.

<sup>34</sup> Chi barduele gaole, reya'ala' gaole zan yu'u quiele, na'tera tzirole gan' yegu'udi'le gaole rtze' quie Cristo, pero cala con ganzi tacuenda bigata' castigo quiele lao Diuzi. Lëzi hueria' arreglo ca yaca ta began' bë' guida' tatula ideyuba' le'e.

## 12

### *Netza' ta banegun Diuzi quie tu turo*

<sup>1</sup> Bicha', re'enda' inia' le'e ta inezile ca naca ta banegun Diuzi quie tu turo ra'o ben' nao xneza Jesús.

<sup>2</sup> Le'e dyë'ëdi nezile ca guca quiele dza biunaole xneza Jesús, bipsanle unaole nu ídolo bero quiele.

<sup>3</sup> Tana' lena' re'enda' inezile nitu nunu ina utasi unia Cristo chi nacan tabala yu'uyaquë' Bichi Be quie Diuzi. Lëzirë re'enda' inezile nitu nunu ina du guicho du la'adyi': "Naca Cristo Señor quia'", chi biyu'uyaquë' Bichi Be quie Diuzi.

<sup>4</sup> Ca naca ra'o ben' nao xneza Jesús, netza' ta banegun Diuzi tu turo ta uzuro di'idza' quienë' inaoro xnezë'. Pero tuzi Diuzi zu guibá banegunnë' quiero.

<sup>5</sup> Tazë modo de ta huero inaoro xneza Diuzi, pero cala zë diuzi zu, tuzi Diuzi zu guibá inaoro xnezë'.

<sup>6</sup> Tazë modo de ta hue Diuzi ca re'ennë' huenë', pero tuzi Diuzi zu guibá huenë' yugulu ca re'ennë' huenë'.

<sup>7</sup> Diuzi rulu'ecazinë' ra'o yu'ucaziro Bichi Be quienë' ta gata' tadya'a quiero yuguluro.

<sup>8</sup> Diuzi, conlë Bichi Be quienë', banegunnë' bala ra'o ta tziõe'ero dyë'ëdi con cabë' rna di'idza' la'íya quienë'. Lëzirë Diuzi, conlë Bichi Be quienë', banegunnë' ibala ra'o ta neziro dyë'ëdi ca naca pensari quienë'.

<sup>9</sup> Lëzirë Diuzi, conlë Bichi Be quienë', banegunnë' ibala ra'o ta sudyi'ilëronë' dyë'ëdi. Ibala ra'o banegunnë' ta yeyuero ben' raca zhue'.

<sup>10</sup> Ibala ra'o banegunnë' ta huero yela' huaca quienë'. Ibala ra'o banegunnë' ta tzetixogue'ro yaca benë' di'idza' la'íya quienë'. Ibala ra'o banegunnë' ta yezaquero nu ben' yu'u bichi be xi'ibi', nü ben' yu'u Bichi Be quie Diuzi. Lëzi ibala ra'o banegunnë' ta inëro di'idza' binaca xti'idza'ro. Ibala ra'o banegunnë' ta yexi'idze'ro benë' bi re'en ina di'idza' binaca xti'idza'ro.

<sup>11</sup> Tuzi Bichi Be quie Diuzi ru'enë' laze banegunnë' quie quiero según ca re'en Diuzi gaca quiero.

*Ba'ala'cazi netza' quie tu turo, yuguluro nacalëro Cristo tuze*

12 Ba'ala'cazi tuzi naca cuerpo quiero, pero naya'n zè cue!. Cana' nacaré quie ra'o ben' nao xneza Jesús.

13 La'achi ben' Israel, la'achi ben' tula, la'achi ben' zu lao xa'ne, la'achi ben' bizu zu lao xa'ne, con nutezi, nacalëro Cristo tuzi. Naca quiero ca quie tuzi benë' nun quie yugulutero yu'uro Bichi Be quie Diuzi. Tuzi Bichi Be quie Diuzi zu. Lao na'a Bichi Be quie Diuzi nacaro tuze len lëbë'.

14 Naya' cuerpo quiero zè cue!, cala tu cue'zin.

15 Inaro chi ni'aro inën inan: “Dan' binaca' na'alo!, bineya'a naca' cuerpo quio!” Ba'ala'cazi ina ni'aro cana', neya'cazin de cuerpo quiero.

16 Lëzirë inaro chi nagaro inën inan: “Dan' binaca' laolo!, bineya'a naca' cuerpo quio!” Ba'ala'cazi ina nagaro cana', neya'cazin de cuerpo quiero.

17 ¿Bizi huero yero chi naca cuerpo quiero tulizi laoro? ¿Bizi huero ilë'ero chi naca cuerpo quiero tulizi nagaro?

18 Pero Diuzi bzalonë'n bë'në'n quie quien según ca re'ennë'.

19 Chi tu cue'zin naca cuerpo quiero, gabi de huenan.

20 Lëscan' ba'ala'cazi naya' cuerpo quiero zè cue!, pero nacacazin tuzi.

21 Laoro bisaque! yëbin na'aro: “Birquinda' luë!” Lëzi guichoro bisaque! yëbin ni'aro: “Birquinda' luë!”

22 Na' bizi tu ta neya' cuerpo quiero nacan yun'la'adyi!, nacaran belao para cuerpo quiero.

23 Dan' nacan yun'la'adyi! naya' cuerpo quiero, gapachi'ron dyë'ëdi. Dan' nacan ta biilë'ë benë' naya' cuerpo quiero, utacaron la'ari'.

24 Pero biutacaro la'ari' nu guichoro nu laoro, como dan' nacan ta ilë'ë benë!. Cana' ta naya' cuerpo quiero nacan yun'la'adyi!, lëparte na' nacaran tabelao para cuerpo quiero. Cana' bë Diuzi bzalonë' ra'o

25 tacuenda gaca tahuen quie cuerpo quiero, ta bigata' zëdi quie yaca ta naya' cuerpo quiero. Yuguluro ben' nao xneza Jesús, nacaro ca quie cuerpo quie Cristo dza rdaro lao yedyi layu.

26 Tana' lena' chi tu parte ta naya' cuerpo quie Cristo redzagalaona, lëzirë yedzagalaorë yugulu ta naya' cuerpo quie Cristo. Lëscan' chi tu parte ta naya' cuerpo quie Cristo nacan dya'a, lëlena' nacan dya'a quie yugulute ta naya' cuerpo quie Cristo.

27 Tahuen para ra'o nacan con baonia' le'e. Bizi na'a ta re'enda' inia' le'e nacaro ca quie cuerpo quie Cristo. Quie tu ra'o nacaro ca quie ta naya' cuerpo quie Cristo.

28 Tana' lena' ulio Diuzi ra'o, ben' nao xneza Jesús, ta huero zè cue' dyin quienë' ca re'ennë' huero. Tanëro ulioquë' ben' naca yaca apóstol. Taorupe ulioquë' yaca ben' rguixogue' benë' di'idza' la'iya quienë!. Taoyune ulioquë' ben' ruzioñe'e laguedyi di'idza' la'iya quienë!. Taodape ulioquë' ben' rue yela' huaca quienë!. Na' ulioquë' ben' reyue ben' raca zhue!. Na' ulioquë' ben' racalë laguedyi. Na' ulioquë' ben' rudze' ni'a xnezi. Na' ulioquë' ben' raca inë di'idza' binaca xti'idza'yaquë'.

29 Cala yuguluro nacaro apóstol. Cala yuguluro nacaro ben' rguixogue' benë' di'idza' la'iya quie Diuzi. Cala yuguluro nacaro ben' ruzioñe'e laguedyi di'idza' la'iya quie Diuzi. Cala yuguluro ruero yela' huaca quienë'.

30 Cala yuguluro reyero ben' raca zhue!. Cala yuguluro racaro inëro di'idza' binaca xti'idza'ro. Cala yuguluro racaro yexi'idze'ro yaca benë' bi re'en ina di'idza' binaca xti'idza'ro.

31 Reya'ala' gue'enro gun Diuzi tadya'ara quiero. Pues ca rua' në'ëdi!, re'enda' uzioñe'era' le'e tu ta nacara dya'a para le'e.

## 13

*Reya'ala' idyë'ëro laquedyiro*

<sup>1</sup> Na'ra nia' le'e, ba'ala'cazi raca' yugulu di'idza' de lao yedyi layu, ba'ala'cazi raca' inia' di'idza' ca di'idza' raca yaca ángel, pero chi binedyë'ëda' yaca benë', bibi zaca' ca ta raca' lao Diuzi. Naca' ca quie tu instrumento birgüedyin lëbi.

<sup>2</sup> Ba'ala'cazi rguixogui'a benë' di'idza' la'iya quie Diuzi, ba'ala'cazi rioñe'eda' yugulu ta nacan zëdi tziñoñe'ero, ba'ala'cazi nezda' yugulu bi ta raca lao yedyi layu, ba'ala'cazi tanto raleda' quie Diuzi, huaca inia' ga zu tu ya'a ta tziön igu'unnan tzala'la, pero chi binedyë'ëda' yaca benë', bibi zaca' lao Diuzi.

<sup>3</sup> Ba'ala'cazi rguisiria' bi ta de quia' ru'a yaca ben' yëchi', ba'ala'cazi usedyina' cuerpo quia' ta uzei yaca ben' rudie në'ëdi', pero chi binedyë'ëda' yaca benë', bibi gan de bia' lao Diuzi.

<sup>4</sup> Chi nedyë'ëro yaca benë', nacaro ben' zela'adyi', nacaro ben' huen. Binacaro ben' zë', binacaro ben' huexa'a, ben' rue ze cuine.

<sup>5</sup> Chi nedyë'ëro yaca benë', biulidzaroyaquë' di'idza' lë'ë, biulidzaroyaquë' di'idza' xa'a. Chi nedyë'ëro yaca benë', quiloros modo para bi huero para gacalëroyaquë', biidza'ziroyaquë', biudze'la'adyi'royaquë'.

<sup>6</sup> Chi nedyë'ëro yaca benë', biyedaohuero chi bi tu xquia bëyaquë'. Chi bëyaquë' tahuen, caora na' yedaohuero.

<sup>7</sup> Chi nedyë'ëro yaca benë', yezi'zero quieyaquë', yezudyi'ilëroyaquë' hue'lëroyaquë' di'idza' zela'adyi'.

<sup>8</sup> Chi tali nedyë'ëro yaca benë', biusanro idyë'ëroyaquë'. Hueyudyi huedu bira quixogue'ro benë' di'idza' la'iya quie Diuzi. Hueyudyi huedu bira inëro di'idza' binaca xti'idza'ro. Hueyudyi huedu quie yela' rioñe'e quie yaca benë'. Pero cala hueyudyi huedu idyë'ëro yaca benë'.

<sup>9</sup> Baoyoñe'ero ga'acaga ca tu ta baoyoñe'ero. Lëzi cana'rë baoyoñe'erëro ga'acaga ca naca di'idza' quie Diuzi ta rguixogue'ro benë'.

<sup>10</sup> Pero cati idyin dza yeguida Cristo, ben' rioñe'e yugulute, caora na' yeyudyi yedu tziñoñe'ero ga'acaga, na'tera tziñoñe'ero yugulu ca re'en Diuzi tziñoñe'ero.

<sup>11</sup> Bizi në'ëdi', caora guca' xcuidi' unia' ca rnë xcuidi', bia' pensari ca pensari quie xcuidi'. Pero caora uya'a guca' bi' huaca, hora na' bira bia' pensari quie xquidi', bia' pensari quie ben' huaca.

<sup>12</sup> Naca quiero ca quie ben' rna' yaohuan naca besu, birulu'en dyë'ëdi, pero huadyin dza ulu'en dyë'ëdi, na' ilé'ëro tal cabë' nacan. Nubë'da' ga'acaga ca naca bi cosa, pero huadyin dza cati huebë'da' yuguten tal cabë' nuebë' Diuzi në'ëdi'.

<sup>13</sup> Quie lena' naca tzona ta biyeyudyi yedu quie. Biyeyudyi yedu zudyi'ilëro Diuzi, biyeyudyi yedu rbezaro dza tzioro tzasulëro lëbë', biyeyudyi yedu nedyë'ë Diuzi ra'o. Lao yuna cue' nacaran belao ta nedyë'ë Diuzi ra'o.

## 14

*Biruguinte inëro di'idza' binaca xti'idza'ro*

<sup>1</sup> Huele baiguin idyë'ële benë'. Lëzirë huele baiguin inaole huele con ca banegun Diuzi tu tule. Rueten baiguin quixogue'le benë' di'idza' la'iya quie Diuzi.

<sup>2</sup> Chi inële di'idza' binaca xti'idza'le, tuzi Diuzi nezinë' bi nale, dan' bisaque' tziñoñe'e yaca benë' tula, yaca ben' biraca di'idza' ca di'idza' rnële. Chi inële di'idza' binaca xti'idza'le, conlë Diuzizi hue'lële di'idza', cala conlë benë', dan' birioñe'eyaquë' ca rnële.



<sup>3</sup> Pero chi le'e quixogue'le benë' xti'idza' Diuzi, lena' nacan ta tzioñe'eyaqué' yedaohueyaqué' inaoyaqué' xneza Jesús. Cana' yeyuezeleyaqué'.

<sup>4</sup> Lëzi chi inële di'idza' binaca xti'idza'le, lena' gacalën le'ezi ta inaorale xneza Jesús. Pero chi quixogue'le benë' di'idza' la'iya quie Diuzi, cana' gacalële yaca los demás ben' bichiro ta inaorayaqué' mazara xneza Jesús.

<sup>5</sup> Ca ta re'enda', re'enda' yugulutele inële di'idza' binaca xti'idza'le. Pero ta re'enda' mazara, re'enda' quixogue'le yaca benë' xti'idza' Diuzi. Nacaran tabelaora quixogue'le benë' xti'idza' Diuzi, cala ca ta inële di'idza' binaca xti'idza'le. Rnia' le'e can' dan' chi bizu ben' yexi'idze' le'e bi re'en ina di'idza' rnële, quie lena' bigacalen yaca ben' bichiro ta inaorayaqué' mazara xneza Jesús.

<sup>6</sup> Tana' lena' bicha', chi cati guida' idena'a le'e, chi inia' le'e conlë di'idza' binaca xti'idza'ro, lëlena' bigacalën le'e. Pero chi inia' le'e conlë di'idza' naca xti'idza'ro, chi usëdia' le'e xti'idza' Diuzi, lëlena' gacalën le'e.

<sup>7</sup> Cabë' quie yaca instrumento rruedyi ben' huecuedyi, como nu flauta, como nu harpa, chi biucuedyiaqué'n tu lëbi, biyu'u ni'a xnezi ta ru-cuedyiaqué', bineziro bi pieza pcuedyiaqué'.

<sup>8</sup> Lëzirë quie yaca soldado, bë' sulaoyaqué' huedila, chi biucuedyiaqué' corneta xláton, bibi puesto suyaqué' para tilayaqué'.

<sup>9</sup> Cana' nacarë quiero. Chi inëro di'idza' biraca ben' ruzënaga quiero, bisaque' tzioñe'eyaqué'. Naca quiero ca quie ben' rnë cuinze.

<sup>10</sup> Tali na' naca zë cue' di'idza' de lao yedyi layu. Lëscan' tali na' yugulun de ga yu'un ni'a xnezi tacuenda tzioñe'eron.

<sup>11</sup> Chi nu ben' inë në'ëdi' di'idza' quienë' ta binaca di'idza' quia', bitzioñe'eda'n. Naca quia' len lëbë' cabë' ben' za' yedyi tula.

<sup>12</sup> Quie lena' huele baiguin ta huele ca ta banegun Diuzi le'e. Huele baiguin ta gata' entre le'e zë ben' gacalë laguedyi ben' bichiro ta inaorayaqué' mazara xneza Jesús.

<sup>13</sup> Tana' lena' chi inëro di'idza' binaca xti'idza'ro, reya'ala' inabaro Diuzi gunnë' quiero ta uzioñe'ero benë' bi re'en ina di'idza' rnëro.

<sup>14</sup> Caora ru'elia' Diuzi di'idza' binaca xti'idza', bisaque' tzioñe'e yaca ben' uzënaga quia'. Lena' nacan ca quie ben' ru'elë Diuzi di'idza' lu'u guicho laxta'ozí.

<sup>15</sup> ¿Cabizi reya'ala' huero? Nacan huen hue'lëro Diuzi di'idza' binaca xti'idza'ro, pero nacalan huen hue'lëro Diuzi di'idza' naca xti'idza'ro tacuenda tzioñe'e yaca benë' bi re'en ina di'idza' rnëro. Nacan huen gularo himnos conlë di'idza' binaca xti'idza'ro, pero lëzi nacalan huen gularo himnos conlë di'idza' naca xti'idza'ro.

<sup>16</sup> Cana' reya'ala' huero, porque chi hue'lëro Diuzi puro di'idza' binaca xti'idza'ro, bitzioñe'e ben' ruzënaga quiero bi naro. Bisaque' nu hue ra'o tuze para ulidzaro Diuzi yëbiroguë' xcalelo'.

<sup>17</sup> Ba'ala'cazi nacan tahuen ta yëbiro Diuzi xcalelo', pero para yaca ben' bichiro, chi yëbiro Diuzi di'idza' binaca xti'idza'ro, bitzioñe'eyaqué'. Tana' lena' biracalëroyaqué' ca reya'ala' gacalëroyaqué' ta inaorayaqué' mazara xneza Jesús.

<sup>18</sup> Rëpa' Diuzi diuxcalelo' dan' racaria' inia' di'idza' binaca di'idza' quia' mazara ca le'e.

<sup>19</sup> Pero ga regu'udi'ro rsëdiro di'idza' la'iya quie Diuzi, rexerada' inia' ga'yo' di'idza' ta tzioñe'e yaca benë', cala ca ta inia' chi mila di'idza' binaca di'idza' quieyaqué'.

<sup>20</sup> Bicha', bitzu'ule pensari quie xcuidi'. Pero uletzu'u pensari quie ben' huaca ta bihuele con ganzi. Rnia' ta reya'ala' huele, huele ca quie xcuidi' binenezi neza mala.

<sup>21</sup> Lu'u libro yu'u ley una Diuzi cani: "Huase'ela' tu ben' yedyi tula, ben' rnë di'idza' tula, ta quixogue'në' yaca benë' ta ineziyaquë' cabë' reya'ala' huejë' inaojë' xneza', pero bihueyaquë' lëbë' casa." Cana' una Diuzi.

<sup>22</sup> Caora inaro di'idza' binaca xti'idza'ro, lena' nacan ca quie seña ta ulu'en quie yaca ben' binao xneza Jesús ca naca yela' huaca quie Diuzi. Binacan ta ulu'en quie yaca ben' nao xneza Jesús. Pero caora quixogue'ro di'idza' la'iya quie Diuzi, lena' nacan seña ta ulu'en quie yaca ben' nao xneza Jesús, binacan ta ulu'en quie yaca ben' binao xneza Jesús.

<sup>23</sup> Bizi con ga regu'udi'ro, chi yuguluro inëro di'idza' binaca xti'idza'ro, chi guidarë yaca ben' binao xneza Jesús ta uzënegayaquë', ¿cala huanayaquë' ra'o nacaro ben' raca loco?

<sup>24</sup> Pero chi ga regu'udi'ro rguixogue'ro di'idza' la'iya quie Diuzi, chi guidarë yaca ben' binao xneza Jesús ta uzënegayaquë', huacabë'yaquë' napajë' dula' xquia. Cana' hueyu'uyaquë' pensari bë' yeyaquë' xti'idza' Diuzi rguixogue'ro.

<sup>25</sup> Cana' ulu'en quieyaquë' yu'uyaquë' pensari median lu'u laxta'oyaquë'. Cana' quitzo žibiyaquë' ta ulidzayaquë' Diuzi inabayaquë' yela' huenitlao. Cana' ineziyaquë' nacan tali zulë Diuzi ra'o.

### *Gan' regu'udi'ro reya'ala' huero puro ta yu'u ni'a xnezi*

<sup>26</sup> Ta re'enda' inia' le'e, bicha', nacan cani: Gan' yegu'udi'le, reya'ala' gacalële yaca ben' bichiro, ben' nao xneza Jesús ta inaorayaquë' mazarayaquë' xneza Jesús. Reya'ala' gulale alabanza. Reya'ala' usëdileyaquë' xti'idza' Diuzi. Reya'ala' uzioñe'eleyaquë' quie Diuzi. Hue'ennan inële di'idza' binaca xti'idza'le, pero reya'ala' yexi'idze'leyaquë' bi re'en ina di'idza' inële.

<sup>27</sup> Caora inële di'idza' binaca xti'idza'le, reya'ala' inë chopale o tzonazile. Reya'ala' inë tu huio tu huiole. Lëzi reya'ala' itule yexi'idze'le bi re'en ina di'idza' rnële.

<sup>28</sup> Chi bizu ben' yexi'idze' le'e bi re'en ina di'idza' rnële, nacalan huen biinële di'idza' binaca xti'idza'le gan' yegu'udi'le hue'lële Diuzi di'idza'. Nacalan huen hue'lële Diuzi di'idza' lu'u guicho laxta'ozile.

<sup>29</sup> Lëzirë caora quixogue'le yaca benë' di'idza' la'iya quie Diuzi gan' regu'udi'le, reya'ala' inë chopale o tzonazile. Reya'ala' uzënaga ben' rzënaga dyë'di, na' hueyaquë' pensari chi rnëyaquë' tuzi ca naca xti'idza' Diuzi.

<sup>30</sup> Pero chi udze' Diuzi tu di'idza' lu'u laxta'o tu ben' re' ga regu'udi'le, chi re'en Diuzi inë ben' na' ca di'idza' bdze'në', na'ra chi zë itu ben' rnë'në', reya'ala' cue' ben' rnë tanëro tacuenda inë ben' taorupe, ben' udze' Diuzi di'idza' lu'u laxta'ohue.

<sup>31</sup> Cana' reya'ala' huele, reya'ala' inële tu huio tu huiole tacuenda tzioñe'e yaca los demás ben' bichiro. Cana' yedaohueyaquë' hue quieyaquë' xti'idza' Diuzi.

<sup>32</sup> Caora rguixogue'le yaca benë' di'idza' la'iya quie Diuzi, reya'ala' quixogue'leyaquë' de gaxo gula.

<sup>33</sup> Cana' reya'ala' huele dan' naca Diuzi ben' rue ta yu'u ni'a xnezi. Biraxe Diuzi huero con ganzi.

Reya'ala' huele cabë' rue yaca los demás ben' bichiro, ben' nao xneza Jesús con gatezi regu'udi'yaquë'.

34 Bireya'ala' cuialao nigula inënë' con ca be'mbyu gan' yegu'udi'le ulidzale Diuzi. Nacan cuenda quie be'mbyu cuialaohuë' inënë' gan' yegu'udi'le, bicuialao nigula inënë'. Cana' na ley yu'u lu'u libro quie Diuzi.

35 Chi nu nigula re'ennë' inezinë' bi re'en ina di'idza' ina ja benë' gan' yegu'udi'le, reya'ala' inabanë' xquiunë' zan yu'u quienë', dan' binacan cuenda quie nigula ta cuialaonë' inënë' con ca be'mbyu gan' yegu'udi'le ulidzale Diuzi.

36 Bihuele pensari conlë le'ezi uzulao Diuzi udixogue' benë' xti'idzë'. Bihuele pensari tuzi le'ezi nezile quie xti'idza' Diuzi.

37 Chi nu bala le'e raquele banegun Diuzi quiele ta quixogue'le benë' di'idza' la'iya quienë', o chi raquele conlë Bichi Ñe quie Diuzi rnële, reya'ala' hue quiele con cabë' rna di'idza' bzua' lë'ë guichi ni, porque nacan mandado quie Cristo.

38 Chi nu ben' bire'en hue quie con cabë' rna di'idza' bzua' lë'ë guichi niga, bihuele casa quienë'.

39 Cani nia' le'e ben' bicha': Reya'ala' quixogue'le benë' di'idza' la'iya quie Diuzi. Lëzi nia' le'e biuzegadyile quie ben' inë di'idza' binaca xti'idza'yaquë'.

40 Yugulute con ca ruele, huele ta yu'u ni'a xnezi, bihuele con ganzi.

## 15

### *Cabë' guca guti beban Cristo*

1 Na'ra ben' bicha', re'enda' yeza'la'adyi'le con cabë' rna xti'idza' Diuzi udixogui'a le'e dza na'. Lëdi'idza' na' gulele quien dza na' nenaolen du guicho du la'adyi'le.

2 Tanun quie bagulele quie di'idza' baonia' le'e dza na', banacale ben' de yela' neban quie tuzioli chi rue quiele xti'idza' Diuzi inaolen du guicho du la'adyi'le, binaolen con ganzi.

3 Tanëro udixogui'a le'e ta naca belao, ta binenezile. Udixogui'a le'e con cabë' una Cristo në'ëdi', con cabë' guca quienë' gutinë' lë'ë yaga cruzo ta yezi dula' xquia quiero. Cana' rnën lë'ë guichi la'iya quie Diuzi.

4 Beyudyi gutinë', na'ra pcachi'yaquë' lëbë'. Pero guca lao tzona dza bebannë' tatula con cabë' rnën lë'ë guichi la'iya quie Diuzi.

5 Tanëro ptilalaonë' Pedro. Ude na' ptilalaonë' yaca los demás apóstoles.

6 Lëzirë ptilalaorënë' lao ga'yo' gayuhua yaca ben' bichiro. Neneban ibalajë', na' ibalajë' baguti.

7 Ude beyudyi na' ptilalaorënë' Santiago len lao yugulu yaca ben' pse'elë' ta tzetixogue'yaquë' benë' di'idza' la'iya quienë'.

8 Ga zelao ptilalaohuë' leyaquë', na'ra ptilalaorënë' në'ëdi'. Pero tu binetialalaonë' në'ëdi', bia' zëdi gula, bigu'unda' inaohua xnezë'. Cana' guca quia' ca quie bdao' zaralo, pero zëdi gula.

9 Entre yaca apóstol tuza' në'ëdi' psaca' ben' nao xneza Jesús bizinaquezi dza na'tela. Lëlena' ni lë'ëti' bibi zaca' ulio Diuzi në'ëdi' naca' apóstol quienë'.

10 Pero nacacaza' ca naca' conlë Diuzi, dan' naca Diuzi ben' huen, beyëchi'la'adyi'në' në'ëdi'. Ca ta bëlë Diuzi në'ëdi', biuden cana'zi. Babëria' dyin quie Diuzi cala ca yaca los demás ben' rguixogue' di'idza' la'iya quienë'. Cala nia' cuinza' bia' dyin quie Diuzi. Gucalëcazi Diuzi në'ëdi' dan' naquë' ben' ze beyëchi'la'adyi'në' në'ëdi'.

11 Cala bihuen chi në'ëdi', chi ben' tula, baodixogue'ndo' le'e di'idza' la'iya quie Diuzi. Ta naca belao ra udixogue'ndo' le'e xti'idzë', na' agulele.

*Naca tali yeban yaca ben' baguti*

12 Chi nêto' rdando' rguixogue'ndo' yaca benë' de que guti beban Cristo ¿na'a bixquien' balale rnae bira yeban yaca ben' baguti?

13 Porque chi nacan tali bira yeban yaca ben' baguti, bisaque' inando' beban Cristo.

14 Chi nacan tali guti Cristo bibebannë', bisaque' inando' zaca' di'idza' quie Diuzi rguixogue'ndo' yaca benë', lêzi bisaque' inando' zaca' inaole xnezë'.

15 Chi nacan tali guti Cristo bibebannë', chi nacan tali biyeseban Diuzi yaca ben' aguti yaca, chi nacan cana', yë' rzi'ndo' benë' rguixogue'ndo'yaquë' beseban Diuzi Cristo.

16 Chi nacan tali biyeseban Diuzi yaca benë' baguti, bisaque' inando' besebannë' Cristo.

17 Chi nacan tali bibeban Cristo, bisaque' inando' zaca' inaole xnezë', lêzi bisaque' inando' bira nao dula' xquia quiele le'e.

18 Chi nacan tali cana', lëscan' bisaque' inando' huazi' Diuzi yaca ben' nao xnezë' caora gatiyaquë'.

19 Ca bayëchi' gula nacan quiero, chi nacan tali dza rdaro na'azi lao yedyi layu zaca' inaoro xneza Cristo, pero bibi zaca'n unaoro xneza Cristo caora gatiro.

20 Pero nacan tali beban Cristo. Cana' ineziro yebanro ra'o len yaca los demás ben' nao xnezanë'. Ba'ala'cazi chi bagutiro, neziro huadyin dza useban Diuzi ra'o. Na'ra para tuzioli bira gatiro tatula.

21 Dyin quie tu ben' uzu tiempote rati yaca benë'. Pero dyin quie ben' use'ela' Diuzi lao yedyi layu yeban yaca ben' guti.

22 Gatiro yugulutero tanun quie dan' nacaro zì'isuba Adán. Pero yeseban Diuzi ra'o, ben' nao xneza Cristo, tanun quie dan' nacalëro Cristo tuže.

23 Pero según ca re'en Diuzi gaca, cana' huenë' quie quiero. Tanëro psebannë' Cristo ta ulu'enë' ra'o cabë' gaca quiero. Lêzi cana'rë useban Diuzi ra'o, ben' nao xneza Cristo, cati yeguida Cristo tatula lao yedyi layu.

24 Te yeyudyi gaca can', na'ra yeyudyi quie lao yedyi layu. Lêcaora na' udyiaguü' Cristo yugulu ben' rnabë', ben' bë condre lëbë'. Lêzirë te yeyudyi gaca can', tzesan Cristo yela' rnabë' quienë' uca'nnë'n lao na'a Xuzinë' Diuzi.

25 Pero rnabë'cazi Cristo hasta bënë' gan paxonë' yugulute ben' rudie lëbë'.

26 Ze'lao na' hue Cristo mandado yeyudyi yedu quie yela' guti tuzioli.

27 Mandado bë Diuzi inabë' Cristo lao yugulute. Cana' rnën lë'ë guichi la'iya quie Diuzi. Pero ba'ala'cazi rnën de que inabë' Cristo lao yugulute, bireya'ala' tziõñe'ero de que inabë' Cristo lao cuin Diuzi, dan' cuin Diuzi bënë' mandado inabë' Cristo.

28 Te yeyudyi bega'n yugulute lao na'a Cristo, na'tera usedyinnë' cuinnë' lao na'a Xuzinë' Diuzi, ben' bë mandado inabë'në' lao yugulute. Cana' hue Cristo uca'nnë' yugulute ta de lao na'a Xuzinë' Diuzi. Cana' gaca Diuzi ben' zera, ben' inabë'ra.

29 Lêzi nita' bala ben' ru'e lao yaca ben' neban rnayaquë' cana' re'ennan ta yeban yaca ben' baguti. ¿Bixquien' rueyaquë' cana'? Chi birbezayaquë' yeban yaca ben' baguti, ¿ga huen dyin ru'eyaquë' lao ben' neban por nun quie ben' baguti?

30 ¿Bixquien' yugu dza ruen žudyi guti benë' nêto'?

31 Rnia' le'e, ben' bicha', yugu dza barbeza' guti yaca benë' në'ëdi'. Nacan tali raca quia' cana' tal como nacan tali napa' gusto dan' banacale ben' nao xneza Jesucristo.

32 Pues në'ëdi' cabë' nia' le'e ga uya'a ciudad Efeso dza na', bedza-galaotzeguia' dula' quie yaca ben' rue ca rue lobo. Pero ¿biži gan de bia'

lao Diuzi chi nacan tali biyeban yaca ben' baguti? Chi nacan tali biyeban yaca ben' baguti, mejorla huero con cabè' una yaca ben' unè: "Gaocalaro yo'ocalaro, porque la'achi uxe, la'achi huidzo, ratiro."

33 Bitzioguele yè'. Nacan tali con cabè' rna yaca benè': "Unitiro neza dya'a quiero chi inaoero yaca ben' rue tamedian."

34 Ulehue pensari inaole neza dya'a. Biiquixile huele tamedian. Balale le'e binenezile ca naca Diuzi. Rnia' le'e can' ta yedue'le.

### *Ca gaca yeban yaca ben' baguti*

35 Nita'cazi yaca ben' inaba nēto' inayaquè': "¿Cabizi gaca yeban yaca ben' huati?" Lèzirè inayaquè': "¿Cabizi gaca quie cuerpo quie yaca ben' huati?"

36 Di'idza' tondo rnayaquè' inayaquè' cana'. Bineziyaquè' ca raca quie nu ben' raza bini. Decazide yeyu'udzo' bini ta ilè yaga quien yezun lao laza bini.

37 Ta razayaquè', razayaquè' bini ta itinín gacan nicuan. Cala binacan nu nicuan razayaquè', la'acazi bini trigo, la'acazi birla bini tula.

38 Bizì Diuzi hue'nè' laze quie quie yaca bini ta ilèyacan según ca naca yaca bini.

39 Cala tu lèbizi naca cuerpo quie benè' len cuerpo quie yaca bia guixi'. Netza'la cuerpo quiero. Netza'la cuerpo quie yaca bia dya' tapa ni'e. Netza'la cuerpo quie yaca bia xile. Netza'la cuerpo quie yaca bela.

40 Taže netza' ta dya' guibá len ta de lao yedyi layu. Netza' yela' baqitu quienan quie quienan.

41 Taže netza' xni' obidza. Taže netza' xni' biu'. Taže netza' xni' bélo. Lèzi entre yaca bélo dya' guibá, netza' yaca xni' quie quien.

42 Cana' nacaré quie yaca ben' huati yeban yaca. Caora bagutiro, na'ra bayu'u cuerpo quiero lu'u yu ta gu'udzona. Pero caora useban Diuzi ra'o, tuzioli bira gatiro.

43 Ra'o rudze'ro lu'u yu tu ta naca gula. Pero Diuzi usebannè' tu ta naca cubi. Ra'o rudze'ro lu'u yu tu ta bira de yela' neban quie. Pero Diuzi usebannè' tu ta gata' yela' neban quie tuzioli.

44 Ra'o udze'ro lu'u yu tu ta baguti. Pero Diuzi usebannè' tu ta bira gati tuzioli. Ca bzalo Diuzi cuerpo quie ben' gati, lèzi bzaloguè' cuerpo quie ben' bira gati tuzioli.

45 Rnèn lè'è guichi la'ya quie Diuzi cani: "Adán, ben' bzalo Diuzi tanèro, bè' Diuzi lèbè' yela' naban quienè'." Cana' rna lè'è guichi. Pero Cristo, ben' use'ela' Diuzi, bèranè' tadya'ara cala ca Adán. Lao na'a Cristo decazi yela' naban quiero biyeyudyi yedu quie.

46 Tanèro de yela' neban quiero, pero hueyudyi huedu quien dza gatiro. Na'tera gata' yela' neban quiero, pero bira yeyudyi yedu quien.

47 Ben' bzalo Diuzi tanèro bèguè' lèbè' de yu. Guquè' ben' de lao yedyi layu. Pero Cristo, ben' use'ela' Diuzi, naquè' ben' za' de lao guibáte.

48 Cabè' guca Adán guquè' de yu, gucacazè' de lao yedyi layu, cana' nacaré quie yaca ben' rda lao yedyi layu. Pero ra'o, ben' nao xneza Cristo, huacaré quiero ca naca Cristo, ben' za' de lao guibáte.

49 Como nacaré quiero ben' bzalo Diuzi bèguè' de yu, lèzirè gacaré quiero ca quie Cristo, ben' za' de lao guibáte.

50 Re'enda' inia' le'e, ben' bicha', de que conlè cuerpo quiero nacan de yu, bisaque' yeyoro ga zu Diuzi guibá. Bisaque' uquixiro ta biru'udzo len ta ru'udzo.

51 Re'enda' inezile tu ta binezile. Cala yuguluro gati, pero yugulutero huetza'ro.

<sup>52</sup> Tu sasazi yetza' cuerpo quiero cati ze'lao yero ucuedyi ángel trompeta. Lëcaora na' yeseban Diuzi yaca ben' baguti ta bira gaticaziyaquë' tuzioli. Lëzi caora na' yetza'rë Diuzi cuerpo quiero.

<sup>53</sup> Yetza' Diuzi pensari median quiero ta yeyudyi yedu quie, ta yeyu'uro pensari dya'a ca pensari quie Diuzi ta bira yeyudyi yedu quie. Lëzi yetza' Diuzi cuerpo quiero hueyacan cuerpo bira cuiagui'n tuzioli.

<sup>54</sup> Cati abeyu'uro pensari dya'a ca pensari quie Diuzi ta bira yeyudyi yedu quie, lëzi cati abetza' Diuzi cuerpo quiero beyacan cuerpo bira cuiagui'n tuzioli, lëcaora na' uzun di'idza' con cabë' rnën le'e guichi la'iya quie Diuzi cani: "Birabi yela' guti gata'.

<sup>55</sup> Bira hue yela' guti gan gatiro. Bira sue yela' guti quiero udyiagui'n ra'o." Cana' rnën lë'ë guichi la'iya quie Diuzi.

<sup>56</sup> Rudyiagui' yela' guti yaca benë' por nun dan' rueyaquë' tamedian. Lëzi con cabë' rna ley udxu Diuzi tiempote, lena' raona yaca benë' xquia.

<sup>57</sup> Pues diuxcale Diuzi, porque dan' lao na'a ži'inë' Jesucristo, bapte pselanë' ra'o quie dula' xquia quiero, bira inaona ra'o.

<sup>58</sup> Lena' nia' le'e, ben' bicha', ulenao xneza Cristo du guicho du la'adyi'le, biyehuëdile. Ulehue dyin quie Diuzi yugo dza. Biusanle dyin na', porque dyë'ëdi nezile biten cana'zi ca dyin huelële Cristo.

## 16

*Ni nan ga ptupayaquë' dumi ta gacalëyaquë' yaca ben' bichiyaquë', ben' nao xneza Jesús*

<sup>1</sup> Bizi na'a rnia' le'e, reya'ala' utupale dumi ta gacalële yaca ben' bichile, ben' nao xneza Jesús. Reya'ala' huele con cabë' baonia' yaca ben' nita' yaca ciudad nebaba Galacia, yaca ben' naorë xneza Jesús.

<sup>2</sup> Yugu dza domingo reya'ala' utupale lë'ëti' ca tu ta babële gan quie lao tu xman. Cana' huele ta baden puesto cati guida'.

<sup>3</sup> Pues caora bazulia' le'e, ero tu chopale tzehua'ayaquë' dumi lao yaca ben' bichiro, ben' nita' ciudad Jerusalén. Hua' tu guichi ta ise'ela'lëron dumi lao na'ayaquë'.

<sup>4</sup> Lëzi chi ruezazin baiguin, huaya'lia'yaquë' ciudad Jerusalén.

*Rue Pablo pensari ta tzioguë' yaca ciudad tula*

<sup>5</sup> Tanëro re'enda' tia' yaca ciudad nebaba Macedonia, na'tera idyina' ciudad Corinto.

<sup>6</sup> Durpende huega'na' sulia' le'e chopa tzona dza, o chi huega'na' biu' ruen zaga. Na'ra chi huele cule, gacalële në'ëdi' ta guxa' quie tu neza bë' tza'a yaca ciudad tula.

<sup>7</sup> Bire'enda' tu teza' ciudad quiele, re'enda' sulia' le'e zi dza, chi Diuzi gunnë' lato.

<sup>8</sup> Lëzi cati tza'a ciudad Efeso, huega'na' na' ta cueza' te lani quie usecho quie bini trigo,

<sup>9</sup> porque de lato na' hua' dyin quie Diuzi. Raqueda' huaron dya'a chan' hua' can', ba'ala'cazi nita' yaca ben' zë, ben' rue condre në'ëdi'.

<sup>10</sup> Caora bazu Timoteo lënë' le'e, huele bayudyi tacuenda suë' gusto bidëbinë'. Pues ruerënë' dyin quie Diuzi con cabë' dyin na' rua' në'ëdi'.

<sup>11</sup> Yezi'lenë' dyë'ëdi gacalënenë' ta guxunë' quie tu neza cati guidanë' idena'në' në'ëdi', porque rbezcaza' guidanë' lënë' yaca los demás ben' bichiro, ben' nao xneza Jesús.

<sup>12</sup> Bizi ben' bichiro Apolos, lega re'enda' guidalënë' yaca ben' bichiro ta idena'yaquë' le'e, pero biuzaque' guidanë'. Huidanë' bé' tzu'unë' lato.

*Ga beyudyi rapa Pablo leyaquë' diuzi*

<sup>13</sup> Bigasiyëläle, hue quiele xti'idza' Diuzi du guicho du la'adyi'le. Bidzebile, biyehuëdile.

<sup>14</sup> Con bitezi ruele, biusanle idyë'ële benë'.

<sup>15</sup> Bicha', dyë'ëdi nezile naca familia quie Estéfanos ben' nëro, ben' betza' pensari quie, barue quieyaquë' di'idza' quie Jesús entre yaca ben' nita' yaca yedyi nebaba Acaya. Bayu'uyaquë' dyin quieyaquë' gacalëyaquë' yaca los demás ben' nao xneza Jesús.

<sup>16</sup> Re'enda' uzënegale gapala'nle leyaquë' dyë'ëdi lente nutezi yaca ben' rue dyin quie Diuzi.

<sup>17</sup> Como biuzaque' guidale, redaohueda' abla' Estéfanos, len Fortunato, len Acaico lao lazale.

<sup>18</sup> Pxela'adyi'yaquë' në'ëdi' ca uxela'adyi'le në'ëdi' chan' le'e zule niga. Zaca'yaquë' gapala'nle leyaquë'.

<sup>19</sup> Yaca ben' nao xneza Jesús, yaca ben' nita' yaca ciudad nebaba Asia, rugapayaquë' le'e diuzi. Lëzirë Aquilo len Priscila, len yaca los demás ben' regu'udi' zan yu'u quieyaquë', rugapayaquë' le'e diuzi laohue Señor quiero.

<sup>20</sup> Lëzi yugulu ben' bichiro niga, rugaparëyaquë' le'e diuzi. Ulegapa tu tule laguedyile diuzi, gaole xagayaquë' tu situ.

<sup>21</sup> Në'ëdi', Pablo, babia' letra ni lë'ë guichi conlë na'a. Lena' use'ela'n laole rgapa' le'e diuzi.

<sup>22</sup> Chi nu bala le'e binedyë'ële Señor quiero Jesucristo, ta bayëchi' gula nacan quiele. Na'ra nia' Señor quiero, naguido'.

<sup>23</sup> Rulidza' Señor quiero Jesucristo ta huela'iyänë' le'e taže.

<sup>24</sup> Rnia' le'e nedyë'ëda' le'e yugulutele laohue Cristo Jesús. Amén.

## GUICHI URUPE BË SAN PABLO APÓSTOL USE'ELA'NĒ'N LAO CIUDAD CORINTO

*Bë Pablo guichi ni use'ela'nĕ'n lao yaca ben' nao xneza Diuzi, ben' nita' ciudad Corinto*

<sup>1</sup> Nĕ'ĕdi', Pablo, naca' ben' bdĕ' Diuzi. Segun ca re'ennĕ' bdĕ'nĕ' nĕ'ĕdi' ta tza'a tzetixogui'a xti'idza' Jesucristo. Nĕ'ĕdi'lia' ben' bichiro Timoteo, bĕndo' guichi ni ta ise'ela'ndo'n lao le'e, ben' nao xneza Jesús, ben' nita' ciudad Corinto. Lĕscan' huase'ela'ndo' guichi ni lao yugu ben' nao xneza Jesús, ben' nita' yaca yedyi nebaba Acaya.

<sup>2</sup> Rulidza' Xuziro Diuzi lĕnĕ' Señor quiero Jesucristo ta huela'iyaquĕ' le'e, cuĕchiyaquĕ' chizi lu'u guicho laxta'ole.

*Ni rnĕn ca guca quie Pablo bedzagalaonĕ'*

<sup>3</sup> Rionla'adyi'ro Diuzi, ben' naca Xuzi Señor quiero Jesucristo. Lĕbĕ' naquĕ' Xuziro, ben' yeyĕchi'la'adyi' ra'o. Lĕbĕ'naquĕ' ben' ru'elĕ ra'o di'idza' zela'adyi' tuzioli.

<sup>4</sup> Con bitezi tazĕdi raca quiero, hue'lĕ Diuzi ra'o di'idza' zela'adyi' tacuenda gacaro hue' lĕrĕro ben' tula di' idza' zela'adyi' bĕ' raca tazĕdi quieĵĕ'.

<sup>5</sup> Como dan' redzagalaoro tazĕla cabĕ' ptzagalao Cristo, lĕscana' tazĕla ru'elĕnĕ' ra'o di'idza' zela'adyi'.

<sup>6</sup> Cana' raca quiendo' tacuenda hue'lĕndo' le'e di'idza' zela'adyi' yele xti'idza' Diuzi gata' yela' naban quiele tuzioli. Lĕscan' cati ru'elĕ Diuzi nĕto' di'idza' zela'adyi', lena' raca quiendo' cuenda gacalĕndo' le'e ta suele cati yedzagalaole con cabĕ' redzagalaondo'.

<sup>7</sup> Nezindo' dyĕ'ĕdi huaca tahuen quiele, como dan' cabĕ' redzagalaole por nun quie dan' naole xneza Cristo, cana'rĕ ru'elĕ Diuzi le'e di'idza' zela'adyi'.

<sup>8</sup> Bichindo', re'enndo' inezile ca tu naca tazĕdi guca quiendo' yaca yedyi nebaba Asia. Tantozi guca zĕdi gula quiendo', abedu fuerza quiendo'. Bĕndo' pensari biyudyi tazĕdi quiendo' gatindo'.

<sup>9</sup> Bĕndo' pensari hora gatindo'. Cana' guca quiendo' cuenda blu'e Diuzi nĕto' cabĕ' reya'ala' sudyi'ilĕro tuzi lĕbĕ', ben' useban ben' baguti. Bireya'ala' gaquero huazuero cuinziro.

<sup>10</sup> Bapcuasa pĕui'o Diuzi nĕto' ca tamala raca quiendo' cati beyen guti ja benĕ' nĕto'. Chi le'e rulidzale Diuzi por nĕto', nezindo' biusan Diuzi ucuasa ucu'onĕ' nĕto' mazara.

<sup>11</sup> Lĕscan' chi ja ben' zĕ rulidzajĕ' Diuzi por nĕto', lĕscana' ja ben' zĕ yĕbijĕ' Diuzi diuxcalelo' nun quie dan' ruela'iya Diuzi nĕto'.

*Udixogĕ' Pablo bi guca quienĕ' dan' biyogĕ' ciudad Corinto*

<sup>12</sup> Sundo' gusto como dan' nezindo' dyĕ'ĕdi rnaondo' tu neza la'iya rdando' du guicho du la'adyi'ndo' lao yedyi layu niga. Lĕscana' rdando' dya'a conlĕ le'e. Pues yela' ben' huen quie Diuzi gualĕnĕ' nĕto' rdando' cana', cala ta racazi la'adyi'ndo' rdando'.

<sup>13</sup> Cabĕ' naca di'idza' ta bzundo' lĕ'ĕ guichi ni, nacan puro di'idza' ta gacale ulabale, ta gacale tzioñe'ele. Rbeza' dza tzioñe'elen dyĕ'ĕdi.

<sup>14</sup> Pero hanzule gusto cabĕ' inia' le'e. Banezile cati yeguida Señor quiero Jesús, cana' le'e huazule gusto cabĕ' bĕndo' nĕto'. Lĕscan' nĕto' huazundo' gusto cabĕ' bĕle le'e.



15 Tantozi ruxela'adya' baoyoñe'ele cabè' baodixogui'a le'e, lena' bia' pensari dza na'te guida' ideyuba' le'e luegozi tacuenda gaca chopa lasa bedeyuba' le'e.

16 Cana' guqueda' tu teza' tza' Macedonia tia' ideyuba' le'e. Na'ra cati yeza' Macedonia guqueda' yedia' yeyuba' le'e tatula. Cana' gunan le'e lato gacalèle nè'èdi' ta tzu'a neza tza' estado Judea.

17 Pero como biuzaque' tia', ¿cómo raquele bibia' pensari dya'a bibida' ideyuba' le'e? ¿Cómo raquele hua' pensari cabè' pensari rue ben' nao ta rnazin quie, ben' ru'e chopa di'idza'?

18 Pero naca Diuzi testigo quiendo' de que bibè'lèndo' le'e chopa di'idza'.

19 Pues zi'i Diuzi, ben' naca Cristo, biru'enè' benè' chopa di'idza'. Lèdi'idza' quienè' rguixogue'lia' Silvano len Timoteo le'e. Nacan tali yugulu ca unè Cristo.

20 Lao na'a Cristo uzucazi Diuzi duzete di'idza' quienè' cabè' unè' huenè'. Quie lena' caora yeyuezero Diuzi, reya'ala' yèbironè' "can' gaca" tanun quie Cristo Jesús.

21 Naca Diuzi ben' gun fuerza quiero ta inaoro xneza Cristo biidzebiro biusanron. Naca Diuzi ben' bdè' ra'o gacaro ben' quienè'.

22 Lèbè' gunnè' ra'o fuerza valor nacan ca quie tu sello quiero cuenda ulu'en tali nacaro ben' quienè'. Lèbè' bdze'nè' Bichi Be quienè' lu'u guicho laxta'oro ta xela'adyi'ro gun Diuzi ra'o duzete ca unè' gunnè' ra'o.

23 Pero chi binetza'a ciudad Corinto cabè' bia' pensari dza na', rguntia' Diuzi naquè' testigo quia', cala bire'enda' tza'a. Por nun quie dan' reyèchi'la'adya' le'e biuya'a.

24 Cala re'enndo' huendo' le'e mandado zi'laza ca ta huele inaole xneza Cristo. Pues banaole xneza Cristo fuerte gula. Ca re'enndo' huendo' quiele, re'enndo' gacalèndo' le'e sule mazara gusto.

## 2

1 Quie lena' bia' pensari biguida' tatula ideyuba' le'e, porque chi guida' ideyuba' le'e, bisule gusto conlè nè'èdi' dan'ruèn zi tila' le'e.

2 Chi tanun quie dan' bida' bedeyuba' le'e bisule gusto, ¿nuzi yezu nè'èdi' gusto? Pues le'ezi huaca yezule nè'èdi' gusto, le'e ben' udila'.

3 Por nun quie lena' aose'ela' tu guichi laole dza na'te ta inezile ca naca pensari quia', porque bigu'unda' guida' ideyuba' le'e ta uzule nè'èdi' bayèchi' nun quie ca ruele. Ta nacalá mejor reya'ala' uzule nè'èdi' gusto. Chi zua' gusto, zela'adyi'ria' lente le'e huazule gusto yugulule.

4 Cati bia' guichi dza na', tantozi guqueda' bayèchi', uredya' nun quie ca ruele. Pero cala aose'ela' guichi laole ta sule bayèchi', dechan' aose'ela' guichi laole ta inezile cabè' nedyè'ètzegueda' le'e.

### *Ni rnèn cabè' reya'ala' yezi'zero quie ben' bè tamala*

5 Pero chi nun quie tu ben' zu ladole guca tu bayèchi', pues cala tuzi nè'èdi' bzunè' bayèchi', pero lèscan' bzunè' lente le'e bayèchi'. Lena' inia' le'e como dan' bire'enda' hue'lia' le'e di'idza' zè.

6 Cabè' castigo babèle ben' na' cati begu'udi'le, con lèzin aodizunè' quie xquia quienè' cabè' bènè'.

7 Na'ra mejorla yezi'zele quienè' yeyuele di'idza' zela'adyi' cuenda bira gaquenè' zi'laza biezunè' gusto nun quie raquenè' bayèchi' gula.

8 Quie lena' inia' le'e tatula, reya'ala' ulu'elenè' cabè' nedyè'èlenè'.

9 Aose'ela' guichi laole dza na' ta aodixogui'a le'e cabè' reya'ala' huele quie ben' na'. Cana' bia' le'e prueba ta inezda' chi zule dispuesto inaole huele cabè' nia'.

10 Na'ra con nu ben' si'zele con biti'tezi cabè' bènè', lèscan' nē'ēdi' huezi'zeria' quienè', porque con nutezi ben' aozi'zia' quie, aozi'zia' quienè' lao Cristo por nun quie le'e.

11 Cana' hua' cuenda bisì' xan' taxi'ibi' Satanás lato huelēnan ra'o. Aneziro dyè'ēdi cabè' nacan yela' mala quienan.

### *Biuzu Pablo gusto zunè' yedyi Troas*

12 Cati bdyina' yedyi Troas ta quixogui'a di'idza' quie Cristo, cana' guca blè'ēda' detzegue lato hua' dyin quie Cristo na'.

13 Pero biuzu guicho laxta'ohua' gusto nun quie ta bibedila' bichiro Tito. Lena' gudya' ja ben' quie Cristo nita' yedyi na' aziya'a. Na'ra beya'a yedyi nebaba Macedonia.

### *Conlè Cristo huero gan lao xan' taxi'ibi'*

14 Reya'ala' yēbiro Diuzi diuxcalelo' nun quie conlè lèbè' nuelēro Cristo Jesús tuže huero gan lao xan' taxi'ibi'. Cana' use'ela' Diuzi ra'o ta quixogue'ro benè' di'idza' quie Cristo ta huebè'jè' lèbè'. Lena' nacan ca quie tu ta rla' zixi zeo duže yedyi layu.

15 Lèscan' ra'o, nun quie nacaro ben' quie Cristo, nacaro ca quie tu ta rla' zixi zeo rdyinnan ga zu Diuzi, rdyinnan ga zu ja ben' nao xnezè', ben' yeyo guibá. Lèscan' rdyinnan ga zu ja ben' birue quie xti'idzè', ben' yeyo lao gui' gabila.

16 Quie ja ben' birue quie xti'idzè', ben' yeyo lao gui' gabila, naca di'idza' rguixogue'ro ca quie tu ta rla' bayatza gutin benè'. Pero quie ja ben' nao xnezè', ben' yeyo guibá, naca di'idza' rguixogue'ro ca quie tu ta rla' zixi zeo gunnan yela' neban tuzioli. ¿Nu gaca tziõe'e cabè' nia' niga?

17 Cala rdando' ruendo' negocio conlè di'idza' la'iya quie Diuzi cabè' rue zè ben' tula, pero nēto', como re Diuzi cabè' inaro, rdando' rguixogue'ndo' di'idza' la'iya quie Diuzi du galo cabè' reya'ala' hue ben' use'ela' Diuzi. Ruendo' cabè' reya'ala' hue ben' rue dyin quie Cristo.

## 3

### *Ni rnèn cabè' naca quiero nun quie bega'ntza'olè Diuzi ra'o tacubi*

1 Cati rnando'cana' ¿ca bi pensari ruele? ¿Ruele pensari ruendo' cuinndo' ben' ze? ¿O chi re'enle ulu'endo' le'e tu guichi ga rnèn nacando' ben' huen? ¿O chi re'enle inabando' le'e tu guichi cana' cabè' rue bala ja benè'?

2 Bihuendo' cana', como dan' le'e cuinle nacale ca quie tu guichi ga rnèn nacando' ben' huen. Con tuzi le'e, na'ra gabira guichi rdziogue. Nacale ca quie tu guichi ta bē Diuzi bzunè'n lè'è guicho laxta'ondo' cuenda ulaba yugulu benè' len inezijè' bi re'en inan.

3 Lèscan' nacale ca quie tu guichi ta bē cuin Cristo bēnnè' nēto' ta usedyinndo'n. Binacale ca quie di'idza' ta bzu benè' conlè tinta. Nacale ca quie di'idza' ta bzu Diuzi neban lao na'a Bichi Be quienè'. Binacale ca quie di'idza' ta bzu Diuzi lè'è tu yo naca tabla dza na'. Nacale ca quie di'idza' ta bzu Diuzi lè'è guicho laxta'ondo'.

4 Nacan dula'adyi'ndo' cabè' rnando' como dan' lao na'a Cristo sudyi'ilèndo' Diuzi.

5 Quele fuerza valor quiendo' cuinzindo' ruendo' ca mandado hue Diuzi nēto', dechan' lèbè' gunnè' fuerza valor quienè' ta huendo' yugulu ca ta inanè' huendo'.

6 Ulio Diuzi nēto' ta huendo' dyin quienè' nun quie dan' bega'ntza'olènè' ra'o tacubi. Cala lao na'a ley bzu Diuzi lè'è yo dza na' bega'ntza'olènè' ra'o tacubi, dechan' lao na'a Bichi Be quienè', ben' yu'u lu'u guicho laxta'oro. Ca

naca ley bzu Diuzi lè'è yo, lèley rchugulina quiero gatiro. Pero ca naca Bichi Be queie Diuzi, lèbè' gunnè' yela' neban quiero tuzioli.

<sup>7</sup> Bzu Diuzi ley quienè' lè'è yo pca'nnè'n lao na'a Moisés. Cati pca'nnè'n lao na'a Moisés, caora na' guca titi'tzegue laohuè'. Tanto guca titi'tzegue laohuè', biuzaque' ina' yaca ben' Israel laohuè'. Pero la'acazi guca titi'tzeguena, beyulacazin. Tanto nacan belao lèley na', conlè xni' quie Diuzi bdyinnan, la'acazi rchugulina quiero gatiro,

<sup>8</sup> pero mazara belaozegue naca di'idza' pca'n Bichi Be queie Diuzi para ra'o.

<sup>9</sup> Quie lena' inaro: Chi guca ley na' belao dza na', lèley na' rchugulina quiero gatiro, na'ra nacara belaozeguera lèdi'idza' rguixogue'n ra'o ca rue Diuzi zunè' dispuesto ta ilè'ènè' ra'o ben' laxta'o yèri.

<sup>10</sup> Lèley na' gucan belao dza na'te, pero biutila ley na' conlè lèdi'idza' rguixogue'n ra'o zuè' dispuesto ta ilè'ènè' ra'o ben' laxta'o yèri. Lena' nacaran belaozegue quele ca ley na'.

<sup>11</sup> Pues chi lèley na' gucan belao dza na'te, la'acazi tu chi'zi unabè'na, na'ra belaozeguera naca ta inabè' tuzioli.

<sup>12</sup> Nun quie dan' nezindo' nacan tali cabè' nando', quie lena' birdzebindo' rguixogue'ndo' xti'idza' Diuzi zaca'lao lao ja benè'.

<sup>13</sup> Biruendo' nètò' cabè' bè Moisés. Ptaconè' tu la'ari' laonè' ta biilè'è ja ben' Israel laohuè' cati beyulan bira guca titi'n, porque decazide yeyulacazin.

<sup>14</sup> Pero biuyoñe'e ben' Israel, ben' unita' dza na'. Lèscan' na'a birioñe'e ja ben' Israel cati rulabajè' lè'è guichi ga rguixogue'n quie dza bega'ntza'olè Diuzi xuzixta'ojè' tiempote. Birioñe'ejè' nun quie nechula guichojè'. Bineduba guichojè' tachula, como dan' ruen zi inaoro xneza Cristo, na' yeduban.

<sup>15</sup> Hasta lente na'a, cati rulaba ben' Israel di'idza' bzu Moisés lè'è guichi, nenechula guichojè' netza'la rioñe'ejè'n.

<sup>16</sup> Pero cati inaoro xneza Cristo, na' yeduba tachula guichoro.

<sup>17</sup> Cristo naquè' Bichi Be queie Diuzi. Nu ben' yu'u Bichi Be queie Diuzi naquè' libre.

<sup>18</sup> Quie lena' ra'o yuguluro, como abeduba tachula guichoro, nacaro ca que tu yaohuan rseni'n gui', pero gui' quie yela' bala'ana quie Cristo rseni'ro. Cana' naca quieroyedynro gacaro mazara ca naca Cristo, porque yugu dza raca quiero runnè' ra'o yela' bala'ana quienè'. Cana' rue Cristo, ben' naca Bichi Be queie Diuzi.

## 4

<sup>1</sup> Quie lena' biyeyatendo' como dan' bè Diuzi tu cule quiendo' bdè'nè' nètò' ta huendo' tu dyin quienè'.

<sup>2</sup> Bire'enndo' huendo' ta negachi' ta naca yela' stu'. Birzi'ndo' yè'. Birguixogue'ndo' ta binaca tali. Birguixogue'ndo' ta birna di'idza' la'ia quie Diuzi. Pues tuz ta naca tali rguixogue'ndo'. Quie lena' bisaque' ina ja benè' nacando' ben' mala. Ca ta ruendo', ruendo' lao Diuzi.

<sup>3</sup> Pero rna ja benè' nacan zèdi ta tzioñe'ejè' con cabè' rna di'idza' quie Diuzi rguixogue'ndo'. Rnajè' binacan quiejè' ta hue quieyaquè'n. Pero ben' gaca quie lao gui' gabila, lèjè' raquejè'n zèdi rnajè' binacan quiejè' ta hue quieyaquè'n.

<sup>4</sup> Nun quie birue quieyaquè'n, bè xan' taxi'ibi' chula guichojè' cuenda bitzioñe'ejè' con cabè' ina di'idza' la'ia quie Diuzi, como dan' lèdi'idza' na' rguixogue'n quie Cristo. Tuzi Cristo nacarè' ben' bala'ana, ben' naca Diuzi guquè' benè', blè'è yaca benè' lèbè'.

<sup>5</sup> Cati rguixogue'ndo' di'idza' la'ia quie Diuzi, quele rguixogue'ndo' ruendo' cuinndo' ben' ze, dechan' rguixogue'ndo' yaca benè' de que naca

Jesucristo Señor quiero ben' ze. Na'ra ca raca quiendo' nacando' ca ben' rue dyin zan yu'u quiele nun quie nadyë'ëndo' Jesús.

6 Naca Diuzi ben' bë mandado dza na'te ta galo gui' useni'na ga naca chula. Lëscan' naca Diuzi ben' bzioñe'e ra'o ca naca quienë' cuenda bira gaca guicho laxta'oro ca guicho laxta'o ben' rda lao lato lao chula. Cana' bënë' quiero cuenda yeyuebë'ro ca naca yela' huaca quienë'. Pues lëyela' huaca na'ruen rseni'na lao Jesús raca titi'n.

*Reya'ala' sudyi'ilëro Diuzi dza rdaro lao yedyi layu*

7 Pero tu ta naca huen gula, tu ta bzioñe'e Diuzi nëto', lena' yu'un lu'u guicho laxta'ondo'. Nacando' ca nu yeso' yu ta bide fuerza valor quie. Lena' rulu'en tali naca fuerza valor quiendo' fuerza valor quie Diuzi, cala quiendo'.

8 Ba'ala'cazi de zëdi quiendo' con gati' tezi rdando', biyela'te quiendo'. Ba'ala'cazi rdëbindo' raquendo', biyeyatendo'.

9 Ba'ala'cazi rue ja benë' nëto' bizinaquezi, biusanla'adyi' Diuzi nëto'. Ba'ala'cazi quijë' nëto' layu, bisuecazijë' gutijë' nëto'.

10 Con gati'tezi rdando' raca quiendo' cabë' guca quie Jesús re'en ja benë' gutijë' nëto'. Pero rute rusela Cristo nëto'. Lena' rulu'en zu Cristo nebannë' sëlënë' nëto', bibi raca quiendo'.

11 Pues yugu dza rdando' lao yedyi layu ruen zudyi guti ja benë' nëto' nun quie nacando' ben' quie Jesús. Cana' raca quiendo', como dan' cati bihue ja benë' gan gutijë' nëto', hualë'ë ja benë' zu Cristo racalënë' nëto'. Lente bë'ëla' zuba' quiendo' ta yeyudyi yedu quie, lena' rulu'en naca Jesús ben' run yela' neban quiendo' yugu dza.

12 Nun quie rguixogue'ndo' di'idza' la'iya quie Diuzi, ruen zudyi guti ja benë' nëto'. Pero para le'e, nun quie rguixogue'ndo' di'idza' la'iya quie Diuzi, de yela' neban quiele tuzioli.

13 Rnën lë'ë guichi la'iya quie Diuzi cani: "Rzudyi'ilia' con cabë' rna Diuzi. Quie lena' rguixogui'a ja benë' di'idza' la'iya quienë'." Lëscan' cana' naca quiendo'. Tuzcazi naca pensari quiendo' len pensari quie ben' bzu di'idza' lë'ë guichi la'iya dza na'te. Rzudyi'ilëndo' Diuzi. Quie lena' rguixogue'ndo' benë' ja di'idza' la'iya quienë'.

14 Cana' rnando' nun quie dan' nezindo' dyë'ëdi Diuzi psebannë' Jesús. Lëscana' nezindo' dyë'ëdi usebannë' ra'o nun quie dan' nacalëro Jesús tuže. Cana' yezi'në' ra'o ta tzesulëronë' guibá ga zuë'.

15 Huaca huen quiele cabë' užacando' nëto', porque cati huela'iya Diuzi ben' zë, lëscan' ben' zë gaca yëbijë' Diuzi diuxcalënë'. Cana' huejë' Diuzi ben' ze.

16 Quie lena' biyeyatendo'. Ba'ala'cazi reyudyi redu fuerza valor quie bë'ëla' zuba' quiendo', pero yugu dza rudze' Diuzi fuerza valor quienë' lu'u guicho laxta'ondo'.

17 Ca naca dza rdaro lao yedyi layu, la'acazi yedzagalaotzeguero, lë'ëti'zi raca quiero nun quie dan' cati yezi' Diuzi ra'o, caora na' yeyaca dya'a te tela laohue quiero.

18 Pues cala rzëla'adyi'ro gaca quiero ta de lao yedyi layu, dechan' tahuen hue Diuzi quiero guibá ga zunë', lena' rzëla'adyi'ro gaca quiero. Cana' huero como dan' ca naca ta de lao yedyi layu, hueyudyi huedu quien, pero ca naca tahuen hue Diuzi quiero guibá ga zunë', biyeyudyi biyedu quien.

## 5

<sup>1</sup> Naca bē'ēla' zuba' quiero ca quie tu yu'u ga zuro, pero hueyudyi huedu quien. Neziro dyē'ēdi chi aodyiaguī' bē'ēla' zuba' quiero naca ca yu'u, zu tu tacubi guibá ta biyeyudyi yedu quie. Nacan ta bē Diuzi, cala ta bē benē'.

<sup>2</sup> Tu raca nezuro lao yedyi layu, rzēla'adyi'ro usanro yedyi layu yeyoro guibá yezuro lu'u bē'ēla' zuba' cubi quiero.

<sup>3</sup> Cana' yezuro lu'u bē'ēla' zuba' cubi quiero ta iya'ro gacaro completo.

<sup>4</sup> Pero tu raca nezuro lu'u bē'ēla' zuba' gula quiero rdēbīro raquero bayēchi'. Re'enro usanro bē'ēla' zuba' gula quiero ta yezuro lu'u bē'ēla' zuba' cubi quiero cuenda yeyudyi yedu ca ta raca quiero lao yedyi layu, na' gata' tu yela' neban cubi quiero.

<sup>5</sup> Diuzi na' bzioñe'enē' ra'o ca huenē' quiero. Lēbē' bdze'nē' Bichi Be quienē' lu'u guicho laxta'oro ta xela'adyi'ro talicazi huenē' quiero ca unē' huenē' quiero.

<sup>6</sup> Quie lena' biyeyatero. Neziro tu raca nezuro lu'u bē'ēla' zuba' gula quiero, bisaque' yeyoro guibá tzasulēro Cristo.

<sup>7</sup> Rdaro rzudyi'ilēro Diuzi gacalēnē' ra'o. Rdaro rzudyi'ilēro lēbē', birdaro rzudyi'ilēro ta ilē'ēro ta raca lao yedyi layu.

<sup>8</sup> Quie lena' nuxela'adyi'ro nacalan dya'a quiero gatiro cuenda yeyoro ta sulēro Cristo ga zuē'.

<sup>9</sup> Quie lena', huero bala ta inaoro huero puro cabē' re'en Cristo, la'acazi cati nebanro, la'acazi cati bagutiro.

<sup>10</sup> Cana' reya'ala' huero como dan' decazide yuguluro tziocaziro lao Cristo ichugulinē' quiero quie quiero, quižunē' ra'o cabē' ta bēro dza rdaro lao yedyi layu, chi bēro tahuē, chi bēro tamala.

### *Bega'ntza'olē Diuzi ra'o tacubila*

<sup>11</sup> Quie lena' como dan' neziro dyē'ēdi reya'ala' yeyuezero xa'nro Diuzi, cana' ruela'adyi'tzeguendo' ta huendo' gan inao ja benē' xneza Jesús. Pero banezi Diuzi ca naca pensari quiendo'. Lēscan' le'e, re' enndo' inezirēle ca naca pensari quiendo'.

<sup>12</sup> Cala rñando' ruendo' že cuinndo', dechan' re'enndo' sule gusto cabē' ruendo' cuenda yequēbile quie nu ben' rñē' contra nēto', ben' re'en ilē'ē ja benē' lējē' ben' huen, pero bire'enjē' inezi ja benē' ca naca pensari yu'u lu'u guicho laxta'ojē'.

<sup>13</sup> Pero chi racando' luco cabē' najē', quie Diuzi na' racando' luco. Chi biracando' luco, na'ra lena' ruen huen quiele.

<sup>14</sup> Nun quie nedyē'ē Cristo ra'o, decazide huero ca mandado ruenē' ra'o huero. Pues neziro dyē'ēdi guti Cristo lē'ē yaga cruzo lao laza yuguluro. Quie lena' ilē'ē Diuzi ra'o cabē' ben' bagutirē cati guti Cristo.

<sup>15</sup> Cana' bē Cristo, gutinē' lao laza yuguluro tacuenda bira huero tuz ta yega'nnan huen quiero, pero na'ra huero tuz ta yega'nnan huen quie Cristo, ben' guti beban para ra'o.

<sup>16</sup> Tanun quie lena', bira huero pensari ca pensari rue ja ben' nita' lao yedyi layu. Pues dza na'te bēro pensari naca Cristo benē'zi ca pensari rue ja ben' nita' lao yedyi layu, pero bira ruero pensari cana'.

<sup>17</sup> Lēscan' quie lena', chi nuelēro Cristo tuže, abetza' Diuzi pensari quiero, abecubinē'n. Baode quie pensari gula quiero, babeyu'uro pensari cubi.

<sup>18</sup> Cana' bē Diuzi bega'ntza'olēnē' ra'o nun quie guti Cristo lē'ē yaga cruzo. Na'ra bdē' Diuzi nēto' ta tzetixogue'ndo' benē' de que zu Diuzi dispuesto yega'ntza'olēnē' lējē'.

<sup>19</sup> Cani inando! Por nun quie guti Cristo, bega'ntza'olë Diuzi yaca benëchi'. Quie lena' zu Diuzi dispuesto si'zenë' dula' xquia quiejë'. Ulio Diuzi nëto' ta tzetixogue'ndo' benë' cabë' bë Diuzi bega'ntza'olënë' lëjë'.

<sup>20</sup> Quie lena' bdyinndo' laole gudyindo' le'e cabë' mandado bë Cristo nëto' ta yëbindo' le'e. Nacan ca quie cuin Diuzi rnënë' rëbinë' le'e cati rnando' rëbindo' le'e. Cana' mandado quie Cristo ruendo' bë' rëbindo' le'e: Ulega'ntza'olë Diuzi.

<sup>21</sup> Ni tu bibi dula' xquia bibë Cristo. Pero por nun quiero blë'ë Diuzi lëbë' ca ben' de dula' xquia quie, bënë' lëbë' castigo lao lazaro cuenda caora nuelëro lëbë' tuze, cana' ilë'ë Diuzi ra'o ben' bide dula' xquia quie.

## 6

<sup>1</sup> Quie lena', como nacando' compañero quiele, ben' rue dyin quie Diuzi, rnabayëchi'ndo' laole bichu'unle tzala' la ca naca tahuen re'en Diuzi huenë' quiele.

<sup>2</sup> Lë'ë guichi la'iya quie Diuzi rguixogue'n ca una Diuzi cani: Huadyin dza gaca huen gula quiele, nacan dza cati yeda' ulidzale në'ëdi'. Huadyin dza ute usela' le'e, nacan dza gacalia' le'e. Cana' una Diuzi. Na'ra uzëcara nagale porque abdyin dza gaca huen quiele, abdyin dza ute usela Diuzi le'e.

<sup>3</sup> Birguilondo' zëdi len ja benë', bire'enndo' inajë' condre dyin quie Diuzi ruendo'.

<sup>4</sup> Pero yugulu ca ruendo' re'enndo' ilë'ë ja benë' nëto' ben' rue dyin quie Diuzi. Re'enndo' ilë'ëjë' nëto' cana' nun quie rzuendo' dyë'ëdi cati raca tazëdi quiendo', lëscan' cati redzagaondo' rdziogundo' bi cosa.

<sup>5</sup> Pues quia quiendo' benjë' nëto' zi', bdze'jë' nëto' dyiguiba, bebiojë' nëto' yedyi, bëndo' dyin zi'i gula, bigusindo', uduendo'.

<sup>6</sup> Bablu'endo' nacando' ben' quie Diuzi como dan' ni tu tamala biruendo'. Banezindo' con cabë' rna di'idza' la'iya quie Diuzi. Nacaro ben' zëla'adyi', ben' huen, yu'undo' Bichi Be quie Diuzi, nedyë'ëndo' benë' du guicho du la'adyi'ndo',

<sup>7</sup> rguixogue'ndo' benë' di'idza' la'iya quienë', ruendo' yela' huaca quienë'. Dan' ruelëndo' benë' puro tadya'a, lena' rdando' laojë' birdzebindo' quixogue'ndo'jë' xti'idza' Diuzi, birdzebindo' ruendo' defender cuinndo' laojë'.

<sup>8</sup> Bayu'u rapala'n benë' nëto', bayu'u birapala'një' nëto'. Bayu'u rnajë' quiendo' ruendo' tahuen, bayu'u rnajë' quiendo' biruendo' tahuen. Bayu'u rlë'ëjë' nëto' ca ben' rguixogue' tali, bayu'u rlë'ëjë' nëto' ca ben' birguixogue' tali.

<sup>9</sup> Bayu'u birzënegajë' quiendo', bayu'u rzënegajë' quiendo'. Bayu'u ruen zudyi gatindo', pero bigatindo'. Bayu'u rusaca ja benë' nëto' bizinaquezi, pero bisuejë' gutijë' nëto'.

<sup>10</sup> Ba'ala'cazi raca bayëchi' quiendo', pero zucazindo' gusto. Ba'ala'cazi nacando' ben' yëchi', pero gacalëndo' ben'zë. Ba'ala'cazi zundo' abide quiendo', pero naca quiendo' yugulu ta de.

<sup>11</sup> Bicha', le'e ben' ciudad Corinto, dyë'ëdi gula bëlëndo' le'e di'idza'. Du guicho du la'adyi'ndo' nedyë'ëndo' le'e.

<sup>12</sup> Cala nëto' bizundo' gusto conlë le'e, dechan' le'e bizule gusto conlë nëto'.

<sup>13</sup> Rnabayëcha' le'e cabë' rue tu xuzi xcuidi' lënë' zi'inë' ta idyë'ële në'ëdi' du guicho du la'adyi'le cabë' nedyë'ëda' le'e du guicho du la'adya'.

*Nacaro ca quie tu idao' rnabë'ra quie Diuzi*

14 Bihuelële tuže len ja ben' binao xneza Cristo. Rnaba' le'e tu pregunta: ¿Ga huen dyin chi huelé ja ben' rue ta yu'u ni'a xnezi tuže len ja ben' birue ta yu'u ni'a xnezi? ¿Biži huero gaca gui' lëbi len tachula?

15 ¿Biži gaca hue Cristo tuže conlë xan' taxi'ibi' Satanás? ¿Biži gaca hue tu ben' nao xneza Cristo conlë ben' binao xneza Cristo?

16 ¿Binezile binacan lëbi idao' r nabë'ra re' ciudad Jerusalén len ja ídolo? Pero lëscan' le'e nacale ca quie idao' r nabë'ra quie Diuzi, ben' neban tuzioli. Cana' una cuin Diuzi caora unë' cani:

Në'ëdi' sua' talia' le'e.

Në'ëdi' naca' Diuzi quiele, nacale ben' tzionla'adyi' në'ëdi'.

17 Lëscan' unarë Diuzi caniga:

Bihuelële tuže conlë ben' birue quie di'idza' quia'.

Bihuele cabë' ta naca žudyi ruejé'.

Na'ra në'ëdi' huayezila'adya' cabë' ruele.

18 Cana' gaca' Xuzile, cana' gacale ži'ina'.

Lena' una Diuzi, tuzi lëbë' de yela' huaca quie.

## 7

1 Pues bicha', ben' nedyë'ëda', cana' naca di'idza' bega'nlë Diuzi ra'o huenë' quiero. Quie lena' reya'ala' gaparo cuidado bihuero xquia. Naca xquia ca quie tu nidyi' udyiagui'n bë'ëla' zuba' quiero len pensari quiero. Lëscan' biusanro huero Diuzi bala'ana, biusanro naoro xnezë' du guicho du la' adyi'ro.

*Ben' Corinto betza'jë' pensari quiejë', bayu'ujë' pensari quie Diuzi*

2 Uzëcara nagale dyë'ëdi ca inando' le'e. Ni tule bibëndo' quiele tamala. Ni tule biddiyagui'ndo' quiele. Ni tule biuzi'ndo' le'e yë'.

3 Cala raohua' le'e xquia. Nacan cabë' baonia' le'e dza na', nedyë'ëda' le'e du guicho du la'adya', la'acazi chi nebana', la'acazi chi gatilia' le'e.

4 Lega redaohueda' zudyi'ilia' le'e. Ba'ala'cazi neruen quiero redza-galaoro, redaohuetzegueda'. Lega gusto sua' conlë le'e.

5 Desde dza cati bdyindo' yu nebaba Macedonia, bibi yela' huezila'adyi' guta' quiendo', dechan' guta' tazëdi con gati'tezi uyondo'. Raca huedila ga rdando', rutëbin nëto' rdzebindo'.

6 Pero reyuezela'adyi' Diuzi ben' raca bayëchi' quie. Lena' beyuezela'adyi' Diuzi nëto', use'ela'në' Tito bedena'në' nëto' redaohuendo'.

7 Pero cala tuzi redaohuendo' nun quie bedena' Tito nëto', lëscan' redaohuendo' como dan' le'e beyuezela'adyi'le Tito. Una Tito nëto' cabë' re'enle ilë'ële nëto'. Lëscan' una Tito cabë' raquiele bayëchi' rdëbile bi raca quia'. Dan' rdëbile bi raca quia', lena' reyuezela'adyi'le në'ëdi' mazara.

8 La'acazi bzua' le'e bayëchi' nun quie guichi use'ela' laole dza na', bi-raqueda'n zi' na'a. Pero chi guqueda'n zi' dza na'te nun quie bzua' le'e bayëchi' tu chi'zi,

9 redaohueda' na'a como dan' nun quie lena', betza'le pensari quiele bayu'ule pensari huen. Lena' redaohue Diuzi cabë' bële. Lena' cala tamala bëndo' quiele bzundo' bayëchi' quiele.

10 Porque cati ruzu Diuzi ra'o bayëchi', lena' gacalën ra'o ta yetza'ro pensari quiero, yu'uro pensari quie Diuzi, gaque quiero yela' neban tuzioli. Lëpensari bayëchi' nacan pensari quie Diuzi, bireya'ala' gaquero'n zi'. Pero cá naca pensari bayëchi' raca lao yedyi layu, lëpensari na' bihuen quie ja benë' tadya'a. Huen quiejë' ta gatijë' tuzioli yeyojë' lao gui' gabila.

11 Pero le'e bële tahuen caora bzu Diuzi bayëchi' quiele. Ulena' cabë' guca quiele. Dyë'ëdi bële casa cabë' tamala guca quiele entre le'e. Du guicho

du la'adyi'le uduxogue'le cabè' guca quiele. Bdza'le bdzebile cabè' tamala guca entre le'e. Lagu'untele guida' ideyuba' le'e. Laozutele dispuesto huele castigo ben' bē tamala. Lena' rulu'en quiele gabi dula' napalē tanun quie ben' bē tamala.

<sup>12</sup> Caora use'ela' guichi quia' laole dza na', bipse'ela'n nun quie tuzi ben' bē tamala, ni quele quie tuzi ben' bega'n yela' stu' quie tanun quie ben' bē tamala, dechan' use'ela' guichi quia' laole ta inezile cabè' rdēbindo' raquendo' quiele lao Diuzi.

<sup>13</sup> Pero nun quie cabè' bēle, bēle tahuen redaohuendo'.

Pero quele tuzi len redaohuendo', lēscan' redaohuendo' nun quie zu Tito gusto ca bēle. Dyin quiele yugulule bega'n guicho laxta'onē' chizi.

<sup>14</sup> Bron huen cabè' aguicha' Tito, aguicha'nē' zua' contento conlē le'e. Na' gucan tali yugulu cabè' unando' le'e, lēscan' gucan tali yugulu cabè' gudyingo' Tito quiele de que zundo' contento conlē le'e.

<sup>15</sup> Lēscan' zu Tito contento conlē le'e caora reza'la'adyi'nē' le'e cabè' bēle, bēle ca ta unanē' quiele huele. Lēscan' zunē' contento conlē le'e cabè' bēle uzi'lenē' dyē'ēdi udapalenē' bala'ana.

<sup>16</sup> Lēscan' redaohueda' ca ruele zudyi'ilia' le'e.

## 8

### *Rguixogue' Pablo quie dumi ptupajē'*

<sup>1</sup> Na'ra bicha', re'ennō' hue'lēndo' le'e di'idza' cabè' bē Diuzi blu'enē' yela' ben' huen quienē', bagucalēnē' ben' nao xneza Jesús, ben' nita' yu nebaba Macedonia.

<sup>2</sup> La'acazi guca zēdi gula quiejē', lena' gucajē' ca prueba chi du guicho du la'adyi'jē' naojē' xneza Jesús, pero bipsanjē', nenaōjē' xnezē' nezujē' gusto gula. Ba'ala'cazi nacajē' ben' yēchi' gula, ptupajē' dumi ze. Bējē' ca ben' bibi rdziogue.

<sup>3</sup> Naca' testigo redaohuejē' ptupajē' ca tu uzuejē'. Pues mazara ptupajē' ca tu uzuejē'.

<sup>4</sup> Unabayēchi'jē' laondo' ta hue'ndo' lato gacalējē' ben' bichiro, ben' nao xneza Jesús.

<sup>5</sup> Bēterajē' mazara ca tu guquendo' huejē'. Tanēro bega'nlējē' Diuzi di'idza' ta hue quieyaquē' mazara quienē', lēscan' ta hue quieyaquē' mazara quiendo' según ca re'en Diuzi huejē'.

<sup>6</sup> Quie lena' unabando' cule lao Tito chi bisaque' guidē' useyudiyinē' ideyubinē' le'e ta utupanē' dumi ca dumi uzulaonē' rutupanē' dza na'.

<sup>7</sup> Na'ra como dyē'ēdi rue quiele xti'idza' Diuzi ca re'ennē' huele, como dyē'ēdi zudyi'ilēle lēbē', como dyē'ēdi rguixogue'le benē' xti'idzē', como dyē'ēdi nezile cabē' nan, como dyē'ēdi naole xnezē', como dyē'ēdi nedyē'ēle nēto', lēscan' dyē'ēdi reya'ala' utuparēle dumi ta gacalēle yaca loe demás ben' bichiro, ben' nao xneza Jesús.

<sup>8</sup> Quele nia' le'e rua' mandado zi'laza huele quie dumi cabè' nia'. Nia' le'e re'enda' inezile cabè' bē ja ben' tula, ben' nao xneza Jesús. Du redaohuejē' ptupajē' dumi. Lena' re'enda' inezile cuenda huele tuzi ca bējē'. Lena' ulu'en quiele tali nedyē'ēle Diuzi.

<sup>9</sup> Cana' re'enda' como dan' banezile dyē'ēdi cabè' bē Jesucristo quiele. Yela' ben' huen quienē' taže gucalēnē' le'e. La'acazi naca quienē' yugulu ta de quie Diuzi, bidē' detē'ē lao yedyi layu, guquē' ben' yēchi' nun quie dan' nedyē'ēnē' le'e. Dyin quienē' huata' tadya'a gula quiele quibā ga zu Diuzi.



10 Na'ra re'enda' inia' le'e ca naca pensari quia'. Baguca tu iza baozulaole dyë'ëdi. Bële huen ptupale dumi. Bële huen bedaohuele ptupalen.

11 Na'ra useyudyile utupale dumi yedaohuele cabë' bedaohuele dza na'. Utupale quie quiele ca tu ta de quiele.

12 Porque chi tali re'enro hue'ro Diuzi gun, huayezila'adyi' Diuzi ca tu ta de quiero utuparo. Pues bigue'en Diuzi hue'ronë' tu ta bide quiero.

13 Na'ra nia' le'e reya'ala' gacalële laguedyile, pero quiele ta uca'n yëchi'le cuinle.

14 Reya'ala' gacalële laguedyile cuenda gabi idziogue laguedyile, gaca tuzi ca ta de quiele len laguedyile. Pues na'a como gabi rdzioguele quiele, lena' reya'ala' gacalële laguedyile ben' rdziogue. Na'ra cati idyin dza idzioguele quiele, cana' iyacalëjë' le'e gunjë' ca ta rdzioguele. Cana' yugulule birabi idzioguele quiele.

15 Lena' nacan cabë' rguixogue'n lë'e guichi la'iyua quie Diuzi cabë' bë Diuzi dza na', pchizanë' ta naca ca yëta xtila ta gao ja ben' Israel. Lena' rnën lë'e guichi cani: "Nu ben' bezi' tazë, bigucan sobre. Lëscan' nu ben' bezi' tadao' bicu'zi, bibdzioguen."

### *Use'ela' Pablo Tito len ja compañero quienë'*

16 Xcale Diuzi bdze'në' pensari lu'u guicho laxta'o Tito ta gacalënë' le'e cabë' pensari yu'a ta gacalia' le'e.

17 Na'ra yaxë Tito cabë' gucha'në' cabë' re'enda' huenë' quiele. Como re'entzegenë' gacalënë' le'e, zunë' dispuesto ta sa'në' ideyubanë' le'e cabë' gusto rapë'.

18 Lëscan' ise'ela'ndo' itu ben' sa'lë Tito tuze. Ja ben' nao xneza Jesús nita' tu tu yedyi ga redupajë', lega raxejë' lëbë' nun quie dyë'ëdi rguixogue'në' benë' xti'idza' Diuzi.

19 Cala tuzi len ruen lëbë' ben' huen, lëscan' bdë' ja ben' nao xneza Jesús lëbë' ta sa'lënë' nëto' tzaže utupando' dumi ta gacalëndo' yaca los demás ben' nao Jesús, ben' bibi de quie. Lena' baruendo' na'a cuenda huendo' Cristo bala'ana, lëscan' cuenda ulu'endo' cabë' racalë ben' nao xneza Jesús laguedyijë'.

20 Cana' re'enndo' huendo' cuenda bigata' tazëdi ina ja benë' contra nëto' nun quie rzi'ndo' dumi.

21 Pues yugulu ca ta ruendo' re'enndo' tzu'un ni'a xnezi. Cala tuzi lao Diuzi re'enndo' tzu'un ni'a xnezi, pero lëscan' lao ja benë' re'enndo' tzu'un ni'a xnezi.

22 Conlë lëjë' ise'ela'ndo' itu ben' bichiro, ben' sa'lë lëjë'. Lëben' na' dyë'ëdi ablu'en quienë' zë lasa cabë' ruenë' dyin quie Diuzi du guicho du la'adyi'në'. Na'ra maztera ruenë' du guicho du la'adyi'në' na'a nun quie anxuela'adyi'në' le'e huele cabë' agucha'në' huele.

23 Chi inaba yaca benë' nuzi Tito, na' yëbilejë' naca Tito ben' compañero quia', ben' ruelë në'ëdi' dyin quie Diuzi ca dyin ruendo' racalëndo' le'e. Lëscan' quie ichopa ben' sa'lë Tito, nacajë' ben' use'ela' laguedyiro ben' nao xneza Jesús, ben' rapa Cristo bala'ana.

24 Nun quie ta inezi ja ben' nao xneza Jesús nita' tu tu yedyi, ulelu'ejë' cabë' tali nedyë'ële ben' bichiro ben' nao xneza Jesús. Lëscan' ulelu'ejë' napando' razón cati rëbindo' benë' zucazile dispuesto ta gacalële laguedyile, ben' nao xneza Jesús.

<sup>1</sup> Na'ra quie dumi reya'ala' utupale ta gacalële ben' bichiro, ben' nao xneza Jesús, biruguente ise'ela' guichi laole le'e, ben' nita' yu nebaba Acaya,

<sup>2</sup> porque nezda' dyè'èdi zule dispuesto utupalen. Redaohueda' yèpa' ben' bichiro, ben' nita' yu nebaba Macedonia, cabè' desde iza aode zule dispuesto gacalële laguedyile. Quie lena', ben' zèja, ben' Macedonia, zujè' dispuesto gacalëjè' laguedyijè' nun quie ca ruele le'e racalële laguedyile.

<sup>3</sup> Na'ra ise'ela' Tito len compañero quienè' laole cuenda gacalëjè' le'e utupale dumi huele tahuen cabè' agucha' ja benè' huele cuenda bigaca di'idza' falso cabè' agucha'jè'. Lena' nia' cuenda lahuetete bala cabè' baonia' le'e huele.

<sup>4</sup> Porque chi nequi'a bala ja ben' nita' yu nebaba Macedonia, bire'enda' ila'ndo' ilè'èndo' bibèle bala biptupale dumi. Bire'enda' gaca yela' stu' quiendo' len le'e nun quie pxela'adyi'le nètò' utupale dumi, na' biptupale dumi.

<sup>5</sup> Quie lena' bia' pensari ruguente inaba' cule lao Tito len compañero quienè' guidajè' ideyubijè' le'e cuenda gacalëjè' le'e utupalëjè' le'e dumi cabè' bega'nro di'idza' dza na'. Cana' bade dumi puesto ta ulu'en bedaohuele ptupalen, quele ptupalen de la fuerza.

<sup>6</sup> Bigala'adyi'le con ca rnia' le'e: Chi gazaro tadao' bicu', lèzi tadao' bicu' usecho yezi'ro. Pero chi gazaro taže, lèzi taže usecho yezi'ro.

<sup>7</sup> Quie lena' quie quiele reya'ala' utupale dumi ca tu pensari yu'u lu'u guicho laxta'ole. Bireya'ala' utupalen canezi ni a la fuerza. Reya'ala' sule gusto utupalen, como dan' nedyè'è Diuzi nu ben' ru'e gun quienè' gusto.

<sup>8</sup> Cana' huela'iya Diuzi le'e taže gula cuenda gata' quiele, bibi idzioguele. Lëscan' huela'iya Diuzi le'e ta gata' quiele gacalële ben' tula huelëlejè' tadya'a.

<sup>9</sup> Cana' rnèn lè'è guichi la'iya quie Diuzi cani:

Taže racalë Diuzi ja ben' yèchi'.

Ca naca tadya'a ruenè' quiejè', biyeyudyi yedu quien.

<sup>10</sup> Quie lena' rnia' le'e, naca Diuzi ben' run bini ta gazaro, lëscan' runnè' yela' huo ta gaoro. Lèbè' gunnè' quiele tacuenda bibi idzioguele gacalële benè' huelëlejè' tadya'a.

<sup>11</sup> Cana' gata' yugulu cue' yela' uña'a quiele tacuenda gacalëlejè' taže. Quie lena' conlè dumi ise'ela'le lao na'ando', cana' yedaohuejè' yèbijè' Diuzi diuxcalelo'.

<sup>12</sup> Porque cati hue'rojè' ta ptupale ta gacalële lèjè', cala tuzi ta rdzioguejè' hue'rojè', pero lëscan' nun quie hue'rojè' ta rdzioguejè', lena' yèbijè' Diuzi diuxcalenè'.

<sup>13</sup> Cana' yeyuezejè' lao Diuzi. Lëscan' cabè' bèle quiejè', bè'lejè' ta bdzioguejè', lena' rulu'en tali rue quiele xti'idza' Cristo. Lëscan' yeyuezejè' lao Diuzi por nun quie dumi že ptupale ta gacalële lèjè' len yugu ja ben' nao xneza Jesús.

<sup>14</sup> Na'ra lèjè' ulidzajè' Diuzi nun quiele. Zujè' gusto conlè le'e nun quie cabè' bèle quiejè', cana' ilè'èjè' naca Diuzi ben' huen.

<sup>15</sup> Xcale Diuzi dan' bèlènè' ra'o tadya'a. Tantozi bèlènè' ra'o tadya'a, bisuero saque' yèbironè' diuxcalelo' cabè' reya'ala' yèbironè' diuxcalelo'.

## 10

### *Una Pablo de yela' rnabè' quienè' naquè' apòstol*

<sup>1</sup> Nè'èdi', Pablo, nun quie naca Cristo ben' reyèchi'la'adyi', ben' huen, rnabayècha' laole uzènagale ca inia' le'e. Na'ra bala le'e rnale naca' ben' rna di'idza' gaxo cati zulìa' le'e tuže, pero cati zua' zitu', naca' ben' rna di'idza' zi'laza.

<sup>2</sup> Tahuencazi chi', rnabayëcha' laole uzënegale quia' dyë'ëdi cati guida' ideyuba' le'e cuenda biruen zi ugunla'adya' pensari quieza' nun quie bala le'e raole nëto' xquia nale rdando' ruendo' ta racazi la'adyi'ndo', quele mandado quie Diuzi. Pues zua' dispuesto yela'lia'jè'.

<sup>3</sup> Talicazi rdando' lao yedyi layu, pero birdilando' ca rdila ja ben' rda lao yedyi layu.

<sup>4</sup> Netza'la ca ruendo' como dan' birzëndo' espada ca rzë ben' rda lao yedyi layu espada, pero napando' yela' rnabë' quie Diuzi. Conlë len suendo' udyiagui'ndo' ta naca fuerte gula rue contra Diuzi.

<sup>5</sup> Cana' huendo' gan ta tzioñe'e ben' binuebë' Diuzi con cabë' rna xti'idzë'. Cana' huendo' gan quie nutezi ben' zë', nutezi ben' rudzun inezi ja benë' con cabë' rna xti'idza' Diuzi. Cana'huendo' gan ulu'endo' benë' netza'la naca pensari quie len pensari quie Cristo. Cana' huendo' gan ulu'endo'jè' ruguinte yetza'jè' pensari quiejè' ta yeyu'ujè' pensari quie Cristo inaojè' xnezè'.

<sup>6</sup> Como banezile dyë'ëdi con cabë' rna xti'idza' Diuzi, na'tera zundo' dispuesto ta huendo' castigo nu ben' birue quie xti'idza' Diuzi.

<sup>7</sup> Le'e biruele pensari dyë'ëdi. Chi nu ben' zu ladole unanë' bdë' Cristo lëbë' ta gaquë' apóstol, na'ra lëben' na' reya'ala' tzioñe'enë' de que lëscan' bdë'rë Cristo nëto' ta gacando' apóstol.

<sup>8</sup> La'acazi tazë lasa baonia' le'e ben Cristo yela' rnabë' quiendo', bireudie'da' inia' le'e cana' tatula. Ben Cristo yela' rnabë' quiendo' ta uzioñe'endo' le'e ta inaole dyë'ëdi xnezë', cala ta udyiagui'ndo' le'e.

<sup>9</sup> Bire'enda' huele pensari use'ela' guichi laole ta idzebile con cabë' inën lë'ëna.

<sup>10</sup> Le'e rnale nuzua' lë'ë guichi puro di'idza' zi'laza, pero cati zua' ladole, rnia' le'e puro di'idza' gaxo, bireyazoga' inia' le'e di'idza' zi'laza.

<sup>11</sup> Pero nu ben' rna cana', reya'ala' inezijë' dyë'ëdi de que cabë' naca di'idza' ruzundo'lë'ë guichi cati zundo' zitu', cana'cazi di'idza' huazaque' hue'lëndo' le'e cati zundo' ladole.

<sup>12</sup> Bireyazondo' utilando' lëbi conlë lëben' rue ze cuine. Pensari tondo ruejè' nun quie entre lëzijië' rlë'ëjè' cuinjè' ben' ze, entre lëzijië' rlë'ëjè' cuinjè' ben' rutila lëbi.

<sup>13</sup> Pero cala con ganzi yëbindo' benë' bëndo' huen, bëndo' dyin quie Diuzi. Bë' Diuzi laze quie quiendo' ga si'ndo' huendo' dyin quienë'. Lëscan' laze quiendo' guidando' hasta ciudad Corinto gan' zule.

<sup>14</sup> Quie lena' cala rdetelando' laohue cabë' mandado bë Diuzi guidando' gan' zule. Chi tali bibë Diuzi mandado guidando' gan' zule, lena' aodeltelando' laohue cabë' mandado bënë' nëto'. Pero zanëto' bidando' tanëro bedetixogue'ndo' le'e xti'idza' Diuzi.

<sup>15</sup> Birnando' dyin bëndo' chi dyin bë ben' tula. Re'enndo' sudyi'ilële Cristo mazara cuenda saque' uzioñe'endo' le'e mazara con cabë' naca mandado bë Diuzi nëto'.

<sup>16</sup> Cana' huaca tziondo' tzetixogue'ndo' di'idza' la'iya quie Diuzi ja yedyi nega'nra zitu' ga zule. Pero ga parte ga uyo ja ben' tula, baodixogue'jè' xti'idza' Diuzi, lëgan' na' bitziondo' nëto' biyëbindo' benë' dyin quiendo'.

<sup>17</sup> Quie nu ben' re'en ina ja benë' nacajë' ben' ze, mejorla inajë' Diuzi naquë' ben' ze.

<sup>18</sup> Porque chi hue Diuzi ra'o ben' ze, talicazi nacaro ben'ze, pero chi huero cuinro ben' ze, cala tali nacaro ben' ze.

## 11

*Una Pablo quie ja ben' huizi' yè', ben' na naca ja apóstol*

<sup>1</sup> Rnaba' cule laole uzēnagale quia' dyē'ēdi la'acazi chi raquele rnia' le'e pensari tondo. Con ca inia' le'e, huele cule uzēnagale quia'.

<sup>2</sup> Naca dyin quie Diuzi nedyē'ēda' le'e, lena' re'enda' usedyina' le'e lao Cristo biuyoguele ben' tula yē'. Re'enda' hua' quiele ca quie rue nu xuzi nigula. Reya'ala' usedyinnē' zi'inē' cuidi' lao xquiubi' biuyogue zi'inē' ben' tula yē'.

<sup>3</sup> Pero como conlē yela' sin' quie xan' taxi'ibi' guquen forma ca bēla uzi'n Eva yē', lēscan' rdēbida' utēbi ben' tula pensari quiele cuenda usanla'adyi'le bira inaole tuzi xneza Cristo du guicho du la'adyi'le.

<sup>4</sup> Porque dyē'ēdi raxele ruzēnagale cabē' di'idza' na nu ben' tula, nu ben' rida rguixogue' le'e netza'la cabē' udixogue'ndo' le'e quie Jesús. Pues dyē'ēdi rezila'adyi'le quie bichi be tula, bichi be binaca Bichi Be quie Diuzi ta uyezila'adyi'le dza na'. Lēscan' dyē'ēdi ruzēnagale di'idza' rguixogue' ben' tula, di'idza' binacan lēbi con cabē' rna xti'idza' Diuzi unando' le'e dza na'.

<sup>5</sup> Pues rnia' cala zaca' nē'ēdi' menosra cabē' nu ben' naole neza quie, nu ben' rnaole naca apóstol huen gula.

<sup>6</sup> La'acazi ruen zēdi quia' ta hue'lia' le'e di'idza', cala binezda' con cabē' rna xti'idza' Diuzi. Lena' bablu'endo' ladole conlē yugute cabē' bēndo' laole.

<sup>7</sup> ¿Bi ca nale? ¿Tamala bia' udixogui'a le'e di'idza' la'iya quie Diuzi, na' biunaba' le'e ni tu centavo? ¿Tamala bia', bedzagalaohua' cuenda gacalia' le'e gata' tahuen quiele?

<sup>8</sup> Hasta uzi'a dumi ta ben ben' nita' yedyi tula nē'ēdi' cuenda tu de len bia' gasto udixogui'a le'e xti'idza' Diuzi.

<sup>9</sup> Catu uzulia' le'e dza na', bide ta hua' gasto, ni tule bibia' le'e zēdi inaba'le gunle quie gasto quia'. Pero ja ben' bichiro, ben' uza' yu nebaba Macedonia, lējē' benjē' ta rdziogueda'. Cana' udapa' cuidado cuenda bihuelia' ni tule zēdi gunle ta rdziogueda'. Pues cana'cazi biusana' huelia' le'e cana'.

<sup>10</sup> Tantozi nužela'adya' nezda' dyē'ēdi con cabē' rna di'idza' li quie Cristo, lena' nezda' nunu saque' udzun cabē' zua' gusto yēba' ja ben' nita' yu nebaba Acaya ca naca tahuen bia' quiele.

<sup>11</sup> Na'ra ¿bixquien' unia' cana'? ¿Nun quie binedyē'ēda' le'e unia' cana'? Cala lena'. Nezi Diuzi con cabē' nedyē'ēda' le'e.

<sup>12</sup> Biusana' hua' cabē' rua' la'acazi chi zu ben' na nacarējē' apóstol ca nēto'. Najē' de yela' rna' bē' quiejē' ruejē' ca apóstol tu lēbizi cabē' nēto'.

<sup>13</sup> Pero binacan con cabē' najē'. Binacajē' dugalo apóstol. Yē'zi rzi'jē' ruejē' cuinjē' ca apóstol quie Cristo.

<sup>14</sup> Lena' binacan ta yebanero, como dan' hasta cuin xan' taxi'ibi' Satanás yē'zi rzi'nē' ruenē' cuinnē' ca tu ángel rseni'n ca xni' gui'.

<sup>15</sup> Cana' biyebanero cabē' rue ben' naque quie xan'taxi'ibi'. Yē'zi rzi'jē' ruejē' ca ben' rue tahuen. Pero hue Diuzi lējē' castigo con cabē' naca tamala bējē'.

*Una Pablo cabē' uzacayudyinē' dan' naquē' apóstol*

<sup>16</sup> Rnia' le'e tatula: Bihuele pensari chi raca' luco. Pero chi cana' ruele pensari, ulegun lato inia' le'e ca rnē' ben' raca luco cuenda hueria' pensari ca quie ben' hue cuine ben' ze.

<sup>17</sup> Quele mandado quie Cristo rnia' cabē' rnia' ni. Rnia' ca quie ben' raca luco. Rnia' ca quie ben' rue cuine ben' ze.

18 Nun quie nita' ben' zë ruejè' ben' ze cuinjè', lega raxejè' ta de lao yedyi layu, lëscana'rè nè'èdi', hueria' ca quie ben' rue cuine ben' ze.

19 Cana' hua' como dan' le'e nale nacale ben' rioñe'e, nale huazuele dyè'èdi huele gan ca na ben' luco.

20 Pues le'e redaohuele huele ca mandado zi'laza huegadyijè' le'e huele quiejè'. Redaohuele cati cubajè' ta de quiele, redaohuele cati inabè'jè' le'e ta zi'laza gula, redaohuele cati gacazè'jè' le'e, hasta redaohuele cati capajè' laohuele.

21 Pero redue'da' inia' le'e nêto' bibeyazondo' huelendo' le'e cana'.

Pero cabè' rue ja ben' na', ruejè' cuinjè' ben' ze, lëscan' hueria' cuina' ben' ze la'acazi ruen zi inèria' ca ben' luco.

22 Quie lena' inaba' le'e, ¿naca ja ben' na' ben' rnè di'idza' hebreo? Lëscan' nè'èdi', rnèria' di'idza' hebreo. ¿Nacajè' ben' Israel? Lëscan' nè'èdi', nacaria' ben' Israel. ¿Nacajè' zì'isuba Abraham? Lëscan' nè'èdi', nacaria' zì'isuba Abraham.

23 ¿Tali na' nacajè' ben' rue mandado quie Cristo? Rnia' le'e cala mandado quie Cristo ruejè'. Pero nè'èdi' sí, rua' dugalo mandado quie Cristo. Ca rnè ben' tondo, cana' rnia' niga. Pues ganura zu rue dyin quie Cristo ca nè'èdi'. Ganura zu rguijè' ru'ejè' zi' quie ca nè'èdi'. Ga nu ben' zu rudze'jè' lu'u dyiguiba ca nè'èdi'. Tazè lasa bèn zudyi quia' guti ja benè' nè'èdi'.

24 Hasta ben' yedyi quia', ben' Israel, bějè' nè'èdi' castigo. Ga'yo' lasa udijè' nè'èdi' galobechi ga huio guidi.

25 Tzona lasa udijè' nè'èdi' yaga. Itu lasa udijè' nè'èdi' yo. Tzona lasa betu barco yu'a lu'u nisadao'. Tu lasa užuba' lao nisadao' tu dza tu yela.

26 Zè lasa uza'a uya'a zitu'. Zè lasa ben zudyi quia' hua' yao ze nè'èdi'. Zè lasa ben zudyi quia' cuan ja benè' ta de quia'. Zè lasa ben zudyi quia' hue ja ben' yedyi quia' bizinaquezi len nè'èdi'. Zè lasa ben zudyi quia' hue ja ben' yedyi tula bizinaquezi len nè'èdi'. Zè lasa ben zudyi quia' ga naca ciudad, ga naca lao ya'a, ga naca lao nisadao'. Zè lasa ben zudyi quia' nun quie ben' na najè' xneza Cristo, pero bē' nazijè'.

27 Bia' dyin zi'i guca zèdi quia'. Zè lasa bigusia' bedu yela. Zè lasa bedzagalaohua' udua'. Zè lasa bedzagalaohua' ubilida'. Zè lasa bia' ubasi. Zè lasa bedzagalaohua' nun quie tazaga. Zè lasa bedzagalaohua' nun quie bdziogueda' žaba'.

28 Cana' guca quia', pero bineyudyi ca tazèdi raca quia'. Yugu dza raqueda' rdèbida' quie ja ben' nao xneza Jesús nita' tu tu yedyi.

29 Chi zu ben' rdzebi inao xneza Cristo, yeyèchi'la'adya' lèbè' ca quie nè'èdi' naca' ben' rdzebi inao xneza Cristo. Lëscan' chi zu ben' bē yela' stu' quie laguedyi, na'ra nè'èdi' rdze'tzegueda' quie ben' bē yela' stu'.

30 Chi ru'en lato hua' cuina' ben' ze, cana' hua' cuina' ben' ze nun quie bedzagalaotzaguia' užacayudya' bia' dyin quie Diuzi.

31 Diuzi, ben' naca Xuzi Señor quiero Jesucristo, ben' rulidzaro ruero bala'ana laohue tuzioli, lèbè' neziné' tali nacan ca rnia' le'e.

32 Cati uzua' ciudad Damasco, caora na' bē ben' naca gobernador quie rey Aretas mandado ta guida ja soldado gapajè' ru'a yedyi ga de neza ta guxujè' nè'èdi' huejè' nè'èdi' preso.

33 Pero ja ben' compañero quia', ben' nao xneza Jesús, lějè' bdze'jè' nè'èdi' tu lu'u chicuti ze, belizajè' nè'èdi' ru'a ventan zu lè'è besu ta zu nusio ru'a yedyi. Cana' guca ula' bibèxujè' nè'èdi'.

## 12

*Blu'e Cristo Pablo blè'ènè' ca naca guibá*

1 Bibi zaca'n hua' cuina' ben' ze, mejorla hua' di'idza' cabè' blè'èda' blu'e Cristo nè'èdi' dza na'.

2 Nè'èdi', ben' nao xneza Cristo, azio chida' iza, uquiè'nè' nè'èdi' guibá uyune. Binezda' chi uya'a len bè'èla' zuba' quia', o chi biuya'a len bè'èla' zuba' quia'. Tuzi Diuzi nezinè'.

3 Pero nezda' uquiè'nè' nè'èdi' guibá, la'acazi binezda' chi len bè'èla' zuba' o chi cala len. Nezi Diuzi.

4 Uquiè'nè' nè'èdi' na' ga beda' di'idza' naca la'iya gula. Tantozi naca la'iya di'idza' na', biru'en lato inè ja benè' ca naca di'idza' beda'.

5 Na'ra lega redaohueda' cabè' guca quia' dza na', pero bire'enda' hua' cuina' ben' ze nun quie len. Tuz ca guca quia' cati bedu fuerza quia', lèzin re'enda' yèpa' ja benè'.

6 Pero chi hua' cuina' ben' ze yèpa' ja benè' tahuen gula bèlè Diuzi nè'èdi' guibá, lena' binacan pensari tondo, como dan' tali cabè' guca quia' guibá yèpa'jè'. Pero bicala yèpa'jè' cana', como dan' bire'enda' huejè' pensari naca' ben' belaora ca tu rlè'èjè' naca'.

7 Tantozi naca tahuen gula ta yebanero cabè' blè'èda' ca naca guibá, ben Diuzi nè'èdi' tu ta tzei ila cuerpo quia' cuenda bigaqueda' cuina' naca' ben' zera ca tu ta naca'. Nacan ca quie tu yèchi' tona uyu'un lu'u cuerpo quia'. Ruen quia' ca tu bichi be quie xan' taxi'ibi' Satanás rusacan nè'èdi' bizinaquezi.

8 Tzona lasa unaba' lao Cristo ta huenè' mandado ta usannan nè'èdi' dan' yu'u ruzei rula cuerpo quia'.

9 Pero una Cristo nè'èdi' cani: "Guna' luè' fuerza quia'. Conlè lèzin birabi idzioguelo', porque cati bide fuerza quio' cuinzo', cana' huazaque' guna' luè' fuerza quia'." Cana' redaohueda' bide fuerza quia' cuenda gunnè' fuerza quienè' quia'.

10 Quie lena' redaohueda' bide fuerza quia'. Redaohueda' cati rutasi runio benè' nè'èdi'. Redaohueda' cati rdziogueda' bi cosa. Redaohueda' cati rusaca ja benè' nè'èdi' bizinaquezi. Redaohueda' cati raca zèdi quia'. Cana' raca quia' nun quie rguixogui'a xti'idza' Cristo. Nezda' cati racabè'da' dyè'èdi' bide fuerza quia', caora na' run Cristo nè'èdi' fuerza quienè', pero mazara fuerza ze run Cristo nè'èdi'.

### *Rdèbi Pablo quie ja ben' nao xneza Jesús, ben' nita' ciudad Corinto*

11 Ca ben' tondo bia', pero dula' quie le'e bia' cana', porque le'e reya'ala' inèle tu cule quia'. Pues cala zaca' nè'èdi' menosra cabè' nu ben' naole neza quie, nu ben'rnale naca apóstol huen gula. Pero quie nè'èdi' rnale ni lè'èti' gabi zaca'.

12 Caora udixogui'a le'e xti'idza' Diuzi dza na', bèlia' le'e zela'adyi' gula, blè'èle bè Diuzi seña, bènè' yela' huaca, bènè' ta yebanero. Lena' blu'en tali naca' apóstol quienè'.

13 ¿Cala bèlia' le'e lèbi cabè' bèlia' ja ben' nao xneza Jesús nita' ga tula? Biunaba' le'e ta hua' gasto quia'. Tuzi lena' bibèlia' le'e lèbi. ¡Ulesi'ze quia' cabè' tamala bia' quiele, biunaba' le'e ta hua' gasto quia'!

14 Pues na'ra sí, bazua' dispuesto guida' ideyuba' le'e taoyune. Pero tatula na'a biunaba' le'e ta hua' gasto quia' como dan' quele ta de quiele re'enda', re'enda' huera quiele quie Cristo. Pues como raquenda' le'e ca zi'ina', lena' naca cuenda quia' hua' gasto quiele. Binacan cuenda quiele huelèle nè'èdi' gasto.

15 Pues redahueda' hua' gasto quia' cuinza'. Hasta zua' dispuesto hua' gasto fuerza quia' ta gacalia' le'e gata' tadya'a quiele. Pero cani raqueda': Ca tu mazara nedyë'ëda' le'e, cana' menosra nedyë'ële në'ëdi'.

16 Pero bala ben' zu ladole inajë' ben' listo gula naca', najë' uzi'a le'e yë' dza na'. Cana' inajë' ba'ala'cazi dyë'ëdi nezijë' biunaba' le'e ta hua' gasto quia' dza na'.

17 ¿Bi ca nale? ¿Uzi'a le'e yë' nun quie nu ben' aose'ela' laole dza na'?

18 Pues nezile aonaba' tu cule lao Tito chi biguidë' ideyubinë' le'e. Lëscan' use'ela' itu ben' bichiro sa'lënë' Tito. ¿Bi ca nale? ¿Uzi' Tito le'e yë'? ¿Bi ca nale? ¿Quele tali na' në'ëdi'lia' Tito, tuzi ca bëlëndo' le'e, tuzi ca naca pensari quiendo'?

19 Chi raquele rnando' aruendo' defender cuinndo' laole, bira huele pensari cana', como dan' biruendo' cana'. Ca ta ruendo' rnando' lao Diuzi nun quie nacalëndo' Cristo tuze. Pero yugu ca rnando' le'e nacan ta gacalen le'e ta huera quiele quie Cristo. Nedyë'ëda' le'e bicha'.

20 Rdëbida' chan' cati guida' ideyuba' le'e neruele ca ta bireya'ala' huele. Lëscan' rdëbida' idza'le në'ëdi' ca ta inia' le'e. Rdëbida' chan' gata' tazëdi. Rdëbida' chan' neruele gacazë'le laguedyile, chan' nerdza'le laguedyile, chan' neruele yela' adyi' len laguedyile, chan' nernële contra laguedyile, chan' neru'ele di'idza' bižu, chan' neruele cuinle ben' že, chan' neruele ta biyu'u ni'a xnezi.

21 Rdëbida' gaca tastu' quia' ca ruele cati guida' ideyuba' le'e tatula. Rdëbida' huabedya' ca ruele chan' neruele cabë' dula' xquia bële tiempote. Rdëbida' chan' neruele tabayatza len yaca nigula, chan' nerdalële nigula binaca žgulale. Rdëbida' chan' nenaole ca naca vicio quiele unaole dza na'.

## 13

### *Bë' Pablo lëjë' consejo, bgapanë' lëjë' diuzi*

1 Pues na' araca tatzona lasa rida' ideyuba' le'e. Biži ta yetilan di'idza' cati gao ja benë' laguedyijë' xquia, re'ennan chopa tzona testigo ta gacan bala chi nacan tali, chi binacan tali.

2 Zua' zitu', pero guna' le'e tu consejo tatula: Chi guida' ideyuba' le'e tatula, chi neruele dula' xquia, na'ra biyeyëchi'la'adya' le'e. Cana' naca consejo bi'a ben' bë xquia dza na'. Lëscana' naca consejo bëna' yugulule cati bida' dza na' bedeyuba' le'e tachopa lasa.

3 Chi rnanan huelia' le'e cana', na'ra huata'cazi prueba ca prueba re'enle gata' chi tali rnia' lao na'a Cristo. Cala hue Cristo gaxo len le'e, dechan' ulu'enë' le'e cabë' naca yela' huaca quienë'.

4 Tali na' guti Cristo lëjë yaga cruzo ca quie ben' bisaque' hue defender cuine, pero yela' huaca quie Diuzi zuë' bebannë'. Lëscan' nëto' nacaré quiendo' ca guca quienë'. Naca quiendo' ca quie ben' bisaque' hue defender cuine, pero como dan' nuelëndo' Cristo tuzi, quie lena' babën Diuzi nëto' yela' huaca quienë' ta huendo' mandado ca mandado re'en Diuzi huelëndo' le'e.

5 Ulehuecara pensari ca ruele chi du guicho du la'adyi'le rnaole xneza Cristo. Ulehue prueba cuinle. ¿Binezile zu Jesucristo len le'e tuze? Pero bisulënë' le'e tuze chi de ladzazi rnaole xnezë'.

6 Pues re'enda' inezile binacando' ben' huizi' yë'.

7 Rulidzando' Diuzi ta nitu bi tamala huele. Cala binapando' rson rulidzando' Diuzi por le'e, pero ca ta re'enndo', re'enndo' huele puro tahuen, la' acazi raquele binapando' rson.

8 Cana' re'enndo' como dan' bisaque' huendo' ta birutila lëbi len xti'idza' Diuzi. Pues puro cabë' rutilan lëbi ruendo'.

<sup>9</sup> Quie lena' redaohuendo' cati inaole xneza Cristo dyë'ëdi, la'acazi raquale nacando' ben' bide yela' huaca quie. Biusanndo' ulidzando' Diuzi por le'e cuenda gacalënë' le'e gacale ben' laxta'o yëri.

<sup>10</sup> Bia' guichi ni use'ela'n laole tu zaguidara' ideyuba' le'e cuenda cati sulia' le'e biinaban inabi'a le'e zi'laza conlë yela' rnabë' ta pca'n Cristo lao na'a. Bire'enda' usanla'adyi'le bira inaole xneza Cristo.

<sup>11</sup> Na'ra bicha', hua' le'e tu despedida. Uleyue pensari quiele ga rapale falta, yeyuežela'adyi'le laguedyile, huelële laguedyile tuže, sulële laguedyile gusto. Cana' huapa Diuzi le'e cuidado. Naca Diuzi ben' cuëchi chizi laxta'oro nedyë'ënë' ra'o.

<sup>12</sup> Gapale diuži quie quie laguedyile dyë'ëdi, gaole xagajë' tu psitu.

<sup>13</sup> Yugulu ben' bichiro, ben' nita'ja len në'ëdi' niga, rgapajë' le'e diuži.

<sup>14</sup> Rulidza' Diuzi ta uca'n Señor quiero Jesucristo le'e huen. Nedyë'ë Diuzi le'e. Lëscan' zu Bichi Be quienë' conlë le'e. Amén.



## DI'IDZA' BZU SAN PABLO APÓSTOL LĒ'Ē GUICHI, USE'ELA'NĒ'N LAO ESTADO GALACIA

### *Ni rguixogue'n ca naca guichi bē San Pablo*

<sup>1</sup> Nē'ēdi', Pablo, bdē' Diuzi nē'ēdi' ta tzetixogui'a benē' xti'idzē'. Cala benē' bdē' nē'ēdi', dechan' bdē' cuin Jesucristo lēnē' Xuziuro Diuzi nē'ēdi'. Naca Diuzi ben' pseban Jesucristo.

<sup>2</sup> Nē'ēdi'lia' ben' bichiro, ben' nao xneza Jesús, ben' nita' niga ga zua', bēndo' guichi ni ta ise'ela'ndo' lao le'e, ben' nao xneza Jesús, ben' nita' estado Galacia.

<sup>3</sup> Rulidza' Xuziuro Diuzi lēnē' zi'inē' Jesucristo ta huela'iyaquē' le'e cuēchiyaquē' chizi laxta'ole.

<sup>4</sup> Naca Jesucristo ben' psedyin cuine gutinē' lē'ē yaga cruzo por nun quie dan' ta gažo dula' quiero quie tamala de lao yedyi layu. Cana' bēnē' quiero según ca re'en Xuziuro Diuzi gaca quiero.

<sup>5</sup> ¡Ra'o na', reya'ala' gapala'nro Diuzi tuzioli! Amén.

### *Tuzi neza de yenaoro yeyoro guibá*

<sup>6</sup> Lega rebaneda' le'e ca ruele laozulaotele rusanla'adyi'le xneza Diuzi, ben' ulio le'e por nun quie nadyē'ē Cristo le'e. Baziole zenaole neza tula, pero cala neza ta yeyole guibá.

<sup>7</sup> Talicazi na' tuzi neza de ta yeyoro guibá. Ca naca ta raca quiele, nita' yaca benē' ruquixiyaquē' quiele. Re'enjē' bigalele ca udxogue'ndo' le'e quie xneza Cristo yenaoron yedyinro guibá.

<sup>8</sup> Udze'de' Diuzi nu ben' re'en usanla'adyi'le cabē' baodixogue'ndo' le'e dza na'te quie xneza Cristo ta re'enjē' yenaole neza tula, neza ta biyedyinle guibá. Udze'de' Diuzi nuti'tezi ben' rue cana', la'acazi nē'ēdi', la'acazi nu ángel za' guibá.

<sup>9</sup> Lena' agudya' le'e dza na'te, pero na'a re'enda' inia' le'e tatula de que udze'de' Diuzi nuti'tezi ben' re'en usanla'adyi'le cabē' baodixogue'ndo' le'e quie xneza Cristo dza na'te ta yenaole neza tula.

<sup>10</sup> La'acazi le'e birapale gusto cabē' rnia' le'e niga, pero Diuzi sí, rapē' gusto. Birguiloga' nu ben' hue nē'ēdi' ben' ze. Chan' rguiloga' nu ben' hue nē'ēdi' ben' ze, na'ra bira zaca' hua' dyin quie Cristo.

### *Ni rguixogue'n cabē' guca quie Pablo guquē' apóstol*

<sup>11</sup> Pero reya'ala' huele pensari cabē' rnia' le'e ni, bicha'. Cala pensari quie benē' rguixogui'a le'e, dechan' pensari quie Diuzi ta yenaole xneza Cristo yeyole guibá.

<sup>12</sup> Cala benē' bzioñe'enē' nē'ēdi' ca naca xneza Cristo, dechan' cuin Jesucristo bzioñe'enē' nē'ēdi'.

<sup>13</sup> Le'e babele cabē' guca quia' dza na' cati benaohua' rua' cabē' naca costumbre quie xuzixta'ohua' ben' Israel. Banezile lega psebi'a xneza Cristo. Uya'a yadiloga' yaca ben' nao xneza Cristo ta udyiaya'yaquē', bibeyēchi'la'adya'yaquē'.

<sup>14</sup> Dyē'ēdi' gula benaohua' cabē' naca costumbre quie xuzixta'ohua' ben' Israel. Nunu yaca ben' gololia' lēbizi, bērayaquē' ca nē'ēdi'.

<sup>15</sup> Pero tu binegaloga' bdē' Diuzi nē'ēdi' tanun quie dan' nadyē'enē' nē'ēdi'.

16 Caora abdyin hora una Diuzi, na'ra bedetilalao zi'iné' Jesucristo në'édi', yela' na' quixogui'a ben' binaca ben' Israel ca naca xneza Cristo yenaoron yedyinro guibá. Beyudyi guca quia' cana', nunu yenaba' consejo.

17 Ni ciudad Jerusalén biuya'a tzenaba' consejo lao yaca ben' banaca apóstol tu binegaca' apóstol. Biuya'a na', pero biudzèda' uya'a yu nebaba Arabia. Na'tera zeza'a uya'a ciudad Damasco.

18 Baocara tzona iza, caora na' uya'a ciudad Jerusalén bedila' Pedro uzulia'nè' chi'inu' dza.

19 Nunura apóstol bedila'. Tuzi Pedro len Santiago, ben' naca ben' bichi xa'nro Jesucristo, bedila'.

20 Ruguntia' Diuzi nacan tali cabè' di'idza' ruzua' lè'è guichi niga.

21 Ude beyudyi na', uya'a yu nebaba Siria. Na'tera uza' za'a yu nebaba Cilicia.

22 Binuebè' yaca ben' nao xneza Cristo, ben' nita' yu nebaba Judea, në'édi'.

23 Na' tu beziyaquè' con cabè' na benè' ca bia' dza na'te. Uneziyaquè' cabè' bia' beguiloga' ga nita' ben' nao xneza Cristo ta udyiaya'yaquè'. Pero na'a bira rua' cana', barda' rguixogui'a benè' xti'idza' Diuzi re'enda' inaoyaquè' xneza Cristo. Tanun quie barnaohua' xneza Cristo na'a,

24 cana' rue yaca benè' Diuzi ben' ze.

## 2

### *Yaca ben' naca apóstol bějè' Pablo tuze*

1 Na'ra baguca chida' iza beya'a ciudad Jerusalén tatula. Uza'lè Bernabé në'édi' uquiè'ndo' Tito.

2 Beya'a na' tatula porque Diuzi na' bènè' mandado beya'a. Gan' na' bedila' ben' napa dyin quie ben' nao xneza Cristo. Caora na' bexi'idze'yaquè' con cabè' rua' rguixogui'a ben' binaca ben' Israel xti'idza' Diuzi. Cana' bia' tacuenda biten cana'zi dyin quie Cristo rua'.

3 Na' bega'nndo' di'idza' dyè'édi. Nica bějè' mandado su compañero quia' Tito tu xèdyidao' cuine como dan' binacan obligado su tu xèdyidao' cuin ben' binaca ben' Israel.

4 Pero tali na' gu'un bala yaca ben' na', ben' nazi naoyaquè' xneza Cristo, su tu xèdyidao' cùn Tito. Quie lena' balarazi za'yaquè' urè'naoyaquè' nètò' ta si'jè' cuenda bi ruendo'. Biraxejè' ca ruendo' como dan' tanun quie nuendo' tuze Jesucristo nacando' ben' libre. Re'enyaquè' yenaondo' ley pca'n Diuzi lao na'a Moisés tatula.

5 Pero ni tzadica' bibèndo'yaquè' lato huelèyaquè' nètò' como dan' re'enndo' huele seguir inaole xneza Cristo yeyole yedyinle guibá.

6 Na' yaca ben' napa dyin quie ben' nao xneza Cristo yaxejè' cabè' rua' bibetza'yaquè' ca naca dyin quie Diuzi za'a rua'. Pero chi ben' napa dyin, chi ben' binapa dyin, tuzicazi ca raqueda' como dan' ilè'ècazi Diuzi ra'o cabè' naca pensari yu'u lu'u guicho laxta'oro, cala cabè' naca žabaro.

7 Na'ra bibetza'yaquè' ca naca dyin quie Diuzi za'a rua', gucabè'yaquè' chi Diuzi bènè' në'édi' mandado rguixogui'a ben' binaca ben' Israel xti'idza' Diuzi ta hue quieyaquè' len, na' yezi' Diuzi leyaquè' guibá. Lèbi cabè' gucabè'yaquè' bè Diuzi Pedro mandado quixogue'nè' yaca ben' Israel xti'idza' Diuzi, cana' gucabè'yaquè' Diuzi bènè' në'édi' mandado quixogui'a xti'idzè'.

8 Pues lèbi cabè' bè Diuzi ulionè' Pedro use'lè' lèbè' ta tzetixogue'nè' xti'idzè' lao ben' Israel, lèzi cana' ulio Diuzi në'édi' tzetixogui'a xti'idza'nè' lao yaca ben' binaca ben' Israel.

<sup>9</sup> Quie lena' gucabé' Santiago, len Pedro, len Juan de que bë Diuzi tu tahuen quia', bënë' dyin quiené' hua'. Naca Santiago, len Pedro, len Juan ben' belao, ben' rudze' xnezi quie yaca ben' nao xneza Jesús. Na' redaohueyaquë' bënyaquë' në'ëdi'lia' Bernabé di'idza' zela'adyi'. Bega'nlyäaquë' nëto' di'idza' ta tziando' nëto' tzetixogue'ndo' ben' binaca ben' Israel xti'idza' Diuzi, tu na' tziyoaquë' leyaquë' tzetixogue'yaquë' ben' Israel xti'idza' Diuzi.

<sup>10</sup> Tuzi unayaquë' nëto' reya'ala' yeyëchi'la'adyi'ndo' ben' yëchi'. Pero cana'cazi rua' rapatzaguaia' cuidado ta rua'.

### *Ciudad Antioquía udila Pablo Pedro*

<sup>11</sup> Na' cati bedyin Pedro ciudad Antioquía, cana' bedila' lëbë' na'. Na'ra udila' lëbë' como baoquixi pensari quiené'.

<sup>12</sup> Dza na' udaolë Pedro yaca ben' binaca ben' Israel. Pero cati bdyin bala ben' Israel, ben' naca amigo quie Santiago, na'ra psannë' bira udaolënë' leyaquë'. Cana' bënë' como dan' rdzebinë' ben' naca tu cue' ben' Israel, ben' re'en su tu xëdyidao' cuin yaca ben' nao xneza Jesús, la'acazi ben' binaca ben' Israel.

<sup>13</sup> Na'ra yaca los demás ben' nao xneza Jesús, ben' Israel, bërëyaquë' chopa neza quieyaquë' con cabë' bë Pedro. Hasta Bernabé, lëscana' bënë' tuze uquixi pensari quie', bërënë' chopa neza.

<sup>14</sup> Cati blë'ëda' ca ruejë', birnaojë' tali con cabë' rna xti'idza' Diuzi, na'ra unia' rëpa' Pedro zaca'lao lao yaca ben' nao xneza Jesús cani: "Luë' naco' ben' Israel, pero bira naolo' ley pca'n Diuzi lao na'a Moisés. Quie lena' rnaba' luë', ¿bixquien' re'leno' huu' mandado inao yaca ben' binaca ben' Israel ley pca'n Diuzi lao na'a Moisés?" Cana' gucha' Pedro udilanë'.

### *La'acazi ben' Israel, la'acazi ben' tula, ruen zi rzudyi'ilëro Cristo ta yeyoro guibá*

<sup>15</sup> Ra'o nacaro ben' Israel. Binacaro ben' binuebë' Diuzi cabë' naca yaca los demás ben' za' yedyi tula.

<sup>16</sup> Pero dyë'ëdi neziro biilë'ë Diuzi ra'o ben' laxta'o yëri tanun quie naoro ley pca'n Diuzi lao na'a Moisés, dechan' tanun quie chi rzudyi'ilëro Jesucristo. Quie tuzi len ilë'ë Diuzi ra'o ben' laxta'o yëri. Quie lena' lente ra'o, rzudyi'ilëro Jesucristo cuenda ilë'ë Diuzi ra'o ben' laxta'o yëri, porque cala tanun quie naoro ley pca'n Diuzi lao na'a Moisés yeyoro guibá.

<sup>17</sup> Pero ¿bizi huero chi rzudyi'ilëro Cristo, na'tera biyedyinro guibá? ¿Bizi huero chi tali ruen zi inaoro ley quie Moisés ta yezi' Diuzi ra'o? ¿Inaro dula' quie Diuzi chi raparo falta biyezi'në' ra'o? ¿Bireya'ala' inaro cana'!

<sup>18</sup> Pero xquia nacan quiero chi yenaoro neza gula quiero tatula, na' tu chi'zi uzudyi'ilëro xneza Cristo.

<sup>19</sup> Lao ley quie Moisés nuen quia' ca quie ben' huati, bira ruen në'ëdi' mandado. Pero lao Diuzi sí, binatia' nabana' ruenë' në'ëdi' mandado.

<sup>20</sup> Naca quia' ca quie ben' gutilë Cristo lë'ë yaga cruzo. Bide yela' neban quia' cuinza', yela' neban quie Cristo rdalia' nabana' lao yedyi layu. Quie lena' decazi yela' neban quia' nabana' lao yedyi layu por nun quie dan' rzudyi'ilia' Cristo, ben' naca zi'i Diuzi, ben' nadyë'ë në'ëdi'. Ta gaca tahuen quia' psedyinnë' cuinnë' gutinë' lë'ë yaga cruzo por në'ëdi'.

<sup>21</sup> Biusanla'adya' ca naca yela' racalë quie Diuzi. Chi tali yezi' Diuzi ra'o por nun quie chi hue quiero cabë' na lao ley pca'n Diuzi lao na'a Moisés, na'ra huazaque' inaro bibi zaca'n guti Cristo lë'ë yaga cruzo.

## 3

*Tuzi sudyi'ilëro Cristo ilë'ë Diuzi ra'o ben' laxta'o yëri*

1 ¿Le'e, bicha', ben' estado Gálatas, aoca tondole! ¿Nu'zi pquixi pensari quiele bira hue quiele xti'idza' Diuzi? Dyë'ëdi blë'ële baodixogue'ndo' le'e cabë' guca quie Cristo gutinë' lë'ë yaga cruzo.

2 Rnaba' le'e tu di'idza': Caora cati uyu'ule Bichi Be quie Diuzi, ¿tanun quie bidan' uyu'ule? ¿Uyu'ule Bichi Be quie Diuzi tanun quie bë quiele cabë' di'idza' na lao ley quie Moisés, o chi tanun quie bë quiele cabë' di'idza' udixogue'ndo' le'e?

3 ¿Bizi' raca quiele ta'ze aotondole? ¿Ruele pensari cuinzile de fuerza valor quiele yenaole xneza Cristo, bira ruen zi gacalë Bichi Be quie Diuzi le'e?

4 Ta'ze baoca tazëdi quiele dan' naole xneza Cristo. Na'ra ¿bi ca nale? ¿Bibi zaca'n baozuele tazëdi guca quiele? Tahuen na' chi zaca'n gucalën le'e.

5 Rnaba' le'e itu di'idza': Cati bdze' Diuzi Bichi Be quienë' lu'u guicho laxta'ole, bënë' yela' milagro quienë' entre le'e, ¿bixquien' bë Diuzi quiele cana'? Pues cala bë Diuzi quiele cana' tanun quie dan' bë quiele cabë' di'idza' na lao ley quie Moisés, dechan' bë Diuzi quiele cana' tanun quie dan' rzudyi'ilële Cristo cabë' aodixogue'ndo' le'e.

6 Na' uzudyi'ilë Abraham Diuzi. Con lëzin blë'ë Diuzi lëbë' ben' laxta'o yëri, ben' nacalë lëbë' tu'ze.

7 Quie lena' reya'ala' inezile naca dugalo ži'isuba Abraham nutezi ben' rzudyi'ilë Diuzi, la'acazi ben' Israel, la'acazi ben' za' yedyi tula.

8 Diuzi, ben' bë mandado bzu yaca benë' xti'idzë' lë'ë guichi, unezinë' dza na'te de que sudyi'ilë yaca ben' binaca ben' Israel lëbë'. Cana' gaca quieyaquë' hualë'ë Diuzi leyaquë' ben' laxta'o yëri, ben' hue lëbë' tu'ze. Quie lena' una Diuzi dza na'te gudyinë' Abraham: "Huela'iya' yugulu ben' nita' lao yedyi layu tanun quio' luë'." Cana' una Diuzi gudyinë' Abraham.

9 Na'ra cani nacan: Huela'iya Diuzi yugulu ben' rzudyi'ilë Cristo lëbizi cabë' bëla'iya Diuzi Abraham dza na'te.

10 Pero udze'de' Diuzi nu yaca ben' sudyi'ilë cabë' mandado rue lao ley ta gata' yela' neban quienë' tuzioli. Lëtana' rguixogue'n lë'ë guichi la'iya quie Diuzi cani: "Yugulu ben' rue quie cabë' mandado rue lao ley, udze'de' Diuzi leyaquë' chi bihue quieyaquë' yugulute cabë' mandado ruen." Cana' rnën lë'ë guichi la'iya quie Diuzi.

11 Tali na' cala tanun quie dan' hue quiero cabë' mandado rue lao ley ilë'ë Diuzi ra'o ben' laxta'o yëri. Lena' rguixogue'n lë'ë guichi la'iya cani: "Tanun quie dan' sudyi'ilëro Diuzi, na'tera ilë'ënë' ra'o ben' laxta'o yëri, gunnë' ra'o yela' neban tuzioli."

12 Pero ta'ze netza'n quie nu ben' rue quie cabë' mandado rue lao ley. Cala sudyi'ilënë' Diuzi ta gata' yela' neban quienë' tuzioli como dan' rguixogue'n lë'ë guichi la'iya caniga: "Nu ben' hue quie yugulute cabë' mandado rue lao ley, gata' yela' neban quienë' tuzioli." Cana' rnën lë'ë guichi la'iya.

13 Nun quie guti Cristo lë'ë yaga cruzo. bibdze'de' Diuzi ra'o, bdze'de'në' Cristo lao lazaro. Cana' rguixogue'n lë'ë guichi la'iya quie Diuzi cani: "Udze'de' Diuzi yugulu ben' na'ala' lë'ë yaga ta gatinë'." Cana' na lë'ë guichi la'iya quie Diuzi.

14 Cana' guca quie Cristo cuenda huela'iya Diuzi ben' binaca ben' Israel. Como dza na'te bega'nlë Diuzi Abraham di'idza' ta huela'iya Diuzi yugulu benë' tanun quie Abraham, na'ra lao na'a Cristo Jesús nuela'iya Diuzi ben' binaca ben' Israel, ben' nao xneza Cristo. Cana' bzu Diuzi di'idza' ca di'idza' bega'nlnënë' Abraham. Cana' aose'ela' Diuzi Bichi Be quienë' ta gacalënë' ra'o tanun quie dan' rzudyi'ilëro Cristo.

*Ni rguixogue'n quie di'idza' bega'nlē Diuzi Abraham dza na'te*

15 Na'ra, bicha', re'enda' inia' le'e tu di'idza' quie nu ben' re'en chasa guichi quie. Caora chasa guichi tzu'un firma ta yega'ntza'oro, na'ra bisaque' uquinoron, bisaque' inaro di'idza' tula.

16 Pues bega'nlē Diuzi Abraham len zi'isubanē' di'idza' dza na'te. Pero birnēn lē'ē guichi de que bega'nlē Diuzi zē zi'isubanē' di'idza', dechan' rnēn bega'nlēnē' tuzi zi'isubanē' di'idza', lena' tzioñe'ero bega'nlēnē' zi'isuba Abraham, ben' naca Cristo, di'idza'.

17 Caniga nacan ta inia' le'e: Dyē'ēdi bega'nlē Diuzi Abraham di'idza' dza na'te. Quie lena' cati baode tapa gayuhua galobechi iza, caora na' pca'n Diuzi ley quienē' lao na'a Moisés. Pero lēley na' bisaque' uquinon con cabē' rna di'idza' bega'nlē Diuzi Abraham.

18 Chi tali na' ruen zi hue quiero cabē' mandado rue lao ley tacuenda gata' yela' neban quiero tuzioli, na'ra bisaque' inaro gata' yela' neban quiero tuzioli tuzi tanun quie dan' sudyi'ilēro Cristo. Pero bega'nlē Diuzi Abraham di'idza' de que tuzi tanun quie dan' uzudyi'ilēnē' lēbē' gata' yela' neban quienē' tuzioli.

19 Na'ra, ¿ga hue dyin ley pca'n Diuzi lao na'a Moisés? Pues tanēro bega'nlē Diuzi Abraham di'idza', na'tera pca'nnē' ley quienē' lao na'a Moisés tacuenda inezi yaca benēchi' de dula' xquia quieyaquē'. Pero cala tuzioli hue ley na' dyin. Cati babdyin Cristo, ben' naca zi'isuba Abraham, ben' bega'nlē Diuzi Abraham di'idza', na'tera babeyudyi quien. Lēscan' inia' le'e itu di'idza': Caora pca'n Diuzi ley quienē', tanēro pca'nnē' lao na'a yaca ángel, na'tera pca'n yaca ángel ley na' lao na'a Moisés.

20 Pero caora bega'nlē Diuzi Abraham di'idza' dza na'te, tu cuinzi Diuzi bega'nlē'nē' Abraham di'idza', nunu ángel, nunu ben' tula use'elē'.

*Ni rguixogue'n ga hue dyin ley quie Moisés*

21 ¿Ca biži inaro? ¿Inaro birutila di'idza' ley na' cabē' naca di'idza' bega'nlē Diuzi Abraham? ¿Bireya'ala' inaro cana'! Porque chi saque' gata' yela' neban quiero tuzioli tanun quie dan' hue quiero cabē' mandado rue bitezi ley, na'ra tanun quie lēley na' gata' yela' neban quiero tuzioli.

22 Pero yuguluro rue dula' xquia quiero ra'o mandado. Dyē'ēdi rguixogue'n cana' lē'ē guichi la'iya quie Diuzi. Quie lena' nu ben' sudyi'ilē Cristo, con lēzin gata' cabē' di'idza' una Diuzi huenē' quiero.

23 Tu bineguida Cristo lao yedyi layu, bē ley quie Moisés ra'o mandado. Guca quiero ca quie ben' rbeza yero lu'u dyiguiba. Ulezaro guida Cristo uzioñe'enē' ra'o ta sudyi'ilēro lēbē'.

24 Naca ley quie Moisés ca quie nu maestro escuela, ben' napa xcuidi'. Cana' udapa ley ra'o tu bineguida Cristo lao yedyi layu ta sudyi'ilēro lēbē', na' yezi'ze Diuzi dula' xquia quiero, ilē'ēnē' ra'o ben' laxta'o yēri.

25 Pero na'a babida Cristo, abdyin hora sudyi'ilēro lēbē'. Quie lena' bira rapa ley quie Moisés ra'o ca nu maestro escuela, bira huen ra'o mandado.

26 Na'a banacale zi'i Diuzi tanun quie rzudyi'ilēle Cristo banuelenē' tuze.

27 Yugulule banaole xneza Cristo bagozole nisa ta ulu'en banuele Cristo tuze. Quie lena' barlē'ē Diuzi le'e cabē' rlē'ēnē' Cristo.

28 Nacaró tuzi la'acazi ben' Israel, la'acazi ben' za' yedyi tula, la'acazi ben' naca ca preso, la'acazi ben' rda libre, la'acazi be'mbyu, la'acazi nigula. Chi banuero Cristo tuze, nacaro tu cue'ziro.

29 Chi banuero Cristo tuze, banacaro dugalo zi'isuba Abraham. Hue Diuzi quiero yugulu cabē' di'idza' bega'nlē Diuzi Abraham dza na'te.

## 4

1-2 Cani naca tu di'idza' ca re'enda' inia' le'e: Inaro uzu tu ben' uña'a. Gutiguè' pca'nnè' ta de quienè', uzi' tu zi'inè' byu quienè' len. Pero como nenacatebi' xcuidi', biuzaque' gaca lao na'abi' len. Re'ennan gapa ben' tula len cuidado hasta idyin dza ca una xuzibi' gaquen quiebi'. Como binedyin hora gaque quiebi' ta de quie xuzibi', tu lèbizi nacan quiebi' ca quie ben' nada'o. Cabè' bigaquen quie ben' ruezzi dyin zan yu'u, cana' binaquen quiebi'. Pero cati idyin hora, na'ra gaquecazin quiebi'.

<sup>3</sup> Lèscana' naca quiero. Tu binedyin Cristo nerue dula' xquia quiero ra'o mandado.

<sup>4</sup> Pero cati bdyin hora, na'tera use'ela' Diuzi zi'inè'. Bi'a tu nigula lèbè', gologuè' naquè' ben' Israel, bè quienè' cabè' mandado rue lao ley pca'n Diuzi lao na'a Moisés.

<sup>5</sup> Cana' bidè' ulionè' pca'nnè' ra'o libre. Bira hue ley pca'n Diuzi lao na'a Moisés ra'o mandado. Cala tanun quie ley na' ilè'è Diuzi ra'o como ca zi'inè'.

<sup>6</sup> Na'ra ta ulu'en tali nacaro zi'i Diuzi, use'ela' Diuzi Bichi Be quienè' lao na'a zi'inè' Jesucristo, yu'unè' lu'u guicho laxta'oro. Quie lena' ru'en lato yè'biro Diuzi: "Xuza' luè'."

<sup>7</sup> Cana' naca quiero. Banacaro zi'i Diuzi, bira nacaro ca ben' nada'o, ben' binaca familia. Na' como nacan tali nacaro zi'i Diuzi, cana' gun Diuzi ra'o yela' neban quiero tuzioli tzazuro guibá.

*Rdèbi Pablo ca raca quie ben' nao xneza Jesús*

<sup>8</sup> Pero dza na'te cati binehuebè'le Diuzi, taže bedzagalaole lèle diuzi quiele dechan' cala diuzi.

<sup>9</sup> Pero na'a banuebè'le Diuzi (o mejorla inaro banuebè' Diuzi le'e), ¿bizi raca quiele yezulaole yenaole pensari bibizaca', pensari bihue dyin, na' yazi'lè tazi' yuda' xcu'udzule tatula?

<sup>10</sup> Neruele nenaole quie dza, quie biu', quie tiempo, quie iza, cabè' mandado rue lao ley pca'n Diuzi la'o na'a Moisés.

<sup>11</sup> Rdzeba' te cana'zi dyin bia' conlè le'e dza na' udirxogui'a le'e xti'idza' Diuzi.

<sup>12</sup> Bicha', du guicho du la'adya' inia' le'e: Tzu'ule ca pensari quia', porque rdèbida' cabè' raca quiele. Na'ra dza na' bèlèle nè'èdi' tadya'a.

<sup>13</sup> Dyè'èdi' nezile cabè' guca quia' guca zhui'a cati uzulaohua' udirxogui'a le'e xti'idza' Diuzi dza na'.

<sup>14</sup> La'acazi guquele zèdi cati guca zhui'a, bipsanla'adyi'le nè'èdi', bibèle yaladyi' conlè nè'èdi'. Dechan' uzule gusto, blè'èle nè'èdi' dza na' ca quie tu ángel quie Diuzi, blè'èle nè'èdi' cabè' rlè'èle Jesucristo.

<sup>15</sup> ¿Bizi guca quiele, bira zulèle nè'èdi' gusto? Nezda' chan' uzaque' dza na', uliole yolaole bènle quia' cuenda yelè'èda' dyè'èdi'.

<sup>16</sup> ¿Bizi guca quiele barlè'èle nè'èdi' ben' mala na'a, la'acazi di'idza' li rguixogui'a le'e?

<sup>17</sup> Na' yaca ben' re'en hue quie cabè' mandado rue lao ley pca'n Diuzi lao na'a Moisés, lega re'enyacuè' huelèyaquè' le'e tuže, pero cala ta gacalèn le'e. Re'enjè' usanla'adyi'le nètò' cuenda gacalèle leyaquè' tuže.

<sup>18</sup> Quele tamala na' huelè benè' le'e tuže, pero reya'ala' tzu'uyaquè' pensari dya'a ta gacalèyaquè' le'e. Pero reya'ala' gacalèjè' le'e yugu dza, cala yaca dzazi cati zulia' le'e.

<sup>19</sup> Zi'ina' dao' quia', tatula redzagalaohua' nun quiele ca redzagalao tu nigula re'en galo xcuidi' quie. Ni zua' rdèbida' quiele hasta yenaole xneza Cristo dyè'èdi' tatula.

<sup>20</sup> Tahuen na' chan' zulia' le'e na'a cuenda hue'lia' le'e di'idza' dyë'ëdi, pero birzaque'da' bihua' quiele como zua' zitu'.

*Pablo pxi'idze'në' tu ejemplo quie tu nigula lao Agar len itu nigula lao Sara*

<sup>21</sup> Le'e ben' re'en hue quie cabë' mandado rue lao ley pca'n Diuzi lao na'a Moisés, ulena chi nezile dyë'ëdi cabë' rguixogue'n lë'ë guichi ley na'.

<sup>22</sup> ¿Bizi raca quiele bineyele cabë' nan? Pues rnën quie Abraham unita' chopa xcuidi' byu quienë'. Tubi' nacabi' zi'i ben' nada'o laohuë' Agar. Itubi' nacabi' zi'i nigula quiecazinë' laohuë' Sara.

<sup>23</sup> Na'ra zi'i nigula nada'o, tu golozi'bi'. Pero zi'i nigula quiecazinë', golobi' ta uzu di'idza' ca di'idza' bega'n'lë Diuzi Abraham dza na'te.

<sup>24</sup> Con cabë' guca quie chopa nigula, nacan tu ejemplo ta ineziro ca naca chopa cue' compromiso bega'n'lë Diuzi yaca ben' Israel dza na'te. Ga zu lë'ë ya'a laona Sinaí, lëgan' na' bëlë Diuzi ben' Israel tu cue' compromiso, pca'nnë' ley quienë' lao na'a Moisés. Na'ra ca naca quie Agar, ben' nada'o quie Abraham, cana' nacarë quie ben' rue quie cabë' mandado rue lao ley pca'n Diuzi lao na'a Moisés. Nacajë' ca quie ben' nada'o, naca ley ca quie xa'një', binacajë' libre.

<sup>25</sup> Pues na' como banaca quie Agar, cana' nacarën quie lë'ë ya'a Sinaí ta nega'nnan yu nebaba ben' Arabia. Lëscan' nacarën cana' quie ciudad Jerusalén ta zu yedyi layu nun quie dan' rue ley quie Moisés yaca ben' nita' ciudad Jerusalén mandado. Hasta yugulu ben' Israel ruen mandado quieyaquë'. Naca ley quie Moisés ca quie xa'nyaquë' nun quie dan' ruen quieyaquë' mandado.

<sup>26</sup> Pero ra'o nacaro ben' ciudad Jerusalén ta zu guibá. Cana' nacaro ben' libre bira ruen ley quie Moisés ra'o mandado.

<sup>27</sup> Lena' rguixogue'n lë'ë guichi la'iya quie Diuzi cani:

Reya'ala' yedaohuero ra'o ben' naca ben' ciudad Jerusalén ta zu guibá.

Bira naca ciudad quiero ca quie tu nigula huidyi', ben' biru'a xcuidi'.

Bira naca ciudad quiero ca quie tu nigula binuebë' yela' re rla cati ralo xcuidi'.

Porque huida ben' zë gula, ben' inita' ciudad Jerusalén ta zu guibá.

Pero bira inita' ben' zë ciudad Jerusalén ta zu yedyi layu.

Cana' rguixogue'n ra'o.

<sup>28</sup> Na'ra, bicha', re'enda' inia' le'e tu di'idza': Cabë' bega'n'lë Diuzi Abraham di'idza' golo tu zi'inë' Isaac, cana' naca quiero. Yela' nao xneza Cristo quiero nacaro zi'isuba Abraham según ca di'idza' bega'n'lë Diuzi Abraham dza na'te.

<sup>29</sup> Pero cabë' guca dza na'te, psaca zi'i nigula nada'o quie Abraham zi'i nigula quiecazi Abraham bizinaquezi, cana' racarë quiero na'a. Yaca ben' rue quie cabë' mandado rue lao ley quie Moisés, rusacajë' ra'o, ben' yu'u Bichi Be quie Diuzi lu'u guicho laxta'ohue, bizinaquezi.

<sup>30</sup> Pero ¿bizi rguixogue'n lë'ë guichi la'iya quie Diuzi? Pues rguixogue'n de que gudyi Diuzi Abraham ta usannë' quie nigula nada'o quienë' lënë' zi'inë', como dan' bisaque' yega'n lao na'a zi'i nigula nada'o quienë' ta de quienë'. Nacacazin ta yega'nnan lao na'a zi'i nigula quiecazë'.

<sup>31</sup> Cana' rguixogue'n ra'o, bicha'. Binacaro zi'i nigula nada'o quienë', dechan' nacaro zi'i nigula quiecazë'.

## 5

*Bihuero lato initi libertad quiero*

1 Dyin bē Cristo nacaro libre, bira rue ley quie Moisés ra'o mandado. Na' gapale cuidado bihuele lato initi libertad quiele. Bira uda'le tazi' xcu'udzule tatula ta bisuele hua'ale.

2 Ulezēnaga dyē'ēdi ca rnia' nē'ēdi', Pablo. Chi huele lato su tu xēdyidao' cuinle, chi por lena' huele pensari yezi' Diuzi le'e, na'ra cabē' bē Cristo para le'e, bibi zaca'n para le'e lao Diuzi.

3 Tatula quixogui'a le'e: Nutezi ben' ru'e lato su tu xēdyidao' cuine, yela' na' huenē' pensari por lena' yezi' Diuzi lēbē', na'ra nacan obligaciōn quienē' huenē' yugulu ca mandado rue lao ley quie Moisés.

4 Chi huele pensari yezi' Diuzi le'e tanun quie dan' rue quiele cabē' mandado rue lao ley quie Moisés, quie lena' apsanla'adyi'le Cristo, aoru'unle tzala'la yela' racalē Diuzi.

5 Pero binacan cana' quiero. Rbezaro yezi' Diuzi ra'o tanun quie dan' rzudyi'ilēro Cristo baoyu'u Bichi Be quie Diuzi lu'u guicho laxta'oro.

6 Chi banuero Cristo Jesús tuze, gabi huanan chi zuro, chi bizuro, tu xēdyidao' cuinro ca mandado rue lao ley. Tu ta reya'ala' huero, reya'ala' inaoro xneza Cristo edyē'ēro laguedyiro.

7 Le'e unita' dyē'ēdi dza na'. ¿Nuzi bē mandado apsanla'adyi'le bira rue quiele xti'idza' Diuzi?

8 Binaca quie Diuzi cabē' ruele. Pues ulio Diuzi le'e ta gacale ben' quienē'.

9 Bigala'adyi'le ca naca quie cuba yēta xtila. Conlē ilē'ēti' levadura ila'adyin duzete cuba.

10 Nužela'adya' gacalē Cristo le'e ta huele pensari ca pensari quia'. Pero hue Diuzi castigo nu ben' rda rutēbi guicho laxta'ole. Nutezi ben' rue cana' huenē' lējē' castigo.

11 Nita' ben' na nere'enda' sua' tu xēdyidao' cuin yaca ben' nao xneza Jesús. Nayaquē' rguixogui'a chi bizu xēdyidao' cuin yaca ben' nao xneza Jesús, biyezi' Diuzi leyaquē'. Pero cala lena' rguixogui'a. Chi tali lena' rguixogui'a, birdza' yaca ben' Israel nē'ēdi'. Chi tali lena' rguixogui'a, birdza'yaquē' cabē' rnia' quie Cristo rnia' gutinē' lē'ē yaga cruzo ta yezi' dula' xquia quiero.

12 Pero quie nu ben' rda rutēbi guicho laxta'ole, ben' rēbi le'e biyezi' Diuzi le'e chi bizu tu xēdyidao' cuinle, na'ra mejorla tu chi'zi ichugule quiejē', bira huele lato huelēyaquē' le'e zēdi.

13 Pero le'e, bicha', ulio Diuzi le'e cuenda gacale libre inaole xneza Cristo. Quie lena' bireya'ala' huele ta rnazin quiele. Mejorla gacalēle laguedyile edyē'ēle laguedyile.

14 Porque chi edyē'ēro laguedyiro cabē' nedyē'ēro cuinro, con tuzi len barue quiero cabē' yugulu mandado rue lao ley quie Moisés.

15 Pero chi tilalēro gacazē'ro laguedyiro, reya'ala' gaparo cuidado, porque ruen žudyi udyiaguī'ro laguedyiro, na' udyiaguī'ro cuinro.

*Bihuero ta rnazin quiero, huero ca mandado rue Bichi Be quie Diuzi ra'o*

16 Cani rguixogui'a le'e: Ulehue quiele ca mandado rue Bichi Be quie Diuzi le'e. Chi huele cana', huabehan quiele dan' rnaban huele ta rnazin quiele.

17 Porque chi huele ta rnazin quiele, lena' rdilalēn Bichi Be quie Diuzi. Pero chi hue quiele ca mandado rue Bichi Be quie Diuzi, lena' gacalēn le'e ta bihuele ta rnazin quiele. Cana' nacan porque rdilalē pensari quiele le'e, bire'ennan hue quiele cabē' mandado rue Bichi Be quie Diuzi. Quie lena' ruen zēdi quiele huele ca reya'ala' huele.

18 Chi rue quiele cabē' mandado rue Bichi Be quie Diuzi le'e, na'ra bira rue ley quie Moisés le'e mandado.



<sup>19</sup> Dyë'ëdi neziro ca rue ben' rue ta rnazin quie. Rdalëyaquë' nigula binaca quieyaquë', ruejè' bayatza, biredue'yaquë',

<sup>20</sup> rionla'adyi'yaquë' yo yaga, ruejè' yela' brujo, rguiloyaquë' dila, racazë'yaquë' laguëdyiyaquë', rdza'jè' benè' con ganzi, quieziyè' re'enjë' gaca huen, rguiloyaquë' rbëchiyaquë' tu cue' ben' quieyaquë'.

<sup>21</sup> Nacajè' ben' zè', rutijè' benè', rdajè' hue'e, raojè' con ta rlè'ëyaquë', tazëla tamala naoyaquë' rueyaquë'. Tatula inia' le'e cabè' gudya' le'e dza na'te: Biyezi' Diuzi nù ben' rue cana'.

<sup>22</sup> Pero netza' ca rue ben' yu'u Bichi Be quie Diuzi. Nadyè'ëyaquë' laguëdyiyaquë', sujè' gusto, rbe' chizi guicho laxta'ojè', nacajè' ben' zela'adyi', rapajè' laguëdyiyè' bala'ana, nacajè' ben' huen, ben' ruzu di'idza'.

<sup>23</sup> Biruejè' ze cuinjè', biruejè' ta rnazin quieyaquë'. Para ra'o, ben' yu'u Bichi Be quie Diuzi, birabi ley de ta ichugubè' cabè' ruero.

<sup>24</sup> Chi banuero Cristo tuže, na'ra apsanla'adyi'ro bira huero ta rnazin quiero. Ca naca quie ben' baguti, bira saque' huejè' ta rnazin quieyaquë', cana' naca quiero, bira saque' huero ta rnazin quiero.

<sup>25</sup> Pues ca naca quiero yu'uro Bichi Be quie Diuzi, cana' reya'ala' huero lato inabè'nè' ra'o ca huero.

<sup>26</sup> Quie lena' bireya'ala' huero cuinro ben' ze. Bireya'ala' utituro laguëdyiro ta idza'yaquë' ra'o, nica yežè'ro laguëdyiro.

## 6

### *Reya'ala' gacalëro laguëdyiro*

<sup>1</sup> Bicha', chi ga nezile zu tu ben' nao xneza Cristo, pero napè' xquia, le'e ben' rue quie dyë'ëdi quie Bichi Be quie Diuzi, reya'ala' gacalële lèbè' ta usannè' bira gapè' xquia. Hue'lëronè' di'idza' zela'adyi'. Gaparo cuidado cuinro, bihue'ro lato iquixiro ugaparo xquia cuinro.

<sup>2</sup> Lëscan' reya'ala' gacalëro laguëdyiro ca tazèdi raca quieyaquë'. Chi huero cana', cana' hue quiero huero cabè' mandado bë Cristo ra'o.

<sup>3</sup> Chi huero cuinro ben' ze, chi bire'enro bigacalëro laguëdyiro, cana' barzi'ro yè' cuinro.

<sup>4</sup> Yuguluro reya'ala' huero pensari chi nacan huen, chi binacan huen cabè' ta ruero. Chi neziro tali nacan tahuen cabè' ta ruero, na' reya'ala' suro contento, bihue'ro lato utëbin ra'o ca ina yaca los demás benè'.

<sup>5</sup> Yuguluro reya'ala' huero bala ca naca ta raca quiero.

<sup>6</sup> Nu ben' ruzioñe'e ra'o xti'idza' Diuzi, reya'ala' gacalërojè' con ta de quiero.

<sup>7</sup> Bisi'le cuinle yè'. Nunu saque' utitu Diuzi. Naca quiero ca quie ben' raza bini. Ca ta gazaru layu, de yezi'ro cosecha quien.

<sup>8</sup> Chi hue benè' ta rnazin quiejè', na'ra lena' udyiaguè' n lèjè' lao Diuzi. Ruen zudyi biyezi' Diuzi lèjè', na' bigata' yela' neban quiejè' tuzioli. Pero chi hue nu benè' con cabè' rna Bichi Be quie Diuzi, chi hue quieyaquë' quienè', na'ra gata' yela' neban quieyaquë' tuzioli.

<sup>9</sup> Cana' biyuhuëdiro huero tahuen, porque chi biyuhuëdiro huero tahuen, huela'ia Diuzi ra'o caora idyin hora.

<sup>10</sup> Quie lena' reya'ala' gacalëro nutezi benè', reya'ala' huero tadya'a quieyaquë'. Lëscana' ta naca belao na' gacalëro ben' bichiro, ben' nao xneza Cristo.

### *Ga beyudyi di'idza' bzu Pablo lè'ë guichi*

<sup>11</sup> Ulena'cara ca letra yela ruzua' lè'ë guichi ni conlè na'a cuina'.

<sup>12</sup> Biruejè' huen yaca ben' re'en uzu tu xèdyidao' cuinle cabè' mandado rue lao ley quie Moisés. Rdzebijè' idza' ja ben' Israel lèjè' chi quixogue'jè' tuzi sudyi'ilèro Cristo, ben' guti lè'è yaga cruzo, con lèzin yezi' Diuzi ra'o.

<sup>13</sup> Pues nu yaca ben' babzu tu xèdyidao' cuine cabè' mandado rue lao ley quie Moisés, nica lèjè' birue quieyaquè' yugulu di'idza' cabè' mandado rue lao ley na'. Pero re'enjè' su tu xèdyidao' cuinle cuenda gacajè' ben' ze lao laguedyiaquè', dan' bèjè' gan zule tu xèdyidao'.

<sup>14</sup> Pero por tu parte quia' nè'èdi', birguiloga' bi hua' ta gaca ben' ze lao laguedya'. Tuzi ca re'enda', re'enda' gaca' ben' ze lao Jesucristo, ben' guti lè'è yaga cruzo ta yezi dula' xquia quiero. Binacan belao chi ilè'è yaca benè' nè'èdi' ben' ze. Lèscan' binacan belao chi ilè'èda' leyaquè' ben' ze.

<sup>15</sup> Chi nacalèro Cristo tuze, bibi huenan chi zu, chi bizu tu xèdyidao' cuinro cabè' mandado rue lao ley quie Moisés. Pero ruenan zi usanro pensari gula quiero huero pensari cubi ta zaza'lè Cristo.

<sup>16</sup> Rulidza' Diuzi cuèchinè' chizi guicho laxta'ole yeyèchi'la'adyi'nè' le'e, ben' nuelè Cristo tuze, yu'ule pensari cubi ta zaza'lè Cristo. Rulidza' Diuzi por yugulu ben' nao xneza Cristo, ben' naca ben' quie Diuzi.

<sup>17</sup> Na'ra bira re'enda' huelèle nè'èdi' zèdi ca naca di'idza' aodixogui'a le'e ni. Pues badyiacaza' zè xèdyi ga bèn yaca benè' nè'èdi' zi', ben' rudie nè'èdi' tanun quie dan' naohua' xneza Cristo. Lèxèdyi na' rulu'en naca' ben' rue quie cabè' mandado hue Cristo nè'èdi'.

<sup>18</sup> Bicha', rulidza' Señor quiero Jesucristo ta huela'iyane' le'e yugulule. Amén.

## DI'IDZA' BZU SAN PABLO APÓSTOL LĒ'Ē GUICHI, USE'ELA'NĒ'N LAO CIUDAD EFESO

*Use'ela' Pablo guichi ni lao yaca ben' nao xneza Jesús, yaca ben' nita' ciudad Efeso*

<sup>1</sup> NĒ'Ēdi', Pablo, bdĕ' Diuzi nĒ'Ēdi' según ca re'ennĕ' huenĕ' use'ela'nĕ' nĒ'Ēdi' lao na'a zi'inĕ' Jesucristo. Bia' guichi ni use'ela'n lao le'e ben' nita' ciudad Efeso. Nacale ben' quie Diuzi. Nacale ben' nao xneza Cristo Jesús.

<sup>2</sup> Rulidza' Diuzi lĕnĕ' zi'inĕ' Jesucristo ta huela'iya Jesucristo le'e cuĕchyaquĕ' chizi lu'u guicho laxta'ole.

*Tazĕla babĕla'iya Diuzi ra'o ta biyeyudyi yedu quie*

<sup>3</sup> Reya'ala' huero Diuzi ben' ze, ben' naca xuzi Señor quiero Jesucristo. Lao na'a Cristo tazĕla babĕla'iyane' ra'o ta biyeyudyi yedu quie cuenda na' yedyinro guibá.

<sup>4</sup> Tu binecua' yedyi layu ulio Diuzi ra'o lao na'a Cristo ta gacaro ben' quienĕ'. Lĕscan' ulionĕ' ra'o ta yezi dula' xquia quiero, na' yeyĕri guicho laxta'oro lao Diuzi.

<sup>5</sup> Azio zĕ iza una Diuzi yezi'nĕ' ra'o iyacaro como ca zi'inĕ' nun quie nedyĕ'ĕnĕ' ra'o lao na'a Jesucristo. Cana' bĕnĕ' de acuerdo con ca re'ennĕ' huenĕ' quiero.

<sup>6</sup> Quie lena' huero Diuzi ben' ze gaparonĕ' bala'ana como dan' naquĕ' ben' ze, ben' bala'ana quiero. Huero Diuzi ben' ze como dan' zĕla bĕla'iyane' ra'o tanun quie nuelĕro zi'inĕ' tuze. Lega nedyĕ'ĕ Diuzi zi'inĕ'.

<sup>7</sup> Tanto nedyĕ'ĕ Diuzi ra'o, apte pselanĕ' ra'o quie dula' xquia quiero tanun quie guti zi'inĕ' lĕ'ĕ yaga cruzo para ra'o, cana' uzi'zenĕ' quiero.

<sup>8</sup> Taze bablu'e Diuzi nedyĕ'ĕnĕ' ra'o babzioĕne' enĕ' ra'o ca naca pensari quie'.

<sup>9</sup> Na'tera babzioĕne' enĕ' ra'o tu ta binezi benĕ' tiempote. Bzioĕne' enĕ' ra'o ca unane' huenĕ' ise'elĕ' Cristo.

<sup>10</sup> Según cabĕ' una Diuzi huenĕ' cati idyin hora tu dza zaza'ra, yetupanĕ' yugulu ta dyia guibá, len yugulu ta de lao yedyi layu, ta uca'nnĕ'n lao ladyina' Cristo.

<sup>11</sup> Tanun quie nuelĕro Cristo tuze, cana' ulio Diuzi ra'o dza na'te tacuenda gunnĕ' ra'o ca ta re'ennĕ' gunnĕ' ra'o. Cana' gaca quiero cabĕ' pensari bĕ Diuzi huenĕ' quiero dza na'te, porque puro ta nacarĕ tahuen hue Diuzi.

<sup>12</sup> Na'ra nĕto', ben' nĕro, ben' nao xneza Cristo, guca quiendo' cana' tacuenda huendo' Diuzi ben' ze gapando'nĕ' bala'ana nun quie naquĕ' ben' huen gula.

<sup>13</sup> Pero lĕscan' le'e, cati babele quie di'idza' li quie Diuzi, cati babele cabĕ' hue Diuzi re'ennĕ' gunnĕ' ra'o yela' neban tuzioli, na'tera barnaole le'e Cristo, anacalĕnenĕ' tuze. Por nun quie bayu'u guicho laxta'ole Bichi Be que Diuzi, lena' rulu'en banacale ben' quie Diuzi. Cana' bĕ Diuzi según ca unĕ' huenĕ' quie Bichi Be quienĕ' dza na'te.

<sup>14</sup> Como dan' bayu'uro Bichi Be quie Diuzi, lena' barzela'adyi'ro gun Diuzi ra'o yugulu cabĕ' ta unĕ' gunnĕ' ra'o cati yedyinro guibá nacaro libre. Caora na' yĕbiro Diuzi: "Diuxcalelo' naco' ben' ze quiendo'."

*Rnaba Pablo lao Diuzi ta uzioĕne' enĕ' yaca ben' nao xneza Cristo*

15-16 Quie lena' birusana' rulidza' Diuzi rēpa'nē' diuxcalelo' nun quiele como dan' babeda' dyē'ēdi barnaole xneza xa'nro Jesús, dyē'ēdi idyē'ēle laguedyile, ben' quie Diuzi.

17 Rulidza' Xuziro Diuzi, ben' de yela' huaca quie, ta gacalēnē' le'e tzioñe'ele dyē'ēdi ca naca pensari quienē', lēscan' ta uzioñe'enē' le'e cabē' bē Cristo, bidanē' bēnē' ca mandado bē Diuzi lēbē' dza na'te.

18 Lēscan' rulidza' Diuzi ta useni'nē' guicho laxta'ole cuenda inezile dyē'ēdi ca naca yela' rbeza quiero yezi' Diuzi ra'o yedyinro guibá, ra'o ben' ulio Diuzi dza na'te. Lēscan' rulidza' Diuzi ta tzioñe'ele dyē'ēdi cabē' tadya'a gula gaca quiero yedyinro guibá gun Diuzi ra'o yela' neban quiero tuzioli, ra'o ben' quienē'.

19 Lēscan' rulidza' Diuzi ta tzioñe'ele quie Diuzi de yela' r nabē'tzegue quienē', birdzioguenē' yela' r nabē' ta gacalēnē' ra'o, ben' quienē'. Blu'e Diuzi de yela' r nabē'tzegue quienē'

20 cati psebannē' Cristo heroguē' ga redyin ben' huati, bēnē' mandado cue'nē' zaquē' yebē ga re'nē' guibá.

21 Bē Diuzi nombrar Cristo ben' r nabē'ra lao yugulu ben' napa yela' r nabē', la'acazi ben' nita' lao yedyi layu, la'acazi ben' nita' guibá, la'acazi ben' nita' na'a, la'acazi ben' zaza'ra.

22 Pca'n Diuzi lao na'a Cristo yugulu ta de lao yedyi layu len yugulu ta de guibá. Lēscan' bēnē' nombrar lēbē' ben' r nabē'ra lao yugulu ben' nao xnezē'.

23 Nacaro ra'o, ben' nao xneza Cristo, tu cue'ro ben' nuelē Cristo tuze. Con Cristo naya'aro tu cue'ro. Naca Cristo ben' r nabē' lao yugulutero.

## 2

### *Yela' nedyē'ē quie Diuzi yezi'nē' ra'o*

1 Dza na'te guca quiele ca quie ben' huati lao Diuzi. Dyin bē dula' xquia quiele, biyu'ule pensari bēle ta rnazin quiele.

2 Unaole bēle ca rue yaca ben' nita' lao yedyi layu. Bē quiele quie Satanás, ben' naca xan' bichi be mala, ben' ru'e fuerza yaca ben' birue quie ca na Diuzi.

3 Cana' bēcazi ra'o yuguluro dza na'te caora biunaoro xneza Cristo. Bēro ta rnazin quiero, na' bē quiero quie pensari mala quiero. Quie lena' de ga hue Diuzi ra'o castigo huala lēbi ca yaca los demás ben' nita' lao yedyi layu.

4 Pero taže beyēchi'la'adyi' Diuzi ra'o. Tanto nedyē'ēnē' ra'o

5 bēnē' tacuenda gata' yela' neban quiero tuzioli caora cati psebannē' Cristo. Cana' bēnē' quiero dza na'te la'acazi nenacaro ca ben' huati, neyu'uro pensari mala unabē' dula' xquia quiero ra'o. Yela' ben' huen quie Diuzi bēnē' ta gata' yela' neban quiero tuzioli.

6 Cana' naca quiero ca quie ben' apseban Diuzi cabē' psebannē' Cristo. Cana' naca quiero yedyinro cue'lēro inabē'lēro Cristo guibá.

7 Cana' bēnē' quiero cuenda ye inezi ben' zaza'ra dza zaza'ra cabē' taže nedyē'ēnē' ra'o, taže gacalēnē' ra'o babēnē' tahuen quiero, ben' nao xneza Cristo Jesús.

8 Como taže nedyē'ē Diuzi ra'o, cana' bēnē' ta gata' yela' neban quiero tuzioli. Cala por nun quie dan' bi huero cuinro, na' gun Diuzi ra'o yela' neban quiero tuzioli, decha'n' ta gunzi Diuzi ra'o ca regalo por nun quie zi'inē'.

9 Como binacan por nun quie dan' bi huero cuinro, na' gun Diuzi ra'o yela' neban quiero tuzioli, quie lena' bide bi huero ta huero cuinro ben' ze lao Diuzi.

10 Cana' naca quiero, como dan' ta bē Diuzi banaoro xneza Cristo Jesús banuelēro lēbē' tuže. Cana' bēnē' quiero cuenda huero tadya'a cabē' unanē' quiero huero dza na'te.

*Baore' chizi guicho laxta'oro por nun quie banaoro xneza Cristo*

11 Quie lena' reya'ala' yeza'la'adyi'le cabē' guca quiele dza na'. Cala ben' Israel'le'e. Bizu tu xēdyidao' cuinle cabē' mandado rue lao ley quie ben' Israel. Quie lena' biblē'ē ben' Israel le'e dya'a, como dan' yugulu ben' Israel bazu xēdyidao' cuinyaquē'. Tanun quie lena' nayaquē' ben' quie Diuzi lējē', na' le'e binuebē'le Diuzi nayaquē'.

12 Dza na'te nita'le binuebē'le Cristo, bibēle cuenda ben' Israel. Nica nezile ca naca di'idza' bega'nlē Diuzi ben' Israel dza na'te. Nita'le lao yedyi layu binezile chi zu Diuzi, biulezale yeyole guibā.

13 Pero na'a, banuelēle Cristo Jesús tuže. La'acazi nica nezile chi zu Diuzi dza na'te, na'tera banezile zu Diuzi, banuebē'le lēbē'. Cana' naca quiele como dan' bida Cristo lao yedyi layu, gutinē' lē'ē yaga cruzo.

14 Cuin Cristo naquē' ben' rbēchitza'o laxta'oro. Dyin quienē' abeyaca yugulu ben' nao xnezē' ca tu yedyizi. Banacaro ca tu yedyizi la'acazi ben' Israel, la'acazi ben' binaca ben' Israel. Lēbē' apquinoguē' yela' rudie laguedyi quiero cabē' ruquino besu zu ruza'aga benē'.

15 Caora cati guti Cristo lē'ē yaga cruzo, cana' uleza ley quie Moisés, bira inabē'n ra'o huero mandado quien. Cana' beyue Cristo chopa cue' benē' beyacaro tu cue'zi ben' cubi, ben' nuelē lēbē' tuže. Cana' bēnē' quiero caora ulēchitza'ohuē' quiero.

16 Lēscan' caora guti Cristo lē'ē yaga cruzo, cana' uleza tazēdi raca entre lao rupa cue'ro. Cana' ulēchitza'ohuē' quiero conlē Diuzi. Beyuenē' ra'o tužezi.

17 Bida Cristo lao yedyi layu, udixogue'nē' benē' xti'idza' Diuzi gudyinē' leyaquē' ca re'en Diuzi cuēchitza'ohuē' guicho laxta'oro. Udixogue'nē' le'e ben' binaca ben' Israel, ben' biunezi chi zu Diuzi. Lēscan' udixogue'nē' nēto' ben' Israel, ben' nezi zu Diuzi.

18 Dyin bē Cristo racalē Bichi Be quie Diuzi ra'o ta huebē'ro Xuziuro Diuzi, la'acazi nacaro ben' Israel, la'acazi nacaro ben' za' yedyi tula.

19 Quie lena' bira nacale ca quie tu ben' za' yedyi zitu', ben' bdyin ga binaca yedyi quie, dechan' banadele cuenda lao Diuzi na'a lēle yaca los demás ben' nao xneza Cristo. Banacale familia quie Diuzi.

20 Naca quiero ca quie tu yu'u besu de yo. Naca yaca ben' apóstol len yaca los demás ben' profeta ca quie ga rzulao besu. Le'e nacale ca quie yo rucua'jē' besu. Naca cuin Jesucristo ca quie yo belao rbēchियाquē' ga rzulao bezu.

21 Lao yo belao, inaro Cristo, rucua' Diuzi yo quie besu dyē'ēdi. Rlisē' tu besu dya'a gula ta gaca idao' naca la'ya como dan' idao' quie Cristo na'.

22 Cana' naca quiele, banuelēle Cristo tuže. Quie lena' nacale ca quie tu idao' r nabē'ra quie Cristo. Lēscan' yugulu ra'o ben' nao xnezē', banuelēro Cristo tuže bayu'uro Bichi Be quie Diuzi, yela' na' nacaro ca quie tu idao' r nabē'ra ga zu Diuzi.

### 3

*Bē Diuzi nombrar Pablo ta tzetixogue'nē' ben' binaca ben' Israel xti'idzē'*

1 Quie lena' nē'ēdi', Pablo, naca' preso dia' lu'u dyiguiba nun quie rdza' ja benē' rguixogui'a xti'idza' Cristo Jesús. Biraxejē' re'enda' gaca huen quiele le'e, ben' binaca ben' Israel.

2 Nužela'adya' banezile cabē' ta ulio Diuzi nē'ēdi' ta quixogui'a le'e quie xti'idzē' como dan' re'ennē' yedyinle guibā.

<sup>3</sup> Lëscan' babzioñe'e Diuzi në'ëdi' cabè' unanè' dza na'te huenè' quiele. Bibzioñe'enè' ben' tula. Na'tera bzioñe'enè' në'ëdi' quie pensari quiè'. Lëpensari quie Diuzi babzua' lè'ë guichi ni tu chopa.

<sup>4</sup> Caora bablabale quie di'idza' bzua' lè'ë guichi ni, na'tera inezcazile de que nezda' cabè' una Cristo huenè' quiele dza na'te.

<sup>5</sup> Bibzioñe'e Diuzi yaca ben' unita' tiempote cabè' unanè' huenè' quiele. Pero na'a sí, lao na'a Bichi Be quienè', babzioñe'e Diuzi yaca apóstol quienè' len yaca los demás ben' rguixogue' xti'idzè', yaca ben' naca la'ya.

<sup>6</sup> Cani naca ca una Diuzi dza na'te: Chi hue quiele le'e ben' binaca ben' Israel xti'idza' Diuzi, na'tera huela'ya Diuzi le'e, gunnè' le'e yela' neban tuzioli lè'bizi ca huela'ya Diuzi në'to' ben' Israel, gunnè' në'to' yela' neban tuzioli. Lëscan' quie lena', nacarèle ben' nuelè Cristo tuže cabè' në'to'. Gun Diuzi le'e baneza ta de guibá cabè' di'idza' bega'nlè Diuzi në'to' ben' Israel dza na'te por nun quie Cristo Jesús.

<sup>7</sup> La'acazi bibi zaca' ta hua' dyin quie Diuzi, bënë' nombrar në'ëdi' ta tza'a tzetixogui'a yaca benè' xti'idzè' cabè' unanè' huenè' dza na'te ta gacalènè' ben' nita' lao yedyi layu. Yela' r nabè' quienè' bënë' nombrar në'ëdi'.

<sup>8</sup> La'acazi ni lè'ëti'zi bibi zaca' ta hua' dyin quie Diuzi cabè' zaca'ra los demás ben' rguixogue' xti'idzè', dechan' ulio Diuzi në'ëdi', bënë' cule, use'elè' në'ëdi' tzetixogui'a ben' binaca ben' Israel ca naca quie Cristo, naquè' ben' ze, biyeyuyi yedu tahuen huenè' quiero.

<sup>9</sup> Na' bē Diuzi në'ëdi' mandado yexi'idze'na' yugulu benè' ca naca quie pensari quienè' cabè' unanè' huenè' tiempo gula ta gacalènè' ben' binaca ben' Israel. Desde dza na'te nunu ben' gulá nezi ca naca quie pensari quiè' ca huenè' quie ben' binaca ben' Israel. Cana' naca pensari quie Diuzi, naquè' ben' raca rue yugulute.

<sup>10</sup> Cana' bē Diuzi bënë' iyaca tužezi ben' rue quie quienè', ben' Israel len ben' binaca ben' Israel, cuenda il'è' yaca ben' r nabè' zu guibá naca Diuzi ben' nayoñe'e yugulute.

<sup>11</sup> Cana' bē Diuzi, bënë' según ca unanè' huenè' quiero desde tiempo dza na'te. Nun quie lena' use'elè' ži'inè' Jesucristo, ben' naca xa'nro. Confé lèbè' uya'lao bëyaquè' ca re'en Diuzi gaca.

<sup>12</sup> Tanun quie nuelèro Cristo tuže, cana' de lato hue'lèro Diuzi di'idza' cabè' ru'elèro xuzi žna'ro di'idza'. Biidzebiro bigaquero huadza' Diuzi ra'o. Cana' naca quiero dan' barue quiero quie ži'inè'.

<sup>13</sup> Bidèbile ta raca quia' niga. Uzule pensari dyè'ëdi, como dan' por nun quie ta gaca huen quiele dia' ni redzagalaohua'.

### *Taze nedyè'ë Cristo ra'o*

<sup>14</sup> Tanto bē Diuzi tadya'a quiero, redaohueda' rguitzu ziba' laohuè' naquè' Xuzi Señor quiero Jesucristo.

<sup>15</sup> Lëscan' naquè' Diuzi Xuzi yuguluro, la'acazi bazuro guibá, la'acazi nenita'ro lao yedyi layu.

<sup>16</sup> Rulidza' Diuzi udze'nè' fuerza valor lu'u guicho laxta'ole gacalè Bichi Be quienè' le'e. Birdziogue Diuzi fuerza valor quienè' gacalènè' le'e.

<sup>17-18</sup> Cana' rulidza' Diuzi cuenda bayu'ule pensari quie Cristo lu'u guicho laxta'ole, na' inabè'n le'e dyè'ëdi. Lëscan' rulidza' Diuzi ta gacalènè' le'e ta inezile taze nedyè'ë Cristo le'e. Cana' reya'ala' inezile cuenda tzioñe'ele le'e, len yaca los demás ben' nao nzeza Cristo, de que biyeyuyi yedu quie yela' nedyè'ë quie Cristo para ra'o.

<sup>19</sup> Rulidza' Diuzi tacuenda gacalènè' le'e tzioñe'ele ca naca quie yela' nedyè'ë quie Cristo para ra'o, la'acazi bisaque' tzioñe'elen delu derè'. Cana'

rulidza' Diuzi cuenda hue'le lato inabë' Diuzi le'e con ga zuzële du dza du yela.

<sup>20</sup> Na'ra reya'ala' ulidzaro Diuzi dan' naquë' ben' ze. De yela' r nabë' quienë' ta huenë' yugulute. Tažera de hue Diuzi quiero cabë' ta inabaronë' huenë'. Tažera de hue Diuzi quiero cabë' ta racaro pensari huenë'. Conlë ra'o ruelë Diuzi yela' huaca quienë'.

<sup>21</sup> Naca Diuzi ben' ze. Reya'ala' ulidza yugulu ben' nao xnezë' lëbë'. Reya'ala' ulidza yugulu ben' rue quie zi'inë' Cristo Jesús lëbë'. Cana' reya'ala' gaca quienë' tuzioli. Amén.

## 4

### *Dyin quie Bichi Be quie Diuzi nacaro tuze*

<sup>1</sup> Quie lena' du guicho du la'adya' inia' le'e reya'ala' tale dyë'ëdi como dan' ulio Diuzi le'e gacale ben' quienë'. Cana' nia' në'ëdi' dia' lu'u dyiguiba naca' preso nun quie dan' rdza' yaca benë' në'ëdi' rguixogui'a xti'idza' Diuzi.

<sup>2</sup> Bihuele cuinle ben' ze, huele gaxo conlë laguedyile. Gacale ben' zela'adyi', yeyëchi'la'adyi'le laguedyile, idyë'ële laguedyile.

<sup>3</sup> Huele lato gacalë Bichi Be quie Diuzi le'e ta huele tuze conlë laguedyile, cana' cue' chizi guicho laxta'olë.

<sup>4</sup> Naca yugulu ra'o, ben' nao xneza Cristo, tu cue'zi ben' nuelë lëbë' tuze. Tuzi Bichi Be quie Diuzi yu'uro yuguluro. Lëscan' como ulio Diuzi ra'o, tuzi naca yela' rbeza quiero rbezaro yedyinro guibá.

<sup>5</sup> Cani naca quiero: Tuzi Cristo zu neziro naca xa'nro, tuzi xti'idza' Diuzi de neziro nacan ta hue quiero, tuzi bautismo de neziro nacan ta gacaro.

<sup>6</sup> Tuzi Diuzi zu naquë' Xuziro yuguluro. Lëbë' r nabë'në' lao yuguluro, lëbë' rudë'në' ra'o bi dyin quienë' huero yuguluro, lëbë' runnë' fuerza valor de quero yuguluro.

<sup>7</sup> Pero quie quiero nudë' Cristo ra'o gunnë' fuerza valor bi dyin quienë' huero.

<sup>8</sup> Lena' rguixogue'n lë'ë guichi la'iya quie Diuzi cani:

Caora beyëpi Cristo ladza zeyonë' bedyinnë' guibá tatula, caora na' blu'en quienë' bënë' gan lao yaca ben' bdie lëbë'.

Caora na' bëla'iya Cristo ra'o, bënnë' ta naca dya'a quiero.

<sup>9</sup> ¿Pero biži ca inaro quie di'idza' gan' rnën cani: “Beyëpinë' zeyonë' bedyinnë' guibá tatula”? Lena' inaro tanëro uyëzinë' bdyinnë' uzunë' lao yedyi layu.

<sup>10</sup> Na'ra lëcazë' beyëpinë' zeyonë' bedyinnë' guibá tatula ta inabë'në' lao yugulu ta naguixu Diuzi.

<sup>11</sup> Na'tera bënnë' laze nudë'në' ra'o bi dyin quienë' huero. Nudë'në' nu ben' gaca apóstol. Nudë'në' nu ben' quixogue' ca naca quie di'idza' gudyi Diuzi lëjé'. Nudë'në' ben' rguixogue' xti'idza' Diuzi cabë' ta pca'n Diuzi quiero ta gata' yela' neban quero tuzioli. Nudë'në' ben' rudze' xnezi quie ben' nao naza Cristo, ben' rusedi yaca.

<sup>12</sup> Cana' runnë' ra'o fuerza valor huero bi dyin quienë' re'ennë' huero cuenda gacalëro laguedyiro uzioñe'erojé' ca naca quie di'idza' la'iya quienë' ta inaorayaquë' xneza Cristo mazara.

<sup>13</sup> Cana' ruenë' quiero hasta idyin dza banacaro tuzi ca hue quiero xti'idzë', banacaro tuzi ca nuebë'ro lëbë' raquë' zi'i Diuzi. Cana' gacaro ben' nao du guicho du la'adyi' xneza Cristo, tzu'uro puro pensari dya'a ca pensari yu'u Cristo.

14 Bira naca pensari quiero cabë' naca pensari quie xcuidi'. Bira yetza'ro pensari quiero tu dza tu dza inaoro neza tula. Binacaro ca la'aga' bidyi ta nu'a be rguinun lao nisa. Bira hue'ro lato si' benë' ra'o yë', ben' re'en uquixi quiero, ben' re'en udze' ra'o neza tula, neza binaca quie Diuzi. La'acazi inayaquë' nacayaquë' ben' rioñe'e, bigalele quiejë'.

15 Mejorla hue quiero xti'idza' Diuzi edyë'ëro benë'. Cana' reya'ala' huero inaoro xneza Cristo, huelëronë' tuže, naquë' xa'nro ra'o, ben' nao xnezë'.

16 Ta bë Cristo nita'lëro laguedyiro dyë'ëdi gacalëro laguedyiro cuenda yuguluro hue quiero xneza Cristo mazara, edyë'ëro laguedyiro mazara.

### *Becubi Cristo pensari quiero*

17 Cani nacan cabë' udixogui'a le'e tanun quie Cristo: Bira tale le'e ca rda ben' binuebë' Diuzi, como dan' naojë' yu'ujë' pensari tondo, pensari bibi zaca' ca naca pensari quie ben' rda

18 lao lato lao chula naca pensari quieyaquë'. Nica neziziyaquë' chi hue' Diuzi leyaquë' yela' neban tuzioli, como dan' yela' yeladyi' quiejë' nacajë' ben' laxta'o zidi.

19 Bira redue'yaquë' bi tamala rueyaquë'. Banue quieyaquë' rueyaquë' tamala. Redaohueyaquë' rueyaquë' con ta rnan quieyaquë'.

20 Pero le'e, dyë'ëdi nezile, cala xneza Cristo naole chi ruele cana'.

21 Chi tali banezile cabë' una Cristo, chi tali banezile nacan tali cabë' unë',  
22 quie lena' ruen zi usanla'adyi'le pensari gula quiele. Bira huele ta rnazin quiele, como dan' nacan tamedian gula, baozi'n le'e yë'.

23 Reya'ala' hue'le lato yecubi Diuzi pensari quiele.

24 Reya'ala' hue quiele quie pensari ta becubi Diuzi quiele, porque lëpensari na' banacan tuže len pensari quienë'. Chi inaoro lëpensari cubi na', cana' du la'adyi'ro talëro laguedyiro dyë'ëdi, huero puro tahuen.

25 Quie lena' bira si'le laguedyile yë'. Puro di'idza' li hue'lële laguedyile, como dan' yuguluro nacaro tu cue' ben' nao xneza Cristo.

26 Chi idza'le laguedyile, gapale cuidado ta bihuen xquia quiele. Chi rdza'le laguedyile, tu binegala dza reya'ala' layeyue'zetele laguedyile.

27 Bihue'le lato huelë taxi'ibi' le'e huele tamala.

28 Chi zu nule rbanle, reya'ala' usanle bira cuanle. Reya'ala' tzu'ule pensari huele dyin dya'a du guicho du la'adyi'le conlë ni'a na'ale ta gata' quiele, na' gacalële ben' bide quie.

29 Biinële di'idza' mala bizinaque ulidzale benë'. Mejorla inële di'idza' dya'a ineyuele leyaquë' hueyaquë' tadya'a huela'iya Diuzi lëjë'.

30 Bihuele tamala cuenda na' gaqueyëchi' Bichi Be quie Diuzi yu'ule. Bihuele cana' como dan' dyin quienë' banadele cuenda lao na'a Diuzi yezi'në' le'e yeyole guibá.

31 Usanla'adyi'le, bira inaya'le laguedyile, bira udiele laguedyile, bira idza'le laguedyile, bira utasi uniole laguedyile. Ni tu ta naca mala bira huelële laguedyile.

32 Mejorla tzu'ulële laguedyile dyë'ëdi, yeyëchi'la'adyi'le laguedyile, si'zele quie laguedyile cabë' baozi'e Diuzi quiele nun quie dan' nuelë tuže len Cristo.

## 5

### *Ni rnan cabë' reya'ala' taro dan' nacaro ben' quie Diuzi*

1 Nun quie nedyë'ë Diuzi le'e nacale zi'inë', cana' reya'ala' huele tuže huele ca rue Diuzi.

2 Quie lena' reya'ala' edyë'ële laguedyile como ca nedyë'ë Cristo ra'o. Tanto nedyë'ënë' ra'o psedyinnë' cuinnë' gutië' lë'ë yaga cruzo ta yezi dula' xquia



quiero. Ca beco' zi'ila' ruti ja benë' ta yezi dula' xquia quie lao Diuzi, cana' bē Cristo gutië' lē'ē yaga cruzo, ta yezi dula' xquia quiero. Ca yo zixi ulē'ēro yaxero taže gula, cana' yaxe Diuzi cabē' bē' ži'inē' nedyē'ēnē' ra'o.

<sup>3</sup> Nun quie banacale ben' quie Diuzi, ni tu lasa, ni ledao'zi, bireya'ala' talēle nutezi nigula, bireya'ala' huele biti'tezi ta naca tabayatza, bireya'ala' sa'la'adyi'le dumi.

<sup>4</sup> Bireya'ala' hue'lēle benë' di'idza' lē'ē, ni di'idza' tonto, ni di'idza' bayatza, porque lēdi'idza' na', bibi zaca'n para le'e. Mejorla ulidzale Diuzi huelenē' ben' ze.

<sup>5</sup> Dyē'ēdi nezile chi nu ben' nue costumbre rdalēnē' nutezi nigula, chi ruenē' biti'tezi ta naca tabayatza, chi rza'la'adyi'nē' dumi, (tuzcazi nacan sa'la'adyi'ro dumi, len ta tzionla'adyi'ro ta naca yo o ta naca yaga), biyezi' Diuzi lēbē' ta yedyinnē' guibá ga rnabē' Cristo len Diuzi.

<sup>6</sup> Bihue'le lato si' benē' le'e yē' hue'lēyaquē' le'e di'idza' tondo inayaquē' le'e binacan mala huele can', porque hue Diuzi castigo huala nu ben' rue cana'.

<sup>7</sup> Na'ra bihuelēle leyaquē' tuže, ni ledao'zi.

<sup>8</sup> Le'e udale lao lato lao chula dza na'te. Pero na'ra nun quie dan' nuelēle Cristo tuže, cana' banayeni' laxta'ole. Quie lena' reya'ala' tale ca ben' nao xneza Cristo, ben' banayeni' laxta'ohue.

<sup>9</sup> Nun quie nacale ben' nao xneza Cristo, ben' banayeni' laxta'ohue, lena' reya'ala' huele puro ta naca dya'a, puro ta naca tali, puro ta yu'u ni'a xnezi lao Diuzi.

<sup>10</sup> Udze'le xneze ta huele pensari lēbi ca pensari quie Cristo tacuenda huele ca raxenē'.

<sup>11</sup> Bihuele ca rue ben' rda lao lato lao chula. Ruejē' ta bibizaca' lao Diuzi. Mejorla uzioñe'ele leyaquē' cuenda tzeni' guicho laxta'oyaquē' bira inaoyaquē' tamala.

<sup>12</sup> Redue'ro huero di'idza' cabē' ruejē' nagachizi.

<sup>13</sup> Pero caora uzioñe'erōjē' ca naca tamala ruejē', caora na' inezijē' lega de dula' xquia quiejē', yela' na' bē' tzu'u beni' quie Diuzi guicho laxta'ojē', caora na' yenaōjē' xneza Cristo.

<sup>14</sup> Quie lena' rguixogue'n lē'ē guichi la'iya quie Diuzi cani:

Uletēlēbē le'e nita'le naca quiele ca quie ben' nita' rasi, ben' biyu'u pensari.

Ulesuli le'e nita'le naca quiele ca quie ben' huati, ben' biyu'u gracia.

Ulesu listo, porque bazu Cristo useni'nē' guicho laxta'ole.

Cana' rguixogue'n lē'ē guichi la'iya.

<sup>15</sup> Quie lena' reya'ala' gapale cuidado ca tale huele lao yaca benē'. Bitale huele ca ben' tondozi, pero ulehue ca ben' rioñe'e.

<sup>16</sup> Biunitile tiempo quiele. Gacale listo huele tahuen, porque yugu dza de tamala.

<sup>17</sup> Bihuetondole. Udze'le xneze ta inezile ca re'en Cristo huele.

<sup>18</sup> Bihuele hue'e como dan' lena' udyiagu'i'n pensari quiele. Mejorla hue quiele cabē' mandado rue Bichi Be quie Diuzi le'e.

<sup>19</sup> Hue'lēle laguedyile di'idza' con cabē' rnan lē'ē guichi Salmos ga yu'u di'idza' la'iya quie Diuzi. Lēscan' reya'ala' gulale himnos len cantos ta naca quie Diuzi. Cana' reya'ala' huele, huele Cristo ben' ze du guicho du la'adyi'le.

<sup>20</sup> Reya'ala' ulidzale Xuziro Diuzi yēbilenē' xcalelo' por nun quie dan' racalēnē' le'e runnē' ta rdziguēle. Cana' huele uzētole lao xa'nro Jesucristo.

### *Ni rguixogue'n cabē' re'en Diuzi huelēro familia quiero*

<sup>21</sup> Huelēle laguedyile ben' nao xneza Cristo tuže, porque nacale ben' rapa Cristo bala'ana.

<sup>22</sup> Quie ja nigula bazulë be'mbyu, reya'ala' uzujë' di'idza' bi mandado rue be'mbyu quiejë' lëjë' como ca quie mandado rue Cristo.

<sup>23</sup> Cana' reya'ala' hue yaca nigula como dan' rnabë' be'mbyu ina' uhuianë' nigula quie' cabë' rnabë' Cristo ina' uhuianë' yaca ben' nao xnezë'. Naca Cristo ben' bapte psela ra'o, gutinë' lë'ë yaga cruzo ta yezi dula' xquia quiero ra'o, ben' nao xnezë'.

<sup>24</sup> Como ra'o, ben' nao xneza Cristo, reya'ala' uzuro di'idza' ca mandado rue Cristo ra'o, lëscan' quie nigula bazulë be'mbyu, reya'ala' uzuë' di'idza' ca mandado rue be'mbyu quie' lëbë'.

<sup>25</sup> Na'ra quie ja be'mbyu bazulë nigula, reya'ala' edyë'ëjë' nigula quiejë' cabë' nedyë'ë Cristo ra'o, gutinë' lë'ë yaga cruzo ta yezi dula' xquia quiero.

<sup>26</sup> Cana' bë Cristo quiero cuenda gacaro ben' naca la'iya. Conlë nisa len xti'idzë' udibinë' guicho laxta'oro, udubë' dula' xquia quiero.

<sup>27</sup> Cana' bë Cristo quiero cuenda idyinro ra'o, ben' nao xnezë', laohuë' nacaro ben' babeyëri guicho laxta'ohue dyë'ëdi. Ta bë Cristo bënë' quiero binaparo dula' xquia, bibi tamala de quiero, nacaro ben' naca la'iya, ben' babeyažo duže dula' xquia quie.

<sup>28</sup> Quie lena' reya'ala' edyë'ële gapale cuidado nigula quiele cabë' nedyë'ële gapale cuidado cuinle. Chi edyë'ële gapale cuidado nigula quiele, lena' huanita'le dyë'ëdi, gacalële cuinle.

<sup>29</sup> Cabë' nedyë'ëro cuinro naparo cuidado cuerpo quiero, cana' nedyë'ë Cristo ra'o napë' ra'o cuidado.

<sup>30</sup> Cana' rue Cristo quiero como dan' nacaro ben' quienë', nuelëro lëbë' tuže conlë yaca los demás ben' nao xnezë'.

<sup>31</sup> Lëscan' naca be'mbyu lënë' nigula quienë' tuzi. Cana' rguixogue'n lë'ë guichi la'iya quie Diuzi cani: "Reya'ala' usan be'mbyu xuzi znë'ë gacalënë' nigula quie' tuže. Cana' banaca quiejë' ca quie tuzi bdyigo'." Cana' nan lë'ë guichi la'iya.

<sup>32</sup> Nezda' nacan zëdi ta tzioñë'ero cabë' nacan, pero cabë' rnia' niga, nacan tu ejemplo cabë' naca quiero lëro Cristo. Nacalëronë' tuzi.

<sup>33</sup> Quie lena' inia' le'e tatula de quie reya'ala' edyë'ële gapale cuidado nigula quiele cabë' nedyë'ële gapale cuidado cuinle. Lëscan' quie yaca nigula, reya'ala' gapajë' bala'ana be'mbyu quieyaquë'.

## 6

<sup>1</sup> Ni re'enda' inia' le'e tu di'idza' quie yaca xcuidi' cabë' reya'ala' hueyacabi'. Reya'ala' galeyacabi' quie xuzi zna'yacabi' como dan' cana' re'en Diuzi hueyacabi'.

<sup>2</sup> Ca naca mandamiento uduxu Diuzi dza na'te rguixogue'n cabë' reya'ala' huero quie xuzi zna'ro, lëscan' rguixogue'n ca naca di'idza' bega'nle Diuzi ra'o chi hue quiero di'idza' unanë'. Quie lena' nan lë'ë guichi la'iya caniga: "Reya'ala' gapale bala'ana xuzi zna'le.

<sup>3</sup> Chi gapale bala'ana xuzi zna'le, na'ra gaca huen quiele sule zidza lao yedyi layu." Cana' nan lë'ë guichi la'iya quie Diuzi.

<sup>4</sup> Lëscan' rnia' le'e, ben' naca xuzi xcuidi', bihuele costumbre utza'le zi'ile. Mejorla usegualë zi'ile dyë'ëdi, tilaleyacabi' caora hueyacabi' tamala cuenda gacayacabi' ben' de pensari. Reya'ala' uzioñë'eleyacabi' cuenda inaoyacabi' xneza Cristo.

<sup>5</sup> Lëscan' rnia' le'e, ben' nada'o reya'ala' uzule di'idza' ca mandado hue xa'nle le'e dza rdale lao yedyi layu. Reya'ala' gapale xa'nle bala'ana, reya'ala' uzule di'idza' cabë' rnanë' du guicho du la'adyi'le ca quie ben' ruzu di'idza' cabë' rna Cristo.

6 Cana' reya'ala' huele la'acazi zu xa'nle rna'në' le'e, la'acazi bizunë' ina'në' le'e. Huele mandado cabë' rue xa'nle le'e, no solamente dan' re'enle yega'nle huen laohuë', pero lëscan' dan' nacale ben' quie Cristo, ben' rue quie ca re'en Diuzi du guicho du la'adyi'.

7 Cana' du la'adyi'le huele dyin quie xa'nle. Bihuele pensari chi dyin quie benë'zi huele, dechan' dyin quie Diuzi.

8 Pues dyë'ëdi nezile ga'acatezi tu tadya'a huero, huaguizu Diuzi ra'o, la'acazi nacaro ben' nada'o, la'acazi benacaro ben' nada'o.

9 Lëscan' rnia' le'e, ben' naca xan' ben' nada'o, huele tahuen conlë yaca ben' nada'o quiele. Bitila inëlële leyaquë'. Bigala'adyi'le tuzi Diuzi zu guibá inabë'në' le'e cabë' inabëlë leyaquë'. Tucazi nacan ca rna'bë' Diuzi ra'o.

### *Reya'ala' uzaloro guicho laxta'oro*

10 Na'ra, bicha', inia' le'e uzalale guicho laxta'ole nun quie nuele Cristo tuze. Huele tzutzu guicho laxta'ole nun quie naca Cristo ben' de yela' huaca quie.

11 Ulehue ca re'en Diuzi huero ta ucuasa ucu'i'oro cuinro uzaloro guicho laxta'oro cuenda bihue xan' taxi'ibi' ra'o gan.

12 Cana' huele nun quie cala laguedyi benë' rdilalëro, dechan' rdilalëro ben' naca xan' taxi'ibi', rdilalëro ben' rue taxi'ibi' mandado, rdilalëro ben' rna'bë' lao lato lao chula.

13 Quie lena' ulehue dyë'ëdi ca re'en Diuzi huele cuenda huele tzutzu guicho laxta'ole biusanla'adyi'le xneza Cristo caora cati ruelë xan' taxi'ibi' le'e bizinaquezi. Cana' reya'ala' huele cuenda bidzebile hue quiele xti'idza' Diuzi du guicho du la'adyi'le biyeyatile.

14 Chi huele cana', chi huele tali cabë' una Diuzi, lena' gacalën le'e ca racalë cincho ruquio lë'ële le'e. Chi huele ta yu'u ni'a xnezi quie Diuzi, lena' ucuasa ucu'i'on le'e cabë' rucuasa rucu'i'o guiba lata naco soldado ta biichugo espada lëbë'.

15 Sule listo tzirole tzetixogue'le benë' xti'idza' Diuzi cabë' rue soldado ruejë' listo racojë' zabayaquë' ruliojë' zapato. Naca xti'idza' Diuzi ta rbëchin chizi laxta'oro.

16 Pero ta naca belao ta huele, reya'ala' sudyi'ilële Cristo dyë'ëdi cuenda bihue xan' taxi'ibi' gan huelën le'e bizinaquezi. Chi sudyi'ilële Cristo, lena' huen defender le'e ca rue defender guiba lata zë soldado ta biquido flecha zu gui' lëbë'.

17 Como bapte psela Diuzi le'e, reya'ala' sule puesto ca quie soldado, ben' nuzu casco guichogue ta bibi gaca quie guichonë'. Lëscan' como naca xti'idza' Diuzi ca quie tu espada ta ben Bichi Be quie Diuzi le'e, reya'ala' guxule len sule listo ca quie soldado, ben' nuxu espada.

18 Reya'ala' uzule di'idza' hue quiele cabë' rnia' le'e. Biusanle ulidzale Diuzi. Biusanle inabalenë' gacalënë' le'e. Hue'le lato gacalë Bichi Be quie Diuzi le'e hue'lële Diuzi di'idza'. Huele listo, biyehuëdile. Ulidzale Diuzi ta gacalënë' yugulu ben' nao xneza Jesús.

19 Lëscan' ulidzale Diuzi inabalenë' gacalënë' në'ëdi' gunnë' në'ëdi' bi di'idza' hue'lia' benë'. Cana' re'ennan cuenda iya'zuga' yuxi'idze'na'yaquë' cuenda tzioñe'eyaquë' hue quieyaquë' di'idza' la'iya quie Diuzi. Re'en Diuzi nebagui'ayaquë' ca unanë' huenë' dza na'te use'elë' Cristo ta gata' yela' neban tuzioli para yaca ben' nita' lao yedyi layu, pero cala quie tuzi ben' Israel, lëscan' quie yaca ben' yedyi tula.

20 Aose'ela' Diuzi në'ëdi' ta quixogui'a benë' xti'idza'në', na' dia' lu'u dyiguiba niga tanun quie bire'en yaca benë' quixogui'a xti'idza'në'. Ulidzale

Diuzi gunnë' fuerza valor quia' quixogui'a benë' xti'idza' Diuzi ca reya'ala' hua'.

*Rgapa Pablo ben' ciudad Efeso diuzi*

<sup>21</sup> Huedetixogue' Tíquico le'e ta inezile ca raca quia' niga. Dyë'ëdi nezile naca Tíquico ben' bichiro, ben' nao xneza Cristo. Du guicho du la'adyi'në' racalënë' nëto' ruendo' dyin quie Diuzi.

<sup>22</sup> Quie lena' use'ela' lëbë' detixogue'në' le'e ca raca quiendo' niga cuenda bigaqueyëchi' guicho laxta'ole.

<sup>23</sup> Rulidza' Xuziro Diuzi lënë' zi'inë' Jesucristo ta cuëchiyaquë' chizi guicho laxta'ole le'e, ben' rue quie xti'idza' Diuzi. Rulidza'yaquë' ta gacalëyaquë' le'e idyë'ële laguedyile sudyi'ilële Cristo.

<sup>24</sup> Rulidza' Diuzi ta huela'iyänë' yugulu le'e ben' nedyë'e Señor quiero Jesucristo tuzioli. Amén.

## DI'IDZA' BZU SAÑ PABLO APÓSTOL LĒ'Ē GUICHI, USE'ELA'NĒ'N LAO CIUDAD FILIPOS

*Rugapa Pablo diuzi yaca ben' nao xneza Jesús, yaca ben' nita' ciudad Filipos*

<sup>1</sup> Nē'ēdi' len Timoteo, nacando' ben' rue dyin quie Jesucristo. Use'ela'ndo' guichi ni lao yugu le'e ben' nao xneza Jesús, ben' nita' ciudad Filipos. Lēscan' use'ela'ndo'n lao yaca ben' napa dyin quie Diuzi, ben' rudze' xnezi quiele, len yaca los demás ben' racalē le'e ciudad Filipos. Nacale ben' quie Diuzi, nacale ben' nuelē Cristo Jesús tuze.

<sup>2</sup> Rulidzando' Xuziro Diuzi len Señor quiero Jesucristo ta gacalējē' le'e huejē' cue' chizi laxta'ole.

*Rulidza Pablo Diuzi ta gacalē Diuzi yaca ben' nao xneza Jesús*

<sup>3</sup> Rēpicaza' Diuzi “diuxcalelo” bē' reza'la'adya' le'e cabē' ruele.

<sup>4</sup> Bē' rulidza' Diuzi redaohueda' rnaba' gaca tadya'a quie yugulule.

<sup>5</sup> Pues desde dza uzulaole inaole xneza Cristo, banuelē nēto' tuze rguixogue'le benē' di'idza' la'iya quie Diuzi.

<sup>6</sup> Uzulao Diuzi ruenē' dyin dya'a quienē' lu'u guicho laxta'ole. Barzela'adya' biusan Diuzi ruenē' dyin dya'a quienē' conlē le'e hasta dza yedyin Jesucristo.

<sup>7</sup> Napa' rson inia' quiele cana', porque nedyē'ēda' le'e. Abēle nē'ēdi' tuze con cabē' tadya'a bē Diuzi para ra'o. Abēle nē'ēdi' tuze la'acazi dia' lu'u dyiguiba, la'acazi zua' lao yaca ben' rnabē' rua' defender xti'idza' Diuzi rguixogui'ayaquē' quie ta naca tali.

<sup>8</sup> Nezi Diuzi lega re'enda' guida' ideyuba' le'e nun quie dan' nedyē'ēda' le'e cabē' nedyē'ē Cristo le'e.

<sup>9</sup> Rulidza' Diuzi ta gacalēnē' le'e ta idyē'ērale itu itule, na' inezile mazara quie Diuzi ta huele pensari dya'a,

<sup>10</sup> na' si'le tahuen, hue quiele quie Diuzi. Cana' sí, yeyēri laxta'ole lao Diuzi, gabi dula' de quiele cati idyin dza yeguیدا Jesucristo.

<sup>11</sup> Cana' hue Jesucristo para le'e tacuenda huele puro tadya'a, yela' na' inezi yaca ben' nita' lao yedyi layu naca Diuzi ben' ze, ben' bala'ana.

*Ta hue Pablo Cristo ben' ze, quie lena' rdanē' lao yedyi layu*

<sup>12</sup> Bicha', re'enda' inezile ca ta aozaca' nē'ēdi' bron huen, baoyēra ben' uzēnaga di'idza' la'iya quie Diuzi.

<sup>13</sup> Banezi yaca soldado, ben' rapa yulao', len yaca los demás benē', cabē' raca quia'. Nezijē' dia' lu'u dyiguiba por nun quie dan' naohua' xneza Cristo.

<sup>14</sup> Lēscan' zē yaca ben' nao xneza Jesús, birdzebiyaquē' rguixogue'yaquē' benē' xti'idza' Diuzi du guicho du la'adyi'yaquē'. Ablē'ēyaquē' cabē' racalē Diuzi nē'ēdi', tu dia' lu'u dyiguiba.

<sup>15</sup> Tali na' nita' bala ben' rnē quie Cristo, pero yela' zē', yela' mala quieyaquē' rnēyaquē'. Pero lēscan' nita'rē yaca ben' rnē quie Cristo du guicho du la'adyi'yaquē'.

<sup>16</sup> Nita' bala ben' rnē quie Cristo ta huejē' cuinzijē' ben' ze. Birnēyaquē' quie Cristo du guicho du la'adyi'yaquē', den' re'enaquē' huerayaquē' causa quia', dan' neziaquē' dia' lu'u dyiguiba.

<sup>17</sup> Pero lēscan' nita' yaca ben' rnē quie Cristo nun quie dan' nedyē'ēyaquē' nē'ēdi'. Neziaquē' zua' niga ta hua' defender xti'idza' Diuzi.

18 Pero abihuena. Bicuezan yedaohueda' nun quie rnějè' quie Cristo, la'acazi du guicho du la'adyi'yaquè', la'acazi chi režè'yaquè' nē'ēdi'.

19 Huedaohueda' dan' nezda' bitit'ezu' raca quia', huaroga' dya'a nun quie rudizale Diuzi por nē'ēdi', na' racalè Bichi Be quie Jesucristo nē'ēdi'.

20 Bire'enda' hua' tu ta gaca yela' stu' quia'. Re'enda' gaca quia' quixogui'a benè' xti'idza' Diuzi du guicho du la'adya', biyedue'da' chi bi bia'. Cana' re'enda' hua' tacuenda tziõe'era yaca benè' naca Cristo ben' že, ben' bala'anara. Cana' re'enda' hua' ba'ala'cazi nebana', ba'ala'cazi gatia'.

21 Ta hua' Cristo ben' že, quie lena' rda'a lao yedyi layu. Na'ra cati gatia', cana'ra bia' gan tzazulia'nē' tuzioli.

22 Pero chi nezua' nē'ēdi' lao yedyi layu, huazaque' huera' dyin quie Diuzi. Quie lena' binezda' nulan nacaran huen inaohua'.

23 Nacan zēdi ta useria' entre chopa neza. Para nē'ēdi' nacaran huen gatia' tzazulia' Cristo tuže. Cana' naca neza re'enda' inaohua'.

24 Pero zu itu neza reya'ala' inaohua' dan' nacaran dya'a para le'e chi nezulia' le'e lao yedyi layu.

25 Quie lena' nužela'adya' yega'nli'a le'e lao yedyi layu ta gacalia' le'e ta inaorale mazara xneza Cristo ta surale contento hue quiele quienè'.

26 Cana' gaca huen quiele yedaohuele chi guida' ideyuba' le'e tatula.

27 Nacan belao huele dyabè' tzu'ule tuže con cabè' una Cristo. Lēscan' la'achi guida' ideyuba' le'e, la'achi zua' zitu', re'enda' inezda' neyu'ule dya'a, nacale tuže ruele dyin quie Diuzi tacuenda uzēnaga yaca benè' di'idza' quienè'.

28 Biidzebile quie yaca ben' rudie le'e. Dan' rudieyaquè' le'e, lena' nacan seña udyiaguil'yaquè' cuinyaquè'. Quie le'e nacan seña nacale ben' bapsela Diuzi yezi'nē' le'e.

29 Bē Diuzi cule quiele ulionè' le'e no solamente ta hue quiele quie Cristo, pero lēscan' ta yedzagalaole nun quie dan' nacale ben' quienè'.

30 Cabè' le'e, cabè' nē'ēdi', tuzi ca zioro huero dyin quie Diuzi, biyuhēdiro. Bablè'ēle cabè' bia' dza na' bia' dyin quie Diuzi, bibehuēdia'. Na'ra banezile nerua' dyin quie Diuzi, biruhuēdia'.

## 2

### *Naca Cristo ben' belaora lao yugulute*

1 Como tali na' reyueže Cristo le'e, como tali na' nadyè'ēnè' ruxela'adyi'nē' le'e, como tali na' banacalèle Bichi Be quie Diuzi tuzi, como tali na' raque Cristo le'e, como tali na' reyèchi'la'adyi'nē' le'e,

2 cana'ra reya'ala' huele tuzi ca pensari huele. Reya'ala' nadyè'ēle itu itule. Tuzi ca huele, huele tuže itu itule. Yela' na' yedaohueda' quiele.

3 Bihuele yaladyi', biuxa'ale. Huele gaxo len laguedyile, gaquele huen laguedyile ca cuinle.

4 Nitu nitule biqilole tadya'a quiezile, pero lēscan' quilole tadya'a quie laguedyile.

5 Reya'ala' tzu'ule pensari cabè' pensari yu'u Jesucristo.

6 Ba'ala'cazi Cristo len Diuzi tuzi ca nacayaquè', bibè Cristo la fuerza huenè' cuinnè' lēbi ca Diuzi,

7 pero pca'nnè' tzala'la yela' rnabè' quienè', gologuè' guquè' be'mbyu, bidè' guquè' ca ben' nada'o.

8 Bidè' guquè' be'mbyu bdze'nè' cuinnè' lao na'a Diuzi. Bzunè' di'idza' cabè' gudyi Diuzi lēbè'. Bibebi'nè' cati bazione' gatinè' lè'è yaga cruzo, ba'ala'cazi yela' stu' huala na' gati benè' lè'è yaga cruzo.

9 Quie lena' bzu Diuzi lëbë' naquë' ben' bala'anara quie yugulute. Quie lena' una Diuzi naca Cristo ben' belaora, nuranu ben' naca belao zu ca lëbë'.

10 Quie lena' yugulu benë', caora reyaquë' laohuë', reya'ala' quitzu zibiyaquë' lao Jesús, la'acazi ben' zu guibá, la'acazi ben' nita' lao yedyi layu, la'acazi ben' baguti.

11 Cana' inayaquë' naca Jesucristo ben' belaora lao yugulute, hueyaquë' Xuziro Diuzi ben' ze.

*Reya'ala' uzioñe'e yaca ben' nao xneza Jesús yaca ben' binetzioñe'e*

12 Quie lena', bicha', ben' nedyë'ëda', lëbi cabë' bë quiele cabë' di'idza' agudya' le'e dza na' caora nezulia' le'e, na'ra re'enda' hue quiele cabë' di'idza' ria' le'e, la'acazi zua' zitu' bisulia' le'e tuze. Du rdzebile, du rzizile ulehue ca re'en Diuzi huele cuenda inaole dyë'ëdi xneza Cristo.

13 Dyin quie Diuzi na' rnën quiele uzule di'idza' quienë'. Cana' gacalë Diuzi le'e uza'laole huele cabë' re'ennë' huele.

14 Yugulu can' ruele, ulehuenta dyë'ëdi. Bitzu'ule dila, bitzu'ule huenë,

15 cuenda bigata' dula' quiele. Re'enda' tale dyë'ëdi ca zi'i Diuzi lao yaca ben' mala, yaca ben' de dula' xquia quie. Nacale ca quie bélo dyia guibá ruseni'n yedyi layu nun quie dan' ruzioñe'ele benë', ben' binetzioñe'e.

16 Reya'ala' quixogue'leyaquë' xti'idza' Diuzi, di'idza' rnën quie yela' neban biyeyudyi yedu. Chi huele cana', cana' yedaohueda' dza yeguida Cristo dan' nuzela'adya' biten cana'zi dyin quie Diuzi bia'.

17 Ba'ala'cazi ruen zi' gatia', huedaohueda' como dan' cana' gaca' ben' naca gun quie Diuzi lëbi cabë' le'e, como nacarële gun quie Diuzi por nun quie dan' barue quiele quienë'. Lena' yedaohueda' len le'e.

18 Cana' reya'ala' yedaohuele huelële në'ëdi' tuze yedaohuero.

*Ise'ela' Pablo Timoteo len Epafrodito*

19 Chi napa Jesús gusto, ise'ela' Timoteo ideyubinë' le'e tacuenda yedaohueda' cati yeda' di'idza' ca ta ruele.

20 Tuzi Timoteo rdëbinë' len në'ëdi' ta yega'nle huen. Tuzi pensari racando' len Timoteo len në'ëdi'.

21 Yaca ben' tula, rguilola'adyi'yaquë' tadya'a quieziyaquë', birguilola'adyi'yaquë' tadya'a quie Cristo Jesús.

22 Banezile cabë' rue Timoteo. Bablu'enë' rdanë' neza dya'a. Lëscan' banezile cabë' bënë' rdalënë' në'ëdi' rguixogue'ndo' benë' xti'idza' Diuzi. Racialënë' në'ëdi' dyë'ëdi ca racialë tu xcuidi' xuzibi'.

23 Caora banezda' nacala ca yero quia' niga, na'tera ise'ela' Timoteo ideyubinë' le'e.

24 Pero nuzela'adya' laguidatia' ideyuba' le'e, chi napa Cristo gusto guida'.

25 Lëscan' raqueda' raoyente ise'ela' ben' bichiro Epafrodito ideyubinë' le'e. Lëlëbë' ruelia' dyin quie Diuzi, lëlëbë' redzagalaolia' tanun quie dan' rguixogue'ndo' xti'idza' Diuzi. Lëlëbë' bause'ela'le gan' zua' dza na' tacuenda gacalënë' në'ëdi' ta tzaxi'në' chan' bi ta rdziogueda'.

26 Lega re'ennë' yeguidë' idena'në' yugulule. Lega rdëbinë' dan' nezinë' babele guca zhue'në'.

27 Tali na' guca zhue'në' ilë'ëti'zi bigutinë'. Pero Diuzi gualënë' lëbë', bigutinë'. Lëscana' gualë Diuzi në'ëdi', dan' beyacanë' ta bira uzua' mazara bayëchi'.

28 Quie lena' lega re'enda' ise'ela'në' laole tacuenda yedaohuele ilë'ëlenë' tatula. Cana' bigacatica bayëchi' quia'.

29 Ulesi' lëbë' du guicho du la'adyi'le, dan' naquë' ben' bichiro, ben' nao xneza Cristo. Reya'ala' gapale bala'ana yugulu ben' naca ca lëbë'.

<sup>30</sup> Il'ëti'zi bigutinë' tanun quie dan' rue quienë' di'idza' quie Cristo. Bicuenda bënë' chi gatinë' tacuenda gacalënë' në'ëdi' lao lazale chan' bi ta rdziogueda', como dan' biužaque' guidale niga gacalële në'ëdi'.

### 3

#### *Reya'ala' huebë'ro Cristo*

<sup>1</sup> Na'ra bicha', reya'ala' yedaohuele dan' nacale ben' nao xneza Jesús. Binacan zëdi para në'ëdi' yenia' le'e tatula ca ta baonia' le'e dza na' lë'ë guichi, como dan' nacan belao para le'e.

<sup>2</sup> Bigalele quie yaca ben' rue ca rue yaca beco', yaca ben' rue tamala, yaca ben' rchugu cuerpo.

<sup>3</sup> Ra'o nacaro dugalo ben' nuzu xëdyidao' cuine. Ra'o nacaro ben' rionla'adyi' Diuzi lao na'a Bichi Be quienë'. Redaohuero nacaro ben' quie Cristo Jesús. Neziro bibi zaca'n huero cuinro ben' ze por nun quie bi ruero dza rdaro lao yedyi layu.

<sup>4</sup> Pero chi nacan huen huero cuinro ben' ze, naparia' derecho hua' cuina' ben' ze ca nurla ben' tula.

<sup>5</sup> Pues bzuyaquë' tu xëdyidao' në'ëdi' caora gologa' guca' xu'una dza. Në'ëdi' naca' dugalo ben' Israel. Naca' zi'isuba xuzixta'oro Benjamín. Desde nacatia' xcuidi' raca' di'idza' hebreo. Gucalia' ben' partido fariseo tuže. Ca maoyaquë' du guicho du la'adyi'yaquë' ley quie Moisés, cana' unaohua' në'ëdi'.

<sup>6</sup> Du guicho du la'adya' psaca' ben' quie Jesús bizinaquezi dza na'. Tantozi unaohua' ley quie Moisés, nunu bë causa quia' chi udapa' dula' xquia lao Diuzi.

<sup>7</sup> Pero banezda' na'a bibi zaca'n lao Diuzi yugulu ca ta guqueda' zaca'n lao Diuzi dza na'. Lena' nezda' porque dan' barnaohua' xneza Cristo na'a.

<sup>8</sup> Lëscan' nezda' yugulu ta de quia' nacan ca quie ta chu'unro, ta bibi sirve. Zaca'ran huebi'a Cristo, ben' naca Señor quia', cala ca yugulu ta de quia'. Tanun quie nubi'a Cristo, pca'na' tzala'la yugulu ta de quia'. Araqueda'n ca tu bëbi, tanto zaca'ran ta huebi'a Cristo,

<sup>9</sup> tanto zaca'ran tzalia' Cristo tuže. Cala por nun quie unaohua' ley quie Moisés rlë'ë Diuzi në'ëdi' ben' laxta'o yëri, dechan' por nun quie dan' rzudyi'ilia' Cristo. Huazi' Diuzi nutezi ben' rzudyi'ilë Cristo.

<sup>10</sup> Tuzi ca re'enda', re'enda' huebi'a Cristo. Re'enda' sulë yela' huaca quienë' në'ëdi' cabë' yela' huaca bë Diuzi psebannë' lëbë'. Lëscan' zua' dispueste yedzagalaohua' cabë' bedzagalaonë', ba'ala'cazi huen zi gatia' cabë' gutinë'.

<sup>11</sup> Cana' re'enda' tacuenda hua' gan useban Diuzi në'ëdi' yeroga' ga de ben' huati.

#### *Ni rguixogue'n ca reya'ala' huero ta huero gan huebë'ro Cristo*

<sup>12</sup> Pero biinia' babia' gan baoya'lao banubi'a Cristo. Lëscan' cala beyudyi bzioñe'e Diuzi në'ëdi' hua' ca mandado re'ennë' hua'. Pero biusana' xneza Cristo. Re'enda' hua' gan huebi'a Cristo ca nuebë' Cristo në'ëdi'.

<sup>13</sup> Lëscan' bicha', biinia' babia' gan abeyudyi bia' cabë' re'en Diuzi hua'. Quie lena' birdëbida' ca tu ta baode baguca. Pero rua' dyabë' ta hua' ca re'en Diuzi hua' dza zaza'ra.

<sup>14</sup> Rua' dyabë' rnaohua' xneza Cristo tacuenda yeyëzi Diuzi në'ëdi' yeya'a guibá. Hueyëzi Diuzi yaca ben' nuelë Cristo tuže ta tzezulëyaquë' lëbë' tuzioli.



15 Yugulu le'e ben' nao neza Cristo, reya'ala' huele pensari ca pensari agudya' le'e niga. Chi le'e natza' pensari quiele, Diuzi uzioñe'enē' le'e ta huele tuzi ca pensari rua'.

16 Quie lena' sí, reya'ala' huero, reya'ala' huero tuzi pensari cabē' pensari nudze' Diuzi ra'o.

17 Bicha', cabē' rua' nē'ēdi', cana' reya'ala' huerēle. Lēscan' huele cuenda nu ben' rue cabē' bēndo' cati unita'lēndo' le'e dza na'.

18 Zē lasa baonia' le'e, na' du rbedya' hua' repetir tatula de que nita' ben' zē, ben' naca enemigo quie Cristo.

19 Naca quieyaquē' yeyoyaquē' lagui' gabila. Ta rnazin quieyaquē' rueyaquē' rnaoyaquē' quie diuzi quieyaquē'. Reya'ala' yedue'yaquē' ca rueyaquē', den' redaohuelayaquē'. Tuz ta raca lao yedyi layu ruejē' pensari.

20 Pero ra'o nacaro cuenda quie Diuzi tu guibá. Rbezaro dza zeza' Jesucristo, ben' psela ra'o, ben' naca Señor quiero.

21 Lēbē' yetza'nē' hē'ēla' zuba' banaca bayēchi' quiero ta iyacan yeni' cabē' naca cuerpo quienē' cuinnē'. Cana' huenē' quiero conlē yela' huaca de quienē' rnabē'nē' lao yugulute.

## 4

### *Reya'ala' yedaohuero nacaro ben' nao xneza Cristo*

1 Quie lena' bicha', ben' nedyē'ēda', lega re'enda' guida' ideyuba' le'e. Por le'e sua' contento nacale ca quie tu premio quia'. Rnia' le'e, ben' nedyē'ēda', ulenao xneza Cristo du guicho du la'adyi'le, biyehuēdile.

2 Rnabayēcha' Evodia len Síntique ta yega'nlēleyaquē' tuzi ca reya'ala' hue yaca nigula, ben' nao xneza Cristo.

3 Lēscan' luē', ben' compañero quia', ben' ruelē nē'ēdi' dyin quie Diuzi, re'enda' gacalēlo' lērupa nigulā. Leyaquē' bzagalēyaquē' nē'ēdi' cati udixogue'ndo' benē' di'idza' la'iya quie Diuzi conlē Clemente len itu yaca ben' tula, ben' bēlē nē'ēdi' dyin quie Diuzi. Bazu laoyaquē' lē'ē libro ga yu'u lao yaca ben' de yela' neban quie tuzioli.

4 Yugu dza reya'ala' yedaohuele, dan' nacale ben' nao xneza Cristo. Tatula rnia' le'e: ¡Yedaohuele!

5 Huele tahuen ta ilē'ē yugulu benē' le'e ben' zela'adyi'. Baruen bago dza yeguida Cristo.

6 Bidēbile chi biti'tezi raca quiele. Yēbile Diuzi chi bi raca quiele. Ulenaba Diuzi chi bi rdzioguele. Yēbilenē' diuxcalelo'.

7 Cana' hue Diuzi cue' chizi laxta'ole. Ca rue Diuzi, ruenē' cue' chizi laxta'oro, lena' nacaran mazara cabē' nacan ta tzioñe'ero. Lēscan' huapa Diuzi le'e cuidado ta tzu'ule pensari dya'a tanun quie sudyi'ilēle Cristo Jesús.

### *Huero pensari quie ta naca tadya'a*

8 Ta iyudyi di'idza' rnia' le'e bicha', ulehue pensari quie yugulu ta naca tali, len quie yugulu ta naca ta bala'ana, len quie yugulu ta naca tabala, len quie yugulu ta naca tala'iya, len quie yugulu ta raxe Diuzi, len quie yugulu ta nuzē quie nacan huen. Chi nacan dya'a, chi nacan ta ilē'ēro huen, lēlena' ulehue pensari cabē' nacan.

9 Ulehue ulenao ca ta bapsēdia' le'e, len ca ta blu'ena' le'e. Ulehue ulenao ca ta babele baonia', len ca ta bablē'ēle bia'. Cana' selē Diuzi le'e. Naca Diuzi ben' cuēchi chizi laxta'ole.

### *Ben' yedyi Filipos bē'yaquē' Pablo gun*

<sup>10</sup> Lega redaohueda' laohue Cristo dan' babeza'la'adyi'le në'ëdi' tatula. Cala rnia' chi bagula'adyi'le në'ëdi'. Nezda' gu'unle gacalële në'ëdi' dza na', pero biuzaque'.

<sup>11</sup> Cala rnia' chi bi rdziogueda'. Baoyulaohua' redaohueda' con tu tadao' de quia'.

<sup>12</sup> Nezda' ca naca quie ben' yëchi'. Lëscan' nezda' ca naca quie ben' birdziogue. Con biti'tezi gaca quia', la'achi aodaohua' beloga', la'achi rdua', la'achi bibi rdziogueda', la'achi rdziogueda', baoyulaohua' sua' contento bira rdëbida'.

<sup>13</sup> Huazueda' con biti'tezi gaca quia', dan' run Cristo në'ëdi' fuerza valor quienë' yugu dza.

<sup>14</sup> Pero bële tu tahuen quia', beyëchi'la'adyi'le në'ëdi' ca tazëdi raca quia'.

<sup>15</sup> Le'e ben' ciudad Filipos, nezile tu cue'zi le'e baose'ela'le gun quiele. Bigula'adyi'le ca gucalia' le'e udixogui'a le'e di'idza' la'iya quie Diuzi. Lëscan' gucalële në'ëdi' dza uya'a yu nebaba Macedonia caora cati uzulaohua' udixogui'a benë' di'idza' la'iya quie Diuzi.

<sup>16</sup> Cati nezua' ciudad Tesalónica, chopa tzona lasa use'ela'le gun quiele itzani'a ta hua' gasto quia'.

<sup>17</sup> Cala rnia' le'e ta ise'ela'le bi cosa quia'. Ca re'enda', re'enda' gata' tahuen quiele lao Diuzi dan' beyëchi'la'adyi'le në'ëdi'. Redaohueda' cati gaca quiele cana'.

<sup>18</sup> Ta naca yalao babezi'a në'ëdi'. Mazla ca tu ta rdziogueda' use'ela'le quia' lao na'a Epafrodito. Ta use'ela'le quia' në'ëdi' nacan ca quie tu ta bë'le Diuzi rla'n žixi žeo, bezi'në'n yaxenë'n.

<sup>19</sup> Gun Diuzi le'e yugulu ca tu ta rdzioguele como biyeya ta de quie Diuzi. Tadya'atzegue de quie Diuzi conlë Cristo Jesús.

<sup>20</sup> Reya'ala' gaparo bala'ana Xuziro Diuzi tuzioli. Amén.

### *Rugapa Pablo leyaquë' diuzi*

<sup>21</sup> Ulegapa diuzi yaca ben' quie Diuzi nita' na', yaca ben' zulë Cristo tuže. Yaca ben' bichiro, ben' zulë në'ëdi' niga, rgapayaquë' le'e diuzi.

<sup>22</sup> Yugulu ben' rue quie xti'idza' Diuzi, ben' nita' niga, rugapayaquë' le'e diuže. Lëscan' yaca ben' quie Diuzi, ben' rue dyin žan yu'u quie ben' rna'bë' quie ben' romano, rugaparëyaquë' le'e diuzi.

<sup>23</sup> Rnaba' huela'iya Jesucristo yugulule. Lëbë' naquë' ben' Señor quiero. Amén.

## DI'IDZA' BZU SAN PABLO APÓSTOL LĒ'Ē GUICHI, USE'ELA'NĒ'N LAO CIUDAD COLOSAS

### *Rugapa Pablo yaca ben' nita' ciudad Colosas diuzi*

<sup>1</sup> NĒ'ēdi', Pablo, bdē' Diuzi nĒ'ēdi' cabē' re'ennē' gaca tacuenda tza' tzetixogui'a benē' di'idza' la'iya quie Jesucristo. NĒ'ēdi'lia' ben' bichiro Timoteo,

<sup>2</sup> bĕndo' guichi ni, use'ela'ndo'n laole ciudad Colosas. Banacarēle ben' quie Diuzi dan' banuerēle Cristo Jesús tuze. Rnabando' huela'iya Xuzi Diuzi le'e cuēchinē' chizi lu'u guicho laxta'ole.

### *Rulidza Pablo Diuzi ta gacalēnē' yaca ben' nao xneza Cristo*

<sup>3</sup> Yugu dza rĕbicazindo' Diuzi diuxcalelo' tanun quiele caora rulidzando' Diuzi, ben' naca Xuzi Jesucristo. Naca Jesucristo ben' belaoa quiero.

<sup>4</sup> Bagudyi benē' nĒ'to' cabē' ruele rzudyi'ilĕle Cristo, nadyē'ĕle yaca ben' rue quie xti'idza' Diuzi.

<sup>5</sup> Cana' naca quiele nun quie dan' rbezale gun Diuzi le'e tu tadya'atzegue pca'nnē' quiele guibá. Aonezile cana' bĕ Diuzi quiele dan' babĕle cuenda quie di'idza' la'iya quie Diuzi dza na'.

<sup>6</sup> Ca naca di'idza' quie Diuzi babele zio rĕnan, lĕdi'idza' na' barue quie yaca ben' zĕ, na' bĕtza'yaquĕ' pensari quieyaquĕ', barnaoyaquĕ' xneza Cristo. Cana' baraca duze yedyi layu. Lĕzi le'e, cana' raca quiele desde dza bele ca nadyē'ĕ Diuzi benē', gucabē'le nacan tali.

<sup>7</sup> Lĕzi cana' psĕdi Epafras le'e. Nacarĕ Epafras ben' rue dyin quie Diuzi. Nadyē'ĕndo'nĕ'. Naquĕ' ben' rue dyin quie Cristo conlĕ le'e du guicho du la'adyi'nĕ'.

<sup>8</sup> Lĕbĕ' bidĕ' bedetixogue'nĕ' nĒ'to' cabē' ruele nadyē'ĕle benē' cabĕ' nadyē'ĕ Cristo benē'.

<sup>9</sup> Quie lena' binusando' rulidzando' Diuzi por le'e desde dza na' cati bendo' ca ruele nedyē'ĕle yaca ben' nao xneza Cristo. Binusando' rnabando' lao Diuzi ta uzioñe'enē' le'e cabĕ' re'ennē' huele, len cabĕ' re'ennē' tzu'ule pensari quienē', len cabĕ' re'ennē' inezile bi rue Bichi Be quienē' racalēnē' ra'o.

<sup>10</sup> Cana' rulidzando' Diuzi tacuenda tale cabĕ' reya'ala' ta ben' nao xneza Cristo ta yedaohuenē' yugulu ca ruele. Lĕscan' rulidzando' Diuzi tacuenda huele dyin quie Diuzi dyĕ'ēdi yugu ca re'ennē', lĕscan' ta inezirale quie Diuzi cabĕ' rnabĕ'nĕ' ra'o.

<sup>11</sup> Rnabando' lao Diuzi gunnē' fuerza valor quiele tacuenda huele gan biti'tezi gaca quiele biyedzebile yedaohuele biyeyatile, na' dyĕ'ēdi yedaohuele du usela Diuzi le'e.

<sup>12</sup> Reya'ala' yĕbile Xuzi Diuzi diuxcalelo', dan' banuetenē' ra'o puesto ta tzu'uro ga naca xni' yezi'ro tu ta pca'n Diuzi para ra'o, ben' naca cuenda quienē'.

<sup>13</sup> Aolio Diuzi le'e, bira nacale cuenda ta inabĕ' xan' taxi'ibi' le'e. Banue Diuzi le'e cuenda inabĕ' zi'inĕ' le'e. Nadyē'ĕ Diuzi zi'inĕ'.

<sup>14</sup> Lĕbĕ' gutinē' lĕ'ĕ yaga cruzo ta yezi dula' xquia quiero gata' yela' neban quiero tuzioli.

*Tanun quie yela' guti quie Cristo nacalĕro Diuzi tuze*

15 Cabē' naca quie Cristo, ben' saque' ilē'ëro, cabē' na' naca quie Diuzi, ben' bisaque' ilē'ëro. Naca Cristo lao Diuzi ca quie tu zi'inē' nēro. Nacarē' belaora lao yugulu ta bē Diuzi.

16 Lao na'a Cristo bē Diuzi yugulute, la'acazi ta dyia guibá, la'acazi ta zu lao yedyi layu, la'acazi ta saque' ilē'ëro, la'acazi ta bisaque' ilē'ëro, la'acazi yaca ben' nita' guibá, yaca ben' de yela' r nabē' quie. Lao na'a Cristo bē Diuzi yugulute, na' bega'nnan quienē'.

17 Tu binecue' yedyi layu bazucazi Cristo. Yugulu ta de lao yedyi layu nacan la'adyi'na'anē'.

18 Naca yaca ben' nao xneza Cristo ca quie tuzi cuerpo. Naca Cristo ca quie guicho cuerpo na'. Na' ra'o nacaro ca quie cuerpo quienē'. Tanēro beban Cristo. Quie lena' naquē' ben' belaora lao yugulute. Ganura ben' belao zu como ca lēbē'.

19 Cani nacan, como dan' cabē' naca Diuzi, cabē' na' naca Cristo.

20 Tanun quie dan' guti Cristo lē'ë yaga cruzo ulato ren quienē', quie lena' pca'ntza'o Diuzi yaca benē', la'acazi ben' zu yedyi layu, la'acazi ben' zu guibá.

21 Dza na' gucale ben' binuebē' Diuzi, ben' rudie Diuzi tanun quie dan' bēle tamedian. Pero na'a bapca'ntza'o Diuzi le'e

22 tanun quie dan' guti Cristo lē'ë yaga cruzo. Cana' bē Cristo tacuenda na' nayērile lao Diuzi, bibi dula' quiele de ta usedyinnē' le'e lao Diuzi.

23 Quie lena' reya'ala' inaorale dyē'ēdi hue quiele quie Cristo. Biusanle uzalale biyebiga'le. Reya'ala' cuezale yezi' Diuzi le'e ca rnēn lē'ë guichi la'iya quie Diuzi. Lēdi'idza' na' rguixogue'ro duže yedyi layu. Ca naca nē'ēdi', naca' ben' rguixogue' xti'idza' Diuzi.

### *Bdē' Diuzi Pablo ta usēdinē' yaca ben' nao xneza Cristo*

24 Redaohueda' sacazi'a ta gacalia' le'e como dan' cana' nacalia' Cristo tuže con cabē' guca quienē' užacazi'nē' ta gacalēnē' yaca ben' quienē', ben' naca ca quie cuerpo quienē'.

25 Bdē' Diuzi nē'ēdi' ta usēdia' yaca ben' rue quie xti'idza' Diuzi. Cana' re'enda' gacalia' quixogui'a le'e yugulu con cabē' rguixogue' di'idza' la'iya quie Diuzi.

26 Lena' rda'a ruzioñe'eda' ben' nao xneza Cristo con cabē' rguixogue' xti'idza' Diuzi, pero tu ta biunezi yaca ben' unita' tiempote ruzioñe'eda'yaquē' na'a. Azio zē iza de di'idza' nucachi' Diuzi, pero na' tera bzioñe'e Diuzi yaca ben' nao xneza Cristo cabē' rguixogue' di'idza' nucachi'nē'.

27 Cana' re'en Diuzi uzioñe'enē' yaca ben' quienē' cabē' rguixogue' di'idza' nagachi' quienē', dan' di'idza' dya'a nacan ta hue quieyaquē' yaca ben' binaca ben' Israel. Pues rguixogue' di'idza' nagachi' quie Diuzi cani: Zu Cristo lu'u guicho laxta'ole. Lēbē' rbezale yeguidē' yezi'nē' le'e yeyole guibá ga naca yen' quienē'.

28 Nēto' rguixogue'ndo' quie Cristo. Rnēyuerdo' rusēdindo' benē' du guicho du la'adyi'ndo' tacuenda usedyinnō' yaca benē' lao Diuzi gacayaquē' ben' laxta'o yēri nun quie nacalēyaquē' Cristo tuže.

29 Quie lena' rua' dyin quie Diuzi du guicho du la'adya' conlē fuerza valor run Cristo nē'ēdi'.

## 2

1 Re'enda' inezile lega rdēbida' bi raza quiele. Lēscan' rdēbida' quie yaca ben' quie Jesús nita' yedyi Laodicea, len nutezi ben' quie Jesús chan' binubē'yaquē' nē'ēdi'.

<sup>2</sup> Re'enda' biyeyatiyaquë' idyë'ëyaquë' itu ituyaquë' gacayaquë' tuzi. Re'enda' cue' chizi laxta'oyaquë' nun quie babzioñe'e Diuzi leyaquë' cabë' rguixogue' di'idza' nagachi' quienë' de que rguixogue'n quie Cristo.

<sup>3</sup> Naca Cristo ben' rioñe'e yugulute. Biyeyudyi yedu yela' rioñe'e quienë'.

<sup>4</sup> Lena' rnia' le'e tacuenda bigalele quie yaca ben' ru'e di'idza' huezi' yë'.

<sup>5</sup> Ba'ala'cazi bizëlia' le'e, pero rdëbida' quiele chi bi raca quiele. Redaohueda' rue quiele ta yu'u ni'a xnezi, birdzëbile inaole xneza Cristo.

<sup>6</sup> Quie lena', dan' baozi'le xneza Cristo, reya'ala' tale cabë' rda ben' nacalë Cristo tuze.

<sup>7</sup> Ca quie tu yaga huala yu'u luenan garë', lëcana' reya'ala' huele quie xneza Cristo, reya'ala' sële len huala, biinaole udeudela neza. Tuzi neza quie Cristo reya'ala' inaole, na' hue quiele cabë' unanë', cabë' psëdindo' le'e. Biusanle yëbile Diuzi diuxcalelo' yugu dza.

### *Baben Cristo yela' neban cubi quiero*

<sup>8</sup> Ulegapa cuidado. Bihue'le lato si' benë' le'e yë', ben' rnë di'idza' dachi, di'idza' huezi' yë'. Birueyaquë' dyabë' inao benë' xneza Cristo, den' rueyaquë' dyabë' inao yaca benë' ca naca costumbre quieyaquë'. Rueyaquë' dyabë' inao yaca benë' ca naca pensari quie yaca ben' nita' lao yedyi layu.

<sup>9</sup> Dužete cabë' naca Diuzi, cabë' na' nacarë Cristo.

<sup>10</sup> Quie lena' yugulu ta de nacan quiele dan' nacalële Cristo tuze. Lëbë' r nabë' rnanë' lao yugulu yaca ben' r nabë'.

<sup>11</sup> Lëscan' dan' nacalële Cristo tuze, quie lena' nacan quiele ca quie ben' bzu tu xëdyidao' cuine. Pues como dan' babeyëri le lao Diuzi, bira r nabë' ta rnazin quiele le'e, lena' nacan quiele ca quie tu xëdyidao' bzu Cristo le'e, cala xëdyidao' bzu benë' le'e.

<sup>12</sup> Lëscan' caora uyu'ule nisa gucale bautismo, cana' guca quiele ca quie ben' gutilë Cristo, ben' uyu'u lu'u yëroba, ben' bebanlë Cristo tatula. Cana' naca quiele na'a nun quie rue quiele quie yela' huaca quie Diuzi, ben' pseban Cristo.

<sup>13</sup> Tu ta baodele dza na' cati binehue quiele quie Diuzi, baodele guca quiele ca quie ben' huati de lao Diuzi. Pues por nun quie dula' xquia quiele, bineyëri le lao Diuzi. Pero na'a baben Diuzi le'e yela' naban tuzioli nun quie banacalële Cristo tuze, bezi'zenë' dula' xquia quiele.

<sup>14</sup> Beguba Diuzi tu ta zuba le'e xquia, tu ta nudze'de'na le'e de acuerdo con cabë' na ley quienë'. Lena' apsula Diuzi caora guti Cristo lë'ë yaga cruzo.

<sup>15</sup> Cana' bë Cristo gan begubanë' yela' r nabë' quie yaca bichi be xi'ibi' caora cati gutiguë' lë'ë yaga cruzo. Pcaxonë' leyacan zaca'lao lao yaca los demás ben' nita' guibá. Bzunë' leyacan preso ca rue nu rey ruzunë' preso ben' naca enemigo quienë'.

### *Ulehue cuenda tu ta naca quie guibá*

<sup>16</sup> Quie lena' nitu nitu bireya'ala' inabižoyaquë' le'e quie ta bi gaole, len ta bi yo'ole. Bireya'ala' inabižoyaquë' le'e quie bi dza huele lani, chi dza bezë biu' re'ene, o chi dza tula. Lëscan' bireya'ala' inabižoyaquë' le'e quie bi dza huele dza huezila'adyi'.

<sup>17</sup> Chi yela' huao, chi lani, chi dza huezila'adyi', lao yunaten rguixogue'n quie tu ben' zaza'ra. Rguixogue'n quie Cristo, ben' naca tali quie Diuzi.

<sup>18</sup> Bihue'le lato si' yaca ben' rionla'adyi' yaca ángel le'e yë'. Bihue'le lato cubayaquë' ta pceueza Diuzi para le'e guibá. Rueyaquë' ca quie ben' gaxo gula, pero bë' rueziaquë'. Nayaquë' uxusayaquë' blë'ëyaquë' ta naca tali quie Diuzi, pero bë' naziaquë'. Rueyaquë' cuinyaquë' ben' ze, pero ta racazi la'adyi'yaquë' rueyaquë' cana'.

<sup>19</sup> Bira ruelëyaquë' Cristo tuže. Ca gaoro ta gue'eniro suro dya'a, cana' naca quie Cristo, ruzioñe'enë' ra'o cabë' naca pensari quie Diuzi tacuenda suro dya'a laohuë' con cabë' re'en Diuzi gaca quiero.

<sup>20</sup> Le'e nacale ca quie ben' huati, ben' gutilë Cristo. Bira nacale cuenda quie benë' ta inaole huele quie pensari quieyaquë'. ¿Bixquien' nenaole neruele quie pensari quie yaca benë' cati bira nacale cuenda quieyaquë'?

<sup>21</sup> Leyaquë' inayaquë' cani: "Biselo' ta ni, bigaolo' ta na', bitzaquilo'n na'alo'." Cana' naca pensari quie benë'.

<sup>22</sup> Pero hueyudyi huedu quienan como dan' nacan puro pensarizi quie benë'.

<sup>23</sup> Parece tali na' huacalën ra'o chi inaoro huero pensari quie benë', porque ruen dyabë' quiero huero quie idao', gacaro ben' gaxo, gáparo cuidado len cuerpo quiero. Pero bë' ruezin binacan cana'. Bibi sirve inaoro huero pensari quie benë', porque bigacalën ra'o ta bihuero ta rnazin quiero.

### 3

<sup>1</sup> Le'e naca quiele ca quie ben' baguti babebanlë Cristo. Quie lena' huele cuenda tu ta naca quie guibá ga re' Cristo zaquë' yebë quie Diuzi.

<sup>2</sup> Nacaran belao huele pensari cabë' naca Diuzi zu guibá. Bihuele puro pensari cabë' raca lao yedyi layu.

<sup>3</sup> Le'e naca quiele ca quie ben' bagutilë Cristo. Quie lena' nazi'tzao' Cristo yela' naban quiele tuzioli nun quie dan' nacalë Cristo len Diuzi tuže.

<sup>4</sup> Naca Cristo ben' run yela' naban quiero tuzioli. Caora yeguida Cristo lao yedyi layu, huazulëronë' tuzioli. Huenë' mandado inabë'ro len lëbë'.

#### *Ni rnan quie yela' neban gula len yela' neban cubi*

<sup>5</sup> Quie lena' rnia' le'e, bira huele cuenda ca tu tamala ina bë'ëla' zuba' quiele huele. Banaca quiele ca quie banati bë'ëla' zuba' quiele, yela' na' bira huele cuenda quien. Biutzagale nigula binaca zgulale. Bihuele ta naca bayatza. Bihuele ta rnazin quiele. Bisa'la'adyi'le dumi. Ca nacan mala tzionla'adyi'ro ídolo, cana' mala nacan sa'la'adyi'ro dumi.

<sup>6</sup> Cana' rue yaca ben' bire'en hue quie con cabë' rna Diuzi. Quie lena' huadyin dza hue Diuzi leyaquë' castigo.

<sup>7</sup> Lëscan' le'e, cana' bële le'e dza na', dza binenaole xneza Cristo.

<sup>8</sup> Pero na'a ulesan bira huele tamala. Biihuin'le benë'. Biyezë'le benë'. Biutasi biunirole benë'. Biulidzale benë' di'idza' lë'ë.

<sup>9</sup> Bisi'le itu itule yë', como dan' apca'nle tzala'la cabë' bële dza na'.

<sup>10</sup> Pues banacale ca quie ben' cubi, bayu'ule pensari cubi ta bdze' Diuzi lu'u guicho laxta'ole. Yugu dza racalë Diuzi le'e ta galele huele con cabë' rna pensari cubi yu'u lu'u guicho laxta'ole tacuenda tziõe'erales mazara quie pensari quie Diuzi.

<sup>11</sup> Ra'o, ben' nao xneza Cristo, lao Diuzi bira nacaro zë cue' benë'. Nacaro tuzi cue' benë', la'achi ben' griego, la'achi ben' Israel, la'achi ben' zu seña xëdyidao', la'achi ben' bizu seña xëdyidao', la'achi ben' za' yedyi ga'ala', la'achi ben' za' yedyi zitu', la'achi ben' nada'o, la'achi ben' libre. Zë'le Cristo yugulu ben' nao xnezë'. Naquë' ben' belaora lao yugulute.

<sup>12</sup> Nadyë'ë Diuzi le'e. Ulionë' le'e bënë' le'e ben' yëri laohuë'. Tana' reya'ala' yeyëchi'la'adyi'le benë', reya'ala' gacalële benë', reya'ala' gapala'nle benë', reya'ala' hue'lële benë' di'idza' zela'adyi'. Bireya'ala' huele ze cunle.

<sup>13</sup> Ulehue'lë laguedyile di'idza' zela'adyi' itu itule. Ulesi'ze quie laguedyile itu itule. Cabë' bë Cristo bezi'zenë' quiele, cana' huelële laguedyile.

14 Tu ta nacan belao huele, reya'ala' idyë'ëtzeguele itu itu laguedyile. Dan' huele cana', lena' gacalën le'e hue quiele duže con cabë' rna pensari cubi bdze' Diuzi lu'u guicho laxta'ole. Cana' gacale tuzi len pensari quie Diuzi.

15 Rulidza' Diuzi cuëchinë' chizi laxta'ole, porque por lena' ulionë' le'e re'ennë' gacale tuzi cue' ben' quienë'. Bigala'adyi'le yëbile Diuzi diuxcaleo'.

16 Hue'le lato yega'n di'idza' quie Cristo lu'u guicho laxta'ole dyë'ëdi. Ulesëdi hue'le di'idza' zela'adyi' conlë itu itule conlë yela' rioñe'e quie Diuzi. Gulale nu Salmo, nu himno, nu alabanza la'iya. Yëbile Diuzi diuxcaleo' du guicho du la'adyi'le.

17 Yugulu ta huele, yugulu ta inale, uzëtole lao Jesús, ben' belao quiero. Caora cati yëbile Xuziro Diuzi diuxcaleo', lao na'a Jesús yëbilenë' diuxcaleo'.

### *Rusëdi Pablo ta yu'u ni'a xnezi hue yaca ben' nao xneza Cristo*

18 Na'ra le'e yaca nigula, cani rnia' le'e: Galele quie be'mbyu quiele. Cana' reya'ala' huele, dan' banacale ben' nao xneza Cristo.

19 Lëscan' rnia' le'e yaca be'mbyu: Gaquele idyë'ële nigula quiele. Bihuele snia conlë lëbë'.

20 Lëscan' rnia' le'e yaca xcuidi': Uzule di'idza' dyë'ëdi quie xuzi zna'le, como cana' re'en Diuzi huele.

21 Lëscan' rnia' le'e xuzi xcuidi': Biquilole idza' xcuidi' quiele, dan' chi huele cana' huadëbibi' biuzubi' di'idza' quiele du guicho du la'adyi'bi'.

22 Lëscan' rnia' le'e yaca ben' nada'o: Uzule di'idza' quie xa'nle, ben' naguixo dyin lao yedyi layu. Bisi'le xa'nle yë'. Huele dyin dya'a, la'achi zënë' ina'në' le'e, la'achi bizënë' ina'në' le'e. Tuz ca huele dyin quienë' du guicho du la'adyi'le. Cana' reya'ala' huele, dan' nacale ben' rapala'n Diuzi.

23 Yugulu ta ruele, huelen du guicho du la'adyi'le como ca dyin quie Diuzi ruele, quele dyin quie benë'.

24 Baonezile haben Diuzi le'e yela' neban tuzioli ta yeyole guiba dan' rzudyi'ilële Cristo, ben' naca Señor quiero.

25 Pero nu ben' rue tamedian, hue Diuzi lëbë' castigo con cabë' naca tamala bënë'. Tuzcazi ca rue Diuzi, cana' ruenë' conlë yugulu benë'.

## 4

1 Lëscan' rnia' le'e yaca ben' naca xa'n yaca ben' nada'o: Huele ta yu'u ni'a xnezi conlë yaca ben' nada'o. Bigala'adyi'le lëscan' le'e zurële lao Diuzi zu guibá, ben' naca xa'nle.

2 Cana'ra rnia' le'e, ben' bicha': Biusanle ulidzale Diuzi yugu dza. Biulidzalenë' con ganzi, pero yëbilenë' diuxcaleo'.

3 Lëscan' ulidzale Diuzi por nëto' tacuenda isaloguë' xnezando' saque'ndo' tzatixogue'ndo' benë' di'idza' la'iya quienë' yëbindo'yaquë' quie Cristo ta biunezi yaca ben' unita' timpote. Tanun quie dan' rguixogui'a quie Cristo, quie lena' dia' lu'u dyiguiba niga.

4 Ulidzale Diuzi ta gacalënë' në'ëdi' ta quixogui'a di'idza' la'iya quienë' cabë' reya'ala' quixogui'a.

5 Uleta dya'a lao yaca ben' binenao xneza Cristo tzala neru'en lato huero dyin quie Diuzi.

6 Puro di'idza' dya'a, di'idza' zaca'n lao Diuzi, reya'ala' hue'lële benë' tacuenda na' inezile ta yequëbile quie ben' binenao xneza Cristo.

### *Ga rugapayaquë' laguedyiaquë' diuzi*

7 Huida Tíquico idetixogue'në' le'e cabë' raca quia'. Naquë' ben' nadyë'ëro, ben' bichiro. Lënë' gucalënë' në'ëdi'. Dula'adyi'në' bëlënë' në'ëdi' dyin quie Diuzi.

<sup>8</sup> Quie lena' ise'ela' lëbë' ta inanë' le'e bi raca quiendo' ta uxela'adyi'në' le'e.

<sup>9</sup> Huidarë Onésimo conlë Tíquico. Lëscan' naca Onésimo ben' nadyë'ëro, ben' bichiro, ben' yedyi quiele. Leyaquë' quixogue'yaquë' le'e yugulu ca raca quiendo' niga.

<sup>10</sup> Aristarco, ben' delë në'ëdi' dyiguiba, rugapanë' le'e diuži. Lëscan' Moisés, ben' bichi Bernabé, rugaparënë' le'e diuži. Baonia' le'e cabë' re'enda' huele quie Marcos. Chi za'në' ideyubinë' le'e, ulezi'në' dyë'ëdi.

<sup>11</sup> Lëscan' rugapa Jesús, ben' laorë Justo, le'e diuži. Entre lado yaca ben' nao xneza Cristo, ben' nacarë ben' Israel, tuzi leyaquë' gualëyaquë' në'ëdi' udixogue'ndo' benë' xti'idza' Diuzi. Lega pxela'adyi'yaquë' në'ëdi'.

<sup>12</sup> Lëscana' rugapa Epafras le'e diuži. Nacarënë' ben' rue dyin quie Cristo, ben' yedyi quiele. Lënë' lega rulidzanë' Diuzi por le'e tacuenda uzalale zule puesto huele ca re'en Diuzi huele.

<sup>13</sup> Blë'ëda' ca rue Epafras ta gaca dya'a quiele. Lëzi cana' re'ennë' gaca dya'a quie ben' nita' ciudad Laodicea, len ben' nita' ciudad Hierápolis.

<sup>14</sup> Rugapa Lucas le'e diuži. Naca Lucas ben' rue remedio, ben' nadyë'ëro. Lëscan' rugapa Demas le'e diuži.

<sup>15</sup> Ugapale yaca ben' bichiro, ben' nao xneza Jesús, ben' nita' ciudad Laodicea, diuži. Lëscana' ugapale Ninfas, len yaca los demás ben' redupa žan yu'u quienë', diuži.

<sup>16</sup> Bë' abeyudyi ablabale guichi bia' ni, ulese'ela'n ciudad Laodicea tacuenda ulaba yaca ben' nao xneza Jesús nita' na' len. Lëscan' ulelaba guichi ta yese'ela'yaquë' laole.

<sup>17</sup> Uleyëbi Arquipo ta uzunë' di'idza' dyë'ëdi ca naca dyin bë' Diuzi lënë' huenë'.

<sup>18</sup> Në'ëdi', Pablo, conlë na'a rua' letra ga iyudyi guichi ni ta inezile tali guichi quia' na'. Rugapa' le'e diuži lë'ë guichi niga. Uleulidza Diuzi por në'ëdi', dan' dia' lu'u dyiguiba. Rulidza' Diuzi ta huela'iyänë' le'e. Amén.



## GUICHI NĒRO BĒ SAN PABLO APÓSTOL, USE'ELA'NĒ'N LAO CIUDAD TESALONICA

*Guichi ni use'ela' Pablo lao yaca ben' nao xneza Jesús, yaca ben' nita' ciudad Tesalónica*

<sup>1</sup> Nĕ'ēdi', Pablo, len Silas len Timoteo, bĕndo' guichi ni, use'ela'ndo'n laole ga nita'le ciudad Tesalónica. Nacale tuze len Xuziro Diuzi len Señor quiero Jesucristo. Rulidzando' Diuzi lĕnĕ' Señor quiero Jesucristo ta huela'iyaquĕ' le'e cuĕchiyaquĕ' chizi lu'u guicho laxta'ole.

*Tadya'a bĕ yaca ben' nao xneza Jesús, yaca ben' nita' ciudad Tesalónica*

<sup>2</sup> Yugo dza rulidzando' Diuzi rĕbindo'nĕ' diuxcalelo' por nun quiele.

<sup>3</sup> Yugu dza reza'la'adyi'ndo' le'e cabĕ' ruele, ruele tadya'a rnaole xneza Jesús, nedyĕ'ĕle laguedyile. Tantozi zudyi'ilĕle Señor quiero Jesucristo du guicho du la'adyi'le, birdzebile chi rusaca yaca benĕ' le'e bizinaquezi.

<sup>4</sup> Bicha', nedyĕ'ĕ Diuzi le'e. Nezindo' ulionĕ' le'e ta gacale ben' quienĕ'.

<sup>5</sup> Cala ta racazi la'adyi'ndo' udixogue'ndo' le'e xti'idza' Diuzi dza na', den' con yela' huaca quie Bichi Be quie Diuzi. Dyĕ'ĕdi nezindo' di'idza' li unando' le'e. Dyĕ'ĕdi nezile cabĕ' bĕndo', bĕndo' huen entre le'e dza na' beguilondo' modo ta gata' tahuen quiele.

<sup>6</sup> Na'ra le'e, por tu parte quiele, ruele cabĕ' ruendo', lĕscan' ruele cabĕ' bĕ Señor quiero. Pues lao na'a Bichi Be quie Diuzi rue quiele xti'idza' Diuzi zule contento, ba'ala'cazi psaca' yaca benĕ' le'e bizinaquezi.

<sup>7</sup> Quie lena' nezi yaca ben' nao xneza Jesús nita' yaca ciudad nebaba Macedonia, len yaca ben' nao xneza Jesús nita' yaca ciudad nebaba Acaya cabĕ' ruele, ruele tadya'a.

<sup>8</sup> Quie lena' yaca ben' nita' yaca ciudad nebaba Macedonia, len yaca ben' nita' yaca ciudad nebaba Acaya, rezila'adyi'yaquĕ' xti'idza' Diuzi, pero lĕscan' yaca ben' nita' zĕ yedyi tula, rezila'adyi'rĕyaquĕ' xti'idza' Diuzi. Tanto rue quiele xti'idza' Diuzi, birnaban yĕbiroyaquĕ' ca ruele,

<sup>9</sup> porque cuinyaquĕ' rĕbiyaquĕ' laguedyiyaquĕ' cabĕ' bĕle dza na', uyezila'adyi'le nĕto'. Lĕscan' rĕbiyaquĕ' laguedyiyaquĕ' cabĕ' bĕle psanla'adyi'le yaca ídolo quiele, banaole tuzi Diuzi zu guibá, ben' neban tuzioli.

<sup>10</sup> Lĕscan' rĕbiyaquĕ' laguedyiyaquĕ' cabĕ' rbezale yeguida zi'inĕ' Jesús zeza'nĕ' guibá yeguidanĕ' lao yedyi layu tatula. Naquĕ' ben' aguti, pero pseban Diuzi lĕbĕ'. Naquĕ' ben' ute usela ra'o ta bigata' castigo quiero dza zaza'ra, dza gaca juicio lao yedyi layu.

## 2

*Ca guca cati uda Pablo ciudad Tesalónica*

<sup>1</sup> Banezile, bicha', biuden cana'zi bidando' udixogue'ndo' le'e xti'idza' Diuzi dza na'.

<sup>2</sup> Lĕscan' nezile cabĕ' bĕ yaca ben' ciudad Filipos len nĕto'. Ptasi bnioyaquĕ' nĕto'. Psacayaquĕ' nĕto' bizinaquezi. Pues ba'ala'cazi psaca yaca ben' na' nĕto' bizinaquezi, ba'ala'cazi guca zĕdi gula, udixogue'ndo' le'e xti'idza' Diuzi du guicho du la'adyi'ndo'.

<sup>3</sup> Cala di'idza' huizi' yĕ' udixogue'ndo' le'e. Biudixogue'ndo' le'e xti'idza' Diuzi con ganzi. Nitu nitu biuzi'ndo' le'e yĕ'.

4 Ulio Diuzi nêto' ta uidxogue'ndo' le'e di'idza' la'iya quienë'. Cala rguilondo' modo ta hue yaca benë' nêto' ben' ze. Rbezando' hue Diuzi nêto' ben' ze, porque nezi Diuzi cabë' naca pensari quiendo'.

5 Dyë'ëdi nezile cala di'idza' bibizaca', cala di'idza' huizi' yë', uidxogue'ndo' le'e dza na'. Dyë'ëdi nezile quele re'enndo' ta de quiele. Naca Diuzi testigo cala yë' rzi'a.

6 Cala za'ndo' rguilondo' ben' hue nêto' ben' ze, la'achi le'e, la'achi ben' tula.

7 Ba'ala'cazi de yela' rnabë' quiendo', como nacando' ben' use'ela' Cristo, bibëlendo' le'e zëdi bi cosa re'enndo' huele. Ca quie zi'indo' bëlendo' le'e dza na'. Gucalendo' le'e ca quie zna'le racalënë' zi'inë'.

8 Pues tantozi nadyë'ëndo' le'e, cala uidxogue'zindo' le'e di'idza' la'iya quie Diuzi, den' lëscan' uzundo' dispuesto gatindo' lao lazale chi bi re'en yaca benë' hueyaquë' quiele.

9 Bicha', bigalala'adyi'le cabë' bëndo', bëndo' dyin du dza, du yëla, ta bibi gasto huele ta de quiele para nêto' caora cati udando' uidxogue'ndo' le'e xti'idza' Diuzi.

10 Le'e len Diuzi, nacale testigo quiendo' cabë' bëndo'. Dyë'ëdi nezile cabë' bëndo' lëndo' le'e dza na'. Bëndo' tahuen, bëndo' tali, bëndo' ta gabi causa gata' quiendo' conlë le'e.

11 Lëscan' nezile cabë' unando' le'e di'idza' zela'adyi' cabë' rue benë' lënë' zi'inë'.

12 Pues pxi'idze'ndo' le'e de que reya'ala' huele tadya'a como ben' nao xneza Diuzi, porque lëbë' ulionë' le'e ta yeyole tzezulële lëbë' guibá ga re'në' rnabë'në'.

13 Quie lena' rulidzando' Diuzi diuxcalelo' nun quie uyëzila'adyi'le xti'idza' Diuzi uidxogue'ndo' le'e dza na'. Gucabë'le di'idza' li xti'idza' Diuzi, binacan di'idza' quie benë'zi. Pues lëdi'idza' na' ruxi'idze'n le'e cabë' reya'ala' huele tadya'a nun quie dan' nacale ben' nao xneza Jesús.

14 Bicha', cati rue yaca benë' le'e bizinaquezi, bigala'adyi'le lëscan' gucarë quie yaca ben' nao xneza Cristo, yaca ben' nita' yaca yedyi nababa estado Judea. Lëzi psaca yaca ben' yedyi quiejë' leyaquë' bizinaquezi.

15 Lëben' Israel bëtiyaquë' Señor quiero Jesús. Lëzi bëtirëyaquë' yaca ben' bida bedetixogue' leyaquë' xti'idza' Diuzi dza na'te. Pues belaoyaquë' nêto' berondo' yaca yedyi quiejë'. Biraxe Diuzi ca ruejë', dan' ruejë' condre yugulu benë'.

16 Pues bza'agayaquë' nêto' caora cati gu'unndo' quixogue'ndo' ben' binaca ben' Israel xti'idza' Diuzi, porque bigu'unyaquë' galeyauquë' gata' yela' neban quieyaquë' tuzioli. Quie lena' nayëra xquia quieyaquë'. Quie lena' abdyn hora hue Diuzi lëjë' castigo huala gula.

*Gu'un Pablo tziönë' tatula ciudad Tesalónica ta tzeyubinë' yaca ben' nao xneza Jesús*

17 Azio zidza beza'ndo' ciudad quiele. Ba'ala'cazi bira zulendo' le'e yedyi quiele, biralala'adyi'ndo' le'e. Lega re'enndo' ideyubindo' le'e.

18 Zë lasa gu'unndo' ideyubindo' le'e hasta agu'unda' guida' cuinza', pero bza'aga xan' taxi'ibi' nêto'.

19 ¿Bixquien' redaohuendo' zundo' gusto, zundo' contento rbezando' yeguida Jesús? Dan' rue quiele xti'idza' Diuzi nacale ben' nao xneza Jesús, quie lena' redaohuendo' zundo' gusto, zundo' contento rbezando' yeguida Señor quiero Jesucristo.

20 Le'e, sí, dan' naole xneza Jesús, quie lena' redaohuendo' zundo' gusto.

## 3

<sup>1</sup> Caora bira uzuendo' cuezando' idena'ndo' le'e, bēndo' pensari bega'nndo' rupando' ciudad Atenas,

<sup>2</sup> na' use'ela'ndo' Timoteo bedeyubinē' le'e. Naca Timoteo ben' rale, ben' racalē nēto' ruendo' dyin quie Diuzi rguixogue'ndo' benē' cabē' hē Cristo, bēnē' tahuen quiero. Use'ela' lēbi' ideyubinē' le'e ta inē' le'e di'idza' zela'adyi' ta biidzebile hue quiele xti'idza' Diuzi.

<sup>3</sup> Cana' huenē' gacalēnē' le'e biyehuēdile inaole xneza Jesús ba'ala'cazi raca zēdi quiele. Dyē'ēdi nezile usacacazi yaca benē' ra'o bizinaquezi.

<sup>4</sup> Pues caora nita'lēndo' le'e dza na', dyē'ēdi unando' le'e huata' tazēdi quiele. Dyē'ēdi nezile gucan laga con cabē' unando' le'e dza na'.

<sup>5</sup> Quie lena', caora bira uzueda' cueza' mazara para inezida' bi raca quiele, caora na' use'ela' Timoteo ta guidē' inezinē' bi raca quiele chi nenaole xneza Jesús. Bdzeba' chi babē xan' taxi'ibi' le'e gan, aozi'na le'e yē', baoden cana'zi dyin quie Diuzi bēndo' entre le'e.

<sup>6</sup> Na'ra abela' Timoteo niga, zeyu'anē' di'idza' nenaole xneza Jesús, nadyē'ēle laguedyile. Lēscana' zeyu'anē' di'idza' reza'la'adyi'le nedyē'ēle nēto', re'enle guidale idena'le nēto'. Lēscan' nēto' re'enndo' idena'ndo' le'e.

<sup>7</sup> Quie lena', bicha', biraquendo' bayēchi' ba'ala'cazi rsaca benē' nēto' bizinaquezi, porque nezindo' le'e birusanla'adyi'le xneza Jesús, nerue quiele xti'idza' Diuzi. Cana' ruxela'adyi'le nēto'.

<sup>8</sup> Legazi yedaohuendo' nezindo' birdzebile nernaole xneza Jesús.

<sup>9</sup> Quie lena' rulidzando' Diuzi rēbindo'nē' diuxcalelo' tu mila gayuhua lasa. Na'ra por nun quie nenaole neruele quie Diuzi, redaohuetzeguendo'.

<sup>10</sup> Pues du dza, du yela, rulidzando' Diuzi chi bigunnē' lato guidando' idena'ndo' le'e tacuenda usēdindo' le'e ga zu racale falta ta inaorale xneza Jesús dya'ara.

<sup>11</sup> Pues siempre rnabando' lao Xuziro Diuzi lēnē' Señor quiero Jesucristo ta gacalēyaquē' nēto' guidando' idena'ndo' le'e.

<sup>12</sup> Lēscana' rnabando' lao Diuzi chi bigacalēnē' le'e ta idyē'ēle mazara ben' bichile, ben' nao xneza Jesús. Lēzi cala tuzi ben' nao xneza Jesús reya'ala' idyē'ēle, reya'ala' idyē'ēle yugulu benē' como cabē' nadyē'ēndo' le'e.

<sup>13</sup> Chi huele cana', lena' ulu'en nacale ben' laxta'o yēri, bibi causa gata' quiele lao Xuziro Diuzi dza zeza' Señor quiero Jesús lēnē' yaca ben' quienē'.

## 4

*Ni nan cabē' re'en Diuzi huero*

<sup>1</sup> Na'ra, bicha', lao Señor quiero Jesucristo, rnabayēchi'ndo' huendo' le'e mandado biusanle huele tadya'a con cabē' baruele, con cabē' psēdindo' le'e tacuenda yedaohue Diuzi cabē' ruele.

<sup>2</sup> Dyē'ēdi nezile conlē yela' rnabē' quie Señor quiero Jesucristo, udixogue'ndo' le'e xti'idzē'.

<sup>3</sup> Pues re'en Diuzi gacaro ben' laxta'o yēri. Quie lena' nitu nitu nunu reya'ala' gatalēnē' nigula tula, nigula binaca zgulē'. Lēscan' yaca nigula bireya'ala' gatalēnē' be'mbyu tula.

<sup>4</sup> Lēscan' tahuen na' chi si'le nigula quiele, pero bihuele bizinaquezi lēle nigula quiele. Huelēlenē' tadya'a gapala'nlenē'.

<sup>5</sup> Bihuele ca rue ben' binezi xti'idza' Diuzi. Rzi'jē' nigula ta usacajē' leyaquē' cabē' rnazin pensari mala quiejē'.

<sup>6</sup> Bire'en Diuzi si'le bichile yē'. Hue Diuzi castigo quie yaca ben' hue cana' laga como bagudyindo' le'e dza na'.

7 Cala ulio Diuzi le'e ta huele tabayatza. Ulioguë' le'e ta gacale ben' laxta'oro yëri.

8 Nacan dyabë' yele cabë' rando' le'e. Chi nu le'e biraxele hue quiele cabë' nando' le'e, cala nêto'zi birue quiele, lëscan' lente Diuzi birue quiele. Naca Diuzi ben' rudze' Bichi Be quië' lu' u guicho laxta'oro.

9 Na'ra biraoyentica ise'ela'ndo' guichi laole ta inando' le'e cabë' reya'ala' huele idyë'ële ben' bichile, ben' nao xneza Jesús, porque cuin Diuzi abzioñe'enë' le'e bi huelële ben' bichile.

10 Cana' banadyë'ële ben' bichile, ben' nao xneza Jesús, ben' nita' yaca yedyi nebaba Macedonia. Pero, bicha', re'enndo' huele mazara, re'enndo' idyë'ëleyaquë' dyë'ëdi.

11 Reya'ala' tzu'ulële laguedyile dyë'ëdi, bihuelële laguedyile zëdi. Pues tahuen na' chi huele dyin quiezile como bagudyindo' le'e dza na'.

12 Chi huele cana', hasta ben' binao xneza Jesús, hualë'ëyaquë' le'e ben' dya'a, ni tule bibi idzioguele.

### *Ni nan cabë' gaca dza yeguida Jesucristo lao yedyi layu*

13 Bicha', re'enndo' inezile cabë' gaca quie yaca bichiro, ben' nao xneza Jesús, yaca ben' baguti. Reya'ala' inezile tacuenda bigaquele bayëchi' quieyaquë' ca bayëchi' naca quie yaca ben' birbeza yeguida Jesús.

14 Pues como neziro aguti Jesús beseban Diuzi lëbë', lëscana' reya'ala' ineziro useban Diuzi yaca ben' rale, yaca ben' unao xneza Jesús dza udajë' lao yedyi layu.

15 Quie lena' rando' le'e con cabë' una Jesús de que ra'o, ben' nenaban, bicuialaoro lao ben' baguti, bicuialaoro laojë' dza yeyoro guibá, dza yeguida Jesús lao yedyi layu.

16 Cati abdyin dza yeguida Jesucristo za'në' guibá, caora na' huanë' zidzo yeyëzinë' ben' quienë' ta yedupayaquë' yedyinyaquë' ga zënë' ladza. Lëscan' huanë' tu xan' ángel zidzo rucuedyinë' trompeta quie Diuzi. Hora na', useban Diuzi yaca ben' quienë', yaca ben' baguti, ben' unao xnezë' dza udajë' lao yedyi layu. Huebëyaquë' hueyojë' ga zë Jesús ladza.

17 Te yeyudyi na', ra'o, ben' quienë', ben' nenaban, ben' nenita' lao yedyi layu, huebëro yedyinrëro ga bedyin ben' zeyo tanëro, ga re' beo, ga zë Jesús ladza.

18 Pues cana' tzazulëro Jesucristo tuzioli. Con cabë' baonia' le'e, huelële ben' bichiro di' idza' zëla'adyi'.

## 5

1 Na'ra, bicha', biraoyentica ise'ela'ndo' guichi laole ta quixogue'n le'e bi hora, bi dza, yeguida Jesús lao yedyi layu,

2 porque banezile dyë'ëdi cabë' gaca dza yeguida Jesucristo. Pues caora raque yaca benë' bibi gaca quiejë', caora na' bigacabë'jë', pero tu sasazi idyin dza yeguida Jesús. Pues idyin dza na' tu sasazi ca quie tu sasazi guida ben' uban du rëla du rasi xan' yu'u, raquenë' bibi gaca quienë'. Cana' gaca cati idyin dza yeguida Jesús.

3 Pues caora na' ina yaca benë' cani: "Nita'ro dya'a na', bibi gaca quiero", pues caora na' tu sasazi cuiagui'yaquë'. Gabi cule quieyaquë' de ta bicuiagui'yaquë' caora yeguida Jesús. Laga cana' gaca quieyaquë' ca quie nigula rla abdyin hora su xcuidi' quie, gabi cule de quienë' ta biñanë'.

4 Pero le'e, bicha', binacale ben' rdo lao lato lao chula. Quie lena' bireya'ala' idzebile dza yeguida Jesucristo cabë' rdzebi ben' uban chi yela' xan' yu'u tu sasazi.

<sup>5</sup> Pues yugulule nacale ben' rda lao lato lao xni'. Binacaro ben' rda lao lato lao chula.

<sup>6</sup> Bihuero ca rue ben' rasi, ben' bibi pensari yu'u. Pero ra'o, reya'ala' suro listo, reya'ala' huero pensari.

<sup>7</sup> Ben' rue gusi, denë' gusi rtze'. Lëscan' ben' rue hue'e, rdanë' hue'e rtze'.

<sup>8</sup> Pero ra'o, bihuero cana', porque nacaro ben' rda lao lato lao xni'. Bihuero ca quie ben' rasi, bihuero ca quie ben' žudyi. Gaparo cuidado, zudyi'ilëro Diuzi du guicho du la'adyi'ro, idyë'ëro laguedyiro, cuezaro dyë'ëdi yezi' Jesús ra'o,

<sup>9</sup> porque cala ulio Diuzi ra'o ta huenë' ra'o castigo dza gaca juicio, pero ulionë' ra'o ta gata' yela' neban quiero tuzioli lao na'a Jesucristo.

<sup>10</sup> Pues lëbë' agutië' lë'ë yaga cruzo para ra'o ta sulëro lëbë' dza yeguidë' para tuzioli, la'achi bagutiro, la'achi nenabanro.

<sup>11</sup> Biusanle huelële ben' bichiro, ben' nao xneza Jesús, di'idza' zela'adyi', tal como barulëleyaquë' na'a.

### *Unëyue Pablo yaca ben' nao xneza Jesús*

<sup>12</sup> Bicha', rnando' le'e gapala'nle nu ben' napa dyin quie Diuzi entre le'e. Lao na'a Señor quiero rnëyueyaquë' rna'yaquë' le'e.

<sup>13</sup> Reya'ala' gapala'nle idyë'ële lëjë' nun quie ruejë' dyin quie Diuzi. Yugulule reya'ala' inita'lële laguedyile dyë'ëdi, bitilalële laguedyile.

<sup>14</sup> Na'ra, bicha', yëbile yaca ben' huëdi ta huejë' dyin, bira yehuëdijë'. Lëscan' hue'lële yaca ben' raca bayëchi' quie di'idza' zela'adyi'. Gacalële yaca ben' binezioñe'e xti'idza' Diuzi dyë'ëdi. Huezela'adyi'le quie lao yugulutejë'.

<sup>15</sup> Gapale cuidado biyeyuele laohue chi rusaca yaca benë' le'e bizinaquezi. Pero inaocazile huele tadya'a lële yugulu benë', la'acazi entre le'ezi, la'acazi entre yaca los demás ben' nita' lao yedyi layu.

<sup>16</sup> Reya'ala' sule contento yugo dza.

<sup>17</sup> Reya'ala' hue'lële Diuzi di'idza' yugo dza.

<sup>18</sup> Chi bi raca quiele, reya'ala' yëbile Diuzi diuxcalelo', porque cana' re'en Diuzi huele como nacale ben' nao xneza Cristo Jesús.

<sup>19</sup> Bihuele yeladyi'. Huele cabë' re'en Bichi Be quie Diuzi huele.

<sup>20</sup> Biyezë'le di'idza' quie ben' rna lao na'a Bichi Be quie Diuzi.

<sup>21</sup> Ina'le dyë'ëdi bi rue yaca benë', chi nacan dya'a, chi binacan dya'a. Yela' na' ilë'ële huerële tadya'a.

<sup>22</sup> Reya'ala' usebi'le yugulu tamedian.

<sup>23</sup> Rulidzando' Diuzi ta huenë' le'e ben' laxta'o yëri. Rulidzando'në' ta gapanë' yela' neban quiele, len bichi be quiele, len alma quiele len cuerpo quiele, yela' na' bibi causa gata' quiele dza yeguida Señor quiero Jesucristo.

<sup>24</sup> Naca Diuzi ben' ulio le'e. Huecazinë' con cabë' unanë' huenë' quiele.

### *Udapa Pablo leyaquë' diuzi*

<sup>25</sup> Bicha', hue'lële Diuzi di'idza' por nëto'.

<sup>26</sup> Ugapale ben' bichiro diuzi, gaole situ xagayaquë'.

<sup>27</sup> Rua' le'e mandado conlë yela' r nabë' quie Jesucristo ta ulabale guichi ni lao yaca los demás ben' nao xneza Jesús.

<sup>28</sup> Rulidzando' Señor quiero Jesucristo ta huela'iyänë' le'e. Amën.

## GUICHI URUPE BÈ SAN PABLO APÓSTOL USE'ELA'NÈ'N LAO CIUDAD TESALONICA

*Pablo lènè' compañero quienè' bějè' guichi ni.*

<sup>1</sup> Nè'èdi', Pablo, len Silas, len Timoteo, bèndo' guichi ni, use'ela'ndo'n laole ga nita'le ciudad Tesalónica. Nacale tuže len Xuziro Diuzi len Señor quiero Jesucristo.

<sup>2</sup> Rulidzando' Xuziro Diuzi lènè' Señor quiero Jesucristo ta huela'iyaquè' le'e cuèchiyaquè' chizi lu'u guicho laxta'ole.

*Hue Diuzi castigo yaca ben' mala dza cati yeguida Cristo*

<sup>3</sup> Bicha', rulidzando' Diuzi rëbindo'nè' diuxcalelo' por le'e. Tadya'acazi yëbïro Diuzi cana', porque yugo dza zudyi'ilële Diuzi, nedyè'ële laguedyile mazara.

<sup>4</sup> Quie lena' redaohuendo' ga redupando' yëbindo' yaca los demás bichiro, ben' nao xneza Jesús, cabizi raca quiele, porque ba'ala'cazi rusaca yaca benè' le'e bizinaquezi redzagalaole, pero birdzebile birusanla'adyi'le xneza Jesús.

<sup>5</sup> Lena' rulu'en ta yu'u ni'a xnezi bē Diuzi pensari bē ulionè' le'e ta tzirole ga zuè' tu dza zaza'ra. Quie lëzin rusaca benè' le'e bizinaquezi.

<sup>6</sup> Pues tali na' hue Diuzi castigo yaca ben' psacayaquè' le'e bizinaquezi.

<sup>7</sup> Lëscan' tali na' dza yeguida Jesucristo hue Diuzi mandado ta iyudyi yedzagalaole tazëdi raca quiele tal como tazëdi raca quiendo'. Dza na' huelè'ëro Jesús zeza'nè' guibá, nu'anè' tu gui' ze, zequiè'nè' yaca ángel quienè', ben' rue yela' huaca quienè'.

<sup>8</sup> Zeza'nè' ta huenè' castigo yugo ben' bibè' quie xti'idza' Diuzi, ben' biunao xnezè'.

<sup>9</sup> Na' castigo hue Diuzi leyaquè' nacan de tzalasazi, bira yeyulan. Huaru'un Diuzi lëjè' zifu' ga yega'nyaquè' tuzioli, ga bizu Jesucristo, ben' de yela' huaca quie, ben' de yela' r nabè' quie.

<sup>10</sup> Cati yeguida Jesucristo, caora na' hue yaca ben' quienè' lëbè' ben' ze, gapala'ntzegueyaquè' lëbè'. Lëscan', le'e, huazurèle conlè lëbè', porque bē quiele xti'idza' Diuzi udixogue'ndo' le'e dza na'.

<sup>11</sup> Quie lena' yugo dza ruendo' orar por le'e rulidzando' Diuzi quiero ta il'è'nè' le'e ben' zaca'cazi ulionè' le'e. Lëscan' rulidzando' Diuzi ta huenè' mandado gaca quiele ca re'ennè' gaca quiele, lëscan' ta gacalènè' le'e ta huele tadya'a ca re'enle huele, lëscan' ta huelè dyin quie Diuzi ca re'enle huele.

<sup>12</sup> Chi huele cana', cana' gaca gapala'n yaca benè' Señor quiero Jesucristo. Lëscan' gapala'n Jesucristo le'e conforme yela' ben' huen quie Diuzi lènè' Señor quiero Jesucristo.

## 2

*Huida tu ben' hue contra Cristo*

<sup>1-2</sup> Bicha', quie dza cati zeza' Jesucristo ta utupanè' ra'o, rnabayèchi'ndo' le'e biutz'a'le pensari quiele bihue'le lato utëbi yaca benè' le'e, chan' nayaquè' babida Cristo. Bigalele quieyaquè' ba'ala'cazi inajè' Diuzi gudyi lëjè' cana'. Bigalele quieyaquè' ba'ala'cazi inayaquè' cana' nan lè'è guichi use'ela'ndo' laole.

<sup>3</sup> Pues bihue'le lato si' yaca benè' le'e yè'. Dza yeguidara Cristo, decazide idyin tiempo huadilalè ja ben' nita' lao yedyi layu Diuzi. Caora na' guida

tu ben' hue contra Cristo. Pero lëben' na', banezi Diuzi bi huenë' quienë', udyiagui'në' lëbë'.

<sup>4</sup>Lëben' na' naquë' enemigo quie Diuzi. Huenë' contra yaca ta rionela'adyi' yaca benë', huenë' contra ta najë' naca diuzi quiejë'. Huanë' rnabë'ranë' ca Diuzi zu guibá. Huayu'unë' tzaque'në' lu'u yu'u idao' rnabë'ra quie Diuzi ta si'në' benë' yë' gaqueyaquë' Diuzi naquë'.

<sup>5</sup>Nezda' rezala'adyi'le con cabë' unia' le'e dza na', dza uzëlia' le'e unia' le'e cabë' gaca dza zaza'ra.

<sup>6</sup>Dyë'ëdi nezile nuquien' ruza'aga ta biguida ben' hue contra Cristo. Decazide guida ben' hue contra Cristo, pero bë' idyin hora cabë' psaquë' Diuzi guidë'.

<sup>7</sup>Pues baozulaonë' ruenë' contra Cristo, pero lë'ëti'zi. Pero huazulaonë' huenë' mazara caora idyin dza bira zu ben' ruza'aga lëbë'.

<sup>8</sup>Cana' gaca caora idyin dza guida lëben' mala gula, ben' rue contra Cristo. Pero guti Jesucristo lëbë'. Conlë bezi rero ru'anë' gutinë' ben' na', yeguidanë' nica gacabë'zinë'. Cana' hue Jesucristo dza cati yeguidanë' hualë'ë yaca benë' ca naca yela' huaca quienë'.

<sup>9</sup>Mandado hue xan' taxi'ibi' Satanás guida ben' hue contra Cristo. Bade yela' huaca quien ta ulu'en benë' ta yebanyaquë', pero bë' huezin na' ta si'zin benë' yë'.

<sup>10</sup>Tamala gula huen ta si'n benë' yë', yaca ben' bire'en inao xneza Jesús, yaca ben' bire'en gata' yela' neban quie tuzioli.

<sup>11</sup>Quie lena' usanla'adyi' Diuzi leyaquë' tacuenda si' ben' na' lëjë' yë'. Lena' galeyauquë' ta binaca tali.

<sup>12</sup>Hue Diuzi lëjë' castigo, dan' bibë quieyaquë' di'idza' quienë', yaxerayaquë' inaoyaquë' hueyaquë' tamala quiejë'.

### *Aolio Diuzi yaca ben' gaca yë'ri laxta'ohue*

<sup>13</sup>Rulidzando' Diuzi diuxcalelo' por le'e, bicha', ben' nedyë'ëndo'. Rulidzando' Diuzi diuxcalelo', dan' zagata'ra yedyi layu, ulio Diuzi le'e ta gacale ben' nëro, ben' gata' yela' neban quie tuzioli lao na'a Bichi Be quienë' lënë' xti'idza'në' ta barue quiele.

<sup>14</sup>Quie lena' ulio Diuzi le'e por nun quie xti'idzë' udixogue'ndo' le'e ta gaca tu parte quiele quie yela' huaca quie Jesucristo, ben' naca Señor quiero.

<sup>15</sup>Bicha', bigala'adyi'le ca ta psëdindo' le'e, la'achi di'idza' bë'lëndo' le'e, la'achi di'idza' bzundo' lë'ë guichi use'ela'ndo'n laole.

<sup>16-17</sup>Naca Señor quiero Jesucristo lënë' Xuziro Diuzi ben' huen gula, nedyë'ëyaquë' ra'o, racalëyaquë' ra'o tuzioli. Por nun quieyaquë' naca huen quiero rbezaro dza yeguida Jesucristo. Rulidzando'yaquë' por le'e ta xela'adyi'yaquë' le'e, lëscan' ta gapayaquë' le'e dyë'ëdi, na' biusanle xneza Diuzi inaole huele puro tadya'a.

## 3

### *Re'en Pablo ulidzayaquë' Diuzi por lëbë' lënë' compañero quienë'*

<sup>1</sup>Na'ra, bicha' ulidzale Diuzi por nëto' tacuenda idyin xti'idza' Diuzi yedu yedyi layu, hue yaca benë' quieyaquen cabë' ruele le'e, ban' quiele xti'idza' Diuzi.

<sup>2</sup>Lëscan' ulidzale Diuzi por nëto' tacuenda te ilando' bigaca quiendo' cabë' re'en yaca ben' mala, ben' re'en usaca nëto' bizinaquezi, porque siempre nita' ben' binao xneza Jesús.

<sup>3</sup>Biusanla'adyi' Diuzi le'e. Rapanë' le'e dyë'ëdi. Ucuasa ucu'onë' le'e bi tamala za' gaca quiele le'e.

<sup>4</sup> Baržela'adyi'ndo' inaole ruele cabè' psèdindo' le'e biusanla'adyi'lena.

<sup>5</sup> Rulidzando' Diuzi ta gacalènè' le'e ta idyè'ële Diuzi ca nadyè'ënè' le'e, lëscan' ta gacale ben' žela'adyi' cabè' ben' žela'adyi' naca Cristo.

*Reya'ala' huero dyin yuguluro*

<sup>6</sup> Na'ra, bicha', lao na'a Señor quiero Jesucristo, rmando' le'e chi zu ben' nao nxeza Jesús, pero bire'ennè' huenè' dyin, ulesan quienè' bira huele lëbè' tzaže.

<sup>7-8</sup> Dyè'èdi nezile cabè' bëndo' dza uzulëndo' le'e. Cala ure'zindo' conlè le'e, cala unabando' ta gaondo' cana'zi, den' udižondo' quie ta udaondo'. Dyin huala bëndo' yugo dza ta hue'endo' ta udaondo' ta bibi gasto bële.

<sup>9</sup> Ba'ala'cazi napando' derecho inabando' ugaole nètò', pero biunabando'n. Cana' blu'endo' le'e cabè' reya'ala' huele.

<sup>10</sup> Nu ben' bire'en hue dyin, bihue'le laze ta gaonè'. Cana' psèdindo' le'e caora uzulëndo' le'e dza na'.

<sup>11</sup> Banezindo' balale bire'enle huele dyin, na' rdazile pasiale yugo dza ru'elèle laguedyile di'idza' bižu, bireyula'adyi'le huele dyin.

<sup>12</sup> Quie leyaquè' ruendo' mandado ta huejè' dyin ta biidzioguejè' ta gaojè', lëscan' ta bira huejè' laguedyijè' zèdi inabajè' lèjè' ta gaojè'. Lao na'a Señor quiero Jesucristo ruendo' le'e mandado de que reya'ala' hue yaca benè' dyin ta gata' ta gaojè'.

<sup>13</sup> Bicha', biyehuèdile huele tadya'a.

<sup>14</sup> Chi nita' ben' bichiro, ben' birue quie cabè' na di'idza' dyia lè'è guichi niga, ina'le dyè'èdi nu yaca ben' rue yaca cana'. Ulesan quieyaquè' tacuenda gata' yela' stu' quieyaquè'.

<sup>15</sup> Biudze'la'adyi'le leyaquè', den' inëyuele quiejè' como ca bichiro.

*Ni beyudyi di'idza' use'ela' Pablo lao yaca ben' nita' ciudad Tesalónica*

<sup>16</sup> Rlidzando' Señor quiero ta cuëchinè' chizi lu'u guicho laxta'ole con bitezi gaca quiele con gatezi tzirole yugulule.

<sup>17</sup> Nè'èdi', Pablo, rugapa' le'e diuzi lè'è guichi niga. Conlè na'a rua' letra con ga iyudyi carta niga tacuenda inezile tali carta quia' na'. Cana' rua' yugo carta quia'.

<sup>18</sup> Rulidzando' Diuzi por le'e ta huela'iya Señor quiero Jesucristo yugulule. Amén.



## GUICHI NĒRO BĒ SAN PABLO APÓSTOL USE'ELA'NĒ'N LAO TIMOTEO

### *Use'ela' Pablo guichi ni lao Timoteo*

1 Nē'ēdi', Pablo, naca' apóstol quie Jesucristo. Use'ela' Diuzi lēnē' Señor quiero Jesucristo nē'ēdi'. Naca Diuzi ben' ute usela ra'o. Lēscana' naca Jesucristo ben' rbezaro yeguida idezi' ra'o.

2 Timoteo, bia' guichi niga pse'ela'n laolo' nun quie naco' ca zi'ina', ben' naorē xneza Jesucristo. Rulidza' Xuziro Diuzi lēnē' Señor quiero Jesucristo ta huela'iyaquē' luē', yeyēchi'la'adyi'yaquē' luē', cuēchiyaquē' chizi laxta'olo'.

### *Rnē Pablo quie yaca ben' rusēdi ta binaca tali*

3 Como cabē' agudya' luē' dza beza' uya'a yaca yedyi nebaba Macedonia, re'enda' yega'nlo' ciudad Efeso ta huegadyo' nu ben' rusēdi ta binaca tali ta usanjē' bira huejē' cana'.

4 Re'enda' yēbo'yaquē' ta bihuejē' tazēdi quie cuento historia quie xuzixta'oyaquē' cabē' guca quieyaquē'. Por nun quie tazēdi na', huata' huenē quieyaquē', bibi cule de huen quieyaquē' ta hue quieyaquē' xti'idza' Diuzi galeyauē' quien.

5 Ca ta reya'ala' huero, reya'ala' idyē'ero laguedyiro como ca ben' laxta'olo yēri, como ca ben' baoyu'u gracia, como ca ben' nao xneza Jesús du guicho du la'adyi'.

6 Pero nita' bala yaca benē' birueyaquē' bala. Biyu'uyaquē' gracia, baoniti pensari quieyaquē', rnējē' puro di'idza' bibi zaca'.

7 Re'enyauē' gacayaquē' ca ben' rusēdi guichi ley quie Diuzi, pero nica nezuyaquē' con cabē' rnan lē'ēna nica nezuyaquē' bidan' rusēdiyaquē'.

8 Neziro guichi ley quie Diuzi na' nacan dya'a chi inaoron según re'en Diuzi inaoron.

9 Bigala'adyo' biudixu Diuzi ley quienē' para yaca ben' bibi tamedian nueja. Pero udixo Diuzi ley quienē' tacuenda gata' castigo quie yaca ben' mala, ben' bire'en gale xti'idzē', ben' rue contra lēbē', ben' de dula' xquia quie, ben' guti xuzi žnē'ē, ben' guti nutezi benē',

10 lente ben' rasilē nigula binaca žgule, lente ben' rasilē laguedyiro byunē' ca nigula, lente ben' rban benē', lente ben' huizi' yē', lente ben' rgunte Diuzi de huizi' yē'. Quie lena' udixo Diuzi guichi ley na' tacuenda gata' castigo quie yugulu ben' birue quiejē' quie ta naca tali quie Diuzi.

11 Na'ra ta naca tali quie Diuzi rdzelan lē'ē guichi la'iya quienē' ga rguixogue'n ca ruenē' gunnē' yela' neban quiero tuzioli. Lēdi'idza' quienē' na' bdē' Diuzi nē'ēdi' ta quixogui'a yaca benē'.

### *Redaohue Pablo beyēchi'la'adyi' Diuzi lēbē'*

12 Rēpa' Señor quiero Jesucristo diuxcalelo' nun quie rlē'ēnē' nē'ēdi' ben' rale rue ca mandado re'ennē' hua', uda'nē' bēnnē' nē'ēdi' fuerza valor ta hua' ca dyin re'ennē' hua'.

13 Pero dza na'te ptasi bnioaga' Jesucristo, udilalia' yaca ben' quienē', psacayaquē' bizinaquezi. Ba'ala'cazi bia' cana', beyēchi'la'adyi' Diuzi nē'ēdi', porque binezda' bin bia', binenaohua' xneza Jesús caora na'.

14 Cana' taže gula beyēchi'la'adyi' Señor quiero nē'ēdi'. Cana' bēnē' quia' ta inaohua' xneza Jesucristo, ta idyē'ēda' benē' ca nadyē'ē yaca ben' nao xneza Jesús yaca benē'.

<sup>15</sup> Nacan tabala bida Cristo Jesús lao yedyi layu ta ute uselanè' yaca ben' de dula' xquia quie ta gata' yela' neban quieyaquè' tuzioli. Na'ra lèscan' nè'èdi', de dula' xquia ze quia' dza na',

<sup>16</sup> pero beyèchi' la' adyi' Diuzi nè'èdi' tacuenda ulu'en naca Cristo Jesús ben' zela' adyi'. Ca guca quia' nacan tu ejemplo para yaca ben' huanao xneza Jesús dza zaza'ra gata' yela' neban quieyaquè' tuzioli.

<sup>17</sup> Cana' tuzioli reya'ala' gapala'nro Diuzi, ben' zu tuzioli, ben' neban tuzioli, ben' biilè'èro. Tuzi lèbè' naquè' Diuzi, ganura Diuzi zu. Amén.

<sup>18</sup> Timoteo, raqueda' luè' ca zì'ina', rnia' luè' huelo' dyin quie Diuzi du guicho du la' adyo', bè quio' xti'idza' Diuzi, bè quio' quie pensari bdze' Diuzi lu'u guicho' con ca una yaca ben' bè quie xti'idza' Diuzi dza na'. Lao na'a Diuzi unayaquè' cabè' reya'ala' huelo'.

<sup>19</sup> Na'ra nita' yaca benè' bibè quiejè' quie pensari bdze' Diuzi lu'u guichoyaquè'. Quie lena' aodyiagui' pensari quieyaquè' psanla' adyi' yaquè' xneza Jesús.

<sup>20</sup> Cana' guca quie Himeneo len Alejandro. Pero babebioga' lèjè', banacayaquè' cuenda quie xan' taxi'ibi' Satanás tacuenda ineziyaquè' bireya'ala' utasi unioyaquè' Diuzi.

## 2

### *Rnè Pablo cabè' reya'ala' hue'lèro Diuzi di'idza'*

<sup>1</sup> Ta nacaran belao rnia' luè', reya'ala' hue'lèle Diuzi di'idza' por yugulu benè'. Reya'ala' inabo' Diuzi gunnè' ta rdzioguelo'. Reya'ala' inabo' Diuzi chi bigacalènè' yaca ben' raca zèdi quie. Reya'ala' yèbo'nè' diuxcalelo'.

<sup>2</sup> Hue'lèle Diuzi di'idza' por yaca ben' naca gobierno, lente yugulu ben' napa dyin tacuenda gaca huen quiéro suro chizi, bibi zèdi gata' quiéro. Cana' inita'ro dya'a tziionla' adyi'ro Diuzi, gapala'n benè' ra'o.

<sup>3</sup> Tahuen na' huero cana'. Lena' huetzaxe Diuzi, ben' run benè' yela' neban tuzioli.

<sup>4</sup> Re'en Diuzi gata' yela' neban tuzioli quie yugulu benè'. Lèzi re'en Diuzi inezi yugu benè' di'idza' la'iya quienè'.

<sup>5</sup> Tuzi Diuzi naca, ganura diuzi zu. Lèzi tuzi Jesucristo naquè' ben' nuelè ra'o tuze conlè Diuzi, ganura ben' tula zu.

<sup>6</sup> Lèbè' psedyinnè' cuinnè' lao na'a yaca benè' bèti lèbè'. Cana' guca guti Jesucristo lao laza yugulu benè', udi'zuguè' quie dula' xquia quieyaquè' ta gata' yela' neban tuzioli quie yaca benè' conforme con ca una Diuzi tiempote.

<sup>7</sup> Lena' ulio Diuzi nè'èdi' naca' apóstol use'ela' Diuzi nè'èdi' ta quixoguil'a ben' binaca ben' Israel xti'idza'nè', lèscan' ta usèdia'yaquè' inaoyaquè' xneza Jesús, na' hue quieyaquè' di'idza' li quie Diuzi. Tali rnia', cala yè' rzi'a.

<sup>8</sup> Cana' re'enda', re'enda' hue'lè yaca benè' Diuzi di'idza', ben' baneyèri laxta'ohue con gatezi zuyaquè'. Bireya'ala' idza'jè' tilalèyaquè' laguedyijè'.

<sup>9</sup> Lèscan' re'enda' gaco yaca nigula la'ari' sencilla ta binaca beya beza' adorno. Tahuen na' uzutza'oyaquè' cuinyaquè', pero cala conlè la'ari' tzao', ni oro, ni yo tzao', nica upa'ayaquè' guichoyaquè' ta'ze.

<sup>10</sup> Reya'ala' hueyaquè' tadya'a como ca rue yaca nigula naca la'iya, yaca nigula nao xneza Jesús.

<sup>11</sup> Reya'ala' cue' yaca nigula chizi uzènagayaquè' dyè'èdi caora rusèdi benè' leyaquè'.

<sup>12</sup> Bihua' lato usèdi yaca nigula benè' ga redupa yaca ben' nao xneza Jesús. Lèscan' bihua' lato inabè' nigula yaca be'mbyu. Reya'ala' inita' yaca nigula chizi,

<sup>13</sup> porque bzalo Diuzi Adán primero, na'tera bzalogué' Eva.

<sup>14</sup> Quele Adán uzi' xan' taxi'ibi' yé', den' nigula quielané' uzi' xan' taxi'ibi' yé' hènè' dula' xquia.

<sup>15</sup> Huela'iya Diuzi yaca nigula chi usegulyaqué' zi'iyaqué' dyé'édi. Lëscan' huela'iya Diuzi leyaqué', chi yu'uyaqué' pensari huen, chi biu-sanyaqué' inaoyaqué' xneza Jesús, chi idyè'ëyaqué' laguediyaqué', chi nayèri laxta'oyaqué' lao Diuzi.

### 3

#### *Rnë Pablo cabè' reya'ala' hue yaca ben' napa dyin quie Diuzi*

<sup>1</sup> Nacan tali ca rnia'. Chi nu ben' re'en gapa dyin quie Diuzi rapané' yaca ben' nao xneza Jesús, na'ra dyin dya'a na' re'enné' huené'.

<sup>2</sup> Nu ben' napa dyin cana', reya'ala' gaca quiené' tantozi rdané' lao bené' dyé'édi gula, nitu nitu gao lëbè' xquia. Reya'ala' suléné' tuzi nigula quiené'. Bireya'ala' huené' ta rnazin quiené'. Reya'ala' tzu'uné' pensari huen, reya'ala' huené' bala'ana. Reya'ala' gapachi'né' ben' rdyin zan yu'u quiené' dyé'édi. Reya'ala' neziné' usédiné' bené'.

<sup>3</sup> Bireya'ala' xudyiné'. Bireya'ala' quiloné' dila. Bireya'ala' sa'la'adyi'né' dumi. Reya'ala' gacalënë' yaca bené'. Reya'ala' tzu'uléné' laguedyiné' dya'a.

<sup>4</sup> Reya'ala' usédiné' ben' nita' zan yu'u quiené' dyé'édi. Reya'ala' gale zi'iné' quiené'. Reya'ala' gapala'n zi'iné' yaca bené'.

<sup>5</sup> Chi biracané' usédiné' yaca ben' nita' zan yu'u quiené', lena' ulu'en quiené' bigacané' usédiné' yaca ben' nao xneza Jesús.

<sup>6</sup> Lëscana' nu ben' zaouzlao inao xneza Jesús, bireya'ala' gapané' dyin quie Diuzi, porque chan' iyaqué' yežè'né' laguedyiné', na' huen žudyi gata' castigo quiené' ca castigo guta' quie xan' taxi'ibi'.

<sup>7</sup> Lëscan' yaca ben' binao xneza Jesús, reya'ala' ilè'ëyaqué' lëbè' ben' huen, porque chi biilè'ëyaqué' lëbè' ben' huen, huanëyaqué' quiené', huata' huedila huené, huen žudyi hue xan' taxi'ibi' gan uza'agan dyin quie Diuzi.

#### *Rnë Pablo cabè' reya'ala' hue yaca ben' racalë yaca ben' nao xneza Jesús*

<sup>8</sup> Lëscan' nu yaca ben' racalë ben' nao xneza Jesús, reya'ala' tajè' gapajè' bala'ana. Bireya'ala' huejè' di'idza' chopa ru'a. Bireya'ala' xudyiyaqué'. Bireya'ala' sa'la'adyi'yaqué' dumi.

<sup>9</sup> Reya'ala' tzu'uyaqué' pensari dya'a. Reya'ala' galeyaqué' du guicho du la'adyi'yaqué' quie ta naca tali quie Diuzi pca'nné' lao na'aro.

<sup>10</sup> Pero zareya'ala' ina'le dyé'édi quieyaqué', chi lagazu rquixiyaqué', na'ra huazaque' gacayaqué' ben' racalë ben' nao xneza Jesús.

<sup>11</sup> Lëscan' nigula quieyaqué', reya'ala' tajè' gapajè' bala'ana. Bireya'ala' hue'lëyaqué' yaca bené' di'idza' bižu. Reya'ala' tzu'uyaqué' pensari huen. Lëscan' biti'tezi dyin napayaqué', reya'ala' hueyaqué'n du guicho du la'adyi'yaqué'.

<sup>12</sup> Nu ben' racalë yaca ben' quie Jesús, reya'ala' suléné' tuzi nigula quiené'. Reya'ala' gale zi'iné' quiené' dyé'édi lente yaca los demás familia quiené'.

<sup>13</sup> Chi ruené' dya'a ca dyin napè', huapala'n yaca bené' lëbè', gacarané' mazara yexi'idze'né' yaca bené', dan' zioné' naoné' xneza Cristo Jesús.

#### *Rnë Pablo quie ta naca tali quie Diuzi*

<sup>14</sup> Re'enda' laguidatia' ideyuba' lué',

<sup>15</sup> pero chan' bisaque' guidatia', rua' guichi ni ta inezilo' cabè' reya'ala' hue yaca ben' nao xneza Jesús. Yugulu ben' nao xneza Jesús nacayaqué' ca quie

tu cue' benë'. Nacayaquë' familia quie Diuzi, ben' neban tuzioli. Leyaquë' quixogue'yaquë' hueyaquë' defender ta naca tali quie Diuzi.

<sup>16</sup> Dula'adyi'ro naca xti'idza' Diuzi di'idza' binezi yaca benë', di'idza' yebantzegueyaquë'. Lëdi'idza' na' rnën caniga:

Golo Jesucristo lao yedyi layu cabë' ralo benë'.

Blë'ë yaca benë' lëbë'.

Udixogue' Bichi Be quie Diuzi unë' bibi dula' xquia de quienë'.

Una' yaca ángel lëbë'.

Udixogue' benë' xti'idza'në' lao yedyi layu.

Unao yaca ben' nita' lao yedyi layu xnezë'.

Bezi' Diuzi lëbë' guibá ga naquë' ben' rnabë' lao yugulute.

Cana' rnën lë'ë guichi la'ya quie Diuzi.

## 4

### *Rnë Pablo quie ben' bira hue bala quie xneza Jesús*

<sup>1</sup> Dyë'ëdicazi unë Bichi Be quie Diuzi huadyin dza bira hue yaca benë' bala quie xneza Jesús. Galeyaquë' quie yaca bichi be xi'ibi' caora cati si'yacan lëjé' yë', na' yëbiyacan lëjé' di'idza' huizi' yë'.

<sup>2</sup> Lëscana' hue quieyaquë' di'idza' cabë' di'idza' ina yaca ben' huizi' yë', yaca ben' ru'elë Diuzi di'idza' ladzazi. Yaca ben' na', bibi bayëchi' raqueyaquë' dan' rueyaquë' tamedian.

<sup>3</sup> Huanayaquë' binacan dya'a utzagana' yaca benë'. Lëscan' huanayaquë' binacan dya'a gao benë' bë'ëla'. Cana' inayaquë' la'acazi Diuzi biunë' cana'. Bë Diuzi yela' huao ta gao yaca ben' quienë', ben' tzioñe'e di'idza' li quienë'.

<sup>4</sup> Yugulu ta bë Diuzi ta gaoro, nacan huen gaoron. Reya'ala' gaoro ta de, bireya'ala' inaro bigaoro ta de. Reya'ala' yëbiro Diuzi diuxcalelo' na' gaoron.

<sup>5</sup> Porque cati rëbiro Diuzi diuxcalelo', na' ruela'ya Diuzi ta raoro, hora na' nacan huen gaoron.

### *Rnë Pablo cabë' reya'ala' hue yaca ben' rue dyin quie Jesucristo*

<sup>6</sup> Chi usëdio' yaca bichiro, ben' nao xneza Jesús, cabë' rnia' ni, chi uzioñe'elo'yaquë' xti'idza' Diuzi, chi usëdio'yaquë' inaoyaquë' xneza Jesús con cabë' ruelo' rnaolo' xnezë', cana' naco' ben' huen, ben' rue dyin quie Jesucristo.

<sup>7</sup> Bigalelo' quie yaca cuento rnëzi benë' de pensari tondozi. Du guicho du la'adyo' gaco' ben' rionla'adyi' Diuzi.

<sup>8</sup> Huacalën ra'o huero ejercicio, pero huacalën ra'o mazara chi du guicho du la'adyi'ro gacaro ben' rionla'adyi' Diuzi. Chi huero cana', lena' gacalen ra'o dza rdaro lao yedyi layu lente dza sulëro Diuzi guibá.

<sup>9</sup> Nacan tali ca rnia' niga. Reya'ala' gale yugulu benë' cabë' nia' niga.

<sup>10</sup> Quie lena' ruero dyin quie Diuzi yugu dza. Quie lena' redzagalaoro rutasi runio yaca benë' ra'o. Pero sudyi'ilëro Diuzi, ben' naban tuzioli. Naca Diuzi ben' ute usela yaca ben' nita' lao yedyi layu ta gata' yela' neban quieyaquë' tuzioli. Bapte psela Diuzi ra'o, ben' nao xneza Jesús, baguta' yela' neban quiero tuzioli.

<sup>11</sup> Cabë' nia' niga, lena' reya'ala' usëdio' yaca benë' huelo'jë' mandado huejë'.

<sup>12</sup> Bihuelo' lato uzë' yaca benë' luë' dan' binetze iza quio'. Nacalan huen gaco' tu ejemplo para yaca los demás ben' nao xneza Jesús. Cana' reya'ala' hue'lao' benë' di'idza' dya'a. Reya'ala' inita'lao' yaca benë' dya'a. Reya'ala' idyë'ëlo' laguedyo'. Reya'ala' hue quio' xti'idza' Diuzi du guicho du la'adyo'. Reya'alo' huelo' puro tahuen.

<sup>13</sup> Tu raca guida' quio', ulabo' di'idza' la'iya quie Diuzi lao yaca los demás ben' nao xneza Jesús ga redupayaquë'. Hue'lao'yaquë' di'idza' zela'adyi', uzioñe'elo'yaquë' xti'idza' Diuzi.

<sup>14</sup> Bigalala'adyo' huelo' según ca ta banegunne Diuzi luë' caora cati du yu'ulo' Bichi Be quie Diuzi, na'ayaquë' guicholo' dza na'.

<sup>15</sup> Gapo' cuidado huelo' cabë' baonia' luë' cuenda ilë'ë yaca benë' aracar-alo' mazara usëdio' benë' xti'idza' Diuzi cabë' rnën.

<sup>16</sup> Gapo' cuidado tuzi ca pensari quie Diuzi huelo'. Lëscana' gapo' cuidado tuzi ca di'idza' quie Diuzi usëdio' benë'. Lena' huelo' tzutzu. Chi huelo' cana', huela'iya Diuzi luë'. Lëscan' huela'iya Diuzi yaca ben' ruzënaga quio' cabë' usëdio'jë'.

## 5

### *Ni nan cabë' reya'ala' hue Timoteo len yaca los demás ben' nao xneza Jesús*

<sup>1</sup> Timoteo, bitilalëlo' yaca ben' gula. Huenla hue'lao'yaquë' di'idza' dya'a cabë' di'idza' ru'elëro xuziro. Lëscana' yaca bi'byu cuidi', reya'ala' hue'lao'yacabi' di'idza' dya'a cabë' di'idza' ru'elëro bichiro.

<sup>2</sup> Lëscana' yaca nigula huaca, reya'ala' hue'lao'yaquë' di'idza' dya'a cabë' di'idza' ru'elëro zna'ro. Lëscana' yaca nigula cuidi', reya'ala' hue'lao'yacabi' di'idza' dya'a cabë' di'idza' ru'elëro zanro. Reya'ala' tzu'ulao'jabi' dya'a.

<sup>3</sup> Reya'ala' gacalëlo' yaca nigula aguti xquiuhue, nigula abide quie.

<sup>4</sup> Pero chi nita' zi'ijë', o chi nita' zi'isubajë', lëjabi' naca cuenda quiejabi' gacalëjabi' leyaquë' como apsegulë' leyacabi'. Chi hueyacabi' cabë' nia', na' hueyula'adyi' Diuzi cabë' rueyacabi'.

<sup>5</sup> Pero ben' nati xquiuhue, ben' ganu familia quie' nita', tali naquë' ben' tu litza'. Lëbë' sí, reya'ala' sunë' rbezanë' gacalë Diuzi lëbë'. Reya'ala' ulidzanë' Diuzi yugu dza, yugu yela.

<sup>6</sup> Na' quie tu nigula nati xquiuhue, chi ruenë' ta rnazin quienë', naca quienë' lao Diuzi ca quie ben' anati, dan' bira rue quienë' xti'idza' Diuzi.

<sup>7</sup> Ruen dyabë' yëbo'jë' cabë' nia' ni cuenda bibi causa gata' quieyaquë'.

<sup>8</sup> Chi nita' nu ben' nao xneza Jesús, pero bire'ennë' gacalënë' ben' naca diadza quienë', chi bire'ennë' gapanë' familia quienë', lena' nacan mala. Nacarë' mazara ben' mala cabë' ben' birue quie xti'idza' Diuzi.

<sup>9-10</sup> Reya'ala' huelo' tu lista quie yaca ben' aguti xquiuhue. Pero nia' luë' biuzulo' lao yaca ben' binesu tzona galo iza. Lëscana' biuzulo' laojë' chi birlë'ë yaca benë' leyaquë' dya'a. Reya'ala' uzulo' laojë' chi uzulëjë' tuzi xquiujë', chi psegulajë' zi'ijë' dyë'ëdi, chi gapachi'jë' dya'a ben' rdyin zan yu'u quieyaquë', chi racalëjë' du guichi du la'adyi'jë' ben' nao xneza Jesús, chi rëychi'la'adyi'në' ben' redzagalao. Chi bëjë' cana', bëjë' tadya'a. Reya'ala' uzulo' laoyaquë' lao lista.

<sup>11</sup> Biuzulo' lao yaca ben' binetze iza quie, porque ruen zudyi inan quieyaquë' yezi'yaquë' ben' tula, caora na' ruen zudyi usanla'adyi'jë' xneza Cristo ta yezulëyaquë' be'mbyu tatula.

<sup>12</sup> Cana' gata' causa quieyaquë', porque bibzujë' di'idza' cabë' unajë' huejë', huejë' puro dyin quie Diuzi.

<sup>13</sup> Ruen zudyi tayaquë' tu yu'u tu yu'u quie benë', dan' gabi dyin ruejë'. Ruen zudyi tayaquë' hue'yaquë' di'idza' bizu bi raca quie yaca benë' ta bireya'ala' hue'yaquë'.

<sup>14</sup> Quie lena' nia' huenla yezi' nigula nenaca cuidi', ben' baguti xquiuhue, be'mbyu tula. Huenla su xcuidi' quieyaquë' cuenda gacajë' ben' familia gapajë' xcuidi'. Cana' bibi causa gata' quieyaquë' lao na'a enemigo quiero.

15 Pero bala yaca nigula, ben' nati xquiuhue, apsanla'adyi'yaquë' xneza Jesús, banaoyaquë' xneza xan' taxi'ibi' Satanás.

16 Yaca ben' nao xneza Jesús, reya'ala' gacalëyaquë' yaca nigula, ben' nati xquiuhue, ben' tali bazu cuinze. Quie lena', chi nita' yaca nigula, ben' nati xquiuhue, pero nenita' familia quieyaquë', reya'ala' gacalë familia quieyaquë' leyaquë'. Binacan cuenda quie ben' nao xneza Jesús gapajë' lëjë' chi nenita' familia quieyaquë'. Pero nacan cuenda quie ben' nao xneza Jesús ta gacalëjë' ja nigula tali bazu cuinze.

17 Yaca ben' napa dyin quie Diuzi, chi rueyaquë' quie dyin napajë' du guicho du la'adyi'jë', reya'ala' hue yaca ben' nao xneza Jesús leyaquë' bala'ana. Lëscan' nacan belao hueyaquë' ben' rguixogue' xti'idza' Diuzi bala'ana.

18 Cani na lë'ë guichi la'iya quie Diuzi: “Bireya'ala' udze'ro du ru'a bëdyihuaga caora rdaba' rutzutzu rulioba' bdyigo' quie trigo ta iro bini quien. Pero dan' rueba' dyin, reya'ala' hue'roba' lato gaoba' tu rdaba' hueba' dyin.” Lëscan' narë guichi la'iya quie Diuzi de ga tula: “Ben' rue dyin, napë' derecho si'në' xlazugüë'.”

19 Timoteo, bigalelo' quie yaca ben' rao ben' napa dyin quie Diuzi xquia, chi binita' chopä tzona ben' naca testigo.

20 Chi nita' ben' napa dyin quie Diuzi, pero birusanyaquë' huejë' dula' xquia, reya'ala' tilalao'yaquë' delante lao yaca los demás ben' nao xneza Jesús cuenda idzebijë' bihuejë' dula' xquia.

21 Rnabi'a luë' lao Diuzi len lao Jesucristo, len lao yaca ángel quienë' ta uzulo' di'idza' huelo' cabë' nia' ni. Tuzi ca huelo', huelo' mandado gale yaca ben' nao xneza Jesús cabë' nia' ni.

22 Reya'ala' yeni'lo' dyë'ëdi nu ben' udë'lo', ben' gapa dyin quie Diuzi, porque ruen züdyi gata' dula' quio' chi hue ben' bdë'lo' bizinaquezi. Pero luë', nia', puro tadya'a huelo'.

23 Lëscan' como racatzegue lë'ëlo', reya'ala' yo'olo' ledao' vino tacuenda yeyaca lë'ëlo'. Bira yo'olo' puro nisa.

24 Quie bala ben' rue xquia, ulu'elaonan luegozi zagaca juicio quieyaquë'. Pero quie ibala ben' rue xquia, biulu'elaonan luegozi sino que bë' gacara juicio.

25 Lëscan' quie yaca ben' rue tadya'a, ulu'elaonan luegozi. Pero chi biulu'elaonan luegozi, bitzënan ulu'elaonan.

## 6

1 Quie nu yaca ben' nao xneza Jesús, chi ben' nada'o nacayaquë', na' reya'ala' gapala'nyaquë' xa'nyaquë' dyë'ëdi cuenda bigata' causa quiejë' biinë' xa'nyaquë' condre Diuzi len condre xti'idza'në' ca ta rguixogue'ro benë'.

2 Lëscan' chi nacaré xa'nyaquë' ben' nao xneza Jesús, reya'ala' gapayaquë' xa'nyaquë' bala'ana dyë'ëdi gula como dan' nacaré xa'nyaquë' ben' nao xneza Jesús. Pues mazara reya'ala' gapayaquë' leyaquë' bala'ana, porque nacayaquë' ben' rale, ben' bichiro, ben' nedyë'ëro.

### *Gaparo cuidado bisa'la'adyi'ro dumi*

3 Ca di'idza' nia' ni, lena' re'enda' quixogue'lo' yaca benë' huelo' mandado galeyacuë' quien. Chi rguixogue' nu ben' di'idza' falso, di'idza' ta binaca lëbi ca di'idza' una Señor quiero Jesucristo lente con cabë' rna xti'idza' Diuzi rnaoro, quie lena' rulu'en

<sup>4</sup> nacayaquë' benë' zë' bineziyaquë' bi rnëyaquë'. Tanto ru'uyaquë' huedila huenë, raca quieyaquë' ca quie ben' raca zhue'. Lena' za'n ruen quiejë' yela' zë'la. Lena' za'n ruen quieyaquë' yela' utasi unio laguedyi. Pues delaohue raca quiejë' si'jë' yë'.

<sup>5</sup> Yaca ben' rue cana', bire'enyayuë' yeyudyi huedila huenë, abzino pensari quieyaquë'. Bineziyaquë' ca naca tali quie Diuzi. Raquieyaquë' chi xneza Jesús naoyaquë', hueyaquë' gan dumi ze. Nu yaca ben' rue cana', bitzu'ulao'jë' tuze.

<sup>6</sup> Pues tali na' chi naoro xneza Jesús huero gan suro contento.

<sup>7</sup> Pues bibi nu'aro dza goloro lao yedyi layu. Lëscana' quele hueyu'aro bi cosa bë' gatiro.

<sup>8</sup> Quie lena' con chi rde rlaro quie ta gaoro, con chi rde rlaro quie žabaro, conlë lëzin reya'ala' zuro gusto.

<sup>9</sup> Pero nita' yaca ben' rza'la'adyi' dumi. Rueyaquë' bitezi ta idzeleyaquë' dumi, ba'ala'cazi huenan bizinaquezi quieyaquë'. Yela' rza'la'adyi' dumi quieyaquë', rudiyagu'yaquë' cuinyaquë'.

<sup>10</sup> Binacan huen sa'la'adyi'ro dumi. Por nun quie rza'la'adyi' yaca benë' dumi, tana' rueyaquë' bitezi tamala, hasta rusanla'adyi'yaquë' xneza Jesús redzagalaoyaquë', pero dula' quieziyaquë'.

### *Reya'ala' hue quiero xti'idza' Diuzi du guicho du la'adyi'ro*

<sup>11</sup> Pero luë', Timoteo, bireya'ala' huelo' ca rue yaca ben' na', dan' naco' ben' quie Diuzi. Reya'ala' huelo' puro tadya'a tzionla'adyo' Diuzi du guicho du la'adyo'. Reya'ala' galelo' quie Diuzi, na' idyë'ëlo' laguedyo'. Reya'ala' suelo' bitezi gaca quio'. Reya'ala' tzu'ulao' talëlo' laguedyo' gaco' ben' gaxo.

<sup>12</sup> Du guicho du la'adyo' galelo' quie Diuzi huelo' cabë' dyin bdë' Diuzi luë' huelo'. Inaolo' xneza Jesús biusanlo'n, na' gata' yela' neban quio' tuzioli. Pues por lena' ulio Diuzi luë' bequëbo' lao yaca benë' de que naco' ben' quie Jesús, ben' nao xnezë'.

<sup>13-14</sup> Rnia' luë': Bzu di'idza' quia' cabë' unia' luë' hasta idyinte dza yeguida Señor quiero Jesucristo cuenda bihue yaca benë' causa quio' gaojë' luë' xquia. Lena' rnia' luë' delante lao Diuzi, ben' run yela' neban yugulu ta de. Lëscan' rnia' luë' delante lao Jesucristo, ben' bequëbi naquë' ži'i Diuzi lao Ponceo Pilato.

<sup>15</sup> Cati psaque' Diuzi abdyin hora, caora na' ilë'ë yaca benë' Señor quiero Jesucristo. Cana' hue Diuzi quiero, porque tuzi lëbë' naquë' Diuzi, ganura Diuzi tula zu. Tuzi lëbë' r nabë'ranë'. Ganura zu r nabë' ca lëbë'. Tuzi lëbë' nacaré' ben' ze. Ganura zu naca ca lëbë'.

<sup>16</sup> Tuzi Diuzi naquë' ben' biyeyudyi yedu quie. Re' xni' ze ga'n zuë'. Nitu nunu saque' ibiga' ga'ala' ga'n zuë'. Nitu nitu ben' nita' yedyi layu bisaque'jë' ilë'ëjë' lëbë'. Reya'ala' gapala'n yugulu benë' lëbë' tuzioli. Biyeyudyi yedu yela' r nabë' quienë'. Amén.

<sup>17</sup> Yaca ben' de dumi quie lao yedyi layu, reya'ala' yëbo'jë' ta biuxa'ajë'. Lëscan' yëbo'jë' ta biuxela'adyi'jë' cuinjë' dan' nacajë' ben' uña'a, porque huade quie yela' uña'a quiejë'. Huenla uxela'adyi'yaquë' Diuzi, ben' naban tuzioli, ben' run ta rdzioguero suro dyë'ëdi.

<sup>18</sup> Yëbo'jë' huejë' tadya'a, pero yugu dza quie batazi. Reya'ala' yeyëchi'la'adyi'yaquë' laguedyiyaquë'. Reya'ala' suyaquë' dispuesto si'jë' ta de quieyaquë' hue'yaquë'n ben' yëchi'.

<sup>19</sup> Cana' gata' dugalo yela' uña'a quieyaquë' guibá dza zaza'ra. Cana' gata' yela' neban quieyaquë' tuzioli.

### *Ga iyudyi di'idza' use'ela' Pablo lao Timoteo*

<sup>20</sup> Timoteo, reya'ala' uzulo' di'idza' huelo' yugulu cabë' baonia' luë' quie Diuzi. Biuzênago' quie di'idza' ru'ezi yaca benë', di'idza' bë' nazijë', di'idza' bibi zaca'. Lëscan' bitzu'ulo' huenë conlë yaca ben' rue cuine ben' rioñe'e, den' bë' nazijë' najë' rioñe'eyaquë', pero birioñe'eyaquë'.

<sup>21</sup> Cana' bë bala ja ben' unita' dza na'. Unayaquë' rioñe'eyaquë', pero bë' naziyaquë', como dan' psanla'adyi'yaquë' xneza Jesús. Ni yeyudyi quie di'idza' unia' luë'. Rulidza' Señor quiero ta huela'iyane' luë'. Amén.



## GUICHI URUPE BÈ SAN PABLO APÓSTOL USE'ELA'NÈ'N LAO TIMOTEO

### *Use'ela' Pablo guichi ni lao Timoteo*

<sup>1</sup> Nè'èdi', Pablo, naca' apóstol quie Jesucristo con cabè' ulio Diuzi nè'èdi' conforme con ca una Diuzi hue'nè' yela' naban tuzioli nutezi ben' hue tuze len Jesucristo.

<sup>2</sup> Timoteo, bia' guichi niga pse'ela'n laolo'. Nezilo' nadyè'èda' luè', raqueda' luè' ca zi'ina'. Rulidza' Xuziuro Diuzi lènè' Señor quiero Jesucristo ta huela'iyaquè' yeyèchi'la'adyi'yaquè' luè' cuèchiyaquè' chizi lu'u guicho laxta'olo'.

### *Reya'ala' quixogue' Timoteo yaca benè' di'idza' quie Cristo*

<sup>3</sup> Yugo dza, yugo yèla, rulidza' Diuzi rëpa'nè' diuxcalelo' por luè'. Lëscan', por tu parte quia' nè'èdi', rua' dyin quie Diuzi birao pensari quia' nè'èdi' xquia. Cana' bèrè xuzixta'ohua', bëyaquè' dyin quie Diuzi, biudao pensari quieyaquè' leyaquè' xquia.

<sup>4</sup> Na'ra rezala'adya' cabè' guquelo' bayèchi' caora unia' luè' bazeya'a. Lena' re'enda' guida' ideyuba' luè' tatula, porque lega redaohueda' sulia' luè'.

<sup>5</sup> Nezda' cabè' ruelo' rnaolo' xneza Jesús du guicho du la'adyo'. Tanëro unao zna'gulo' Loida len zna'lo' Eunice xneza Jesús. Reyula'adya' lëscan' luè' naolo' xneza Jesús ca leyaquè'.

<sup>6</sup> Quie lena' rnia' luè': Reya'ala' huelo' bala ca ta banegunne Diuzi luè' caora uxuba' na'a guicholo' bdè' Diuzi luè'.

<sup>7</sup> Bire'en Diuzi idzebiro, re'ennè' huero tzutzu huala laxta'oro, re'ennè' idyè'ero laguedyiro, re'ennè' tzu'uro pensari dya'a.

<sup>8</sup> Biyedue'lo' inèlo' cule quie Señor quiero. Lëscan' biyedue'lo' dan' dia' lu'u dyiguiba por nun quie dan' naohua' xneza Cristo cabè' luè'. Lëscana' biidzebo' cati huelè benè' luè' bizinaquezi. Siempre gun Diuzi fuerza valor quio' ta suelo' sulo' chizi chi biti'tezi ta usaca benè' luè' porque dan' rguixogue'lo' xti'idza' Diuzi.

<sup>9</sup> Ulio Diuzi ra'o beguibinè' laxta'oro, porque re'ennè' gacaro ben' la'iya quienè'. Cala yela' ben' huen quiero ulio Diuzi ra'o, dechan' ulionè' ra'o bënë' cule quiero, porque cana' re'ennè' huenè' quiero nedyè'ènè' ra'o ca nedyè'èrè Jesucristo ra'o. Tu binegata' yedyi layu, tu na' zu Diuzi nadyè'ènè' ra'o.

<sup>10</sup> Tali blu'e Diuzi nadyè'ènè' ra'o, porque use'ela'nè' Señor quiero Jesucristo ta yedyi yedu quie yela' guti quiero. Lëscan' lao na'anè' guta' yela' neban quiero tuzioli por nun quie xti'idza' Diuzi.

<sup>11</sup> Bè Diuzi nè'èdi' nombrado ta tzetixogui'a benè' xti'idza' Diuzi. Quie lena' use'ela'nè' nè'èdi' naca' apóstol, naca' maestro.

<sup>12</sup> Quie lena' redzagalaohua', pero biredue'da' porque nuebè'da' Cristo, naohua' xnezè'. Nezda' naca Cristo ben' de yela' huacá quie, rna'nè' nè'èdi' tu lala zua' yedyi layu hasta idyin dza gaca juicio lao yedyi layu.

<sup>13</sup> Biusanla'adyo' inaolo' cabè' psèdia' luè' quie xti'idza' Diuzi. Unao xneza Jesús du guicho du la'adyo', idyè'èlo' laguedyio' nun quie dan' naco' tuze len Cristo Jesús.

<sup>14</sup> Lao na'a Bichi Be quie Diuzi, ben' yu'u lu'u guicho laxta'oro, gapo' cuidado bigala'adyo' uzulo' xti'idza' Diuzi ca ta bdè'nè' luè'.

15 Luë' nezilo' apsanla'adyi' yaca ben' nita' yaca ciudad nebaba Asia në'ëdi'. Cana' apsanla'adyi' Figelo len Hermógenes në'ëdi'.

16 Rulidza' huela'iya Diuzi familia quie Onesíforo, porque zë lasa px-ela'adyi'në' në'ëdi'. Biredue'në' quia' naca' preso dia' lu'u dyiguiba.

17 Cati bedyinnë' ciudad Roma udanë' beguilonë' në'ëdi' hasta bedzelenë' në'ëdi'.

18 Rulidza' Diuzi yeza'la'adyi'në' quienë' dza gaca juicio lao yedyi layu. Dyë'ëdi nezilo' taže gualënë' ra'o dza udaro ciudad Efeso.

## 2

### *Naca ben' nao xneza Jesús ca quie soldado dya'a*

1 Luë' naco' ca quie zi'ina'. Tana' nia' luë' huelo' bala ca tu ta banegunne Cristo Jesús luë'.

2 Na'ra cabë' di'idza' apsëdia' luë', re'enda' usëdio' ben' tula, pero ben' nezo' uzu di'idza', ben' nezo' usëdi dyë'ëdi. Huelo' mandado usëdijë' yaca benë' cabë' di'idza' apsëdia' luë'.

3 Reya'ala' sëllo' tzutzu huala ca quie soldado dya'a quie Jesús cati rusaca benë' luë' bizinaquezi.

4 Bireya'ala' hue soldado dyin tula cati ruenë' servicio quienë'. Reya'ala' huenë' puro ca mandado rue xa'ne cuenda yeyula'adyi' xa'ne lëbë'.

5 Lëscana' nacarë quio' ca quie ben' rguitulë pelota, bihuenë' gan chi bihuenë' cabë' na reglamento quien.

6 Lëscana' nacarë quio' ca quie ben' guza na quie, ben' rue dyin guixi', napanë' derecho si'në' usecho quien.

7 Huu' pensari cabë' nia' luë', na'tera huacalë Diuzi luë' ta tzioñe'elo'n.

8 Bigalala'adyo' Jesucristo, zi'isuba' rey David. Naquë' ben' aguti, na' bebannë' tatula aberoguë' gan' yu'u ja ben' huati. Lena' rguixogui'a benë'.

9 Nun quie rguixogui'a benë' xti'idza' Diuzi, redzagalaohua' pquioyaquë' ni'a na'a caden. Ca quie ben' bë tamala, bëyaquë' quia'. Pero bisaque'yaquë' uquioyaquë' xti'idza' Diuzi.

10 Pues rzueda' con biti'tezi tamala raca quia' cuenda yega'nnan dya'a quie yaca ben' ulio Diuzi, na' gata' yela' neban quieyaquë' tuzioli tzasulëyaquë' Cristo Jesús tuže.

11 Tali nacan de que:

Chi zuro puesto inaoronë' ba'ala'cazi ruen žudyi guti benë' ra'o, na'tera huezi'në' ra'o huetzasulëronë' tuzioli.

12 Chi šuero cati rue ja ben' quiero bizinaquezi, na'tera gunnë' lato quiero inabë'ro conlë lëbë'.

Chi usebi'ro lëbë', lëscana' usebi'në' ra'o.

13 Ba'ala'cazi birue quiero xti'idza' Diuzi, lëbë' sí, rucazi quienë' xti'idzë', porque bisaque' birue quienë' xti'idzë'.

### *Reya'ala' huero ta yeyula'adyi' Diuzi*

14 Gacalao' yaca ben' nao xneza Jesús ta bigalala'adyi'yaquë' cabë' nia' niga. Lëscan' huegadyo'yaquë' ta bihuejë' cuenda quie yaca ben' raxe tzu'u huenë' rdilayaquë' quie bi di'idza' rnën lë'ë guichi ley quie Diuzi. Pues bibi zaca'n tzu'uyaquë' huenë' conlë leyaquë'. Tuzi ca huen quieyaquë', huatondo pensari quiejë' chan' uzë'nagajë' quiejë'.

15 Bë quio' xti'idza' Diuzi du guicho du la'adyo' cuenda ilë'ë Diuzi cabë' ruelo' tanun quienë' naco' ben' rue dyin dya'a, ben' rguixogue' di'idza' li quienë' ta yu'u ni'a xnezi. Chi huelo' cana', na' huario dyin quio' dya'a, bigata' yela' stu' quio' lao Diuzi.

<sup>16</sup> Bihuu' cuenda quie yaca ben' rna di'idza' bibi zaca'n, di'idza' dachizi, porque yaca ben' rna cana', tu dza, tu dza, ziojé' ruejé' mazara tamala.

<sup>17</sup> Naca di'idza' quiejé' ca quie hue' baru'udzo'. Cana' naca quie Himeneo len Fileto.

<sup>18</sup> Uquixiyaqué' nayaqué' biyeban yaca ben' huati. Cana' aptondoje' pensari quie bala ben' nao xneza Jesús.

<sup>19</sup> Pero bisaque' te cana'zi ta bē Diuzi, yega'nnan tuzioli. Pues cani nan lē'ē guichi la'iya quie Diuzi: "Nezi Diuzi nu ben' naca ben' quienē'." Lēscan' nan: "Yugulu ben' nao xneza Jesús, reya'ala' usanjé' tamala."

<sup>20</sup> Uzēcara nago' ta inia' lué' tu di'idza'. Lu'u yu'u quie ben' uña'a de zē cue' taza. De taza de oro, len de plata, len de yaga, len de yu. Na'ra nu taza de oro o de plata zaca'n za'ala'. Pero yaca taza de yaga o de yu, lē'ēti'zi zaca'n. Lēscana' ra'o, ben' nao xneza Jesús, naca quiero ca quie zē cue' taza.

<sup>21</sup> Naca quiero ca quie nu taza zaca'n za'ala', zaca'ro lao Diuzi, huero dyin quienē'. Ruen dyabē' quiero bihuero tamala, na'ra baneyē'iro huero dyin dya'a, huero dyin quie Diuzi.

<sup>22</sup> Pues gapo' cuidado, bihuelo' ca rue bala bi' ru'abe, porque rguiloyacabi' ga huejabi' tamedian. Mejorla huelo' ta yeyula'adyi' Diuzi, sudyi'ilēlo'nē' mazara, idyē'ēlo' laguedyo', huelo' cue' chizi laxta'olo', porque cana' rue ben' ruidza Diuzi du guicho du la'adyi', ben' nayēri laxta'ohue.

<sup>23</sup> Bihuelo' cuenda quie ben' rnē di'idza' bižu, porque dyē'ēdi nezo' huaca dila yaca benē'.

<sup>24</sup> Nacaró ben' rue cabē' re'en Diuzi. Quie lena' bireya'ala' tzu'ulēro benē' huenē'. Reya'ala' gapala'nro yugulu benē'. Reya'ala' suro puesto usēdiro laguedyiro. Reya'ala' huezela'adyi'ro lēro laguedyiro.

<sup>25</sup> Lēscan' reya'ala' hue'lēro ben' rdza' ra'o di'idza' dya'a ulidzaro Diuzi gacalē Diuzi lējé' utza'jé' pensari quiejé' hue quieyaqué' xti'idza' Diuzi.

<sup>26</sup> Cana' re'ennan cuenda sujé' listo yerojé' lu'u trampa ga bdze' xan' taxi'ibi' lējé' nacajé' preso ga hue xan' taxi'ibi' ta rnazin quiēna conlē lējé'.

### 3

#### *Ni nan cabē' gaca quie yaca benē' caora bayeyudyi quie yedyi layu*

<sup>1</sup> Reya'ala' inezo' dyē'ēdi cabē' gaca caora bayeguida Jesucristo, porque huata' tu zēdi ze gula lao yedyi layu.

<sup>2</sup> Yaca ben' inita' dza na', huejé' cuinjé' ben' ze, huaza'la'adyi'yaqué' dumi, uzē'yaqué' benē', utasi unioyaqué' Diuzi, bigaleyaqué' quie xuziyaqué', bibi bala'ana gapayaqué' chí nu benē' yeyéchi'la'adyi'nē' leyaqué', bitzionla'adyi'yaqué' Diuzi.

<sup>3</sup> Binadyē'ēyaqué' benē', bisi'zeyaqué' quie benē', gaoyaqué' benē' xquia rnayaqué' di'idza' falso, hueyaqué' con ta rnazin quieyaqué', hueyaqué' snia, bitzaxeyaqué' tadya'a.

<sup>4</sup> Huazi'yaqué' bichiyaqué' yē', hueyaqué' con ganzi, rueyaqué' ben' huen cuinyaqué', huatzaxejé' huejé' ta rnazin quiejé', bitzaxeyaqué' ta re'en Diuzi hueyaqué'.

<sup>5</sup> Rionla'adyi'jé' Diuzi najé', pero bē' nazijé', dan' birueyaqué' ca re'en Diuzi hueyaqué'.

#### *Pues yaca ben' rue cana', bitzu'ulao'jé' tuze*

<sup>6</sup> Entre leyaqué' nita' ben' tzu'u lu'u yu'u quie benē' ga zu nigula rue median, ga zu nigula yu'u pensari mala. Raxe yaca nigula na' cabē' di'idza' falso na yaca ben' na'.

<sup>7</sup>Tu rnabaziyaquë' ta ineziyaquë' chi nacan tali, pero bē' ruezijē' bire'enjē' inezijē' tali.

<sup>8</sup>Birue quieyaquë' ta naca tali. Bitzu'uyaquë' pensari dya'a. Bē' nazijē' inajē' naojē' xneza Diuzi. Hueyaquë' cabē' bē' chopa ben' brujo dza na', tu ben' lao Janes len itu ben' lao Jambres. Leyaquë' biguleyaquë' quie Moisés caora uzuyaquë' tiempote.

<sup>9</sup>Pero yaca ben' inita' dza zaza'ra, lē'ēti'zi hueyaquë' gan si'jē' benē' yē', porque huacabē' yaca benē' nacajē' ben' tondo. Gaca quieyaquë' cabē' guca quie Janes len Jambres dza na'. Gucabē' yaca benē' uzu tiempote naca Janes len Jambres ben' tondo.

### *Ni rguixogue' Pablo mazara Timoteo*

<sup>10</sup>Pero luē', dyē'ēdi banaolo' ruelo' cabē' ta psēdia' luē'. Lēscan' ablē'ēlo' cabē' rua', rua' tadya'a, zudyi'ilia' Jesús, rua' ca re'en Diuzi hua' tacuenda gale ja benē' con cabē' rna xti'idza'nē'. Nezo' cabē' naca', naca' ben' zela'adyi', nadyē'ēda' benē'. Nezo' cabē' naca quia' redzagalaohua', pero birusanla'adya'.

<sup>11</sup>Dyē'ēdi nezilo' cabē' psaca benē' nē'ēdi' bizinaquezi. Nezilo' cabē' guca quia' ciudad Antioquía, len ciudad Iconio, len ciudad Listra. Tahuala gula bedzagalaohua', pero gualē Jesús nē'ēdi' cabē' tamala gu'un yaca benē' huejē' quia'.

<sup>12</sup>Tana' nia' luē' yedzagalaocazi yaca ben' re'en enao xneza Jesús. Usacacazi benē' lējē' bizinaquezi.

<sup>13</sup>Pero yaca ben' mala len yaca ben' huizi' yē', tu dza tu dza ziojē' ruezjē' mazara tamala. Rzi'yaquë' yē', riogueyaquë' yē'.

<sup>14</sup>Pero luē', bicha', bē' quio' yugulute ca ta bapsēdio', porque anezo' nacan tali, nuebē'lo' nu ben' psēdi luē'.

<sup>15</sup>Nenacatio' xcuidi' uzulaolo' rusēdio' guichi la'iya quie Diuzi. Caora na' bzioñe'e Diuzi luē' cabē' reya'ala' huero sudyi'ilēro Jesús tacuenda gata' yela' neban quiero tuzioli.

<sup>16</sup>Lao na'a Bichi Be quie Diuzi bēnē' mandado bzu yaca ben' unita' tiempote xti'idzē' lē'ē guichi. Tana' nacan huen isēdiro xti'idza' Diuzi cuenda na'tera usēdiro ben' tula quien, tilarojē' chi bihuejē' tadya'a, uzioñe'erojē' ca re'en Diuzi tajē' huejē' puro ta yu'u ni'a xnezi

<sup>17</sup>cuenda gaca yaca ben' nao xneza Jesús ben' laxta'o yēri, ben' raca rue yugulu tadya'a.

## 4

<sup>1</sup>Delante lao Xuziro Diuzi lēnē' zi'inē' Jesucristo, ben' yeguida lao yedyi layu como ca rey ta huenē' juicio quie ja ben' naban, len quie ja ben' aguti, rua' luē' mandado

<sup>2</sup>ta quixogue'lo' yaca benē' xti'idza' Diuzi la'achi yeyula'adyi'jē', la'achi biyeyula'adyi'jē'. Uzioñe'elo'jē', tilo'jē', usēdio'jē' ca ben' rue zela'adyi'.

<sup>3</sup>Can' huelo', porque dan' huadyin dza bigue'en yaca benē' yejē' ta naca tali, pero huaguiloyaquë' nu yaca ben' usēdi lējē' puro ca ta re'enjē' yejē'.

<sup>4</sup>Huasebi'yaquë' di'idza' li quie Diuzi. Gue'enaquë' uzēnagayaquë' cabē' naca cuento quie benē'zi.

<sup>5</sup>Pero luē', reya'ala' talao' tuzi ca pensari dya'a. Bigalelo' cati hue benē' luē' bizinaquezi. Du guicho du la'adyo' tzetixogue'lo' benē' xti'idza' Diuzi. Uzulo' di'idza' cabē' dyin ben Diuzi ruelo'.

<sup>6</sup>Bagazi idyin dza gatia' yeya'a tzazua' ga zu Diuzi.

<sup>7</sup> Ca dyin ben Diuzi bia', bia' tadya'a quien bareyudyin. Bipsanla'adya' xneza Jesús.

<sup>8</sup> Caora na' udyia Señor quiero, ben' rchugobè' tali, tu coron guichoga'. Na' quele tuzi nè'èdi' udyia Señor quiero coron guichoga', lèscan' udyianè' coron guicho yugulu ben' rbeza yeguida Cristo, ben' nadyè'è lèbè'.

*Rnaba Pablo tu cule lao Timoteo*

<sup>9</sup> Huelo' dyabè' guido' idena'lo' nè'èdi'.

<sup>10</sup> Apsanla'adyi' Demas nè'èdi', zeyonè' ciudad Tesalónica. Raxeranè' gaca quienè' ta de lao yedyi layu cala ca ta yega'nlènè' nè'èdi' niga. Na' Crescente zionè' tu mandado yu nebaba Galacia. Lèzi cana' ziorè Tito tu mandado yu nebaba Dalmacia.

<sup>11</sup> Ituzi Lucas abega'nlènè' nè'èdi' niga. Chi huu' cule, tzio' tzeguedyo' Marcos ta guidalao'nè' niga, porque re'enda' gacalènè' nè'èdi'.

<sup>12</sup> Abia' mandado zio Tiquico ciudad Efeso.

<sup>13</sup> Bè' bazao' ga zua' niga, yedelo' ciudad Troas tzažiu' gaban quia' ta nuca'na' lidyi Carpo. Lèzi re'enda' tzažiu' libro quia', pero racara purari tzažiu' documento quia'.

<sup>14</sup> Alejandro, ben' rue dyin conlè guíba, lega psaquenè' nè'èdi' bizinaquezi. Pues hue Diuzi lèbè' castigo.

<sup>15</sup> Gapo' cuidado conlè lèbè', porque lega ruenè' contra xti'idza' Diuzi rguixogue'ro benè'.

<sup>16</sup> Caora tanèro bia' defender cuina' lao yaca ben' rnabè', nunu gualè nè'èdi'. Yugojè' psanla'adyi'yaquè' nè'èdi' niga. Rulidza' Diuzi si'zenè' quieyaquè'.

<sup>17</sup> Pero gualè Cristo nè'èdi', bènnè' fuerza valor quia'. Bia' gan udixogui'a yaca ben' binaca ben' Israel xti'idza' Diuzi. Yugojè' bzè'nagajè' xti'idza' Diuzi udixogui'ayaquè'. Cana' gualè Cristo nè'èdi' zè lasa caora cati guca zèdi quia'.

<sup>18</sup> Pues huacalècazi Cristo nè'èdi' con biti'tezi tamala gaca quia'. Nezda' gapanè' nè'èdi' hasta dza huetzazulia' lèbè' guibá ga rnabè'nè'. Huero Diuzi ben' ze tuzioli. Amén.

*Ni reyudyi di'idza' use'ela' Pablo lao Timoteo*

<sup>19</sup> Ugapo' diuzi Prisca, lènè' Aquilo, len familia quie Onesíforo.

<sup>20</sup> Nia' luè' napca'na' Trófimo ciudad Mileto dan' raza zhue'nè'. Lèzi bega'nre Erasto ciudad Corinto.

<sup>21</sup> Huelo' dyabè' guido' na'a zatzu'uraro biu' ruen zaga. Lèscan' rugapa Eubulo, len Pudente, len Lino, len Claudio, len yaca los demás ben' nao xneza Jesús, luè' diuzi.

<sup>22</sup> Rulidza' Señor quiero Jesucristo ta sulènè' luè' yugu dza. Lèscan' rulidza' Diuzi ta huela'iyane' yugulule. Amén.

## GUICHI BË SAN PABLO APÓSTOL USE'ELA'NËN LAO TITO

### *Ga rzulao guichi bë Pablo*

<sup>1</sup> Nè'èdi', Pablo, naca' ben' rue dyin quie Diuzi. Lëscan' naca' apóstol quie Jesucristo, use'ela'nè' nè'èdi' ta gacalia' yaca ben' ulio Diuzi ta ineziyaquè' ca naca tali quie xneza Jesús.

<sup>2</sup> Según ca naca xneza Jesús rbezaro idyin dza tzazulëro Diuzi gata' yela' neban quiero tuzioli. Tu binecue' yedyi layu una Diuzi gunnè' yela' neban quiero ra'o, yaca ben' nao xneza Jesús. Nacan tali ca unè', porque tali unanè' como binaca Diuzi ben' rzi' yè'.

<sup>3</sup> Na'ra una Diuzi abdyin hora ineziro quie xti'idza'nè' por nun quie ben' rguixogue' len. Lëscan' Diuzi, ben' pte psela' ra'o, ulionè' nè'èdi' ta tzetixogui'a xti'idza'nè' según cabè' mandado bënnè' nè'èdi'.

<sup>4</sup> Na'ra bia' guichi ni use'ela'n laolo' luè', Tito. Naco' ca zi'ina', dan' rnaorèlo' xneza Jesús cabè' nè'èdi'. Rulidza' Xuziro Diuzi lènè' Jesucristo, ben' pte psela' ra'o, ta huela'iyacuè' luè' cuèchiyaquè' chizi lu'u guicho laxta'olo'.

### *Ni nan cabè' re'en Pablo hue Tito cati zunè' yaca yedyi nebaba Creta*

<sup>5</sup> Na'ra pca'na' luè' isla Creta ta useyudyo' quie asunto bega'n dza na'. Re'enda' huu' nombrar yaca ben' gapa dyin quie Diuzi tu tu yedyi cabè' di'idza' unia' luè' dza na'.

<sup>6</sup> Pues yaca ben' gapa dyin quie Diuzi, bireya'ala' hueyaquè' biz-inaquezi. Reya'ala' sulèjè' tuzi nigula quie quieyaquè'. Reya'ala' uzioñe'ejè' zi'iyacuè' ta bihueyacabi' tamedian, lëscan' ta inaoyacabi' xneza Jesús dyè'èdi. Lëscana' reya'ala' uzioñe'ejè' zi'ijè' ta uzujabi' di'idza' quie xuziya-cabi' len Zna'yacabi'.

<sup>7</sup> Lëscan' yaca ben' gapa dyin quie Diuzi, reya'ala' huejè' dya'a dyin quie Diuzi rueyaquè'. Bireya'ala' inabè'jè' ca cuendazi. Reya'ala' gacajè' ben' zela'adyi'. Bireya'ala' laidza'teyaquè'. Lëscan' bireya'ala' tajè' xudyiyaquè' quilojè' dila. Bireya'ala' cuanjè' quie benè'.

<sup>8</sup> Reya'ala' gapachi'jè' dyè'èdi ben' rdyin zan yu'u quieyaquè'. Bireya'ala' hueyaquè' tamedian. Reya'ala' tzu'uyaquè' pensari dya'a, gacajè' ben' huen, ben' bihue ta rnazin quie.

<sup>9</sup> Reya'ala' inaoyaquè' du guicho du la'adyi'jè' xti'idza' Diuzi ca ta psèdindo' leyaquè'. Reya'ala' gacajè' benè' zela'adyi'. Reya'ala' usèdiyaquè' uzioñe'eyaquè' yaca ben' birnao xneza Jesús, yaca ben' rusebi' xti'idza' Diuzi rnayaquè' binacan tali con cabè' rnèn.

<sup>10</sup> Cana' re'ennan huero, porque nita' zè yaca ben' birale quie xti'idza' Diuzi, ben' rnè di'idza' tondo, ben' rzi' yè'. Nita' zè ben' Israel rueja cana'.

<sup>11</sup> Lében' na' yebo'jè' cue'jè' chizi bira huejè' cana', porque ben' zè apton-dojè' pensari quie, hasta yugu ben' naca tu cue' familia aptondojè' pensari quie. Rusèdiyaquè' benè' ta bireya'ala' usèdiyaquè' cuenda huejè' gan dumi, pero tamala ruejè'.

<sup>12</sup> Uzu tu ben' isla Creta tiempote unè' cani: "Ben' huèdi, ben' mala, naca ben' yedyi quia', ben' isla Creta. Rzi'yaquè' yè', raotzegueyaquè'."

<sup>13</sup> Cana' unè' quie laguèdyinè', pero tabalacazi unè' cana'. Quie lena' reya'ala' tilo'yaquè' dyè'èdi gula cuenda galejè' quie xti'idza' Diuzi ca reya'ala' galejè'.

<sup>14</sup> Lëscan' yëbo'jè' ta bihuejè' cuenda quie cuento ta rnazi yaca ben' Israel de pensarizi quieyaquè'. Lëscan' yëbo'jè' bigalejè' quie ben' psebi'n di'idza' li quie Diuzi.

<sup>15</sup> Yaca ben' nayèri laxta'ohue, rguiloayaquè' tadya'a, pero yaca ben' birnao xneza Jesús, yaca ben' binayèri laxta'ohue, rguiloayaquè' tamala. Lente pensari yu'uyaquè' nacan pensari bayatza.

<sup>16</sup> Nayaquè' raleyacuè' quie Diuzi, pero bè' nazijè' como dan' birueyaquè' tadya'a cabè' tadya'a re'en Diuzi hueyaquè'. Pues ratza Diuzi quieyaquè', dan' bire'enaquè' hue quieyaquè' xti'idzè'. Nica nezijè' bi huejè' chan' re'enjè' huejè' tadya'a.

## 2

### *Yaca ben' quie Jesús, reya'ala' hue quieyaquè' xti'idza' Diuzi*

<sup>1</sup> Ca ta usèdio' benè' reya'ala' inèn lëbizi conlè xti'idza' Diuzi.

<sup>2</sup> Yëbo' yaca be'mbyu gula de que reya'ala' yu'uyaquè' gracia, bitondoyacuè', gapajè' bala'ana, huejè' pensari. Reya'ala' inaojè' xneza Jesús du guicho du la'adyi'yaquè'. Reya'ala' idyè'ëyaquè' laguedyiyacuè'. Reya'ala' sueyaquè' cati bi tu tazèdi de quieyaquè'.

<sup>3</sup> Lëscan' yëbo' yaca nigula gula ta tayaquè' gapajè' Diuzi bala'ana. Yëbo'jè' ta bihue'lëyaquè' laguedyiyacuè' di'idza' bïzu, nica tayaquè' hue'e. La'acazi tajè', pero huejè' tadya'a.

<sup>4</sup> Reya'ala' inëyueyaquè' ja nigula cuidi' ta hueyacabi' tadya'a, lëscan' ta idyè'ëyacabi' be'mbyu quieyacabi' len zi'iyacabi',

<sup>5</sup> lëscan' ta tzu'uyacabi' pensari dya'a, lëscan' ta bigasilëyacabi' be'mbyu tula. Na' yëbo'yacabi' ta sulëyacabi' be'mbyu quieyacabi' dyè'ëdi, lëscan' ta usegulayacabi' zi'iyacabi' dyè'ëdi, lëscan' ta gacalëyacabi' laguedyiyacabi'. Pues ruen dyabè' uzuyacabi' di'idza' ca mandado rue be'mbyu quieyacabi' cuenda bibi dula' gata' quieyacabi' ina benè' condre xti'idza' Diuzi.

<sup>6</sup> Lëscan' yëbo' yaca bi'byu cuidi' ta yu'uyacabi' gracia bitondoyacabi'.

<sup>7</sup> Lëscan', luè', la'acazi tao', pero huelo' puro tahuen. Ca ben' yu'u gracia, ca ben' laxta'o yèri, cana' reya'ala' usèdio' yaca bi'byu cuidi'.

<sup>8</sup> Reya'ala' hue'lëlo' benè' puro di'idza' dya'a tacuenda bigata' causa quio' gao benè' luè' xquia. Cana' huata' yela' stu' quie yaca ben' rue condre ra'o, porque yedue'yaquè' inajè' quiero nacaro ben' mala.

<sup>9</sup> Lëscan' yëbo' yaca ben' nada'o de que reya'ala' galejè' quie xa'njè'. Yëbo'jè' bireya'ala' yeyèchojè' yedilalèjè' xa'njè'.

<sup>10</sup> Lëscan' yëbo'jè' ta bicuanyacuè' ta de quie xa'nyaquè'. Reya'ala' huerajè' huen gapachi'jè' ta de quie xa'njè' cuenda na' il'é'è xa'nyaquè' leyaquè' ben' huen gula, ben' rue quie xti'idza' Diuzi.

<sup>11</sup> Pues bablu'e Diuzi ra'o naquè' ben' huen gula, rbezè' ute uselanè' nutezi ben' re'en inao xneza Jesús.

<sup>12</sup> Yela' ben' huen quienè' abzioñe'enè' ra'o ca re'ennè' usanro tamala, re'ennè' bira huero ta rnazin quiero. Bzioñe'enè' ra'o ca re'ennè' tzu'uro pensari huen, re'ennè' huero tadya'a, re'ennè' tzionla'adyi'ronè' dula'adyi'ro, re'ennè' inaoro xnezè' dza rdaro nabanro lao yedyi layu.

<sup>13</sup> Lëscan' bzioñe'enè' ra'o ca re'ennè' cuezaro dza yeguida Jesucristo. Pues cuezaro yedaohuero dza cati uzu Diuzi di'idza' quienè' ca unè' huenè' quiero. Lëdza zaza'ra na' yeguida Diuzi quiero lënë' zi'inè' Jesucristo, ben' pte psela ra'o.

<sup>14</sup> Pues dza na'te, dza baode, psedyin Jesús cuinnè' lao na'a yaca benè' bëti lëbè'. Cana' bënë' gutinè' ta gata' tahuen quiero. Cana' bënë' pte pselanè'

quiero ta bihue Diuzi ra'o castigo quie yela' mala quiero. Lëscan' udibinë' laxta'oro cuenda gacaro ben' laxta'o yëri, gacaro ben' quienë', tzioro inaoro huero tahuen.

<sup>15</sup> Cana' re'enda' usëdio' yaca los demás ben' quie Jesús. Reya'ala' ux-ela'adyo'jë' cati ruejë' tahuen, lëscan' reya'ala' tilo'jë' dyë'ëdi cati ruejë' tamala. Huu' dyabë' uzënegajë' quio' cabë' yëbo'yaquë'.

### 3

#### *Ni nan cabë' reya'ala' hue ja ben' nao xneza Jesús*

<sup>1</sup> Yëbo' yaca ben' quie Jesús reya'ala' galejë' quie yaca ben' quie gobierno, ben' napa dyin, len quie ben' rnabë' quie yaca yedyi quieyaquë'. Reya'ala' sujë' dispuesto huejë' dyin dya'a ca mandado rue yaca ben' rnabë' quiejë'.

<sup>2</sup> Bireya'ala' udze'la'adyi'yaquë' benë'. Reya'ala' inita'lëjë' laguedyijë' dyë'ëdi huejë' tadya'a gapala'një' benë'.

<sup>3</sup> Bigala'adyo' cabë' guca quiero dza na'. Gucaro ben' yaladyi', bigulero quie Diuzi. Guca bayëchi' gula quiero, bëro puro ta rnazin quiero. Beyula'adyi'ro bëro puro tamala, biuneziro huero tadya'a. Bežë'ro laguedyiro, bdiero laguedyiro, lëscan' bdieyaquë' ra'o.

<sup>4</sup> Pero naca Diuzi ben' huen gula reyëchi'la'adyi'në' nedyë'ënë' ben' nita' lao yedyi layu.

<sup>5</sup> Bireya'ala' huero pensari chi pte psela Diuzi ra'o por nun quie dan' chi bëro tadya'a. Quele por nun quie dan' chi bëro tadya'a pte pselanë' ra'o, den' yela' ben' huen quienë' beyëchi'la'adyi'në' ra'o pte pselanë' ra'o. Conlë nisa udibinë' laxta'oro becubinë'n. Lao na'a Bichi Be quienë' bënnë' quiero yela' neban cubi.

<sup>6</sup> Lëzi lao na'a Señor quiero Jesucristo yu'u Bichi Be quie Diuzi lu'u guicho laxta'oro.

<sup>7</sup> Cana' rue Diuzi quiero. Te beyudyi bezi'ženë' quie dula' xquia quiero, na'tera gunnë' yela' naban quiero tuzioli. Lena' rbezaro gaca quiero.

<sup>8</sup> Cabë' rnia' ni nacan tali. Lena' re'enda' yëbo' yaca ben' quie Jesús huejë' dyabë' galeyauquë' quia' can' rnia' cuenda huejë' tadya'a. Cabë' rnia' ni nacan huen gacalën le'e yugulule.

<sup>9</sup> Bitzu'ulo' huedila huenë conlë yaca ben' rnë di'idza' tondo, ben' tzu'u huedila huenë quie yaca ben' unita' tiempote. Lëscan' bitzu'ulo' huedila huenë quie guichi ley pca'n Diuzi lao na'a Moisés. Huanitio' tiempo bibi zaca'n tzu'ulo' huedila huenë conlë leyaquë'.

<sup>10</sup> Chi za' ben' re'en cuëchi ja partido entre yaca ben' nao xneza Jesús, reya'ala' tilo'jë' yëbo'jë' tu chopa lasa ta usanjë' bihuejë' cana'. Chi biralejë' quio', bihue'lo'jë' lato guidayaquë' gan' rdupale ruele culto.

<sup>11</sup> Claro gula nacan aoquixiyaquë', huanao xquia banapajë' lëjë', huachugubë'na quieyaquë' lao Diuzi.

#### *Rnaba Pablo tu cule lao Tito*

<sup>12</sup> Na' ise'ela' Artemas o Tíquico ga zulo'. Caora abla'në' ga zulo', huelo' dyabë' yeza'lo' yeguido' yedilero ciudad Nicópolis, porque abia' pensari yega'na' ciudad Nicópolis biu' zaga.

<sup>13</sup> Reya'ala' gacalao' Zenas, ben' sëlë benë', len Apolos chi bi ta idziogueyaquë' ta tzu'uyaquë' neza.

<sup>14</sup> Tahuen na' hue yaca ben' bichiro, ben' nao xneza Jesús, tadya'a gacalëyaquë' ben' bibi de quie. Cana' biten cana'zi dza rdayaquë' lao yedyi layu.

#### *Rugapa Pablo Tito diuzi*



<sup>15</sup>Yugulu ben' nita'lë në'ëdi' niga, rugapayaquë' luë' diuzi. Lëscan' ugapo' duizi yaca ben' zulë luë'. Nacayaquë' amigo quiero, ben' bichiro, ben' nao xneza Jesús. Rulidza' Diuzi huela'iyanë' yugulule. Amén.

## GUICHI NI BÈ SAN PABLO APÓSTOL USE'ELA'NÈ'N LAO FILEMÓN

### *Use'ela' Pablo guichi ni lao Filemón*

1 Nè'èdi', Pablo, dia' lu'u dyiguiba dan' bire'en yaca benè' quixogui'a di'idza' quie Cristo Jesús. Nè'èdi'lia' bichiro Timoteo use'ela'ndo' guichi ni laolo' luè', Filemón. Naco' tuzi len nêto', ben' rue dyin quie Diuzi. Nedyè'èndo' luè' ca ben' bichindo'. Lëscan' guichi ni use'ela'ndo' lao zanro Apia

2 lente lao yugulu ben' redupa zan yu'u quio', ben' nao xneza Jesús. Lëscan' use'ela'ndo' guichi ni lao Arquipo. Nacarë Arquipo tuzi len ra'o, ben' rguixogue' di'idza' quie Diuzi.

3 Rulidza' Xuziro Diuzi lënë' Señor quiero Jesucristo ta huela'iyaquë' le'le, cuëchyaquë' chizi lu'u guicho laxta'ole.

### *Filemón rzudyi'ilënë' Diuzi nadyë'ënë' benë'*

4 Yugo dza rëpa' Diuzi diuxcalenë'

5 nun quie na yaca benè' cabè' ruelo' naolo' du guicho du la'adyo' xneza Señor quiero Jesús nedyè'èlo' yaca los demás ben' quienè'.

6 Rulidza' Diuzi ta uzioñe'enè' luè' dyè'èdi ta inezo' cabè' tadya'a gula gata' quiero nun quie nacaro ben' quienè'.

7 Lega redaohuetzegueda' zua' contento cabè' ruelo' nedyè'èlo' benè'. Xcalelo', bicha', dan' por nun quio' bare' chizi lu'u guicho laxta'o yaca ben' nao xneza Jesús.

### *Unaba Pablo tu cule lao Filemón*

8 Dan' naca' apóstol quie Cristo, quie lena' napa' derecho hua' luè' mandado bi huelo', pero bihua' cana'.

9 Raxerada' inaba' tu cule laolo' nun quie nedyè'èlo' nê'èdi', lëscan' nedyè'èda' luè'.

Na'ra nê'èdi', Pablo, anaca' ben' gula dia' lu'u dyiguiba por nun quie dan' bire'en yaca benè' quixogui'a di'idza' quie Cristo Jesús,

10 rnaba' luè' huu' tu cule para Onésimo. Pues ca naca quie Onésimo ni, raqueda'nè' ca zi'ina', ben' rue quie xti'idza' Diuzi ta udxogui'anè' lu'u dyiguiba gan' dendo' niga. Lëlena' inaba' tu cule laolo' ta yezi'lo'nè' de criado quio' tatula.

11 Bizi dza na'la guca Onésimo ben' bibi zaca' len luè', pero na'a naquë' ben' zaca' len luè' len nê'èdi'.

12 Bizi na'a rese'ela'nè' tatula gan' quio' yeziu'nè' conlë ca nê'èdi'.

13 Gu'unda' yega'nnè' gacalënë' nê'èdi' lao lazo' dia' lu'u dyiguiba por nun quie dan' bire'en yaca benè' quixogui'a di'idza' la'lya quie Diuzi.

14 Pero chi bizulo' de acuerdo, bibi zucuzi bi inia' ta yese'ela'nè' laolo' la fuerza. Re'enda' de gusto yeziu'nè'.

15 Huazaque' inaro beza' Onésimo lido' tu chi'zi tacuenda na'a yezulënë' luè' tuzioli.

16 Pero cala de criadozi yeziu'nè'. Reya'ala' yeziu'nè' ca ben' bicho', ben' nedyè'èlo'. Lega nedyè'èda'nè'. Lëscan' luè', reya'ala' idyè'èrèlo'nè' mazara ca nê'èdi'. Biidyè'èlo'nè' con ganzi, idyè'èlo'nè' ca nu ben' bicho', ben' nao xneza Jesucristo.

17 Ca naca na'a, chi luè' nuelo' nê'èdi' tuzi, bezi'nè' cabè' beziu' nê'èdi'.

<sup>18</sup> Chi bizinaquezi babënë' lënë' luë', o chi reya'ala'në' quio', në'ëdi' yeguižuga'n.

<sup>19</sup> Nē'ëdi', Pablo, bzua' letra lē'ë guichi ni conlë na'a ta xela'adyo' huagužuga'n. Bigala'adyo' ca cule bia' quio' udixogui'a luë' xti'idza' Diuzi.

<sup>20</sup> Bicha' huu' tu cule, rnaba' luë' como ca ben' rnaorë xneza Jesús, yeyuežela'adyo' në'ëdi' como ca ben' bicha', ben' quie Cristo.

<sup>21</sup> Rse'ela' guichi ni laolo' dan' nezda' huu' cabë' inia' luë' huelo' quia'. Pues nezda' huelo' mazara cabë' inia' huelo'.

<sup>22</sup> Dera re'enda' huelo' quia', chi huu' cule, ucuezo' posada quia', porque rbeza' dza ise'ela' Diuzi në'ëdi' ideyuba' le'e con cabë' rnabale quia' lao Diuzi.

*Yaca ben' laguedyi Pablo, rugapayaquë' diuzi Filemón*

<sup>23</sup> Epafra, ben' derë lu'u dyiguiiba len në'ëdi' nun quie dan' rguixogue'ndo' xti'idza' Diuzi, rugaparënë' luë' diuzi.

<sup>24</sup> Lëscan' Marcos, len Aristarco, len Demas, len Lucas, rugaparëyaquë' luë' diuzi. Dyë'ëdi' racalëyaquë' në'ëdi' rua' dyin quie Diuzi.

<sup>25</sup> Rulidza' Señor quiero Jesucristo ta huela'iyänë' le'e. Amén.

## DI'IDZA' LA'IYA QUIE DIUZI TA USE'ELA'YAQUË' LAO BEN' HEBREO

### *Use'ela' Diuzi zi'inè' ta quixogue'nè' ra'o*

1 Tazè lasa, tazè modo, use'ela' Diuzi tiempote ben' naca profeta ta quixogue'jè' xuzixta'oro quie pensari quienè'.

2 Pero dza na'a, dza reyudyi quie tiempo gula, use'elè' zi'inè' ta quixogue'nè' ra'o quie pensari quienè'. Conlè zi'inè' bzalonè' duze yedyi layu, apca'nnè' yugulu ta de lao na'a zi'inè'.

3 Cabè' naca Diuzi ben' ze, ben' la'iya, cabè' na' nacarè' zi'inè' ben' ze, ben' la'iya. Tuzi ca naca Diuzi lènè' zi'inè'. Lèzi'inè' na' rnabè'nè' lao yugulu ta dyia guibá len yugulu ta de lao dyilayu conlè fuerza valor quie di'idza' quienè'. Bè' beyudyi udubanè' dula' xquia quiero, cana' bedyinnè' yere'nè' rnabè'nè' zaca' yebè ga zu Diuzi guibá.

### *Nacara zi'i Diuzi ben' rnabè'ra ca yaca ángel*

4 Quie lena' nacara zi'i Diuzi ben' rnabè'ra ca yaca ángel. Pca'n Diuzi lèbè' re'nè' ga nacatera belao ca yaca ángel.

5 Porque ni tu lasa bigudyi Diuzi tu ángel ca unè' gudyinè' Cristo cani: Luè' naco' zi'ina'.

Abdyin dza ulu'ena' yaca ben' nita' lao yedyi layu luè' zi'ina'.

Lëscan' ni tu yaca ángel bigudyi Diuzi lèbè' ca unè' quie Cristo cani:

Nè'èdi' naca' Xuzinè'.

Lèbè' naquè' zi'ina'.

6 Pero cati use'elè' zi'inè' bidanè' lao yedyi layu, naquè' ben' bazucazi cati binecue' yedyi layu, cana' unè' cani:

Re'enda' yugulu yaca ángel gapajè' lèbè' bala'ana.

7 Quie yaca ángel una Diuzi cani:

Rse'ela' ja ángel quia' cabè' rse'ela'be.

Rua' mandado ja ben' rue dyin quia' cabè' rua' mandado gui' ta zenan.

8 Pero quie zi'inè' una Diuzi cani:

Luè', Diuzi, inabè'lo' tuzioli.

Puro ta yu'u ni'a xnezi ruelo' inabè'lo'.

9 Puro ta naca tali raxelo' huelo'.

Rudielo' ta binaca tali.

Quie lena' nè'èdi', Diuzi quio', bia' tuzo' luè' ben' rnabè'ra ca ben' tula.

10 Lëscan' una Diuzi rëbinè' zi'inè' cani:

Luè', Señor, bzalolo' udixulo' yedyi layu dza na'te.

Dyin bëlo' len ni'a na'alo' bëlo' guibá.

11 Ca naca yedyi layu len guibá, hueyudyi huedu quien, huagulan ca quie la'ari'.

Pero luè', biyeyudyi yedu quio'.

12 Cabè' ruzapa benè' gaban quiejè', cana' uzapalo' yedyi layu len guibá dza zaza'ra.

Cabè' rutza' benè' zabajè', cana' utza'lo' yedyi layu len guibá dza zaza'ra.

Pero luè', tuzicazi ca naco' tuzioli, biyeyudyi yedu yela' neban quio'.

Cana' una Diuzi.

13 Lëscan' ni tu lasa bigudyi Diuzi tu ángel ca unè' gudyinè' Cristo cani:

Ure' cuëta' zaquë' yebë niga, hasta idyin dza cuëcha' xni'alo' yaca ben' rudie luë'.

Cana' una Diuzi.

<sup>14</sup> Na'ra naca yaca ángel bichi bezi, ben' rue ca mandado rue Diuzi. Rse'ela' Diuzi lëjë' ta gacalëjë' ben' de yela' neban quie tuzioli.

## 2

### *Reya'ala' hue quiero ca na Diuzi*

<sup>1</sup> Quie lena' reya'ala' hue quiero xti'idza' Diuzi ta babero cuenda biusanla'adyi'ro inaoro xneza Cristo.

<sup>2</sup> Nacan tali ca na xti'idza' Diuzi ta udixogue' yaca ángel dza na'te. Bë Diuzi castigo nu ben' bë dula' xquia bigulejë' quie xti'idzë'. Bë Diuzi lëjë' tu castigo cabë' reya'ala' gaca quiejë'.

<sup>3</sup> ¿Biži huero ta bihue Diuzi ra'o castigo chi caora cati bënë' ra'o yela' neban tuzioli, na'ra bihue quiero di'idza' quienë'? Pues tanëro udixogue' cuin Jesús cabë' rue Diuzi uselanë' benë' yeyojë' guibá. Na'tera quie ben' bzënaga cabë' udixogue'në', gucabë'yaquë' nacan tali, na'tera lëjë' udixogue'jë' ra'o.

<sup>4</sup> Lëscan' Diuzi, zë lasa bënë' yela' milagro quienë', bënë' seña, bënë' ta beban ja benë' tacuenda ineziyaquë' nacan tali di'idza' unanë'. Tazë modo bënë' use'elë' Bichi Be quienë' ta gacalënë' ra'o con ca raxe Diuzi huenë' quiero.

### *Guca Jesucristo benë' cabë' naca benë', ben' nao xnezë'*

<sup>5</sup> Lëscan' bibë' Diuzi yela' r nabë' quienë' yaca ángel ta inabë'jë' lao yedyi layu cubi ta zaza'ra. Quie lëyedyi na' rnando'.

<sup>6</sup> Na'ra zu tu parte lë'ë guichi la'iya quie Diuzi ga rnan cani:  
¿Cabiži naca quie yaca ben' rda lao yedyi layu, chi luë' Diuzi, reyëchi'la'adyo' leyaquë'?

¿Cabiži naca quie yaca ben' nita' lao yedyi layu, chi luë' Diuzi, raquelo' bi raca quieyaquë'?

<sup>7</sup> Dyin bëlo' luë' bzulo' ja benë' ledao'zi menosra ca ja ángel, pero tu chi'zi. Pero udapo' lëjë' bala'ana.

<sup>8</sup> Bëlo'jë' mandado inabë'jë' lao yugulute ta de lao yedyi layu.

Cana' rnan lë'ë guichi la'iya quie Diuzi. Na'ra cati bë Diuzi mandado inabë' ja benë' lao yugulute ta de lao yedyi layu, bipca'nnë' tzala'la ni tu ta bigalen quiejë'. Pero nezïro binedyin dza ta galen quiejë' yugulu ta de lao yedyi layu.

<sup>9</sup> Lëscan' nezïro cabë' bë Diuzi conlë Jesús. Bënë' mandado gaca Jesús ledao'zi menosra ca yaca ángel, pero tu chi'zi. Yela' nedyë'ë quie Diuzi bënë' mandado guti Jesús lao laza yugulu benë'. Na'ra nue Diuzi lëbë' ben' belaoatzegue, ben' bala'ana gula nun quie dan' bedzagalaonë' gutinë' lë'ë yaga cruzo.

<sup>10</sup> Yugulu ta de bë bzalo Diuzi naque quienë'. Re'en Diuzi yeyo yugulu ben' nao xnezë' guibá ga zuë'. Quie lena' bënë' mandado bedzagalao Jesucristo cuenda ulu'en dyë'ëdi naca Cristo ben' bide dula' xquia quie, huazuenë' gatinë' lë'ë yaga cruzo ta uselanë' yaca benëchi'.

<sup>11</sup> Porque Cristo len ben' nao xnezë', naca tuzi Xuzijë'. Nacajë' ben' la'iya nun quie dan' bëla'iya Cristo lëjë'. Quie lena' biredue' ži'i Diuzi yëbinë' ra'o: "Nacale ben' bicha'."

<sup>12</sup> Lena' rnën lë'ë guichi la'iya quie Diuzi cani:  
Huëpa' ja ben' bicha' cabë' ben' že gula naca Diuzi.  
Gula' ja himno quienë' ga redupa ja benë'.

<sup>13</sup> Lëscan' rnën cani lë'ë guichi la'iya:

Në'ëdi' rzudyi'ilia' Diuzi.

Lëscan' rnën cani:

Ni zulia' ben' bicha', ben' nao xneza', ben' ben Diuzi në'ëdi'.

<sup>14</sup> Cabë' naca quie ben' nao xneza Cristo, nacajë' benë' yudzujë' ren nacajë' bë'ëla' zuba', lëscan' nacaré' quie Jesús. Lëbë' guquë' benë', yudzurënë' ren nacarënë' bë'ëla' zuba' cuenda gatinë' lë'ë yaga cruzo ta udyiagu' në' ben' rudyiagu' benëchi', ta inaro, xan' taxi'ibi'.

<sup>15</sup> Dyin bë Cristo naca ben' nao xnezë' libre. Bira rdzebijë' gatijë'. Cati dza rdajë' lao yedyi layu, cana' bdzebijë' gatijë', guca quiejë' ca quie ben' zu lao xa'ne mala gula tu lala dza zujë' lao yedyi layu.

<sup>16</sup> Pues bibida Cristo lao yedyi layu ta gacalënë' yaca ángel, dechan' bidë' ta gacalënë' yaca ben' naca zi'isuba Abraham, ta inaro, ben' nao xnezë'.

<sup>17</sup> Quie lena' ben' zi guque' benë' cabë' naca benë', ben' nao xnezë', ben' bichinë'. Cana' saque' gapë' dyin gaquë' pxuzi r nabë'ra lao Diuzi. Cana' uzucazinë' di'idza' una Diuzi huenë'. Cana' saque' yeyëchi' la'adyi' në' dyë'ëdi yaca benëchi'. Cana' saque' cubanë' dula' xquia quiejë'. Cana' saque' hueljëjë' Diuzi tuže.

<sup>18</sup> Nun quie bedzagalao Cristo guquë' prueba bipsannë' bënë' cabë' mandado bë Diuzi huenë'. Cana' huazaque' në' gacalënë' dyë'ëdi nu ben' nao xnezë', ben' raca prueba.

### 3

#### *Naca Jesús ben' r nabë'ra ca Moisés*

<sup>1</sup> Na'ra, bicha', nacale ben' la'iya. Lena' rnia' le'e como dan' ulio Diuzi le'e gacale ben' quienë'. Quie lena' reya'ala' huele pensari dyë'ëdi cabë' naca quie Cristo Jesús. Naquë' ben' use'ela' Diuzi. Naquë' pxuzi r nabë'ra quiero ra'o ben' nao xnezë'. Cana' naquë' quiero. Cana' naca cabë' rue quiero quienë' yuguluro, naca tuzi cabë' rue quiero quienë'.

<sup>2</sup> Bdë' Diuzi Jesús use'elë' lëbë' gaquë' pxuzi r nabë'ra quiero. Bzucazi Jesús di'idza' ca di'idza' gudyi Diuzi lëbë' huenë'. Lëscan' Moisés, bzurëcazinë' di'idza' ca di'idza' gudyi Diuzi lëbë' ta gacalënë' ben' quie Diuzi unita' dza na', ta inaro, yaca ben' Israel, ben' naca familia quie Diuzi.

<sup>3</sup> Pero nacara Jesús ben' r nabë'ra ca Moisés. Ca quie nacara ben' uzulao rue familia ben' r nabë'ra ca zi'inë', cana' nacara Jesús ben' r nabë'ra ca Moisés.

<sup>4</sup> Quie yugulu familia unita' ben' uzulao bë ta unita' zi'inë'. Pero Diuzi uzulaonë' benë' yugulu ta de.

<sup>5</sup> Quie lena' Moisés, como ben' rue mandado quie Diuzi, bzucazinë' di'idza' ca di'idza' gudyi Diuzi lëbë' gacalënë' ben' quie Diuzi unita' dza na', ta inaro, yaca ben' Israel, ben' naca familia quie Diuzi. Guca dyin quie Moisés udxogue' në' lëjë' ca di'idza' una Diuzi cabë' ta gaca dza zaza'ra.

<sup>6</sup> Lëscan' bzucazi Cristo di'idza' ca di'idza' gudyi Diuzi lëbë'. Pero netza' cabë' naca quie Cristo, porque nun quie naquë' zi'i Diuzi racalënë' ra'o, ben' nao xnezë' nacaro familia quie Diuzi. Cana' naca quiero chi inaoro xnezë' du guicho du la'adyi'ro, chi biusanla'adyi'ro sudyi' lëro lëbë', chi suro gusto cuezaro dyë'ëdi hasta dza gatiro.

#### *Cabë' una Diuzi quie ben' quienë', ben' yeyo ga zuë' yezila'adyi' në'.*

<sup>7</sup> Quie lena' naca quiero cabë' una Bichi Be quie Diuzi dza na'. Lena' rnën lë'ë guichi la'iya quie Diuzi cani:

Na'adza, chi tali rele bi na Diuzi le'e,

<sup>8</sup> bigacale ben' laxta'o zidi, cabë' bë bala ben' unita' dza na' ptza'jë' Diuzi.

Bějē' Diuzi zēdi hasta beyudyi paciencia quienē', cati dza udajē' lao lato dachi.

Lena' una Bichi Be quie Diuzi gudyinē' lējē' cani:

<sup>9</sup> Lao lato na' bē xuzixta'ole nē'ēdi' zēdi hasta beyudyi paciencia quia'.

Cana' bējē' la'acazi blē'ējē' cabē' tahuen bia' quiejē' lao chopa galo iza.

<sup>10</sup> Quie lena' bdzē'ēda' lējē', gucha' jē': "La'acazi nezile ca re'enda' huele, pero bire'enle huele ca re'enda'. Bire'enle huebē'le xneza'."

<sup>11</sup> Quie lena' bdzē'ēda' lējē' uchugulia' quiejē' bzētoga' laohua' unia': "Biguidajē' ga zua' yezila'adyi'jē'."

Cana' una Bichi Be quie Diuzi dza na'.

<sup>12</sup> Bicha', gapale cuidado bigacale ben' laxta'o yaladyi' usanla'adyi'le xneza Diuzi nun quie dan' bihue quiele quienē'.

<sup>13</sup> Mejorla hue'lēle laguedyile di'idza' žela'adyi' yugu dza tu nede lato. Cana' reya'ala' huele cuenda bihue dula' xquia quiele le'e gan, na' huele condre Diuzi.

<sup>14</sup> Porque chi inaoro xneza Cristo biidzebiro biusanla'adyi'ro sudyi'ilēronē' dyē'ēdi, na'ra nacaro ben' quienē'. Cabē' bēro tanēro cati uzulaoro unaoro xnezē', cana' re'ennē' huero hasta dza cati gatiro.

<sup>15</sup> Lena' rnēn lē'ē guichi la'iya quie Diuzi cani:

Na'adza, chi tali relē bi na Diuzi le'e, bigacale ben' laxta'o zidi cabē' bē bala ben' unita' dza na' ptza'jē' Diuzi.

Cana' rnēn lē'ē guichi la'iya quie Diuzi.

<sup>16</sup> Na' inaba' le'e tu di'idza'. ¿Nuži ja ben' bzēnaga xti'idza' Diuzi, na' ude beyudyi bzēnagajē' xti'idzē', caora na' ptza'jē' lēbē'? Pues yaca ben' yedyi quie Moisés, ben' Israel, ben' ulioguē' nación Egipto, lējē' bējē' cana'.

<sup>17</sup> Lēscan' inaba' le'e: ¿Nuži ja ben' bdza' Diuzi lao chopa galo iza? Pues yaca ben' bē dula' xquia. Quie lena' bdza' Diuzi lējē' gutijē' lao lato dachi.

<sup>18</sup> Lēscan', ¿nuži ja ben' uchuguli Diuzi quie, bzētoguē' laohuē' unē' biguidajē' ga zuē' yezila'adyi'jē'? Pues yaca ben' bibē quie quie Diuzi, lējē' uchugulinē'.

<sup>19</sup> Na'ra blē'ēro cabē' guca quiejē' biuzaque' yeyojē' ga zu Diuzi como dan' bibē quiejē' quie Diuzi.

## 4

<sup>1</sup> Quie lena' tu raca nrega'nlē Diuzi ra'o di'idza' ta yeyoro ga zuē' yezila'adyi'ro, reya'ala' gapale cuidado ta hue quiele quie Diuzi, yela' na' yeyole ga zunē' yezila'adyi'le.

<sup>2</sup> Porque cabē' udixoguē' Diuzi yaca ben' unita' tiempote cabē' bēnē' quiejē' ta yeyojē' guibá, lēscan' udixogue'rēnē' ra'o. Pero para lējē' biben sirve bzēnagajē' xti'idza' Diuzi, porque tu bzēnagazijē'n bibējē' casa hue quiejē' xti'idza' Diuzi.

<sup>3</sup> Pero ra'o, ben' nao xneza Cristo, hueyoro ga zu Diuzi ta yezila'adyi'ro dza gatiro. Bigaca quiero cabē' una Diuzi lē'ē guichi la'iya quienē' cani:

Quie lena' bdzē'ēda' lējē', uchugulia' quiejē' bzētoga' laohua' unia' biguidajē' ga zua' yezila'adyi'jē'.

Cana' una Diuzi dza na'te. Pero cala bibē Diuzi ga guidajē' yezila'adyi'jē', como dan' nugaohue Diuzi dyin quienē' bēnē' dza cati udixunē' yedyi layu.

<sup>4</sup> Zu ga rguixogue'n ra'o lē'ē guichi la'iya quie Diuzi cabē' bē Diuzi quie dza gadyi. Rnēn cani:

Pseyudyi Diuzi dyin quienē' lao xopa dza.

Na'ra dza gadyi bezila'adyi'nē'.

<sup>5</sup> Lēscan' zu ga rnēn lē'ē guichi la'iya quie Diuzi cani:

Biguidajē' ga zua' yezila'adyi'jē'.

Cana' una Diuzi dza na'.

<sup>6</sup> Pero neracara falta yaca ben' yeyo yezila'adyi' ga zu Diuzi. Na'ra yaca ben' unita' tiempote, ben' bžēnaga xti'idza' Diuzi ca unē' gudyinē' lējē' cabē' bēnē' quiejē' ta yeyojē' guibá, pero bibē quiejē'xti'idza' Diuzi, na' biuyojē' ga zu Diuzi ta yezila'adyi'jē'.

<sup>7</sup> Quie lena' bzu Diuzi itu tiempo cati reya'ala' hue quiero quie xti'idza'nē'. Lētiempo na' nacan na'adza. Cana' nacan cabē' una rey David dza na'te, dza unita' ben' unita' ja tiempote. Cabē' una Diuzi, cana' una rey David con ca rguixogue'n ra'o lē'ē guichi la'ya quie Diuzi cani:

Na'adza, chi rele bi na Diuzi le'e, bigacale ben' laxta'o zidi.

Cana' una Diuzi dza na'.

<sup>8</sup> Chi tali lao na'a Josué uyo yaca ben' unita' tiempote guibá bezila'adyi'jē', na' biina Diuzi quie tiempo zaza'ra.

<sup>9</sup> Lena' neziro neza'ra dza yeyo yaca ben' nao xneza Jesús guibá yezila'adyi'jē'.

<sup>10</sup> Na'ra cati yeyoro ga zu Diuzi yezila'adyi'ro, bira sacazi'ro huero dyin. Gaca quiero yezila'adyi'ro cabē' bezila'adyi' Diuzi dza na' cati beyudyi bzalonē' yedyi layu.

<sup>11</sup> Quie lena' reya'ala' inaoro xneza Cristo du guicho du la'adyi'ro ta yeyoro ga zuē' yezila'adyi'ro. Reya'ala' gaparo cuidado nu nu hue cabē' bē ja ben' unita' tiempote, bibē quieyaquē' xti'idza' Diuzi.

<sup>12</sup> Cabē' naca Diuzi ben' zu neban tuzioli, cabē' na' nacarē xti'idzē'. Cabē' naca Diuzi ben' de yela' huaca quie, cabē' na' nacarē xti'idzē'. Tzu'ura xti'idzē' guicho laxta'oro zitu'ra ca tu espada neduchi'n rupalaona. Tzu'uteran ra'o zitu' ga yu'u bichi be quiero. Tzu'uteran ra'o zitu' ga zelaozi ga yu'u pensari quiero. Rulu'en ca naca pensari yu'u lu'u guicho laxta'oro, chi pensari huen, chi pensari mala.

<sup>13</sup> Ni tu ta bē Diuzi bisaque' ucachi'laona lao Diuzi. Rlē'ē Diuzi yugulu ca ruero. Bisaque' igachi' ca naca quiero laohué'. Lao lēbē' yezacalao yugulu cabē' babēro, chi bēro tahuen, chi bēro tamala.

### *Naca Jesús pxuzi r nabē'ra quiero*

<sup>14</sup> Jesús, ži'i Diuzi, naquē' pxuzi r nabē'ra quiero, baziyoguē' guibá ga zu Diuzi. Quie lena' reya'ala' huero seguir biyehuēdiro inaoro xneza Cristo.

<sup>15</sup> Na'ra Cristo racanē' reyēchi'la'adyi'nē' ra'o como dan' lēbē' cuinnē' guquē' prueba dza na', chi huenē' tamala, chi bihuenē' tamala, cabē' raca quiero racaro prueba, pero lēbē' bibēnē' tamala.

<sup>16</sup> Quie lena' reya'ala' hue quiero xti'idza' Diuzi du guicho du la'adyi'ro, bi-idzebiro hue'lēro lēbē' di'idza' nun quie zunē' dispuesto gacalēnē' ra'o, re'nē' xlatonē' guibá ga r nabē'teranē' ra'o. Chi huero cana', yeyēchi'la'adyi'nē' ra'o gacalēnē' ra'o hora cati raca zēdi quiero.

## 5

<sup>1</sup> Rbio yaca benē' nu ben' gaca pxuzi r nabē'ra quiejē' de entre laguedyijē' ta tzesēnē' lao Diuzi lao lazajē'. Lēscan' nacan dyin quienē' gutinē' yaca bia naca gun quie Diuzi udyianē'ba' lao ru'aba cuenda yezi'ze Diuzi dula' xquia quiejē'.

<sup>2</sup> Na'ra como benē'zi naca pxuzi r nabē'ra, derē dula' xquia quienē'. Quie lena' nezinē' yeyēchi'la'adyi'nē' ben' binenezi, ben' birue quie xti'idza' Diuzi.

<sup>3</sup> Lēscan' nun quie derē dula' xquia quienē', tanēro ruen zi gutinē' tu bia udyianē'ba' lao ru'aba cuenda yezi'ze Diuzi dula' xquia quienē' cuinnē', na'tera huazaquē' udyianē' ituba' lao ru'aba cuenda yezi'ze Diuzi dula' xquia quie ja ben' yedyi quienē'.



4 Nitu nitu bisaque'nè' huenè' cuinnè' pxuzi rnabè'ra. Dechan' Diuzi cuioguè' nu ben' huenè' bala'ana, huenè' pxuzi rnabè'ra. Cabè' bè Diuzi tiempote ulioguè' Aarón pxuzi rnabè'ra, cana' cuio Diuzi nu ben' gaca pxuzi rnabè'ra.

5 Lëscan'rè guca quie Cristo. Quele ulionè' cuinnè' pxuzi rnabè'ra, dechan' Diuzi udapè' lèbè' bala'ana, ulionè' lèbè' naquè' pxuzi rnabè'ra con ca una Diuzi caniga:

Luè' naco' zì'ina', abdyin dza inezi ja benèchi' zì'ina' luè'.

6 Lëscan' zurè itu parte lè'è guichi la'iya quie Diuzi ga una Diuzi rëbinè' lèbè': Luè' naco' pxuzi tuzioli, ca pxuzi guca Melquisedec tiempote, cana' naco' pxuzi.

7 Cana' una Diuzi. Na'ra dza uda Cristo lao yedyi layu, caora na' unè' zidzo blidzanè' Diuzi uredyinè' unabanè' Diuzi ta gacalènè' lèbè', como dan' naca Diuzi ben' napa poder ta ucuasa ucui'onè' lèbè', biguti ja benè' lèbè'. Na' como zu Cristo dispuesto ta huenè' ca re'en Diuzi huenè', benè' lèbè' cati blidzanè' lèbè' gualènè' lèbè'.

8 La'acazi naca Cristo zì'i Diuzi, ben zi bedzagalaonè' cuenda ulu'en quienè' huazuenè' hue quienè' xti'idza' Diuzi la'acazi raca zèdi gula quienè'.

9 Cati bablu'en quienè' huazuenè', na'ra guquè' ben' run yela' neban tuzioli quie ja ben' nao xnezè'.

10 Bdè' Diuzi lèbè' pxuzi rnabè'ra quiero. Ca pxuzi guca Melquisedec tiempote, cana' naquè' pxuzi.

### *Nacan zudyi usanla'adyi'ro bira inaoro xneza Cristo*

11 Di'idza' zèra de ta inando' le'e cabè' naca quie Cristo, pero zèdi nacan ta uxi'idze'ndo' le'e, porque canezi rioñe'ele.

12 Como baziote tiempo banezcazole cabè' una Diuzi, lena' reya'ala' uxi'idze'le yaca ben' tula cabè' unanè'. Pero neruen zi quiele yexi'idze'ndo' le'e tatula ta nacan yalo quie xti'idza' Diuzi. Abeyaca quiele ca quie xcuidi'. Puro ta nacan yalo quie xti'idza' Diuzi re'enle uxi'idze' benè' le'e. Binegacale uxi'idze' benè' le'e ta naca zèdi quie xti'idza' Diuzi.

13 Yaca ben' binegaca tziõe'e ta naca zèdi quie xti'idza' Diuzi, nacajè' ca quie xcuidi' nera'adyi'. Binetzu'ulaojè' hue quieyaquè' dyè'èdi quie xti'idza' Diuzi.

14 Pero ta naca zèdi quie xti'idza' Diuzi, nacan para ben' huaca, ben' bayu-lao rue quie xti'idza' Diuzi, como dan' banezinè' rnaonè' tahuen, birnaonè' tamala.

## 6

1 Quie lena' huero seguir usèdiro ta tziõe'ero mazara cabè' reya'ala' tziõe'ero ta hue quiero xti'idza' Diuzi mazara. Bira usèdiro puro ta baoyõe'ero dza na' cati uzulaoro unaoro xneza Cristo. Banezile cabè' rguixogue' xti'idza' Diuzi, rguixogue'n cabè' reya'ala' utza'ro pensari quiero bira huero xquia, rguixogue'n cabè' reya'ala' hue quiero xti'idza' Diuzi,

2 rguixogue'n quie bautismo, rguixogue'n cabè' huero uquichiro na'aro lao guicho ben' nao xneza Cristo, ben' gapa dyin cati dza sulaonè' gapanè' dyin. Lëscan' rguixogue'n cabè' naca quie ben' huati huebanjè', rguixogue'n quie dza gaca juicio.

3 Pues huero seguir usèdiro tziõe'ero mazara como cana' re'en Diuzi huero.

4 Cana' reya'ala' huero, porque chi babeyue Diuzi ra'o ben' cubi, chi baozulaoro si'ro ca ta run Diuzi ra'o, chi bayu'uro Bichi Be quienè',

<sup>5</sup> chi baozulaoro usëdiro tzioñe'ero cabë' na di'idza' quienë', chi baozulaoro usëdiro tzioñe'ero quie yela' huaca gata' quiero dza cati taro lao dyila yu cubi ta zaza'ra,

<sup>6</sup> chi chu'unro tzala'la ca una Diuzi, chi bira inaoro xnezë', na'ra bisaque' yeyue Diuzi ra'o ben' cubi tatula yetza'ro pensari quiero tatula. Chi huero cana', naca quiero ca quie ben' uda' zi'i Diuzi lë'e yaga cruzo tatula, utitoronë' zaquë'lao lao ja benë'.

<sup>7</sup> Chi huero cana', naca quiero ca quie layu ri'on nisa cati ruen nisayo. Chi hue'n usecho huen quie ben' raza ra'n laona, na'ra layu dya'a na', huela'iya Diuzi len.

<sup>8</sup> Pero chi hue'n puro guixi', nacan layu mala bibi zaca'n. Ruen zudyi udze'de' Diuzi len, hueyudyi huedu quien tzeina.

### *Naca seguro quiero lao Diuzi*

<sup>9</sup> La' acazi inando' le'e cana', le'e bicha', ben' nedyë'ëda', quie le'e nužela'adyi'ndo' huela'iya Diuzi le'e, rnaole neza ta yeyole guibá.

<sup>10</sup> Naca Diuzi ben' rue puro ta yu'u ni'a xnezi. Bigala'adyi'në' cabë' bële dza na' blu'ele cabë' nedyë'ële gucalële ja ben' bichiro, ben' nao xneza Cristo. Lëscan' nezi Diuzi neruele na'a cabë' bële dza na'.

<sup>11</sup> Na'ra nëto' re'enndo' huele seguir yugulule inaole xneza Cristo du guicho du la'adyi'le hasta dza cati gatile nužela'adyi'le gun Diuzi le'e ca ta rbezale gunnë' le'e.

<sup>12</sup> Bire'enndo' yehuëdile, re'enndo' huele seguir huele cabë' rue yaca los demás ben' nao xneza Cristo. Nun quie rue quiejë' ca na Diuzi, redaohuejë' rbezajë' dyë'ëdi dza hue' Diuzi lëjë' cabë' di'idza' bega'nlnë' lëjë'.

<sup>13</sup> Na'ra quie dza cati bega'nle' Diuzi Abraham di'idza', bgunte Diuzi cuinnë' huenë' ca unë' huenë', como dan' ganura ben' tula zu nacara ben' rnabë'ra ca lëbë' ta uguntënë' laohue.

<sup>14</sup> Na'ra unë' rëbinë' Abraham: "Talicazi inia' luë', huela'iya' luë' taže, hueže zi'isubo'." Cana' una Diuzi gudyinë' lëbë'.

<sup>15</sup> Pues dyë'ëdi uleza Abraham dza hue Diuzi cabë' unanë' huenë' quienë'. Na'ra cati bdyin dza, bëcazi Diuzi cabë' unanë' huenë' quienë'.

<sup>16</sup> Cati rugunte ja benë', ruguntejë' lao Diuzi. Cati raca dila binaca lëbi ca rnajë' lao ben' rnabë', na'ra ruguntejë' lao Diuzi nacan tali ca rnajë'.

<sup>17</sup> Lëscan' Diuzi, bgu'untenë' dza na' laohuë' cuinnë' unë' nacan tali ca unanë'. Gu'unne' blu'enë' dyë'ëdi zuë' dispuesto uzunë' di'idza' ca di'idza' unë', bibetza'në' ca huia ina'në' ra'o. Cana' raca quiero, ben' rzudyi'lë Diuzi, ablu'e Diuzi seguro na' huenë' ca unë' huenë'.

<sup>18</sup> Naca chopa ta rue Diuzi bisaque' itza'n. Bisaque' itza'n ca unë' huenë'. Lëscan' bisaque' itza'n ca bgu'untenë' laohuë' cuinnë' huenë'. Bisi' Diuzi yë'. Dan' cana' rue Diuzi, lena' uxela'adyi'n ra'o taže. Cana' raca quiero, ben' rnaba lao Diuzi, ta huia ina'në' ra'o. Cana' raca quiero, ben' rzudyi'lë Diuzi, nužela'adyi'ro hue Diuzi quiero cabë' unë' huenë' quiero.

<sup>19</sup> Naca seguro quiero lao Diuzi cabë' naca seguro quie nu barco nerio len tu guíba naca zi'i gula, bisaque' udyiga be len tzala'la. Cana' naca quiero huazaque' yeyu'utero hasta ga zu Diuzi guibá.

<sup>20</sup> Lëgan' na' naca ga uyu'u Jesús, psalonë' neza quiero cuenda saque' yeyu'urëro ga beyu'unë' guibá. Cana' naca quie Jesús, naquë' pxuzi rnabë'ra quiero tuzioli cabë' pxuzi guca Melquisedec dza na'.

## 7

<sup>1</sup> Lëben' lao Melquisedec guquë' rey quie ciudad Salem. Lëscan' guquë' pxuzi, ben' rue mandado quie Diuzi quiero, ben' zu sibi. Na' cati bedyin Abraham, uyoguë' lao dila, bënë' gan lao yaca rey. Caora na' bro Melquisedec ptilë' lëbë' bëla'iyane' lëbë'.

<sup>2</sup> Na' bë' Abraham Melquisedec tu cue'na quie lao chi cue' yugulu ta bënë' gan uyoguë' lao dila. Na'ra cabë' laohuë', laohuë' Melquisedec, ta inaro xti'idza'ro: "Ben' naca rey, ben' rue ta yu'u ni'a xnezi." Lëscan' como guquë' rey quie ciudad Salem, ta inaro xti'idza'ro: "Yela' ruela'iya quie Diuzi", quie lena' rnërë laohuë' xti'idza'ro: "Ben' naca rey, ben' rue yela' ruela'iya quie Diuzi."

<sup>3</sup> Lë'ë guichi la'iya quie Diuzi birguixogue'n ra'o quie xuzi zna'në', ni quie xuzixta'onë'. Birguixogue'n quie dza golonë', ni quie dza gutinë'. Naquë' ca que zi'i Diuzi, naquë' pxuzi tuziuli.

<sup>4</sup> Na'ra ulehuecara pensari ca tu ben' belao naca Melquisedec. Pues hasta cuin xuzixta'oro Abraham bë'në' lëbë' tu cue'na quie lao chi cue' yugulu ta bënë' gan uyoguë' lao dila.

<sup>5</sup> Na'ra cabë' na lë'ë guichi ley pca'n Diuzi lao na'a Moisés dza na'te, rguixogue'n quie yaca pxuzi, ben' naca familia quie xuzixta'oro Leví. Ruen mandado ta uquizujë' yaca ben' Israel tu cue'na quie lao chi cue' quie ta de quiejë', ba'ala'cazi ben' yedyi quiejë', ba'ala'cazi ben' naca zi'isuba Abraham cabë' lëjë'.

<sup>6</sup> Pero Melquisedec, ba'ala'cazi binaquë' familia quie xuzixta'oro Leví, bë' Abraham lëbë' tu cue'na quie lao chi cue' ta de quienë'. Na' bëla'iya Melquisedec Abraham, ben' bega'në' Diuzi di'idza' ta yeze zi'isubanë'.

<sup>7</sup> Na'ra tabalacazi na' nacara belao ben' ruela'iya quele ca ben' raca la'iya.

<sup>8</sup> Pues ca naca quie yaca pxuzi, ben' napa dyin uquizujë' tu cue'na quie lao chi cue' ta de quie ben' Israel, cati beyudyi dza quiejë' gutijë'. Pero ca naca quie Melquisedec, rnën quienë' lë'ë guichi la'iya quie Diuzi ca quie ben' nezu bineyudyi dza quie.

<sup>9</sup> Lëscan' quie Leví, ben' pquiizu tu cue' quie lao chi cue'na ta de quie ben' Israel dza na', ba'ala'cazi binesuë' lao yedyi layu caora uzu Melquisedec, huazaque' inaro bë'rënë' Melquisedec tu cue' quie lao chi cue'na ta de quienë' caora bedila xuzixta'onë' Abraham Melquisedec tu neza, na' bë'në' lëbë' tu cue' quie lao chi cue'na ta de quienë'.

<sup>10</sup> Cana' huazaque' inaro como dan' caora na' cati bedila Abraham Melquisedec tu neza, nenu'a Abraham Leví lu'u cuerpo quienë', nenaca Leví forma quie bini lu'u cuerpo quie Abraham, ta inaro nenaca Leví ben' zagalora, be'n' gaca zi'isuba Abraham dza zaza'ra.

<sup>11</sup> Lao na'a yaca pxuzi, ben' naca familia quie Leví, uzi' yaca ben' Israel ley quie Diuzi. Lëyaca pxuzi na' nacajë' zi'isuba xuzixta'oro Aarón. Na'ra chi tali huaca hue yaca pxuzi na' ta bigata' dula' xquia quie ja ben' nao ley pca'n Diuzi lao na'a Moisés, na'ra birnaban guida ben' tula, ben' gaca pxuzi cabë' pxuzi gaca Melquisedec.

<sup>12</sup> Cati yetza' quie pxuzi, lëscan'rë decazide yetza'n quie ley pca'n Diuzi lao na'a Moisés.

<sup>13</sup> Na'ra quie Señor quiero, rnën lë'ë guichi la'iya quie Diuzi naquë' pxuzi ca guca Melquisedec pxuzi. Pero binaca Señor quiero familia quie xuzixta'oro Leví. Naquë' familia quie ni tu ben' biguca pxuzi.

<sup>14</sup> Dyë'ëdi neziro naca Señor quiero familia quie xuzixta'oro Judá. Na' biuna Moisés gaca pxuzi ben' naca familia quie Judá.

<sup>15</sup> Lena' reya'ala' tzioñë'ero dyë'ëdi cati ineziro babida tu pxuzi cubi, ben' naca pxuzi cabë' pxuzi guca Melquisedec.

16 Binaca Jesús pxuzi nun quie ley quie Moisés ga rguixogue'n nu familia quie ben' Israel reya'ala' gaca pxuzi, dechan' naca Jesús pxuzi nun quie biyeyudyi yedu yela' huaca quienè', tuzioli sunè'.

17 Porque cani una Diuzi rëbinè' Jesús:

Luè' naco' pxuzi tuzioli, ca guca Melquisedec pxuzi, cana' naco' pxuzi. Cana' una Diuzi dza na'.

18 Quie lena' beyula mandamiento udixu Diuzi dza na' como dan' bira ben dyin.

19 Pues binapa ley pca'n Diuzi lao na'a Moisés fuerza valor ta gaohue quiero cuenda saque' huelè Diuzi ra'o tuze. Pero lao laza ley na', dera ta nacara dya'a quiero. Pues nacara dya'a quiero chi sudyi'iléro Cristo ta gaohue quiero cuenda saque' huelè Diuzi ra'o tuze.

20 Bgunte Diuzi cuinnè' dza cati bdè'nè' Cristo gaquè' pxuzi.

21 Cati bdè' Diuzi ben' gaca pxuzi dza na'te, bibguntenè' cuinnè' ta gaca ben' bdè'nè' pxuzi. Pero cati bdè' Cristo gaquè' pxuzi, bguntenè' cuinnè' unè' quie Cristo cabè' rnèn lè'è guichi la'ia cani:

Bgunte Diuzi cuinnè', bibetza'nè', huenè' ca unè' huenè', unè':

“Luè' naco' pxuzi tuzioli, ca guca Melquisedec pxuzi, cana' naco' pxuzi.”

Cana' una Diuzi.

22 Nun quie bgunte Diuzi cana', quie lena' naca cuenda quie Cristo ta uzunè' di'idza' huenè' cabè' di'idza' bega'ntza'olè Diuzi ra'o tacubi. Lèdi'idza' na' nacaran huen ca di'idza' bega'ntza'olènè' ben' unita' tiempote.

23 Ben' zè gucajè' pxuzi quie ben' Israel tiempote, pero cati bdyin dza quiejè' gutijè', bega'n ben' tula lao lazajè'.

24 Pero como bigati Jesús, tuzioli naquè' pxuzi, ganura yega'n gaca pxuzi lao lazanè'.

25 Quie lena' huazague' uselanè' ra'o yeyoro guibá tuzioli. Nacaro ben' huelè Diuzi tuze nun quie rue quiero quie Cristo. Lena' nacan tali, como dan' tuzioli neban Cristo tu ulidzè' Diuzi tanun quiero.

26 Cani naca quie Jesús: Naquè' pxuzi r nabè'ra quiero, naquè' ben' la'ia, bide ni tu dula' xquia quienè'. Netza' quienè', binaca quienè' ca naca quie ben' rue dula' xquia. Zuè' guibá ga naquè' ben' bala'anatzegue.

27 Binaca quie Cristo cabè' naca quie yaca los demás pxuzi r nabè'ra. Yugu dza rnaban gutijè' yaca bia guixi' udyiajè'ba' lao ru'aba nacaba' gun quie Diuzi. Tanèro rnaban gutijè' tuba' udyiajè'ba' lao ru'aba ta yezi dula' xquia quiejè' cuinjè'. Na'tera gutijè' ituba' udyiajè'ba' lao ru'aba ta yezi dula' xquia quie ja ben' Israel. Pero netza' cabè' bè Cristo. Tu lasazi gutinè' guquè' cuinnè' gun quie Diuzi ta yezi dula' xquia quie yaca benèchi'.

28 Con ca naca ley pca'n Diuzi lao na'a Moisés, bdè' Diuzi ben' gaca pxuzi r nabè'ra. Pero como nacajè' benè'zi, decazi dula' xquia quiejè'. Pero netza' cabè' bè Diuzi cati bdè'nè' zi'inè' gaquè' pxuzi. Beyudyi pca'nnè' ley quienè' lao na'a Moisés, na'ra bguntenè' cuinnè' bdè'nè' zi'inè' gaquè' pxuzi r nabè'ra. Naca zi'inè' pxuzi r nabè'ra, ben' lila'adyi' tuzioli.

## 8

### *Naca Jesús ben' zèlè ra'o lao Diuzi*

1 Pero ta nacaran belao inando' le'e, nacan caniga: Zu tu pxuzi r nabè'ra quiero. Lèbè' re'nè' zaquè' yebè ga re' Diuzi guibá.

2 Ga ruenè' dyin quie pxuzi lu'u idao' zu guibá nacan dugalo ta bè Diuzi, quele ta bè ja benè'.

3 Na' bdè' Diuzi ja ben' gaca pxuzi r nabè'ra cuenda gutijè' yaca bia guixi' udyiajè'ba' lao ru'aba gacaba' gun quie Diuzi. Na' quie Jesucristo guquè'

cuinnë' gun quie Diuzi. Guca quienë' ca quie ben' bdyia cuine lao ru'aba gaca gun quie Diuzi dza cati gutinë' lë'ë yaga cruzo.

<sup>4</sup> Chi lëbë' nezuë' lao yedyi layu, bihuenë' dyin cabë' dyin rue pxuzi como dan' zu ben' naca pxuzi, ben' rudyia gun quie Diuzi lao ru'aba como ca rnën lë'ë guichi ley pca'n Diuzi lao na'a Moisés.

<sup>5</sup> Pero cabë' ruejë', ruejë' dyin quie pxuzi, cabë' na' naca quiejë' ca quie tu copia ta ulu'ezin quie idao' ta zu guibá. Neziro naca quiejë' ca quie copia como dan' cati ilë'ëti'zi rdziogue sulao Moisés huenë' idao' de la'ari', caora na' una Diuzi gudyinë' lëbë': "Una' dyë'ëdi, bë idao' de la'ari' con ca blu'ena' luë' dza na' cati ptila' luë' lao ya'a." Cana'una Diuzi gudyinë' Moisés.

<sup>6</sup> Pero Cristo, ben' naca pxuzi r nabë'ra quiero, nacaran belao dyin quie pxuzi ruenë', como dan' naquë' ben' zëlë ra'o, ben' rute di'idza' quiero lao Diuzi con ca bega'ntza'olë Diuzi ra'o tacubi ta nacaran huenra.

<sup>7</sup> Cana' naca quiero como dan' chi tali birdziogue gaohue cabë' bega'ntza'olë Diuzi ben' unita' tiempote, na'ra biben zi dza na' yega'ntza'olë Diuzi ra'o tacubi.

<sup>8</sup> Pero blë'ë Diuzi bibë quieyaquë' di'idza' bega'ntza'olë Diuzi lëjë'. Quie lena' rnën quiejë' lë'ë guichi la'iya quie Diuzi caniga:

Cani una Diuzi:

Huadyin dza yega'ntza'olia' yaca ben' Israel len ben' laguedyijë' ben' Judá tacubi.

<sup>9</sup> Huetza' cabë' di'idza' bega'ntza'olia' xuzixta'ojë' dza na' cati gualia' ulioga' xuzixta'ojë' nación Egipto ga užacazi'yaquë'.

Bibë quie xuzixta'ojë' di'idza' ca di'idza' bega'ntza'olia' lëjë'.

Quie lena' apanla'adya' lëjë'.

<sup>10</sup> Cani naca di'idza' yega'ntza'olia' ben' Israel tacubi cati idyin dza bira usanla'adya' xuzixta'ojë':

Udzi'ajë' pensari quia' lu'u guicho laxta'ojë'.

Na'ra në'ëdi' gaca' Diuzi quiejë', na' lëjë' gacajë' ben' quia'.

<sup>11</sup> Bira inaban uxi'idze'jë' quie quiejë' ca naca quia'.

Ni laguedyijë', ni bichijë', bira inaban uxi'idze'jë' lëjë' cuenda huebë'jë' në'ëdi', como dan' yugulujë' huebë'jë' në'ëdi' desde ben' gula hasta xcuidi'.

<sup>12</sup> Hueziz'ia' dula' xquia quiejë', bira yeza'la'adya' quie dula' xquia quiejë'.

Cana' una Diuzi.

<sup>13</sup> Na' cati una Diuzi yega'ntza'olënë' ra'o tacubi, cana' unë' como dan' bira hue dyin cabë' bega'ntza'olënë' ben' unita' tiempote. Na'ra tu ta bira huen dyin banacan tagula, baruen bago yeyudyi yedu quien.

## 9

### *Ni rnën quie tu idao' zu lao yedyi layu, len itun zu guibá*

<sup>1</sup> Na'ra cabë' naca di'idza' bega'ntza'olë Diuzi xuzixta'oro dza na', unënan cabë' re'en Diuzi hue ja pxuzi lu'u tu idao' de la'ari' ta zu lao yedyi layu ga uyonla'adyi'jë' lëbë'.

<sup>2</sup> Lëidao' na' nacan caniga. Tanëro zu tu cuarto laonan Lato Naca La'iya. Lëlu'unan na' zu tu candelero. Na' zërë tu mesa ga dyia yëta xtila naca la'iya.

<sup>3</sup> Ga beyudyi tu cuarto zu tanëro, na' zë itu la'ari'. Na' xcu'udzu la'ari' na' zu itu cuarto laona Lato Naca La'iyatzegue.

<sup>4</sup> Na'ra lëlu'u cuarto na' zu tu mesa dao' ga ruzejë' yalo. Lëscan' zu tu caja ga yu'u di'idza'ca di'idza' bega'ntza'olë Diuzi xuzixta'oro. Lëcaja na' duzete lë'en zu ta naca belaozi oro. Na' lu'u caja na' zu tu yeso' de oro ga yu'u yëta

xtila laona maná. Lēzi lu'u caja na' yu'u xaga quie Aarón ta bebe'zi'ine. Lēzi lu'u caja na' yu'u tu yo ta'a gan' bzu Diuzi chi mandamiento quienē'.

<sup>5</sup> Na'ra lao caja zu chopa figura quie ángel laojē' querubines. Gatzto lao' ga zē ángel, na' raca titi' cabē' raca titi' ga zu Diuzi. Na'ra rzē ángel xilajē' lao caja na' ga bzio pxuzi rñabē'ra ren quie bia naca gun quie Diuzi cuenda yezi'ze Diuzi dula' xquia quie ben' Israel. Pero dena'zi, bihue'ro di'idza' zē cabē' ta guca lu'u idao' de la'ari' dza na'.

<sup>6</sup> Pues cana' bējē' quie lu'u idao' de la' ari'. Yugu dza uyu'u ben' naca pxuzi lu'u cuarto nēro quie idao' de la'ari' ta huenē' dyin ca naca dyin quie pxuzi de quienē' huenē'.

<sup>7</sup> Na'ra cuarto urupe lu'u idao' de la'ari', na' ru'u tuzi ben' naca pxuzi rñabē'ra tu lasazi tu iza. Bē' tzu'unē' lu'u cuarto urupe, na' ruen zi quienē' hua'anē' ren quie bia guixi' naca gun quie Diuzi ta bzioquē'n lao caja ga yu'u tu yo ta'a gan' bzu Diuzi chi mandamiento quienē' cuenda yezi'ze Diuzi dula' xquia quienē' cuinnē'. Na'tera bziorēnē' ren tatula quie itu bia guixi' ta yezi'ze Diuzi dula' xquia quie ben' yedyi quienē'.

<sup>8</sup> Na' como cana' bējē', lena' nacan ta bzioñe'e Bichi Be quie Diuzi ra'o de que tu raca nezu idao' de la'ari' naca chopa cuarto, bisaque' tzu'u ja benē' lu'u cuarto naca la'iyatzegue, ta inaro bisaque' tzu'uro ga zu Diuzi.

<sup>9</sup> Yugu cabē' ta bējē' lu'u idao' de la'ari' nacan tu ejemplo ta uzioñe'en ra'o cabē' naca quiero na'a. La'acazi bētijē' bia guixi' nacaba' gun quie Diuzi, la'acazi bziojē' ren quieba' lao ru'aba, biuzaque' yecubin pensari quiejē' ta tzu'ujē' pensari ca pensari re'en Diuzi tzu'u ben' rionla'adyi' lēbē'.

<sup>10</sup> Cabē' naca quie yaca bia guixi' naca gun quie Diuzi bēti ja pxuzi, lena' rguixogue'n quie ta gaoro len ta yo'oro. Rguixogue'n quie ta huero yēri cuinro lao Diuzi conlē nisa. Yugu len rguixogue'n quie bē'ēla' zuba' quiero cabē' rñabē'n ra'o hasta dza cati yetza' Diuzi len.

<sup>11</sup> Pero na'a babida Cristo. Naquē' pxuzi rñabē'ra quiero. Bēnē' quiero guca tahuen quiero con cabē' baraca quiero na'a. Ca naca lu'u idao' ga zu Cristo guibá ruenē' dyin quie pxuzi, nacaran huenra, nacaran dugalo idao'. Binaca idao' bē benē', ta inaro binaca idao' zu lao yedyi layu.

<sup>12</sup> Na'ra cati uyu'u Cristo lu'u cuarto urupe ga naca la'iyatzegue, cala bi'anē' ren quie chibo ni ren quie bēdyihuagadao', dechan' ren quienē' cuinnē' bi'anē'. Cana' bēnē' quiero yuguluro, uyu'unē' tu lasazi lu'u cuarto urupe ga naca la'iyatzegue, bēnē' gan gata' yela' neban quiero tuzioli.

<sup>13</sup> Na'ra tali na' de fuerza valor quie ren quie bēdyihuaga len ren quie chibo ta uzio ja pxuzi len ta yeyuen yēri lao Diuzi yaca ben' uditulē ta naca žudyi. Lēscan' de fuerza valor quie de quie tu bēdyihuagadao', bia bzejijē' lao ru'aba ta uziojē'n lao benē' ta yeyuen lējē' yēri lao Diuzi. Pero quie bē'ēla' zuba'zi quiejē' huazuen huen lējē' yēri lao Diuzi. Biuzaque'n yeyuen yēri pensari quiejē' lao Diuzi.

<sup>14</sup> Pero dera mazara fuerza valor quie ren quie Cristo. Du racalē Bichi Be quie Diuzi lēbē', psedyinnē' cuinnē' guquē' tu gun quie Diuzi ca naca bia guixi' guti ja pxuzi gun quie Diuzi. Pero naca Cristo gun quie Diuzi ta dya'atzegue, ta bidyia ni tu nidyi'. De fuerza valor quie ren quienē' yeyuen yēri pensari quiero lao Diuzi ta bira inao dula' xquia quiero ra'o, na' tzionla'adyi'ro lēbē', ben' neban tuzioli.

<sup>15</sup> Quie lena' naca Cristo ben' zēlē ra'o, ben' rute di'idza' quiero lao Diuzi con cabē' naca di'idza' bega'ntza'olē Diuzi ra'o tacubi. Nun quie guti Cristo lē'ē yaga cruzo, de lato ta yezi'ze Diuzi dula' xquia quie ja ben' unita' dza na', ben' xuzixta'oro, ben' bega'ntza'olē Diuzi tanēro. Lēscan' nun quie guti Cristo lē'ē yaga cruzo, de lato ta hue' Diuzi lējē' yela' neban tuzioli, ta inaro

ben' bdë'në' gaca ben' quienë'. Hue' Diuzi lëjë' yela' neban tuzioli con cabë' bega'nlënë' lëjë' di'idza' dza na'.

<sup>16</sup> Caora de tu acta de cancelación, solamente cati gatira ben' ulisa acta, na'tera hue dyin acta na'.

<sup>17</sup> Tu neneban ben' ulisa acta, bisaque' quisi ben' tula ta de quienë'. Pero cati agutinë', na'ra huazaque' quisijë' ta de quienë' según cabë' nan lë'ë guichi.

<sup>18</sup> Pues lente di'idza' bega'ntza'olë Diuzi xuzixta'oro tanëro, ben zi ulatojë' ren ta ulu'en rue di'idza' na' lëjë' mandado.

<sup>19</sup> Dza na' udixogue' Moisés lao ja ben' Israel cabë' naca yugu mandamiento pca'n Diuzi lao na'anë'. Na'tera ude beyudyi na', uzi'në' tu zi'ila' zna len tu taca' yaga laona hisopo, na' psebisane' len lu'u nisa nequixi ren quie bëdyihuagadao' len ren quie chibo. Na'ra bzionë'n lao guichi ley quie Diuzi. Lëscan' bzionë'n lao ja ben' Israel.

<sup>20</sup> Caora na' una Moisés gudyinë' lëjë': "Lëren niga nacan ta ulu'en ra'o de que di'idza' na' ruen ra'o mandado. Nacan di'idza' bega'ntza'olë Diuzi ra'o."

<sup>21</sup> Lëscan' bziorë Moisés ren lu'u idao' de la'ari' lente ta de lu'una.

<sup>22</sup> Según cabë' na lë'ë guichi ley quie Diuzi, casi yugu ta de quiejë', bisaque' gacan yëri lao Diuzi chi bibzio pxuzi ren laona. Pues ta yezi'ze Diuzi dula' xquia quiejë', ruen zi ilato ren.

### *Naca Cristo gun quie Diuzi gutinë' udubanë' dula' xquia quie ja benë'*

<sup>23</sup> Ben zi dza na' guti ja pxuzi yaca bia guixi' udyiajë'ba' lao ru'aba ca gun quie Diuzi cuenda yeyuen yëri idao' de la'ari' len ta de lu'una. Lena' nacan ca quie copia quie ta de guibá ga zu Diuzi. Pero tacuenda saque' yeyo benë' guibá ga zu Diuzi, ruen zi gati tu ta zaca' mazara ca yaca bia guixi'.

<sup>24</sup> Biuyu'u Cristo lu'u idao' de la'ari' ta bë ja benë' ta nacan copia quie tu idao' dugalo zu guibá, dechan' uyu'unë' ga zu cuin Diuzi guibá. Na' beyu'unë' zuë' naquë' ben' zëlë' ra'o, ben' rute di'idza' quiero lao Diuzi cuenda gacalënë' ra'o.

<sup>25</sup> Na' dza na' uyu'u pxuzi r nabë'ra quie ben' Israel lu'u cuarto naca la'iyatzegue tu lasazi lao tu iza ta bzionë' ren binaca ren quienë' lao caja ga yu'u ley quie Diuzi. Pero bibë' Cristo cana'. Tu lasazi para tuzioli guquë' gun quie Diuzi gutinë' lë'ë yaga cruzo.

<sup>26</sup> Chan' bë Cristo cabë' bë pxuzi na', na'ra ruen zi gati Cristo tazë lasa desde dza cati udixu Diuzi yedyi layu. Pero binacan cana'. Cani nacan na'adza dza ruen bago iyudyi yedu quie yedyi layu: Babida Cristo lao yedyi layu guquë' gun quie Diuzi gutinë' lë'ë yaga cruzo tu lasazi para tuzioli ta udubanë' dula' xquia quie yugulu benë'chi'.

<sup>27</sup> Porque cabë' una Diuzi huenë' quie ja benë', unë' tanëro idyin dza gatijë', pero tu lasazi, na'tera ichuguli Diuzi quiejë'.

<sup>28</sup> Lëscan' quie Cristo, tanëro guquë' gun quie Diuzi gutinë' lë'ë yaga cruzo, pero tu lasazi gutinë', na' udubanë' dula' xquia quie ben' zë gula. Na'tera yeguidë' tatula, pero cala ta cubanë' dula' xquia quie ja benë', den' ta uselanë' nu ben' rbeza ja lëbë' yeguidë'.

## 10

<sup>1</sup> Porque naca ley pca'n Diuzi lao na'a Moisés tiempote ca quie tu ta ulu'en ra'o cabë' una Diuzi bi huenë' ta huenë' dya'a quiero dza zaza'ra. Binaca ley na' mero tadya'a re'en Diuzi huenë' quiero. Derla tadya'a re'en Diuzi huenë' quiero. Bide fuerza valor quie ley na' ta yeyuen benë' yëri lao Diuzi,

ba'ala'cazi bëtijè' bia guixi', bia naca gun quienè', bziojè' ren quieba' lao ru'aba lao tu iza huio.

<sup>2</sup> Chi tali huaca yeyuejè' cuinjè' yèri lao Diuzi nun quie dan' bëtijè' tu bia guixi', bia naca gun quie Diuzi, bira inaban gutijè' bia tula. Pues chi tali abeduba dula' xquia quiejè' tuzioli, bira idèbijè' chi napajè' dula' xquia.

<sup>3</sup> Pero cati bëtijè' bia guixi', bia naca gun quie Diuzi, bziojè' ren quieba' lao ru'aba lao tu iza huio, lena' nacan ta yeza'la'adyi'jè' napajè' dula' xquia.

<sup>4</sup> Cana' nacan como dan' bisaque' yeduba dula' xquia quie benè' conlè ren quie bèdyihuaga, o conlè ren quie chibo.

<sup>5</sup> Quie lena' cati bida Cristo lao yedyi layu unè' gudyinè' Diuzi:

Bisulo' gusto caora cati guti ja benè' bia guixi', bia naca gun quio', udyiajè'ba' lao ru'aba, chi bihue quiejè' cabè' nao'.

Pero babzalolo' benlo' tu cuerpo quia' ta ta' lao yedyi layu hue quia' cabè' nao'.

<sup>6</sup> Biraxelo' ca ruejè' gutijè' bia guixi' naca gun quio', udyiajè'ba' lao ru'aba uzejè'ba' cuenda yeduba dula' xquia quiejè', chi bihue quieyaquè' cabè' nao'.

<sup>7</sup> Quie lena' agudya' luè' dza na':

"Ni zua', zua' dispuesto hue quia' cabè' re'leno' luè', Diuzi.

Cabè' rguixogue'n quia' nè'èdi' lè'è guichi la'iya quio', cana' hua', hue quia' di'idza' quio'."

Cana' una Cristo dza na'.

<sup>8</sup> Tanèro rguixogue'n quie Diuzi de que biraxenè' hue' ja benè' tu gun quienè', nica raxenè' gutijè' bia guixi' gaca gun quienè', nica raxenè' udyiajè' bia guixi' lao ru'aba uzejè'ba' cuenda yeduba dula' xquia quiejè', chi bihue quieyaquè' xti'idzè'. Biraxe Diuzi huejè' cana', ba'ala'cazi cana' rnabè'n lè'è guichi ley quie Diuzi ta huejè'.

<sup>9</sup> Quie lena' rnèn rnan cani: "Ni zua', zua' dispuesto hue quia' cabè' re'leno' luè', Diuzi." Cana' udixogue'nè' ra'o bira zaca'n cabè' bè ja ben' unita' tiempote bëtijè' bdyiajè' bia guixi' lao ru'aba. Lao laza lena' udixu Diuzi ta naca tacubi cati guti Cristo lè'è yaga cruzo, guquè' gun quie Diuzi, bè quienè' xti'idza' Diuzi.

<sup>10</sup> Banuela'iya Diuzi ra'o nun quie bzu Jesucristo di'idza' ca mandado una Diuzi huenè' caora cati psedyinnè' cuinnè', guquè' gun quie Diuzi, gutiè' lè'è yaga cruzo tu lasazi para tuzioli.

<sup>11</sup> Yugu dza rzè yaca pxuzi quie ben' Israel ruejè' cabè' dyin napajè' quie idao'. Yugu dza rutijè' bia guixi' rudyiajè'ba' lao ru'aba ruzejè'ba', la'acazi conlè lèba' biyeduba dula' xquia quie ben' Israel.

<sup>12</sup> Pero Jesucristo guquè' gun quie Diuzi gutinè' lè'è yaga cruzo ta yeduba dula' xquia quie ja benè' tu lasazi para tuzioli. Na'tera yere'nè' zaquè' yebè ga re' Diuzi guibá.

<sup>13</sup> Na' zuè' rbezanè' dza cati hue Diuzi castigo yugulu ben' rudie lèbè'.

<sup>14</sup> Porque dan' guquè' gun quie Diuzi, gutinè' lè'è yaga cruzo, cana' beyuenè' yèri para tuzioli ja ben' bdè' Diuzi gaca ben' quienè'.

<sup>15</sup> Pues nuxela'adyi' Bichi Be quie Diuzi ra'o de que nacan tali con cabè' unanè', con cabè' rnan lè'è guichi la'iya cani:

<sup>16</sup> Cani naca di'idza' yega'ntza'olia' ben' Israel tacubi cati idyin dza bira usanla'adya' xuzixta'ojè'.

Udzi'a pensari quia' lu'u guicho laxta'ojè'.

<sup>17</sup> Biyeza'la' adya' ca naca dula' xquia quiejè', nica ca naca tamala babèjè'. Cana' una Bichi Be quie Diuzi dza na'.



18 Pues cani nacan: Cati abezi'ze Diuzi dula' xquia quiero, bira ruen zi guti ja pxuzi ja bia guixi' ta naca gun quie Diuzi ta yezi'zené' dula' xquia quiero tatula.

*Reya'ala' tzionla'adyi'ro Diuzi du guicho du la'adyi'ro*

19 Quie lena', bicha', huazaque' yeyoro ga naca la'iyatzegue ga zu Diuzi biidzebiro, porque guti Jesucristo lé'è yaga cruzo ulato ren quiené'.

20 Huero seguir inaoro neza cubi quiero, porque chi inaoron, cana' gata' yela' neban quiero tuzioli. Cabé' uyo pxuzi xcu'udzu la'ari' ga naca la'iyatzegue dza na', cana' huazaque' yeyoro ga zu Diuzi nun quie psalo Cristo neza cubi quiero cati gutiné' lé'è yaga cruzo.

21 Naca Jesús pxuzi rnabé'ra quiero. Naqué' ben' rnabé'ra lao yugulu ja ben' nao xnezé'.

22 Quie lena' reya'ala' tzionla'adyi'ro Diuzi du guicho du la'adyi'ro sudyi'ilérogué' yugo dza. Lébè' beyuené' yèri guicho laxta'oro. Cana' neziro dyé'èdi baozi'zené' quie dula' xquia quiero, gabira dula' xquia quiero de. Nacaro yèri lao Diuzi ca quie ben' bagozo yao len nisa yèri gula.

23 Huero seguir biusanla'adyi'ro hue quiero quie Diuzi, rbezaro dyé'èdi dza cati hue Diuzi quiero cabé' uné' huené' quiero, como dan' uzucazi Diuzi di'idza' cabé' di'idza' bega'nlné' ra'o.

24 Reya'ala' hue'lèro laguedyiro, ben' nao xneza Cristo, di'idza' zela'adyi' ta gacalèrojé' ta idyè'èjé' bené' huejé' puro ta yu'u ni'a xnezi.

25 Bireya'ala' usanro yeduparo tzionla'adyi'ro Diuzi cabé' naca costumbre quie bala ja bené', bapsanjé' bira guidajé' dza cati yeduparo. Reya'ala' hue'lèrojé' di'idza' zela'adyi' ta biyeyatijé' como dan' baruen bago idyìn dza cati yeguida Cristo lao yedyi layu tatula.

26 Porque cati baneziro con cabé' rna di'idza' li quie Diuzi, pero chi huero seguir huero tamala, na' bisaque' inaro bineziro tamala. Chi huero cana', huero seguir huero tamala, na'tera bira bide bi hue Diuzi ta yezi'zené' dula' xquia quiero.

27 Tuz ta huené', huené' castigo huala gula nu ben' rue cana', tzejijé' lao gui' ta ra'ala' batzani' gula ga cuiagui' ben' rue condre Diuzi.

28 Na'ra dza tiempote cati uzu nu ben' uru'un tzala'la di'idza' ley pca'n Diuzi lao na'a Moisés, chi uzu nu chopo o nu tzona ben' guca testigo, ben' nezi tali bē ben' na' tamala, caora na' uchuguli yaca ben' rnabé' quiené' ta gutijé' lèbè', bibeyèchi'la'adyi'jé' biuzi'zejé' quiené'.

29 Pues ¿bica inale quie ben' reru'un tzala'la zì'i Diuzi? ¿Bica inale quie ben' rutitu lèbè' inajé': "Bibi zaca' dan' gutiné' lé'è yaga cruzo ulato ren quiené'?" Nedyè'è Bichi Be quie Diuzi yugulu bené', na'ra ¿bica inale quie ben' rutasi runio Bichi Be quiené'? ¿Quele mazara castigo huala gula reya'ala' gaca quiejé'? Pues bira raxejé' tu ta beyue lèjé' yèri lao Diuzi dza na'. Pues nun quie guti Cristo lé'è yaga cruzo ulato ren quiené', lena' nezcaziro nacan tali hue Diuzi quiero cabé' tadya'a uné' huené' quiero. Pues bira raxejé' tu ta beyuen lèjé' yèri lao Diuzi dza na'.

30 Dyé'èdi neziro Diuzi na' uné' caniga: "Cuenda quia' na' hua' bené' castigo. Huaguizuga'jé' quie tamala bèjé'." Lèscan' una Diuzi: "Né'èdi' ichugulia' quie yaca ben' nao xneza'."

31 Nacan ta idzebitzegue ja bené' cati hue Diuzi lèjé' castigo.

32 Pero bigala'adyi'le cabé' guca quiele dza na', dza cati zaozulaole unaole xneza Cristo. Dyé'èdi uzele bèle gan cabé' tazèdi gula guca quiele bedzagalatzeguele.

<sup>33</sup> Pues dza na' ptasi bnio ja benë' le'e. Psacajë' bala le'e bizinaquezi zaca'lao lao ja ben' yedyi quiele. Lëscan' ibala le'e guca quiele bedzagalaole cabë' bedzagalao laguedyile.

<sup>34</sup> Dyë'ëdi beyëchi'la'adyi'le laguedyile, ben' nao xneza Cristo, ben' de lu'u dyiguiba. Lëscan' hasta uzule gusto uzuele bë' uduba ja benë' ta de quiele, como dan' nezile dera ta de quiele guibá ta nacara huen gula ta biyeyudyi yedu quie.

<sup>35</sup> Biusanle sudyi'ilële Diuzi, porque huata' tadya'a gula guibá quie ben' rzudyi'ilë lëbë'.

<sup>36</sup> Pues le'e bireya'ala' yeyatile huele ca re'en Diuzi huele. Cana' idyin dza hue Diuzi tadya'a quiele cabë' unë' huenë' quiele.

<sup>37</sup> Lena' rnën lë'ë guichi la'iya quie Diuzi cani:

Iledao'zi idyin dza cati guida ben' guida, pero bitzenë' guidanë'.

<sup>38</sup> Nu ben' rzudyi'ilë në'ëdi', gata' yela' neban quienë' tuzioli.

Pero chi usannë' bira inaonë' xneza', bisua' gusto conlë lëbë'. Cana' una Diuzi.

<sup>39</sup> Pero ra'o binacaro ben' usan, ben' bira inao xneza Diuzi. Binacaro ben' cuiagui' tuzioli. Dugalo nacaro ben' rue quie quie Diuzi. Nacaro ben' sue hue gan gata' yela' neban quie tuzioli.

## 11

### *Cabë' naca quie ben' rzudyi'ilë Diuzi*

<sup>1</sup> Cati sudyi'ilëro Diuzi nezïro du guicho du la'adyi'ro huenë' tadya'a quiero cabë' rbezaro huenë' quiero. Lëscan' cati sudyi'ilëro Diuzi nužela'adyi'ro nacan tali zuë' rnabë'në' la'acazi bisaque' ilë'ëroguë'.

<sup>2</sup> Yaca xuzixta'oro, ben' unita' tiempote, uzu Diuzi gusto conlë lëjë' nun quie bë' quieyaquë' quienë'.

<sup>3</sup> Nun quie dan' rzudyi'ilëro Diuzi nezïro dyin bë' Diuzi bzalonë' bënë' yugulu ta de žan guibá tiempote. Conlë fuerza valor quie xti'idza'në', cana' guta'n. Conlë ta bisaque' ilë'ëro, bënë' bzaloguë' tu ta ilë'ëro na'a.

<sup>4</sup> Nun quie uzudyi'ilë Abel Diuzi, bë'në' Diuzi tu gun nacara dya'ara, quele cabë' naca gun ta bë' bichinë' Caïn Diuzi. Quie lena' blë'ë Diuzi Abel ben' laxta'o yëri, uzi'në' gun quienë'. Na'ra la'acazi aguti Abel, nenaquë' tu ejemplo cabë' reya'ala' huero, reya'ala' sudyi'ilëro Diuzi cabë' uzudyi'ilë Abel Diuzi.

<sup>5</sup> Nun quie dan' uzudyi'ilë Enoc Diuzi, bezi' Diuzi lëbë' zeyoguë' guibá bigutinë'. Nun quie bezi' Diuzi lëbë', bira bedzele yaca benë' lëbë'. Rnën lë'ë guichi la'iya quie Diuzi de que tu binesi' Diuzi lëbë', lega yaxë Diuzi lëbë' cabë' bënë'.

<sup>6</sup> Chi bisudyi'ilëro Diuzi, bisaque' tzaxe Diuzi ra'o cabë' ruero, porque ta tzionla'adyi'ro Diuzi, ruen zi galero zunë', ruen zi galero huenë' tahuen quie nu ben' nao xnezë'.

<sup>7</sup> Nun quie dan' uzudyi'ilë Noë Diuzi, bzunë' di'idza' ca di'idza' gudyi Diuzi lëbë', bënë' tu barco že gula cuenda te ilanë' len yaca familia quienë' como dan' gudyi Diuzi lëbë' huaca juicio lao yedyi layu, huaca juicio ca juicio ta binelë'ëjë'. Nun quie dan' uzudyi'ilë Noë Diuzi, udixogue'në' yaca ben' unita' dza tiempote hue Diuzi lëjë' castigo. Cana' blë'ë Diuzi Noë ben' laxta'o yëri nun quie uzudyi'ilënë' Diuzi.

<sup>8</sup> Nun quie dan' uzudyi'ilë Abraham Diuzi, bzunë' di'idza' dza cati gudyi Diuzi lëbë' ta uzë'ë yedyi quienë' zioaguë' ga tula ga de layu hue' Diuzi lëbë' gaque quienë'. Ba'ala'cazi binenezinë' ga ise'ela' Diuzi lëbë', pero uzë'ë zioaguë'.

9 Nun quie dan' uzudiyi'ilë Abraham Diuzi, uzunë' ga de layu una Diuzi hue'në' quienë', pero uzunë' na' ca quie binaquen quienë', ca quie ben' zu yedyi binaca yedyi quie. Puro lu'u yu'u de la'ari'zi uzunë'. Lëscan' cabë' bë Abraham, cana' bërë zi'inë' Isaac, cana' bërë zi'isubanë' Jacob. Lëscan' conlë lëjë' bega'nlë Diuzi lëjë' di'idza' huadyin dza hue'në' lëjë' gaque quiejë' layu ga zujë'.

10 Cana' bë Abraham, porque ulezanë' dza cati yeyoguë' ga zu Diuzi, ga zu tu yedyi ta biyeyudiyi yedu quie, yedyi ta bë cuin Diuzi.

11 Lëscan', hasta nigula quienë' Sara, nun quie dan' uzudiyi'ilënë' Diuzi, bë' Diuzi lëbë' fuerza gucanë' zna' bdao', la'acazi abgulanë' aode tiempo quienë' ta hua'anë' bdao'. Bzucazi Diuzi di'idza' ca di'idza' bega'nlënë' lëbë', gucalënë' lëbë' ta ila' tu xcuidi' byu quienë'.

12 Lëscan' Abraham, ba'ala'cazi abgulë' banapë' zë iza, ba'ala'cazi ganu zi'inë' uzu, pero bdyincazi dza golo tu zi'inë', bi'inita' zi'isube zë gula. Quie lena' uzu di'idza' unita' zi'isubanë' tazë gula. Nita'jë' ca quie bélo dyia guibá, nita'jë' ca quie yožo re' ru'a yao ze, bisaque' ulabaron. Cana' nita' zi'isuba Abraham.

13 Na'ra lëben' uzudiyi'ilë Diuzi agutijë' yugulujë'. Binehue Diuzi quiejë' cabë' unanë' huenë' quiejë', pero como uzudiyi'ilëjë' Diuzi, cana' nuzela'adyi'jë' idyincazi dza hue Diuzi quiejë' cabë' unanë' huenë' quiejë'. Cana' bedaohuejë' unajë' ca naca pensari quiejë', unezijë' bisujë' lao yedyi layu tuzioli.

14 Quie yaca ben' una cana', rulu'en quiejë' dyë'ëdi rbezajë' yeyojë' sujë' ga naca quiejë'.

15 Pero bibdëbijë' quie layu ga brojë' uza'jë', porque chi bdëbijë' quie layu na', bebi'jë' bedyinjë' ga uza'jë'.

16 Pero gu'unjë' tziojë' tzesujë' ga nacatera dya'a, ta inaro gu'unjë' tziojë' tzesujë' guibá ga zu Diuzi. Quie lena' redaohue Diuzi cati inajë' naquë' Diuzi quiejë'. Pues banuetza'o Diuzi tu ciudad guibá ga sujë'.

17 Nun quie uzudiyi'ilë Abraham Diuzi, uquië'në' zi'inë' Isaac ta gutinë'bi' udyianë'bi' lao ru'aba ca gun quie Diuzi dza cati bë Diuzi lëbë' tu prueba chi tali hue quienë' ca una Diuzi lëbë'. Uzunë' dispuesto ta gutinë' tu litza' zi'inë' Isaac, la'acazi bega'nlë Diuzi lëbë' di'idza' dza na' cati unë' gudyinë' lëbë' cani:

18 "Lao na'a zi'ilo' Isaac huanita' ja zi'isubo'."

19 Na'ra gule Abraham napa Diuzi poder ta yesebannë' ben' huati. Huazaque' inaro guca quie Abraham len zi'inë' como si fuera beseban Diuzi zi'i Abraham caora bezi'në' zi'inë' tatula nebambi'.

20 Nun quie dan' uzudiyi'ilë Isaac Diuzi, bëla'iya Isaac zi'inë' Jacob len zi'inë' Esau gudyinë' lëjë' cabë' gaca quiejë' dza zaza'ra.

21 Lëscan' nun quie dan' uzudiyi'ilë Jacob Diuzi, bëla'iya Jacob ja zi'i José dza cati anapë' iza baruen bago gatinë', uyonla'adyi'në' Diuzi pquichinë' xaga quienë' layu ta gucalën lënë' ta zënë'.

22 Nun quie dan' uzudiyi'ilë José Diuzi, udixogue'në' ben' Israel idyincazi dza yerojë' sa'jë' nación Egipto, bënë' lëjë' mandado cuiojë' chita quienë' hua'ajë'n dza cati sa'jë'. Cana' udixogue' José lëjë' dza cati baruen bago gatinë'.

23 Nun quie dan' uzudiyi'ilë xuzi zna' Moisés Diuzi, pcachi'jë' lëbi' tzona biu' dza cati golobi', como dan' blë'ëjë' naca bdao' na' badan gula. Na'ra bibdëbijë' rey quie ben' Egipto, como dan' bë rey na' mandado gati yugulu bdao' byu quie ben' Israel.

24 Nun quie dan' uzudyi'ilë Moisés Diuzi, bigu'unne' ilë'e ja benë' lëbë' ca zi'i nigula, ben' naca zi'i rey quie ben' Egipto cati bgulanë' guquë' ben' huaca.

25 Quie lena' uzunë' dispuesto ta yedzagalaonë' gacalënë' ben' yedyi quienë' tuze. Uzunë' dispuesto yedzagalaonë', bigu'unne' inaohue' neza mala quie ben' Egipto.

26 Unezinë' nacaran huenra yedzagalaonë' cabë' bedzagalao Cristo, ta inaro uzunë' dispuesto hue ja benë' lëbë' bizinaquezi cuenda gacalënë' ben' Israel, bigu'unne' gaca quienë' yela' uña'a ta de quie ben' Egipto. Quie lena' bigulenë' quie ben' Egipto, como dan' unezinë' cabë' tahuenra de ta hue' Diuzi lëbë'.

27 Nun quie dan' uzudyi'ilë Moisés Diuzi, bzunonë' nación Egipto, pero bibdzebinë' bdza' rey quie ben' Egipto lëbë'. Uzunenë' como nuebë'në' Diuzi, ben' birzaque' ilë'ëro.

28 Nun quie dan' uzudyi'ilë Moisés Diuzi, udixonë' lani pascua bënë' mandado bzio ben' Israel ren quie beco' zi'ila' ru'a yu'u quie zan yu'u quie quiejë', como dan' use'ela' Diuzi tu ángel ta gutinë' xcuidi' byu nëro quie nu ben' bibzio ren ru'a yu'u quie.

29 Nun quie dan' uzudyi'ilë ben' Israel Diuzi dza na', udejë' ga de nisadao' laona Nisadao' Zna dza na'te. Uyalo tu neza ga udejë' lu'u nisa beyacan layu bidyi. Na'ra cati gu'un ja benë' Egipto terëjë' cabë' ude ben' Israel, bedaco' nisa lëjë' gutijë'.

30 Nun quie dan' uzudyi'ilë ben' Israel Diuzi dza na', byala ja besu ta naca sibi ta neyëcho ru'a ciudad Jericó caora cati beyudyi uyëchojë' ru'a lao ciudad lao gadyi dza cabë' mandado bë Diuzi huejë'.

31 Lëscan' tu nigula bëti' gusto quie, ben' lao Rahab, nun quie dan' uzudyi'ilënë' Diuzi, bigutinë' dza na' caora cati bdyiagui' ben' Israel ben' yedyi quienë', ben' bigu'un hue quie cabë' una Diuzi. Biguti nigula na' nun quie gucalënë' chopa ben' Israel, ben' uyo balarazi ta yena'jë' ca naca ciudad Jericó.

32 ¿Ca bizira ta inia' le'e? Bide tiempo ta inia' le'e quie Gedeón, quie Barac, quie Sansón, quie Jefté, quie rey David, quie Samuel, quie yaca profeta, ben' udixogue' xti'idza' Diuzi tiempote.

33 Nun quie dan' uzudyi'ilëjë' Diuzi, bëjë' gan bëtijë' yaca enemigo quiejë' cati udilalëjë' lëjë', bëjë' gan unabë'jë' lao ja yedyi quiejë', bëjë' gan gucalë Diuzi lëjë' cabë' una Diuzi huenë' quiejë', bëjë' gan bibi guca quiejë' cati gu'un yaca león qui'imba' lëjë',

34 bëjë' gan besulajë' gui' ta raca gui' bela, bëjë' gan ulajë' lao na'a ben' re'en guti lëjë' conlë espada. Lëscan' yaca ben' bdzebi dza na', bibedzebijë' cati gucadilalëjë' ja soldado quie ben' yedyi tula.

35 Lëscan' guca quie bala nigula unita' dza na' bezi'jë' ben' huati quiejë' tatula nebanjë'.

Pero unita' ja ben' tula guticazijë'. Udi benë' lëjë' hasta gutijë', pero bipsanjë' unaojë' xneza Diuzi cabë' gu'un ben' udi lëjë'. Cana' gutijë', pero unezijë' huadyin dza useban Diuzi lëjë' sujë' guibá ga nacaran huen gula.

36 Na'ra balajë' ptitu ja benë' lëjë'. Ibalajë' udi ja benë' lëjë' guidi. Ibalajë' pquio ja benë' lëjë' caden, bdze'jë' lëjë' lu'u dyiguiba.

37 Ibalajë' bëti ja benë' lëjë' con yo. Ibalajë' uchugu ja benë' lëjë' conlë serucho gucajë' chopa yo'o. Ibalajë' bëjë' lëjë' bizinaquezi cuenda usanjë' bira inaojë' xneza Diuzi, na' bëtijë' lëjë' con espada. Ibalajë' udajë' ni'nizi, gucojë' zaba beco' zi'ila', gucojë' zaba chibo. Bibi guta' quiejë', guca zëdi gula quiejë'. Psaca benë' lëjë' bizinaquezi.

<sup>38</sup> Bibizaca' ja ben' nita' lao yedyi ta inita'lējē' lējē' tuže. Cana' guca quiejē' udajē' ni'nizi ga naca lato dachi, udajē' ni'nizi lao ya'a, udajē' ni'nizi ga zu beló.

<sup>39</sup> Na'ra lējē', ba'ala'cazi uzudyi'ilējē' Diuzi, lēscan' ba'ala'cazi uzu Diuzi gusto cabē' hējē' dza na', biuzi'jē' quiejē' yugulu cabē' tadya'a unē Diuzi hue'nē' quiejē'.

<sup>40</sup> Nerdziogue hue Diuzi tadya'a quiejē', porque unanē' huenē' tadya'a quiejē' tuže len ra'o, ben' laxta'o yēri, ben' la'iya, ben' bide dula' xquia quie. Lena' nacaran huen hue Diuzi tadya'a quiero tuže len lējē' guibá ga zuē'.

## 12

### *Reya'ala' inaoro xneza Cristo du guicho du la'adyi'ro*

<sup>1</sup> Quie lena' como nita' ben' zē gula, ben' bablu'e ra'o cabē' uzudyi'ilējē' Diuzi dza na', reya'ala' usanla'adyi'ro yugu ta rudzun ra'o inaoro xneza Cristo. Lēscan' reya'ala' usanla'adyi'ro bira huero tamala cabē' nequionan ra'o bire'ennan huero tahuen. Reya'ala' inaoro xneza Cristo du guicho du la'adyi'ro, biyeyatiro huero ca udixu Diuzi quiero huero.

<sup>2</sup> Reya'ala' huero cuenda cabē' re'en Jesús huero. Naca Jesús ben' naca ejemplo belaotera quiero cabē' reya'ala'huero sudyi'ilēro Diuzi. Ganura zu ben' uzudyi'ilē Diuzi ca lēbē'. Bibdēbinē' nacan yela' stu' quie ben' gati lē'ē yaga cruzo. Uzuē' dispuesto bedzagalaonē' gutinē' lē'ē yaga cruzo, como dan' nezinē' caora cati beyudyi bedzagalaonē', huapala'n Diuzi lēbē' tzeque'nē' zaquē' yebē ga re' Diuzi guibá.

<sup>3</sup> Reya'ala' huele pensari cabē' bē Jesús uzuenē' cabē' tamala psacayudyi ben' mala lēbē'. Lena' gacalēn le'e ta biyehuēdile biyeyatile inaole xnezē'.

<sup>4</sup> Pues le'e, nica guti ja benē' le'e nun quie rnaole xneza Cristo. Nica guti ja benē' le'e nun quie bira re'enle huele tamala cabē' lējē'.

<sup>5</sup> ¿Quele agula'adyi'le cabē' rnēyue Diuzi le'e nacale ca zi'inē'? Lena' rnēn lē'ē guichi la'iya quie Diuzi caniga:

Zi'ina', bihuele pensari chi bibi zaca'n caora cati rdila Diuzi luē'.

Biyeyatile caora cati hue Diuzi luē' castigo.

<sup>6</sup> Porque rdila Diuzi nu ben' nedyē'ēnē', rdila Diuzi yugu ben' naca zi'inē', huenē' lējē' castigo cati biralejē' quienē'.

Cana' una Diuzi dza na'.

<sup>7</sup> Na'ra rnia' le'e biidza'le bē' rue Diuzi le'e castigo cati biralele quienē', como dan' ca zi'inē' ruelēnē' le'e. ¿Binezile bizu xcuidi' birue xuzibi' lēbi' castigo cati biralebi' quienē'?

<sup>8</sup> Pero chí birdila Diuzi le'e cabē' rdila Diuzi yugu ben' naca zi'inē', lena' ulu'en nacale ca quie xcuidi' tu yo, binezibi' nu naca xuzibi'.

<sup>9</sup> Cati nenacaro xcuidi', caora na' udila xuziro ra'o gulero quienē' udaparonē' bala'ana. Quie lena', ¿quele rnabē'ran quiero galero cabē' na Xuziro Diuzi zu guibá cuenda gata' yela' neban quiero tuzioli?

<sup>10</sup> Cati bigulero quie xuziro dza na', udilanē' ra'o según ca guquenē' nacan huen quiero, però tuzi dza nenacaro xcuidi' udilanē' ra'o. Però Diuzi rdilanē' ra'o cati biralero quienē' yugu dza rdaro lao yedyi layu cuenda tali gaca huen quiero, gacaro ben' la'iya ca naquē' ben' la'iya.

<sup>11</sup> Tali na' bisuro gusto cati racaro castigo, raquero zi' ca nacan. Però ude beyudyi gucaro castigo, chí tali aoyoñe'ero, bira huero cabē' tamala bēro. Lena' gacalēn ra'o huero puro ta yu'u ni'a xnezi suro gusto.

### *Nacan zudyi chu'unro tzala'la cabē' rna Diuzi ra'o*

<sup>12</sup> Quie lena' biyehuēdile huele fuerza ni'a na'ale.

13 Huele lucha ta unaole neza li quie Cristo. Cana' yezi' fuerza ni'a na'ale tale dyë'ëdi.

14 Huele bala ta sulële yugulu benë' dyë'ëdi. Lëscan' huele bala ta gacale ben' rue quie quie Diuzi, como dan' chi bihue quie quie Diuzi, bisaque' ilë'ële Cristo tzesulënenë' tuze.

15 Gapale cuidado cuenda ni tule bigaca quiele bihuela'iya Diuzi le'e nun quie binaole xnezë' du guicho du la'adyi'le. Lëscan' gapale cuidado bihuele lato su nu ben' bire'en usan dula' xquia quie ladole, porque huenë' quiele ca rue tu guixi' naca veneno, udyiagui'në' yaca los demás ben' nao xneza Cristo.

16 Lëscan' ni tu le'e, bireya'ala' gasilële nigula binaca nigula quiele. Lëscan' bireya'ala' utitole huele pensari bibi zaca' ta naca la'iya quie Diuzi. Cana' bë Esaú tiempote guquenë' bibizaca' ca naca derecho quienë' naquë' bi' nëro. Pues ta udaonë' tu lasazi caora bdzioguenë' ta gaohuë', bë'në' derecho quienë' bi' bichinë'.

17 Dyë'ëdi nezile cabë' guca quie Esaú dza na'. Cati unabanë' huela'iya xuzinë' lëbë', bira gu'un xuzinë' huela'iyane' lëbë'. Pues la'acazi guquenë' bayëchi' uredyitzeguenë', bira uzaque' huela'iya xuzinë' lëbë'. Bira ubinnë' bi huenë' ta huela'iya xuzinë' lëbë'.

18 Na'ra bihuele cabë' bë xuzixta'oro ben' Israel dza na'. Lëjë' ubiga'jë' ga'ala' ga zu tu ya'a ga bireya'ala' uliojë'. Lë'ë ya'a na' lega uya'ala'n gui', guca chula, uda tu be bedun' fuerte.

19 Lëjë' bejë' bgüedi trompeta, bejë' rchi' Diuzi cati unë' bë'lënë' lëjë' di'idza'. Lëben' na' unabayëchi'jë' Diuzi ta bira hue'lë Diuzi lëjë' di'idza'.

20 Cana' gudyijë' Diuzi, como dan' tantozi bdzebijë' yejë' cati una Diuzi gudyinë' lëjë' cani: "Chi bablio tu benë' lë'ë ya'a ni, ulegutinë' conlë yo o conlë lanza, la'achi benë', la'achi bia guixi'."

21 Tantozi bdzebijë' cabë' blë'ëjë' dza na', hasta cuin Moisés unë' rëbinë' lëjë': "Lega rüzida' rdzeba'."

22 Pero quie le'e, anacan cuenda quiele tzirole lë'ë ya'a laona ya'a Sión ga de ciudad quie Diuzi, ben' zu tuzioli. Anacan cuenda quiele tzirole ciudad Jerusalén zu guibá ga nita' zë mila ángel, ben' negu'udi' ta tzionla'adyi'jë' Diuzi.

23 Anacan cuenda quiele tzirole ga regu'udi' yaca ben' naca zi'i Diuzi, ben' zu laohue lao lista quie Diuzi. Anacan cuenda quiele tzirole ga zu Diuzi, ben' naca jueza quie yuguluro. Anacan cuenda quiele tzirole ga regu'udi' yaca ben' huen, ben' laxta'o yëri.

24 Anacan cuenda quiele tzirole ga zu Jesús, ben' zëlë ra'o lao Diuzi rutenë' di'idza' ca di'idza' bega'ntza'olë Diuzi ra'o tacubi. Lëscan' naca cuenda quiele yeyëri lae Diuzi nun quie ulato ren quie Jesús. Quie lena' gacaran huen quiele ulato ren quie Jesús, cala ca ren quie Abel.

25 Quie lena' reya'ala' gapale cuidado bichu'unle tzala'la ca na Diuzi, ben' ru'elë le'e di'idza'. Pues biula yaca ben' unita' tiempote, ben' uru'un tzala'la ca una Diuzi dza cati beyëzinë' lao yedyi layu bë'lënë' lëjë' di'idza'. Lëscan' ra'o, biilaro hue Diuzi ra'o castigo chi chu'unro tzala'la ca rnanë' ru'elënë' ra'o di'idza' desde guibá.

26 Dyin quie rchi' Diuzi psisi lao yedyi layu dza na', dza cati bë'lë Diuzi Moisés di'idza' lë'ë ya'a Sinaí. Pero cani rna Diuzi na'a: "Itu lasazi usisia' lao yedyi layu, pero quie tuzi yedyi layuzi, lëscan' usisiria' lente guibá."

27 Caora una Diuzi "itu lasazi", lena' reya'ala' tziõe'ero hueyudyi huedu quie ta usisinë'n, pero biyeyudyi yedu quie ta bisaque' usisi yaca benë'.

<sup>28</sup> Quie lena' reya'ala' yëbiro Diuzi diuxcalelo', como dan' bënë' lato quiero tzioro ga zuë' rnabë'në', pero biisisin biyeyudyi yedu ga rnabë'në'. Reya'ala' tzionla'adyi'ro Diuzi du guicho du la'adyi'ro cabë' re'ennë' huero quienë'.

<sup>29</sup> Naca Diuzi quiero ca quie tu gui' ze ta tzei ben' reru'un lëbë' tzala'la.

## 13

### *Cani re'en Diuzi hue yaca ben' nao xneza Jesús*

<sup>1</sup> Biusanle idyë'ële ben' bichile, ben' nao xneza Jesús.

<sup>2</sup> Lëscan' bigala'adyi'le cabë' reya'ala' huele sule dispuesto gapachi'le dyë'ëdi nu ben' za' zan yu'u quiele, como dan' nu ben' rue cana', hasta ben' naca ángel baozi'jë' zan yu'u quiejë', nica bezaquejë' chi ben' naca ángel na'.

<sup>3</sup> Lëscan' reya'ala' yeyëchi'la'adyi'le nu ben' naca preso yu'u lu'u dyiguiba. Reya'ala' yeyëchi'la'adyi'lejë' ca quie le'e cuinle yu'ulële lëjë' tuze lu'u dyiguiba. Reya'ala' yeyëchi'la'adyi'le nu ben' raca zëdi quie, rusaca ja benë' lëjë' bizinaquezi. Reya'ala' yeyëchi'la'adyi'lejë' ca quie le'e cuinle raca zëdi quiele, rusaca ja benë' le'e bizinaquezi.

<sup>4</sup> Yugulule reya'ala' huelële laguedyile puro tahuen. La'acazi bazulële laguedyile, la'acazi binesulële laguedyile, bihuele ta naca yela' stu' quiele, porque hue Diuzi castigo nu ben' cuidi', chi rasilëbi' laguedyibi' binesi'bi' lëbi'. Lëscan' hue Diuzi castigo nu ben' bazulë laguedyi, chi rasilënë' ben' tula.

<sup>5</sup> Bisa'la'adyi'le dumi, pero sule contento conlë bi ta de quiele, porque cani rna Diuzi: "Con bitezi gaca quiele, biusanla'adyi'caza' le'e."

<sup>6</sup> Quie lena' huazaque' inaro nužela'adyi'ro nacan tali:

Naca Diuzi ben' racalë ra'o, biidzebiro chi bi re'en ja benë' huejër'a'o.

Cana' rnën lë'ë guichi la'ya quie Diuzi.

<sup>7</sup> Bigala'adyi'le quie ben' napa dyin entre le'e, ben' udixogue' le'e xti'idza' Diuzi dza na'. Huele pensari cabë' bëjë' gulejë' quie Diuzi, cana' inaole huele cabë' bëjë'.

<sup>8</sup> Tuzi ca naca Jesucristo, biyetza'në'. Cabë' nacacazë' tiempote, cana' naquë' na'a, cana' nacacazë' tuzioli.

<sup>9</sup> Gapale cuidado bigalele quie ben' re'en inaole cabë' rnajë', rnajë' ta binacan tuzi ca na Cristo. Taže netza'n cabë' rnajë', rnajë' di'idza' zë. Mejorla inabaro Diuzi ta gacalënë' ra'o gunnë' fuerza valor quiero inaoro xneza Cristo. Pero chi gaoro bi cosa, o chi bigaoro bi cosa, lena' bigacalën ra'o inaoro xneza Cristo. Pues hasta yaca ben' unao dyë'ëdi ca naca quie yela' huao dza na', bigacalën lëjë' ta inaojë' quie Diuzi.

<sup>10</sup> Pues netza' ca naca quiero ben' nao xneza Cristo. Guti Cristo lë'ë yaga cruzo guquë' gun quie Diuzi. Pero quie yaca ben' nena cabë' bë yaca pxuzi quie xuzixta'oro lu'u idao' de la'ari' tiempote, chi nenaojë' ruejë' cabë' bë ja ben' na', na'ra bisaque' inaorëjë' xneza Cristo.

<sup>11</sup> Pues tiempote bzio pxuzi rnabë'ra quie xuzixta'oro ren quie bia guixi' lu'u idao' de la'ari' ga naca la'iyatzegue. Bzionë'n como ca gun quie Diuzi cuenda yeduba Diuzi dula' xquia quie ja ben' Israel. Pero quie yaca bia guixi', bia bëtijë', tzala'la ru'a yedyi bzejjë' cuerpo quieyacaba'.

<sup>12</sup> Lëscan', Cristo, tzala'la ru'a ciudad Jerusalén bedzagalaonë' gutinë' lë'ë yaga cruzo cuenda yežinë' dula' xquia quie ben' nao xnezë'. Cana' guca quienë' ulato ren quienë' dza na'.

<sup>13</sup> Quie lena' tzioro inaoro huero quie Cristo, la'acazi yedzagalaoro usaca benë' ra'o bizinaquezi cabë' guca quie Cristo dza na'.

<sup>14</sup> Pues bizu yedyi quiero lao yedyi layu niga ta biyeyudyi yedu quie. Pero rbezaro dza zaza'ra tzioro tu yedyi zu guibá.

<sup>15</sup> Quie lena' reya'ala' tzionla'adyi'ro Diuzi lao na'a Jesucristo tuzioli. Lena' cati tzionla'adyi'ronë' nacan gun quienë' ta hue'ronë', ta inaro, ulidzaronë' hueronë' ben' ze.

<sup>16</sup> Bigala'adyi'le huele tahuen. Bigala'adyi'le gacalële ben' rdziogue quie con ta de quiele, porque cana' re'en Diuzi huele, cana' naca gun quie Diuzi reya'ala' hue'lenë'.

<sup>17</sup> Lëscan' galele uzule di'idza' quie ben' napa dyin quiele, ben' rue dyin quie Diuzi. Naca cuenda quiejë' gapajë' le'e dyë'ëdi, gacalëjë' le'e inaole xneza Cristo. Nezijë' huadyin dza yedejë' cuenda lao Diuzi cabë' bëjë' udapajë' le'e. Huele dyabë' ta sujë' gusto cabë' naca dyin napajë'. Bihuele quiejë' ta bisujë' gusto, como dan' chi huele cana', bihuena huen quiele.

<sup>18</sup> Ulidzale Diuzi ta gacalënë' nëto'. Pues nužela'adyi'ndo' puro pensari huen yu'undo', puro tahuen re'enndo' huendo' con bitezi ta huendo'.

<sup>19</sup> Huele orar por në'ëdi' cuenda gacalë Diuzi në'ëdi' laguidatia' ideyuba' le'e tatula.

*Blidzanë' Diuzi ta gacalënë' lëjë'*

<sup>20-21</sup> Rulidza' Diuzi, ben' cuëchi chizi laxta'oro, ta gacalënë' le'e dyë'ëdi ta huele ca re'en Diuzi huele. Naca Diuzi ben' pseban Señor quiero Jesucristo, ben' rapa ra'o ca quie ben' rapa beco' ži'ila', ulato ren quienë' lë'ë yaga cruzo cuenda gaca seguro para tuzioli cabë' di'idza' bega'ntza'olë Diuzi yaca benëchi'. Lëscana' rulidza' Diuzi ta gacalënë' yuguluro ta galero quienë' du guicho du la'adyi'ro, huero puro ca re'ennë' huero nun quie dan' nacaro ben' quie Jesucristo. ¡Huero Cristo ben' ze tuzioli! Amén.

<sup>22</sup> Bicha', rnaba' cule laole ta uzë'nagale dyë'ëdi cabë' naca di'idza' unia' le'e niga runa' le'e consejo. Pues quele di'idza' zë bzua' lë'ë guichi pse'ela'n laole.

<sup>23</sup> Lëscana' rguixogui'a le'e abero ben' bichiro Timoteo lu'u dyiguiba. Na'ra chi abela'nezanë', na' huaqui'anë' guidando' ta ideyubindo' le'e.

<sup>24</sup> Lëscana' gapale diuži ben' napa dyin quiele, ben' rue dyin quie Diuzi. Lëscan' gapale diuži yugulu ben' bichiro, ben' nao xneza Cristo ga zule. Rgapa ben' yedyi Italia le'e diuzi.

<sup>25</sup> Rulidza' Diuzi huela'iyane' le'e yugulule. Amén.



## DI'IDZA' LA'IYA BZU SANTIAGO APÓSTOL LĒ'Ē GUICHI

*Use'ela' Santiago carta ni lao ben' nao xneza Cristo, ben' nita' tu tu yedyi*

<sup>1</sup> NĒ'ēdi', Santiago, naca' ben' ruzu di'idza' ca mandado rue Diuzi lĒnĒ' xa'nro Jesucristo. Rgapa' le'e diuzi, le'e ben' naca chipchopa cue' ben' Israel, le'e ben' nao xneza Cristo, le'e ben' rdale duže yedyi layu.

*Naca Diuzi ta uzioñe'enĒ' ra'o*

<sup>2</sup> Bicha', reya'ala' yedaohuele cati hue Diuzi le'e biti'tezi prueba ta ulu'en chi rnaole xnezĒ' du guicho du la'adyi'le.

<sup>3</sup> Baquezi nezile caora hue Diuzi le'e prueba, lena' nacan ta gacalĒn le'e suele dyĒ'ēdi biusanla'adyi'le xnezĒ' cati gaca zĒdi quiele.

<sup>4</sup> Quie lena' reya'ala' huele purari suele dyĒ'ēdi bi tazĒdi gaca quiele dan' rnaole xneza Cristo cuenda gacale ben' nao xnezĒ' du guicho du la'adyi', gacale ben' bigapa falta.

<sup>5</sup> Chi nu le'e binezile cabĒ' reya'ala' huele, ruen zi inabale lao Diuzi gacalĒnĒ' le'e ta inezile ca reya'ala' huele. Diuzi sĪ, huacalĒnĒ' le'e ta inezile. Biidza' Diuzi le'e dan' inabalenĒ' ta inezile ca reya'ala' huele.

<sup>6</sup> Pero cati inabale Diuzi gacalĒnĒ' le'e, bihuele pensari chi usanla'adyi'nĒ' le'e, huacalĒcazĒ' le'e. Chi huele pensari usanla'adyi'nĒ' le'e, lena' naca pensari quiele ca quie nisa yao že ru'a be len, reru'unnan len tzala' huio lao yu bidyi.

<sup>7</sup> Nu ben' naca cana', bireya'ala' huenĒ' pensari hue' Diuzi lĒbĒ' ca ta inabanĒ' Diuzi.

<sup>8</sup> Cana' naca quie yaca ben' rue cana', como dan' chi racajĒ' chopa pensari, zĒdi nacan quiejĒ', na' biruejĒ' pensari inaojĒ' tuzi xneza Diuzi.

<sup>9</sup> Na'ra rnia' le'e, bicha', ben' yĒchi', ben' bi de quie: Reya'ala' yedaohuele sule gusto cabĒ' tahuen gula babĒ' Diuzi quiele sunĒ' dispuesto ta yezi'nĒ' le'e guibá.

<sup>10</sup> LĒscan' rnia' le'e, bicha', ben' uña'a, ben' bibi rdziogue: Reya'ala' yedaohuele sule contento cati rue benĒ' le'e bizinaquezi redzagalaole nun quie naole xneza Cristo. Cana' reya'ala' huele como dan' tzadica'zi za'le lao yedyi layu. Naca quiele ca quie tu yo guixi' bisun zidza.

<sup>11</sup> Cati rna' oba zi' rbe' tala, cana' ibidyi guixi' iguino yo quien, cana' rnitĪ yela' badan quien. LĒscana' nacarĒ' quie yaca ben' uña'a. Tu chopa dzazi rdajĒ' ruejĒ' negocio, caora na' laratitejĒ'.

*Hue Diuzi ra'o prueba chi tali naoro xnezĒ'*

<sup>12</sup> Huela'iya Diuzi nu ben' sue dyĒ'ēdi cabĒ' prueba hue Diuzi lĒbĒ', porque caora banaquĒ' prueba, na'ra gaca quienĒ' ca quie ben' nuzu coron ca coron nuzu rey. Hue' Diuzi lĒbĒ' yela' neban tuzioli cabĒ' unĒ' huenĒ' quie ben' nadyĒ'Ē' lĒbĒ'.

<sup>13</sup> Cati racaro pensari huero tamala, bigacaro pensari chi Diuzi rudze'nĒ' ra'o pensari mala, porque Diuzi biyu'unĒ' pensari ta huenĒ' tamala, lĒscan' birudze'nĒ' ra'o pensari huero tamala.

<sup>14</sup> Pero cani nacan: Pensari quieziro ruenan ra'o mandado huero ta rnazin quiero huero tamala.

<sup>15</sup> Nun quie pensari mala yu'uro, lena' inën ra'o huero tamala cuëchin dula' xquia quiero. Na'ra cati baoyë dula' xquia quiero, barnabë'n ra'o, caora na' udyiagui'n ra'o.

<sup>16</sup> Bicha', ben' nedyë'ëda', rnia' le'e bisi'le cuinle yë'.

<sup>17</sup> Puro ta naca huen gula za' guibá gun Diuzi ra'o. Lëbë' nabëchinë' xni' guibá. Tuzi ca naca Diuzi tuzioli, bibetza'në'.

<sup>18</sup> Según ca una Diuzi huenë' quiero dza na'te, cana' bënë' na'. Use'elë' di'idza' la'iya quienë' cuenda hue quiero quienë' gata' yela' neban quiero tuzioli. Naca quiero ca quie usecho nëro ta yezi' Diuzi.

### *Ni rguixogue'n ca re'en Diuzi huero inaoro xnezë' dyë'ëdi*

<sup>19</sup> Quie lena', bicha', rnia' le'e reya'ala' ye uzë'nagale dyë'ëdi huele cuenda xti'idza' Diuzi. Reya'ala' huele pensari biinële con ganzi. Reya'ala' gacale benë' zela'adyi', bigacale ben' huin'.

<sup>20</sup> Porque chi rdza'ro rdilalëro laguedyiro, bisaque' huero tadya'a cabë' re'en Diuzi huero.

<sup>21</sup> Quie lena' bira inaole huele ca tamala gula rue yaca benë'. Reya'ala' inaole huele ca naca di'idza' la'iya quie Diuzi ta bayu'u guicho laxta'ole, bihuele cuinle ben' ze. Pues fuerza valor nu'a di'idza' la'iya quie Diuzi ta gacalën ra'o yedyinro guibá.

<sup>22</sup> Quie lena' uzule di'idza' huele mandado cabë' mandado rue di'idza' la'iya quie Diuzi. Biinaro tu yezilen, tu ina'zilen, porque chi tu yezilen, tu ina'zilen, cana' si'le cuinle yë'.

<sup>23</sup> Chi yeziro ina'zira' biuzuro di'idza' huero ca mandado rue xti'idza' Diuzi, naca quiero ca quie tu ben' rna' laohue lao huan.

<sup>24</sup> Tzadica'zi baona'në' laohuë' lao huan, na'ra bagula'adyi'në' bi naque laohuë'. Cana' naca quie ben' yezi ina'zi xti'idza' Diuzi. Tu rezinë' rna'zinë', na'ra bagula'adyi'në' len.

<sup>25</sup> Pero nu ben' re rna' dyë'ëdi xti'idza' Diuzi, bireza'la'adyi'në'n ruzunë' di'idza' ca na xti'idza' Diuzi, na'ra huela'iya Diuzi lëbë' cabë' ruenë'. Naca xti'idza' Diuzi di'idza' dya'atzegue. Ruen ra'o mandado chi hue quiero len gacaro ben' libre, suro contento cabë' ruero.

<sup>26</sup> Chi ina nu ben' naquë' ben' quie Diuzi, pero binezinë' hue'lënë' benë' di'idza' zela'adyi', rnënë' di'idza' yaladyi' rulidzë' benë', na'ra rzi'në' cuinnë' yë'. Binaquë' sirve para gaquë' ben' quie Diuzi.

<sup>27</sup> Pero cani re'en Xuzi Diuzi huero inaoro dyë'ëdi xnezë', re'ennë' gacalëro xcuidi' huezëbi, re'ennë' gacalëro nigula baguti xquiuhue ta rdzioguenë', re'ennë' taro dyë'ëdi biinaoro neza mala cabë' tamala de lao yedyi layu.

## 2

### *Reya'ala' huero tuzi ca huelëro benë'*

<sup>1</sup> Bicha', le'e ben' nao xneza Señor quiero Jesucristo, reya'ala' huele tuzi ca huelële benë'.

<sup>2</sup> Por ejemplo, chi za' ben' uña'a ga regu'udi'le, ben' yu'u tu anillo de oro zbenë', chi za'në' nacué' tu la'ari' dya'a, lëscan' chi za' tu ben' yëchi' nacué' tu la'ari' gula,

<sup>3</sup> chi rapale bala'ana dyë'ëdi ben' uña'a rëbilenë': "Ure' gan' ni ga naca dya'a", pero chan' na' ben' yëchi' rëbilenë': "Ude uzuli na'la", o chi rëbilenë': "Ure' layu", cala tadya'a ruele dan' ruele cana'.

<sup>4</sup> Chi biruele tuzi ca ruelële benë', biruele tahuen. Barulu'ena quiele biyu'ule pensari dya'a.

<sup>5</sup> Bicha', ben' nedyë'ëda', uzëna'gale dyë'ëdi cabë' rnia': Entre yaca ben' nita' lao yedyi layu, ulio Diuzi yaca ben' yëchi' tacuenda gaca huen gula quiejë' inajë' xneza Cristo yedyinjë' guibá ga rñabë' Diuzi cabë' una Diuzi huenë' quie ben' nadyë'ë lëbë'.

<sup>6</sup> Pero le'e baruele yela' stu' quie yaca ben' yëchi'. ¿Binezile ben' uña'a, ben' si' le'e yë', lëjë' cuanjë' ta de quiele hasta rehua'ajë' le'e lao ben' rñabë'?

<sup>7</sup> ¿Binezile leyaquë' rñëbizo'yaquë' quie Cristo, ben' naca Señor quiero, ben' rzëtoro laohue'?

<sup>8</sup> Chi tali uzule di'idza' ca mandado rue ley rñabë'ra quie Diuzi, baruele huen. Léley na' rguixogue'n cani: "Idyë'ële laguedyile ca idyë'ële cuinle."

<sup>9</sup> Pero chi biruele tuzi ca ruelële benë', cana' ruele xquia quiele, napale dula' biruzule di'idza' ca mandado rue Cristo ra'o.

<sup>10</sup> Chi uzuro di'idza' con cabë' rna lao ley pca'n Diuzi lao na'a Moisés, pero na'a chi baoquixiro tun cabë' mandado ruen ra'o, na'ra de dula' quiero ca quie ben' baoquixi yugulu mandado ruen.

<sup>11</sup> Pues dza na' una Diuzi rëbinë' ra'o: "Bireya'ala' talële nigula binaca zgulale", pero lëscan' una Diuzi: "Bireya'ala' gutile benë'." Quie lena' la'acazi birdalële nigula binaca zgulale, pero chi babëtile benë', naca quiele ca quie ben' biruzu ni tu di'idza' con cabë' rna lao ley quie Diuzi.

<sup>12</sup> Reya'ala' huele pensari dyë'ëdi tale du guicho du la'adyi'le como ben' hue cuenda lao Cristo chi bë quiele cabë' unanë' huele ta gacale ben' libre.

<sup>13</sup> Pues con nu ben' biyeyëchi'la'adyi' benë', lëscan' biyeyëchi'la'adyi' Diuzi lëbë' dza gaca juicio. Pero con nu ben' beyëchi'la'adyi' benë', huenë' gan yeyëchi'la'adyi' Diuzi lëbë' dza gaca juicio.

### *Bireya'ala' tu yeziro xti'idza' Diuzi*

<sup>14</sup> Na' rnia' le'e bicha': ¿Ga rue dyin dan' inale rnaole xneza Cristo, chi biruzule di'idza' quienë' yeyëchi'la'adyi'le benë' ca mandado bënë' quiero? Chi huele cana', lena' rulu'en quiele binaole xneza Cristo, na' biyezi' Diuzi le'e yedyinle guibá.

<sup>15</sup> Inaro chi zu nu bichiro, o nu zanro, ben' naorë xneza Cristo, pero rdzioguenë' žabanë', rdzioguenë' ta gaonë',

<sup>16</sup> na'ra chi nu le'e inale rëbile ben' rdziogue, ben' bibi de quie: "Beyo dyë'ëdi. Utaco' cuino' quie tazaga. Udao dyë'ëdi", pero bibi bë'lenë' ta idaconë' quie tazaga, bibi bë'lenë' ta gaonë', chi cana' bële, žbizi' bële ta gacalëben' rdziogue, bële cana'?

<sup>17</sup> Cani nacan: Chi biuzuro di'idza' ca mandado bë Cristo ra'o, lena' rulu'en quiero binaoro xneza Cristo, lena' rulu'en quiero di'idza' dachi rñëro inaro naoro xneza Cristo.

<sup>18</sup> Pero bala le'e inale biruen zi uzuro di'idza' ca mandado bë Cristo. Inale tu neziziro bidë' gutië' lë'e yaga cruzo, quie lëzin yedyinro guibá. Pero në'ëdi' rnia' le'e, rucazin zi uzuro di'idza' ca mandado bë Cristo, porque chi biuzuro di'idza' ca mandado bë Cristo, lena' rulu'en quiero binaoro xnezë'.

<sup>19</sup> Pues banezile dyë'ëdi tuzi Diuzi zu. Tahuen na' banezile cana'. Pero bigala'adyi'le banezirë yaca taxi'ibi' tuzi Diuzi zu. Pues hasta tu rziziyacan rdzebiyacan quie Diuzi. Pero la'acazi neziyacan tuzi Diuzi zu, biyezi' Diuzi leyacan yeyoyacan guibá.

<sup>20</sup> Pero pensari tondo yu'ule. ¿Binezile di'idza' dachi rñëro chi inaro naoro xneza Cristo, na' biuzuro di'idza' ca mandado bënë' ra'o?

<sup>21</sup> Na'ra blë'e Diuzi xuzixta'oro Abraham ben' laxta'o yëri nun quie dan' bzu Abraham ca di'idza' bë'lë Diuzi lëbë'. Bzunë' ži'inë' Isaac lao ru'aba ca quie gun quie Diuzi lao laza bia guixi'.

<sup>22</sup> Pues claro nacan cabë' bëlë Diuzi Abraham. Nun quie dan' bzu Abraham di'idza' ca mandado bë Diuzi lëbë', cana' blu'en quie Abraham talicazi uzudyi'ilënë' Diuzi.

<sup>23</sup> Cana' uzu di'idza' con cabë' rna lë'ë guichi la'ya quie Diuzi cani: “Como dan' uzudyi'ilë Abraham Diuzi, quie lena' blë'ë Diuzi lëbë' ben' laxta'o yëri.” Cana' guca una Diuzi rëbinë' Abraham: “Nacaro amigo.”

<sup>24</sup> Lëscan', claro nacan cala tu neziziro zu Diuzi, na' ilë'ënë' ra'o ben' laxta'o yëri, yezi'në' ra'o. Pero lëscan' ruen zi uzuro di'idza' ca mandado ruenë' ra'o.

<sup>25</sup> Cana' bëlë Diuzi tu nigula guti' gusto quie lao Rahab dza na'te. Pues lënigula na' gualënë' chopa ben' Israel, ben' bida balarazi dena' ca naca yedyi quienë'. Caora na' bë'ne' lëjë' posada quiejë'. Blu'enë' leyaquë' ga zu neza ta yežunoyaquë' lao yedyi yeza'jë' balarazi, porque gu'un rey quie yedyi na' gutinë' lëjë'. Na' caora guca dilalë ben' yedyi quie nigula na', len ben' Israel, caora na' pte psela Diuzi nigula na' len familia quienë', bigutiyaquë'.

<sup>26</sup> Pues cani nacan: Cati babero bichi be quiero lu'u cuerpo quiero, cana' banati cuerpo quiero, bira bisirve. Lëscan' ra'o, chi biuzuro di'idza' huero ca mandado rue Cristo ra'o, nacaro ca quie ben' huati, bibi sirve inaro rnaoro xneza Cristo.

### 3

#### *Reya'ala' gaparo cuidado cabë' di'idza' hue'lëro benë'*

<sup>1</sup> Bicha', gapale cuidado cabë' ruele usëdile benë' xti'idza' Diuzi, porque nezile cabë' hue Diuzi quie ra'o ben' rusëdi. Nezile cati yezi' Diuzi cuenda quiero, na'tera inaba Diuzi ra'o chi bëro cuinro cabë' psëdiro benë' tula, cabë' psëdirojë' reya'ala' hueyaquë'.

<sup>2</sup> Yuguluro rquixiro, biru'elëro benë' puro di'idza' dya'a. Chi zu tu ben' birquixi, ben' biru'elë benë' di'idza' mala, naquë' ben' laxta'o li, nezinë' inabë'në' cuinnë'.

<sup>3</sup> Na' inia' le'e chopa ejemplo. Cati rudze'ro freno ru'a caballo, cana' ucaxoroba' ta tzahua'aba' ra'o gan' re'enro tzioro.

<sup>4</sup> Lëscan' ulehue pensari ca naca quie yaca barco. La'acazi nacan barco yela, la'acazi be fuerte rudyigan len, huaca usa' ben' rusa' len con tuzi yaga ta'a dao' ta tziolënë'n ga re'ennë' tzioguë'.

<sup>5</sup> Cana' nacarë quie ludyiro. Nacan tu parte dao' bicu' cuerpo quiero, pero ruanan tazëla quiero. Lëscan' cana' nacarën quie tu gui' dao'. La'acazi nacan gui' dao'zi, tažë guixi' yaga uzeinan.

<sup>6</sup> Naca ludyiro ca quie gui' re' gabila. Tanto ruelëro ludyiro tamala udyiagui'ro benë', cana' udyiagui'ro cuinro. Nun quie lena' quilon tazëdi gula quiero dza rdaro lao yedyi layu.

<sup>7</sup> Huazaque' ucaxoro nutezi bia guixi', nutezi bguini, nutezi bëla. Pues hasta yaca bia yu'u lu'u nisa huazaque' ucaxoroba'.

<sup>8</sup> Pero nunu saque' ucaxo ludyinë'. Bicueza ludyiro quilon tamala quiero. Naca ludyiro ca quie lei bëla ta yudzu veneno ta udyiagui' benë'.

<sup>9</sup> Con tuzi ludyiro tzionla'adyi'ro Xuziro Diuzi, na' udze'de'ro laguedyiro, ben' bzalo Diuzi ca naquë' cuinnë'.

<sup>10</sup> Tuzi ru'aro rero di'idza' huen tzionla'adyi'ro Diuzi, na' reron di'idza' mala udze'de'ro benë'. Bicha' bireya'ala' huele cana'.

<sup>11</sup> ¿Binezile ca naca ga ralo nisa? ¿Binezile biralo chopa cue' nisa gacan nisa zixi, na' gacan nisa sla'?

<sup>12</sup> Bicha', rnia' le'e: ¿Huazaque' cuia yaga hui tazixi tula? Pues bisaque'. Lëscan', rnia' le'e: ¿Huazaque' cuia lao luba bedzuli' hui? Pues bisaque'. Lëscan' ga ralo nisa, bisaque' gacan nisa žna'a, na' gacan nisa žixi.

*Ca reya'ala' huero chi tali rioñe'ero quie xneza Cristo*

<sup>13</sup> Ca naca le'e, chi tali rioñe'ele quie xneza Cristo, reya'ala' huele tahuen cuenda ulu'en quie tali barioñe'ele. Reya'ala' huele ca rue ben' rioñe'e, bihuele cuinle ben' ze.

<sup>14</sup> Chi racažë'le laguedyile, na' naca laxta'ole yaladyi'. Chi puro cuinzile re'enle gaca tahuen quiele, na' biinale rioñe'ele quie xneza Cristo, porque yë' rzi'le binaca tali ca nale.

<sup>15</sup> Chi huele cana', cala pensari quie Diuzi yu'ule, den' pensari quie benë', pensari quie xan' taxi'ibi'.

<sup>16</sup> Porque cati racažë' benë' laguedyiyaquë', cati re'enyaquë' puro cuinziyaquë' gaca tahuen, quie lena' gaca tazëdi huaca dilayaquë', gaca zë cue' tamala.

<sup>17</sup> Pero yaca ben' rioñe'e dyë'ëdi quie xneza Cristo, lëjë' sí, rnaoyaquë' tuzi xneza Cristo, biyu'ujë' pensari mala. Nacayaquë' ben' gaxo, ben' huen, ben' yu'u pensari, ben' reyëchi'la'adyi' laguedyi, ben' rguixogue' dyë'ëdi ca nacan, ben' rda du guicho du la'adyi'.

<sup>18</sup> Con nu ben' rguilo ta cuëchi laxta'o benë' chizi, huaca huen quiejë' lao Diuzi, ruejë' ca re'en Diuzi huejë'.

## 4

*Bireya'ala' taro cabë' rda yaca ben' nita' lao yedyi layu*

<sup>1</sup> ¿Gazi za' ralo yela' huedila quiele? Pues za' ralon nun quie pensari mala yu'u lu'u guicho laxta'ole. Lena' runën le'e lu'u guicho laxta'ole rdale rdilalële laguedyile.

<sup>2</sup> Le'e re'enle ta de quie laguedyile, pero como binacan quiele, na'ra rutilë laguedyile cuenda si'le ta de quienë'. Rza'la'adyi'le ta de quie laguedyile, pero como biden quiele, na'ra rzulaole rdilale. Bide ta rdzioguele como dan' birnabalen lao Diuzi.

<sup>3</sup> Chi inabalen lao Diuzi, bibi gunnë' le'e, porque dan' biyu'ule pensari dya'a inabalen. Yu'ule pensari ta huele ta rnazin quiele.

<sup>4</sup> Le'e bire'enle inaole tuzi xneza Diuzi. ¿Binezile chi huelële tuže ben' rudie xneza Diuzi, na' nacale enemigo quie Diuzi? Nutezi ben' re'en huelë tuže ben' rudie xneza Diuzi, na'ra banaca ben' na' enemigo quie Diuzi.

<sup>5</sup> Quie lena' rnën lë'ë guichi la'iya quie Diuzi cani: "Lega nedyë'ë Diuzi Bichi Be quienë', bdze'në' lënë' lu'u guicho laxta'oro."

<sup>6</sup> Cana' taze racalë Diuzi ra'o. Lena' rguixogue'n lë'ë guichi la'iya quie Diuzi caniga: "Bire'en Diuzi ca rue ben' rue ze cuine, pero reyëchi'la'adyi' Diuzi yaca ben' nao xnezë' du guicho du la'adyi'."

<sup>7</sup> Quie lena' reya'ala' uzule di'idza' dyë'ëdi ca na Diuzi le'e. Chi bihue'le lato inabë' xan' taxi'ibi' le'e, cana' usanla'adyi'n le'e yežunona.

<sup>8</sup> Ulehuelë Diuzi tuže, cana' huelë Diuzi le'e tuže. Le'e, ben' napa dula' xquia, reya'ala' usanla'adyi'le pensari mala quiele. Le'e, ben' re'en inao chopa neza, ulehue pensari bi neza inaole.

<sup>9</sup> Huele pensari ca bayëchi' raca quiele nun quie dula' xquia quiele. Biuzidyile ca ruele. Pues reya'ala' cuedyile gacalë bayëchi'. Bisule alegre. Pues reya'ala' cue'le chizi yeyuele pensari cabë' raca quiele.

<sup>10</sup> Ulequitzu žibile lao Diuzi, na'ra huenë' le'e ben' ze.

*Bireya'ala' inëbizoro quie laguedyiro*

11 Bicha', bireya'ala' inëbìzole mala quie laguedyile. Chi inëbìzole quie laguedyile, ruen quiele rnëbìzole quie ley pca'n Diuzi lao na'a Moisés. Chi inëbìzole quie ley na', na' babèle cuinle ben' rnabè'ra quie lao ley na'. Pero cabè' reya'ala' huele, reya'ala' uzule di'ida' cabè' rna lao ley na',

12 porque tuzi ben' zu, ben' pca'n ley, ben' naca ben' rnabè'. Lëlèbè' ute uselanè' benè', o chi ise'elè' benè' lao gui' gabila. ¿Pero nuži naca le'e re'enle inëbìzole quie laguedyile?

### *Bineziro bi ta za' gaca quiero uxe*

13 Ulezènaga le'e ben' rnè: “Na'a, uxe, sa'ro tzioro yedyi tula tzasuro tu iza huero negocio huero gan.”

14 Pero nica nezile bi ta za' gaca quiele uxe. Quie lena' inaba' le'e, ¿cabìzi naca quiero dza rdaro lao yedyi layu? Pues naca quiero ca quie tu beo lasi tzadica' reyulan.

15 Pero reya'ala' inale cani: “Chi re'en Diuzi, huazuro lao yedyi layu, huero bi dyin re'enro huero.”

16 Pero le'e, lega raxele huele cuinle ben' ze cabè' rnèle. Binacan huen ca ruele ruele cuinle ben' ze.

17 Chi le'e nezile huele tahuen, na' biruelen, lena' nacan xquia quiele.

## 5

### *Ni rguixogue'n cabè' naca quie ben' uña'a*

1 ¿Ulezènaga dyè'èdi cabè' naca quie ben' uña'a! Reya'ala' cuedyiya'yaquè' quie tamala za' quieyaquè' yedzagalaoyaquè'.

2 Ca naca yela' uña'a quieyaquè', huabiagui'n gudzon itabon. Lëscana' nu zabajè' dya'a, huatabon gao biazidzo len.

3 Lëscana' oro plata quiejè', huabiagui'na gaca ditoguen. Ulu'en ca tamala bèjè' bëlèjè' ben' yèchi'. Lena' huen quiejè' ca quie ben' žuba lagui', uzeinan leyaquè'. Bapupajè' yela' uña'a quiejè' na'adza cati baruen bago iyudyi quie yedyi layu.

4 ¿Le'e ulezènaga! Rbedyi yaca ben' rue dyin quiejè', porque rezi'jè' cosecha quieyaquè', na' racayaquè' zi', pero birguizuyaquè' leyaquè'. Lena' raona leyaquè' xquia lao Diuzi. Na'ra Diuzi rnabè'nè' guibá, rnabè'nè' lao yedyi layu, banezinè' cabè' rusaca ben' uña'a yaca ben' rue dyin quieyaquè'.

5 Gan' ni lao yedyi layu, puro de lujo re'enyacuè'. Rza'la'adyi'yaquè' tuz ta rnan quie cuerpo quiejè'. Ruejè' baneza cuinziaquè'. Ruzèni' cuinyaquè' cabè' re'eni bēdyihuaga. Baruen bago dza hue Diuzi leyaquè' castigo gatiyaquè' ca rati bēdyihuaga.

6 Mandado quiejè' aochuguli yaca ben' rnabè' ta gutijè' ben' bibi tamala bē, ben' birzaque' hue defender cuine.

### *Reya'ala' cuezaro dyè'èdi dza yeguida Cristo, hue'lëro Diuzi di'ida'*

7 Pero le'e bicha', reya'ala' cuezale dyè'èdi dza cati yeguida Cristo lao yedyi layu. Naca quiero ca quie ben' rue dyin guixi'. Rbezanè' yela' nisa yo, na'ra gazanè' rbezanè' dyè'èdi yezi'nè' cosecha ca naca ta rdzioguenè'.

8 Lëscan' le'e, reya'ala' cuezale dyè'èdi huele tuzi pensari, porque baruen bago dza yeguida Jesucristo lao yedyi layu.

9 Bicha', biinèle contra laguedyile, porque huachugubè' Diuzi le'e chi inèle contra laguedyile. Naca Diuzi ben' ichugubè' quiero yuguluro. Ilè'èti'zi nerdzioque idyin dza huenè' juicio lao yedyi layu.

10 Bicha', cabè' bē ben' profeta, ben' ulio Diuzi, ben' uidxogue' xti'idzè' dza na'te, bezueyaquè' bedzagalaoyaquè', cana' reya'ala' huele le'e.

<sup>11</sup> Pues neziro huela'iya Diuzi nu ben' rzue redzagalao, ben' biusan xneza Cristo. Babele cabè' bē Job, ben' unita' tiempote. Dyè'èdi uzuenè' bedzagalaaonè'. Lèscan' nezile cabè' gualè Diuzi lèbè', bro quienè' huen. Lena' rulu'en reyèchi'la'adyi' Diuzi benè', re'ennè' gacalènè' ra'o.

<sup>12</sup> Nacan belao cabè' rnia' le'e ni, bicha'. Biugunle ta dyia guibá, biugunle ta de lao yedyi layu. Biugunle Diuzi con ganzi. Bisi'le benè' yè'. Dula'adyi'le inale: "Huazaque'", dula'adyi'le inale: "Bisaque'". Na'ra bihue Diuzi xquia quiele.

<sup>13</sup> Chi nu le'e redzagalaole, reya'ala' ulidzale Diuzi hue'lènè' di'idza'. Chi nu le'e sule contento, reya'ala' gulale alabanza.

<sup>14</sup> Chi nu le'e raca zhue'le, reya'ala' guèzile guida ben' napa dyin quie ben' nao xneza Cristo ta ulidzajè' Diuzi ga dele ilèpiyaquè' le'e aceite rzétoyaquè' lao Jesucristo.

<sup>15</sup> Na'ra cati ulidzayaquè' Diuzi hue'lèyaquè' lèbè' di'idza' du guicho du la'adyi'yaquè', caora na' iyacale yeyue Diuzi le'e. Chi bèle xquia, huezi'ze Diuzi dula' xquia quiele.

<sup>16</sup> Quie lena' reya'ala' ixubalèpile lao laguedyile, ben' nao xneza Cristo, chi bèle xquia. Lèscan' reya'ala' ulidzale Diuzi inabalenè' gacalènè' laguedyile, ben' nao xneza Cristo, cuenda sule huen. Huacalècazi Diuzi nu ben' huen, ben' hue'lè lèbè' di'idza' du guicho du la'adyi'.

<sup>17</sup> Bigala'adyi'le ca guca quie ben' profeta Elías. Guquè' benè' ca ra'o. Pero caora unabanè' Diuzi du guicho du la'adyi'nè' ta bihuen nisayo, na'ra tzona iza yu gatzo biben nisayo.

<sup>18</sup> Ude na' benabanè' lao Diuzi ta huen nisayo, na'ra bela' nisayo, bezi'yaquè' cosecha quieyaquè'.

<sup>19</sup> Na'ra rnia' le'e bicha'. Chi nu laguedyile, ben' nao xneza Cristo, bap-sanla'adyi'nè' xneza Cristo, reya'ala' gacalèlenè' ta yenaohuè' xneza Cristo tatula.

<sup>20</sup> Reya'ala' inezile chi gacalèle ben' psanla'adyi' xneza Cristo ta yenaohuè' xneza Cristo tatula, babèle tahuen ta bicuiagui'nè' bira inahue' neza tula, neza zio gabila. Lèscan' nun quie gacalèlenè', huazi'ze Diuzi dula' xquia quie ben' na', la'acazi napè' xquia ze. Amén.

## GUICHI NĒRO BĒ SAN PEDRO APÓSTOL

*Bē Pedro tu guichi ni, use'ela'nē'n lao yaca ben' nao xneza Jesús, yaca ben' abdzatza uza' yedyi quie*

<sup>1</sup> Nē'ēdi', Pedro, naca' apóstol quie Jesucristo. Bia' guichi ni use'ela'n laole le'e ben' abdzatza uza' yedyi quie ziole yedyi tula, ziole yaca yedyi nebaba Ponto, len yaca yedyi nebaba Galacia, len yaca yedyi nebaba Capadocia, len yaca yedyi nebaba Asia, len yaca yedyi nebaba Bitinia.

<sup>2</sup> Ulio Xuziro Diuzi desde tiempote gacale ben' quienē' según ca unanē' huenē' quiele. Lao na'a Bichi Be quienē' ulionē' le'e tacuenda inaole xneza Jesucristo yeyēri guicho laxta'ole por nun quie gutinē' lē'ē yaga cruzo ulato ren quienē'. Rulidza' Diuzi ta huela'iyané' le'e cuēchinē' chizi lu'u guicho laxta'ole.

*Rbezaro dza yeyoro guibá*

<sup>3</sup> Huero Diuzi, ben' naca Xuzi Señor quiero Jesucristo, ben' ze. Beyēchi'la'adyi'nē' ra'o, banaca quiero ca quie ben' bagolo tacubi. Lena' rbezaro dza yeyi'nē' ra'o gata' yela' neban quiero tuzioli cabē' bēnē' quie Jesucristo, psebannē' lēbē'.

<sup>4</sup> Cana' yega'nnan quiele ca ta pcueza Diuzi guibá gunnē'n quiele. Ca ta gun Diuzi nacan huen gula, binaquixin ni tu tamala. Biyeyudyi yedu yeyulan tuzioli.

<sup>5</sup> Nun quie naole xneza Jesús, nacui'o Diuzi le'e conlē yela' huaca quienē' hasta dza yeyudyi yedu quie dyilayu bade yela' neban quiele tuzioli. Hora na', hora yeyudyi yedu dyilayu, ulu'e Diuzi le'e ca tadya'a gula bapcuezē' quiele guibá.

<sup>6</sup> Quie lena' redaohuele ba'ala'cazi rnaban yedzagalaole taze tu tiempo dao' tacuenda ilē'ē Diuzi chi du guicho du la'adyi'le naole xnezē'.

<sup>7</sup> Rnaban udze'ro yo lagui' ta racan ca oro ta gaca prueba chi tali nacan oro. Lēscan' le'e, rnaban gacale prueba ilē'ē Diuzi chi du guicho du la'adyi'le naole xnezē'. Na' chi biusanle xneza Jesús, lena' zaca'ran ca zaca' oro. Lena' yeyula'adyi' Diuzi le'e yēbinē' bēle huen, yeron dya'a quiele laonē' dza yeguida Jesucristo.

<sup>8</sup> Le'e nedyē'ēle Jesucristo ba'ala'cazi binelē'ēlenē'. Caora na' nun quie naole xnezē' ba'ala'cazi binelē'ēlenē', zudyi'ilēlenē'. Tantozi redaohuele, birdzelele di'idza' inale cabē' naca yela' redaohue quiele.

<sup>9</sup> Cuenda quie naole xneza Jesucristo, cana' biiniti bichi be quiele, cana' bade yela' neban quiele tuzioli.

<sup>10</sup> Yaca ben' unita' tiempote, ben' psēdi guichi quie Diuzi, psēdijē' ca cule hue Diuzi quiele gata' yela' neban quiele tuzioli, na' unajē' quie tadya'a gula de quie Diuzi gunnē' quiele.

<sup>11</sup> Dza na' use'ela' Cristo Bichi Be quienē' ta uzioñe'enē' yaca ben' psēdi guichi quie Diuzi tiempote. Bzioñe'enē' lējē' tu ta binegaca quie Cristo. Bzioñe'enē' lējē' cabē' yedzagalao Cristo, pero caora yeyudyi yedzagalaonē', gapala'n yaca benē' lēbē' taze gula. Psēdijē' ca ta bzioñe'e Bichi Be quie Cristo lējē'. Bējē' pensari nu guida. Bējē' pensari bata gaca cana'.

<sup>12</sup> Pero bzioñe'e Diuzi lējē' de que cabē' bedzelejē' psēdijē' bigucan para lējē', guacazin para ra'o. Desde guibá use'ela' Diuzi Bichi Be quienē' ta gacalēnē' yaca ben' rguixogue' xti'idza' Diuzi ta px'i'idze'jē' le'e con cabē' una



ja ben' unita' tiempote. Pues lente ja ángel re'enjè' isèdijè' con cabè' una yaca ben' unita' tiempote.

*Re'en Diuzi gacaro ben' laxta'o yèri*

<sup>13</sup> Quie lena' sule listo tzu'u'le gracia. Sudyi'ilèle Diuzi cuezale dyè'èdi ca tadya'a gula gaca quiele dza yeguida Jesucristo.

<sup>14</sup> Ca rale ži'iro quiero, cana' reya'ala' galele quie Diuzi. Bihuele ta rnazin quiele cabè' bèle dza na', dza caora binenaole xneza Jesús.

<sup>15</sup> Ta reya'ala' huele, reya'ala' gacale ben' laxta'o yèri, porque Diuzi, ben' ulionè' le'e, naquè' ben' laxta'o yèri gula.

<sup>16</sup> Porque rnèn lè'è guichi la'ya quie Diuzi cani: “Gacale ben' laxta'o yèri, porque naca Diuzi ben' laxta'o yèri gula.”

<sup>17</sup> Chi ulidzaro Diuzi yèbironè': “Xuzindo' luè'”, tana' reya'ala' gaparo cuidado bibi huero tu lala rdaro lao yedyi layu, porque nezi Diuzi nu ra'o rue tahuen, nu ra'o rue tamala. Tuzi ca nezi Diuzi quiero.

<sup>18</sup> Pues bapte psela Diuzi ra'o. Babecubinè' pensari quiero ta bira huero tamala ca ta mala bè xuzixta'oro. Ta bè Diuzi quiero ruenan ca quie ben' ya'ohue ra'o. Pero dyè'èdi nezile quele con ta yeyudyi yedu quie como ca oro o plata ya'ohue Diuzi ra'o,

<sup>19</sup> pero conlè ren quie Cristo ya'ohue Diuzi ra'o. Lèbè' gutiguè' lè'è yaga cruzo ca gun quie Diuzi ulato ren quienè'. Naquè' ca quie tu beco' ži'ila' dya'a gula ta hue'ro Diuzi.

<sup>20</sup> Tu binegata' yedyi layu una Diuzi ise'elè' Cristo lao yedyi layu. Na'ra tiempo quiero, tiempo rdaro lao yedyi layu, bapsee'ela' Diuzi Cristo bidanè' bènè' tadya'a quiero.

<sup>21</sup> Lao na'a Cristo naoro xneza Diuzi. Pseban Diuzi Cristo, bènè' lèbè' ben' ze. Por nun quie dan' zudyi'ilèro Diuzi, cana' rbezaro dza yezi'nè' ra'o.

<sup>22</sup> Na'ra le'e, barue quiele di'idza' li quie Diuzi, baneyèri guicho laxta'ole lao Diuzi tacuenda idyè'èle yaca ben' bichiro. Du baneyèrile lao Diuzi, cana' du guicho du la'adyi'le reya'ala' idyè'èle ben' bichiro, yaca ben' nao xneza Jesús.

<sup>23</sup> Banaca quiele ca quie ben' bagolo tacubi, pero quele por nun quie xuzile žna'le, den' por nun quie xti'idza' Diuzi. Pues quie xti'idza' Diuzi, biyeyudyi yedu quien, nebannan tuzioli.

<sup>24</sup> Cana' rnèn lè'è guichi la'ya quie Diuzi cani: Yugo benè' naca quiejè' ca quie guizi, como tu chopa dzazi yeyudyi yedu quiejè'.

Lëscan' nacarè ta de quiejè' ca quie yo guixi', como lëzirè tu chopa dzazi yeyudyi yedu quien.

<sup>25</sup> Pero xti'idza' Diuzi, tuzioli biyeyudyi biyedu quien. Rguixogue'n quie yela' neban tuzioli. Lèdi'idza' na', di'idza' la'ya quie Diuzi, lena' baodixogue' yaca benè' le'e.

## 2

<sup>1</sup> Quie lena' bireya'ala' huele ni lè'èti' tamedian. Bisi'le benè' yè', biinaole chopa neza, biyezè'le benè', bihue'lèle benè' di'idza' bižu.

<sup>2</sup> Ca bdao' zagolo are'embì' ga'adyibi' ta si'bi' fuerza, cana' reya'ala' gue'enle isèdile xti'idza' Diuzi ta si'le fuerza inaorale mazara xneza Jesús, inita'le dya'a laohuè'.

<sup>3</sup> Cana' re'ennan huele chi tali aoyoñe'ele naca Señor quiero ben' la'ya.

*Naca Cristo ca quie yo naban zaca'n taze*

4 Ulenao Cristo, ben' naca ca quie tu yo naban zaca'n taže, pero uru'un yaca benë' len tzala'la. Pero Diuzi sí, bezi'në' lëbë' rlë'ënë' lëbë' ca quie tu yo naban zaca'n taže.

5 Cana' ruerë Diuzi conlë le'e. Rlë'ënë' le'e ca quie tu yo naban, ben' rue quie lëbë'. Rlë'ënë' le'e ca quie tu idao' ga zu Bichi Be quienë'. Rlë'ënë' le'e ca quie yaca pxuzi la'iya, ben' rudyia gun quienë' lao ru'aba por nun quie Jesucristo, lega reyunla'adyi' Diuzi len.

6 Quie lena' rnën lë'ë guichi la'iya quie Diuzi cani:

Ise'ela' zi'ina' ciudad Sión, naquë' ca quie yo belao, yo zaca' taže.  
Nutezi sudyi'ilë lëbë', huaron dya'a quienë' laohua'.

7 Para ra'o, ben' nao xnezë', naca Jesús ca quie tu yo zaca'n taže. Pero para ben' binao xnezë', naca Jesús ca quie tu yo ta bibi zaca', na' aoru'unyaquë' lëbë' tzala'la. Quie lena' naca quieyaquë' con cabë' rnën lë'ë guichi la'iya quie Diuzi cani:

Aoru'un yaca benë' tzala'la yo belao, yo zaca'n taže, pero Diuzi babezi'në' yo belao ta uru'un benë', bezunë'n xlaton.

8 Lëscan' ga tula rnën lë'ë guichi la'iya quie Diuzi cani:

Naquë' ca quie tu yo ruxitin yaca benë'.

Cana' rnën lë'ë guichi la'iya quie Diuzi. Pues uxitin leyaquë' huabiagu'j'ë' nun quie bibëj'ë' casa quie xti'idza' Diuzi. Cana' una Diuzi gaca quiejë'.

#### *Ta huero dyin quie Diuzi suro lao yedyi layu*

9 Pero le'e, ulio Diuzi le'e, nacale familia quienë'. Lëscan' naca quiele ca quie yaca pxuzi ruzu di'idza' quie nu rey. Nacale ben' nayëri laxta'ohue lao Diuzi. Nacale ladyina'a Diuzi. Cana' naca quiele cuenda quixogue'le benë' cabë' rue Diuzi, ruenë' tahuen gulatzegue. Lëbë' ulionë' le'e ga yuu'ule udale lao lato lao chula, pero na'a aberole rdale lao lato lao xni'.

10 Dza na'te binacale ladyina'a Diuzi, pero na'a sí, banacale ladyina'anë'. Dza na'te biyëchi'la'adyi' Diuzi le'e, pero na'a sí, abeyechi'la'adyi'në' le'e.

#### *Rnë Pedro cabë' reya'ala' hue yaca ben' nao xneza Jesús*

11 Bicha', nedyë'ëda' le'e, rnabayëcha' laole como ben' naca ladyina'a Diuzi, como ben' zu lao yedyi layu tu chi'zi, biinaole neza mala huele ta rnazin quiele, porque dan' chi huele cana', ruen zudyi yega'nle mala lao Diuzi.

12 Reya'ala' tzirole neza dya'a lao yaca ben' birue quie xti'idza' Diuzi. Yela' na' ba'ala'cazi chi rudyiala'adyi'j'ë' le'e inayaquë' ben' mala le'e, hualë'ëcazi'j'ë' ziole neza dya'a. Cana' cati idyin dza gaca juicio, ba'ala'cazi bire'enjë', decazide huejë' Diuzi ben' ze.

13 Por nun quie Señor quiero, reya'ala' galele quie yugulu ja ben' rnabë' nita' lao yedyi layu. Reya'ala' galele quiejë' la'achi ben' rnabë'ra, ben' rey,

14 la'achi ben' rnabë'tica, ben' rue castigo yaca ben' rue xquia, o chi ben' rue bala'ana yaca ben' rue tahuen.

15 Porque re'en Diuzi huele tahuen ta bigata' causa quiele inë yaca ben' binezi, yaca ben' tondo, condre le'e.

16 Ca ben' libre reya'ala' huele, pero bihuele pensari ru'en lato huele tamala dan' nacale ben' libre. Nacalan dya'a huele tahuen ca reya'ala' hue yaca ben' quie Diuzi.

17 Reya'ala' gapala'nle yugulu benë'. Reya'ala' idyë'ële ben' bichiro, ben' nao xneza Jesús. Reya'ala' tzionla'adyi'le Diuzi. Reya'ala' gapala'nle yaca ben' rnabë'.

#### *Reya'ala' huerëro cabë' bë Jesús*

18 Le'e ben' nada'o, ulegale quie xa'nle, la'acazi ben' rue tahuen quiele, la'alacazi ben' rue tamala quiele.

<sup>19</sup> Porque tahuen na' chi suero huezela'adyi'ro biidza'ro caora cati racaro castigo dula' quie ben' tula, cala dula' quiero. Pues suero biidza'ro, porque nacaro ben' rue bala ca bala pca'n Diuzi lao na'aro.

<sup>20</sup> Pero chi racaro castigo, dan' tabala bëro mala, bireya'ala' huero pensari nacaro ben' huen, la'acazi suero huezela'adyi'ro biidza'ro quie castigo quiero. Pues cana' reya'ala' huero como cuinziro naparo dula'. Pero chi racaro castigo ba'ala'cazi bëro tadya'a, chi bidza'ro huezela'adyi'ro castigo quiero, lena' nacan huen lao Diuzi.

<sup>21</sup> Quie lena' ulio Diuzi le'e guca Jesús castigo dula' quiero, pero uzuenë' bezela'adyi'në' blu'enë' le'e cabë' reya'ala' huele inaole xnezë'.

<sup>22</sup> Ni tu bibi tamala bë Cristo, ni tu nunu uzi'në' yë'.

<sup>23</sup> Caora ptasi bnio yaca benë' lëbë', biguca lënë' leyaquë' lëbi. Caora psaca benë' lëbë' bizinaquezi, bibzëgadyinë' quieyaquë', den' ulezanë' hue Diuzi juicio.

<sup>24</sup> Lëbë' gutinë' lë'ë yaga cruzo aodizuguë' quie xquia quiero. Guta' castigo quienë' tacuenda bigata' castigo quiero, na' bira inao dula' xquia quiero ra'o. Yela' guti quienë' guta' yela' naban quiero tuzioli.

<sup>25</sup> Dza na'te bëro ta rnazin quiero, guca quiero ca quie tu beco' zi'ila' aoniti tu neza. Pero na'a rnaoro xneza Cristo. Rapa Cristo ra'o ca quie beco' zi'ila' bia rapa xa'ne lëba'.

### 3

#### *Cabë' reya'ala' hue yaca ben' aozij'a laquedyi*

<sup>1-2</sup> Na'ra le'e yaca nigula bazu ben' quie, re'enda' inia' le'e tu di'idza'. Reya'ala' galele dyë'di quie be'mbyu quiele. Chi rdale neza huen galele quie be'mbyu quiele, pero binao be'mbyu quiele xneza Jesús, gala' inaonë' xneza Jesús nun quie blë'ënë' rdale neza huen, rapala'nle Diuzi.

<sup>3</sup> Lëscan' nia' le'e bireya'ala' upa'ale guichole taže. Bireya'ala' uzutza'ole cunle conlë la'ari' tzao', o conlë oro.

<sup>4</sup> Ta reya'ala' huele, inaole cabë' rnën pensari quie Diuzi yu'u lu'u guicho laxta'ole. Huele gaxo, bihuele ru'be. Lena' zaca'n lao Diuzi. Hueyudyi quie tatzao', pero tu ta zaca'n lao Diuzi biyeyudyin.

<sup>5</sup> Cana' bë ja nigula unita' dza na'te, yaca nigula bë quie xti'idza' Diuzi. Uzudyi'lëjë' Diuzi, udapala'një' be'mbyu quiejë'.

<sup>6</sup> Cana' bë Sara dza na'te, udapala'nnë' be'mbyu quienë', Abraham. Uda-panë' lëbë' bala'ana ca xan' yu'u. Chi huele tahuen sudyi'ilële Diuzi, cana' gaca quiele ca quie zi'isuba Sara.

<sup>7</sup> Na'ra le'e yaca be'mbyu bazu ben' quie, re'enda' inia' le'e tu di'idza'. Reya'ala' tzu'ule dya'a conlë nigula quiele. Reya'ala' gapala'nleyaquë' huezela'adyi'leyaquë', porque binapajë' fuerza cabë' le'e. Cana' reya'ala' huele, porque bega'nle' Diuzi lëjë' di'idza' gata' yela' neban' quiejë' tuzioli tuzi ca bega'nlenë' le'e di'idza'. Ulehue cabë' nia', porque chi bihuele cabë' nia' ni, bibi zaca' rulidzale Diuzi.

#### *Cati rue yaca ben' mala ra'o bizinaquezi, bigacalërojë' lëbi*

<sup>8</sup> Reya'ala' tuzi pensari huele. Reya'ala' sulële yaca ben' bichile, ben' nao xneza Jesús dya'a. Reya'ala' yeyëchi'la'adyi'lejë', huele gaxo conlë lëjë'.

<sup>9</sup> Chi rue yaca ben' mala len le'e bizinaquezi, chi rutasi runiojë' le'e, bigacalëlejë' lëbi. Nacalan huen huele tadya'a quiejë', porque cati ulio Diuzi le'e bënë' tadya'a quiele.

<sup>10</sup> Cana' reya'ala' huele, porque rnën lë'ë guichi la'iya quie Diuzi cani:

Nu ben' re'en inita' dya'a, ben' re'en su contento, bireya'ala' udyiala'adyi'jè' si'jè' benè' yè'.

11 Reya'ala' usanjè' tamala, na' huejè' tahuen. Reya'ala' cue'jè' chizi lèjè' benè'.

12 Cana' re'ennan, porque rapa Xuziro Diuzi ben' nayèri laxta'ohue, renè' caora rulidzajè' lèbè', pero huaguizu Diuzi castigo quie ben' mala.

13 Na' rnaba' le'e tu pregunta: ¿Nuži sue huejè' tamala quiele chi huele puro tadya'a quiejè'?

14 Chi rue yaca benè' tamala quiele, la'acazi ruele tahuen quiejè', hue'la'iyatzegue Diuzi le'e. Biidzebile bigalele quie yaca ben' rue tamala quiele.

15 Reya'ala' gapala'nle Cristo du guicho du la'adyi'le como ben' naca xa'nro. Reya'ala' isèdile huele pensari ta iquèbile dyè'èdi chi nu ben' inaba le'e bixquien' naole xneza Jesús.

16 Reya'ala' tzu'ule neza dya'a ta su chizi laxta'ole. Chi huele cana', gata' yela' stu' quie yaca ben' rao le'e xquia. Yedue'jè' cabè' rnèjè' cati ilè'èjè' naole neza dya'a, ralele quie Cristo.

17 Zaca'n lao Diuzi huezela'adyi'le yedzagalaole ba'ala'cazi bèle tahuen, chi cana' re'en Diuzi, pero bizaca'n lao Diuzi, chi dula' quiezile yedzagalaole bèle tamala.

18 Guti Cristo lè'è yaga cruzo ta yezi dula' xquia quiero de tzalasagazi. Ni tu xquia binuenè', pero gutinè' lao laza ra'o, ben' napa dula' xquia, tacuenda tzu'ulèro Diuzi tuže, na' gacaro ben' quienè'. Dyin quie yaca benè' gutinè', pero lao na'a Bichi Be quie Diuzi bebannè' tatula.

19 Pero tu gutinè' binebannè' uyonè' yetixogue'nè' di'idza' quienè' lao ja bichi be quie yaca ben' gutija cana'te, yaca ben' naca preso rbezajè' gata' castigo quiejè'.

20 Bigulejè' quie Diuzi caora unita'jè' tiempo aode cana'te, tiempo caora uzu tu ben' lao Noé. Uzu Diuzi ulezè' utza'yaquè' pensari quiejè' tu lala zu Noé ruenè' barco, pero biptza'jè' pensari quiejè'. Quie lena' udyiagu'jè' gutijè' lu'u nisa. Xunayaquè' bega'n, bigutijè' lu'u nisa.

21 Lena' nacan ca quie bautismo quie ja ben' nao xneza Cristo. Cabè' guca quieyaquè' ulayaquè' lao nisa, cana' nacarè' quiero, apsela Diuzi ra'o. Bibi dyin hue bautismo ta tzèri cuerpo quiero, pero hue bautismo dyin caora aonabaro Diuzi si'zenè' quie xquia quiero. Caora na' gun Diuzi yela' neban tuzioli quiero nun quie guti beban Jesucristo.

22 Naca Jesucristo ben' beyèpi zeyo guibá. Zunè' zaquè' yebè quie Diuzi ga rnabè'nè' lao ja ángel len lao ja yugulute ben' rnabè' yu'uja guibá.

## 4

### *Reya'ala' hue quiero xti'idza' Diuzi du guicho du la'adyi'ro*

1 Como bedzagalao Jesucristo, gutinè' lè'è yaga cruzo, lèscan' le'e, reya'ala' sule dispuesto yedzagalaole. Porque chan' yedzagalaole, lena' gacalèn le'e ta biinan quiele huele xquia.

2 Lèscan' huacalèn le'e inaole tadya'a huele cabè' re'en Diuzi huele dza rdale lao yedyi layu.

3 Zi'tela abèle tamala cana'te. Abèle tamala ca yaca ben' binezi quie Diuzi. Abèle tamala cabè' unan quiele. Udale hue'e, uzudyile, bèle lani, bèle ru'be, uyonla'adyi'le yaca ídolo quiele ta naca bayatza gula.

4 Pero na'ra yaca ben' binezi quie Diuzi rdza'jè' le'e, porque bira tzu'ulèlejè' tuže yela' mala quiejè'. Quie lena' rudyiala'adyi'jè' le'e.

<sup>5</sup> Pero huadyincazi dza gaca juicio quiejè' lao Señor quiero Jesucristo, ben' ichugubè' quie len yaca ben' aguti, yaca ben' naban.

<sup>6</sup> Quie lena' uyo yaca benè' yetixogue'jè' xti'idza' Diuzi lao yaca ben' unita' tiempote cuenda gata' yela' neban quiejè' tuzioli lao na'a Bichi Be quie Diuzi, ba'ala'cazi cati bdyin dza quiejè' gutiyaquè' cabè' gaca quie yugulu benè'.

<sup>7</sup> Baidyin dza yeyudyi yedu quie dyila yu. Quie lena' tzu'u'le pensari huen ulidzale Diuzi du guicho du la'adyi'le.

<sup>8</sup> Pero ta nacara belao idyè'èle laguedyile, porque lena' gacalèn le'e si'zele quiejè' caora rapajè' falta.

<sup>9</sup> Reya'ala' gapachi'le laguedyile zan yu'u quiele dyè'èdi, bitilale leyaquè'.

<sup>10</sup> Como ben' napa dyin quie Diuzi, gacalèle laguedyile según ca banegun Diuzi quie quiele.

<sup>11</sup> Yaca ben' bè' Diuzi laze quixogue'jè' xti'idza'nè', reya'ala' quixogue'jè'n ca ben' rnè' quie Diuzi. Lèscan', yaca ben' bè' Diuzi laze gacalèjè' laguedyijè', reya'ala' gacalèjè' lèjè' conlè fuerza valor ru'e Diuzi lèjè'. Yugulu ta ruele, huelen lao na'a Jesucristo tacuenda hue yaca benè' Diuzi bala'ana. Naca Jesucristo ben' zecazi, ben' de yela' huaca quie tuzioli. Amén.

### *Biidzebiro yedzagalaoro inaoro xneza Jesús*

<sup>12</sup> Bicha', ben' nadyè'èda', caora raca zèdi quiele nun quie rue Diuzi le'e prueba, bidèbile bihuele pensari tamala raca quiele.

<sup>13</sup> Mejorla yedaohuele caora rusaca benè' le'e tamala nun quie naole xneza Cristo, porque tahuen gula yega'nnan quiele yedaohuetzeguele caora yeguida Jesucristo ilè'è yaca benè' naquè' ben' zecazi.

<sup>14</sup> Chi rutasi runio yaca benè' le'e nun quie naole xneza Cristo, reya'ala' yedaohuele, porque lena' rulu'en yu'ule Bichi Be quie Diuzi lu'u guicho laxta'ole. Rutasi runio yaca benè' Cristo, pero le'e reya'ala' ruelenè' ben' ze.

<sup>15</sup> Chi redzagalaole nun quie bètile benè', o chi ulanle quie benè', o chi bèle tamala, o chi bda' quiele ta bireya'ala' uda' quiele, reya'ala' yedue'le.

<sup>16</sup> Pero chi redzagalaole nun quie naole xneza Cristo, na' bireya'ala' yedue'le, reya'ala' yedaohuele.

<sup>17</sup> Aruen bago dza gaca juicio quie lao yugulu benè'. Huazulaona len ra'o, ben' nao xneza Jesús. Pero chi sulaona len ra'o, ben' nao xneza Jesús, bayèchi' gula gaca quie yaca ben' bibè quie xti'idza' Diuzi.

<sup>18</sup> Lena' rnèn lè'è guichi la'ya quie Diuzi cani:

Chi canezi ula yaca ben' laxta'o yèri, zbiži gaca quie yaca ben' mala?

<sup>19</sup> Tana', chi rusaca yaca benè' le'e bizinaque nun quie naole xneza Cristo cabè' re'en Diuzi, bïusanla'adyi'le huele tahuen sudyi'ilèle Diuzi, ben' bzalo ra'o. Uzucazi Diuzi di'idza' quienè' cabè' unè' huenè'.

## 5

### *Bè' Pedro tu consejo quieyaquè'*

<sup>1</sup> Le'e ben' napa dyin quie Diuzi, re'enda' guna' le'e tu consejo. Nè'èdi' nacaria' ben' napa dyin quie Diuzi. Naca' testigo blè'èda' bedzagalao Cristo gutinè' lè'è yaga cruzo. Lèscan' conlè yaca los demás ben' napa dyin quie Diuzi, huazulia' Cristo bè' yeguidè' ulu'enè' yela' huaca quienè'.

<sup>2</sup> Ca ben' rapa beco' zi'ila' quie, cana' reya'ala' gapale ben' nao xneza Jesús, ben' naca cuenda quiele. Pero lèscana' du guicho du la'adyi'le huele bala quiele ca re'en Diuzi huele, bihuele ben' zuzile gan, ben' rza'la'adyi' len.

<sup>3</sup> Biinabè'le zi'laza ben' naca cuenda quiele como si fuera nacale xa'nyaquè', pero tzu'u'le neza dya'a usèdilejè' inaøjè' neza ca neza rnaole le'e.

<sup>4</sup> Cana' cati yeguida ben' naca pastor belaora, huega'n tadya'a quiele lao Diuzi tuzioli.

<sup>5</sup> Lëscan' le'e, ben' ru'abe, re'enda' guna' le'e tu consejo. Reya'ala' galele quie yaca ben' napa dyin quie Diuzi. Yugulule reya'ala' galale gacale gaxo conlë laguedyile, ben' nao xneza Jesús, porque cana' rnën lë'ë guichi la'iya quie Diuzi cani:

Biraxe Diuzi ben' rue že cuine, pero racalë Diuzi ben' naca gaxo.

<sup>6</sup> Reya'ala' gacale ben' gaxo lao Diuzi, porque idyin dza gue'en Diuzi, caora na' huenë' le'e ben' že.

<sup>7</sup> Bidëbile chi bi tu ta raca quiele. Usedyinle tazëdi quiele lao Diuzi como dan' zu Diuzi rapanë' le'e.

<sup>8</sup> Gapale cuidado quie xan' taxi'ibi', porque rdanan re'ennan udyiagui'nan benë'. Ca rue león bë' rueba' snia, rdaba' rguiloba' ta gaoba', cana' rda xan' taxi'ibi' reguilonan benë'.

<sup>9</sup> Bigalele quienan, galele quie Diuzi. Bigala'adyi'le rdanan duže yedyi layu ruenan ta yedzagalao yaca los demás ben' bichiro, ben' nao xneza Jesús, lëscan' ca le'e.

<sup>10</sup> Te yeyudyi yedzagalaole ilë'ëti'zi, caora na' Diuzi huenë' le'e ben' laxta'o yëri, ben' rue quie xti'idzë', ben' rzudyi'ilë lëbë', ben' tzazulë lëbë' tuzioli. Tantozi nedyë'ë Diuzi ra'o, ulionë' ra'o cuenda nuelëro Jesús tuže, yeyoro guibá sulëronë' tuzioli.

<sup>11</sup> Naca Jesucristo ben' de yela' huaca quie tuzioli. Amén.

### *Rugapa Pedro lëj'ë' diuzi*

<sup>12</sup> Bia' guichi dao' ni use'ela'n laole lao na'a Silvano ta guna' le'e yaca consejo. Naca Silvano ben' bichiro, ben' nao xneza Jesús, ben' zudyi'ilëro. Lëscan' bia' guichi ni ta nuxela'adya' le'e inezile nadyë'ë Diuzi le'e. Naca prueba nedyë'ënë' le'e bëla'iyänë' le'e taže. Ulenao xnezë', biyehuëdile.

<sup>13</sup> Na'ra yaca ben' nao xneza Jesús, ben' nita' ciudad Babilonia, ben' uliorë Diuzi lëscan' ca le'e, rugapajë' le'e diuzi. Lëzi Marcos, ben' naca ca ži'ina', rugapanë' le'e diuzi.

<sup>14</sup> Ugapale yaca ben' bichiro, ben' nao xneza Jesús, diuzi. Como ben' bichiro gaole tu situ xagajë'. Rulidza' Diuzi cuëchinë' chizi lu'u guicho laxta'ole yugulule. Amén.

## GUICHI URUPE BÈ SAN PEDRO APÓSTOL

### *Bè Pedro guichi ni, use'ela'nè'n lao yaca ben' nao xneza Jesús*

1 Nè'èdi', Simón Pedro, naca' ben' rue mandado quie Jesucristo. Naca' apóstol quienè'. Bia' guichi ni use'ela'n lao le'e, yaca ben' rnaorè xneza Jesucristo cabè' nao nètò' xnezanè'. Yela' ben' justo quie Xuziro Diuzi Jesucristo rlè'ènè' tuzi ca rlè'ènè' ra'o.

2 Rulidza' Diuzi ta huela'iyane' le'e taže cuèchinè' chizi lu'u guicho laxta'ole como dan' rioñe'ele ruele tuže conlè Diuzi lènè' Señor quiero Jesús.

### *Rnè Pedro cabè' reya'ala' hue yaca ben' nao xneza Jesús*

3 Conlè yela' huaca quienè', banegun Diuzi fuerza valor quiero ta inaoro xnezè' dza rdaro lao yedyi layu, na' gacaro ben' laxta'ò yèri. Cana' bènè' quiero caora cati gualènè' ra'o ta tziòñe'ero galero quie Cristo, ben' ulio ra'o, ben' že gula, ben' rue puro ta yu'u ni'a xnezi.

4 Cana' bè Diuzi quiero bega'n lènè' ra'o di'idza' ta gacalènè' ra'o ute uselanè' ra'o quie tamala de lao yedyi layu, na' gacaro ben' yèri cabè' nayèri Diuzi. Cana' biudyiaguin' ta rnazin quiero ra'o.

5 Quie lena' ruen dyabè' galele quie Diuzi du guicho du la'adyi'le tale neza dya'a. Lèscan' ruen dyabè' tziòñe'ele huele cabè' na Diuzi

6 gapale cuidado bihue'le lato inabè' ta rnazin quiele le'e huele tamala. Lèscan' ruen dyabè'

7 yeyèchi'la'adyi'le ben' bichiro, ben' nao xneza Jesús, idyè'èle yugulu benè'.

8 Chi tziòle huele cana', na' biten cana'zi dza rdale lao yedyi layu, biten cana'zi unaole xneza Jesucristo, ben' naca Señor quiero.

9 Pero chi bitziòle huele cana', nacale ca quie tu ben' laochula, ben' birlè'è dya'a, porque agula'adyi'le cabè' bè Diuzi quiele uzi'zenè' quie dula' xquia quiele ta bèle tiempote.

10 Quie lena', bicha', nun quie bè Diuzi nombrar le'e, huele dyabè' hue quiele ca nia' niga. Chi huele cana', na' biiquixile inaole xneza Jesús dyè'èdi gula.

11 Chi huele cana', na' huesalo Diuzi puerta guibá ta tzetzu'ule tzesule tuzioli ga rnabè' Señor quiero Jesucristo, ben' pte psela ra'o.

12 Quie lena' biusana' inia' le'e ta bigalala'adyi'le cabè' reya'ala' huele, ba'ala'cazi banezile dyè'èdi barue quiele di'idza' lí quie Diuzi.

13 Tu lala rda' lao yedyi layu, nacan bala quia' guna' le'e consejo ca consejo bèna' le'e niga.

14 Baona Señor quiero Jesucristo nè'èdi' de que ruen bago dza gatia'.

15 Quie lena' pca'na' di'idza' quia' laole cuenda bigala'adyi'le cabè' consejo bèna' le'e dza uda' lao yedyi layu.

### *Ni nan quie yela' huaca quie Jesús*

16 Caora unando' bzioñe'endo' le'e quie yela' huaca quie Señor quiero Jesucristo, quele cuento ulio ben' rzi' yè' bzioñe'endo' le'e, porque nètò' blè'èndo' yela' huaca quienè'.

17 Lèzi blè'èndo'nè' caora bè Diuzi lèbè' ben' že. Bendo' rchi' Diuzi caora unènè' dyè'èdi nanè' nètò': "Zi'ina' ben' niga. Lega nedyè'èda'bi' raxeda' ca ruebi'."

<sup>18</sup> Bendo' rchi' Diuzi za'n guibá caora nita'lëndo' Jesús lao ya'a ga betza' zabané' gucan bezéri di raca titi'.

<sup>19</sup> Quie lena' nacan bala cabé' una yaca ben' unita' tiempo, yaca ben' uidxogue' xti'idza' Diuzi. Napale razón ruele cuenda cabé' unajé', porque naca di'idza' unajé' ca quie xni' gui' rseni'na ga naca chula cuenda il'éro ga zioro hasta yeguidara Jesucristo huené' gaca yeni' gula lu'u guicho laxta'oro.

<sup>20</sup> Re'enda' inia' le'e tu di'idza' naca belao. Nunu saque' tzioñe'e di'idza' la'iya quie Diuzi según pensari quieziyaqué', dechan' según cabé' rna Bichi Be quie Diuzi tzioñe'eyaqué'n.

<sup>21</sup> Pues yaca ben' na', ben' unita' tiempote, quele bzujé' di'idza' l'é'e guichi ta racazi la'adyi'jé', pero como nacajé' ben' la'iya quie Diuzi, bzujé' di'idza' l'é'e guichi cabé' mandado bē Bichi Be quie Diuzi quieyaqué'.

## 2

### *Ni nan cabé' rue ja ben' huezi' yé' (Judas 4-13)*

<sup>1</sup> Lao ja ben' Israel, uyu'uré ben' huezi' yé'. Unajé' quie Diuzi najé', pero bē' nazijé' uzi'jé' yé'. Lēzi cana' le'e, huayu'uré ben' naca maestro si'jé' yé' laole. Balarazi ruzioñe'ejé' bené' di'idza' huizi' yé', inajé' di'idza' li ruzioñe'ejé'. Cana' huejé' si'jé' yé' udyiaguí'jé' bené' huejé' condre Cristo, ben' udižu xquia quie yugulu bené'. Quie lena' tu sasazi udyiaguí' Diuzi lējé'.

<sup>2</sup> Huanao ben' zē neza mala quiejé' huejé' ta rnazín quiejé'. Dula' quiejé' ina yaca bené' binaca dya'a xneza Jesús.

<sup>3</sup> Yela' rza'la'adyi' dumi quiejé' rzi'jé' le'e yé' inajé' le'e di'idza' huezi' yé'. Pero udyiaguí' Diuzi lējé', biilajé'. Desde cana'te banucueza Diuzi castigo quiejé'.

<sup>4</sup> Caora cati bē bala ja ángel xquia dza na'te, biuzi'ze Diuzi quie xquia bējé'. Pues na' bē Diuzi mandado tzu'ujé' ga naca chula tziojé' lagui' gabila iriojé' caden cuenda cuezajé' dza gaca juicio quiejé'.

<sup>5</sup> Lēzi cana' biuzi'ze Diuzi quie xquia bē yaca ben' unita' cana'te. Bēnē' mandado gaca nisayo yusiu' lao chopa galo dza cuenda yedza'jé' nisa gatijé'. Nun quie tamala bējé', bdyiaguí' Diuzi lējé'. Tuzi ben' lao Noé lēnē' igadyi familia quienē' bega'njé' psela Diuzi lējé'. Pero gudyi Noé ja ben' unita' tiempo de quie re'en Diuzi inaojé' xnezé' huejé' tadya'a, pero bigulejé' quie Noé.

<sup>6</sup> Lēzi cana' bē Diuzi juicio lao yaca ben' nita' ciudad Sodoma len yaca ben' nita' ciudad Gomorra. Bzei Diuzi lējé', dan' bējé' puro tamala. Lente ciudad quiejé' bzei Diuzi len bega'nnan gucan puro de. Cana' bē Diuzi quie ja ben' na' ta il'é ja ben' zaza' de que bire'en Diuzi huejé' cabé' bē ja ben' na'.

<sup>7</sup> Pero tu ben' lao Lot, bibdyiaguí' Diuzi lēbē', ba'ala'cazi naqué' ben' ciudad Sodoma, dan' naca Lot ben' bē quie xti'idza' Diuzi. Guque Lot bayēchi' bē' blē'ēnē' cabé' ta bayatza gula bē ja ben' ciudad quiené'.

<sup>8</sup> Cana' uzu laxta'ohué' bayēchi' gula yugu dza caora blē'ēnē' cabé' bē ja ben' yedyi quiené'. Puro tabayatzta ta biraxe Diuzi bējé'.

<sup>9</sup> Pero nezi Diuzi bi huené' ta uselané' yaca ben' nao xnezé' caora re'en xan' taxi'ibi' si'n lējé' yé' huejé' xquia. Lēzi nezi Diuzi bi huené' huené' castigo yaca ben' mala hasta dza gaca juicio quiejé'.

<sup>10</sup> Con yugulu ben' rue tabayatzta ta rnazín quie, ben' ružidyi ja xti'idza' Diuzi, hue Diuzi lējé' tu castigo huala gula. Pues yaca ben' na' ruejé' ze cuinjé', nacajé' ben' zidi, birdzebijé' rutasi runiojé' ben' rnabé', chi ben' zu guibá, chi ben' zu dylilayu.



11 Na'ra ba'ala'cazi nacara yaca ángel ben' rnabè' ca yaca ben' na', birutasi runio yaca ángel yaca ben' na' caora rao yaca ángel xquia yaca ben' na' lao Diuzi.

12 Pero yaca ben' na', yela' bayatza quiejè' ruejè' huabiaguijè'. Biyu'ujè' pensari. Ruejè' ca rue bia guixi'. Puro ta rnazin quiejè' ruejè'. Con bitezi ta birioñe'ejè', na' rudyiala'adyi'jè'n. Yela' naca quiejè', na' yeyula yentitijè' lao Diuzi.

13 Huanao xquia quiejè' lèjè'. Lente tedza ruejè' ta rnazin quiejè' huejè' tabayatza. Anaca quiejè' ca quie nidyì' azun lè'è la'ari' dya'a. Raxejè' gaolèjè' le'e tuze gacalejè' amigo, pero ta si'jè' le'e yè', tana' ruejè' cana'.

14 Tuzi ca pensari ruejè', re'enjè' gasilèjè' nigula binaca quiejè'. Binezijè' bi modo huejè' ta usanjè' tamala quiejè'. Rzi'jè' yè' yaca ben' zaonao xneza Jesús. Puro dumi rza'la'adyi'jè'. Pero babdze'de' Diuzi lèjè'.

15 Aoru'unjè' tzala'la xneza Jesús, banaojè' neza mala. Aruejè' cabè' bè tu ben' lao Balaam, zi'i Beor, ben' unita' cana'te. Ta huenè' gan dumi bènè' tatondo.

16 Pero bè Diuzi mandado udila tu burro lèbè'. Unè burro ca rnè benè'. Bè'lèba' lènè' di'idza' u dilaba' lèbè' cuenda usannè' bira huenè' tatondo quienè'.

17 Pero yaca ben' na', ben' rzi' yè', naca quiejè' ca quie yasa babeyu'en nisa. Naca quiejè' ca quie nisayo gupa'dao' ru'azi be bedun' len, bira bisirvejè'. Hue Diuzi mandado tziojè' gui' gabila ga naca chula tuzioli.

18 Badan gula ruejè' rnèjè' zidzo, pero bè' ruezijè', yè' rzi'jè'. Na'ra najè' nacaro libre huero ca tabayatz rnan quiero huero, pero yè' rzi'jè'. Rguilojè' nu ben' si' di'idza' quiejè', ben' zapsan neza mala quie.

19 Najè' nacajè' libre ru'en lato huejè' con biti'tezi raxejè' huejè', pero yè' rzi'jè' najè' cana', dan' puro tamala ruejè'. Biru'e yela' mala quiejè' lato huejè' tahuen. Chi huero tamala, naca yela' mala quiero ca quie xa'nro, binacaro ben' libre.

20 Pues chi apsanro neza mala quiero banaoro xneza Señor quiero Jesucristo, pero na' chi yeyu'uro neza mala quiero tatula, chi usanro xneza Cristo bira tziro inaoron, hueran mazara mala quiero.

21 Huen mala quiero chi biinaoro xneza Jesús, pero hueran mazara mala quiero chi barue quiero di'idza' la'iya quie Diuzi, na' usanron yenaoro neza mala quiero tatula.

22 Chi banaoro xneza Jesús, na' usanron, lena' ruen quiero ca rnèn lè'è guichi cani: "Areyao beco' ta babeyèbiba'. Lèscan' quie yaca cuchi, ba'ala'cazi zabgazoroba' yao, pero hueyu'ucziba' gun' tatula."

### 3

#### *Ni nan cabè' gaca cati yeguida Jesús*

1 Na'ra bicha', taurupe na' bia' guichi ni use'ela'n laole, porque re'enda' guna' le'e consejo tacuenda huele pensari ta yu'u ni'a xnezi.

2 Bigala'adyi'le cabè' una yaca ben' la'iya quie Diuzi, yaca ben' uidxogue' xti'idza' Diuzi tiempote. Lèscan' bigala'adyi'le di'idza' belao quie Señor quiero Jesucristo, ben' pte psela ra'ò. Lèdi'idza' belao na' bziõñe'e yaca apóstol le'e.

3 Nacan belao ta inezile cabè' hue yaca benè' caora idyin dza yeyudyi yedu quie yedyi layu. Ru'zidyijè' utitujè' xti'idza' Diuzi. Huejè' cabè' ta rnazin quiejè'.

4 Lèscana' utitujè' benè' nao xneza Jesús yèbijè' lèjè': "¿Bi'zi raca quie Cristo? ¿Quele unè' guidè', na' bineguidè'? ¿Bi'quien' con rbezale, na' biguidè'? Desde

dza cati guti xuzixta'oro, tuzicazi ca nacan cabè' guta' dylilayu tiempote.'  
Cana' inajè'.

<sup>5</sup> Bigue'enjè' galejè' dyin quie Diuzi guta' guibá tiempote. Lèzi bigalejè' mandado quienè' guta' xneza nisa cuenda bebidyi layu cue' nisadao' xlaton.

<sup>6</sup> Lèscan' bigalejè' mandado quie Diuzi guca nisayo yusiu' lao chopo galo dza tiempote guti yugulute ja ben' unita', aodyiagui' yugulute ta de lao yedyi layu. Cana' bè Diuzi juicio quieyaquè'.

<sup>7</sup> Pero cati idyin dza hue Diuzi juicio tatula, huayei yugulute ta de lao yedyi layu lente yugulute ta de guibá. Huachugubè' Diuzi yugulu ben' biunao xneza Jesús.

<sup>8</sup> Lèscan', bicha', bigala'adyi'le ruen quie Diuzi ca quie tu dzazi tu mila iza. Lèscan' tu mila iza ruen quienè' ca quie tu dzazi.

<sup>9</sup> Bitzè Señor quiero con ca rna bala benè', den' uzunè' di'idza' quiè' ca unè' huenè'. Naquè' ben' de paciencia rbezanè' bire'ennè' cuiagui' yaca benè'. Re'ennè' inaojè' xneza Jesús.

<sup>10</sup> Cati guida Jesús, tu sasazi guidè' cati guidè'. Guidè' caora raque yaca benè' biguidè'. Guidè' ca guida tu ben' uban caora raque benè' nunu ben' uban guida. Caora na' huabiagui' ladza. Huenan ca rue be bedun' ze gula bè' rudze' rchi'n'an cati baza'n. Lèscan' ta dyia guibá, hueyalan quie tala quie gui. Huayei yugulu ta de lao yedyi layu. Hue Diuzi juicio lao düzeten.

<sup>11</sup> Nun quie huabiagui' yugulu ta de lao yedyi layu, ruen dyabè' inaole xneza Jesús gacale ben' laxta'o yèri.

<sup>12</sup> Reya'ala' tzu'ule yedaohuele cuezale dyè'èdi dza cati yeguida Jesús lao yedyi layu. Huele ca ta reya'ala' huele cuenda yeguidanezè'. Dza cati yeguidè', dza na' tzei ta dyia guibá, hueyalan quie tala quie gui'.

<sup>13</sup> Pues ra'o niga rbezero yeguixo Diuzi yedyi layu cubi, yeyuenè' guibá cubi como cana' unanè' huenè'. Na'ra quie dylilayu cubi len guibá cubi, bira gata'n tamala, bira gata'n tabayatza.

<sup>14</sup> Quie lena' bicha', tu lala rbezale hue Diuzi cana', reya'ala' hue quiele xti'idza' Diuzi du guicho du la'adyi'le cuenda cue' chizi laxta'ole binapale dula' xquia hora cati yeguida Jesús lao yedyi layu.

<sup>15</sup> Bigala'adyi'le naca Diuzi ben' zela'adyi' gula. Zunè' rbezanè' ulidza ja benè' lèbè' inabajè' si'zenè' quie dula' xquia quiejè' gata' yela' naban quiejè' tuzioli. Cabè' rnèn lè'è guichi bia', lèscan'rè rnèn lè'è guichi bè ben' bichiro Pablo ta use'ela'nè' laole. Ca ta bzioñe'e Diuzi lèbè', lena' bzunè' lè'è guichi use'ela'nè'n laole.

<sup>16</sup> Pues lè'è yugulu guichi bè Pablo rguixogue'n ra'o cabè' reya'ala' hue quiero xti'idza' Diuzi du guicho du la'adyi'ro, dan' baza' dza yeyudyi yedu quie yedyi layu. Pero bala di'idza' bzunè' lè'è guichi nacan zèdi bitzioñe'eron. Quie lena' bala ben' binezi, ben' binetzioñe'e xti'idza' Diuzi dyè'èdi, rueyaquè' zidi uzèguichola rnèjè' retza'yaquè' xti'idza' Pablo. Hasta xti'idza' Diuzi uzèguichola rnèjè' retza'yaquè'n. Nun quie ruejè' cana', huay-ojè' lao gui' gabila.

<sup>17</sup> Quie lena', bicha', como anezile cabè' gaca dza zaza'ra, gapale cuidado biixixile bihue'le lato si' yaca ben' mala le'e yè'. Gapalè cuidado ta biixixile, porque reya'ala' inaole xneza Jesús du guicho du la'adyi'le.

<sup>18</sup> Lèscan' reya'ala' huebè'le mazara Señor quiero Jesucristo, ben' pte psela ra'o. Lèscan' reya'ala' idyè'èle lèbè' mazara. Cabè' rueronè' ben' ze, cana' hueronè' ben' ze tuzioli. Amén.

## GUICHI NĒRO BĒ SAN JUAN APÓSTOL

### *Biyeyudyi yedu quie xti'idza' Cristo*

<sup>1-3</sup> Bēndo' guichi ni use'ela'ndo'n laole rguixogue'n quie tu ben' uzu cati binegata' dylilayu. Nēto' ablē'ēndo'nē', una'ndo'nē', bendo' cabē' di'idza' unē', uda' tacando' lēbē'. Rnēndo' quie xti'idza' ben' na', ben' run yela' naban quiero, pero biyeyudyi yedu yela' neban runnē' quiero. Rnēndo' quie Jesucristo. Rnēndo' cabē' blē'ēndo' cuenda na' gacale tuze len nēto', len Xuziuro Diuzi, lēnē' zī'inē' Jesucristo. Bida Jesucristo detē'ē lao yedyi layu ablē'ēndo'nē'. Ga zu Diuzi uza'nē' bidē' ga yu'undo' blē'ēndo'nē'.

<sup>4</sup> Lena' use'ela'ndo' guichi ni laole cuenda na' sule gusto len nēto'.

### *Yeni' gula naca ga zu Diuzi*

<sup>5</sup> Niga rnēndo' le'e cabē' di'idza' una Jesucristo nēto'. Naca Diuzi ben' laxta'o yēri gula. Ni tu pensari mala biyu'u laxta'o Diuzi. Yeni' gula naca ga zu Diuzi. Ni lē'ēti' binaca chula ga zuē'.

<sup>6</sup> Chi inēro nacalēro Diuzi tuze, pero ruero pensari mala quiero, lena' rulu'en rzi'ro yē' ca ta inaro, rquixiro ca ta ruero.

<sup>7</sup> Pero chi naca laxta'oro yēri gula como naca laxta'o Diuzi, lena' rulu'en nacalēro Diuzi tuze. Lēscan', nun quie guti zī'inē' Jesucristo lē'ē yaga cruzo ulato ren quienē', zuē' dispuesto si'zenē' quie bitezi xquia naparo.

<sup>8</sup> Chi inaro binaparo xquia, tzioguero yē' inaro can', birnēro tali.

<sup>9</sup> Pero chi uxubalēpiro lao Diuzi inaro naparo xquia, nacan tabala hue Diuzi quiero cabē' unē' huenē' quiero, na' huazi'zenē' quiero yebionē' yugulu pensari mala yu'u lu'u laxta'oro, na' iyacan yēri gula.

<sup>10</sup> Pero chi inaro binaparo xquia, lena' inaro quie Diuzi rzi'nē' yē', biruero cuenda con cabē' rna xti'idza' Diuzi.

## 2

### *Naca Cristo ben' sēlē'ra'o lao Diuzi*

<sup>1</sup> Raqueda' le'e ca quie zī'ina'. Guichi ni bia' use'ela'n laole ta gacalēn le'e ta bihue'l tamedian. Pero chi huele tamedian, naca Jesucristo ben' huen gula, ben' sēlē'ra'o lao Xuziuro Diuzi.

<sup>2</sup> Lēbē' aodizuguē' quie xquia quiero cati gutinē' lē'ē yaga cruzo lao lazaro. Pero quele quie ra'ozī' udižunē', lēscan' udižunē' quie yugulu benē'.

<sup>3</sup> Chi hue quiero ca una Cristo, lena' nezīro tali nacaro ben' quienē'.

<sup>4</sup> Chi inaro nacaro ben' quienē', na' bihue quiero cabē' unē', na' rzi'ro yē', birnēro tali.

<sup>5</sup> Pero chi hue quiero ca unē', lena' rlu'en nedyē'ēro Diuzi du guicho du la'adyi'ro, xela'adyi'ro nacaro ben' quienē'.

<sup>6</sup> Chi inaro naoro xneza Cristo, na' reya'ala' taro cabē' udanē'.

### *Udixogue' Juan tu di'idza' naca belao*

<sup>7</sup> Bicha', quele di'idza' cubi rnia' le'e niga. Rnia' le'e ca di'idza' abele desde cana'te caora uzulaole rnaole xneza Cristo.

<sup>8</sup> Pero lēscan' ta rnia' le'e niga, nacan ca quie tu di'idza' cubi. Tantozi naca di'idza' belao, ruen dyabē' inia' le'e tatula. Di'idza' li rnia' niga. Rnia' quie Cristo, lēscan' rnia' quie le'e. Rnia' le'e areyudyi rda yaca benē' lao lato lao chula. Barseni'n guī' quie xti'idza' Diuzi lu'u guicho laxta'o yaca benē'.

9 Chi inaro rseni'n gui' quie xti'idza' Diuzi lu'u guicho laxta'oro, pero rudiero ben' bichiro, ben' nao xneza Jesús, yé' rzi'ro rnëro can'. Quele rseni'n gui' quie xti'idza' Diuzi lu'u guicho laxta'oro, nechan' nechula lu'u guicho laxta'oro.

10 Chi nedyë'ëro ben' bichiro, ben' nao xneza Jesús, lena' ulu'en rseni'n gui' quie xti'idza' Diuzi lu'u guicho laxta'oro. Birue xti'idza' Diuzi ra'o mandado huero tamala.

11 Chi rudiero bichiro ben' nao xneza Jesús, naca quiero ca quie ben' rda ga naca chula, birlë'ëro ga zioro. Anaca quiero ca quie ben' laochula, ben' birlë'ë.

12 Raqueda' le'e ca quie zi'ina'. Quie lena' bia' guichi niga use'ela'n laole, porque lao na'a Jesucristo aozì'ze Diuzi quie xquia quiele.

13 Lëscan' bia' guichi ni, use'ela'n laole le'e, ben' naca ja xuzi familia, porque nuebë'le Cristo, ben' uzu tu binegata' dyilayu.

Lëscan' bia' guichi ni, use'ela'n laole le'e bi' ru'abe, porque rnaole xneza Jesús, bira naole neza mala.

14 Bia' guichi ni, use'ela'n laole le'e, zi'ina', porque nuebë'le Xuziro Diuzi. Lëscan' bia' guichi ni use'ela'n laole le'e, ben' naca ja xuzi familia, porque nuebë'le Cristo, ben' uzu tu binegata' dyila yu. Bia' guichi ni, use'ela'n laole le'e, bi' ru'abe, porque tzutzu huala rnaole xneza Cristo, aoyu'u laxta'ole xti'idza' Diuzi, bira naole neza mala.

15 Bireya'ala' sa'la'adyi'ro ta de lao yedyi layu. Chi sa'la'adyi'ro ta de lao yedyi layu, lena' rulu'en binadyë'ëro Diuzi.

16 Yaca ben' nita' lao yedyi layu, ruejé' ta rnazin quiejé', rza'la'adyi'jé' ta de lao yedyi layu. Yela' uña'a quiejé', ruejé' cuinjé' ben' ze, rezë'yaquë' lagueyiaquë'. Pero quele tanun quie Diuzi ruejé' cana', dechan' ta racazi la'adyi'jé' ruejé' cana'.

17 Bareyudyi redu quie dyilayu len quie yaca ben' rueja ta rnazin quie. Yaca ben' rue quie ca re'en Diuzi, huata' yela' neban quiejé' tuzioli.

### *Huida ben' huetzague condre Cristo*

18 Rnia' le'e, zi'ina', ilë'ëti'zi yeyudyi yedu quie yedyi layu. Abele huida tu ben' huetzague condre Cristo. Pues hora na'a anita' zë yaca ben' rue condre Cristo. Tana' neziro baza' dza yeyudyi yedu quie yedyi layu.

19 Yaca ben' rue condre Cristo, gucalëjé' ra'o tuze dza na', pero apsanla'adyi'jé' ra'o na'a. Chi dula'adyi'jé' gucalëjé' ra'o tuze dza na', bip-sanla'adyi'jé' ra'o. Pero guca cana' tacuenda ulu'en dyë'ëdi bë' bëziyaquë', dan' gucalëjé' ra'o tuze.

20 Pero le'e, babdze' Diuzi Bichi Be quienë' lu'u guicho laxta'ole cuenda gacale ben' rioñe'e.

21 Bia' guichi ni use'ela'n laole, porque quele binezile con cabë' rna xti'idza' Diuzi, dechan' nezicazile con cabë' rnan. Dyë'ëdi nezile birnë xti'idza' Diuzi di'idza' huizi' yé'.

22 Yë' rzi' benë' bë' nayaquë' binaca Jesús ben' use'ela' Diuzi ta ute uselanë' benë'. Nu yaca ben' rnë cana', rudyalala'adyi'yaquë' Cristo. Rusebi'yaquë' Xuziro Diuzi lënë' zi'inë' Jesucristo.

23 Chi rusebi' yaca benë' zi'i Diuzi, lente Diuzi rusebi'yaquë'. Chi rnëyaquë' cule quie zi'i Diuzi, lente Diuzi rnëyaquë' cule.

24 Quie lena' bigala'adyi'le cabë' di'idza' uyu'u lu'u guicho laxta'ole hora uzulaole rnaole xneza Jesús. Porque chi yega'n di'idza' bele cana'te lu'u guicho laxta'ole, na' biyeyudyi nacalële Xuziro Diuzi lënë' zi'inë' tuzi.

<sup>25</sup> Una Jesucristo gunnë' yela' neban quiero tuzioli. Cana' bega'nlënë' ra'o di'idza'.

<sup>26</sup> Guichi bia' niga, nacan ta quixogue'n le'e cabë' hue yaca ben' re'en si' le'e yë'.

<sup>27</sup> Na' abdze' Jesucristo Bichi Be quienë' lu'u guicho laxta'ole. Abega'nnë' yu'unë' lu'u laxta'ole ruzioñe'enë' le'e di'idza' li quie Diuzi. Cana' inezile chi inë' yaca benë' tuzi ca rnën len xti'idza' Diuzi, o chi birnëyaquë' tuzi. Puro di'idza' li rna Bichi Be quienë', birnë'në' di'idza' huezi' yë'. Biyehuëdile nacalële Cristo tuze conforme con ca bzioñe'e Bichi Be quienë' le'e.

<sup>28</sup> Lena', zi'ina', rnia' le'e tatula, biyehuëdiro nacalëro Cristo tuze cuenda bigata' yela' stu' quiero cati dza yeguidë'.

<sup>29</sup> Nezile naca Diuzi ben' rue ta yu'u ni'a xnezi. Lëscan' reya'ala' inezile yugulu yaca ben' rue ta yu'u ni'a xnezi, nacayaquë' zi'i Diuzi.

### 3

#### *Zi'i Diuzi nacaro*

<sup>1</sup> Tanto nedyë'ë Xuziro Diuzi ra'o ulionë' ra'o nacaro zi'inë'. Quie lena' binacalë yaca ben' nita' lao yedyi layu tuzi len ra'o, porque binacalëjë' tuzi len Diuzi.

<sup>2</sup> Le'e bicha', nadyë'ëda' le'e. Rnia' le'e nacaro zi'i Diuzi. Binelu'e Diuzi ra'o cabë' gaca quiero bë' azulëronë' guibá, pero neziro huaca quiero cabë' naca quie Cristo cati yeguidë'. Porque cati yeguidë', dyë'ëdi ilë'ëronë' tal cabë' naquë'.

<sup>3</sup> Chi du la'adyi'ro rbezaro yeguida Cristo, bihue'ro lato gaca laxta'oro besu. Reya'ala' gaca laxta'oro yëri cabë' yëri naca laxta'o Jesucristo.

<sup>4</sup> Yugulu ben' rue xquia, tamala ruejë'. Nacan mala huero xquia.

<sup>5</sup> Dyë'ëdi nezile abida Jesucristo lao yedyi layu begubanë' xquia yu'u lu'u laxta'oro, pero ni tu xquia biyu'u lu'u guicho laxta'onë'.

<sup>6</sup> Chi nacalëro Cristo tuzi, biru'en lato inaoro neza mala huero xquia. Pero yugulu ben' rnao neza mala, birue quieyaquë' xti'idza'në', binuebë'yaquë' lëbë'.

<sup>7</sup> Na'ra le'e, zi'ina', bihue'le lato si' benë' le'e yë'. Tali rnia' le'e: Chi nacaro ben' laxta'o yëri ca naca Cristo ben' laxta'o yëri, bide lato inaoro neza mala.

<sup>8</sup> Chi naoro neza mala, binacaro ben' quie Diuzi, dechan' ben' quie taxi'ibi', porque tu binegata' dylilay unao xan' taxi'ibi' neza mala. Quie lena' bida zi'i Diuzi lao yedyi layu besulanë' dyin quie xan' taxi'ibi'.

<sup>9</sup> Yaca ben' naca zi'i Diuzi, bide lato inaoyaquë' neza mala, porque babë' Diuzi yela' naban quiejë' tuzioli, anacajë' zi'i Diuzi. Quie lena', como bibi tamedian rue Diuzi, lëscan' ra'o, chi tali nacaro zi'i Diuzi, bireya'ala' huero tamedian.

<sup>10</sup> Lena' ulu'en chi tali nacaro zi'i Diuzi, o chi nacaro zi'i xan' taxi'ibi'. Chi huero tamedian rudiero benë', binacaro zi'i Diuzi.

#### *Nacan zi hue quiero idyë'ëro tu ituro*

<sup>11</sup> Ni rnia' le'e tatula ca di'idza' babele dza na'te, dza uzulaole rnaole xneza Jesús: Reya'ala' idyë'ëro tu ituro.

<sup>12</sup> Bireya'ala' gacaro cabë' guca ben' lao Caín caora uzunë' dyila yu. Gulenë' quie xan' taxi'ibi' bëtiné' bi' bichinë', porque unao bi' bichinë' neza dya'a, pero lënë' unaonë' neza mala quie xan' taxi'ibi'.

<sup>13</sup> Bicha', biyebanle cati rudie benë' le'e.

<sup>14</sup> Guca quiero ca quie ben' aguti dza na', dza unaoro neza mala quie xan' taxi'ibi'. Pero na'ra banaca quiero ca quie ben' abeban nun quie anaoro

neza dya'a quie Jesús. Neziro naoro xneza Jesús chi nadyë'ëro tu ituro. Chi binadyë'ëro itu ituro, naca quiero ca quie ben' baguti, ben' biyezi' Diuzi.

15 Chi rudiero tu ituro, naca quiero ca quie ben' bëti benë'. Na'ra nezile dyë'ëdi cabë' gaca quie ben' bëti benë'. Bigata' yela' neban quieyaquë' tuzioli.

16 Tantozí nadyë'ë Cristo ra'o, gutinë' lë'ë yaga cruzo ta gata' tadya'a quiero. Lëscan', ra'o, reya'ala' idyë'ë'ëro itu ituro, hasta suro dispuesto gatiro ta gata' tadya'a quie ben' bichiro.

17 Chi nacaro ben' uña'a, pero biyëchi'la'adyi'ro ben' bichiro, ben' bide quie, na'tera bisaque' inaro nadyë'ërojë' cabë' nadyë'ë Diuzi lëjë'.

18 Zi'ina', bireya'ala' idyë'ëro ben' bichiro de di'idza'zi, pero reya'ala' idyë'ërojë' du guicho du la'adyi'ro.

### *Cabë' reya'ala' huero ta cue' laxta'oro chizi lao Diuzi*

19 Chi huero cana', huaneziro tali na' naoro xneza Jesús, tali na' huabe' chizi laxta'oro.

20 Pero chi bicue' chizi laxta'oro, chi rao pensari quiero ra'o xquia, na' huacalë Diuzi ra'o yegubanë' chi tamala yu'u lu'u laxta'oro tacuenda cue'n chizi. Cana' hue Diuzi, dan' naquë' ben' ze, nezinë' yugulu cabë' ruero, cabë' pensari yu'uro.

21 Pues cani nacan, ben' bicha': Chi birao pensari quiero ra'o xquia, lena' du la'adyi'ro huabe' chizi laxta'oro.

22 Gun Diuzi yugulu ca ta inabaronë' por nun quie rue quiero xti'idzë', ruero ca ta re'ennë' huero.

23 Na' ta hue quiero xti'idzë', re'ennë' inaoro xneza zi'inë' Jesucristo, re'ennë' idyë'ëro tu ituro cabë' unë'.

24 Porque chi hue quiero xti'idza' Diuzi, lena' rulu'ena nacalëronë' tuze, lëscan' nacalë'në' ra'o tuze. Neziro nacalëronë' tuze, porque yu'u Bichi Be quienë' lu'u guicho laxta'oro.

## 4

*Ni rnën quie ben' yu'u Bichi Be quie Diuzi, len quie ben' yu'u bichi be quie taxi'ibi'*

1 Bicha', bigalele quie yugulu ben' naja tanun quie Diuzi rnajë', dan' bineziro chi balejë' rnajë' quie Diuzi. Reya'ala' uzë'nagaro quiejë' dyë'ëdi chi rnajë' tuzi ca rna di'idza' quie Diuzi, o chi birnajë' tuzi. Porque nita' ben' zë rnaja tanun quie Diuzi rnajë', pero bë' nazijë', yë' rzi'ljë'.

2 Chi rnajë' bida Jesucristo lao yedyi layu guquë' benë', cana' ineziro nacajë' ben' quie Diuzi, aoyu'u Bichi Be quienë' lëjë'.

3 Pero chi rnajë' bibida Jesucristo lao yedyi layu, biguquë' benë', cana' ineziro binacajë' ben' quie Diuzi, biyu'u Bichi Be quie Diuzi lëjë', pero yu'ujë' bichi be xi'ibi'. Na' bichi be yu'ujë' rdyiala'adyi'n Cristo. Abele huida bichi be xi'ibi' rue cana' lao yedyi layu. Ni rnia' le'e babidan na'a.

4 Zi'ina', nacaro ben' quie Diuzi. Quie lena' yaca ben' birna tuzi con cabë' rna xti'idza' Diuzi, bihuejë' ra'o gan si'jë' ra'o yë', porque napara fuerza Bichi Be quie Diuzi yu'uro, quele ca fuerza napa bichi be quie xan' taxi'ibi' yu'ujë'.

5 Nacajë' ben' quie xan' taxi'ibi', binacajë' ben' quie Diuzi. Quie lena' rnajë' tuzi ca rna xan' taxi'ibi'. Quie lena' gale yaca ben' nao neza quie xan' taxi'ibi' ca di'idza' inajë'.

6 Pero ra'o, nacaro ben' quie Diuzi. Nu ben' gale quiero, nacarëjë' ben' quie Diuzi. Cana' neziro nula yu'u Bichi Be quie Diuzi, nula yu'u bichi be quie taxi'ibi'.

*Nadyë'ë Diuzi yugulute benë'*

<sup>7</sup> Bicha', reya'ala' idyë'ëro ben' bichiro, ben' nao xneza Jesús. Cana' re'en Diuzi huero, porque nadyë'ë Diuzi yugulute benë'. Chi nadyë'ëro yugulute benë', nacalëro Diuzi tuze, na' du la'adyi'ro nacaro zi'inë'.

<sup>8</sup> Chi binadyë'ëro yugulute benë', na' binacalëro Diuzi tuze, porque nadyë'ë Diuzi yugulute benë'.

<sup>9</sup> Tantozi nadyë'ë Diuzi ra'o, na' use'elë' tu litza' zi'inë' lao yedyi layu. Lao na'a zi'inë' guta' yela' naban quiero tuzioli. Cana' neziro nadyë'ë Diuzi ra'o.

<sup>10</sup> Tanto nadyë'ë Diuzi ra'o, ba'ala'cazi binegue'enro Diuzi caora na', use'elë' zi'inë' lao yedyi layu gutinë' lë'ë yaga cruzo, udižuguë' dula' xquia quiero cuenda yezi'ze Diuzi quiero.

<sup>11</sup> Bicha', nun quie nadyë'ë Diuzi ra'o, reya'ala' edyë'ëro itu ituro.

<sup>12</sup> Ba'ala'cazi ni tu nunu blë'ë Diuzi, pero chi nadyë'ëro itu ituro, na' yu'u Bichi Be quienë' lu'u guicho laxta'oro, na' bitecazi nadyë'ë Diuzi ra'o.

<sup>13</sup> Nun quie nudze' Diuzi Bichi Be quienë' lu'u guicho laxta'oro, na' ineziro nacalëronë' tuze.

<sup>14</sup> Nëto' blë'ëndo' nacando' testigo cabë' bë Xuziro Diuzi lënë' zi'inë'. Use'elë' lëbë' lao yedyi layu tacuenda ute uselanë' nutezi ben' re'en nao xnezë'.

<sup>15</sup> Nutezi ben' gale chi zi'i Diuzi Jesucristo, lëben' na' nuenë' Diuzi bala'ana, lëscan' nue Diuzi lëben' na' bala'ana.

<sup>16</sup> Cana' neziro nadyë'ë Diuzi ra'o lente yugulute benë'. Lëscan', ra'o, chi edyë'ëro tu ituro, na' nuero Diuzi bala'ana, lëscan' nue Diuzi ra'o bala'ana.

<sup>17</sup> Cana' hue quiero idyë'ëro Diuzi du guicho du la'adyi'ro, biidzebiro dza gaca juicio, porque bdyë'ëro Diuzi dza udaro lao yedyi layu cabë' bdyë'ë Jesucristo Diuzi.

<sup>18</sup> Chi neziro nadyë'ë Diuzi ra'o, biidzebironë'. Chi du la'adyi'ro nadyë'ëro Diuzi biidzebironë' ni lë'ëti'. Pero chi rdzebiro Diuzi, lena' rulu'en bineneziro chi tali nadyë'ë Diuzi ra'o.

<sup>19</sup> Nadyë'ëro Diuzi porque tanëro bdyë'ë Diuzi ra'o.

<sup>20</sup> Chi inaro nadyë'ëro Diuzi, pero rudiero yaca benë', yë' rzi'ro inaro nadyë'ëro Diuzi. Chi binadyë'ëro yaca benë', ben' rlë'ëro, yë' rzi'ro inaro nadyë'ëro Diuzi, ben' birlë'ëro.

<sup>21</sup> Chi nadyë'ëro Diuzi, nacan zi hue quiero idyë'ëro yaca benë'. Cana' naca mandamiento uduxu Jesucristo para ra'o.

## 5

### *Cabë' reya'ala' huero ta huero gan lao tamala de lao yedyi layu*

<sup>1</sup> Chi galero use'ela' Diuzi Jesús, chi galero bidë' lao yedyi layu ta ute uselanë' ra'o, na' nacaro zi'i Diuzi. Chi nadyë'ëro Xuziro Diuzi, nacan zi hue quiero idyë'ëro ben' bichiro, ben' naca zi'i Diuzi.

<sup>2</sup> Chi nadyë'ëro Diuzi huero cabë' mandado ruenë', cana' ineziro tali na' nadyë'ëro yaca ben' bichiro, ben' naca zi'i Diuzi.

<sup>3</sup> Bisaque' inaro nadyë'ëro Diuzi chi biruero ca mandado ruenë'. Binaca zi'i mandado quienë'. Mandado dya'a ruenë'.

<sup>4</sup> Babë yugulu ben' naca zi'i Diuzi gan lao tamala de lao yedyi layu. Nun quie rzudyi'ilëro Jesús abëro gan.

<sup>5</sup> Chi bisudyi'ilëro quie Jesús inaro zi'i Diuzi lëbë', bisaque' huero gan lao tamala de lao dyila yu.

### *Cabë' una Diuzi quie zi'inë'*

<sup>6</sup> Caora bida Jesucristo lao yedyi layu, caora na' uyu'unë' lu'u nisa, ulato ren quienë' gutinë' lë'ë yaga cruzo. Quele uyu'uzinë' lu'u nisa, pero lëscan'

gutcazinè' lè'è yaga cruzo ulato ren quienè'. Naca Bichi Be quie Diuzi testigo con cabè' guca quie Jesucristo. Puro tali rna Bichi Be quie Diuzi, birzi'nè' yè'.

7 Tzona cue' testigo naca ta de guibá rguixogue'n quie Jesucristo. Rguixogue' Xuziro Diuzi, lènè' di'idza' quienè', lènè' Bichi Be quienè'. Tuzi ca rguixogue'jè' quie Jesucristo.

8 Lëscan' tzona cue' testigo nacarè ta de lao yedyi layu rguixogue'n quie Jesucristo. Rguixogue' Bichi Be quie Diuzi. Lëscan' caora uyu'u Jesucristo lu'u nisa, lena' rguixogue'n quienè'. Lëscan' cati gutinë' lè'è yaga cruzo, ulato ren quienè', lena' rguixogue'rënan quienè'. Tuzi ca rguixogue'n lao yunaten quie Jesucristo.

9 Chi ralero quie benè' cabè' inajè' ra'o, reya'ala'cazi galero quie Diuzi cabè' unè', porque zaca'ra cabè' una Diuzi quie zi'inè'.

10 Chi hue quiero di'idza' quie zi'i Diuzi, cana' ineziro tali nacan di'idza' quienè' cabè' unè'. Pero chi bihue quiero di'idza' quie zi'i Diuzi, lena' inaro naca Diuzi ben' huizi' yè', porque biralero tali nacan cabè' unè' quie zi'inè'.

11 Na'ra con cabè' una Diuzi, unè' babënnè' yela' neban quiero ta biyeyudyi yedu quiè. Lëscan' unè' babënnè' quiero len lao na'a zi'inè'.

12 Nu ben' rale quie zi'inè', banapè' yela' neban ta biyeyudyi yedu quie. Pero nu ben' birale quie zi'inè', binapè' yela' naban ta biyeyudyi yedu quie.

### *Ni yeyudyi di'idza' bzu Juan lè'è guichi*

13 Bia' guichi ni use'ela'n laole le'e, ben' rale quie zi'i Diuzi, ta inezile banapale yela' neban ta biyeyudyi yedu quie.

14 Quie lena' du la'adyi'ro reya'ala' ulidzaro Diuzi, porque neziro renè' quiero chi inabaronè' ca ta ugunnè' gunnè' quiero.

15 Como cana' neziro re Diuzi quiero cati ulidzaronè', lëscan' ineziro babënnè' quiero ta unabaronè'.

16 Chi rlè'ëro rnao tu ben' bichiro neza mala ruenè' xquia, pero binacan xquia ta udyiaguì' Diuzi lèbè', reya'ala' ulidzaro Diuzi inabaronè' chi biga-calè Diuzi lèbè' ta usannè' neza mala quienè' yenaonè' xneza Diuzi tatula. De tu cue' xquia nacan ta udyiaguì' Diuzi ra'o. Biinia' le'e reya'ala' ulidzaro Diuzi por nu ben' napa xquia nacan ta udyiaguì' Diuzi lèbè'.

17 Yugulu xquia ruero nacan mala, pero de tu cue' xquia nacan ta udyiaguì' Diuzi ra'o.

18 Neziro yugulu ben' naca zi'i Diuzi binaojè' huejè' xquia, porque rapa zi'i Diuzi lèjè'. Bisaque' xan' taxi'ibi' huelèn lèjè'.

19 Neziro nacaro ben' quie Diuzi. Lëscan' neziro rue yaca los demás ben' nita' lao yedyi layu ca mandado re'en xan' taxi'ibi' huejè'.

20 Lëscan' neziro babida zi'i Diuzi lao yedyi layu bzioñe'enè' ra'o nuebè'ro tuzi Diuzi zu guibá, neziro nunura Diuzi zu. Nacalëronè' tuže, ta inaro, nacalëro zi'inè' Jesucristo tuže. Tuzi lèbè' naquè' Diuzi, tuzi lèbè' gunnè' yela' naban quiero ta biyeyudyi yedu quie.

21 Zi'ina', gapale cuidado ta birionla'adyi'le ta binaca Diuzi. Amén.



## GUICHI URUPE BÈ SAN JUAN APÓSTOL

### *Nacan zi hue quiero idyè'ëro yugulu laguedyiro*

<sup>1</sup> Nè'èdi', ben' gula, bia' guichi ni, use'ela'n laolo' luè' dan' naco' luè' nigula ulio Diuzi. Lèscan' use'ela' guichi ni lao ja zi'ilo'. Nadyè'èda' le'e du guicho du la'adya'. Pero cala tuza' nè'èdi', lèscan' nadyè'è yaca los demás ben' nao xneza Jesús le'e.

<sup>2</sup> Nadyè'èda' le'e por nun quie di'idza' li quie Diuzi yu'un lu'u laxta'oro. Lèdi'idza' na' biyeyuyi yedu fuerza valor quien.

<sup>3</sup> Rulidza' Xuziro Diuzi lènè' zi'inè' Jesucristo ta huela'iyajè' yeyèchi'la'adyi'jè' le'e, cuèchijè' chizi guicho laxta'ole. Tabalacazi nedyè'è Xuziro Diuzi lènè' zi'inè' le'e.

<sup>4</sup> Redaohueda' cabè' rue bala ja zi'ilo', barue quieyaquè' di'idza' li quie Diuzi, barueyaquè' ca mandado re'en Xuziro Diuzi huero.

<sup>5</sup> Na'ra zana', quele mandamiento cubi inia' le'e lè'è guichi ni, dechan' mandamiento gula ca ta unè Jesús nètò' desde dza na'te. Rnia' le'e nacan zi hue quiero idyè'ëro yugulu laguedyiro.

<sup>6</sup> Nacan tali nadyè'ëro yugulu laguedyiro, chi barue quiero xti'idza' Diuzi. Banezile desde dza na'te cabè' re'en Diuzi huero, re'ennè' idyè'ëro yugulu laguedyiro.

### *Nita' ben' zè, ben' huezi' yè' lao yedyi layu*

<sup>7</sup> Na'ra nita' ben' zè, ben' huezi' yè', ben' rnè biguca Jesucristo benè' cati bidè' lao yedyi layu. Pero yè' rzi'jè', rudyiala'adyi'jè' Cristo rnèjè' cana'.

<sup>8</sup> Gapale cuidado ta bisi'jè' le'e yè', na' te cana'zi dyin quie Diuzi ta ziole ruele. Hue quiele xti'idza' Diuzi tacuenda gata'cazi quiele duzete ca ta pceza Diuzi gunnè' le'e dza zaza'ra.

<sup>9</sup> Nutezi ben' rnè di'idza' quie Cristo rguixogue'nè', pero cabè' rguixogue'nè' binacan lèbi con cabè' una Cristo, binubè'nè' Diuzi, binaquè' ben' quie Diuzi. Pero chi rguixogue'nè' lèbi con cabè' una Cristo, nubè'nè' Xuziro Diuzi lènè' zi'inè'.

<sup>10</sup> Chi guida ben' birguixogue' lèbi con cabè' una Cristo, bisi'lenè' zan yu'u quiele, biugapalenè' diuzi,

<sup>11</sup> porque chi ugapalenè' diuzi, huen quiele ca quie ben' rue tamala len leyaquè'.

### *Niga yeyuyi di'idza' bzu Juan lè'è guichi*

<sup>12</sup> Zè di'idza' re'enda' inia' le'e, pero bire'enda' hua' zè guichi. Mejorla naguidala' zan yu'u quiele ta hue'ro di'idza' dyè'èdi, yedaohuero suro gusto.

<sup>13</sup> Yaca zi'i bi' zilo', ben' uliorè Diuzi, rugapajè' luè' diuzi. Amén.

## GUICHI UYUNE BĚ SAN JUAN APÓSTOL

### *Use'ela' Juan guichi ni lao tu ben' lao Gayo*

<sup>1</sup> Nĕ'ĕdi', ben' gula, bia' guichi ni use'ela'n laolo' luĕ', Gayo. Naco' amigo quia', tabalacazi nadyĕ'ĕda' luĕ'.

<sup>2</sup> Bicha', rulidza' Diuzi ta icuasa icui'o tamala ta bibi gaca quio' sulo' huen. Cabĕ' ruelo' naolo' xneza Jesŭs dyĕ'ĕdi, cana' re'enda' sulo' dya'a tuzioli.

<sup>3</sup> Bedaohueda' caora bla' chopa tzona ben' bichiro, ben' nao xneza Jesŭs, unajĕ' nĕ'ĕdi' cabĕ' ruelo' rnaolo' xneza Jesŭs du guicho du la'adyo'.

<sup>4</sup> Lega redaohueda' bĕ' beda' nenaŭ yaca ben' quie Jesŭs xnezane' du guicho du la'adyi'jĕ'. Raqueda'yaquĕ' ca zi'ina'.

<sup>5</sup> Bicha', tahuen na' huelo' caora gacalao' ben' bichiro, ben' nao xneza Jesŭs. Tahuen gula huelo' gacalao' yaca ben' za' yedyi tula.

<sup>6</sup> Unajĕ' rĕbijĕ' yaca los demĀs ben' bichiro cabĕ' ruelo' nadyĕ'ĕlo' lĕjĕ'. Chi huu' cule, gacalĕlo'jĕ' tzu'ujĕ' neza dyĕ'ĕdi, como lĕzi lĕjĕ' rguixogue'rĕjĕ' xti'idza' Diuzi.

<sup>7</sup> Mandado quie Jesucristo aoyu'ujĕ' neza. Birnabajĕ' ben' binaŭ xneza Jesŭs ta gasijĕ' len ta gaojĕ'.

<sup>8</sup> Nacan cuenda quiero hue'rojĕ' ga gasijĕ', hue'rojĕ' ta gaojĕ', gacalĕrojĕ' tzu'ujĕ' neza tziojĕ' tzetixogue'jĕ' benĕ' xti'idza' Diuzi.

### *Rnĕ Juan quie tu ben' lao Diŭtrefes, ben' rudyiala'adyi' lĕbĕ'*

<sup>9</sup> Aose'ela' tu guichi laole dza na' ta inezile cabĕ' reya'ala' huele. Pero bigule Diŭtrefes quiendo'. Re'ennĕ' inabĕ'nĕ' cuinzinĕ'.

<sup>10</sup> Lena' hua' di'idza' len le'e cati guida' cabĕ' ruenĕ', porque rudyiala'adyi'nĕ' nĕto'. Bire'ennĕ' gapachi'nĕ' ben' bichiro ŷan yu'u quienĕ'. Lĕscan' ruzegadyinĕ' yaca ben' re'en gapachi' ben' bichiro ŷan yu'u quie. Biru'enĕ' lato yedupalĕjĕ' ben' bichiro bĕ' rueyaquĕ' culto.

<sup>11</sup> Bicha', biinaole huele ca rue ben' mala. Reya'ala' huele ca rue ben' huen. Chi huero tadya'a, lena' rulu'en nubĕ'ro Diuzi. Chi huero tamala, lena' rulu'en binubĕ'ro Diuzi.

### *Rnĕ Juan naca Demetrio ben' huen*

<sup>12</sup> Naca Demetrio ben' huen, cana' na yaca benĕ' yugulujĕ'. Talicazi nacan con cabĕ' najĕ' quienĕ' najĕ' naquĕ' ben' huen. Lĕscan' nĕto', nezirĕndo' naquĕ' ben' huen. Luĕ' nezilo' di'idza' li rnĕndo'.

### *Ni yeyudyi di'idza' bzu Juan lĕ'ĕ guichi*

<sup>13-14</sup> Zĕ di'idza' re'enda' inia' luĕ', pero bire'enda' hua' zĕ guichi. Mejorla naguidala' ŷan yu'u quio' ta hue'ro di'idza' dyĕ'ĕdi cabĕ' nacan.

<sup>15</sup> Rulidza' Diuzi cuĕchinĕ' chizi guicho laxta'olo'. Yaca amigo quio', ben' zulia' tuze gan' ni, rugapayaquĕ' luĕ' diuzi. Ugapalo' diuzi yugulu amigo quia', ben' nita'lao' tuze. Amĕn.

## GUICHI NI BÈ SAN JUDAS APÓSTOL

### *Guichi ni bè Judas use'ela'nè'n lao yaca ben' nao xneza Jesús*

<sup>1</sup> Nè'èdi', Judas, naca' ben' rue mandado quie Jesucristo. Naca' bicha' Santiago. Guichi ni bia' use'ela'n laole le'e, ben' ulio Diuzi. Nadyè'è Xuziro Diuzi le'e, zunè' rna'nè' le'e.

<sup>2</sup> Rulidza' Diuzi ta yeyèchi'la'adyi'nè' le'e dyè'èdi, lëscan' ta cuèchinè' chizi laxta'ole idyè'ènè' le'e taže.

### *Rnè Judas quie yaca ben' huezi'yè'* *(2 Pedro 2.1-17)*

<sup>3</sup> Bicha', lega re'enda' ise'ela' tu guichi laole ta inia' le'e mazara cabè' bè Diuzi bènnè' yela' neban quiero tuzioli. Ruen dyabè' ise'ela' tu guichi laole ta inia' le'e cabè' reya'ala' huele, reya'ala' gapale cuidado ta bisi' benè' le'e yè'. Reya'ala' hue quiele xti'idza' Diuzi ca di'idza' pca'n Diuzi lao na'a yaca ben' quienè'.

<sup>4</sup> Cana' nia', porque balarazi aoyu'u ben' huezi'yè' ladole. Yaca ben' na' najè' bibi huena chi huero tabayatza cabè' rnan quiero. Najè' bihue Diuzi ra'o castigo, porque dan' nadyè'ènè' ra'o. Pero bè' nazijè' yè' rzi'jè' binacan cana'. Nacajè' ben' mala, ben' rudyiala'adyi' Jesucristo. Tuzi Jesucristo naquè' xa'nro, ben' Señor quiero. Pero lèjè' rnajè' bibi zaca'nè'. Pues desde cana'te rnèn lè'è guichi la'ya quie Diuzi bi gaca quie ben' rna cana'. Rnèn huachugubè' Diuzi lèjè' dza gaca juicio.

<sup>5</sup> Anezile dyè'èdi cabè' bè Diuzi cana'te, pero decazide re'enda' yeza'la'adyi'le tatula. Bigala'adyi'le cabè' guca caora unita' yaca ben' Israel nación Egipto. Psaca ben' Egipto ben' Israel bizinaquezi, pero pte psela Diuzi lèjè', uchugubè'cazi Diuzi quie balajè'. Uchugubè'nè' quie yaca ben' bigule quienè' cabè' unè'.

<sup>6</sup> Lèzi bigala'adyi'le cabè' guca quie bala ángel. Bigulejè' cabè' una Diuzi, na' berojè' ga banaca xlotojè'. Caora na' bè Diuzi mandado uyu'ujè' ga naca chula ta iriojè' caden para bira yerojè'. Na' yu'ujè' rbezajè' dza gaca juicio.

<sup>7</sup> Lèzi quie ja ben' ciudad Sodoma, len ja ben' ciudad Gomorra, len ja ben' yedyi re' ga'ala', bigala'adyi'le cabè' ta uzacajè'. Bigulejè' quie Diuzi cabè' bigule ja ángel dza na'. Bèjè' bizinaque, gusilèjè' nigula binaca žgulajè', hasta gusilèjè' laguedyi byujè' ca nigula. Pues lente be'mbyu lente nigula bèjè' bizinaquezi. Quie lena' uchugubè' Diuzi quiejè', aoyejè' tzalasagazi cuenda na' inezi yaca benè' de que ratza Diuzi cabè' tamala bèjè'.

<sup>8</sup> Cabè' bè ja ben' unita' tiempo, cana' ruerè ben' huezi'yè' uyu'u ladole. Ca ben' xusa, ruelèjè' cuinjè' tabayatza. Biralejè' quie Diuzi. Rutasi runiojè' yaca ben' rna'è' zu guibá.

<sup>9</sup> Bigala'adyi'le cabè' bè xan' ángel laohuè' Miguel. Lao cuerpo quie Moisés bèlènè' xan' taxi'ibi' huenè. Pero yela' ben' huen quienè', biptasi bnionè' xan' taxi'ibi'. Lèzi biudaonè' xan' taxi'ibi' xquia. Pero unè xan' ángel rëbinè' xan' taxi'ibi': "Huaò Jesucristo luè' xquia."

<sup>10</sup> Na'ra yaca ben' na', ben' huezi'yè' uyu'u ladole, ta birioñe'ejè' na' rudyiala'adyi'jè'. Nacajè' ca bia guixi', biyu'ujè' pensari. Dula' napajè' cuinjè' gata' castigo quiejè' tuzioli.

<sup>11</sup> Gaca bayèchi' gula quiejè' nun quie naojè' ruejè' cabè' bè Caín. Yela' rza'la'adyi' dumi quiejè', ruejè' cabè' bè Balaam cana'te. Huacarè bayèchi'

quiejë' cabë' guca quie tu ben' lao Coré cana'te. Guca quie Coré uchugubë' Diuzi lëbë', como dan' bdyiala'adyi'në' Diuzi.

12 Naca yela' stu' quiele, como dan' raolële lëjë' tuze ga redupale ruele culto len ben' bichile, ben' nao xneza Jesús. Dan' rudyiala'adyi'jë' Diuzi, bireya'ala' gaolële lëjë' tuze. Puro quiezijë' re'enjë' gata'. Naca quiejë' ca quie beo bidyi ru'unan be bedun'. Lëzi naca quiejë' ca quie yaga gu'udzo na' reyalan, birbian tazixi. Cana' naca quiejë', como dan' biralejë' quie Diuzi.

13 Naca quieyaquë' ca quie bdyin' ta rzë ru'a yao ze dupen bëbi. Rdayaquë' rnëtzegueyaquë', pero yë' rzi'jë'. Naca quieyaquë' ca tu bélo bizun xlaton. Bire'enjë' inaojë' xneza Jesús. Quie lena' udixu Diuzi tu lato chula ga yu'ujë' tuzioli.

14 Bigala'adyi'le quie tu zi'isuba Adán, ben' uzu tiempote laohué' Enoc. Tanun quie Diuzi unënë' quie ja ben' rdyiala'adyi' Diuzi caora unënë' gudyinë' laguedyinë' cani: "Huadyin dza cati guida Xuziro Diuzi lënë' yugulute yaca ángel quienë'.

15 Caora na' huenë' juicio quie lao yugulute ja benë' rue xquia, ja ben' rdyiala'adyi' lëbë'. Huenë' lëjë' castigo nun quie unëjë' di'idza' bayatza bdyiala'adyi'jë' Diuzi." Cana' una Enoc gudyinë' laguedyinë' cana'te.

16 Na'ra yaca ben' rdyiala'adyi' Diuzi, puro huao xquia laguedyi ruejë'. Puro ta rnazin quiejë' ruejë'. Ruejë' cuinjë' ze. Cuenda huejë' gan ta de quie benë', lena' ru'elëjë' benë' di'idza' dya'a, pero bë' rnazijë'.

### *Consejo dya'a ru'e apóstol Judas yaca ben' nao xneza Jesús*

17 Pero le'e, bicha', bigala'adyi'le con cabë' una yaca apóstol quie Señor quiero Jesucristo cana'te.

18 Cani unajë' gudyijë' laguedyijë': "Za' yeyudyi quie yedyi layu ga rzidyicala ja benë' quie xti'idza' Diuzi, ga ruejë' ta rnazin quiejë', ga birapajë' Diuzi bala'ana." Cana' una yaca apóstol dza na', rnayaquë' ca hue ben' na'.

19 Lëzi quie ben' na' rnia' de que raxejë' tzu'ujë' huedila cuenda huejë' laguedyijë' chopa cue'. Biyu'u Bichi Be quie Diuzi lu'u guicho laxta'ojë'.

20 Pero le'e, bicha', huele tzutzu biyehuedile inaole xneza Jesús. Ulenaba Bichi Be quie Diuzi ta gacalënë' le'e ta hue'lële Diuzi di'idza'.

21 Yugu dza reya'ala' yeza'la'adyi'ro Diuzi cabë' ruenë' nadyë'ënë' ra'o. Reya'ala' cuezaro dyë'ëdi dza yezi' Señor quiero Jesucristo ra'o, dza yeyëchi'la'adyi'në' ra'o gunnë' yela' naban quiero ta biyeyudyi yedu.

22 Reya'ala' uxi'idze'ro dyë'ëdi ben' binenezi, ben' nerue pensari chi naojë', chi biinaojë' xneza Jesús.

23 Reya'ala' yëbiro benë' ta bihuejë' xquia, porque chi huejë' xquia, huabi-agui'jë' cabë' rbiagui' ta yu'u lagui' reina. Reya'ala' yeyëchi'la'adyi'ro ben' rue xquia, porque naca bayëchi' gula quiejë'. Reya'ala' gacalërojë' ta usanjë' bira huejë' tamala. Pero con cuidado gacalërojë' tacuenda bitzu'uro pensari huerëro xquia cabë' rue lëjë'.

### *Ga iyudyi guichi ni, bë Judas Diuzi ben' ze*

24-25 Naca Diuzi ben' racalë ra'o ta bira inaoro huero tamedian. Dyin quienë' nacaro ben' laxta'o yëri, binaparo xquia yedaohuero yedyinro laohué'. Tuzi Diuzi naquë' ben' bala'ana quie lao yugultero. Tuzi lëbë' rnabë'në' quie lao duzete. Tuzi lëbë' reya'ala' gapala'n yugu benë'. Tuzi lëbë' rute ruselanë' ra'o tanun quie zi'inë' Jesucristo. Tuzioli naca Diuzi ben' zera, la'acazi dza na'la, la'acazi na'a, la'acazi dza zaza'ra. Amén.

## DI'IDZA' TABELAO TA UDXOGUE' JESUCRISTO SAN JUAN APÓSTOL

### *Di'idza' tabelao ta udixogue' Jesucristo San Juan apóstol*

<sup>1</sup> Lèdi'idza' niga nacan di'idza' tabelao ta gudyi Diuzi Jesucristo tacuenda quixogue'nè' ja ben' nao xnezè' ta inezijè' cabè' baza' gaca dza zaza'ra. Use'ela' Jesucristo tu ángel ta gacalènè' nè'èdi' ta inezida' nè'èdi', Juan, naca' ben' nao xneza Cristo.

<sup>2</sup> Tali rnia' cabè' blè'èda'. Naca' testigo nacan tali con cabè' rna xti'idza' Diuzi. Naca' testigo nacan tali con cabè' una Cristo.

<sup>3</sup> Huela'iya Diuzi huaca huen gula quie nu ben' rulaba di'idza' lè'è guichi ni, nu ben' ruzènaga con cabè' rnan. Lèscan' huela'iya Diuzi huaca huen gula quie nu ben' rue quie cabè' rnèn lè'è guichi ni, como dan' baidyin dza gaca con cabè' rnèn lè'è guichi ni.

### *Use'ela' Juan guichi ni lao gadyi ciudad*

<sup>4</sup> Nè'èdi', Juan, bia' guichi niga use'ela'n lao le'e, ben' nao xneza Cristo lao gadyi ciudad ga nita'le yu nebaba Asia. Rnaba' lao Diuzi, ben' zu tuzioli, ta huela'iyane' le'e tacuenda su laxta'ole gusto bidèbile. Lèscan' lena' rnaba' lao ben' naca ca gadyi bichi be, ben' zu zaca'lao lao Diuzi ga naca xlatonè'.

<sup>5</sup> Lèscan' lena' rnaba' lao Jesucristo, ben' naca testigo dya'a quie Diuzi. Naquè' ben' nèro, ben' pseban Diuzi para tuzioli. Lèbè' rnabè'nè' yugulu ben' naca rey, ben' nita' lao yedyi layu. Nedyè'è Cristo ra'o udubanè' dula' xquia quiero cati ulato ren quienè' gutinè' lè'è yaga cruzo.

<sup>6</sup> Ulionè' ra'o nacaro rey, nacaro pxuzi ta huero ca mandado re'en Xuzinè' Diuzi huero. Ben' bala'ana naquè' tuzioli. Ben' napa yela' rnabè' naquè' tuzioli. Amén.

<sup>7</sup> Uzè nagale quia' dyè'èdi. Baidyin dza guida Cristo lao beo. Hualè'è yugulu benè' lèbè'. Hasta ben' psaca lèbè' bizinaquezi hualè'èjè' lèbè'. Huabedyi yugulu ben' nita' lao yedyi layu cati ilè'èjè' lèbè'. Nacan tali can' gaca.

<sup>8</sup> Na'ra una Diuzi: "Lao na'a uzulaohua' ulècha' yedyi layu. Lèscan' lao na'a yeyudyi yedu quie yedyi layu. Naca' ca quie letra A len letra Z quie abecedario." Cana' una Diuzi, ben' de yugulu yela' rnabè' quie, ben' zu tuzioli.

### *Blu'e Bichi Be quie Diuzi Juan ca naca Cristo*

<sup>9</sup> Nè'èdi', Juan, naca' ben' bichile, ben' nao xneza Jesús. Nacalia' le'e tuze nun quie redzagalaoro naoro xneza Cristo. Lèscan' nacalia' le'e tuze nun quie dan' nacaro ben' nao quie yela' rnabè' quie Diuzi. Lèscan' nacalia' le'e tuze nun quie racalè Jesucristo ra'o ta suero dyè'èdi. Na'ra guca' preso dza na' ga de yu bidyi lu'u nisadao' laona Patmos nun quie dan' udixogui'a benè' xti'idza' Diuzi gucha'jè' cabè' bè Jesucristo.

<sup>10</sup> Na'ra cani guca quia' tu dza quie Señor quiero. Guca quia' blu'e Bichi Be quie Diuzi nè'èdi' cabè' baza' gaca dza zaza'ra. Beda' zidzo gula unè tu benè' xcu'udza'. Como ca rchi' trompeta unènè'.

<sup>11</sup> Na'ra una ben' na' rëbinè' nè'èdi':

—Lao na'a uzulaohua' ulècha' yedyi layu. Lèscan' lao na'a yeyudyi yedu quie yedyi layu. Naca' ca quie letra A len letra Z quie abecedario. Cabè' ilè'èlo' ni, uzulo' di'idza' lè'è guichi, huelo' tu libro isè'elo'n lao gadyi ciudad ga nita' ben' nao xneza' yu nebaba Asia. Ise'elo'n lao ciudad Efeso, len lao

ciudad Esmirna, len lao ciudad Pérgamo, len lao ciudad Tiatira, len lao ciudad Sardis, len lao ciudad Filadelfia, len lao ciudad Laodicea.

<sup>12</sup> Na'ra beyëchoga' una'a blë'ëda' nuzi ben' unë në'ëdi'. Na'ra cati beyëchoga', una'a blë'ëda' gadyi candelero de oro.

<sup>13</sup> Lao tao' candelero na', blë'ëda' tu ben' naca ca be'mbyu. Naconë' tu la'ari' tona zun xcu'udzu labatenë'. Na'ra ru'achu'u la'ari' naconë', yu'un tu cinta ta naca de oro.

<sup>14</sup> Na'ra guitza' guichonë' nacan ta bezëri cabë' naca zaba beco' zi'ila' bezëri, lëscan' cabë' naca yelo bezëri. Na' rna' yulaonë' ca rna' xni' gui'.

<sup>15</sup> Lëscan' labanë' rna'n raca titi' cabë' rna' guiba bronce yëri gula ta bro lao gui'. Lëscan' rchi'në' rnan zidzo gula ca rchi' tu yao ze gula.

<sup>16</sup> Na'ra zënë' gadyi bélo na'anë' zaquë' yebë. Lëscan' bro tu ta naca ca quie tu espada neduchi'n rupala'n lu'u ru'anë'. Lëscan' rna' laonë' cabë' rna' lao ubidza raca titi' cati rna' oba fuerte gula.

<sup>17</sup> Na'ra cati blë'ëda' cana', byala' xni'anë' guca quia' ca quie ben' baguti. Pero lëbë' bda'në' na'anë' yebë në'ëdi'. Na'ra unë' në'ëdi':

—Bidzebo'. Lao na'a uzulaohua' ulëcha' yedyi layu. Lëscan' lao na'a yeyudyi yedu quie yedyi layu.

<sup>18</sup> Naca' ben' de yela' neban quie tuzioli. Ba'ala'cazi agutia', pero bebana' zua' tuzioli. Në'ëdi' rna'bi'a lao yela' guti len lao gui' gabila.

<sup>19</sup> Na'ra bzu di'idza' lë'ë guichi cabë' bablë'ëlo'. Lëscan' bzu di'idza' cabë' rlë'ëlo' raca na'a, len cabë' ilë'ëlo' baza' gaca.

<sup>20</sup> Na'ra cani naca di'idza' ta rguixogue'n quie gadyi bélo zia' zaquë' na'a yebë ta bablë'ëlo'. Lëscan' cani naca di'idza' ta rguixogue'n quie gadyi candelero de oro ta bablë'ëlo'. Na'ra quie gadyi bélo, leyacan rguixogue'n quie gadyi ben' quixogue' xti'idza' Diuzi lao gadyi ciudad ga nita' ben' nao xneza'. Lëscan' quie gadyi candelero, leyacan rguixogue'n quie gadyi ciudad na'.

## 2

*Use'ela' Juan di'idza' lao gadyi ciudad: Di'idza' niga use'ela'në' lao ciudad Efeso*

<sup>1</sup> Na'ra una Jesús gudyinë' në'ëdi':

—Bzu di'idza' niga lë'ë guichi ise'elo'n lao ben' nao xneza', ben' zu rguixogue' xti'idza' Diuzi ciudad Efeso. Na' yëbo'jë': "Cani rna ben' zë gadyi bélo zaque' na'anë' yebë, ben' rda lao tao' candelero na':

<sup>2</sup> Nezda' yugulu cabë'n ruele. Nezda' cabë' ruele dyin quia' du guicho du la'adyi'le. Nezda' biusanla'adyi'le huele dyin quia'. Nezda' bihue'le lato gacalë ben' mala le'e tuze. Nezda' bële prueba quie ben' na nacajë' apóstol, pero bë' nazijë' binacajë' apóstol. Nezda' banezile ben' huizi' yë' nacajë'.

<sup>3</sup> Nezda' cabë' ruele rnaole xneza' dyë'ëdi. Nezda' lega bedzagalaole tanun quie dan' naole xneza'. Nezda' bële dyin quia' biruhuëdile.

<sup>4</sup> Pero de tu ta ruele biraxeda'. Bira nedyë'ële në'ëdi' cabë' bdyë'ële në'ëdi' dza na', dza uzulaole inaole xneza'.

<sup>5</sup> Quie lena' reya'ala' yeza'la'adyi'le cabë' bële dza na'. Reya'ala' yetza'le pensari quiele huele tatula cabë' bële dza na'. Chi bihuele ca nia', laguidatia' huaguba' le'e ga zule, bira gacale ca quie candelero quia' chi biyetza'le pensari quiele.

<sup>6</sup> Pero tahuen na' cabë' pensari ruele rudiele ca rue ja ben' nicolaítas, ben' rionla'adyi' yaca idolo. Lëscan' në'ëdi', rudieda' cabë' ruejë'.

7 Ulezēnaga dyē'ēdi cabē' na Bichi Be quie Diuzi rēbinē' yaca ben' nao xneza'. Nu yaca ben' sue biusanla'adyi' xneza', huayojē' guibá ta gaojē' tazixi ta dyia tu yaga ta zu na'. Lētažixi na' ru'en yela' neban." —Cana' una Jesús dza na'.

*Di'idza' niga use'ela' Juan lao ciudad Esmirna*

8 Na'ra una Jesús gudyinē' nē'ēdi':

—Lēscan' bzu di'idza' niga lē'ē guichi ta ise'elo'n lao ben' rguixogue' xti'idza' Diuzi, ben' zu ciudad Esmirna. Na' yēbo'jē': "Cani na ben' una lao nē'ē uzulao cuēchi yedyi layu, ben' una lao nē'ē yeyudyi yedu quie yedyi layu, ben' baguti beban, ben' bazu tuzioli:

9 Banezda' yugulu cabē' ruele. Banezda' cabē' redzagalaole. Banezda' nacale ben' yēchi', pero huadyin dza gacale ben' uña'a como dan' huaguižu Diuzi le'e quie dyin quienē' ruele. Banezda' cabē' rudie ja benē' le'e, ben' na nacajē' ben' Israel, pero nacajē' ben' nao rue cabē' mandado rue Satanás.

10 Na'ra biidzebile cabē' baza' gaca quiele yedzagalaole. Biidzebile ba'ala'cazi dyin quie xan' taxi'ibi' baza' gaca quiele udze' ja benē' bala le'e lu'u dyiguiba cuenda gacale prueba chi tali naole xneza' biusanla'adyi'len. Na'ra baba dzazi baza' yedzagalaole. Pero suele dyē'ēdi inaole xneza' ba'ala'cazi guti ja benē' le'e. Na'ra guna' yela' neban quiele tuzioli.

11 Ulezēnaga dyē'ēdi cabē' na Bichi Be quie Diuzi rēbinē' yaca ben' nao xneza'. Nu yaca ben' sue biusanla'adyi' xneza', bibi tamala gaca quiejē', ude beyudyi gutijē', bitziojē' lao gui' gabila." —Cana' una Jesús dza na'.

*Di'idza' niga use'ela' Juan lao ciudad Pérgamo*

12 Na'ra una Jesús gudyinē' nē'ēdi':

—Na'ra bzu di'idza' niga lē'ē guichi ise'elo'n lao ben' rguixogue' xti'idza' Diuzi, ben' zu ciudad Pérgamo. Na' yēbo'nē': "Cani rna ben' zē espada neduchi' rupalao:

13 Nē'ēdi' nezda' yugulu ca ruele. Nezda' zule ciudad ga lega nao ja benē' ca mandado rue Satanás. Pero ba'ala'cazi zule ciudad na', birusanla'adyi'le inaole xneza'. Bipsanla'adyi'le inaole xneza' la'acazi bēti ja benē' Antipas, ben' naca testigo quia'. Bētijē' lēbē' yedyi quiele ga r nabē' Satanás.

14 Pero de tu ta ruele biraxeda'. Biraxeda' ru'ele lato cabē' rue ben' zu ladole, ben' nenaonerue cabē' consejo bdze' tu ben' lao Balaam len itu ben' lao Balac dza na'. Bdze'nē' Balac consejo ta yēbinē' ben' Israel ta gaojē' bē'ēla' ta bdyia ja ben' lao ru'aba ga zu ídolo. Lēscan' bdze'nē' Balac consejo ta yēbinē' ben' Israel ta huejē' tamala gatiljē' nigula tula, nigula binaca zgulajē'.

15 Lēscan' biraxeda' ru'ele lato cabē' rue ben' zu ladole, ben' nenaonerue cabē' consejo rudze' ben' nicolaítas. Pero rudieda' cabē' consejo rudze'jē' leyaquē'.

16 Quie lena' ruen dyabē' yetza'le pensari quiele, como dan' chi biyetza'le pensari quiele, laguidatia' ga zule tilalia' lējē' conlē espada ta rero ru'a.

17 Ulezēnaga dyē'ēdi cabē' na Bichi Be quie Diuzi rēbinē' yaca ben' nao xneza'. Nu yaca ben' sue biusanla'adyi' xneza', hua'jē' yēta xtila laona maná ta gaojē', pero yēta xtila ta negachi'n na'. Lēscan' hua'jē' tu huio yo bezēri quie quiejē'. Na' lē'ē yo na' zun tu laojē' cubi ta binezi ja ben' tula. Tuzi ben' si'len nezinē' nu laohue zun." —Cana' una Jesús dza na'.

*Di'idza' ni use'ela' Juan lao ciudad Tiatira*

18 Na'ra una Jesús gudyinē' nē'ēdi':

—Na'ra bzu di'idza' niga lè'è guichi ise'elo'n lao ben' zu rguixogue' xti'idza' Diuzi ciudad Tiatira. Na' yèbo'nè': "Cani rna ben' naca zì'i Diuzi, ben' yu'u laohue ca yu'u xni' gui', ben' rna' labe ca rna' guibá bronce yèri gula:

<sup>19</sup> Na'ra nezda' yugulu cabè' ruele. Nezda' cabè' nedyè'èle nè'èdi'. Nezda' cabè' rnaole xneza'. Nezda' ruele cabè' mandado re'enda' huele. Nezda' rzuele birusanla'adyi'le inaole xneza'. Nezda' arnaorale xneza' dya'ara ca dza uzulaole inaole xneza'.

<sup>20</sup> Pero de tu ta ruele biraxeda'. Biraxeda' ru'ele lato zu tu nigula, ben' lao Jezabel, ladole. Rnanè' nun quie Diuzi rnanè', pero yè'zi rzi'nè', como dan' rudze'nè' ja ben' nao xneza' consejo ta huejè' tamala. Rudze'nè' lèjè' consejo ta gasilèjè' yaca nigula binaca žgulajè'. Lèscan' rudze'nè' lèjè' consejo gaojè' bè'èla' ta bdyia ja benè' lao ru'aba ga zu ídolo.

<sup>21</sup> Na'ra nè'èdi' abi'anè' lato ta yetza'nè' pensari quienè', pero bire'ennè' usanla'adyi'nè' tamala quienè' rasilènè' con nutezi be'mbyu.

<sup>22</sup> Pero nè'èdi' hua'nè' castigo gaca žhue'nè' gatanè' lao cama na'. Lèscan' hua' castigo ja ben' ruelè lèbè' tamala chi biusanla'adyi'jè' cabè' tamala ruelèjè' lèbè'.

<sup>23</sup> Na'ra cati gutia' ja ben' nao nigula na', caora na' huanezi yugulu ben' nao xneza' de que nezda' dužete ca naca pensari yu'u lu'u guicho laxta'o benè'. Caora na' guna' le'le tu premio chi bèle tahuen, pero hua' le'le tu castigo chi bèle tamala.

<sup>24</sup> Pero le'e, ben' nao xneza', ben' zu ciudad Tiatira, le'e ben' binao birue cabè' consejo rudze' nigula na', le'e ben' binezi cabè' di'idza' rnajè', rnajè' di'idza' negachi' quie Satanás, na' nè'èdi' rnia' le'e, tuzi ca re'enda' huele, re'enda' inaole xneza'.

<sup>25</sup> Huele seguir inaole xneza' dyè'èdi hasta dza cati yeguida'.

<sup>26</sup> Na'ra quie ben' rzue birusanla'adyi' xneza', quie ben' rue ca mandado re'enda' huejè' hasta dza gati'jè', hua'jè' lato inabè'jè' lao yedyi layu.

<sup>27</sup> Cabè' lato bèn Xuz'a nè'èdi' rnabi'a, cana' hua'jè' lato inabè'jè'. Conlè tu xaga' de guiba inabè'jè' lao yedyi layu. Chi tilalè ja benè' lèjè', udyiagui' yaca ben' nao xneza' lèjè' užužuyaquè' lèjè' como si fuera nacajè' yeso' yu.

<sup>28</sup> Hua'jè' lato sulèjè' nè'èdi', ben' naca ca bélo quie bala.

<sup>29</sup> Ulezènaga dyè'èdi cabè' na Bichi Be quie Diuzi rëbinè' yaca ben' nao xneza'." —Cana' una Jesús dza na'.

### 3

#### *Di'idza' niga use'ela' Juan lao ciudad Sardis*

<sup>1</sup> Na'ra una Jesús gudyinè' nè'èdi':

—Na'ra bzu di'idza' niga lè'è guichi ise'elo'n lao ben' rguixogue' xti'idza' Diuzi, ben' zu ciudad Sardis. Na' yèbo'jè': "Cani rna ben' yu'u Bichi Be quie Diuzi naca ca gadyi bichi be, ben' zè gadyi bélo: Nezda' yugulu cabè' ruele. Nezda' binaca huen quiele, naca quiele ca quie ben' baguti ba'ala'cazi nezule nebanle.

<sup>2</sup> Ulehue pensari cabè' raca quiele. Gapale cuidado biusanla'adyi'le ca tu tadao' bicu' rnaole xneza'. Pues il'è'ti'zi bipsanla'adyi'le xneza'. Blè'èda' cabè' naole xneza', binegaolen dya'a cabè' re'enda'.

<sup>3</sup> Na'ra bigala'adyi'le cabè' bè quiele quie xti'idza' Diuzi dza na'. Reya'ala' inaole dyè'èdi hue quiele quie xti'idza' Diuzi tatula. Reya'ala' utza'le pensari quiele, como dan' chi bihue quiele cabè' rnia' le'e, na'ra guida' binezile bi hora idechugulia' quiele. Cabè' guida ben' uban, binezile bi hora guidè', cana' guida'.



4 Pero zu bala ben' zu ladole ciudad Sardis, ben' binaca žabajë' besu, ta inaro, tuzi xneza' rnaojë'. Na'ra hua'jë' la'ari' bezëri ta gacojë', huazulia' lëjë' tuze, como dan' cana' zaca'jë' gaca quiejë'.

5 Nu yaca ben' rzue biusanla'adyi' xneza', hua'jë' la'ari' bezëri ta gacojë', biusula' laojë' zu lë'ë guichi naca libro ga naca lista bi lao ben' gata' yela' neban quie tuzioli. Huëpa' Xuza' len yaca ángel quienë': "Ben' ni nacajë' ben' quia'."

6 Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'." —Cana' una Jesús dza na'.

### *Di'idza' niga use'ela' Juan lao ciudad Filadelfia*

7 Na'ra una Jesús gudyinë' në'ëdi':

—Na'ra bzu di'idza' niga lë'ë guichi ise'elo'n lao ben' rguixogue' xti'idza' Diuzi, ben' zu ciudad Filadelfia. Na' yëbo'jë': "Cani rna ben' naca la'ya, ben' rnë tali, ben' rna bënë' lao ciudad quie rey David, ben' rsalo puerta nunu saque' usio len, ben' rsio puerta nunu saque' isalo len:

8 Nezda' yugulu cabë' ruele. Para le'e apsaloga' puerta quie guibá, nunu saque' usio len. Cana' bia' quiele como dan' rnaole xneza', rue quiele quie xti'idza', birusebi'le në'ëdi'.

9 Cani hua' quiele: Ulaohua' yaca ben' nao xneza' Satanás, ben' huizi' yë', ben' na nacajë' ben' Israel, pero binaojë' xneza'. Hua' mandado quitzujë' žibijë' laole ta inezijë' nedyë'ëda' le'e.

10 Lëscan', como dan' rue quiele quie xti'idza', rzuele bipsanla'adyi'le xneza', quie lena' ucuasa ucui'oga' le'e dza zaza'ra cati gaca tazëdi gula lao dužete yedyi layu. Na' gaca tazëdi gula lao yedyi layu ta ulu'en quie yaca ben' nita' na' cabë' ben' mala nacajë'.

11 Laguidatia'. Quie lena' biusanla'adyi'le cabë' babële naole xneza' cuenda bigaca quiele bigata' premio quiele guibá.

12 Nu yaca ben' hue gan lao tamala, hua'jë' fuerza valor cuenda gaca quiejë' ca quie tu pilare zu lu'u yu'u quie Xuza'. Na' huega'një' lu'u yu'u na' tuzioli. Uzua' lë'ë laxta'ojë' laohua', len lao Xuza', len lao ciudad quienë', ciudad Jerusalén cubi yeyëzi guibá yedyinnan lao yedyi layu.

13 Ulezënaga dyë'ëdi cabë' na Bichi Be quie Diuzi rëbinë' yaca ben' nao xneza'." —Cana' una Jesús dza na'.

### *Di'idza' niga use'ela' Juan lao ciudad Laodicea*

14 Na'ra una Jesús gudyinë' në'ëdi':

—Bzu di'idza' niga lë'ë guichi ise'elo'n lao ben' rguixogue' xti'idza' Diuzi, ben' zu ciudad Laodicea. Na' yëbo'jë': "Cani rna ben' rna puro tali, ben' naca testigo dya'a, ben' birzi' yë', ben' zulë Diuzi tuze cati uzulao Diuzi bzaloguë' yugulu ta de:

15 Nezda' yugulu ca ruele. Nezda' nica naole xneza' du guicho du la'adyi'le, nica rusebi'le në'ëdi'. Chi bire'enle inaole xneza' du guicho du la'adyi'le, mejorla usebi'le në'ëdi'.

16 Pero como binaole xneza' du guicho du la'adyi'le, lena' bizua' gusto cabë' ruele.

17 Na'ra nale nacale ben' uña'a. Nale raca huen quiele. Nale lega raxe Diuzi ca ruele. Nale gabi rdzioguele. Pero nica nezile ca tamala raca quiele. Nica nezile araca quiele ca quie ben' yëchi', ca quie ben' laochula, ca quie ben' rda žan gudi.

18 Quie lena' guna' le'e tu consejo. Reya'ala' inabale në'ëdi' chi biguti'a quielë ta naca puro oro cuenda gacale dugalo ben' uña'a. Reya'ala' inabale në'ëdi' chi biguti'a quiele la'ari' bezëri ta gacole cuenda ucachi'n cuerpo

quiele, na' bigaca yela' stu' quiele. Reya'ala' inabale nē'ēdi' chi biguti'a quiele huento ta udze'le yulaole cuenda yelē'ēle.

<sup>19</sup> Rdila' ruegadya' yugu ben' nedyē'ēda'. Quie lena' reya'ala' inaole xneza' du guicho du la'adyi'le. Reya'ala' utza'le pensari quiele uzēnagale quia'.

<sup>20</sup> Naca quia' ca quie tu ben' zē ru'a yu'u, ben' rulidza le'e. Chi nu ben' be quia' inanē' nē'ēdi': Uda lu'u yu'u, caora na' tzu'a lu'u yu'u quienē' gaolia'nē' tuže, na' gaolēnē' nē'ēdi' tuže.

<sup>21</sup> Nu ben' hue gan lao tamala, hua'nē' lato cue'lēnē' nē'ēdi' cuēta' ga ri'a xlatoga'. Cana' hua' quienē' con cabē' bia' nē'ēdi', bia' gan lao tamala, ben Xuzā' nē'ēdi' lato cui'a cuēta'nē' ga re'nē' xlatonē'.

<sup>22</sup> Ulezēnaga dyē'ēdi' cabē' na Bichi Be quie Diuzi rēbinē' yaca ben' nao xneza'." —Cana' una Jesús dza na'.

## 4

### *Cabē' rionla'adyi'jē' Diuzi guibá*

<sup>1</sup> Na'ra ude beyudyi cana', blē'ēda' neyalo puerta guibá beda' unē ben' unē nē'ēdi' tanēro, ben' yu'u rchi' ca yu'u rchi' trompeta. Na'ra unanē' nē'ēdi' caniga:

—Ūyēpicara niga. Ulu'ena' luē' cabē' ta baza' gaca.

<sup>2</sup> Cana' bē Bichi Be quie Diuzi blu'enē' nē'ēdi' ta baza' gaca. Na'ra blē'ēda' ga cue' tu benē' ta zu guibá. Lēscan' blē'ēda' re' tu benē' laonan.

<sup>3</sup> Lēben' na', ben' re' laonan, raca titi'nē' ca raca titi' yo jaspe o ca raca titi' yo cornalina. Lēscan' blē'ēda' ru'alao ga re'nē', neyēchon byēta' ta raca titi'n ca raca titi' yo esmeralda.

<sup>4</sup> Lēscan' blē'ēda' ru'alao ga re' ben' na', zura igalobetapa ga cue'ra benē'. Blē'ēda' na' ure' galobetapa ben' gula, ben' r nabē'ja. Lēben' na' nacojē' la'ari' bezēri, yu'u coron de oro guichoje'.

<sup>5</sup> Ga re' ben' na', rguino rēpiyesa, ratzo bdyito huiziu'. Na' zaca'lao ga re' ben' na', zu gadyi lámpara ra'ala'n gui'. Lělámpara na' nacan bichi be quie Diuzi ta naca gadyi.

<sup>6</sup> Zaca'lao ga re' ben' na', blē'ēda' tu ta naca ca nisadao', pero rna'n ca yaohuan yen' gula.

Lēscan' blē'ēda' lao tao' tu la'a huio, zaca' ga re' ben' na', zu tapa ben' naca forma ca bia guixi'. Na' yu'u yulaojē' duzetejē' xcu'udzujē' len laojē'.

<sup>7</sup> Na'ra blē'ēda' ben' nēro, naquē' ca tu bēdyi guixi', na' ben' urupe, naquē' ca tu bēdyihuaga, na' ben' uyune, zu laohuē' ca zu lao benē', na' ben' udape, naquē' ca psia bia rzē.

<sup>8</sup> Blē'ēda' zu tzona huio xilajē' tzala' tzala'jē'. Lēscan' dyia yulaojē' duzete xilajē' rupala'n. Na'ra du dza, du yela, birusanjē' rnajē' cani:

Ben' la'iya naco', ben' la'iya naco', ben' la'iya naco'.

Naco' Diuzi, ben' de yugulute yela' rnabē' quie, ben' zu tuzioli.

<sup>9</sup> Na'ra cati rapala'njē' ben' re' lao xlatogue, ben' neban tuzioli,

<sup>10</sup> caora na' uditzu žibi galobetapa ben' gula, ben' rnabē'ja, lao ben' re' na'. Cana' rionla'adyi'jē' ben' neban tuzioli. Lēscan' blē'ēda' bdyiajē' coron quiejē' lao xlatō ben' na'. Na'ra unajē' rēbijē' lēbē' cani:

<sup>11</sup> Señor, luē' naco' Diuzi quiendo'.

Luē' zaca'lo' hue ja benē' luē' ben' ze.

Luē' zaca'lo' hue ja benē' luē' ben' bala'ana.

Luē' zaca'lo' hue ja benē' luē' ben' de yela' rnabē' quie.

Cana' zaca'lo', como dan' luē' bēlo' yugulute ta de.

Lao na'alo' bzalo'yacan.

## 5

*Ni rnan quie tu libro len tu ben' naca ca quie tu beco' zi'ila'*

<sup>1</sup> Na'ra blè'èda' ben' re' xlatogue zènè' tu libro zaquè' na'anè' yebè. Blè'èda' naca libro forma ca rollo. Yu'u letra laonan len xcu'udzun. Blè'èda' gadyi cue' nerioranan.

<sup>2</sup> Lèscan' blè'èda' tu ángel, ben' de yela' r nabè' quie. Blè'èda' unènè' zidzo unanè' cani:

—¿Nu ben' zaca' ta ichipa ta nerio libro na' ta ixèdyinè'n?

<sup>3</sup> Na' blè'èda' ganu ben' zu, ben' zaca' ixèdyi libro na', ni ta ulabanè'n bisaque'. Blè'èda' ganu ben' rdzele, ni guibá, ni yedyi layu, ni ga yu'u ben' huati.

<sup>4</sup> Na'ra uredyitzaya'a nun quie dan' ganu ben' nedzele zaca' ixèdyi libro na', ni ta ulabanè'n bisaque'.

<sup>5</sup> Na'ra unè tu ben' gula, ben' r nabè', unanè' nè'èdi' caniga:

—Bira cuedyo' como dan' bazaca' Jesús, ben' naca ben' r nabè' quie familia quie Judá, ben' naca zi'isuba rey David, bazaca'nè' ichipanè' gadyi cue' ta nerio libro ixèdyinè'n.

<sup>6</sup> Lao tao' ga re' ben' na' xlatogue, ga zu tapa ben' naca ca forma bia guixi', len galobetapa ben' gula, ben' r nabè'ja, na' blè'èda' Jesús, ben' naca ca quie beco' zi'ila'. Zènè' na' ba'ala'cazi naquè' hue' nun quie bèti ja benè' lèbè'. Na' blè'èda' dyia gadyi luzu beco' zi'ila'. Lèscan' yu'u gadyi yulaoba'. Na'ra naca gadyi yulaoba' ca gadyi bichi be quie Diuzi ta use'elè' duzete yedyi layu.

<sup>7</sup> Lèscan' blè'èda' uyo lèben' naca ca quie beco' zi'ila' na', yexi'nè' libro zè ben' re' xlatogue na' zaquè' na'anè' yebè.

<sup>8</sup> Cati baozi' ben' naca ca quie beco' zi'ila' libro na', na'ra uditzu zibi tapa ben' naca forma ca bia guixi', len galobetapa ja ben' gula, ben' r nabè'ja, lao ben' naca ca quie beco' zi'ila'. Na'ra ja ben' gula, ben' r nabè'ja na', zèjè' tu huio arpa, zèjè' tu huio copa de oro yu'un yalo. Naca yalo na' ca quie di'idza' ru'elè yaca ben' rue quie xti'idza' Diuzi lèbè'.

<sup>9</sup> Na'ra rulajè' tu tacubi rnajè' caniga:

Luè' na' zaco' si'lo' libro na', ichipo' ta nerionan.

Luè' zaco', como dan' bèti ja benè' luè', ulato ren quio'.

Cana' udižulo' quie dula' xquia quie ja benè' cuenda gacajè' ben' quie Diuzi. Udižulo' quie dula' xquia quie ben' naca con nutezi ja raza, con nutezi ja di'idza', con bitezi ja yedyi, con bitezi ja naciòn.

<sup>10</sup> Uliolo' lèjè' gacajè' rey, gacajè' pxuzi quie Diuzi quiero.

Na'ra inabè'jè' lao yedyi layu.

<sup>11</sup> Caora na' una'a beda' ja ángel zè gula. Neyèchojè' ru'alao xlato ben' na', len ben' naca ca forma bia guixi', len ben' gula, ben' r nabè'ja. Zè million naca ja ángel.

<sup>12</sup> Na' unèjè' zidzo unajè' caniga:

Ben' naca ca quie beco' zi'ila', bèti ja benè' lèbè', zaca'nè' tzionla'adyi' ja benè' lèbè'.

Zaca'nè' yèbijè' lèbè' caniga:

Luè' naco' ben' de yela' r nabè' quie.

Luè' naco' xa'n yugulute ta de.

Luè' naco' ben' rioñe'e yugulute.

Luè' naco' ben' de yela' huaca quie.

Luè' naco' ben' bala'ana, ben' belaotzegue.

Luè' naco' ben' huendo' ben' ze.

13 Na'ra beda' unë yugulu ta bë Diuzi, ta inaro, yugulu ta zu guibá, len yugulu ta zu lao yedyi layu, len yugulu ta zu ga yu'u ben' huati, len yugulu ta zu lu'u xladao', len yugulute ta de. Beda' unëjan unajan caniga:

Ben' re' xlatogue, len ben' naca ca quie beco' zi'ila', nacajë' ben' huendo' ben' ze.

Nacajë' ben' bala'ana, ben' belatzegue. Nacajë' ben' de yela' rnabë' quie. Cana' naca quiejë' tuzioli.

14 Na'ra una tapa ben' naca forma ca bia guixi' caniga:

—Can' gaca.

Lëscan' udituz žibi galobetapa ben' gula, ben' rnabë'ja, uyonla'adyi'jë' ben' zu tuzioli.

## 6

### *Ni rguixogue'n quie xopa ta nerio libro na'*

1 Na'ra blë'ëda' cati pchipa ben' naca ca quie beco' zi'ila' ta nerio libro na' tanëro lao gadyi ta nerionan. Beda' rchi' tu ben' nëro, ben' naca quie lao tapa ben' naca forma ca bia guixi'. Beda' rchi'në' ca rchi' bdyito hueziu'. Na' unanë' në'ëdi':

—jUdacara ilë'ëlo'!

2 Na'ra cati una'a blë'ëda' tu caballo bezëri. Lëscan' blë'ëda' dyia tu benë' xcu'udzuba'. Lëben' na' zënë' tu ta chu'un flecha. Na' bë'jë' lebë' tu coron. Lëscan' bë'jë' lëbë' yela' rnabë'. Na' uza'në' zionë' ta sueranë' hueranë' gan tilalënë' yaca ben' naca enemigo quienë'.

3 Cati pchipa ben' naca ca quie beco' zi'ila' ta nerio libro na' taurupe, caora na' beda' cati unë ben' urupe, ben' naca quie lao tapa ben' naca forma ca bia guixi'. Unanë' në'ëdi':

—jUdacara ilë'ëlo'!

4 Na'ra cati una'a blë'ëda' bro itu caballo zna dyia tu benë' xcu'udzuba'. Na'ra ben' dyia xcu'udzuba' na', napë' yela' rnabë' ta uxenë' dila lao yedyi layu ta guti ja benë' laguedyijë'. Caora na' bë'jë' lëbë' tu espada že gula.

5 Na'ra cati pchipa ben' naca ca quie beco' zi'ila' tauyune nerio libro na', caora na' unë ben' uyune, ben' naca quie lao tapa ben' naca forma ca bia guixi'. Na' unanë' në'ëdi':

—jUdacara ilë'ëlo'!

Na' cati una'a blë'ëda' itu caballo gaso dyia benë' xcu'udzuba'. Blë'ëda' ben' dyia xcu'udzuba' zënë' tu žiga' de onza.

6 Caora na' beda' cati unë ben' uyune, ben' naca quie lao tapa ben' naca forma ca bia guixi', rëbinë' ben' dyia xcu'udzu caballo:

—Lažo quie ben' rue dyin tu dza, cana' saca' tu kilo trigo, cana' saca' tzona kilo cebada. Pero biudyiaguilo' yaga olivo ta cuio ja benë' aceite. Lëscan' biudyiaguilo' luba bedzuli' ta cuio ja benë' vino.

7 Na'ra cati pchipa ben' naca ca quie beco' zi'ila' taudape ga nerio libro na', caora na' beda' unë ben' udape, ben' naca quie lao tapa ben' naca forma ca bia guixi'. Unëne' unanë' në'ëdi':

—jUdacara ilë'ëlo'!

8 Na'ra cati una'a blë'ëda' bro itu caballo gachi, bia dyia tu benë' xcu'udzuba'. Na' ben' dyia lëba' na' laohuë' Yela' Guti. Lëscan' blë'ëda' xcu'udzunë' zena' iten' ben' laohuë' Yero Ba Ga Yu'u Ben' Huati. Bë' Diuzi lëjë' lato ta gutijë' tu naga quie ja ben' nita' lao yedyi layu. Bë'në' lato gutijë' lëjë' conlë huedila, conlë ubin, conlë yela' huë', conlë ja bia guixi' mala gula, bia zu lao yedyi layu.

<sup>9</sup> Na'ra cati pchipa ben' naca ca quie beco' zi'ila' taga'yo' ga nerio libro na', caora na' una'a blé'eda' zan ru'aba ta zu guibá, blé'eda' zu ja bichi be quie ja ben' guti nun quie udixogue'jé' xti'idza' Diuzi. Ta bē yaca ben' nita' lao yedyi layu bētijé' lējé' nun quie dan' udixogue'jé' xti'idza' Diuzi.

<sup>10</sup> Na'ra beda' unē ja ben' zu zan ru'aba ta zu guibá, beda' rnējé' zidzo gula rnajé' caniga:

—Señor, ben' la'iya lué'. Lué' uzulo' di'idza' ca unao' huelo'. ¿Bata ichugulilo' huelo' castigo ja ben' nita' lao yedyi layu, ja ben' bēti nēto'?

<sup>11</sup> Na'ra bē' Diuzi lējé' tu huio žabajé' bezēri ta gucojé'. Caora na' una Diuzi rēbinē' lējé':

—Ulecueza itu tiempo cuenda gacale completo, porque nezu ben' nerdziogue, ben' nuelé le'e tuže, ben' rue ca mandado rue Cristo. Binedyin dza guti ja benē' lējé' cabé' bētijé' le'e.

<sup>12</sup> Na'ra cati pchipa ben' naca ca quie beco' zi'ila' taxopa ga nerio libro na', caora na' guca tu užu' huala gula, na' beyaca ubidza chula ca tu la'ari' gaso gula. Lēscan' beyaca biu' rna'n ca ren.

<sup>13</sup> Caora na' bguino bélo gusi'jan lao dylayú. Guca quie bélo cabé' raca quie yaga higo cati rda tu be bedun' fuerte gula, rguino ja higo ya'a quienen rasi'jan layu.

<sup>14</sup> Na'ra bedubi ladza cabé' retubiro guichi, bira ilé'eron. Lēscan' bzisi ja ya'a, len ga de yu bidyi lu'u nisadao' ga zujan naca xlaton.

<sup>15</sup> Caora na' pcachi'lao ja ben' naca ja rey nita' lao yedyi layu. Pcachi'laoré ja ben' naca ben' belao quiejé', len ja ben' uña'a, len ja ben' naca comandante, len ja ben' de yela' rnabé' quie. La'acazi ben' nada'o, la'acazi ben' libre, pcachi'laojé' zan beló, pcachi'laojé' zan yo yela.

<sup>16</sup> Na'ra unajé' rēbijé' ya'a len yo yela:

—Ulecachi' nēto' cuenda bira ilé' ben' re' xlatogue guibá nēto' ta bigaca quiendo' ca castigo huala gula rue ben' naca ca quie beco' zi'ila' nēto'.

<sup>17</sup> Pues abdyin dza hue Diuzi castigo lao yedyi layu. ¿Ca nuži ben' sue, ben' gacaja ca castigo huené'?

## 7

### *Ni rguixogue'n quie ja ben' Israel, ben' neguichi' sello quie Diuzi*

<sup>1</sup> Na'ra ude beyudyi na', blé'eda' tapa ángel zējé' tu huiojé' lao dapa squin yedyi layu. Zējé' ruza'agajé' ta bita lao dapate be rda lao yedyi layu. Cana' bējé' tacuenda bita be lao yedyi layu, ni lao nisadao', ni ta utan yaca yaga.

<sup>2</sup> Na'ra lēscan' blé'eda' za' itu ángel zaca' ni ga rlé ubidza, zēnē' tu sello quie Diuzi, ben' zu neban tuzioli. Na'ra léángel na' urediyi'a'nē' zidzo gula blidzané' tapa ángel. Na' bē' Diuzi tapa ángel yela' rnabé' ta udyiagui'jé' yedyi layu len nisadao'. Na'ra una ángel na' rēbinē' tapa ja ángel na' caniga:

<sup>3</sup> —Tu raca na' nerdzioguen cuiobē'ro uquichiro sello žga ja ben' quie Diuzi, biudyiagui'le yedyi layu, biudyiagui'le nisadao', biudyiagui'le ja yaga.

<sup>4</sup> Na'ra beda' tu cani naca ja ben' neguichi' sello, ben' naca ja familia quie ben' Israel. Beda' tu gayuhua chopa galo tapa mila nacajé'.

<sup>5</sup> Chipchopa mila naca ja ben' familia quie Judá, na' chipchopa mila naca ja ben' familia quie Rubén, na' chipchopa mila naca ja ben' familia quie Gad,

<sup>6</sup> na' chipchopa mila naca ja ben' familia quie Aser, na' chipchopa mila naca ja ben' familia quie Neftalí, na' chipchopa mila naca ja ben' familia quie Manasés,

<sup>7</sup> na' chipchopa mila naca ja ben' familia quie Simeón, na' chipchopa mila naca ja ben' familia quie Leví, na' chipchopa mila naca ja ben' familia quie Isacar,

<sup>8</sup> na' chipchopa mila naca ja ben' familia quie Zabulón, na' chipchopa mila naca ja ben' familia quie José, na' chipchopa mila naca ja ben' familia quie Benjamín. Cana' naca lista quie ja ben' neguichi' sello.

*Ni rguixogue'n quie ben' zë gula, ben' naco la'ari' bezëri*

<sup>9</sup> Na'ra ude beyudyi na', cati una'a blë'ëda' negu'udi' ben' zë gula. Negu'udi' ben' quie yugulute nación, len ben' quie yugulute ren, len ben' quie yugulute cue' di'idza', len ben' quie yugulute yedyi. Na'ra blë'ëda' neyëchojë' ru'alaog an' re' ben' re' xlatogue, len gan' zë ben' naca ca quie beco' zi'ila'. Na'ra ben' neyëcho na', nacajë' ben' zë gula. Nitu ganu sue ulaba lëjë'. Nacojë' yugulutejë' la'ari' bezëri, zëjë' la'aga' zin.

<sup>10</sup> Lëscan' yugulujë' urediyi'jë' zidzo gula unajë' caniga: Diuzi quiero, ben' re' xlatogue, len ben' naca ca quie beco' zi'ila', lëjë' bapselajë' nëto'.

<sup>11</sup> Na'ra yugute ja ángel na' neyëchojë' ru'alaog an' re' ben' re' xlatogue, len gan' re' ben' gula, ben' rnabë'ja, len gan' zë yaca ben' naca forma ca bia guixi'. Caora na' byëcho ja ángel, bda' ru'ajë' layu gan' re' ben' re' xlatogue, uyonla'adyi'jë' lëbë'.

<sup>12</sup> Na' unajë' cani:

Cani nacan quie Diuzi quiero.

Naca Diuzi ben' tzionla'adyi'ro, ben' huero ben' ze.

Naca Diuzi ben' rioñe'e yugulute, ben' yëbiri diuxcalelo'.

Naca Diuzi ben' bala'ana, ben' de yela' rnabë' quie, ben' de yela' huaca quie.

Cana' nacan quie Diuzi quiero tuzioli. Amén.

<sup>13</sup> Na'ra tu ben' gula, ben' rnabë' na', unabanë' në'ëdi' caniga:

—¿Nuži ja ben' niga, ben' naco ja la'ari' bezëri? ¿Gaži uzal'jë'?

<sup>14</sup> Na'ra gucha'në' caniga:

—Señor, luë' nezo'.

Na' unë' rëbinë' në'ëdi':

—Lëja ben' niga uza'jë' ga guca zëdi gula lao yedyi layu. Abeyacajë' ben' laxta'o yëri lao Diuzi nun quie dan' unaojë' xneza ben' naca ca quie beco' zi'ila'. Na' nacojë' la'ari' bezëri ta uyërin conlë ren quienë'.

<sup>15</sup> Quie lena' nita'jë' zaquë'lao ga re' Diuzi ga naca xlatonë'. Rionla'adyi'jë' Diuzi du dza, du yela, ga zu idao' quienë' guibá. Na'ra rapa Diuzi lëjë' ta gabi gaca quiejë'.

<sup>16</sup> Bira yedzagalaojë', bira idzioguejë' ta gaojë' ta yo'ojë'. Bira udyiagui' oba lëjë', nicara gaquejë' zla quien.

<sup>17</sup> Cana' gaca quiejë' como dan' bazë ben' naca ca quie beco' zi'ila' zaca'lao ga re' Diuzi xlatogue'. Rapa ben' naca ca quie beco' zi'ila' lëjë' ca quie ben' rapa beco' zi'ila' quie. Rehua'anë' lëjë' ga zu nisa ta ri'ojë' ta ru'en lëjë' yela' neban quiejë' tuzioli. Bira cuedyijë', porque barapa Diuzi lëjë'.

## 8

*Ruchipa ben' naca ca quie beco' zi'ila' tagadyi ta nerio libro na'*

<sup>1</sup> Na'ra cati pchiba ben' naca ca quie beco' zi'ila' na' tagadyi ta nerio libro na', caora na' ure' chizi guibá ca du gatzto hora.

<sup>2</sup> Caora na' blë'ëda' igadyi ángel nita'jë' zaquë'lao ga zu Diuzi. Na'ra bë' Diuzi lëjë' gadyi trompeta.

<sup>3</sup> Beyudyi ude na', blë'ëda' itu ángel zënë' tu ye'n yalo de oro. Na' zunë' zaquë'lao lao ru'aba bë'jë' lëbë' yalo zë gula ta bdyianë' lao ru'aba ca gun quie Diuzi ta tzëpi dzen quien ga zu Diuzi tuže conlë di'idza' ru'elë ben' rue quie xti'idza' Diuzi lëbë'. Na' lëru'aba na' nacan de oro, zun zaca'lao ga re' Diuzi.

<sup>4</sup> Na'ra lao na'a ángel na' uyëpi dzen quie ye'n yalo tuže len di'idza' ru'elë ben' rue quie xti'idza' Diuzi lëbë' ta bdyinnan ga re' Diuzi.

<sup>5</sup> Caora na' uzi' ángel ye'n yalo na' psedza'në'n bao' ure'n gui' ta dyia lao ru'aba uzi'në'n uru'unnë'n lao yedyi layu. Cana' guca uyëpi yesa, gotzo bdyito hueziu', guca uzu' lao yedyi layu.

### *Rucuedyi ja ángel ja trompeta quiejë'*

<sup>6</sup> Na'ra lao gadyi ja ángel, ben' zë ja gadyi trompeta na', ulisajë' trompeta quiejë' ta ucuedyijë'n.

<sup>7</sup> Na'ra cati pcuedyi ángel nëro trompeta quienë', caora na' bguino yo hueziu' len gui' dupen ta naca ca ren lao yedyi layu. Dyin quie len, uyei tu cue' quie lao tzona cue' yedyi layu, lëscan' uyei tu cue' quie lao tzona cue' yaga, lëscan' uyei tu cue' quie lao tzona cue' guixi' ya'a.

<sup>8</sup> Na'ra cati pcuedyi ángel urupe trompeta quienë', caora na' bguino tu ta naca ca tu ya'a ra'ala'n gui' lu'u nisadao'. Guca tu cue' quie lao tzona cue' nisadao' ca ren.

<sup>9</sup> Lëscan' guti tu cue' quie lao tzona cue' bia yu'u lu'u nisadao', lëscan' udyiagui' tu cue' quie lao tzona cue' ja barco rda lao nisadao'.

<sup>10</sup> Na'ra cati pcuedyi ángel uyune trompeta quienë', caora na' bguino tu bélo ze gula lao yedyi layu ra'ala'n gui'. Dyin quie len udyiagui' tu cue' quie lao tzona cue' yao, lëscan' udyiagui' tu cue' quie lao tzona cue' ga rlë nisa.

<sup>11</sup> Lëbélo na' lao bélo sla' gula. Dyin quie len beyaca tu cue' quie lao tzona cue' nisa sla' gula. Aguti ben' zë nun quie dan' hue'ejë' nisa na', como dan' sla' gula beyacan.

<sup>12</sup> Na'ra cati pcuedyi ángel udape trompeta quienë', caora na' udyiagui' tu cue' quie lao tzona cue' ubidza, lëscan' udyiagui' tu cue' quie lao tzona cue' biu', lëscan' udyiagui' tu cue' quie lao tzona cue' bélo. Quie lena' bega'n tu cue' quie lao tzona cue' jan lato chula. Na'ra bipseni' xni' ubidza tu cue' quie lao tzona cue' quie dza. Lëscan' bipseni' xni' biu', bipseni' xni' bélo. Tu cue' quie lao tzona cue' quie yela bipseni'yacan.

<sup>13</sup> Caora na' una'a beda' cati unë tu ángel rzënë' ladza gatzo guibá. Rnënë' zidzo rnanë' caniga:

—¡Bayëchi' gula nacan quie ja ben' nita' lao yedyi layu cati ucuedyi itzona ángel trompeta quiejë'!

## 9

<sup>1</sup> Na'ra cati pcuedyi ángel ga'yo' trompeta quienë', blë'ëda' tu ta naca ca bélo uyëzin guibá bdyinnan lao yedyi layu beyacan ángel. Na' bé' Diuzi ángel na' tu zi'guiba quie tu poso zitu' gula.

<sup>2</sup> Na'ra psalo ángel na' ru'a poso zitu' gula. Caora na' lu'u poso na' bro dzen cabë' dzen rero ru'a horno. Nun quie rero dzen na', bechula xni' ubidza, lëscan' bechula ladza.

<sup>3</sup> Na'ra lu'u dzen na' bro ja bëchi'zu rdajaba' rzëjaba' lao yedyi layu. Bë' Diuzi lato quiejaba' ta qui'idyi'jaba' ja benë' cabë' rgui'idyi' xuni'.

4 Pero bibè' Diuzi lèjaba' lato ta udyiagui'jaba' guixi' ni ta udyiagui'jaba' ta raza ja benè', ni ta udyiagui'jaba' ja yaga. Pero bè Diuzi lèjaba' mandado ta qui'idyijaba' ja ben' bida' zga sello quie Diuzi.

5 Bibè' Diuzi lèjaba' lato ta gutijaba' ja benè', pero solamente ta qui'idyijaba' lèjè' ilajè' lao ga'yo' biu'. Na'ra cabè' rla nu benè' cati rgui'idyij' xuni' lèjè', cana' ulajè'.

6 Na'ra lèdza cati gaca quie ja ben' nita' lao yedyi layu cana', lega gue'enjè' gatijè', pero bigatijè'. Ba'ala'cazi gue'enjè' iyudyi yedu quiejè', bisì' yela' guti quiejè' lèjè'.

7 Na'ra lèja bèchi'zu na', nacajaba' forma ca caballo, bia listo ta rio lao dila. Zun guichojaba' tu ta naca ca coron de oro. Pero zu laojaba' ca zu lao benè'.

8 Naca guitza' guichojaba' ca guitza' guicho nigula. Lèscan' dyia leijaba' ca dyia lei león.

9 Na'ra lèbèchi'zu na', yu'u ru'achu'uba' tu ta naca de guíba. Lèscan' xilaba' ruen ru'be cabè' ru'be rue zè carreta ta rguba ja caballo cati yu'ujaba' be tziojaba' lao dila.

10 Lèscan' zu zbamba' ca zu zbam xuni'. Zurèn yèchi' ca zu zbam xuni'. Napa Zbanjaba' fuerza ta qui'idyijaba' ja ben' nita' lao yedyi layu lao ga'yo' biu'.

11 Na'ra zu tu ben' naca xa'n bèchi'zu. Lèben' na' naquè' ángel, naquè' ben' rnabè' lu'u poso zitu' gula. Na' di'idza' hebreo lao ángel na' Abadón. Lèscan' di'idza' griego lao ángel na' Apolión, ta inaro xti'idza'ro, ben' rudyiagui' ja benè'.

12 Cana' guca aode tu ta naca bayèchi' gula, pero neracara falta gaca ichopan.

13 Quie lena' cati pcuedyi ángel xopa trompeta quienè', caora na' beda' bro tu rchi' benè' lao dapa squin ru'aba de oro ta zu zaquè'lao ga zu Diuzi guibá.

14 Lèscan' beda' rchi' ben' na' rëbinè' ángel xopa, ben' zè trompeta quie unè' caniga:

—Ulexèdyi dapa ángel, ben' nerio ru'a yao ze Eufrates.

15 Cana' pxèdyijè' dapa ángel na' ta gutijè' tu cue' quie lao tzona cue' ja benè' nita' lao yedyi layu. Dyin bè Diuzi bega'njè' neriojè' hasta idyin hora, hasta idyin dza, hasta idyin biu', hasta idyin iza ixèdyijè' ja ángel na'.

16 Na'ra beda' anaca soldado quiejè' chopa gayuhua million, ben' dyia ja caballo.

17 Na'ra guca quia' ca quie ben' uxusa, blè'èda' caballo na'. Lèscan' blè'èda' ben' dyia lèba' yu'u guíba ru'achu'ujè' ta naca culuri zna, len culuri azul, len culuri gachi. Na'ra naca guicho caballo na' ca guicho león. Lèscan' ru'a caballo na' reron gui' len dzen len ta ra'ala' gui' laona azufre.

18 Na'ra guti tu cue' lao tzona cue' ja benè' nita' lao yedyi layu. Dyin quie tzona cue' castigo ta bro ru'a caballo bdyiagui'nan lèjè', ta inaro, bdyiagui' gui' lèjè', lèscan' bdyiagui' dzen lèjè', tu ta ra'ala' gui' laona azufre lèjè'.

19 Na'ra lu'u ru'a ja caballo yu'u fuerza quiejaba' ta udyiagui'jaba' ja benè'. Lèscan' de fuerza quie zbanjaba'. Naca zbanjaba' ca bèla zè. Na'ra conlè bèla naca zban ja caballo bèjaba' hue' ja benè'.

20 Na'ra ja ben' bega'n, ben' biguti nun quie ja castigo, biptza'jè' pensari quiejè' ta usanjè' cabè' ruejè'. Lèscan' bipsanjè' cabè' ruejè' rionla'adyijè' taxi'ihui', bipsanjè' cabè' ruejè' rionla'adyijè' ja ídolo ta naca de oro, len ja ídolo ta naca de plata, len ja ídolo ta naca de bronce, len ja ídolo ta naca de yo, len ja ídolo ta naca de yaga. Pues yaca ídolo na' birlè'èn, birena, birza'n.



<sup>21</sup> Na'ra lëscan' biptza'jè' pensari quiejè' ta usanjè' bira gutijè' benè', bira huejè' brujo, bira gasilèjè' ja nigula binaca žgulajè', bira cuanjè' quie benè'.

## 10

*Ni ru'en di'idza' quie tu ángel, ben' zè tu guichi naca rollo*

<sup>1</sup> Na'ra blè'èda' itu ángel, ben' lega de yela' huaca quie. Uyëzinè' guibá dubinè' beo bdyinnè' lao yedyi layu. Na'ra guichonè' zunan tu byeta'. Lëscan' laohuè' rna'n raca titi' ca rna' ubidza. Naca sunnè' ca plare ta rna' ca gui'.

<sup>2</sup> Lëscan' blè'èda' zènè' tu guichi naca rollo nasalonè'n. Blè'èda' ni'anè' yebè blionè' lao nisadao'. Lëscan' itzala' ni'anè' yega' blionè' lao yu bidyi.

<sup>3</sup> Na'ra urediyia' ángel na' unènè' zidzo gula cabè' rue león cati rbediyia'ba'. Cati urediyia' ángel na', caora na' unè' gadyi hueziu'. Na'ra beda' cabè' unajan.

<sup>4</sup> Cati ude beyudyi beda' cabè' una gadyi hueziu' na', na'ra gue'enda' uzua'n lè'è guichi ca unajan. Pero caora na' beda' tu rchi' ben' unè' nè'èdi' guibá. Na' unè' rëbinè' nè'èdi' cani:

—Pcachi' cabè' una gadyi hueziu' na' luè'. Biuzulo'n lè'è guichi.

<sup>5</sup> Na'ra léángel na', ben' blè'èda' nulio lao nisadao' len yu bidyi, caora na' ulisanè' ladza na'anè' yebè

<sup>6</sup> bguntenè' ben' zu tuzioli, ben' bzalo guibá, len dyilayu, len nisadao', len yugulute ta de. Na'ra unè' caniga:

—Abdyin hora na'a. Bira de tiempo.

<sup>7</sup> Na'ra bè' idyin tiempo sulao ángel gadyi ta ucuedyinè' trompeta quienè', caora na' su di'idza' gaca cabè' di'idza' belao udixogue' Diuzi ja ben' quienè', ben' udixogue' xti'idzè' dza na'.

<sup>8</sup> Na'ra tatula beda' unè' ángel, ben' unè' nè'èdi' guibá. Na' unè' rëbinè' nè'èdi' cani:

—Uyo yexi' guichi naca rollo nayalo ta zè ángel na', ben' nulio lao nisadao' len yu bidyi.

<sup>9</sup> Na'ra uya' gan' zè ángel na', unaba'nè' ta gunnè'n nè'èdi'. Na'ra unè' rëbinè' nè'èdi' caniga:

—Uzi'n, udaona. Bè' gaolo'n hueyacan zixi gula ca bdyin'dao' lu'u ru'alo'. Pero bè' baodëbo'n baoyëzin lu'u lè'èlo', na'ra hueyacan sla' gula.

<sup>10</sup> Na'ra ben' ángel na' nè'èdi' guichi naca rollo. Bè' udaohua'n beyacan zixi gula ca bdyin'dao' lu'u ru'a. Pero bè' baodëba'n baoyëzin lu'u lè'èna', na'ra beyacan sla' gula.

<sup>11</sup> Na'ra unajè' nè'èdi' caniga:

—Tatula reya'ala' quixogue'lo' benè' cabè' una Diuzi cabè' ta baza' gaca quie yedyi zè, len quie nación zè, len quie zè cue' di'idza', len quie zè cue' ben' naca rey.

## 11

*Ni ru'en di'idza' quie chopa ben' naca testigo quie Diuzi*

<sup>1</sup> Na'ra benjè' nè'èdi' tu huenixi' ta naca ca yaga ta rzèjè' rurixijè'. Na'ra beda' tu rchi' benè' unanè' nè'èdi' caniga:

—Uyo yerixi bala žicho naca idao' quia' len ru'aba quien. Lëscan' ulabo' bala naca ben' rionla'adyi' nè'èdi' na'.

<sup>2</sup> Pero biurixo' lali'a quie idao' nun quie dan' na' rda ja ben' yedyi tula, ben' binaca ja ben' Israel. Pues lëben' na' huadyinjè' tajè' bigapajè' bala'ana ciudad Jerusalén, ciudad naca la'iya. Cana' huejè' lao chopa galo chopa biu'.

<sup>3</sup> Na'ra në'ëdi' ise'ela' chopa ben' naca testigo quia', nacojë' la'ari' ca la'ari' ta naco ja ben' guti familia quie. Huaguixogue'jë' benë' tanun quia' në'ëdi' lao tu mila chopa gayuhua tzona galo dza. —Cana' unanë' në'ëdi'.

<sup>4</sup> Na'ra lëchopa ja ben' naca testigo quie Diuzi, nacayaquë' ca quie chopa yaga olivo. Lëscan' nacajë' ca quie chopa candelero ta zu lao Diuzi, ben' naca xan' yedyi layu.

<sup>5</sup> Na'ra chi nu ben' re'en udyiagui' ben' naca testigo quie Diuzi, huario gui' lu'u ru'ajë' ta uzejjë' ben' re'en udyiagui' lëjë'. Cana' gati nutezi ben' re'en udyiagui' lëjë'.

<sup>6</sup> Na'ra bade yela' r nabë' quiejë' ta huejë' mandado bihuen nisayo lao yedyi layu dza rdajë' rguixogue'jë' ja benë' tanun quie Diuzi. Lëscan' bade yela' r nabë' quiejë' yeyuejë' nisa iyacan zna ca ren. Lëscan' bade yela' r nabë' quiejë' ta uxejë' ta lega yedzagalao ja ben' nita' lao yedyi layu, lëscan' ta uxejë' zë cue' ta udyiagui' benë'. Con bala cue' ta re'enjë' gata' ta udyiagui' ja benë', cana' huejë' mandado gaca.

<sup>7</sup> Pero bë' iyudyi huejë' ca mandado re'en Diuzi huejë', na'ra tilalë tu bia guixi' mala gula lëjë', bia bro lu'u pozo zitu' gula. Na'ra hueba' lëjë' gan, gutiba' lëjë',

<sup>8</sup> uca'mba' cuerpo quiejë' lëciudad na' ga bda'jë' Señor quiero lë'ë yaga cruzo. Biucachi'yaquë' leyaquë', pero yega'n cuerpo quieyaquë' la callezi. Quie lëciudad na' huazaque' inaro nacan ca quie ciudad Sodoma, ciudad mala gula. Lëscan' nacan ca quie nación Egipto.

<sup>9</sup> Ben' za' zë yedyi tula, ben' nacaja ren tula, ben' racaja zë cue' di'idza' tula, ben' za' zë nación tula, hualë'ëjë' cuerpo quiejë' lao tzona dza yugatzo, pero bihue'jë' lato ucachi'jë' cuerpo quiejë'.

<sup>10</sup> Na'ra lega yedaohue ja ben' nita' lao yedyi layu sujë' gusto dan' guti ja ben' na'. Tantozi sujë' gusto, ise'ela'jë' regalo quie quie laguedyijë'. Lega raxejë' aguti ja ben' na', como dan' lega rdza'jë' ben' rguixogue' tanun quie Diuzi.

<sup>11</sup> Na'ra ude guca lao tzona dza yugatzo, useban Diuzi lëjë' yeyasajë' tatula. Caora na' yugulu ben' blë'ë cabë' guca quiejë', lega bdzebijë'.

<sup>12</sup> Caora na' chopa ben' naca testigo, bejë' rchi' tu ben' unë zidzo guibá unë rëbinë' lëjë' caniga:

—Uleyëpi niga.

Caora na' beyëpijë' lao beo zeyojë' guibá blë'ë ja ben' naca enemigo quiejë' lëjë'.

<sup>13</sup> Ude na', lagucate tu užu' fuerte gula, byala tu cue' yu'u quie lao chi cue' yu'u quie ja ben' ciudad na'. Lëscan' nun quie užu' guti gadyi milajë'. Caora na', ben' bega'nja bigutija, lega bdzebijë' unajë' naca Diuzi ben' de yela' huaca quie.

<sup>14</sup> Cana' ude taorupe ta naca bayëchi' gula, pero taoyune laza'te gaca ta naca bayëchi' gula.

### *Pcuedyi ángel gadyi trompeta quienë'*

<sup>15</sup> Na'ra pcuedyi ángel gadyi trompeta quienë'. Caora na' unë ja ben' zulë Diuzi guibá zidzo unajë' cani:

Diuzi len ži'inë' Cristo, ben' use'elë' lao yedyi layu, abdyin dza inabë'jë' lao yugulu ben' r nabë', ben' nita' lao yedyi layu.

Biyeyudyi biyedu inabë'jë'.

<sup>16</sup> Na'ra lëgalobetapa ja ben' gula, ben' r nabë'ja re'ja lao xlatojë' zaquë'lao ga re' Diuzi guibá, lëjë' gutajë' guzuru'ala layu uyonla'adyi'jë' Diuzi.

<sup>17</sup> Cani unajë' rëbijë' Diuzi:

Rnando' luë' diuxcalelo', Señor.

Luë' naco' Diuzi, ben' de yugulute yela' r nabë' quie tuzioli.

Zulo' nebanlo' tuzioli.

Abdyin hora huelo' mandado ta hue ja benë' ca re'enlo' huejë'.

Abdyin hora inabë'lo' lao yedyi layu.

<sup>18</sup> Abdza' ja ben' nita' lao yedyi layu luë'.

Pero na'ra abdyin dza huelo'jë' castigo, abdyin dza ichugulilo' quie ja ben' huati.

Abdyin dza quizulo' ben' uidxogue' di'idza' quio', ben' naca ben' la'iya quio', ben' udapa luë' bala'ana.

Abdyin dza quizulo'jë' yugulujë'.

Abdyin dza udyiagui'lo' ben' rudyiagui' yedyi layu.

<sup>19</sup> Na'ra uyalo ga rionla'adyi'jë' Diuzi guibá. Caora na' blë'ëjë' tu caja ga yu'u di'idza' bega'ntza'olë' Diuzi ja ben' unita' tiempote. Cati uyalon, na'ra uyëpi yesa, gotzo bdyito hueziu', lëscan' guca uzu', bguino yo hueziu' dužeten.

## 12

*Ni rnën quie tu nigula len tu bia guixi' snia gula nacaba' ca bëla*

<sup>1</sup> Na'ra guca tu seña guibá. Bla' tu nigula nedubinë' xni' ubidza. Naconë'n nacan ca quie zabanë'. Lëscan' xni'anë' zu biu'. Lëscan' zu tu coron guichonë' ga dyia chipchopa bélo.

<sup>2</sup> Nu'anë' bdao' rbedyiya'në' bedzagalaonë' len bdao'. Ruen žhue'në' ta su bdao' quienë'.

<sup>3</sup> Na'ra guca itu seña guibá. Bla' tu bia guixi' snia gula nacaba' ca bëla, nacaba' culuri žna. Naca gadyi guichoba'. Dyia chi luzuba'. Lëscan' zu tu huio coron lao gadyi guichoba'.

<sup>4</sup> Conlë žbamba' pquinoba' tu cue' quie lao tzona cue' bélo lao yedyi layu. Caora na' uzëba' lao nigula, ben' su bdao' quie, cuenda gaoba' bdao' quienë' bë' subi'.

<sup>5</sup> Caora na' uzu tu bdao' byu quie nigula na'. Lëbdao' na', cati banacabi' ben' huaca, huanabë'në' lao yedyi layu ta yu'u ni'a xnezi. Na'ra labezi'te Diuzi bdao' na', zeyu'anë'bi' yesannë'bi' ga re'në' lao xlatoguë'.

<sup>6</sup> Lëscan' bžuno nigula na', zionë' lao lato ga bidyia yu'u. Lëlato na' nacan ga pceza Diuzi ta gao nigula na' lao tu mila chopa gayuhua tzona galo dza.

<sup>7</sup> Cati ude beyudyi na', guca tu dila guibá. Na'ra ángel Miguel len ja ángel quienë', udilalëjë' lëbia guixi' snia gula len ángel quieba'.

<sup>8</sup> Pero biužaque'ba' huelëba' ángel quieba' gan. Cana' abeyudyi tiempo quieba' len ángel quieba'. Bira saque' sulëba' ángel quieba' guibá.

<sup>9</sup> Cana' guca uliojë' lëba' guibá. Na'ra lëbia guixi' snia gula laoba' xan' taxi'ihui'. Lëscan' laoba' Satanás. Lëba' rzi'ba' yë' ja ben' nita' lao yedyi layu. Cana' guca uru'unjë'ba' lao yedyi layu len ja ángel quieba'.

<sup>10</sup> Na'ra beda' tu rchi' benë' unëñë' zidzo guibá unanë' cani:

—Babdyin dza ute usela Diuzi yaca ben' quienë'. Barnabë' Diuzi quiero len ben' naca Cristo quienë' lao yedyi layu. Baoru'unjë' ben' udao xquia yaca ben' nao xneza Jesús. Du dza, du yela, udao Satanás lëjë' xquia lao Diuzi.

<sup>11</sup> Bëjë' gan lao taxi'ibi' nun quie guti Cristo, ben' naca ca quie beco' ži'ila', bia naca gun quie Diuzi. Bëjë' gan nun quie bibdzebijë' uidxogue'jë' xti'idza' Diuzi. Bibdzebijë' chi guti ja benë' lëjë', na' uzujë' dispuesto gatijë'.

<sup>12</sup> Pues yedaohuele le'e, ben' zu guibá. Pero bayëchi' gula nacan quiele le'e, ben' nita' lao yedyi layu, la'acazi zule yu bidyí, la'acazi zule lao nisadao'.

Naca bayëchi' gula quiele como dan' baoyëzi xan' taxi'ibi' yedyi layu ga nita'le. Lega bdza'në<sup>1</sup> nun quie dan' nezinë' baruen bago dza yeyudyi yedu quienë'. —Cana' una ben' na'.

<sup>13</sup> Na'ra cati blë'ë lëbia guixi' snia gula cabë' bëjë' quieba', uliojë'ba' guibá, pquinojë'ba' lao yedyi layu, caora na' uza'ba' zioba' unaoba' nigula, ben' baozu bdao' quie.

<sup>14</sup> Pero bë' Diuzi nigula na' chopa xila yela ca xila psia cuenda sënë' ladza tzionë' lao lato ga bidyia yu'u, ga nacan zitu'. Lë'nigula na' bë'jë' ta udaonë' lao tzona iza yugatzo.

<sup>15</sup> Na'ra bro nisa lu'u ru'a bia guixi' snia gula na', uduxoba' tu yao ze cuenda idyinnan ga zu nigula gatinë' lu'u nisa.

<sup>16</sup> Pero gualë layu nigula na', uxa'ana' ru'an hue'enan nisa bro ru'a bia guixi' snia gula.

<sup>17</sup> Quie lena' lega bdza'ba' nigula na' zioba' tzetilalëba' yaca zi'isuba nigula na', yaca ben' ruzu rue cabë' mandado rue Diuzi, yaca ben' rnao con cabë' rna xti'idza' Jesucristo du guicho du la'adyi'.

## 13

### *Ni ru'en di'idza' quie chopa bia guixi' bayatza gula*

<sup>1</sup> Na'ra uzua' ru'a nisadao' ga naca layu bidyi, caora na' blë'ëda' bro itua bia guixi' bayatza gula lu'u nisadao'. Blë'ëda' naca gadyi guichoba'. Lëscan' blë'ëda' dyia chi luzuba'. Na' tu huio lao luzuba' zun tu huio coron. Lëscan' lë'ë gadyi guichojaba' zu laojaba' quie quie ca laojaba'. Pero ca naca laojaba' nacan ta utasi unioyacan Diuzi.

<sup>2</sup> Na'ra lëbia guixi' bayatza gula, bia blë'ëda', nacaba' forma ca bëdyi. Naca ni'aba' ca ni'a oso. Zu ru'aba' ca zu ru'a león. Caora na' lëbia guixi' snia gula nacaba' ca bëla, bë'ba' xlato bia guixi' bayatza gula ga cue'ba'. Lëscan' bë'ba' lëba' yela' r nabë' ta inabë'ba' lao yedyi layu.

<sup>3</sup> Na'ra tu guichoba' zun tu hue' ta gutin lëba', pero beyaca hue' na'. Quie lena' lega beban ja ben' nita' lao yedyi layu unaojë'ba'.

<sup>4</sup> Na'ra uyonla'adyi'jë' bia guixi' snia gula, como dan' bë'ba' bia guixi' bayatza gula yela' r nabë' quieba'. Lëscan' uyonla'adyi'jë' bia guixi' bayatza gula. Na' unajë' caniga:

—Ganura zu naca ca lëba'. Nunu sue tilalë lëba'.

<sup>5</sup> Na'ra bia guixi' snia gula bë'ba' bia guixi' bayatza gula lato ta hueba' ze cuimba' ta utasi nioba' Diuzi. Lëscan' bë'ba' lëba' lato ta inabë'ba' ca tu re'emba' inabë'ba' chopa galo chopu biu'.

<sup>6</sup> Na'ra tamalatzague bë' bia guixi' bayatza gula unëba' contra Diuzi. Lega ptasi bnioba' lëbë'. Lëscan' ptasi bnioba' ga zu Diuzi guibá. Lëscan' ptasi bnioba' ja ben' zulënë' na'.

<sup>7</sup> Caora na' lëbia guixi' snia gula bë'ba' bia guixi' bayatza gula lato ta tilalëba' ja ben' quie Diuzi hasta hueba' lëjë' gan.

<sup>8</sup> Na' yaca ben' nita' lao yedyi layu, yaca ben' bizu laojë' lë'ë lista ta bë' Diuzi tu binecuëchinë' yedyi layu, uyonla'adyi'jë' bia guixi' bayatza gula. Lëlista napa ben' naca ca quie beco' zi'ila', ben' guti dza na'. Rguixogue'n quie ben' de yela' naban quie tuzioli.

<sup>9</sup> Chi zu ja ben' ruzënaga, reya'ala' uzë'nagajë' dyë'ëdi ca rnia'.

<sup>10</sup> Chi nu ben' hue yaca ben' quie Diuzi preso, lëscan' huadyin dza gacarëjë' preso. Chi nu ben' guti ben' quie Diuzi conlë espada, lëscan' conlë espada gatirëjë'. Quie lena', reya'ala' sue ben' quie Diuzi sudyi'ilëjë' Diuzi dyë'ëdi.

<sup>11</sup> Na'ra ude na', blë'ëda' itu bia guixi' bayatza gula ta broba' lu'u yu. Dyia chopa luzuba' ca luzu beco' zi'ila', pero unëba' zidzo gula.

<sup>12</sup> Na'ra ca de yela' rnabë' quie bia guixi' bayatza gula, bia blë'ëda' tanëro, lëscan' derë yela' rnabë' quie bia guixi' bayatza gula, bia blë'ëda' taorupe. Pues con ca mandado re'en bia nëro hue bia urupe, cana' rucaziba'. Caora na' bë bia urupe mandado tzionla'adyi' yugulu ben' nita' lao yedyi layu bia nëro, bia beyaca hue' zu guichogue ta guti lëba'.

<sup>13</sup> Lëscan' bëba' yela' milagro quieba' hasta ruquinoba' gui' guibá rguinon lao yedyi layu ta il'ë'ë ja benë' len.

<sup>14</sup> Na'ra nun quie yela' milagro bë bia urupe zaquë'lao bia nëro, cana' uzi'ba' yë' ja ben' nita' lao yedyi layu. Cana' bëba' mandado hue ja benë' tu ta naca forma quie bia nëro, bia zu hue' ga uchugu espada guichoba', pero beyacaba' zuba'.

<sup>15</sup> Na'ra bia urupe bëba' yela' milagro quieba', bëba' mandado ta inë tu ta naca forma quie bia nëro ta huenan mandado gati ja ben' birionla'adyi' lënan.

<sup>16</sup> Lëscan' bëba' itu mandado ta uzu tu sello quieba' zaquë' na'a yebë ja benë', o zaquë' zgajë', la'acazi xcuidi', la'acazi ben' huaca, la'acazi ben' uña'a, la'acazi ben' yëchi', la'acazi ben' nada'o, la'acazi ben' libre.

<sup>17</sup> Lëscan', chi nu ja ben' bizu sello quieba', o chi bizu laoba', o chi bizu número quie laoba', na'ra bisaque' ga'ojë' bi cosa, bisaque' yeyuti'jë' bi cosa.

<sup>18</sup> Reya'ala' inezi nu ben' rioñe'e cabë' nan niga. Chi nacale ben' rioñe'e, ulelaba ca naca número quie lëbia guixi' bayatza gula. Lënumero na' nacan número quie tu be'mbyu. Cani naca número quieba': Xopa gayuhua tzona galo xopa naca número quieba'.

## 14

### *Rula tu gayuhua chopa galo tapa mila benë' tu canto cubi*

<sup>1</sup> Na'ra ude na', una'a blë'ëda' ben' naca ca quie beco' zi'ila'. Zënë' ga zu tu ya'a laona ya'a Sión. Zëlënë' tu gayuhua chopa galo tapa mila benë'. Blë'ëda' zga ja ben' na' zu lao ben' naca ca quie beco' zi'ila', lëscan' zu lao xuzinë'.

<sup>2</sup> Na'ra beda' ca tu rchi' yao ze gula uyëzin guibá. Naca rchi'n ca tu rchi' yesa cati rëpin ratzon fuerte gula. Lëscan' naca rchi'n ca rchi' zë ja ben' ruxidy ja arpa.

<sup>3</sup> Caora na' beda' rula ja ben' na' tu canto cubi. Zëjë' zaquë'lao lao xlato Diuzi ga zu yaca ben' naca ca forma bia guixi' len ja ben' gula. Ni tu ja ben' tula biraca gula ca tacubi rula ja ben' na'. Tuzi ja ben' naca tu gayuhua chopa galo tapa mila, ja ben' psela Diuzi de entre ja ben' nita' lao yedyi layu, tuzi lëjë' racajë' rulajë' tu tacubi.

<sup>4</sup> Ni tu lasa bigusilëjë' nigula binaca zgulajë'. Bibi xquia napajë'. Na'ra rnaojë' ben' naca ca quie beco' zi'ila' con gatezi zionë'. Psela Diuzi lëjë' de entre ja ben' nita' lao yedyi layu cuenda gacajë' ben' nëro, ben' naca gun quie Diuzi lënë' ben' naca ca quie beco' zi'ila'.

<sup>5</sup> Ni tu di'idza' huizi' yë' biunajë'. Ni tu xquia binapajë' zëjë' zaquë'lao lao xlato Diuzi.

### *Ni rnan quie di'idza' udixogue' tzona lao ángel ja benë'*

<sup>6</sup> Na'ra blë'ëda' itu ángel rzënë' ladza gatzo guibá. Rguixogue'në' ben' nita' lao yedyi layu xti'idza' Diuzi. Lëdi'idza' na' nacan tali tuzioli. Rguixogue'në' ben' quie yugulute nación, len ben' quie yugulute ren, len ben' quie yugulute cue' di'idza', len ben' quie yugulute yedyi.

<sup>7</sup> Caora na' una ángel na' zidzo gula unë' cani:

—Reya'ala' gapale Diuzi bala'ana huelenë' ben' ze, como dan' abdyin hora huenë' juicio. Reya'ala' tzionla'adyi'le Diuzi, ben' bë guibá, len yedyi layu, len nisadao', len ga rlë nisa.

<sup>8</sup> Na'ra una itu ángel unë' cani:

—Aoca quie Babilonia, aoca quie Babilonia, porque naca ciudad Babilonia ca quie tu nigula ru'e ben' nita' lao yedyi layu vino fa yo'ojë' izudyijë' hueljë' lëbë' tabayatza gula.

<sup>9</sup> Na'ra una ángel uyune. Unë' zidzo gula unë' caniga:

—Con nu ben' tzionla'adyi' lëbia guixi' bayatza gula, o chi tzionla'adyi'jë' tu ta naca ca forma quieba', chan' hue'jë' lato su marca quieba' lao žgajë', o chi lao na'ajë',

<sup>10</sup> caora na' hue Diuzi lëjë' tu castigo huala gula. Lega idza' Diuzi lëjë' biyeyëchi'la'adyi'në' lëjë'. Huayeyjë' conlë gui' len itu gui' ra'ala' laona azufre. Huayeyjë' zaca'lao lao ángel quie Diuzi len ben' naca ca quie beco' ži'ila'.

<sup>11</sup> Huayasa dzen ga tzejjë' tuzioli. Yugu dza, yugu yela, bide huezila'adyi' quie ben' uyonla'adyi' lëbia guixi' bayatza gula len ben' uyonla'adyi' tu ta naca ca forma quieba', ben' bë' lato uzu marca quieba' cabë' laoba'.

<sup>12</sup> Quie lena' nu ben' naca ben' quie Diuzi, ben' rue ca mandado ru-enë', ben' nao xneza Jesús du guicho du la'adyi', reya'ala' cuezajë' dyë'ëdi, reya'ala' gacajë' ben' de paciencia.

<sup>13</sup> Na'ra beda' tu rchi' benë' uyëzin guibá. Unë' në'ëdi' caniga:

—Bzu lë'ë guichi cabë' nia' caniga: “Huaca huen quie ben' baguti, ben' bë quie xti'idza' Diuzi. Desde na'a sulao huaca huen quiejë'.” Lëscan' una Bichi Be quie Diuzi cani: “Huaca huen quiejë'. Huezila'adyi'jë' abeyudyi cabë' dyin quie Diuzi bëjë'. Cabë' unaojë' quie Diuzi dza udajë' lao yedyi layu, lena' rulu'en nacajë' ben' quie Diuzi.”

### *Bezi' Diuzi cosecha quie yedyi layu*

<sup>14</sup> Na'ra una'a blë'ëda' tu beo bezëri. Lao beo na' ure' tu ben' naca bichi yugulu benëchi'. Zu tu corona de oro guichonë'. Zënë' tu espada leco ta neduchi'tzague.

<sup>15</sup> Na'ra bero itu ángel ga zu Diuzi guibá. Unënë' zidzo rulidzanë' ben' re' lao beo unë' caniga:

—Conlë espada leco quio' ichugulo' yeziu' cosecha, como dan' abdyin hora bara cosecha de lao yedyi layu.

<sup>16</sup> Na'ra conlë espada leco quie ben' re' lao beo, uchugunë' bezi'në' cosecha quienë' de lao yedyi layu.

<sup>17</sup> Na'ra bero itu ángel ga zu Diuzi guibá. Zërënë' itu espada leco ta neduchi'tzague.

<sup>18</sup> Na'ra bero itu ángel ga zu ru'aba quie Diuzi guibá, ben' rnabë' quie gui'. Unënë' zidzo gula blidzanë' ben' zë espada leco ta neduchi'tzague rëbinë' lëbë' cani:

—Ichugo' ziza bedzuli' de lao yedyi layu como aranan.

<sup>19</sup> Na'ra uchugo ángel na' ziza bedzuli' de lao yedyi layu. Uzi'në' cosecha ziza bedzuli' bdze'në'n lu'u pilo ta isinë' nisa quien. Cabë' guca quie ziza bedzuli', cana' hue Diuzi quie ja benë' dza huenë' juicio.

<sup>20</sup> Na'ra bzi ziza bedzuli' na' nisa quien ru'a yedyi na'. Caora na' bro ren zila gula ru'a pilo. Tanto bro ren ure'n tasibi ca tu sibi naca ru'a caballo. Cana' ure'n sibi tzona gayuhua kilómetro. Tu cana' ure'n yela' ze quien.

## 15

*Nu'a ja ángel zelao gadyi castigo*

<sup>1</sup> Na'ra blé'èda' itu seña taže guibá ta naca ta yebanero: Blé'èda' igadyi ángel nu'ajé' gadyi cue' castigo ta naca ga zelaozi gadyi castigo. Zelao na' iyudyi yela' rdza' quie Diuzi.

<sup>2</sup> Lëscan' blé'èda' tu ta naca ca nisadao', pero rna'n ca yaohuan ta yu'u gui'. Blé'èda' zè ja ben' lao nisadao' na', ja ben' uzue biuyonla'adyi'jè' lëbia guixi' bayatza gula. Lëscan' biuyonla'adyi'jè' tu ta naca ca forma quieba', bibëjè' lato sujè' número quieba' ta bigaca quieba' lëjè'. Napajè' arpa ta bè' Diuzi lëjè'.

<sup>3</sup> Na'ra rulajè' tu ta bila Moisés dza na'. Lëscan' rularëjè' tu ta rula ben' naca ca quie beco' zi'ila' na'. Lena' rnan cani:

Yugulu ta bëlo' nacan tahuen gula, nacan ta yebanendo', Señor.  
Diuzi quiendo' luè', naco' ben' de yugulute yela' huaca quie.  
Puro tali, puro ta naca dugalo naca quio'.

Luè' rnabè'lo' yugulu nación.

<sup>4</sup> Reya'ala' tzionla'adyi' yugulu ja benè' luè', Señor.

Reya'ala' hue yugulu ja benè' luè' ben' ze.

Tuzi luè' naco' ben' la'ia.

Huida yugulu ja ben' nita' lao yedyi layu ta tzionla'adyi'jè' luè', porque blë'ëjè' ruelo' puro ta naca tali.

<sup>5</sup> Ude beyudyi na', una'a blé'èda' neyalo idao' ga zu Diuzi guibá. Blé'èda' ru'aba ga nudze'jè' tabla yo ga zu di'idza' ley quie Diuzi.

<sup>6</sup> Lu'u idao' na' bro igadyi ángel. Nu'ajé' gadyi cue' castigo. Nacojè' la'ari' yèri gula ta raca titi'. Yu'u cinta de oro ru'achu'ujè'.

<sup>7</sup> Na'ra blé'èda' tu ben' naca forma ca bia guixi' bè'nè' gadyi ángel tu huio copa de oro ta yudzu castigo huala gula ta hue Diuzi, ben' zu tuzioli.

<sup>8</sup> Na'ra yela' huaca quie Diuzi bedza' dzen lu'u idao' quienè'. Na' nunu saque' tzu'u lu'u idao' na' tu bineyudyi hue Diuzi gadyi castigo ta nu'a gadyi ángel.

## 16

*Ni rnën quie gadyi copa yudzo castigo*

<sup>1</sup> Na'ra beda' rchi' tu benè' unènè' zidzo gula lu'u idao' na'. Unè' rëbinè' gadyi ángel cani:

—Uletzio uletzelato copa ta yudzo castigo huala gula quie Diuzi lao yedyi layu.

<sup>2</sup> Na'ra uyo ángel nëro yelatonè' copa quienè' lao yedyi layu. Caora na' yugulu ben' zu marca quie bia guixi' bayatza gula, ben' uyonla'adyi' tu ta naca forma quieba', ulè yëdzo' bërè' mala gula lëjè'. Lega castigo gula gucajè'.

<sup>3</sup> Na'ra uyo ángel urupe yelatonè' copa quienè' lao nisadao'. Caora na' beyaca nisadao' na' ca ren quie ben' huati, lëscan' guti yugute bia yu'u neban lu'unan.

<sup>4</sup> Na'ra uyo ángel uyune yelatonè' copa quienè' lu'u ja yao len ga rlë nisa lao yedyi layu. Caora na' beyaca nisa na' ca ren.

<sup>5</sup> Lëscan' beda' unè' itu ángel, ben' rnabè' nisa de lao yedyi layu unè' cani:

—Tahuen gula ruelo' rchugobè'lo' quie ja benè'. Luè' naco' Diuzi, ben' la'ia. Luè' naco' ben' azucagi desde timpote.

<sup>6</sup> Nacan ta yu'u ni'a xnezi babèlo' quiejè', como dan' bëtijè' blatojè' ren quie yaca ben' naca la'ia quio', blatojè' ren quie ben' udixogue' xti'idzo' dza

na'. Na'ra luë' bao' mandado yo'ojë' nisa ren na'a. Pues cana' reya'ala' gaca quiejë'.

<sup>7</sup> Lëscan' beda' unë itu ben' zu ru'aba unë' caniga:

—Xuzindo' Diuzi. Luë' naco' ben' de yugulute yela' huaca quie. Nacan ta yu'u ni'a nezi cabë' babëlo' baochugubë'lo' quiejë'.

<sup>8</sup> Na'ra uyo ángel udape yelatonë' copa quienë' lao obidza. Caora na' bë' Diuzi lëbë' fuerza ta uzeinë' yaca ben' nita' lao yedyi layu.

<sup>9</sup> Na'ra uyeitzaguejë', pero bibetza'jë' pensari quiejë', bibëjë' Diuzi ben' ze, den' ptasi bniolajë' Diuzi, ben' rue ca castigo raca quiejë'.

<sup>10</sup> Na'ra uyo ángel ga'yo' yelatonë' copa quienë' lao xlato bia guixi' bayatza gula. Caora na' bega'n chula lato ga rnabë'ba', lëscan' udi'in ja benë' ludyijë' tanto ulajë'.

<sup>11</sup> Pero bibetza'jë' pensari quiejë' ta bira huejë' cabë' naca tamala ruejë', den' ptasi bniolajë' Diuzi, ben' zu guibá, nun quie dan' lega ulajë' uzujë' yedzo' bërë'.

<sup>12</sup> Na'ra uyo ángel xopa yelatonë' copa quienë' lu'u yao ze laona Eufrates. Caora na' beyu'e nisa quie yao na', beyacan layu bidyi cuenda uyalo tu neza ga ude ja soldado quie rey, ben' za' zaca' rlë ubidza.

<sup>13</sup> Na'ra blë'ëda' bro tzona bichi be mala nacajan forma ca quië'dzo'. Brojaba' lu'ru'u' a bia guixi' snia gula, bia naca Satanás. Lëscan' brojaba' lu'ru'u' a bia guixi' bayatza gula. Lëscan' brojaba' lu'ru'u' a ben' rguixogue' di'idza' huezi' yë'.

<sup>14</sup> Na'ra lëja bichi be mala na', nacajan bichi be quie taxi'ihui'. Ruejan seña, ruejan yela' milagro. Na' riojan retupajan ja rey, ben' nita' lao yedyi layu, ta yedupajë' tu dza bzu Diuzi, dza belaotzegue, dza cati tilaljë' Diuzi, ben' de yugulute yela' huaca quie.

<sup>15</sup> Lu'la una Jesucristo: “Gapale cuidado, porque tu sasazi yeguida' ba'ala'cazi raquele biyeguida'. Huaca huen quie ben' zu rbeza në'ëdi' cati yeguida', porque ben' birbeza në'ëdi', naca quienë' ca quie ben' rasi, ben' biracabë' tu sasazi idyin ben' uban zan yu'u quienë'. Huele listo cuezale në'ëdi' dyë'ëdi cuenda bigaca yela' stu' quiele cati idyin hora yeguida'.” Cana' una Jesucristo.

<sup>16</sup> Caora na' betupa ja bichi be mala quie ja rey nita' lao yedyi layu tu lugar ga lao Armagedón di'idza' hebreo.

<sup>17</sup> Na'ra uyo ángel gadyi yelatonë' copa quienë' ladzazi. Caora na' desde lu'u idao' zu guibá ga zu xlato Diuzi, na'te bro tu rchi' bene' unanë' caniga: —Aoca.

<sup>18</sup> Caora na' uyëpi yesa, gotzo bdyito hueziu', lëscan' guca užu' fuerte gula. Na' lega psisin yedyi layu. Ni tu lasa binežu' fuerte gula cabë' užu' huala gula guca. Tu lala nita' ja benë' lao yedyi layu, binegacacazi cana'.

<sup>19</sup> Aodyiagui' lëyedyi belaotera, na' gucan tzona cue'. Aozuri' ja ciudad de lao yedyi layu. Caora na' beza'la'adyi' Diuzi quie ciudad Babilonia, ciudad belaotera. Bë' Diuzi castigo huala gula quie ben' ciudad Babilonia nun quie lega bdza'në' cabë' bë ja ben' ciudad na'.

<sup>20</sup> Lëscan' abeyula ga de yu bidyi lu'u nisadao', lëscan' abeyula yugulu ya'a.

<sup>21</sup> Gusi' yo hueziu' yela gula guibá. Gusi'n lao ja ben' nita' lao yedyi layu. Naca yela' zi'i quien chopa galo kilo tu tun. Pero ptasi niola ja benë' Diuzi nun quie dan' besi'në' yo hueziu' gucajë' tu castigo huala gula.



1 Caora na' bida tu ángel, ben' naca gadyi ben' yelato gadyi copa unanē nē'ēdi' caniga:

—Uda, ulu'ena' luē' cabē' castigo gaca quie nigula bayatza gula, nigula ruti' gusto quie, ben' re' lao nisadao'.

2 Na'ra ja rey na', ben' nita' lao yedyi layu, bēlējē' lēnigula na' tabayatza gula, ta bireya'ala' huelējē' lēbē'. Lēscan' ja ben' nita' lao yedyi layu, ahue'ejē' vino quienē' uzudyijē' bērējē' tabayatza gula ta bireya'ala' huelējē' lēbē'.

3 Na'ra dyin quie Bichi Be quie Diuzi guca quia' ca ben' uxusa blē'ēda' tu ángel uquiē'nē' nē'ēdi' tu lao lato ga bidyia yu'u. Na' blē'ēda' dyia tu nigula xcu'udzu tu bia guixi' nacaba' zna. Blē'ēda' dyia laoba' di'idza' ta rutasi runioba' lao Diuzi. Blē'ēda' zu gadyi guichoba', lēscan' dyia chi luzuba'.

4 Na'ra lēnigula na' naconē' tu vestido naca culuri tamorado len ta zna. Naca tza'onē' conlē oro, len yo tza'o, len perla. Lēscan' zēnē' tu copa de oro ta yudzu ta naca bayatza gula cabē' bēlēnē' ja be'mbyu.

5 Na'ra zga nigula na' zu letra rguixogue'n cabē' laohuē', pero negachi'zi naca laohuē'. Cani rnēn lē'ē zganē': “Nē'ēdi' laohua' Babilonia. Naca' zna' yugulu nigula bayatza, nigula ruti' gusto quie. Naca' zna' yugulu ta naca mala gula de lao yedyi layu.”

6 Na'ra blē'ēda' raza tondo guicho nigula na' ca raza tondo guicho ben' žudyi. Raza tondo guichonē' nun quie dula' quienē' ulato ren quie ja ben' quie Diuzi, len ja ben' uduxogue' xti'idza' Jesús. Pues dula' quienē' gutijē'. Caora blē'ēda' ca naca quienē', lega bebaneda'.

7 Na'ra unē ángel na' nē'ēdi' cani:

—¿Bixquien' lega rebanelo'? Na' uzioñe'eda' luē' cabē' naca ta negachi' quie nigula na', len quie bia guixi', bia dyia nigula na', bia zu gadyi guichogue, bia naca chi luzu.

8 Lēbia guixi' blē'ēlo', nacaba' bia uzu dza na'te, pero bira zuba' na'a, pero huaroba' lu'u pozo zitu' gula ga yu'uba'. Bē' yeyudyi na', te quieba' tuzioli. Huebane ja ben' nita' lao yedyi layu, ja ben' bizu laohue lu'u libro ta naca lista quie ben' de yela' neban quie tuzioli. Desde dza cati ure' dyilayu bizu laojē'lē'e lista. Huebanejē' cati llē'ējē' lēbia guixi', bia uzu dza na'te, pero bira zuba' na'a, pero huaroba' yezuba' tatula.

9 Ni rnia' tu di'idza' para nu ben' tzioñe'e len. Rnia' lēgadyi guicho bia guixi' rnērēn quie gadyi ya'a ga dyia nigula na'.

10 Lēscan' lēgadyi guichoba' rnērēn quie gadyi rey. Na'ra quie ga'yo' rey na' abeyudyi bedu quiejē'. Itunē' r nabē'nē' na'a. Itunē' nerdzioguera idyin dza inabē'nē'. Cati idyin dza inabē' zelao ben' gadyi, biinabē'nē' zi dza.

11 Na'ra lēbia guixi', bia uzu dza na'te, pero bira zuba' na'a, lēba' huaroba' gacaba' xuna rey. Entre laguedyi gadyi ben' rey, huaroba' gacaba' rey xuna, pero bē' yeyudyi na', te quieba' tuzioli.

12 Quie lao chi luzuba' ta blē'ēlo', lenan rnērēn quie chi rey, ben' bin sulao inabē'. Huacajē' rey, pero tu chi'zi inabē'jē' len lēbia guixi'.

13 Na'ra lao chi rey na' huazujē' de acuerdo ta hue'jē' lēbia guixi' na' yela' rnabē' quiejē' ta inabē'ba'.

14 Caora na' huadilalējē' ben' naca ca quie beco' zi'ila', pero hue ben' naca ca quie beco' zi'ila' gan. Huenē' gan como dan' naquē' xan' yugulu ben' rnabē', lēscan' naquē' xan' yugulu ben' naca rey. Uliō Diuzi pserenē' yaca ben' naca ben' quienē'. Nacajē' ben' bipsan unao xnezē'.

15 Lēscan' una ángel na' nē'ēdi' caniga:

—Nisadao' ta blë'ëlo' gan' dyia nigula bayatza gula, nigula ruti' gusto quie, lena' rguixogue'n quie ja ciudad, len quie ja benë', len quie ja di'idza' len quie ja nación.

<sup>16</sup> Na'ra quie chi luzu bia guixi' naca rey ta blë'ëlo', lëyaca rey na' udiejë' nigula bayatza gula, nigula ruti' gusto quie. Usanla'adyi'jë' lëbë'. Hualëchojë' zabanë' ta tanë' du ga'ala' guidinë'. Lëscan' gaojë' bë'ëla' zuba' quienë', na' uzejjë' cuerpo quienë'.

<sup>17</sup> Cabë' re'en Diuzi gaca, cana' udze'në' pensari lu'u guicho laxta'ojë' ta huejë' quienë' cabë' re'ennë', la'acazi biracabë'jë' chi Diuzi hue quiejë' cana'. Quie lena' huazujë' de acuerdo hue'jë' yela' rnabë' quiejë' lao na'a bia guixi' ta gacaba' rey inabë'ba' lëjë'. Cana' gaca quiejë' hasta izu di'idza' cabë' una Diuzi.

<sup>18</sup> Na'ra lë'nigula na' blë'ëlo', naquë' lëyedyi belaotera ga rnabë'jë' ja rey nita' lao yedyi layu.

## 18

### *Aoca quie ciudad Babilonia*

<sup>1</sup> Na'ra ude beyudyi na', blë'ëda' itu ángel, ben' detzague yela' rnabë' quie, uyëzinë' guibá. Na'ra tantozi naquë' raca titi', uyu'u xni' quienë' lao yedyi layu.

<sup>2</sup> Caora na' unë ángel na' zidzo unanë' caniga:

—Aoca quie Babilonia, aoca quie Babilonia. Naca Babilonia ciudad be-laotera, pero abeyacan ciudad ga rda ja taxi'ihui'. Abeyacan ca beló ga yu'u yugu cuë' bichi be mala. Abeyacan lidyí ja bia mala gula, bia rzë ladza, bia naca bayatza gula.

<sup>3</sup> Cana' guca quie Babilonia, como dan' naca ciudad Babilonia ca quie tu nigula mala, nigula ruti' gusto quie. Ahue'e ben' quie yugulu nación vino quienë'. Bëlëjë' lëbë' tabayatza, ta bireya'ala' huelëjë' nigula. Lëscan' ja rey nita' lao yedyi layu, bëlëjë' lëbë' tabayatza gula, ta bireya'ala' huelëjë' nigula. Lëscan' ja ben' yu'u huëti', ben' nita' lao yedyi layu, beyacajë' ben' uña'a gula nun quie dan' bërëjë' nigula na' tabayatza gula, ta bireya'ala' huelëjë' nigula.

<sup>4</sup> Na'ra beda' tu rchi' itu ben' zu guibá. Unanë' cani:

—Le'e ben' naca ben' quia'. Ulero ciudad na' tacuenda bihuerële cabë' dula' xquia ruejë', ta bigaca quiele cabë' castigo gacajë'.

<sup>5</sup> Tantozi baoye dula' xquia quiejë', una Diuzi abdyin dza huenë' lëjë' castigo.

<sup>6</sup> Abdyin dza gaca nigula na' castigo lëbi ca castigo bënë' ja ben' tula. Chopa tantola huele nigula na' castigo quie cabë' tamala bënë'. Hue'le nigula na' ta yo'onë' chopa tantola ta naca sla' cabë' ta bënë' hue'e ja ben' tula.

<sup>7</sup> Lëbizi ca bënë', bënë' cuinnë' ben' ze, lëbizi ca guquë' ben' uña'a nun quie bënë' tabayatza, cana' huele nigula na' castigo ta yedzagalaotzeguenë'. Cani rna nigula na' lu'u guicho laxta'onë': "Ni ri'a. Naca' ben' rnabë'. Binaca' nigula guti xquiuhue. Bisaca'yudyicaza'." Cana' rnanë'.

<sup>8</sup> Quie lena' tu sasazi gata' castigo quienë'. Tu sasazi gata' yela' guti quienë'. Tu sasazi gata' yela' rla quienë'. Tu sasazi gata' yela' rdue quienë'. Na' huayeinë' confë gui' como dan' naca Diuzi ben' de yela' huaca quie baochugulinë' quienë'.

<sup>9</sup> Huabedyi ja rey, ben' nita' lao yedyi layu, ben' bëlë lëbë' tabayatza. Huabedyiya'jë' cati ilë'ëjë' rasa dzen ga reinë'.

10 Na'ra yega'n ja rey na' zitu' nun quie rdzebijè' cabè' castigo raca nigula na' inajè' caniga:

—¡Ay! ¡Bayèchi' gula raca quie ben' ciudad Babilonia! Ciudad že, ciudad belaotera naca ciudad Babilonia, pero tu sasazi bla' castigo quiejè'.

11 Lèscan' huabedyi ja ben' yu'u huèti', ben' nita' lao yedyi layu. Huabedyijè' nun quie aodyiagui' lèciudad na'. Huabedyiya'jè' como dan' bira nita' nu ja ben' ga'o ta nu'ajè' ruti'jè'

12 ta nu'ajè' oro, ta nu'ajè' plata, ta nu'ajè' yo tza'o', ta nu'ajè' perla, ta nu'ajè' la'ari' fino gula taculuri morado len taculuri žna. Lèscan' bira nita' nu ja ben' ga'o ta nu'ajè' yugu cue' ja yaga rla' žixi žeo, ta nu'ajè' marfil, ta nu'ajè' yaga fino, ta nu'ajè' bronce, ta nu'ajè' guibá, ta nu'ajè' mármol.

13 Lèscan' bira nita' nu ja ben' ga'o ta nu'ajè' canela, ta nu'ajè' rchinlaza, ta nu'ajè' yalo, ta nu'ajè' aceite mirra len aceite tula ta rla' badan gula, ta nu'ajè' vino, ta nu'ajè' aceite olivo, ta nu'ajè' yezo fino, ta nu'ajè' trigo. Lèscan' nequiè'jè' bia ru'a yua', nequiè'jè' beco' ži'ila', nequiè'jè' caballo, nusa'jè' carreta, hasta nequiè'jè' benè' ta yeyuti'jè'.

14 Na'ra cani nina yaca ben' huèti' rëbijè' yaca ben' ciudad na':

—Bira de tažixi cabè' tažixi lega yaxele dza na'. Aode quie yela' uña'a quiele, aode quie tafino ta de quiele dza na'.

15 Na'ra ja ben' ruti'ja tana', ben' guca ben' uña'a nun quie bějè' huèti' ciudad na', bira tziojè' ga'ala' ga re' ciudad na'. Huega'njè' zitu' nun quie rdzebijè' quie castigo raca ja ben' ciudad na'. Huabedyijè' huaquejè' bayèchi'.

16 Cani inajè':

—¡Ay! ¡Bayèchi' gula raca quie ciudad na'! Guca ciudad na' ca quie tu nigula naco tu la'ari' fino de culuri morado len culuri žna. Guca ciudad na' ca quie tu nigula naca tza'o' con oro, len yo tza'o', len perlas.

17 Pero tu sasazi aoniti yela' uña'a quienè'.

Na'ra yugulu ben' naca xan' barco, len ben' naca pasajero quiejè', len ben' rue dyin quie barco, len ben' huèti', ben' rse'ela' ja yua' quie ta tzion yedyi tula, caora na' bira tziojè' ciudad na' huega'njè' zitu'.

18 Cati ilè'èjè' rasa dzen rei ciudad na', na'ra huabedyiya'jè' inajè' caniga:

—¡Bira de ciudad belaotera ca ciudad niga!

19 Na'ra udze'jè' yu guichojè', huabedyijè' gaquejè' bayèchi', cuedyiya'jè', inajè' caniga:

—¡Ay! Bayèchi' gula raca quie ciudad na'. Conlè yela' uña'a quie ciudad na' beyaca ben' naca xan' barco ben' uña'a. Pero na'a tu sasazi aode quie ciudad na'.

20 Pero le'e ben' zu guibá, len le'e ben' naca apóstol, len le'e ben' rguixogue' xti'idza' Diuzi, len le'e yugulu ben' naque quie Diuzi, reya'ala' yedaohuele cabè' guca quie ciudad na', como dan' castigo bè Diuzi ciudad na'. Cana' apquizu Diuzi lèjè' cabè' tamala bějè' quiele.

21 Na'ra blè'èda' ulisa tu ángel hua'ala' tu yo ta naca ca yo že cabè' ta rutujè' žuba'. Blè'èda' uru'unnè'n lu'u nisadao'. Na' unè' cani:

—Lèbizi cabè' guca quie yo že, cana' gaca quie ciudad Babilonia. Tu sasazi te quien, bira ilè'è yaca benè' len.

22 Bira uxidyi ja benè' arpa, bira ucuedyi ja benè' flauta, bira ucuedyi ja benè' trompeta, bira huejè' música lao calle ciudad na'. Nitu nitu ben' hue dyin, bira inita'jè' ciudad na'. Bira gutu molino yo,

23 bira useni' lámpara gui', bira gaca ru'be lani quie huetzagana' ciudad na'. Cana' gaca quie ciudad na' la'acazi ben' yu'u huèti' quie ciudad na', gucajè'

ben' belaora lao yaca ben' nita' lao yedyi layu, pero uzi'jè' ben' quie yugulu naciòn yè' conlè yela' brujo quiejè'.

<sup>24</sup>Na'ra lèciudad na' nacan ciudad ga bëtijè' blatojè' ren quie ben' uduxogue' xti'idza' Diuzi len yaca los demás ben' naque quienè'. Blatojè' ren quie yugulu ben' unao xneza Cristo.

## 19

<sup>1</sup>Na'ra ude beyudyi na' beda' rchi' ja ben' zè, ben' zu guibá, unèjè' zidzo gula caniga:

Naca Diuzi ben' ze.

Tuzi Diuzi quiero uselanè' ra'o.

Tuzi Diuzi quiero de yela' bala'ana quienè'.

Tuzi Diuzi quiero de yela' rnabè' quienè'.

<sup>2</sup>Cana' naca quienè', como dan' rchugulinè' ta yu'u ni'a xnezi, rchugulinè' ta naca tali.

Pues aochugulinè' quie nigula bayatza gula, nigula ruti' gusto quiè, nigula psèdi ja ben' nita' lao yedyi layu, na' bèjè' tabayatza gula cabè' psèdinè' lèjè'.

Bapquizu Diuzi lènigula na' cabè' bènè' bétinè' ja ben' quie Diuzi.

<sup>3</sup>Caora na' benajè' tatula:

—¡Naca Diuzi ben' ze! Tuzioli raca dzen ga rei nigula na'.

<sup>4</sup>Na'ra galobetapa ja ben' gula, len tapa ben' naca forma quie bia guixi', gutajè' uzu ru'ala layu uyonla'adyi'jè' Diuzi, ben' re' lao xlatogue. Na'ra unajè' cani:

—¡Cana' nacan! ¡Naca Diuzi ben' ze!

<sup>5</sup>Na'ra beda' itu rchi' benè', ben' zu cuèta xlato Diuzi, unènè' caniga:

Huele Diuzi ben' ze, yugulu le'e ben' rue ca mandado ruenè'.

Huele Diuzi ben' ze, yugulu le'e ben' rionla'adyi' lèbè', len le'e ben' cuidi', len le'e ben' huaca.

*Ni rnèn quie lani quie huetzagana' quie ben' naca ca quie beco' zi'ila'*

<sup>6</sup>Lèscan' beda' itu rchi' ja ben' zè. Unèyaquè' cabè' rnè ja yao ze, lèscan' cabè' rnè bdyito hueziu' fuerte. Unajè' caniga:

¡Naca Diuzi ben' ze!

Abdyin dza tuzi lèbè' rnabè'nè'.

Naca Diuzi quiero ben' de yugulute yela' rnabè' quie.

<sup>7</sup>Yedaohuetzeguero, suro gusto gula, hueronè' ben' ze, como dan' abdyin hora quie huetzagana' quie ben' naca ca quie beco' zi'ila'.

Azu nigula gaca žgulanè', rbezane' utzagana'lènè' lèbè'.

<sup>8</sup>Bè' Diuzi lèbè' la'ari' fino gula, la'ari' yèri gula, la'ari' raca titi' ta gaconè'.

Lèla'ari' fino gula rnèn quie ben' naque quie Diuzi nun quie bè quiejè' ca re'en Diuzi huejè'.

<sup>9</sup>Na'ra una ángel na' nè'èdi' caniga:

—Bzu di'idza' lè'è guichi cani: “Tahuen gula nacan quie ja ben' guida lani quie huetzagana' quie ben' naca ca quie beco' zi'ila'.”

Lèscan' unè' nè'èdi' cani:

—Cabè' di'idza' rnia' luè' nacan di'idza' quie Diuzi.

<sup>10</sup>Na'ra uditzoga' ziba' lao ángel na' ta tzionla'adya' lèbè', pero unè' nè'èdi' caniga:

—Bihuelo' cana'. Tuzi Diuzi reya'ala' tzionla'adyo'. Nacaria' ben' rue bi mandado hue Diuzi nè'èdi' cabè' ruelo' luè', len ja ben' bicho', ben' rguixogue' xti'idza' Jesús. Pues nu ben' rguixogue' xti'idza' Jesús, yu'ujè' Bichi Be ca Bichi Be uyu'u ja ben' uduxogue' xti'idza' Diuzi tiempote.

*Ni rnan quie tu ben' dyia caballo bezëri*

<sup>11</sup> Na'ra blë'ëda' uyalo guibá, blë'ëda' tu caballo bezëri dyia benë' lëba'. Na'ra ben' dyia lëba' laonë' cani: "Ben' ruzu di'idza', ben' rue puro tali." Cana' laonë', como dan' puro ca re'len Diuzi huenë', cana' ruenë'. Cana' rnabë'në' rdilalënë' ben' raca condra Diuzi.

<sup>12</sup> Lëben' dyia caballo bezëri, na' yu'u yulaohuë' ca gui'. Yu'u guichonë' coron zë. Zu letra lë'ë coron quienë' cabë' laohuë', pero tuzi lëbë' nezinë' cabë' laonë'.

<sup>13</sup> Na'ra naconë' tu la'ari' nela'o ren. Lëscan' laonë': "Xti'idza' Diuzi."

<sup>14</sup> Na'ra unao yugulu ben' zu guibá ben' na'. Lëscan' nacojë' la'ari' fino gula, la'ari' yëri bezëri. Lëscan' dyiajë' ja caballo bezëri.

<sup>15</sup> Bro tu espada neduchi' gula lu'u ru'a ben' na'. Conlë len rguinë' ja ben' quie ja nación nita' lao yedyi layu. Inabë'në' lëjë' zi'laza gula. Huachugulinë' quiejë' tali gula. Gaca quiejë' ca quie ziza bedzuli' ta blio ja benë' uzin. Yela' rdza' quie Diuzi, ben' de yugulute yela' huaca quie, huenë' lëjë' castigo huala gula.

<sup>16</sup> Na'ra blë'ëda' zu letra lë'ë zabanë' len sunnë' ga rguixogue'n bi laonë'. Cani laonë': "Ben' rnabë'ra ca ja rey, ben' rnabë'ra ca ja ben' rnabë'."

<sup>17</sup> Na'ra blë'ëda' tu ángel nulioguë' lao obidza uredyia'yënë' fuerte gula guzinë' yugulu bia rzë ladza. Unë' caniga:

—Uleda, idupale ta gaole rtze' quie Diuzi.

<sup>18</sup> Uleda ta gaole bë'ëla' žuba' quie ja rey, len quie ja xan' soldado, len quie ja ben' naca tzutzu huala, len quie ja caballo, len quie ja soldado dyia caballo, len quie ja ben' zë. Gaole bë'ëla' žuba' quiejë', la'acazi ben' libre, la'acazi ben' nada'o, la'acazi ben' yëchi', la'acazi ben' belao.

<sup>19</sup> Na'ra blë'ëda' lëbia guixi' bayatza gula, lëscan' blë'ëda' ja rey nita' lao yedyi layu len ja soldado quiejë'. Babedupajë' ta tilalëjë' ben' dyia caballo bezëri len ja ben' nao lëbë'.

<sup>20</sup> Na'ra ben' dyia caballo bezëri len ben' nao lëbë', bëjë' bia guixi' bayatza gula len ben' rguixogue' di'idza' huezi' yë' preso. Lëben' huezi' yë' naquë' ben' bë seña, bënë' yela' milagro uzi'në' yë' ja ben' bë lato uzu marca quie bia guixi' bayatza gula. Lëjë' uyonla'adyi'jë' tu ta naca ca forma quie bia guixi' bayatza gula. Na'ra ben' dyia caballo bezëri len ben' nao lëbë', uru'unjë' bia guixi' bayatza gula len ben' rguixogue' di'idza' huezi' yë' lu'u gui' že naca ca lagun ga yu'u tu ta lao azufre ta lega ra'ala' gui'. Du nebanjë' aoru'unjë' lëjë' lu'u gui' na'.

<sup>21</sup> Na'ra ben' dyia caballo bezëri bëtinë' ja ben' bega'n, ben' naca rey len soldado quiejë'. Conlë espada neduchi' bero ru'anë', conlë len bëtinë' lëjë'. Na'ra bla' ja bia rzë ladza udaojaba' bë'ëla' žuba' quiejë' belojoba'.

## 20

*Ni rnan quie tu mila iza*

<sup>1</sup> Ude beyudyi na' blë'ëda' uyëzi tu ángel guibá zënë' ži'guiba quie pozo zitu' gula, lëscan' zënë' tu caden reo.

<sup>2</sup> Na'ra bëxonë' lëbia snia gula, bia naca ca bëla, bia naca xan' taxi'ihui' lao Satanás. Pquio ángel na' lëbë' lao tu mila iza.

<sup>3</sup> Baoru'un ángel na' lëbë' lu'u pozo zitu' gula gan' psioguë' lëbë', lëscan' bzunë' tu sellu ru'a puerta quie pozo na' tacuenda bira si'në' ja ben' nita' lao yedyi layu yë' lao tu mila iza. Na'ra bë' aode lao tu mila iza, cana' yeguidë' itu chi'zi.

4 Caora na' blé'èda' re' yaca benè' lao xlatojè'. De yela' rna'bè' quiejè' ta huejè' justicia. Lèscan' blé'èda' ja bichi be quie ja ben' guti dza na'. Aochugu benè' luba'jè' dza na' nun quie dan' unaojè' xneza Jesús udixogue'jè' xti'idza' Diuzi. Biuyonla'adyi'jè' bia guixi' bayatza gula. Lèscan' biuyonla'adyi'jè' tu ta naca forma quieba'. Bibèjè' lato su marca quieba' z'gajè'. Lèscan' bibèjè' lato su marca quieba' lao na'ajè'. Blé'èda' beban ja ben' na' ta inabè'jè' tuze len Cristo lao tu mila iza.

5 Pero ja los demás ben' huati, bibebanjè' hasta aode lao tu mila iza.

6 Naca huen gula quie ben' beban tanëro. Nacajè' ben' la'iya quie Diuzi. Tuzioli bigata' castigo quiejè', den' huacajè' pxuzi quie Diuzi len Cristo. Inabè'jè' tuze len Cristo lao tu mila iza.

7 Bè' aode tu mila iza, na'ra bero Satanás lu'u ga yu'unè' neyeyonè'.

8 Huaronè' ta tzexi'nè' yè' ja ben' nita' lao yedyi layu. Huazi'nè' ben' quie nación Gog len ben' quie nación Magog yè'. Huatupanè' lèjè' ta huejè' dila. Tantozi naca soldado quiejè' ben' zè' gula, una'n ca quie yozo re' ru'a nisadao'.

9 Na'ra bedza'jè' lao yedyi layu, uyèchojè' ga negu'udi' ja ben' quie Diuzi, ta inaro uyèchojè' lèciudad nedyè'è Diuzi. Pero na'ra pchezi Diuzi gui' guibá ta bzeinan lèjè' beyudyi bedu.

10 Caora na' uru'un Diuzi xan' taxi'ihui', ben' uzi' yè', lu'u gui' ze naca ca lagun ga yu'u azufre ta lega ra'ala' gui'. Ga uru'un Diuzi lèbia bayatza gula, len lèben' udixogue' di'idza' huizi' yè', lègan' na' uru'un Diuzi xan' taxi'ihui'. Lègan' na' ilatzeguejè' du dza, du yela, tuzioli.

### *Ga rue Diuzi juicio quie ben' mala*

11 Na'ra blé'èda' xlatu Diuzi ta naca bezèri. Blé'èda' nu ben' re' laona. Nun quie re' ben' na' xlatoguè', aode quie ladza, aode quie dyilayu duzeten. Ni ilè'èti'n bira bega'n.

12 Na'ra blé'èda' ja ben' huati, ben' huaca len ja xcuidi', zèjè' zaquè'lao lao Diuzi. Na'ra usalojè' ja libro len itu libro ga yu'u lista quie ben' de yela' neban quie tuzioli. Caora na' uchuguli Diuzi quie ja ben' huati cabè' bèjè' según ca rnèn lè'è ja libro na'.

13 Na'ra blé'èda' abedupa ben' zè, ben' huati. Abedupa ben' guti lu'u nisadao' len ben' guti con gati'tezi gan' zujè' rbezajè'. Uchuguli Diuzi quiejè' cabè' bèjè'.

14 Caora na' aode quie yela' guti, aode quie gui' gabila. Beyudyi bedu quien yu'un lu'u gui' naca ca lagun. Na'ra quie nu ben' tzu'u lu'u gui' ze naca ca lagun, biyeyudyi yedu gaca castigo quiejè' tuzioli.

15 Uyu'u lu'u gui' naca ca lagun nu ben' bizu laoje lu'u libro ga yu'u lista quie ben' de yela' neban quie tuzioli.

## 21

### *Bade tu guibá cubi len tu dyilayu cubi*

1 Na'ra ude beyudyi na', blé'èda' bazè tu guibá cubi len tu dyilayu cubi. Abeyula guibá gula len dyilayu gula. Lèscan' bira de nisadao'.

2 Nè'èdi', Juan, blé'èda' bayèzi tu ciudad la'iya, tu ciudad Jerusalén cubi. Bayèzin guibá ga zu Diuzi. Banaca ciudad na' dya'a gula cabè' dya'a gula naca la'ari' naco nigula caora idyin be'mbyu ta utzägana'lè'nè' lèbè'.

3 Na'ra beda' rchi' benè' guibá, rnènè' zidzo gula cani:

—Una'cara, bazu Diuzi ga nita' ja benè'. Huazunè' len lèjè' tuze. Huacajè' ben' quienè'. Cuin Diuzi huazunè' len lèjè' ta nacanè' Diuzi quiejè'.

<sup>4</sup> Bihue Diuzi lato gaca tamala quiejè'. Bira gatiyè', bira cuedyiyè', bira gaca bayèchi' quiejè', bira ilajè', como dan' aode quie yugulu tagula, babeyulan.

<sup>5</sup> Na'ra una Diuzi, ben' re' lao xlatogue, unènè' cani:

—Una'cara, tacubi reyua' yugulu ta de.

Lëscan' unè' cani:

—Bzu di'idza' lè'è guichi cabè' rnia', como dan' cabè' rnia' nacan ta sudyi'ilèlo'.

<sup>6</sup> Ude beyudyi na' unè' nè'èdi' cani:

—Babia' cabè' unia' hua'. Lao na'a uzulaohua' ulècha' yedyi layu. Lëscan' lao na'a yeyudyi yedu quie yedyi layu. Naca' ca quie letra A len letra Z quie abecedario. Con nu ben' rbili nisa, nè'èdi' hua'jè' nisa yo'ojè', bibi si'a quien. Nisa zila rlè ta hua'jè' yo'ojè'. Nu ben' yo'o nisa hua'jè', nebanjè' tuzioli.

<sup>7</sup> Lëscan' nu yaca ben' sue biusanla'adyi' xneza', gaca quiejè' tadya'a gula cabè' unia' gaca quiejè'. Huaca' Diuzi quiejè', na' huacajè' zi'ina'.

<sup>8</sup> Pero cabè' gaca quie ben' rdzebi inao xneza', ben' bibè quie xti'idza', len ben' bè tabayatza, len ben' bëti benè', len ben' udalè ja nigula binaca zgule, len ben' bë yela' brujo, len ben' uyonla'adyi' ja ídolo, len yugulu ja ben' huezi' yè', lèjè' naca quiejè' tziojè' lu'u gui' naca ca lagun ga yu'u tu ta lao azufre ta lega ra'ala' gui'. Cana' gata' castigo quiejè' tuzioli.

### *Huayèzi tu ciudad Jerusalén cubi guibá*

<sup>9</sup> Na'ra bida tu ángel, ben' nacaja gadyi, ben' zè ja gadyi copa ta yudzo zelao gadyi castigo bè Diuzi dza na'. Na'ra unanè' nè'èdi' cani:

—Udacara, ulu'ena' luè' cabè' naca nigula, ben' utzagana'lè ben' naca ca quie beco' zi'ila'.

<sup>10</sup> Na'ra dyin quie Bichi Be quie Diuzi, guca quia' ca quie ben' uxusa. Blè'èda' tu ángel uquiè'nè' nè'èdi' tu lao ya'a ze naca sibi gula. Na' blu'enè' nè'èdi' lèciudad ze, ciudad naca la'iya, ciudad Jerusalén ta za' guibá ga zu Diuzi.

<sup>11</sup> Na' raca titi'n ca raca titi' ga zu Diuzi. Raca titi'n ca raca titi' yo tzao' gula, ca raca titi' yo jaspe rna'n ca yaohuan.

<sup>12</sup> Ru'a lao ciudad na' zu tu besu ze gula nacan tasibi ta dyian chipchopa puerta. Na'ra zu tu huio ángel ru'a ja puerta na'. Lëscan' lè'è ja puerta na' zu letra cabè' lao tu huio ja ben' Israel quie chipchopa familiajè'.

<sup>13</sup> Zu tzona puerta zaquè' ga rlè obidza. Lëscan' zu tzona puerta zaquè' norte, lëscan' zu itzonan zaquè' sur, lëscan' zu itzonan zaquè' ga reyen obidza.

<sup>14</sup> Na'ra uzulao besu quie ciudad na' lao chipchopa yo nacan laga'. Lëscan' lè'è yo na' zu tu huio lao ja apóstol quie lao chipchopajè', ben' naque quie ben' naca ca quie beco' zi'ila'.

<sup>15</sup> Na'ra léángel na', ben' bè'lènè' nè'èdi' di'idza', zènè' tu ta naca ca huenixi' de oro ta urixinè' ciudad na', len ja puerta quien, len ja besu quien.

<sup>16</sup> Blè'èda' lèciudad na' nacan cuadrado. Nacan yela' tona quien lèbizi len yela' laga' quien. Caora na' bixi ángel na' ciudad na' blè'èda' nacan tu gayuhua legua. Tu lèbizi nacan yela' tona quien len yela' sibi quien len yela' laga' quien.

<sup>17</sup> Lëscan' bixi ángel na' besu quien blè'èda' tu gayuhua chopo galo tapa zicho yela' laga' quien, según ca rurixi ja benè' como dan' cana' bixi ángel na' len.

<sup>18</sup> Blè'èda' naca besu quien de yo jaspe. Lëscan' lèciudad na' nacan puro de oro rna'n ca yaohuan yèri gula.

19 Lë'è yo naca laga' ga uzulao besu na', yu'un yugu cue' yo tzao'. Na' yo laga' nëro, yu'un yo jaspe. Na' yo laga' urupe, yu'un yo safiro. Na' yo laga' uyune, yu'un yo ágata. Na' yo laga' udape, yu'un yo esmeralda.

20 Na' yo laga' ga'yo', yu'un yo ónice. Na' yo laga' xopa, yu'un yo cornalina. Na' yo laga' gadyi, yu'un yo crisólito. Na' yo laga' xuna, yu'un yo berilo. Na' yo laga' ga, yu'un yo topacio. Na' yo laga' chi, yu'un yo crisoprasa. Na' yo laga' chiptu, yu'un yo jacinto. Na' yo laga' chipchopa, yu'un yo amatista.

21 Na'ra quie chipchopa puerta na' nacajan de tu huio perla quie quien. Lëscan' naca calle belao quie ciudad na' de oro puro. Rna'n ca yaohuan yëri gula.

22 Biblë'ëda' nitu idao' bizu lao ciudad na' como dan' cuin Diuzi, ben' de yugulute yela' huaca quie, zunë' lao ciudad na' len ben' naca ca quie beco' zi'ila'.

23 Lëscan' birnaban tzu'un xni' obidza ni xni' biu' ciudad na', como dan' cuin Diuzi len ben' naca ca quie beco' zi'ila' rseni'jë' nacajë' gui' quien.

24 Nun quie xni' quie ciudad na', hualë'ë ja ben' quie ja nación ta tajë' neza quiejë'. Huida ja rey lao ciudad na' ta gapala'një' Diuzi.

25 Na'ra bireyeyo ja puerta quie ciudad na' te dza. Bira rala lao ciudad na'.

26 Lëscan' huida ja benë' quie quie nación lao ciudad na' ta huejë' Diuzi ben' ze gapala'një' lëbë'.

27 Pero yaca ben' mala, len yaca ben' bayatza, len yaca ben' huezi' yë', bisaque' tzu'ujë' lao ciudad na'. Tuzi ben' zu laohue lë'ë lista zu lu'u libro napa ben' naca ca quie beco' zi'ila', tuzi lëjë' huazaque' tzu'ujë' lao ciudad na'. Lëlibro na' nacan ga yu'u lao ja ben' de yela' neban quie tuzioli.

## 22

1 Na'ra blu'e ángel na' në'ëdi' tu yao nacan nisa dya'a gula raca titi'n ca yaohuan yëri gula. Lënisa na' ru'en yela' neban. Na'ra rero nisa na' ga re' xlato Diuzi len ga re' xlato ben' naca ca quie beco' zi'ila'.

2 Lëscan' lao tao' calle belao quie ciudad na', de tu yao yëri gula. Itzala' huio yao na', zu ja yaga ru'e yela' neban. Rbia ja yaga na' tazixi quien chipchopa lasa tu iza, ta inaro, tu lasa tu biu'. Lëxla'aga' ja yaga na' nacan remedio ta iyaca ja ben' quie ja nación.

3 Na'ra bira nudze'de' Diuzi nitu ben' zu lao ciudad na'. Lëscan' huazu xlato Diuzi len ben' naca ca quie beco' zi'ila' lao yedyi na'. Huayonla'adyi' yaca ben' quienë' lëbë'.

4 Hualë'ëjë' ru'alao Diuzi. Badyia letra žgajë' cabë' lao Diuzi.

5 Na'ra bira rala lao ciudad na'. Lëscan' yaca ben' zu lao ciudad na', bira inaban useni' gui' ta ilë'ëjë', bira inaban useni' ubidza gan' zujë', como dan' cuin Diuzi useni'në' gui' quiejë' ta ilë'ëjë'. Caora na' inabë'jë' tuzioli.

### *Baruen bago dza yeguida Cristo*

6 Na'ra una ángel në'ëdi' cani:

—Nacan di'idza' li ta babelo'. Nacan ta sudyi'ilëlo'n. Caora na' use'ela' Diuzi tu ángel quienë' ta ulu'enë' ja ben' quienë' cabë' ta baza' gaca. Naca Diuzi ben' rudze' Bichi Be quienë' lu'u guicho laxta'o ja ben' rguixogue' xti'idzë' ta gacalënë' lëjë' cabë' inajë'.

7 Na'ra tanun quie Cristo una ángel cani:

—Baruen bago dza yeguida'.

¡Huaca huen quie ja ben' ruzënaga cabë' di'idza' rguixogue' libro ni!



<sup>8</sup> Nē'ēdi', Juan, beda' blē'ēda' cabē' blu'e ángel na' nē'ēdi'. Caora cati beyudyi beda' blē'ēda' cana', caora na' uditzoga' žiba' lao ángel na', ben' blu'e nē'ēdi' cana', ta tzionla'adya' lēbē'.

<sup>9</sup> Caora na' unē' nē'ēdi' cani:

—Bihuelo' cana'. Nacaria' ben' rue mandado quie Diuzi cabē' luē', cabē' ben' bicho', ben' rguixogue' xti'idza' Diuzi, len yugulu ben' ruzēnaga cabē' di'idza' zu lē'ē libro niga. Tuzi Diuzi reya'ala' tzionla'adyo'.

<sup>10</sup> Lēscan' unē' nē'ēdi' caniga:

—Biucacho' con cabē' rna di'idza' zu lē'ē libro niga, como dan' baruen bago dza su di'idza' gaca con cabē' rnan lē'ē libro ni.

<sup>11</sup> Psañ quie ben' mala. Huegarajē' seguir huejē' cabē' tamala quiejē' ruejē'. Psañ quie ben' rue tabayatza. Huegarajē' seguir huejē' cabē' tabayatza quiejē' ruejē'. Pero ben' rue tahuen, huegarajē' seguir huejē' tahuen. Lēscan' ben' naca la'ia, ben' quie Diuzi, huegarajē' seguir gaca la'iyarajē'.

Na'ra tatula una ángel tanun quie Cristo, unē' cani:

<sup>12</sup> —Tali na' baruen bago dza yeguida'. Huaguizuga' ja benē' cabē' naca ta bējē'.

<sup>13</sup> Naca' ben' zu tuzioli. Lao na'a uzulaohua' ulēcha' yedyi layu. Lēscan' lao na'a yeyudyi yedu quie yedyi layu. Naca' ca quie letra A len letra Z quie abecedario.

<sup>14</sup> Huaca huen quie ben' rguibi žabe cuenda gata' derecho quiejē' ta gaojē' tazixi rbia yaga ru'e yela' neban. Cana' huazaque' tzu'ujē' lu'u ru'a puerta quie ciudad na'.

<sup>15</sup> Pero bisaque' tzu'u ja ben' birue quie Diuzi, bisaque' tzu'u ja ben' rue yela' brujo, bisaque' tzu'u ja ben' rdalē ja nigula binaca žgule, bisaque' tzu'u ja ben' ruti benē', bisaque' tzu'u ja ben' rionla'adyi ja ídolo, bisaque' tzu'u ja ben' raxe rue huezi' yē'.

<sup>16</sup> —Nē'ēdi', Jesús, aose'ela' ángel quia' ta quixogue'nē' yugulu cabē' unia' niga lao ja ben' nao xneza'. Naca' ži'isuba rey David. Naca' ca bélo raca titi' quie bala.

<sup>17</sup> Na'ra cani una Bichi Be quie Diuzi len nigula utzagana'lē ben' naca ca quie beco' ži'ila':

—Rbezando' yeguido', Señor Jesús.

Lēscana' cani una nu ben' ruzēnaga cabē' di'idza' zu lē'ē guichi ni:

—Rbezando' yeguido', Señor Jesús.

Lēscan' huen guida nu ben' rbili nisa, nu ben' re'en guida yo'o nisa ta ru'e yela' neban. Biquizuga'jē' ta yo'ojē'n.

<sup>18</sup> Na'ra inia' le'e, ben' ruzēnaga cabē' di'idza' zu lē'ē libro ni: Chi utza' benē' di'idza' ni, huejē'n di'idza' falso, hue Diuzi lējē' ja castigo cabē' rguixogue'n lē'ē libro niga.

<sup>19</sup> Lēscan' chi uzēchi'jē' con cabē' rna di'idza' zu lē'ē libro niga, bihue' Diuzi lato si'jē' parte quiejē' quie yaga ru'e yela' neban. Lēscan' bihue'nē' lato tzu'ujē' lu'u ciudad naca la'ia cabē' rguixogue'n lē'ē libro niga.

<sup>20</sup> Na'ra Jesús, ben' naca testigo quie di'idza' zu lē'ē libro niga, unanē' cani:

—Baruen bago dza yeguida'.

Na'ra nē'ēdi', Juan, rnia' cani:

—Gaca cana'. ¡Rbezando' yeguido', Señor Jesús!

<sup>21</sup> Rulidza' Señor quiero Jesucristo ta huela'iyané' le'e yugulule. Amén.